

仿
古
字
版

陸
放
翁
全
集

379586

世
行
發

00836

上海图书馆藏书



A541 212 0023 1797B

☆ 國 書 雜 誌 ☆

上海市捲菸工業行業公會

★ 請 勿 攜 出 ★



卷二十一

夜歸樽街巷書事

近坊燈火如晝明。十里東風吹市聲。遠坊寂寂門盡閉。只有煙月無人行。誰家小樓歌惱僕。餘響縹緲縈簾櫳。苦心自古乏真賞。此恨略與吾曹同。歸來空齋臥淒冷。燈前病骨巉巉影。獨吟古調遣誰聽。聊與梅花分夜永。

馬上作

三十年前客帝城。城南結騎盡豪英。湖山冷落悲陳迹。文字流傳付後生。衰老更禁新臥病。塵埃時拂舊題名。馬頭風捲飛花過。又得殘春一日晴。

行在春晚有懷故隱

老辱明時乞一官。逢春惆悵獨無歡。舊人零落北音少。市肆蕭疎民力殫。歸計已栽千箇竹。殘年合挂兩梁冠。石帆山路頻回首。箭茁蕓絲正滿槃。

儀曹直廬

春晚氣始和。微雲淡朝陽。開軒面小庭。露漬薔薇香。遊絲卷欲盡。忽復百尺長。而我正遺事。枕藉書一牀。鷓波雖稽天。未遽妨人狂。惟當傾綠酒。莫待熟黃梁。

讀書

兩兩星躔九九車。天津笑我醉騎驢。床頭正可著周易。架上何妨抽漢書。幸有古人同臭味。不嫌兒子似迂疎。頽然白髮雖堪鄙。耐事禁愁卻有餘。

小昭慶院講僧舊在都下與之相從今沒已久見畫像於院中作詩弔之

曩歲曾陪夜講燈。伏犀插腦齒如冰。假令重見應難識。遺像癯然一老僧。

晨入省中偶書

清風拂畫簾。初日照素壁。花枝蝶小憩。草葉露時滴。房櫳闕無人。澗水聲激激。摩挲語枯節。伴我住幽寂。

春晚

今年病過春，得健春欲盡。更堪風雨橫，紅溼樓綠潤。一笑本自難，造物復爾吝。榆莢堆平堦，柳絮飛作陣。塵埃生破榼，霜雪滿衰鬢。平生慕陶謝，著語終不近。

觀潮送劉監至江上作

江平無風面如鏡，日午樓船帆影正。忽看千尺涌濤頭，頗動老子乘桴興。濤頭洶洶雷山傾，江流卻作鏡面平。向來壯觀雖一快，不如帆映青山行。嗟余往來不知數，慣見買符官發渡。雲根小築幸可歸，勿爲浮名老行路。

新晴馬上

一劍飄然萬里身，白頭也復走京塵。畫樓酒飾滴殘雨，綠樹鶯聲催暮春。絕塞勒回勳業夢，流年換盡市朝人。此生安得常強健，小艇湘湖自采蓴。湘湖在蕭山縣。

過六和塔前江亭小憩

斷岸孤亭日暮時，欄邊聊試葛巾欹。偶觀挂席乘潮快，便覺懸車納祿遲。痛飲相如無奈渴，清言叔寶不勝羸。年來親友凋零盡，惟有江山是舊知。

春夕睡覺

破衫羸馬老黃塵，人自衰遲歲自新。積雨恐侵春甲子，昏燈嬾守夜庚申。花枝影轉欹殘月，鼻鼾聲豪撼四鄰。自笑功名猶有夢，散關金鼓震函秦。

送霍監丞出守盱眙

淮浦鱗鱗浸碧天，卽今誰料作窮邊。空聞甌脫嘶胡馬，不見浮屠插爨煙。亭障久安無檄到，盃觴頻舉有詩傳。長城萬里英雄事，應笑窮儒飽晝眠。

寄題徐載叔秀才東莊東莊乃藪書之所

次公醒狂何必酒，直諒多聞俱可友。萬籤插架號東莊，多稼連雲亦何有。今年偶入長安城，不識貴人呼作卿。南臺中丞埽榻見，北門學士倒屣迎。耶官酸寒誰肯顧，君來下馬談至莫。東莊雖富未可矜，更要縱橫開武庫。

入省

點點輕花墮綠盃。翩翩羸馬犯黃埃。眼邊好句等閑過。夢裏故人時一來。玉塞請行狂故在。霜髭自照老相催。今朝涼冷文書少。隱几南窗聽轉雷。

出省

五更東帶聽朝雞。出省還家日已西。酒市雨餘青旆重。河橋風爽紫羅嘶。久慙旅飯糜倉粟。常憶新橙搗膾齏。萬事似棋聊爾耳。年來著數不勝低。

和周元吉右司過弊居追懷南鄭相從之作

梁益東西六十州。大行臺出北防秋。閱兵金鼓震河渭。縱臘狐兔平山丘。露布捷書天上去。軍諮祭酒幄中謀。豈知今日詩來處。日落風生蘆荻洲。

允延之侍郎屢求作遂初堂詩詩未成延之去國因以奉送

印何纍纍綬若若。只堪人看公何樂。忽然振袖開布颿。慰滿平生一丘壑。遂初築堂今幾時。年年說歸真得歸。異書名刻堆滿屋。欠伸欲起遭書圍。捨之出遊公豈誤。綠髮朱顏已非故。請將勲業付諸郎。身踐當年遂初賦。

送張野夫寺丞牧滁州

皇天方憂九州裂。建隆真人仗黃鉞。陣雲冷壓清流關。賊壘啞嚶氣如髮。逋誅猾虜入檻車。北風吹乾草頭血。一龍上天三百年。舊事空聞遺老說。金印斗大誰作州。公子玉面蒼髯虬。賦詩健筆挾風雨。論兵辯舌森戈矛。別君帳飲灞橋頭。長歌爲君寬旅愁。戰場遺迹儻可畫。尺素寄我關河秋。

史院書事是日丞相過局

信史新修稿滿床。牙籤黃肥帶芸香。中人馳賜初宣旨。丞相傳呼早出堂。皇祖聖謨高萬古。諸賢直筆擅三長。孤臣曾趣龍墀對。白首爲郎只自傷。紹興辛巳。嘗蒙恩賜對。今三十九年矣。

病中數辱會無逸架閣見問今日忽聞徙居走筆奉簡因致卜鄰之約

病羸不辨攬衣迎。剝啄空慙扣戶聲。凡藥豈能驅二豎。清心幸足制三彭。巷南僦屋儻可問。歲晚囊衣吾亦行。不

爲朝天愁路澀。夜窗燈火要尋盟。

喜楊廷秀秘監再入館

公去蓬山輕。公歸蓬山重。錦囊三千篇。字字律呂中。文章寶公器。當與天下共。吾嘗評其妙。如龍馬受鞅。燕許亦有名。此事恐未夢。嗚呼大廈傾。孰可任梁棟。願公力起之。千載傳正統。時時醉黃封。高詠追屈宋。我如老蒼鶻。寂寞愁獨弄。杖屨勤來遊。雪鬢梅欲動。

次韻和楊伯子主簿見贈

齋戒叩頭賤天公。幸矣使我爲枯蓬。枯蓬於世百無用。始得曠快乘秋風。此生安往失貧賤。白髮蕭蕭對黃卷。今人雖鄰有不覲。古人卻向書中見。緩啼月落青山空。舊隱夢寂思東蒙。不願峨冠赤墀下。且可短劍紅塵中。終年無人問良苦。眼望青天惟自許。可憐對酒不敢豪。它日空澆墳上土。文章最忌百家衣。火龍黼黻世不知。誰能養氣塞天地。吐出自足成虹蜺。渡江諸賢骨已朽。老夫亦將正丘首。杜郎苦瘦帽撇耳。程子久貧衣露肘。君復作意尋齊盟。豈知衰懦畏後生。大篇一讀我起立。喜君得法從家庭。鯤鵬自有天池著。誰謂太狂須束縛。大機大用君已傳。那遣老夫安注脚。杜與伯高。程有徵文若。皆近以詩文得名於諸公。而尤與予善。

簡何同叔

白髮都門客。青燈夜雪時。盡捐塵世事。細看月湖詩。格律冰霜敵。襟懷猿鶴知。吾儕端後死。此事要深期。

去國待潮江亭太常徐簿宋卿載酒來別

昨解魚符已徑歸。偶隨尺一起柴扉。暫留已媿黔吾突。久住空令緇客衣。外物紛紛何足問。故人眷眷莫相違。從今再見應無日。長與沙鷗共釣磯。

醉中作行草數紙

還家痛飲洗塵土。醉帖淋漓寄豪舉。石池墨瀋如海寬。玄雲下垂黑蛟舞。太陰鬼神挾風雨。夜半馬陵飛萬弩。堂堂筆陣從天下。氣壓唐人折釵股。丈夫本意陋千古。殘虜何足膏磔斧。驛書馳報兒單于。直知毛錐驚殺汝。

雪夜小酌

黃昏雲齊雪意熟。二更雪急聲簌簌。地爐對火得奇溫。兔醢魚鱸窮旨蓄。引盃且作稿面紅。脫帽不管衰鬢禿。浩歌三終徐自和。藏書萬卷方盡讀。從來本不擇死生。況復區區論禍福。雪晴著屐可登山。與子一放千里目。

卽事

塹壁編茅養病翁。五更擁褐聽霜風。老雞棲冷啼偏早。宿火灰深撥更紅。知我向來惟斷簡。會心終竟在孤篷。東歸已賣腰間劍。魯叟從今不諱窮。

到家旬餘意味甚適戲書

天恐紅塵著脚深。不教經歲去山林。欲酬清淨三生願。先洗功名萬里心。石鼎颺颺閑菴茗。玉徽零落自修琴。晚來剩有華胥興。臥看西窗一炷沉。

雨後復小雪

雨雪來無已。冬春忽欲交。賤貧安淡薄。老鈍耐譏嘲。村酒兒能取。農書手自鈔。暮年真箇嬾。屋漏旋添茆。

鯉魚行

鯉魚財三尺。淺水不覆脊。雖懷江湖樂。已歎刀几赤。長鯨之長幾千丈。雪蹴山傾萬重浪。縱遊不厭滄海寬。一躍已在青天上。身世局促古所哀。險噉貪餌胡爲哉。人間溝瀆莫更顧。夜半變化乘風雷。

雪夜作

雪重從壓竹。竹折有奇聲。雪深亦莫埽。小窗終夜明。我老尙耐冷。開卷對短檠。龍茶與羔酒。得失不足評。但思被重鎧。夜入蔡州城。君勿輕羶儒。有志事竟成。

晨起

倦枕廉纖雨。幽窗料峭寒。溪柴旋篝火。野靛鬪登槃。年老衣冠古。身閑宇宙寬。兒孫生我笑。趨揖已儒酸。鄉市小把柴。謂之溪柴。蓋自若耶來也。

野饋

經年倉粟厭陳陳。天遣香杭饋野人。黃耳輩生齋鉢富。白頭非出客盤新。此生不復營三釜。一飽何曾羨八珍。尙

媿古來高士在。盃羹無糝甑生塵。

醉中浩歌罷戲書

造物小兒如我何。還家依舊一漁蓑。穿雲逸響蘇門嘯。卷地悲風易水歌。老眼閱人真爛熟。壯心得酒旋消磨。傍觀虛作窮愁想。點檢霜髯卻未多。

朝雨

甲夜星照泥。平旦雲行西。小屋古澤中。天昏雨淒淒。避溼升我堂。垂翅閱老雞。所欣園中蔬。冒土青滿畦。門無今雨客。路滑愁長堤。一盃且復睡。物理何足齊。

春雨

苦雨何時止。微雲又作陰。傍簷時小立。隱几復微吟。枝重殘紅溼。隄平漲綠深。物華元自好。老病負登臨。

又

春愁無處避。春雨幾時晴。黯黯陰連月。蕭蕭滴到明。窗昏減書課。弦緩咽琴聲。何以娛幽獨。新醅手自傾。

記夢

夢裏都忘兩鬢殘。恍然白紵入長安。碰教紙熟修溫卷。做得驢騎候熱官。紅葉滿街秋著句。青樓燒燭夜追歡。如今萬事消除盡。老眼摩挲靜處看。

野興

紅飯青蔬笑莫加。鄰翁能共一甌茶。舍西日緊花房斂。港北風生柳脚斜。筇杖不妨閑有伴。茆簷終勝老無家。自驚七十猶強健。采藥歸來見暮鴉。

又

鬢邊莫笑久星星。造物常鍾我輩情。每帶餘醺躡花影。又和殘夢聽鶯聲。軒窗風過書籤亂。洲渚潮生釣艇橫。韓子未除豪氣在。文章都待不平鳴。

杭州夜歸

昔如架上九秋鷹。今似窗間十月蠅。無復囊鞬思出塞。不妨粥飯略同僧。白蘋洲晚初回櫂。綠樹村深已上燈。莫謂陶詩恨枯槁。細看字字可銘膺。

又

野艇迢迢信所之。歸來常及欲昏時。陂塘煙重怨姑惡。林薄月明悲子規。出谷寺鐘初縹緲。穿籬續火已參差。欣然笑向麴門說。又了浮生一首詩。

或問余近況示以長句

天亦知予嬾是真。暮年乞與自由身。幽尋東浦鶯迎櫂。獨臥北窗鶯喚人。野卉滿頭狂取醉。草廬容膝樂忘貧。死時是處堪藏骨。不用要離更作鄰。

估客有自蔡州來者感懷彌日

洮河馬死劍鋒摧。綠髮成絲每自哀。幾歲中原消息斷。喜聞人自蔡州來。

又

百戰元和取蔡州。如今胡馬飲淮流。和親自古非長策。誰與朝家共此憂。

初夏郊行

小硯孤吟恐作愁。長堤曳杖且閑遊。破雲山踴千螺翠。經雨波涵一鏡秋。粧妝青紅村步市。闌干高下寺家樓。去年此日君知否。十丈京塵沒馬頭。

重午

葉底榴花盛綠繒。街頭初賣苑池冰。會稽不藏冰。賣者皆自行在來。世間各自有時節。蕭艾著冠稱道陵。

夏日

赤日黃塵襪穢忙。放翁湖上獨相羊。竹梢露滴驚殘夢。荷蓋風翻送早涼。暑用酒逃猶有待。熱憑靜勝更無方。空齋一榻儵然臥。閑看衣篝起篆香。

睡起見楊花滿庭偶書

斷香裊裊倚窗紗。睡起膏騰日未斜。堪歎一春風雨惡。今年四月見楊花。

梅雨

沐罷斜簪二十冠。斷雲殘靄暗江干。絲絲梅子熟時雨。漠漠楝花開後寒。剩采芸香辟書蠹。旋春麥麩續家餐。日長倦睫惟思閉。茗椀真須抵死寬。

醉歌

讀書三萬卷。仕宦皆束閣。學劍四十年。虜血未染鏢。不得爲長虹。萬丈掃寥廓。又不爲疾風。六月送飛雹。戰馬死槽櫪。公卿守和約。窮邊指淮淝。異域視京雒。於乎此何心。有酒吾忍酌。平生爲衣食。斂版靴兩腳。心雖了是非。口不給唯諾。如今老且病。鬢禿牙齒落。仰天少吐氣。餓死實差樂。壯心埋不朽。千載猶可作。

醉書秦望山石壁

秋雨初霽開長空。夜天無雲吐白虹。擘波浴海出日月。破山卷地驅雷風。崑崙黃流瀉浩浩。太華巨掌摩穹穹。平生所懷正如此。拜賜虛皇稱放翁。放翁七十飲千鍾。耳目未廢頭未童。向來楚漢何足道。真覺萬古無英雄。行窮禹迹亦安往。聊借曠快洗我胸。濤瀾屢犯蛟鱗怒。澗谷或與精靈逢。黃金鑄就決河塞。倅獻頤利長安宮。不如醉筆掃青嶂。入石一寸豪健驚天公。

秋夜

藥餌扶衰疾。琴書返故園。陶公方止酒。樂令且清言。煙鳥宿沙際。露螢明草根。塵蠶不到處。此意與誰論。

夜意

孤夢初回夜氣清。世塵掃盡覺心平。月沉洲渚漁歌遠。人語比鄰續火明。獨汲寒泉鳴細綆。靜聽漏鼓下高城。悠然坐待東方白。卻看軒窗淡日生。

蝸廬

小葺蝸廬便著家。槿籬莎徑任欹斜。爲生草草僧行脚。到處悠悠客泛槎。孤蝶惜衣晴曝粉。穉蜂貪蜜晚爭花。有書懶讀吾堪愧。睡起何妨自澀茶。

予十年間兩坐斥鼻雖擢髮莫數而詩爲首謂之嘲詠風月既還山遂以風月名小軒且作絕句
扁舟又向鏡中行。小草清詩取次成。放逐尙非餘子比。清風明月入臺評。

又

綠蔬丹果薦瓢尊。身寄城南禹會村。連坐頻年到風月。固應無客叩吾門。

題梅漢卿醉經堂

它人爛醉錦瑟傍。君獨醉心編簡香。沉酣骨髓春盎盎。如枕魏甌羅盃觥。三萬牙籤插高架。五千黃卷撐枯腸。信哉名教有樂地。白首不入無功鄉。

得親舊書問近況以詩代書報之

溪頭日日弄潺湲。敢料餘生竟得全。白簡免勞中執法。青銅罷算小行年。花前一笑頻開口。林下深藏永息肩。欲養金丹還嬾去。身今已是地行仙。

放逐

放逐雖慙處士高。笑譚未減少年豪。青山隨處有三窟。白首今年無二毛。正得筇枝爲老伴。盡將書帙付兒曹。飲酣自足稱名士。安用辛勤讀楚騷。

月下野步

空中磊落斗跨天。道旁荒寒月滿川。行歌驚起鷗鷺眠。三萬里在拄杖邊。敲門索酒太華前。飛渡黃河不須船。袖中短鐵青蜿蜒。昔曾巴丘從老仙。削平巖崖扶雲煙。此妙可得不可傳。雷聲殷殷電煜然。已覺遼碣無腥羶。雪花如席登祁連。歸來卻看東封年。

自詠

孤艇渺煙波。衡門暗薜蘿。衣冠醉學究。世有醉學究。圓。毛骨病維摩。撫几時長喟。臨觴亦浩歌。無勞問蝸角。蠻觸正橫戈。

午睡起遇急雨

揩眼捫髯破晝眠。闌邊小立獨幽然。叢花雨打無飛蝶。高柳風驚有墮蟬。才略本居元子下。功名那計祖生先。今朝會意君知否。目送飛雲揮五絃。

夜雨暴至

堂中虛窗雨氣入。堂前叢竹雨聲急。山童束縵走求火。屋漏惟愁打書溼。秋風擺種九千頃。自鏡湖北際海。墾地凡九千頃。皆吾鄉上腴也。此夕真成傾玉粒。蹋歌作社約比隣。一飽今年可平揖。

睡起作帖數行

睡餘得清風。起坐傍書几。日長誰晤言。賴此管城子。欣然共游戲。一笑我忘爾。羣鴻偶下集。但怪驚不起。古來翰墨事。著意更可鄙。跌宕三十年。一日造此理。不知筆在手。而況字落紙。三叫投紗巾。作歌識吾喜。

新秋

短鬢蕭蕭失舊青。此身已看作郵亭。新秋無限淒涼意。盡付風蟬與露螢。

秋興

去秋尙十日。軒窗夕已涼。露草黏溼螢。壞壁啼寒螿。丈夫志四海。臨書慨以慷。白髮忽如此。惟有歸耕桑。藥餌且枝梧。鄰曲相扶將。豈無甕中酒。老病不能觴。南山有歸處。歲晚柏已行。下從吾親游。此事歲月長。

又

無食苦日長。無衣念秋近。雖云老農圃。未害樂堯舜。士生要弘毅。病在墮驕吝。得喪纔幾何。哀哉以身徇。平生最耐事。霜雪亦滿鬢。憂患一洗空。吾道其少進。

幽居

幽居人迹稀。柴扉晝常掩。小池清見底。疎雨時數點。蟬噉秋未衰。花房暮先斂。老大固多傷。年華還冉冉。

山居食每不肉戲作

谿友留魚不忍烹。直將蔬糲送餘生。二升畬粟香炊飯。一把畦菘淡煮羹。莫笑開單成淨供。也能捫腹作徐行。秋來更有堪誇處。日傍東籬拾落英。

自笑

諸公袞袞幾金貂。自笑無材負聖朝。老氣醉中猶跌宕。閑身夢裏亦逍遙。舊書日伴吾兒讀。薄飯時從野叟招。病後秋衣須早製。竹窗殘夜雨蕭蕭。

世上

世上悠悠東逝波。金丹將奈鬢絲何。牆頭楊柳知秋早。窗外芭蕉受雨多。伏櫪自應如老驥。還鄉元欲借明駝。吾棊一局千年事。從使旁觀爛斧柯。

夜歸偶懷故人獨孤景略

買醉村場半夜歸。西山落月照柴扉。劉琨死後無奇士。獨聽荒雞淚滿衣。

秋夜自近村歸

江頭浩歌天宇寬。刺船歸來清夜闌。女貞林黑月未上。姑惡聲悲村已寒。不恨故交日零落。本知浮生難控搏。頭童面槁更安往。莫問傍人君自看。

夜聞蟋蟀

布穀布穀解勸耕。蟋蟀蟋蟀能促織。州符縣帖無已時。勸耕促織知何益。安得生世當成周。一家百畝長無愁。綠桑鬱鬱暗微徑。黃犢叱叱行平曠。荆扉績火明煜煜。黍壠盪飯香浮浮。耕亦不須勸。織亦不須促。機上有餘布。盎中有餘粟。老翁白首如小兒。鼓腹擊壤相從嬉。

秋夜風雨暴至

風聲掠野來。瀕洞如翻濤。雨聲集庭木。桐葉聲最豪。殘暑一洗空。凜然念綈袍。秋穀已登場。欲忘終歲勞。東舍捉鵝鴨。西舍烹豚羔。籬落開寒花。房櫳壓小槽。貧賤何所歎。樂歲成吾高。卻拾牆角檠。拂拭賀汝遭。

月下小酌

草樹已秋聲。郊原喜晚晴。風生雲盡散。天闊月徐行。下箸槎頭笑。傳盃甕面清。追歡猶可勉。徂歲不須驚。

鄰曲有未飯被追入郭者憫然有作

春得香杭摘綠葵。縣符急急不容炊。君王日御金華殿。誰誦周家七月詩。

吾廬

吾廬鏡湖上。傍水開雲局。秋淺葉未丹。日落山更有。孤鶴從西來。長鳴掠沙汀。亦知常苦飢。未忍吞羶腥。我食雖不肉。七箸窮芳馨。幽窗燈火冷。濁酒倒殘瓶。

飲酒望西山戲詠

太白十詩九言酒。醉翁無詩不說山。若耶老農識幾字。也與二事日相關。

小院

小院回廊夕照明。放翁宴坐一筇橫。銅匱暖徹香初過。鐵杵聲清藥欲成。世事熟看無一可。古人不作與誰評。新涼社酒家家熟。便用陽狂了此生。

發篋得故人書有感

衰鬢星星換舊青。世間萬事但堪驚。晨炊欲熟客未覺。夜漏漸殘人尚行。花發且爲無事飲。詩成非復不平鳴。京華朋舊凋零盡。忽見緘題似隔生。

秋光

年年最愛秋光好。病起逢秋合賦詩。叢菊漸黃人醉後。孤燈初暗雨來時。舊書細讀猶多味。老態相尋似有期。早信爲農勝覓祿。一生虛作虎頭癡。

晚秋風雨

儘道漁村陋。秋來物色奇。寒生沽酒興。雨及種花時。狂舞欲誰屬。清吟空自知。茫茫宇宙內。吾道竟何之。

幽居

白髮蕭蕭僅到肩。一枝藤杖日翩躚。草苔牆北棲雞屋。泥補橋西放鴨船。心似枯葵空向日。身如病櫟孰知年。放懷却有脩然處。不羨金丹不學禪。

又

面面秋山擁翠屏。天留三畝著雲扃。迎霜南阜楓林赤。飽雨西村菜甲青。散策人驚衰後健。浩歌自覺醉中醒。凌煙冠劍應無爾。布帽霜襦老管寧。

故山

功名莫苦怨天慳。一櫂歸來到死閑。傍水無家無好竹。卷簾是處是青山。滿籃箭茁瑤簪白。壓擔稜梅鶴頂殷。野興盡時尤可樂。小江煙雨趁潮還。鏡湖。

又

禹祠行樂盛年年。繡轂爭先罨畫船。十里煙波明月夜。萬人歌吹早鸞天。花如上苑常成市。酒似新豐不直錢。老子未須悲白髮。黃公壚下且閑眠。禹祠。

又

老尉鴟鵂隱市門。千年猶有舊巢痕。陸生於此寓棋局。予二十年前嘗寓居。會丈時來開酒樽。會丈謂文清公。渺渺帆檣遙見海。冥冥蒲葦不知村。數僧也復投詩社。零落今無一二存。梅山。

又

落磔泉奔舞玉虹。護丹松老臥蒼龍。霜柑籬角寒初熟。野碓雲邊夜自舂。挈榼人沽村市酒。打包僧趁寺樓鐘。幽尋自是年來嬾。枉道山靈不見容。雲門。

秋晚弊廬小葺一室過冬欣然有作

放翁畢竟合躬耕。剩喜東歸樂太平。碧瓦新霜寒尙薄。明窗嫩日雨初晴。素琴尋得無絃曲。野餉烹成不糝羹。更說市朝癡太絕。一湖秋水濯塵纓。

小室晚酌

病不禁寒怯早霜。東齋隨其具盃觴。清時寬大何妨醉。白首龍鍾未減狂。枝葉扶檠山果熟。鹽醯調適野蔬香。興闌徑覓華胥路。枕藉圖書滿一床。

冬晚山房書事

山澤何妨老太平。嶢嶢骨相本來清。月明滿地看梅影。露下隔溪聞鶴聲。未辨藥苗逢客問。欲酬琴價約僧評。胡奴仁祖今俱絕。且學湘纍拾菊英。

又

屏迹山村病日增。烏皮几穩得閑凭。凍雲傍水封梅萼。嫩日烘窗釋硯冰。歲盡光陰饒充充。身閑醉夢且騰騰。蠻童采藥歸來晚。客至從嗔喚不應。

村居日飲酒對梅花醉則擁紙衾熟睡甚自適也

江村歲晚掩柴荆。地僻久無車馬聲。孤寂惟尋麴道士。一寒仍賴楮先生。醉頭珠滴愁先破。帳底春回夢易成。莫笑衰翁殺風景。小瓶梅蕊解卿卿。

山居疊韻

禽吟陰森林。鹿伏樸楸木。嗚呼吾徒愚。僕僕逐肉粟。聯翩憐鳶肩。覆餗速戮辱。艱難還山間。獨欲足畜牧。躋梯棲西谿。築屋宿北谷。光芒常當藏。櫝玉觸俗目。

寓歎

心已忘斯世。天猶活此翁。嫩湯茶乳白。軟火地爐紅。課婢耘蔬甲。呼兒下釣筒。生涯君勿笑。聊足慰塗窮。

又

久矣門無客。高齋獨掩扉。敢言消壯志。要是息危機。清露夜自滴。孤雲寒不歸。晨炊勿關念。更典篋中衣。

又

卷二十一

贈惟了侍者

水邊剝啄打門誰。滿袖清風一紙詩。驚起放翁蝴蝶夢。半窗寒日欲斜時。

雪中僵臥不須悲。徹骨清寒始解詩。一等人間閑草木。月窗君看早梅枝。

又
題湖邊旗亭

春色初回杜若洲。佳人又典鸚鵡裘。八千里外狂漁父。五百年前舊酒樓。渡口遠山顰翠黛。天邊新月挂瓊鈎。回頭笑向紅塵說。也有閑愁到此不。

醉臥道邊覺而有賦

太華五千仞。天台四萬丈。一枝古藤如黑龍。天遣飄然寄閑放。莫怪公卿不我知。我自不知渠是誰。史書弄筆後來事。繡鞍寶帶聊兒嬉。旗亭爛醉官道臥。醒後無人數吾過。世間恩怨一時空。且免它年送臨賀。

寓懷

脫粟未爲飢。短褐未爲寒。衆毀心自可。身困氣愈完。茆屋雖三間。跌坐則已寬。濁酒不滿瓢。浩歌有餘歡。祿食妻子樂。功名後人看。成敗兩蝸角。貴賤一鼠肝。茫茫百年夢。底物堪控搏。不如學餐霞。駐此雙頰丹。行披終南雲。飛渡黃河湍。巋然過空城。人言古長安。霜露蒙荆榛。喟然增永歎。

又

蒼壁與黃琮。初非俗所貴。粲然薦縑藉。可對越天地。我豈賣餅兒。自銜三家市。持槃叫道邊。雖售無乃媿。文章等卜祝。王公以儒戲。書成藏名山。此是千載事。

又

我昔浮滄溟。浩渺難具論。華夷溱不辨。日月互吐吞。神龍忽上騰。尾鬣風霆奔。積浪自生火。烈焰焚乾坤。笑謂同舟子。世豈無鵬鯤。聊持豪逸氣。壓汝破碎魂。

又

鮑魚載沙丘。鹿馬獻阿房。泗上老亭長。仿侔起東方。干戈暗寓縣。鯨徒化侯王。富貴誠可慕。頹醯亦足當。青門獨無恙。種瓜亦何傷。後有阮嗣宗。絕識未易量。楚漢真豎子。孰謂斯人狂。

喜事

武夷老子雪垂肩。喜事何曾減少年。鸚鵡螺深翻細浪。辟邪爐暖起微煙。幽花猶露露紗帽。亂絮憑風撲畫船。虎豹九關君勿歎。未妨一笑住壺天。

甜羹菘蘆服山藥芋作羹

山廚薪桂軟炊杭。旋洗香蔬手自烹。從此入珍俱避舍。天蘇陶味屬甜羹。

縱筆

文叔一人知此翁。洛陽城裏又春風。讓他綠髮好年少。二十四歲作三公。

又

一紙除書到海邊。紫皇賜號武夷仙。功名敢道渾無意。暫作閑人五百年。

又

背上嵯峨兩肉山。明駝有債自須還。玉霄峯頭雪包鹿。清曉一聲煙雨間。

又

素月徘徊牛斗間。天風吹鶴度函關。一年似此佳時少。喚起陳搏醉華山。

自嘲解嘲

世變真難料。吾癡只自嘲。移山謀畚土。黏日欲煎膠。得句題修竹。烹茶拾墮菓。行年不須算。斷是死衡茆。

又

種稻稽山下。誅茆剡曲傍。鳴雞耐昏早。飛燕異炎涼。古劍寒三尺。殘書亂一床。穹穹與厚厚。能識我非狂。

春雨絕句

恰喜西窗晚照明。虛簷又報雨來聲。端憂不用占龜兆。壞盡花時自解晴。

又

千點猩紅蜀海棠。誰憐雨裏作啼粧。殺風景處君知否。正伴鄰翁救麥忙。

又
天公似欲敗蠶麈。雨冒南山暮不收。駭女癡兒那念此。貪看科斗滿清溝。

又
今年春半不知春。飛電奔雷嚇殺人。縫得春衫元未著。免教惆悵洛陽塵。

又
梅中最晚是緜梅。一日來看欲百回。俗紫凡紅終避舍。不妨自向雨中開。

又
蕭條冬令侵春晚。浙瀝寒聲滴夜長。更事老翁頑到底。每言宜睡好燒香。

雨中臥病有感

病臥窮山白髮新。不堪風雨過中春。歌呼空倚一尊酒。零落漸無吾輩人。千載詩書成長物。兩京宮闕委胡塵。非熊老子不復見。誰弔遺魂清渭濱。

舟中作

不遷比景戍交河。三徑歸來得已多。應俗愈疎身老大。讀書漸廢意蹉跎。閑從孫叟蘇門嘯。醉和荆卿易水歌。歌罷卻揮孤櫂去。石闌干下買漁蓑。石闌干在剡谿道中。

山園

買得新園近釣磯。旋營茆棟設柴扉。山經宿雨修容出。花倚和風作態飛。世事只成驚老眼。酒徒頻約典春衣。狂吟爛醉君無笑。十丈愁城要解圍。

聞虜亂

運數羣胡盡。煙塵北道昏。百年身易老。萬里志空存。楊柳搖馳道。櫻桃奉寢園。南公忠義薄。此恨與誰論。

題千秋觀懷賀亭

河湟使典珥左貂。曲江相君謝不朝。宮中玉環狐作妖。結虜旁窺心已驕。天維欲絕地軸搖。有識凜凜憂宗祧。賀

公託言師松喬。黃冠徑歸侶漁樵。老馬立仗不自聊。去如鸞鳳冲煙霄。傾都租錢擁渭橋。賢哉大夫脫塵囂。揚州渡江木蘭橈。入東夜聽錢塘潮。我來故祠竹蕭蕭。黃冠野服傳生綃。詞卑媿匪英瓊瑤。空采蘋藻奠桂椒。虛堂斷香閉寂寥。遺魂零落何由招。

禹祠

我昔下三峽。南賓繫歸艫。渡江謁神禹。拜手薦俎壺。書藤枝如虬。巨柏腹若劊。門庭雖日荒。殿寢猶枝梧。巴俗喜禱祠。解牛舞羣巫。巍巍黻冕古。食與夷鬼俱。聖度固兼容。臣憤獨不據。還鄉瞻廟貌。羸政久已除。歎牧儼如生。想像聞都兪。廓清雖可喜。欲退復躊躇。念昔平水土。棋布畫九區。豈知千歲後。戎錫居中都。老虜失大刑。今復傳其雛。直令挽天河。未濯腥羶汙。夷鬼細事耳。披撥直須臾。天下讎不復。大恥何時祛。蚩蚩謂固然。此責在吾徒。揮滌灑庭草。誰憐小臣愚。

樊江

手中一卷養魚經。又向樊江上草亭。朝雨染成新漲綠。春煙澹盡遠山青。榜舟不厭頻來往。岸幘常須半醉醒。賦罷新詩自高詠。滿汀鷗鷺欲忘形。

東關

路入東關物象奇。角巾老子曳筇枝。蠶如黑蟻桑生後。秧似青鍼水滿時。穿市不嫌微雨溼。過谿翻喜壞橋危。當年野店題詩處。又典春衣具午炊。

又

雲蹙魚鱗襯夕陽。放翁繫纜水雲鄉。一筇疾步人驚健。斗酒高歌自笑狂。風暖市樓吹絮雪。蠶生村舍采桑黃。東阡南陌無窮樂。底事隨人作許忙。

練塘

微風吹頰酒初醒。落日舟橫杜若汀。水秀山明何所似。玉人臨鏡疊螺青。

娥江市

小聚依江近。支流入浦分。荒寒孤店雨。零亂野祠雲。薄餉炊畚粟。珍烹采澗芹。年來去健羨。摩腹自欣欣。

宿野人家

避雨來投白版扉。野人憐客不相違。林喧鳥雀棲初定。村近牛羊暮自歸。土釜煖湯先濯足。豆豉吹火旋烘衣。老來世路渾諳盡。露宿風餐未覺非。

舟中遣懷

三黜歸來結草廬。平生狂態掃無餘。但思下帷授老子。那復騎牛讀漢書。歷歷舊遊渾似夢。蕭蕭殘髮不勝梳。閑中事業君知否。不把漁竿卽荷鋤。

歸次樊江

芳草東西路。綠楊長短亭。人生豈匏繫。吾志本鴻冥。征袖朝霏雨。歸帆夜戴星。長魚幸能買。且復倒殘瓶。

夜過魯墟

中夜過魯墟。船底鳴細浪。月出菱歌長。林闇續火壯。故居不可識。四顧但青嶂。百年幾廢興。撫事一悽愴。士生本耕稼。時來偶卿相。功名亦餘事。所勉在素尚。况吾多難者。久已冥得喪。微祿行當辭。沒身事幽曠。

有感

溫洛榮河拱舊京。從來人物富豪英。報仇雖有楚三戶。守節得無齊二城。胡寇寧能斷地脈。王師行復暢天聲。鳳麟久伏應爭奮。勉爲明時頌太平。

遊石帆玉笥石旗諸山

暮景苦多病。幽尋寄一欣。溪喧常似雨。石潤易生雲。天迴回鴉陣。林疎過鹿羣。莫談朝市事。吾老厭紛紛。

信步近村

端閑何以永今朝。拈得筇枝度野橋。三畝空園喧啄木。十尋高樹絡凌霄。長飢未必緣詩瘦。多悶惟須賴酒澆。興盡歸來又陳迹。一林風葉暮蕭蕭。

寒食省九里大墓

陌上簫聲正賣錫。籃輿兀兀兩冥冥。人來平野一點白。山壓亂雲千疊青。石馬朱門松下路。凍齏冷飯柳陰亭。華顛尙記兒童日。撫事興懷涕自零。

平水道中

處處陵水滿。家家巢燕忙。葉舒桑漸闊。穗重麥初昂。高下山花發。青紅粉餌香。亦知時節好。老大自悲傷。
五雲橋往時鏡湖陂。防不廢則若耶溪。水常滿可行大舟。至雲門此橋本跨溪。上今乃在平陸矣。
若耶北與鏡湖通。縹緲飛橋跨半空。陵谷變遷誰復識。我來徒倚暮煙中。

小雨雲門溪上

好雨疎疎壓暮埃。斷雲漠漠帶春雷。離黃穿樹語斷續。翠碧銜魚飛去來。生菜入盤隨冷甍。朱櫻上市伴青梅。狂吟不是誇強健。老氣如山未許摧。

雲門獨坐

山北山南處處行。回頭六十七清明。如今老去摧頽甚。獨坐焚香聽水聲。

泛湖至東涇

春水六七里。夕陽三四家。兒童牧鵝鴨。婦女治桑麻。地僻衣巾古。年豐笑語譁。老夫維小艇。半醉摘藤花。

又

湖光分別浦。嶺路過前村。泉石相縈帶。雲煙互吐吞。耕犁無易業。隣曲有通婚。試覓誅茆地。吾將遺子孫。

又

細細桃枝竹。疎疎篋眼籬。雪霜燒葑夜。月露采菱時。腰斧登山早。移罾出浦遲。關心盡幽事。恨汝不能詩。

舟過梅塢胡氏居愛其幽邃爲賦一詩

稽山翠入家家窗。此家清絕無與雙。丹葩綠樹錦繡谷。清波白石玻璃江。一堤茂草有眠犢。數掩短籬無吠尫。北軒商略可散髮。借與放翁傾酒缸。

北窗

北窗本意傲羲皇。老返園穡味更長。曠健戴星耕白水。蠶飢衝雨采青桑。但儒朱墨滿公學。廟史牲牢祝歲穰。從此鬢毛雖似雪。未妨墮壤頌虞唐。

聞蛙

科斗忽安在。蛙聲豪有餘。雖成兩部樂。恨失一編書。忿怒緣何事。號呼可奈渠。廚人不退棄。猶得伴溪魚。

晚春感事

風惡房櫳燕子歸。雨多山路蕨芽肥。青衿旋擣作寒食。白葛預裁充暑衣。禪子日長供課早。故人官達寄書稀。幽居自喜渾無事。又向湖陰坐釣磯。

又

和風薄靄過清明。減盡重裘覺體輕。正午軒窗無樹影。乍晴阡陌有鶯聲。釀成西蜀鴉雞酒。藉賣廣漢酒名。裘就東坡玉糝羹。捫腹脩然出門去。春郊何處不堪行。

又

徙倚闌干送落暉。年華冉冉恨依依。護雛燕子常更出。著雨楊花又嬾飛。已爲讀書悲眼力。還因攬帶歎腰圍。親朋半作荒郊冢。欲話初心淚滿衣。

又

少年騎馬入咸陽。鵝似身輕蝶似狂。蹴鞠場邊萬人看。鞦韆旗下一春忙。風光旒轉渾如昨。志氣低摧只自傷。日永東齋淡無事。閉門掃地獨焚香。

山居

平生杜宇最相知。遺我巢山一段奇。茶磴細香供隱几。松風幽韻入哦詩。溪邊拂石同兒釣。竹下開軒喚客棋。幾許放翁新事業。不教虛過太平時。

四月三日同子坦子聿遊湖中諸山

我行無所詣。悠颺信舴艋。愛此綠樹村。捨棹度小嶺。路窮忽披豁。恍然得異境。蒼玉立萬峯。清鏡渺千頃。更爲西

南行聊破春晝永。遙看秀邃處。疑足事幽屏。一崦果可人。奇古插碧井。鏘鳴若環珮。其味復甘冷。徘徊不忍去。照我鬚鬢影。須臾日穿林。井面光炯炯。古今勝絕意。正用一笑領。安得絕世喧。於茲慕箕頴。

梅仙塢小隱

綠樹陰陰小嶺西。一翁二子自扶攜。兩前芳嫩初浮盃。臘脚清醇旋拆泥。本欲省緣行買餅。未能去殺尙烹雞。二者皆紀是日實事。弄撓莫便尋歸路。湖靜無風日未低。

盟雲

謂雲本無心。企望乃爾奇。謂雲果有心。百變端爲誰。豈憐此翁愁。一出怡悅之。橫截千嶂平。高擎一峯危。銀城突嵯峨。玉海浩渺瀾。成爲羣龍矯。或作孤鶴飛。卷舒閑有態。去來倏無時。瀟瀟覆松頂。靄靄映水湄。帶雨過僧窗。和月傍釣磯。豈惟困畫工。吾詩固難追。惟當與之盟。畢世相娛嬉。忍飢固易耳。此友不可欺。

示兒

舍東已種百本桑。舍西仍築百步塘。早茶采盡曠茶出。小麥方秀大麥黃。老夫一飽手捫腹。不復舉首號蒼蒼。讀書習氣掃未盡。燈前簡牘紛朱黃。吾兒從旁論治亂。每使老子喜欲狂。不須飲酒徑自醉。取書相和聲琅琅。人生百病有已時。獨有書癖不可醫。願兒力耕足衣食。讀書萬卷真何益。

村居初夏

暮境難禁日月催。臘醅初見拆泥開。壓車麥穗黃雲卷。食葉蠶聲白雨來。薄飯蕨薇端可飽。短衫紵葛亦新裁。宦塗自古多憂畏。白首爲農信樂哉。

又

北陌東阡節物新。往來饋餉走比鄰。出籠鵝白輕紅掌。藉藻魚鮮淡墨鱗。笑語相聞豐歲樂。耕桑自足古風淳。頽然一醉茆簷下。且免西曹議吐茵。

又

羹酒開時日正長。山家隨分答年光。梅青巧配吳鹽白。筍美偏宜蜀豉香。風暖緊催蠶上簇。雨餘閑看稻移秧。老

夫見事真成晚。浪走人間兩鬢霜。

又

天遣爲農老故鄉。山園三畝鏡湖傍。嫩莎經雨如秧綠。小蝶穿花似繭黃。斗酒隻雞人笑樂。十風五雨歲豐穰。相逢但喜桑麻長。欲話窮通已兩忘。

又

故鄉風物勝荆吳。流水青山無處無。列植園林多美果。飽鉏畦壟富嘉蔬。橋邊來碎剝桑斧。池畔行芟縛糶菰。我有素紈如月扇。會憑名手作新圖。

城東逆旅

店家乞火燎征衣。溼竹生薪不受吹。更甚從戎戍邊日。正如隨計入關時。百年擾擾夢相似。萬事悠悠心自知。賴有牀頭周易在。不妨清坐忍朝飢。

紅村初夏

紫甚狼藉桑林下。石榴一枝紅可把。江村夏淺暑猶薄。農事方與人滿野。連雲麥熟新食麩。小裏荷香初賣鮓。蘋洲蓬艇疾如鳥。沙路芒屨健如馬。君看早朝塵撲面。豈勝春耕泥沒踝。爲農世世樂有餘。寄語兒曹勿輕捨。

舟中作

湖海飄然避世紛。汀鷗沙鷺舊知聞。漁舟臥看山方好。野店沽嘗酒易醺。病骨未成松下土。老身常伴渡頭雲。美芹欲獻雖堪笑。此意區區亦愛君。

東關

天華寺西艇子橫。白蘋風細浪紋平。移家只欲東關住。夜夜湖中看月生。

又

煙水蒼茫西復東。扁舟又繫柳陰中。三更酒醒殘燈在。臥聽蕭蕭雨打篷。

少微山

平生一舸艇。幾到少微山。傑觀掃無迹。高人呼不還。崖崩危欲壓。磴斷滑難攀。日暮增幽興。漁歌荈茗間。

舟行至織女潭

艣枝搖碎碧琉璃。織女潭東白塔西。帶犢吳牛依茂樹。添巢海燕啄新泥。山谿曲折遙通谷。沙水淙潺各赴溪。猶恨兒曹不同載。一尊他日要重攜。

書歎

溲落非時用。棲遲送此生。只知求醉死。何憚得狂名。伏櫪天涯老。吞舟海澨橫。眼前交舊盡。有淚對誰傾。

小園獨立

草香無處覓。花嫩不禁飛。澤國春歸晚。柴門客過稀。新泥添燕戶。細雨溼鶯衣。倚杖臨階久。衰翁氣力微。

觀蘇滄浪草書絹圖歌

天孫獨處河之湄。龍梭夜織冰蠶絲。機頭剪落光陸離。騎鯨仙人醉題詩。字大如斗健欲飛。利刃猛斫生蛟螭。墨渴字燥尤怪奇。百彪潛影神靈悲。嗚呼東雲作筆兮。海爲硯。激水一騰龍野戰。乾坤震蕩人始驚。筆未落時誰得見。

睡起書觸目

壓架藤花重。團枝杏子稠。渴蜂窺硯水。弱燕集簾鈎。入夏暑猶薄。投閑身自由。午窗初睡起。幽興付茶甌。

曉雨初霽

曉來一雨洗塵痕。濃綠陰陰可一園。燕子聲中寂無事。獨穿苔徑出籬門。

夏雨

連朝暑溽不可過。動地忽有東北風。嵯峨雲壓世界碎。天矯龍卷江湖空。塵沙洗濯草木醒。潄澹激灑舟舸通。更煩造物出壯觀。跨海千丈垂天虹。

自東涇度小嶺聞有地可卜菴喜而有賦

小嶺西南煙水間。頗聞有地百弓寬。誰其云者兩黃鵠。何以報之雙玉盤。竹塢未昏先曉暖。蓮汀當暑亦清寒。一

菴何日從吾好。會約高人共倚陳。

露坐

五月暑猶薄。中庭試葛衣。蛙聲經兩壯。螢點避風稀。塵念三生誤。歸心半世違。殘年端有幾。可復負漁磯。

自笑

自笑胸中抵海寬。非齋麥飯日加餐。住山緣熟塵機息。養氣功深槁面丹。惡路慣曾經灑灑。浮生何啻夢邯鄲。鏡湖五月秋蕭爽。剩傍灘頭把釣竿。

夜賦

夜窗搔首髮鬢髻。病不勝衣倚瘦藤。堪笑顏回忍飢面。常依韓愈看書燈。殘生已與灰俱冷。舊友誰如几可憑。月落風生忽增氣。掠簷勁翮有歸鷹。

書懷

老死已無日。功名猶自期。清笳太行路。何日出王師。

醉後作小草因成長句

天教老去未全衰。猶欠縱橫萬首詩。家近將軍觴詠地。身如太史滯留時。酒翻銀浪紅螺醖。墨涌玄雲紫玉池。流落不妨風味在。花前醉草寫烏絲。

雨中作

空幃初喜灑欄楹。忽聽空階點滴聲。高枕便知宜夕睡。豐年不歎負春耕。多情幽草沿牆綠。無賴羣蛙繞舍鳴。屈指清秋兩旬近。卻愁徂歲又崢嶸。

詠史

入郢功成賜屬餽。削吳計用載廚車。閉門種菜英雄事。莫笑衰翁日荷鋤。

登鵝鼻山至絕頂訪秦刻石且北望大海山路危甚人迹所罕至也

街頭旋買雙芒屨。作意登山殊不惡。蒼崖無罅竹鞭逸。崩石欲墜松根絡。憑高開豁快送目。歷險崎嶇危著脚。川

王給事餉玉友

散髮蕭然蒲葦林。馬軍送酒慰孤斟。江河不洗古今恨。天地能知忠義心。無侶有時邀落月。放狂連夕到橫參。玉船湛湛真秋露。却恨鵝兒色尙深。

晚興

白布裙襦退士裝。短籬幽徑獨相羊。莎根蟋蟀催秋候。稗穗蜻蜓立晚涼。屈子所悲人盡醉。酈生常謂我非狂。知心賴有青天在。又炷中庭一夕香。

村圃

村圃穿荒翳。秋容變慘悽。柳疎蟬噪急。雨重鵲飛低。小草臨池學。新詩滿竹題。若令車馬到。何處有幽棲。

卷二十一

七月一日夜坐舍北水涯戲作

兀傲胡床酒半醒。釣筒收盡數舟橫。風生細葛無三伏。月上疎林正四更。北斗離離低欲盡。明河脈脈去無聲。斥仙豈復塵中戀。便擬騎鯨返玉京。

病後登山亭

野客雙蓬鬢。空山一草亭。睡魔欺茗薄。疾豎怯丹靈。治世窮馮衍。殘年老管寧。安居得後死。不敢恨飄零。

覽鏡

白頭漸覺黑絲多。造物將如此老何。三萬里天供醉眼。二千年事入悲歌。劍關曾蹴連雲棧。海道新窺浴日波。未頌中興吾未死。插江崖石竟須磨。比自三江航海至丈亭。

遣懷

許國區區不自勝。秋風空澆下鞬鷹。青雲夜歎初心誤。白髮朝看一倍增。積憤有時歌易水。孤忠無路哭昭陵。唐制有冤者許哭昭陵下。頭顱自揣今如此。尙欲閑尋紫閣僧。陳希夷奇錄宜靖。復招紫閣僧相之。

開元寺小閣十四韻

淵源兩名衲。築閣捫星長。近山臥蜿蜒。遠山高嶙峋。朝看雨空濛。暮揖雲輪囷。賦詩有宿諾。下語終未親。萬法不孤起。請君作其因。高掛四面窗。淨掃一榻塵。室中絕人聲。門前謝車輪。容我睡半日。兩忘主與賓。緩燒海南沉。細碾建谿春。是間儻有句。可與屈宋鄰。詩如奮螭龍。天矯不受馴。使可造次得。何異池中鱗。世有擾龍手。媿我非其人。詩不已就乎。著眼勿逡巡。

寄題趙寬之主簿慈順堂

人間得意盡危機。獨有榮親事未非。魏闕恩光新綠綬。高堂娛侍舊斑衣。牙籤插架書無恙。蘭膳循陔養莫違。况有兩公天下士。爲君百斛瀉珠璣。謝昌國中丞楊廷秀秘監皆嘗有此作。

郊居

平生萬事不容求。惟有郊居志已酬。更漏遠城雞唱曉。歲時無曆葉知秋。潮生小舫行收荻。月落長歌起飯牛。已作幸民仍醉死。人間毀譽判悠悠。

又

索米官倉例坐愚。東方未可戲侏儒。行藏要付他年看。富貴真堪一笑無。等死不過賒歲月。長閑勿更問妻孥。狂豪儘道非平昔。老膽輪困尙滿軀。

新秋感事

江上清秋昨夜回。漁扉正對荻洲開。志存天下食不足。節慕古人讒愈來。風際紙鳶那解久。祭餘芻狗會堪哀。蕭然散髮聽秋雨。剩領新涼入酒盃。

又

北渚秋風凋白蘋。流年冉冉默傷神。強顏未忍乞墦祭。積毀僅逃輸鬼薪。半榼浮蛆初試釀。兩螯斫雪又嘗新。受恩自度終無報。聊爲清時備隱淪。

八月一日微雨驟涼

流汗沾衣喘不供。孰知有此快哉風。新涼忽覺從天下。殘暑真成掃地空。恰轉輕雷過林塢。已吹好雨到簾櫳。幽人病愈閑無事。剩賦歌詩樂歲豐。

秋雨

剡曲高秋一草亭。兩來迨我醉初醒。豪吞平野宜閑望。急打虛窗入靜聽。沙上溼雲號斷雁。籬根衰草綴孤螢。老人嬾復親燈火。臥看爐香掩素屏。

又

赤日黃塵勢已窮。七月中旬後。秋暑尤劇。淒風苦雨卻忽忽。盛衰默定見天造。寒暑密移成歲功。柯葉凋零無茂木。羽翰顛顛有羈鴻。誰知病客悲秋意。盡在空墻點滴中。

又

冷雨蕭蕭澀不晴。叢篁遮盡小窗明。故衾獨展成酣寢。新釀初嘗得細傾。壁簡積陰添蠹字。牀琴生潤咽絃聲。此時懷抱真難遣。一首清詩信筆成。

月下獨坐

髮根蕭爽受微風。徙倚闌干月正中。天宇了無雲一點。城樓俄報鼓三通。庭臯簌簌吹凋葉。江渚翩翩落斷鴻。回首人間塵土惡。騎鯨聊駐水精宮。

秋日步至湖桑埭西

伏枕衰方劇。搯筇氣忽增。細泉鳴暗竇。疎樹映孤燈。斷雁寒依渚。強魚健脫罾。行纏已無用。卻作在家僧。

秋社

明朝逢社日。鄰曲樂年豐。稻蟹雨中盡。海氛秋後空。不須諛土偶。正可倚天公。酒滿銀盃綠。相呼一笑中。

又

浦溆漁歌遠。蒹葭續火明。新涼迎病起。樂事及秋成。社肉分初至。官壺買旋傾。殘年得家食。何以報時清。

秋思

南鄭歸來二十霜。背人歲月去堂堂。破裘不補知寒早。倦枕無憐厭夜長。年少若爲評宿士。狂生曾是說高皇。慨然此夕江湖夢。猶繞天山古戰場。

又

一生書劍徧天涯。兩歲秋風喜在家。爛醉日傾無算酒。高眠時聽屬私蛙。園林夕照明丹柿。籬落初寒蔓碧花。便擬掛冠君會否。耳根不復耐喧嘩。

又

殘暑偏能著此翁。吹襟剩喜得西風。露滋小徑蘭苔冷。月射高梁燕戶空。衰病呻吟真一洗。醉歌跌宕與誰同。從今日日增幽興。水際先丹數葉楓。

又

半年閉戶廢登臨。直自春殘病至今。帳外昏燈伴孤夢。簷前寒雨滴愁心。中原形勝關河在。列聖憂勤德澤深。遙想遺民垂泣處。大梁城闕又秋砧。

又

雁陣橫空送早寒。白頭病叟住江干。風林脫葉山容瘦。霜稻登場野色寬。萬里關河驚契闊。一尊鄰曲話悲歡。書生鐵死尋常事。那得重彈掛壁冠。

又

藥畦蔬圃夕陽中。帶落冠欹一病翁。步蹇每妨行藥興。眼昏幾廢讀書功。露濃乍警雲巢鶴。風勁先凋玉井桐。欲賦悲秋卻休去。鬢絲已是滿青銅。

以事至城南書觸目

十里西風吹帽羣。江城衣杵遠猶聞。路如劍閣逢秋雨。山似爐峯鎖暮雲。原上老翁眠犢背。籬根小婦牧羊羣。百錢且就村場醉。舌本醇醪莫苦分。

舍西夕望

茆舍菱陂北。柴門藥圃西。奇雲去人近。澹月傍簷低。野迴羊牛下。林昏鳥雀栖。郊墟少還往。父子自扶攜。

題城侍者峴山圖

漢水沉碑安在哉。千年峴首獨崔嵬。平生不作羊公計。但欲無名死草萊。

題城侍者剡溪圖

暮境侵尋兩鬢絲。湖邊自葺小茆茨。從今步步俱回棹。不獨山陰興盡時。

晚秋農家

老來萬事懶。不獨廢應酬。門前卽湖山。亦復罕出遊。吾廬有真樂。一榻眠高秋。回看世上事。得喪良悠悠。

又

秋雨無時休。令我雙鬢縞。庭荒何由鉏。木落不得掃。遣奴入城市。寸步困泥潦。菰首幸可烹。芻豢置勿道。

又

豢犬使警夜。畜雞用司旦。徹警盜所窺。失旦固吾患。豈無糠粃費。施報不可緩。家居亦爲政。發我中夜歎。

又

東鄰稻上場。勞之以一壺。西鄰女受聘。賀之以一襦。誠知物寡薄。且用交里閭。努力畢農功。租賦勿後輸。

又

我年近七十。與世長相忘。筋力幸可勉。扶衰業耕桑。身雜老農間。何能避風霜。夜半起飯牛。北斗垂大荒。

又

疎溝架略約。拾瓦疊浮屠。旣畫菘韭畦。遂營瓜芋區。豉香吳鹽白。飽計已有餘。捫腹笑自賀。無羊敗吾蔬。

又

苦寒牛亦耕。甚雨雞亦鳴。物物各有職。怠心其敢萌。我老返農圃。學業付後生。語兒續膏油。勿輟讀書聲。

又

吾里賢長者。蓋有萬石風。少年以利遷。但可哀其窮。仁義亦何常。聖賢與人同。我言不足取。汝豈忘乃翁。

湖上小閣

蒲萄初紫柿初紅。小閣憑闌萬里風。莫怪年來增酒量。此中能著太虛空。

苦雨歎

九淵龍公出忘還。瓦溝垂溜聲淙淙。茫茫大澤北際海。激激平湖南浸山。吾廬四望路俱斷。蛙黽爭雄亂昏旦。漏牀腐席夜失眠。涇龍生新朝不爨。今年十分喜有秋。豈知青秧出禾頭。老夫一飽復繆悠。聽兒讀書寬百憂。

遣懷

秋風策策冷吹衣。謝病經年晝掩扉。絕世本來希獨立。刺天不復計羣飛。細思萬古名何用。太息九原誰與歸。葬近要離非素意。富春灘畔有苔磯。

道石吾家舊藏奇石甚富今無復存者獨遺石一尙置几案間戲作

秋風媚媚雨班班。身隱幽窗筆硯閑。小試壺公縮地術。數峯閑對道州山。

又

林廬靈壁俱尤物。散落人間不復還。投老東歸風味在。春陵小岫伴身閑。

又

誤因祿米棄蓴鱸。一落塵埃底事無。布鞵青鞵雖興盡。此峯聊當臥遊圖。

蘭亭

蘭亭絕境擅吾州。病起身閑得縱遊。曲水流觴千古勝。小山叢桂一年秋。酒酣起舞風前袖。興盡回橈月下舟。江左諸賢嗟未遠。感今懷昔使人愁。

小葺村居

昔我作屋時。趣欲庇風雨。茆茨寒自刈。條枚細相拄。庫溼生蚍蜉。得煖森翅羽。摧撓自棟梁。朽敗連柱礎。鄰父爲我言。努力謀安處。土堅瓦可陶。步近木易取。豈知七十翁。沉痾久未愈。身世如浮漚。家舍真逆旅。一牀居易足。十歲敢自許。且當復其初。浩歌臥環堵。

書陶靖節桃源詩後

寄奴談笑取秦燕，愚智皆知晉鼎遷。獨爲桃源人作傳，固應不仕義熙年。

有叟

有叟鏡湖邊，茆茨八九椽。憑闌秋萬里，閉戶醉經年。身外浮名小，胸中浩氣全。此生吾自判，造物恐無權。

不寐

老眼睡眠少，林居煙雨昏。百年歸老死，萬事付乾坤。熠熠螢穿幔，鏗鏘鐵過門。欲明聞漉稻，浩歎閱黎元。

遙夜

遙夜凜高秋，蕭條念褐裘。煙江新雁下，竹塢暗螢流。舊友嗟誰在，初心恐不酬。一尊桑落酒，聊得洗吾愁。

秋晚思梁益舊遊

幅巾筇杖立籬門，秋意蕭條欲斷魂。恰似嘉陵江上路，冷雲微雨溼黃昏。

又

憶昔西行萬里餘，長亭夜夜夢歸吳。如今歷盡風波惡，飛棧連雲是坦途。

又

滄波極目江鄉恨，衰草連天塞路愁。三十年間行萬里，不論南北怯登樓。

紹熙辛亥九月四日雨後白龍挂西北方復雨三日作長句記之

長空黢闇如欲夜，白龍騰拏見雲罅。鱗間出火光照江，尾卷風霆雨如射。老人百歲見未曾，兒童閉門伏牀下。髮毛慘凜誰復支，性命么微不禁嚇。登場已歎禾生耳，出戶仍愁泥沒胯。皇天生民豈不愛，龍亦何心敗吾稼。父老相看出無策，攬涕頓顙號村社。移牀避漏我亦忙，秉燭題詩寄悲吒。

蔬圃

蔬圃依山腳，魚扉並水涯。臥枝開野菊，殘枿出秋茶。病骨知天色，羈懷感物華。餘年有幾許，且墮邵平瓜。

農家

南畝勤耒耨。西城謹蓋藏。種菘乘露日。斫荻待微霜。谿碓新春白。山廚野藪香。何須北窗臥。始得傲羲皇。

自喜

半生羈宦走人間。醉裏心寬夢裏閑。自喜如今無一事。讀書纔倦即遊山。

重九後風雨不止遂作小寒

病軀剩喜即新秋。殘暑無端抵死留。風雨掃除雖一快。凋年搖落已堪愁。

又

菊枝欲倒不成叢。井上梧桐葉半空。射虎南山無復夢。雨蓑煙艇伴漁翁。

又

夜長稚子添書課。霜近衰翁憶醉鄉。儘道吳中時節晚。菊花也有一枝黃。

城南上原陳翁以賣花爲業得錢悉供酒資又不能獨飲逢人輒強與共醉辛亥九月十二日偶過其門訪之敗屋一間妻子飢寒而此翁已大醉矣殆隱者也爲賦一詩

君不見會稽城南賣花翁。以花爲糧如蜜蠶。朝賣一株紫。暮賣一枝紅。屋破見青天。盎中米常空。賣花得錢送酒家。取酒盡時還賣花。春花開豈有極。日日我醉終無涯。亦不知天子殿前宜白麻。亦不知相公門前築堤沙。客來與語不能答。但見醉髮覆面垂髭髻。

甜羹之法以菘菜山藥芋菜菔雜爲之不施鹽醬山庖珍烹也戲作一絕

老住湖邊一把茆。時沽村酒具山肴。年來傳得甜羹法。更爲吳酸作解嘲。

暮秋書事

暮秋風雨卷茆茨。砧杵聲中過雁悲。楓葉欲丹先慘澹。菊叢半倒不支持。旗亭人熟容賒酒。野寺僧閑得樹棋。莫怪苦尋林下事。駭機滿地只心知。

早自偏門入城晚出南堰門以歸

早從偏門入。暮從南堰歸。鮑郎山前路。空翠浮煙霏。秋令忽已深。病骨頻添衣。向來慕功名。常恐斯心違。乃今知

其難。唵。啞。迫。殘。暉。伯。鸞。與。幼。安。尙。友。或。庶。幾。到。家。亦。既。夕。青。燈。耿。空。扉。且。復。取。書。讀。父。子。窮。相。依。

初寒

蚊。蠅。掃。迹。葉。飛。初。剩。喜。幽。窗。讀。我。書。牆。角。短。檠。真。耐。久。手。中。團。扇。又。成。疎。百。年。作。夢。行。休。去。九。月。無。衣。亦。晏。如。獨。恨。故。人。消。息。斷。寒。江。誰。與。倩。雙。魚。張。季。長。自。離。吳。門。未。得。近。書。

小舟自紅橋之南過吉澤歸三山

霏。霏。寒。雨。數。家。村。雞。犬。蕭。然。晝。閉。門。它。日。路。迷。君。勿。恨。人。間。隨。處。有。桃。源。

又

六。月。芙。渠。正。盛。時。畫。船。長。記。醉。題。詩。世。間。好。景。元。無。盡。霜。落。荷。枯。又。一。奇。

得猫於近村以雪兒名之戲爲作詩

似。虎。能。緣。木。如。駒。不。伏。轅。但。知。空。鼠。穴。無。意。爲。魚。殮。薄。荷。時。時。醉。氍。毹。夜。夜。溫。前。生。舊。童。子。伴。我。老。山。村。

晝睡

眼。昏。妨。讀。書。不。睡。復。如。何。擁。被。新。寒。裏。伸。腰。午。飯。餘。斷。香。縈。倦。枕。疎。雨。滴。前。除。未。竟。華。胥。樂。茶。甌。莫。喚。渠。

戲詠閑適

暮。秋。風。雨。暗。江。津。不。下。書。堂。已。過。旬。鸚。鵡。籠。寒。晨。自。訴。狸。奴。氍。煖。夜。相。親。典。衣。旋。買。修。琴。料。叩。戶。時。聞。請。藥。人。說。與。鄉。鄰。當。賀。我。死。前。長。作。自。由。身。

寓歎

荷。戈。常。記。壯。遊。時。齒。豁。頭。童。不。自。知。已。分。功。名。非。力。致。更。悲。文。字。與。年。衰。端。居。漸。覺。從。人。嬾。熟。睡。偏。於。聽。雨。宜。自。斷。歸。休。君。勿。怪。一。盃。薺。糝。敵。瓊。糜。

又

醉。撫。酒。壺。憐。孑。孒。臥。看。香。岫。愛。嶙。峴。舊。時。京。洛。塵。埃。面。今。作。江。湖。風。月。民。幻。世。界。中。均。起。滅。太。虛。空。裏。孰。冤。親。可。齋。入。定。論。千。劫。說。與。天。魔。任。惱。人。

獨夜

獨夜迢迢掩素屏。病懷羈思共鈴聲。房櫳十月寒初重。風雨三更酒半醒。繁杵有聲時斷續。殘缸無焰尚青熒。恍然喚起西征夢。身臥金牛古驛亭。

記九月二十六夜夢

海山萬峯鬱參差。宮殿插水蟠蛟螭。碧桃千樹自開落。飛橋架空來者誰。桐枝高聳宿丹鳳。蓮葉半展巢金龜。和風微度竇箏響。永日徐轉簾陰移。西廂恍記舊遊處。素壁好在尋春詩。當年意氣不少讓。跌宕醉墨紛淋漓。宿醒未解字猶溼。人間歲月浩莫推。歎驚撫几忽夢斷。海闊天遠難重期。

夢海山壁間詩不能盡記以其意追補

碧海無風鏡面平。潮來忽作雪山傾。金橋化出三千丈。閑把松枝引鶴行。

又

海上乘雲滿袖風。醉捫星斗躡虛空。要知壯觀非塵世。半夜鯨波浴日紅。

又

一劍能清萬里塵。讒波深處偶全身。那知九轉丹成後。卻插金貂侍帝宸。

又

春殘枕藉落花眠。正是周家定鼎年。睡起不知秦漢事。一尊閑醉華陽川。

當食歎

黃鵠舉網收。錦雉帶箭墮。藉藻頰鯉鮓。發奩蒼兔臥。吾儕亦何心。甘味樂死禍。貧夫五鼎烹。志士首陽餓。請言觀其終。孰爲當弔賀。八月黍可炊。五月麥可磨。一飽端有餘。努力事春鋤。

避鄉

有酒君勿啜。入腸作戈矛。有書君勿觀。到眼生君愁。不如睡鄉去。萬事風馬牛。郊墟無來客。風雨送暮秋。苔甃蟲唧唧。霜林葉颼颼。是時一枕睡。不博萬戶侯。斗帳裁青氈。重衾擁黃紬。華山希夷翁。千載可與遊。

晨興

未旦雞三號。將旦鵝羣鳴。湖陂地曠快。頗樂聞此聲。回首宦遊日。鈴索攬五更。未言簿書勞。讒謗隨日生。一飢百憂散。灑然懷抱清。雨後初得菘。晨庖有珍烹。豈不念加糝。後汰恐易萌。且當讀古書。至味敵大羹。

初冬從父老飲村酒有作

父老招呼共一觴。歲猶中熟有餘糧。麴花漫漫渾如雪。豈莢離離未著霜。山路獵歸收兔網。水濱農隙架魚梁。醉看四海何曾窄。蘇子美詩云。吁嗟四海窄。且復相扶醉夕陽。

懷南鄭舊遊

南山南畔昔從戎。賓主相期意氣中。渴驥奔時書滿壁。餓鴟鳴處箭凌風。千艘粟漕魚關北。一點烽傳駱谷東。惆悵壯遊成昨夢。戴公亭下伴漁翁。

冬夜讀書

霜雪紛紛滿鬢毛。凋年懷抱獨蕭騷。房櫳夜悄孤燈暗。原野風悲萬木號。病臥極知趨死近。老勤猶欲與書鏖。小兒可付巾箱業。未用逢人歎不遭。

余爲成都帥司參議成將軍漢卿爲成都路兵鈐相從無虛日余被召出蜀漢卿坐法謫居於涪旣得自便因卜築爲涪人今年廣漢僧祖成來山陰乃言嘗至永嘉樂清縣柳市之廣福寺有黃先生寓寺中

煉丹及見則漢卿也余聞之感歎不已爲賦此詩

將軍胸中備文武。鐵馬黃旗玉關路。羌胡可滅心自知。富貴有命才可與。奪官置之三峽中。空山猿鳥同朝暮。道逢奇士握手談。明日家人不知處。平生心事一丹竈。萬里生涯兩芒屨。東嘉古寺臥高秋。時有巢仙來叩戶。山中豈識故將軍。但怪英姿凜不羣。電眼蝟鬚長八尺。論丹說劍氣凌雲。

雜題

松肪釀酒石根醉。櫛葉作衣雲外行。指點人間一長歎。秋風又到洛陽城。

又

山家貧甚亦支撐。時撫桐孫一再行。朝甑米空烹芋粥。夜缸油盡點松明。

又

牟裘老人只念歸。安用星辰動紫微。洛陽城中市兒眼。情知不識釣魚磯。

又

黍醅新壓野雞肥。茆店酣歌送落暉。人道山僧最無事。憐渠猶趁暮鐘歸。

又

釣魚吹笛本閑身。正坐微官白髮新。著屐此生猶幾網。可令復踏九衢塵。

又

山光染黛朝如溼。川氣鎔銀暮不收。詩料滿前誰領略。時時來倚水邊樓。

思蜀

思蜀寸心折。歸吳雙鬢衰。今年脫虎口。昨夜夢蠶頤。死隔平時友。愁吟別後詩。江山應好在。誰記踏青期。

又

一作劍閣客。閑遊將十年。不嫌狂駭俗。自許醉知天。瑞草溪橋路。青衣野廟壩。霜天獵歸處。萬里入橫鞭。

又

來從雲棧北。行度雪山西。故事談金馬。遺蹤訪石犀。閑情淡於水。豪飲醉如泥。壞壁塵封遍。何人拂舊題。

又

玉食峨峒楫。金齋丙穴魚。常思晚秋醉。未與故人疎。白髮當歸隱。青山可結廬。梅花消息動。悵望雪消初。余昔在

魏爲師伯暉。王志夫張功父王季夷。蓋上人輩。以秋晚來訪。樂飲旬日而去。

散吏

拜賜明時散吏名。頭銜字字敵冰清。讀書有味聊忘老。賦祿無多亦代耕。笠澤葦鱸秋向晚。綠山筴鶴月微明。人間樂事今真得。莫恨摧頹白髮生。

題剡溪盤上人梅花小軸

孤舟清曉下溪灘，爲訪梅花不怕寒。忽有一枝橫竹外，醉中推起短篷看。

夜夢遊驪山

秦楚相望萬里天，豈知今夕宿溫泉。穿雲漱月無窮恨，依舊潺湲古縣前。溫飛卿詩云：至今傷殿水，嗚咽縣前流。

枕上

簷角查查鶯語輕，窗櫺澹澹日痕生。清愁不逐爐香散，旋啜寒齋解宿醒。

五更讀書示子

近村遠村雞續鳴，大星已高天未明。牀頭瓦檠燈煜燼，老夫凍坐書縱橫。暮年於書更多味，眼底明明見莘渭。但令病骨尙枝梧，半盞殘膏未爲費。吾兒雖慧素業存，頗能伴翁飽菜根。萬鍾一品不足論，時來出手蘇元元。

夜坐

天公似欲假餘齡，鉞石年來幸小停。微火暖爐娛獨夜，斷雲吐月縞中庭。眼前樂事寒醅綠，身後虛名蠹簡青。賴有古人同此志，旁觀不用歎伶仃。

臥龍

危磴盤紆上翠微，倚天樓觀碧參差。雨來海氣先橫鶩，風惡松柯盡倒垂。孤鶴歸巢翅翎重，斷鴻覓伴語聲悲。人間萬事難禁老，醉撫闌干欲暮時。

卷二十四

野步晚歸

江村十日喜霜晴，草死泥乾拄杖輕。溝港淺來無鷺下，郊原暖處有牛耕。奔馳久厭兒童戲，淪落偏知世俗情。欲向書窗了殘課，歸來猶占夕陽明。

並山東南間步至野人吳氏居乃歸

信步閒行遍四鄰。擁籬老稚看綸巾。人隨世換朋儕少。志與年衰感慨頻。梅送冷香橫雪岸。雁翻孤影下煙津。豐年何地酬君賜。剩向旗亭作醉人。

晝睡

我年垂七十。齒髮日變遷。初無金丹術。何以追飛仙。惟有一高枕。可以餞餘年。蕭蕭敗榻上。鼻鼾心了然。靜如豹隱霧。湛若珠藏淵。寄語少年輩。未宜嘲孝先。

連日有雪意戲書

壯歲羈遊半九州。即今顛顛老菟裘。狂心那復繳鳩鵲。世事已如風馬牛。雪作未成增慘澹。葉飛欲盡更颼颼。聊將袖裏平戎事。判斷千巖萬壑秋。

兩蜀故人寄余閬中左縣題名石刻來皆二十餘年矣悵然有感

憶過西州樂飲時。百車載酒萬花圍。只言身外皆餘事。豈信人間有駭機。雪鬢已成新夢境。緇塵空化舊征衣。早知一笑難如此。剩判年光醉不歸。

歲晚

歲晚霜風正怒號。荒村敗屋擁藜蒿。窮猶可勉聖賢事。老豈遽忘鉛槧勞。從宦雖如棊已決。治經竊比繭初繰。閉門養氣淵源在。未敢摧傷學楚騷。

夢斷

夢斷燈殘聞雁聲。攬衣起坐待天明。街頭濁酒不堪醉。窗外疎梅空復情。人欲見擠真砭石。身寧輕用作投瓊。南湖可引春疇笑。只合躬耕畢此生。

雨聲

雨聲點滴朝復暮。中有詩人絕塵句。雲門咸池渺千古。斷譜遺音此其緒。兩聲點滴夜不休。中有羈臣去國愁。九疑聯翩湘水秋。忠誠內激涕自流。我今衰病百無念。臥對青燈吐殘焰。支牀納息效寒龜。傍枕長吟笑孤劍。雨聲不斷睡愈美。窗白鴉啼攬衣起。呼兒燒兔傾濁醪。又倚胡牀雨聲裏。

低垣矮屋倚江流。渾舍相娛到白頭。累世不知名宦樂。百年那識別離愁。飯餘常貯新陳穀。農隙閑眠子母牛。聞道少年俱孝謹。未應家法媿恬侯。

夜行湖上

月痕澹欲無。斗柄低半沒。荒陂雁飛鳴。草屋牛臥齧。我行湖邊路。霜冷刮病骨。斷隄沙水溼。屢滑常恐蹶。殘年垂七十。野處猶短褐。窮死士所有。權門不可謁。

冬夜讀書忽聞雞唱

齷齪常談笑。老生丈夫失意合躬耕。天涯懷友月千里。燈下讀書雞一鳴。事去六牀空獨臥。時來豎子或成名。春蕪何限英雄骨。白髮蕭蕭未用驚。

梅花絕句

凜凜冰霜晨。皎皎風月夜。南山有飛仙。來結尋梅社。

又

憶昔西戍日。夜宿仙人原。風吹野梅香。夢繞江南村。

又

錦城梅花海。十里香不斷。醉帽插花歸。銀鞍萬人看。

又

低空銀一鈎。糝野玉三尺。愁絕水邊花。無人問消息。

又

蘭莖古所貴。梅乃晚見稱。盛衰各有時。類非人力能。

又

子欲作梅詩。當造幽絕境。筆端有纖塵。正恐梅未肯。

清霜徹花骨。霜重骨欲折。我知造物意。遣子世味絕。

又

士窺見節義。木槁自芬芳。坐回萬物春。賴此一點香。

又

南村花已繁。北塢殊未動。更賒一月期。待我醉春甕。

又

山月縞中庭。幽人酒初醒。不是怯清寒。愁躡梅花影。

閉戶

簞瓢虛道不堪憂。閉戶方從造物遊。安樂本因無事得。功名常忌有心求。洗除仇怨忘蠻觸。收斂光芒靜斗牛。兒報牀頭春甕熟。人間萬事轉悠悠。

小園竹間得梅一枝

若耶溪邊鶴髮叟。流落一生端坐口。如今不怕桃李嗔。更因竹君得梅友。嶺頭羈旅萬里愁。江上淒涼一杯酒。枝橫檐月影在地。蕊插烏巾香馥手。交情歲晚金石堅。孤操凜然真耐久。荒山野水終自得。銀燭金壺亦何有。夢魂不接莊周蝶。心事肯付張緒柳。晚來畫角動高城。起舞聊爲放翁壽。

梅花絕句

幽谷那堪更北枝。年年自分著花遲。高標逸韻君知否。正在層冰積雪時。

又

萬瓦清霜夜漏殘。小舟斜月過闌干。老來一事偏堪恨。好看梅時卻怕寒。

得林正父察院書問信甚勤以長句寄謝

折柳湖南別尚新。書來已見柳搖春。故情存此膠投漆。薄俗從渠越視秦。長劍拄頤那復夢。短衣掩脛未全貧。有

詩亦欲頻持寄賜斷西江六六鱗

蔬食戲書

新津韭黃天下無。色如鵝黃三尺餘。東門彘肉更奇絕。肥美不減胡羊酥。貴珍詎敢雜常饌。桂炊薏米圓比珠。還吳此味那復有。日飯脫粟焚枯魚。人生口腹何足道。往往坐役七尺軀。羶葷從今一掃除。夜煮白石箋陰符。

歎俗

風俗陵夷日可憐。乞墻鉗市亦欣然。看渠皮底元無血。那識虞卿魯仲連。

晚飯罷小立門外有作

此心何敢慕輕肥。尙媿無功飽蕨薇。浦面烏衝殘靄去。柳陰人荷一鋤歸。病嗟短髮紛紛白。老覺初心種種非。百步空庭著明月。黃昏手自掩荆扉。

觀梅至花涇高唐叔解元見尋

春晴閑過野僧家。邂逅詩人共晚茶。歸見諸公問老子。爲言滿帽插梅花。

又

春暖山中雲作堆。放翁艇子出尋梅。不須問信道傍叟。但覓梅花多處來。

春雪

江雲垂野雪如簷。閩歲春來特地遲。倒盡酒壺終日醉。臥聽兒誦半山詩。

舟過季家山小泊

因睫濛濛渴煮茶。繫船來叩野人家。風翻翠浪千畦麥。水漾紅雲一塢花。健憤破荒耕犂确。幽禽除蠹啄槎牙。尋春非復衰翁事。且伴兒童一笑譁。

送王成之給事

我昔揚帆掠吳楚。夜泊秦淮聽春雨。明朝冠蓋擁長亭。誤辱諸公問良苦。是時衆中初識公。天驥蹴踏萬馬空。知心投分財數語。玉麈謾謾生清風。冶城醉墨鴉棲壁。長干祖道花照席。公方閉戶試諸生。坐歎江山少顏色。爾來

俛仰三十春。欲話舊遊無故人。豈知邂逅逢一笑。使我肝膽還輪囷。衰遲少復入城市。虛左屢招慚主意。忽聞上印卻悽然。悔不日日從公醉。朝廷三載虛一相。如公早合鸞臺上。滎河温洛久胡沙。此段功名勿多讓。

山家

白石青莎一徑斜。斷無人迹到山家。梁間歸燕避微雨。池面游魚爭落花。雪鬢但增新感慨。金鞭那復舊豪華。明窗睡起渾無事。篝火風爐自試茶。

送傑上人歸成都

錦城一別鬢成絲。今日山陰送傑師。亂絮飛花撲行路。正如東郭放船時。

又

春夜挑燈話別愁。此心已在錦江頭。舊時處處塵昏壁。想復長吟爲小留。

落魄

落魄江湖七十翁。欲持一笑與誰同。蕭蕭雪鬢難藏老。寂寂蓬門可諱窮。好句尙來敲枕處。壯心時在倚樓中。無涯毀譽何勞詰。骨朽人間論自公。

春晴出遊

芳樹參差葉已成。園林隨處聽鶯聲。遊人正樂還興歎。造物無心卻有情。糝徑落紅猶可藉。漲溪分綠已堪耕。蘭亭禹廟年年好。剩伴鄉鄰醉太平。

題瑩上人二畫

天地又秋風。谿山憶剡中。孤舟幸閑著。借我訪支公。

右剡谿

曉聽楓橋鐘。暮泊松江月。斯人亦可人。淡墨寫愁絕。

右吳江

和張功父見寄

舉世何人念此翁。敢期相語寂寥中。回思舊社驚年往。細讀來書恨紙窮。我用荷鋤爲事業。君將高枕示神童。叮寧一語宜深聽。信筆題詩勿太工。

又

佐命貂蟬再世孫。手鉏瓜壟傍青門。超騰已得丹換骨。戀著肯求香返魂。功父如夫人逝去。聞頗損眠食。故及之。正復悲秋如騎省。可令病渴似文園。庭前柏樹西來意。握手何時得共論。

山家暮春

澗屋清陰合。綠堤綠草纖。起蠶初放食。新麥已磨鎌。苦筍先調醬。青梅小蘸鹽。佳時幸無事。酒盡更須添。

又

行飯獨相羊。扶藜過野塘。晴光生蝶粉。暖律變鶯吭。麩笑羣兒競。蠶飢小婦忙。深知遊宦惡。窮死勿離鄉。

讀王季夷舊所寄詩

燈前忽見季夷詩。淚灑行間不自知。醉別西津如昨日。露晞漚滅已多時。余在京口與季夷別。後不復相見。

題庠閣黎二畫

秋山瘦嶙峋。秋水渺無津。如何草亭上。卻欠倚闌人。

右秋景

溪上望前峯。巉巖千仞玉。渾舍喜翁歸。地爐煨芋熟。

右雪景

入雲門小憩五雲橋

穀雨初過換夾衣。園林零落到薔薇。鳴鳩日暖遙相應。雛燕風柔漸獨飛。臺省多才吾輩拙。江湖久客暮年歸。雲門躡月方清絕。且倚溪橋看夕霏。

黃訪小店野飯示子坦子聿

山林久衰病。生世幾清明。未作松根臥。猶尋溪上行。食新炊麥飯。嘗盞啜莼羹。孺子雖知學。家貧且力耕。

山園

山園寂寂閉春風。箇裏天教著放翁。萬事已拋孤枕外。一尊常醉亂花中。閑隨戲蝶忘形久。細聽啼鶯得意同。月桂可憐常在眼。小叢時放一枝紅。

入城至郡圃及諸家園亭遊人甚盛

老子何曾慣市塵。今朝也復入城闈。太平有象人人醉。造物無私處處春。九陌鶯花娛病眼。一竿風月屬閑身。不緣與盡回橈早。要就湖波照角巾。

次韻范參政書懷

養氣頽然似木雞。謗讒寧復問端倪。生塵甑煖喜炊黍。轉釜羹香忘糝藜。萬里曾遊雲棧北。一庵今臥鏡湖西。殘年老病侵腰膂。那得隨人病夏畦。

又

已著山林掃塔衣。洗除仕路劍頭炊。心光熠熠雖潛發。領雪紛紛已太遲。度日只今閑水牯。知時從昔羨山雌。掩關未必渾無事。擬徧寒山百首詩。

又

身寄崎嶇欲盡時。且貪餘景伴兒嬉。故廬手種竹千箇。醉帽時簪花一枝。蠹篋有書供夙好。衡門無客作新知。半裘自欠封侯骨。敢道君房徹底癡。

又

感昔傷懷一喟然。事賢猶及紹興前。此身顛仆應無日。諸老凋零不計年。客少可羅門外雀。家貧也辦杖頭錢。插花醉舞春風裏。不學龐翁更問禪。

又

春寒還似暮冬天。敗絮重披有蝨緣。雖欠高僧分白氈。偶蒙暴客恕青氈。濁醪盎盎貧猶醉。倦枕昏昏晝亦眠。年少從渠笑衰癯。招呼再廟看龍船。近有偷兒取二釜去。它幸無所失亡。

又
祠祿恩寬亦例沾。屏居懷抱苦厭厭。戎邊事往功名忤。迎客兒扶老病兼。遇興榜舟無遠近。破愁沽酒任酸甜。殘年唯有讀書癖。盡發家藏三萬籤。

又
芋栗多儲煖復煨。一塵那許到靈臺。虹穿道室爐丹熟。龍吼空山匣劍開。躡屨未成遊地肺。掩扉聊欲隱天台。桃花榮謝吾何預。一任劉郎去後栽。

又
探梅方憶雪中歸。轉眼青青子滿枝。築圃漫爲娛老計。箋牋又賦送春詩。乞身何日還初服。坐食終年媿聖時。睡起西窗澹無事。一枰閑看客爭棋。

又
字內寓形財幾時。西山俄已迫斜暉。百年過隙古所歎。衆口鑠金胡不歸。已是平生行逆境。更堪末路踐危機。夜香一炷無他祝。稽首虛空懺昨非。

又
趙州行腳我安能。閑卻牀邊六尺藤。釣閣臥聽西澗雨。棋軒遙見北村燈。平生愛睡如甘酒。晚歲憂讒劇履冰。剩欲舒懷答清獻。半空鸞鳳媿孫登。

春晚村居雜賦絕句
作堤蜿蜿六百尺。西崦東村成一家。春雨乍晴桑吐葉。秋風初冷稻吹花。

又
鵝兒草綠侵行路。燕子花明照屋除。處處乞漿俱得酒。杖頭何恨一錢無。

又
一篙湖水鴨頭綠。千樹桃花人面紅。茆舍青帘起余意。聊將醉舞答春風。

朝書牛券拈枯筆。暮祭蠶神酌凍醪。閑放無憂窮有意。傍人錯羨此翁高。

又

澆書滿挹浮蛆瓮。攤飯橫眠夢蝶牀。莫笑山翁見機晚。也勝朝市一生忙。東坡先生謂晨飲爲燒書。李黃門謂午睡爲攤飯。

又

午枕閉門無客攪。夜燈開卷有兒同。若爲賤與天公道。盡乞餘生向此中。

沽垆西酒小酌

垆西小店酒新篘。一醉今朝覺易謀。從曠劫來俱有死。出青天外始無愁。功名未許妨高臥。風月猶能賦遠遊。造物向人元不薄。卷簾萬頃鏡湖秋。

戲詠村居

歌起陂頭正插秧。梯斜籬外又剝桑。日長處處鶯聲笑。歲樂家家麥飯香。林杏半丹禁宿雨。叢萱自斂避斜陽。北窗合是羲皇上。已置臨風八尺牀。

又

馬跡車聲斷已無。鄰翁笑語自相呼。衣裁大布如亭長。船設低篷學釣徒。懸物欲師僧施食。畏人愁報吏催租。陳蕃壯志消磨盡。一室從今卻掃除。

戲詠閒適

鈔書字細眼猶明。擣藥聲清疾漸平。桐葉雨邊尋斷夢。菊花香裏散餘醒。人間榮辱知難到。紙上興亡看亦輕。惟恨暮年交舊少。滿懷情話向誰傾。

又

剡曲稽山是故鄉。人言景物似瀟湘。三升花露春壺滿。八尺風漪午枕涼。樹合綠陰山鵲鬧。盆鑄紫石水梔香。回

思鳥帽京塵客始覺幽居白日長

又

涉世心知百不能。閉門嬾出病相仍。簞瓢味美如烹鼎。鄰曲人淳近結繩。半穎鴉殘牆外杏。一枝鶻鼻澗邊藤。蕭然掃盡彈冠興。敢爲詩情望武陵。

夜與兒子出門閑步

家住黃花入麥村。閑將稚子出柴門。草根螢墮久開闔。雲際月行時吐吞。未分悲憂攻齒髮。已將生死付乾坤。舊書半蠹猶堪讀。糲飯藜羹莫更論。

老景

老景雖無幾。爲農尙有餘。曾傳種魚術。新得相牛書。黍酒時留客。菱歌或起予。平生湖海志。高枕看巖徐。

初夏

筍生遮狹徑。溪漲入疎籬。漸及分秧候。還當煮繭時。兩昏雞共嬾。米盡鼠同飢。村巷無來客。清羸只自知。

晨起

老病少睡眠。臥見天窗白。棲鳥亦已鳴。一一翻去翮。我起將何之。且復守書冊。收斂萬里心。未厭容膝迫。吾家讀書法。一字亦當覈。勉哉積新功。莫問幾時客。王右丞歎白髮詩曰。俯仰天地間。能爲幾時客。

月夜短歌

老夫倚杖當戶立。霜氣青冥月輪溼。颼颼短髮冷入頂。更覺衣屨清風襲。月落欲盡夜蒼茫。回顧明星已煜煜。明星雖高未須喜。三足陽鳥生海底。

小軒

四面山如碧玉城。小軒聊得愜幽情。乍飛乳燕低無力。自落來禽靜有聲。麟筆殘功成水晶。蛇圖餘思入棋枰。閑中事業吾能了。未恨林廬送此生。

愛閑

愛閑惟與病相宜。壯歲懷歸老可知。睡熟素書橫竹架。吟餘犀管閣銅螭。水芭蕉潤心抽葉。盆石榴殘子壓枝。堪笑放翁頭白盡。坐消長日事兒嬉。

靜院

靜院房櫳雨送涼。熏籠衣幘潤生香。小屏風疊圖遙碧。古錦囊書揭硬黃。已占江湖寬處老。絕知日月靜中長。敲門無客妨人睡。更覺餘年樂未央。

雨晴

閑曳枯筇自在行。曲廊小閣賞新晴。幽禽葉底吟風久。殘雨枝間照日明。茶映盞毫新乳上。琴橫薦石細泉鳴。亦知老健終難恃。且復蕭然得此生。

讀史有感

英雄自古埋秋草。世上兒童共笑狂。射賊曾飛白羽箭。閉門空枕綠沉槍。隆中高臥人千載。易水悲歌淚數行。讀盡青編窗日晚。一尊聊復弔興亡。

暮歸

意行無所之。偶傍陂頭立。空村犬吠豪。高樹蟬嗥急。風塵一身老。海宇萬感集。還家日已暮。草露青鞋溼。

仰首座求鈍菴詩

鈍菴來問鈍何如。真箇能參鈍也無。掘井及泉那用巧。磨磚作鏡未爲愚。先師鉢袋當傳後。上座蒲團莫負渠。我亦年來念休歇。約君同作鈍工夫。

壁老求笑菴詩

臺省諸公六出奇。江湖狂客一生癡。無人爲問淨光老。撫掌掀髯端爲誰。

又

車馬往來塵暗天。淨光欣喜接諸賢。半甌春茗無多費。且結來生一笑緣。

裕罷

浴罷西軒物色幽。臥看香霧上衣篝。半廊月白初侵夜。一葉桐飛忽報秋。老覺年光殊袞袞。病知心事斷悠悠。碧簫且作池邊醉。玉色新醅手自篘。

夜坐水次

房屋縱。心星橫。北斗高掛南斗傾。蓼根爛熳螢火明。葦叢哀哀姑惡聲。我倚胡牀破三更。倏風吹衣月未生。玉門關。拂雲城。何時連營插漢旌。白頭書生未可輕。不死令君看太平。

六月十四日微雨極涼

湖上清秋近。齋中白日長。雲來樹收影。雨過土生香。蓮小紅衣溼。瓜甘碧玉涼。晚來幽興極。移榻近方塘。

十五日雲陰涼尤甚再賦長句

襍穢京塵觸熱行。豈知世有野堂清。磴茶落雪睡魔退。激水跳珠涼意生。壘壘清風隨塵柄。悠悠長日付棋枰。小舟先向蘋汀泊。浴罷還須泛月明。

水亭晚眺

暑雨初晴浦面寬。水亭景物卷簾看。聯舟作陣圍魚隊。屈竹成籬護芡盤。四海諸公半丘壘。百年幾夕倚闌干。日沈未用匆匆去。待挽銀河濯肺肝。

自詠

萬事不挂眼。終年常避人。荒畦荷鋤晚。環堵結茆新。病馬何勞斥。輕鷗未肯馴。雖慚市門卒。聊作葛天民。

立秋前四日夜泛舟至跨湖橋

短楫追涼十里來。夜深卻御便風回。離離蒲葉先秋老。嫋嫋蘋花帶露開。陌上歌呼簪稻穗。橋邊燈火賣官醅。時平樂事知何限。未歎流年兩鬢催。

信筆

爲善得禍吁可悲。顏回短命伯夷飢。何人長號血續淚。天自無心君自疑。

又

少年醉眼傲王侯。未路悲歌夜飯牛。濟世有時生一念。鏡中白髮勸人休。

又

急雨初過景物奇。一天雲作細鱗差。畫橈弄水三十里。恰是西村煙暝時。

示兒

斥逐襟袂歸。招喚振衣起。此是鄙夫事。學者那得爾。前年還東時。指心誓江水。亦知食不足。但有餓而死。小兒教汝書。不用日十紙。字字講聲形。仍要身踐履。果能稱善人。便可老鄉里。勿言五鼎養。肉食吾所鄙。

青山白雲歌

青山白雲翁。放浪酒中死。埋骨長松根。夜夜聽谿水。松老會作薪。骨朽會作塵。但留千載狂名在。知我他年自有

人。

小市狂歌醉墮冠。南山山色跨牛看。放翁胸次誰能測。萬里秋空未是寬。

蓬萊館午憩

驛門繫馬聽蟬吟。翻動平生萬里心。橋畔笛聲催日落。城邊草色帶煙深。關河歷歷功名晚。歲月悠悠老病侵。憶戍梁州如昨日。憑闌西望一霑襟。

夢遊散關渭水之間

平生望眼怯天涯。客裏何堪度歲華。但恨征輪無四角。不愁歸路有三叉。驛窗燈闇傳秋柝。關樹煙深宿暮鴉。叱犢老翁頭似雪。羨渠生死不離家。

卷二十一十五

秋夜

清夜不成寐。出門還浩歌。驚雲微翳月。薄露不傾荷。絡緯知時早。梧桐奈汝何。非關老懷惡。秋物感人多。

世事

世事本難全。吾生已媿天。借書常稱載。餽酒亦蟬聯。鐘粥隨時具。湖山此地偏。殘年更何慕。未死即神仙。

夜半池上作

夜永空齋睡不成。起扶藤杖傍池行。露濃雙鶴移枝宿。風急孤螢墮草明。斷續更籌傳古戍。縱橫河漢接高城。寒泉未漱神先爽。靜聽銅瓶汲井聲。

秋夜將曉出籬門迎涼有感

迢迢天漢西南落。喔喔鄰雞一再鳴。壯志病來消欲盡。出門搔首愴平生。

又

三萬里河東入海。五千仞嶽上摩天。遺民淚盡胡塵裏。南望王師又一年。

夏秋之交久不雨。方以旱爲憂。忽得甘澍喜而有作

亂點灑庭蕪。涼聲集井梧。綠荷傾作汞。翠蔓綴成珠。臥聽病良已。行吟愁欲無。天公終老手。談笑活焦枯。

藥圃

少年讀爾雅。亦喜騷人語。幸茲身少閑。治地開藥圃。破荒斲瓦礫。引水灌膏乳。玉芝移石帆。金星取天姥。申椒蘼蕪輩。一一粲可數。次第雨苗滋。參差風葉舉。山僧與野老。言議各有取。瓜香躬采曝。泉潔謹炊鬻。老夫病若失。稚子喜欲舞。餘年有幾何。長鏡真託汝。

書歎

只道才高始不容。無才也墮駭機中。市朝回首已陳迹。日月催人成老翁。仗馬自貪三品料。雲鵬方駕九天風。今朝有喜君知否。揀得煙汀下釣筒。

夜興

夜出茆堂自撒局。烏藤與我兩伶俜。涼蟾吐暈圍千丈。老木移陰可一庭。隔浦呼鳴聞宿鳥。傍簷開闔數流螢。放翁尙友論千載。不取梁鴻即管寧。

閑中頗自適戲書示客

髮猶半黑臉常紅。老健應無似放翁。烹野八珍邀父老。燒窮四和伴兒童。野八珍。見王履道詩。世又有窮四和香法。翦紗新製簪花帽。乞竹寬編養鶴籠。巢許夔龍竟誰是。請君下語勿匆匆。

新涼夜坐有作

老夫任運本騰騰。一念軒裳實未曾。閑似苔磯垂釣叟。淡如村院罷參僧。硯屏突兀蓬婆雪。書几青燐蓮勺燈。臨朶雪山硯屏。及漢嘉古檣燈檠。皆吾書室中物也。稚子可憐貪夜課。語渠循舊未須增。

荷花

風露青冥水面涼。旋移野艇受清香。猶嫌翠蓋紅粧句。何況人言似六郎。

又

南浦清秋露冷時。凋紅片片已堪悲。若教具眼高人看。風折霜枯似更奇。

醉中作

宦遊三十載。舉步亦看人。愛酒官長罵。近花丞相嗔。湖山今入手。風月始關身。少吐胸中氣。從教白髮新。

題齋壁

平生喜蕭散。垂老厭奔走。三千鏡湖上。樂事未曾有。晨開一卷書。暮把一卮酒。病除覺身輕。赤腳自躡藕。乃知造物意。亦未棄衰朽。今夕月殊佳。出門喚鄰叟。

老將

憶昔東都有事宜。夜傳帛詔起西師。功名無分身空在。猶指金釧說戰時。

又

百戰西歸變姓名。悲歌擊筑醉湖城。貂裘換得金鷄背。種藥南山待太平。

白髮

疾芮侵壯年。髮恐不及白。偶賴針石功。寓世成久客。行年垂七十。霜雪紛滿幘。耳目雖已衰。亦未與人隔。濯纓千

頃湖送老五畝宅。大布縫長衫。東阡復南陌。

小雨

百穀畏秋陽。常恐膏澤吝。大哉天公仁。屢霖來有信。蘋汀水未長。藥壠土先潤。新涼生葛衣。老僊亦小振。

秋日郊居

山雨霏微鴨頭水。溪雲細薄魚鱗天。幽尋自笑本無事。羽扇筇枝上釣船。

又

行歌曳杖到新塘。銀闕瑤臺無此涼。萬里秋風菰菜老。一川明月稻花香。

又

秋日留連野老家。朱槩鮓鱸粲如花。已炊藟散真珠米。更點丁坑白雪茶。藟散米名。丁坑茶名。

又

車蕩比鄰例饋魚。流涎對此四腮鱸。北窗雨過涼如水。消得先生一醉無。

又

今年斟酌是豐年。社近兒童喜欲顛。半醉半醒村老子。家家門口掠神錢。

又

魚鹹滿缶酒新篘。處處吳歌起壠頭。上客已隨新雁到。晚禾猶待薄霜收。剡及諸暨人。以八月來水鄉助穫。謂之上客。以其來自山中也。

又

又

兒童冬學鬧比鄰。據案愚儒卻自珍。授罷村書閉門睡。終年不著面看人。農家十月乃童子入學。謂之冬學。所讀

雜字百家姓之類。謂之村書。

又

兩翁兒女舊論姻。酒檐半腔喜色新。不遣交情隔生死。固應世好等朱陳。小兒子聿。聘亡友張叔渚季女。蓋尋舊

約也。

七月十七日大雨極涼

吳中七月熱未已。渴烏呀呀井無水。炎官護前不少斂。樹頭敢望秋風起。天公老手亦豈難。雨來黑雲如壞山。瓦溝淙淙萬銀竹。變化只在須臾間。老夫挑燈北窗下。山童夜歸泥過踝。草根促織有底忙。縑衣未贖還慨慷。

雨中作

山雨時時急。谿流日日添。煙苔緣暗壁。腐瓦落頽簷。老至那容卻。狂來未易砭。泥深村路絕。煙樹出青帘。

秋興

天遣幽人儘放狂。醉眠無復客爲妨。墨蛟飛下剡藤滑。蒼壁碾成官焙香。老境雖深身更健。清秋欲半日猶長。閉門莫道都無事。又了移花一段忙。

又

蓬蒿門巷絕經過。清夜何人與晤歌。蟋蟀獨知秋令早。芭蕉正得雨聲多。傳家產業遺書富。玩世神通醉臉酡。如許癡頑君會否。一毫不遣損天和。

又

老子雖貧未易量。風流猶在小茆堂。蒲萄錦覆桐孫古。鸚鵡螺斟玉瀝香。千點荷聲先報雨。一林竹影剩分涼。秋來便有欣然處。新種蕙絲已滿塘。

兩夜南堂獨坐

老夫眼暗牙齒疎。七十未滿六十餘。故人欲盡誰與娛。獨坐默誦小年書。北風日夜吹雨急。空村泥深屋茆溼。風皇覽德乃下集。可憐飛螢當熠燿。

夜不能寐復呼燈起坐戲作

吳中秋半暑未退。今歲雨多如許涼。藥鼎熒熒伴孤寂。三更袖手聽啼螿。

喜晴

久雨羣蛙日夜號。染我鬢色滿江郊。草書已悟屋漏壁詩句。免悲風卷茆喚婦晴鳩鳴。廢圃種材棲蠶補足身。祈乾我亦思來客。未暇移書廣絕交。

枕上

守書眼欲闔。投枕乃瞭然。兒曹戒曳履。相語翁正眠。豈知擁敗褐。炯如寒魚鰓。少時笑老人。其事今好還。蕭蕭雙白鬢。忽忽七十年。豈惟老態出。已覺衰病纏。白晝尙便靜。況此清夜闌。妙處殆難名。睡與不睡間。

新作南門弊廬本西鄉設門紹熙壬子歲始翦關荆棘移門南鄉

荆棘移門未費錢。好山無數碧巉然。病夫憤憤真堪笑。反衣狐裘三十年。

寄成模卿將軍

燕領將軍萬里遊。谿山好處即遲留。頗聞南岳度殘夏。寧憶北平防盛秋。君已飛騰丹換骨。我方衰病雪蒙頭。禪龕也有新勛業。百萬魔軍一戰收。

病臥

病臥東齋怕攬衣。年來真與世相違。橫林蠹葉秋先覺。別浦驕雲暝不歸。歲月惟須付樽酒。江山竟是屬漁磯。鄰翁一夕成今古。愈信人生七十稀。村東吳翁病一夕而卒。

晚晴

今年秋多陰。殊未決豐歉。時時雲一片。復作雨數點。晚來晴頗牢。天宇碧如染。微風過林梢。斜日在山崦。農家築場罷。竭作事收斂。貪睡吾可慙。齋扉晝常掩。

秋雨初晴有感

炎曦赫赫尙餘威。冷雨蕭蕭故解圍。號野百蟲如自訴。辭柯萬葉竟安歸。芼羹菰菜珍無價。上釣魴魚健欲飛。散吏何功露一飽。高眠仍聽擣秋衣。

獨飲

怪怪奇奇不自懲。晚途猶復氣橫膺。舡船那待清歌勸。酒到愁邊量自增。

小築

小築湖邊避俗囂。幾年于此寓篔簹。雖非隱士子午谷。寧媿詩人丁卯橋。羅雀門庭無俗駕。緣雲磴路有歸樵。詩情酒興常相屬。堪笑傍人說寂寥。

示兒

文能換骨餘無法。學但窮源自不疑。齒豁頭童方悟此。乃翁見事可憐遲。

新晴

積雨已凄冷。新晴還少和。稼收平野闊。木落遠山多。土潤朝畦菜。機鳴夜擲梭。時清年歲好。吾敢歎蹉跎。

晨起坐南堂書觸目

林塘天與占深幽。一把茆輕萬戶侯。漠漠斷雲開復合。纖纖微雨落還收。奇峯角立千螺曉。遠水平鋪疋練秋。詩料滿前吾老矣。筆端無力固宜休。

壬子八月癸卯大風雨拔木飄瓦通夕不能寐

我昔浮江坐食快。六十幅蒲船尾挂。惡風吹到馬當祠。出沒蜿蜒舞澎湃。舟人失色急倒檣。共上蘆灣望祠拜。風雲晝晦性命憂。更復何心問薪菜。顛危僅免葬魚腹。至今常抱垂堂戒。豈知風雨有茲夕。屋破窗鳴紛百怪。直疑屋外即長江。九轉得生那可再。正襟默坐徐自思。忠信固可當喪敗。鬼神雖惡技有窮。卷地破山真一噫。明朝倚杖看晴雲。茲夕驚心復何在。

秋雨不止排悶

放翁愁坐茆齋裏。泥潦連村不得行。夜夜溼星占雨候。時時老木送秋聲。小詩旋錄兼行草。薄酒新蕩任濁清。身世正如萍在水。略無根柢也能生。

用短

用短定非癡。愛閑真復奇。飯香貧始覺。睡味老偏知。畦地閑栽藥。留僧靜對棋。餘年猶有幾。捨此欲何之。

覽鏡有感

齒如敗屐鬢成絲。七十之年敢自期。闕世久應書鬼錄。強顏那復乞山資。緋衫蔭子踰初望。下澤還鄉負聖時。回首墮溝元有命。不須深計巧丸兒。

吳徑山策老

岌岌龍門萬納傾。翩翩隻履又西行。塵侵白拂繩床冷。露滴青松卯塔成。遙想再來非四入。尙應相見話三生。放翁大欠修行力。未免人間愴別情。

松風東嶺諸松多。余丙戌歲手種。距今壬子二十有七年矣。

半嶺松風破睡時。起看山月倚筇枝。縱橫滿地髯龍影。盡是當年手自移。

醉歌

佛如優曇時一出。老姥何爲憎見佛。山從古在天地間。愚公可笑欲移山。火其書。廬其居。佛亦何曾可掃除。子有孫。孫有子。山竟嵯峨汝何喜。床頭有酒敵霜風。詩成老氣尙如虹。八萬四千顛倒想。與君同付醉眠中。

秋夜讀書有感

鬢毛焦秃齒牙疎。老病燈前未廢書。卷裏光陰能屬我。人間聲利久忘渠。窮山藏拙猶嫌淺。糲飯支羸不願餘。兩露安能澤枯朽。故人枉是費吹嘘。時所聞如此。

廬州亂

高寺坡前火照天。南定樓下血成川。從事橫屍太守死。處處巷陌森戈鋌。此州雄跨西南邊。平安烽火夜夜傳。豈知癰疽潰在內。漫倚築城如鐵堅。從來守邊要人望。縱有好謀氣先喪。即今死者端爲誰。姓名至死無人知。

東鄰築舍與兒輩訪之爲小留

甲第潭潭莫羨渠。窮人從昔愛吾廬。茆茨新潔嗟何欠。鄰里追隨故不疎。甕醬芬香盤早免。白齋珍醜膾寒魚。年豐日有攜尊興。家乘從今不一書。黃魯直有日記。謂之家乘。

夜坐

瘦骨倚蒲團。燈前影自看。心清便獨夜。酒盡怯新寒。病虎減精采。飢鴻摧羽翰。晚途堪笑閱。猶擬乞祠官。

西鄰亦新葺所居復與兒曹過之

竹屋茆檐煙火微。長歌相應負禾歸。窮居幸可支朝夕。世事何曾有是非。新茁畦蔬經宿雨。半開籬槿弄斜暉。老翁略與吾年等。眷眷遮留莫苦違。

有術士過門謂余壽及九十

形骸鶴瘦復松枯。況是新霜滿鬢鬚。醉似在家狂道士。愚于識字老耕夫。敢言萬里封侯事。但問縱文入口無。許我年如伏生比。逢時猶解誦唐虞。

晚眺

秋晚閑愁抵酒濃。試尋高處倚枯筇。雲歸時帶雨數點。木落又添山一峯。鳴雁沙邊驚客牖。行僧煙際認樓鐘。箇中詩思來無盡。十手傳抄畏不供。

秋日焚香讀書戲作

世事無端自糾紛。放翁隱几對爐熏。好官何恨輸玄保。奇字猶須屬子雲。婆律一銖能敵國。水沉盈握有兼斤。閑門莫怪常終日。不是高人不遣聞。

九月一日夜讀詩稿有感走筆作歌

我昔學詩未有得。殘餘未免從人乞。力孱氣餒心自知。妄取虛名有慚色。四十從戎駐南鄭。酣宴軍中夜連日。打球築場一千步。閣馬列廐三萬疋。華燈縱博聲滿樓。寶釵豔舞光照席。琵琶絃急冰雹亂。羯鼓手勻風雨疾。詩家三昧忽見前。屈賈在眼元歷歷。天機雲錦用在我。翦裁妙處非刀尺。世間才傑固不乏。秋毫未合天地隔。放翁老死何足論。廣陵散絕還堪惜。

上書乞再任冲佑

此枝六尺藤。方屋九寸帽。人間無處著。山水歸寄傲。耳中聞淵明。自我髮未燥。高標不可揖。七十忽已到。明窗置經龕。奧室養丹竈。雖云迫遲暮。要足平昔好。悠然萬念空。快若河卷掃。寄聲幔亭雲。行拜散人號。

秋晚歲登戲作

水落沙痕出。大高野氣嚴。餅香油乍壓。齋笑韭新醃。裘褐風霜逼。衡茆醉夢兼。菊花香滿把。聊得擬陶潛。

又

漫漫蕃鋪白。纍纍橘弄黃。未論癯腹飽。已覺醉魂香。曳杖行歌裏。拋書倦枕傍。軒車雖已矣。終媿食官倉。時方謀
荷祿。

舟中望禹祠蘭亭諸山

艣枝謳軋出煙津。醉倚船篷岸幅巾。禹穴探書慚舊學。塗山執玉記前身。雲低野澤號新雁。露溼芳洲老白蘋。逸
少亡來欲千載。眼中髣髴見清真。

夜觀嚴光祠碑有感

我昔過釣臺。峭石插江淥。登堂拜嚴子。挹水薦秋菊。君看此眉宇。何地著榮辱。雒陽逢故人。醉腳加其腹。書生常
事爾。乃復駭世俗。正令爲少留。要非昔文叔。平生陋范曄。瑣瑣何足錄。安得太史公。妙語寫高躅。

閑趣

濯罷銅駝陌上塵。此生長作水雲人。更貧家業猶供酒。未死年光盡屬身。閉戶棋聲聞臍膊。卷簾山色對嶙峋。貴
公漫說林間事。東路何人岸角巾。

壬子九日登山小酌

老懷多感驚佳節。病骨宜寒喜薄霜。玉脍齏中橙尙綠。彩猫餠上菊初黃。幾年虛負登高興。何許重尋落帽狂。淺
酌易醒歸薄暮。又成支枕獨焚香。

舍北望水鄉風物戲作絕句

西風沙際矯輕鷗。落日橋邊繫釣舟。乞與畫工團扇本。青林紅樹一川秋。

新黏竹隔作煖閣

骨相元作臞儒酸。况復疾豎乘衰殘。鸚姑聲急兩方作。烏舅葉丹天已寒。封姨青女交作尾。竹君褚生卻憐客。小
兒但喜夜爐紅。老夫更愛晨窗白。蝸牛負廬亦自容。是豈不足支窮冬。已勝展鉢三椽下。莫羨苴茆萬戶封。

禹跡寺南有沈氏小園四十年前嘗題小闕壁間偶復一到而園已易主刻小闕于石讀之悵然

楓葉初丹樹葉黃。河陽愁鬢怯新霜。林亭感舊空回首。泉路憑誰說斷腸。壞壁醉題塵漠漠。斷雲幽夢事茫茫。年來妄念消除盡。回向禪龕一炷香。

贈鏡中隱者

小築林間避世紛。不妨野叟是知聞。來遊喜有楫迎我。歸臥豈無雲贈君。得鹿夢回初了了。吠獒聲惡尙狺狺。從今雪夜頻相過。紙帳蒲團要策勳。

月夜作

江風吹微雲。長空散魚鱗。秋露洗明月。青山湧冰輪。我病適良已。欣然岸綸巾。索酒惱諸兒。哦詩驚四鄰。頗覺胸次空。未歎白髮新。庭菊臥殘枝。奇香猶絕塵。園梅雖未花。瘦影已可人。方池憊齋淪。醜石立嶙峋。幸無千金費。亦足終吾身。樂哉何所恨。擊壤從堯民。

記夢

我夢結束遊何邦。小憩野館臨幽窗。千峯廬山錦繡谷。一水蜀道玻璃江。春耕叱犢翁眉龐。曉汲負盎女鬢雙。忽然夢斷已雞唱。擁衾坐待鄰鐘撞。

感舊

當年書劍揖三公。談舌如雲氣吐虹。十丈戰塵孤壯志。一簪華髮醉秋風。夢回松漠榆關外。身老桑村麥野中。奇士久埋巴峽骨。燈前慷慨與誰同。獨孤景略死于惠州十年矣。

小園

窄窄柴門短短籬。山家隨分有園池。客因問字來攜酒。僧趁分題就賦詩。晨露每看花蘸垢。夕陽頻見樹陰移。此二事非閑寂不知也。拂衣司諫猶忙在。此趣淵明卻少知。

初冬

已罷彈冠欲挂冠。一菴天遣養衰殘。兩荒園菊枝枝瘦。霜染江楓葉葉丹。蠶釜帶鱗烹白小。蓬門和蔓繫黃團。夕

陽更動閑遊興。十月吳中未苦寒。

閑中樂事

轉老轉迂疎。胸中一物無。放言誇酒聖。著論笑錢愚。掃地收松粉。全巢買鶴雛。登臨未應倦。天給短筇扶。

又

得喪略相當。幽居氣味長。五窮雖偃蹇。二豎已奔忙。出甑桃花軟。傾瓢竹葉香。語君真富貴。不是傲羲皇。

小舟

小舟無定處。隨意泊江村。雲氣分山疊。沙汀蹙浪痕。宦途危虎尾。閑味美熊蹯。高詠淵明句。吾將起九原。

九月二十三夜小兒方讀書而油盡口占此詩示之

徹骨貧來累始輕。孤村月上正三更。汝緣油盡眠差早。我亦尊空醉不成。南陌金羈良自苦。北邙麟冢半無名。書生事業期千載。得喪從來未易評。

今年立冬後菊方盛開小飲

胡床移就菊花畦。飲具酸寒手自攜。野實似丹仍似漆。村醪如蜜復如齋。傳芳那解烹羊腳。破戒猶慚擊蟹膾。一醉又驅黃犢出。冬晴正要飽耕犁。

行飯暮歸

宿疾去如掃。出門芒屨輕。菊叢寒蝶鬧。楓葉夕陽明。結陣看鴉集。銜衣喜犬迎。踟躕搔白首。詩句入經營。

晝眠

困睫瞢騰老孝先。麤氎布被早霜天。珥貂碧落應無分。且向人間作睡仙。

睡覺聞兒子讀書

夢回聞汝讀書聲。如聽蕭韶奏九成。且要沉酣向文史。未須辛苦慕功名。人人本性初何欠。字字微言要力行。老病自憐難預此。夜窗常負短燈檠。

余得木杖於秦望山中。今三十年矣。隴蜀萬里。未嘗相捨。戲賦長句贈之。

捩搗到處覺身輕。楚澤秦關不計程。只道維摩無侍者。誰知上座是同行。青鞵白拂真相稱。湘竹谿藤誤得名。珍重從今常倚壁。住菴吾欲過浮生。

步至近村

藥物扶持疾漸平。布裘絮帽出柴荆。荒堤經雨多牛跡。村舍無人有碓聲。數蝶弄香寒菊晚。萬鴉回陣夕楓明。老翁隨意閑成句。不似劉侯要取名。

五鼓不得眠起酌一盃復就枕

栖冷雞聲咽。窗深燭焰明。流年容易過。華髮等閒生。濁挹連醅酒。香拈帶葉橙。殘骸付螻蟻。汗簡更須名。

醉倒歌

曩時對酒不敢飲。側睨旁觀皆具錦。狂言欲發畏客傳。一笑未成憂禍稔。如今醉倒官道邊。插花不怕顛狂甚。行人喚起更嵬昂。牧豎扶歸猶蹉跎。始知人生元自樂。誤計作官常懷懍。秋毫得喪何足論。萬古興亡一酣枕。

冬夜

新醅引睡睡味濃。有如猩猩薦駝峯。屏深氈煖衾稠重。鼻端雷起驚兒童。床頭蘭缸綴玉蟲。雙瓶湯熟爐正紅。夢回起坐夜未中。憑几困睫猶瞢瞢。霜風凋盡玉井桐。月落翠霧淒房櫳。一盃罌粟蠻奴供。莊周蝴蝶兩俱空。

默坐

巧說安能敵拙修。焚香默坐一窗幽。煌煌炎火常下照。浩浩黃河方逆流。氣住神仙端可學。心虛造物本同遊。絕知此事不相負。荆棘剪除梨栗秋。

日暮

淅淅風吹葉。淒淒雨作泥。鵲寒猶遶樹。雞晚自歸栖。老病心知有。榮枯理本齊。端居嫌太嬾。拾瓦傍蔬畦。

遣興

勦業如今莫繫懷。開單日日學僧齋。讒深只有天堪問。憂極渾無地可埋。看鏡已成雙白鬢。登山猶費幾青鞵。晚來詩興誰能那。雀噪空園葉擁階。

泛舟

去去泛輕舸。飄然與自豪。葉凋山寺出。溪瘦石橋高。草徑牛羊下。煙村鷓鴣號。還家一盃酒。未畏暮風饒。

夜讀范至能攬轡錄言中原父老見使者多揮涕感其事作絕句

公卿有黨排宗澤。帷幄無人用岳飛。遺老不應知此恨。亦逢漢節解沾衣。

初冬掃東山之麓置數石於喬松巨竹間以眺西山甚自適也

護霜天氣半晴陰。小嶺蒼寒薛徑深。翠鬻欲成孤鳳舞。青松先作老龍吟。漁歌浦口生高興。騎吹邊頭負壯心。兒報東村。登梅發。杖藜與汝共幽尋。

南堂脊記乃已三十年偶讀之悵然有感

一住三山三十載。交親漸覺眼前稀。長松鬱鬱偃高蓋。新竹森森添舊圍。沙徑雨餘留鳥迹。柴門日落鎖煙扉。放翁正倚蒲團穩。遼海從渠萬事非。

卷二十一

醉臥松下短歌

披鹿裘。枕白石。醉臥松陰當月夕。寒藤夭矯學草書。天風蕭森入詩律。忽然夢上百尺顛。綠毛癢近巢雲仙。相攜大笑咸陽市。俯仰塵世三千年。

霜草

入冬已兩旬。澤國霜始實。可憐青青草。一夕生意盡。嗟予蒲柳姿。去日若飛隼。草衰有復榮。我髮寧再髮。微官雖置散。束帶終自憫。漸退用婦言。千載付一哂。白樂天詩曰。猶被妻兒教勸退。莫求致仕且分司。

冬夜

百錢買菅席。錦茵亦何加。疋布縫麕裘。安用狐腋奢。昨者南山僧。松肪寄一車。可以照讀書。堅坐待朝霞。顧影爲發笑。山童雙髻丫。一掬琴高魚。聊用薦夜茶。

村東

村西行藥到村東。沙路溪流曲折通。莫問梅花開早晚。杖藜到處即春風。

小園

新作小溪園。牽藤迤縲門。釣船橫北渚。樵路接東村。靜坐依林樾。慵眠傍竹根。還家日已夕。棲雀鬧黃昏。

書適

老翁垂七十。其實似童兒。山果啼呼覓。鄉讎喜笑隨。羣嬉累瓦塔。獨立照盆池。更挾殘書讀。渾如上學時。

又

家食身無役。耆年力未衰。寫歡那待酒。隨意或成詩。窮達元非我。寃親竟是誰。惟嗟見事晚。枉卻鬢邊絲。

狂夫

狂夫與世本難諧。醉傲王侯亦壯哉。奕奕方收巖際電。酣酣已起枕間雷。回天力在人終歎。入月星來敵自摧。千

載鬼雄皆國土。直令窮死未須哀。

白髮

白髮今年一倍增。閉門養此老無能。牛牟被野霜天晚。禾稼連雲歲事登。未午春炊餘脫粟。乍寒包裹有鶯繒。自

憐未廢詩書業。父子蓬窗共一燈。

檢舊詩偶見在蜀日江濱池醉歸之篇悵然有感

江濱池頭爛醉歸。青旗日晚插城扉。正馳玉勒衝紅雨。又挾金丸伺翠衣。老境漸侵歡意盡。舊遊欲說故人稀。憑

高三歎君知否。倦鷁無風亦退飛。

十一月四日風雨大作

風卷江湖雨闌村。四山聲作海濤翻。溪柴火軟蠻氈暖。我與狸奴不出門。

又

僵臥孤村不自哀。尙思爲國戍輪臺。夜闌臥聽風吹雨。鐵馬冰河入夢來。

冬日觀漁獵者

人閑漁獵各相從。南陌東阡處處逢。繡羽觸機餘耿介。錦鱗出網尚噉嗎。傍觀扶杖常移日。就買還家足御冬。更待風霜都過盡。卻從春野看春農。

雨晴

山川炳煥似闢國。風雨退收如解嚴。老子真成無一事。抱孫負日坐茆簷。

病起

少年射虎南山下。惡馬強弓看似無。老病卽今那可說。出門十步要人扶。

奉祠

明窗松石供琴薦。小鼎山泉煮藥苗。乞得奉祠還自愧。猶將名姓到中朝。

假寐見海山異甚作小詩記之

海如黛色深。浪作雪點濺。數峯黃金山。巖絕出水面。此非想與因。了了目中見。何時真往遊。浮世付掣電。

松下縱筆

自掃松陰寄醉眠。龍吟虎嘯滿霜天。卻思初到人間世。似是唐堯丙子年。

又

老不能閑莫笑予。五千言豈世間書。青松折取當塵尾。爲子試談天地初。

又

種玉餐芝術不傳。金丹下手更茫然。陶公妙訣吾曾受。但聽松風自得仙。

又

髯龍天矯欲飛去。百尺蒼藤羅絡之。應笑此翁才不進。故將老氣起吾詩。

拜勅口號

黃紙如鴉字。今朝下九天。身居鏡湖曲。銜帶武夷仙。日絕絲毫事。年請百萬錢。祠俸錢粟絮帛。歲計千緡有曉。恭

惟優老政。千古照青編。

又

扶病中庭拜。君恩抵海深。頓增新祿格。暫拂舊朝簪。心欲先營酒。兒言且贖琴。人生奉祠貴。喜色動山林。僕以官視大卿監。俸給皆增於昔。尤爲忝竊也。

閑居

土鑄茶七椀。瓦甌稷三升。兀兀能言石。騰騰有髮僧。淨巾裁白氈。拄杖采紅藤。尙喜冬來健。逢山得遍登。

十一月十八日蒙恩再領冲佑鄰里來賀謝以長句

綠章封事徹虛皇。黃紙除書降野堂。海上春常探先到。壺中日已不勝長。冰銜再署仙班貴。鶴料重支玉粒香。便掛朝冠亦良易。金銅茶籠本相忘。往時嘗使閩者。例餽茶三年。今不講已久。余蓋未嘗霑及也。

題老學菴壁

此生生計愈蕭然。架行苦茆只數椽。萬卷古今消永日。一窗昏曉送流年。太平民樂無愁歎。衰老形枯少睡眠。喚得南村跛童子。煎茶掃地亦隨緣。

冬晴日得閑遊偶作

不用清歌素與蠻。閑愁已似解連環。閨年春近梅差早。澤國風和雪尙慳。詩思長橋蹇驢上。碁聲流水古松間。牋天公事君知否。正乞柴荆到死閑。

示元禮

燕居侍立出扶行。見汝成童我眼明。但使鄉閭稱善士。布衣未必媿公卿。

書巢冬夜待旦

掃葉擁墻寒犬行。編茆護柵老雞鳴。風霜漸逼歲時晚。形影相依燈火明。史策千年媿豪傑。關河萬里愴功名。固應死抱無窮恨。老病何由更請纓。

醉後莊門望西南諸山

身是咸陽舊酒徒。龍鍾猶復泥村酤。百年略似夢長短。一醉且隨家有無。登覽未應慚劇力。功名正爾歎頭顱。夕陽又凭闌干立。誰畫三山岸幘圖。

著書

平生著書汗馬牛。一事不施今白頭。河洛未清非我責。山林高臥復何求。愚公何笑金堆屋。老子唯須糟築丘。華表無人識歸鶴。煙波底處有馴鷗。

探梅

我遊東村衝暮煙。斷橋流水鳴澌澌。欲尋梅花作一笑。數枝忽到拄杖邊。高標元合著山澤。絕豔豈復施丹鉛。定知曾授餐玉法。不爾恐是凌波仙。錦江賦詩忽萬里。蓬山把酒今三年。相逢風味宛如昨。人生何者非前緣。頗思取醉極清賞。杖頭幸有百許錢。但判插破烏紗帽。莫記吹落黃金船。

歲暮風雨

驕風起海澨。浩蕩東北來。鐵騎掠陣過。秋濤觸山回。老夫北窗下。坐守寒爐灰。處世困憂患。萬事學低摧。便欲滅燈睡。門閉不敢開。並海固多風。汝孱良可哀。念昔少年日。從戎何壯哉。獨騎洮河馬。涉渭夜銜枚。

又

一冬少雨雪。人意常昏昏。夜半有奇事。雨聲卷江村。陸子真老農。破屋依頽垣。扶持衰病身。收召譴逐魂。手烹醬陰齋。美若乳下豚。聽雨取一醉。不厭村酒渾。眼昏燈生暈。衣弊蟲可捫。父子幸相守。萬事何足論。

自夏秋匱甚慨然有感

萬卷縱橫眼欲枯。老猶閉戶誦唐虞。故人誰復訪生死。鄰父幸能通有無。雲子翻匙新稻飯。天吳坼繡舊衣襦。時平得掩松根骨。也勝王孫泣路隅。

題四仙像

反虜鯨鯢世共讎。漢公勛業過伊周。市門灑淚塵埃裏。誰與朝廷植委裘。梅福

又

世上年光東逝波。咸陽銅狄幾摩挲。神仙不死成何事。只向秋風感慨多。薊子訓

又

曾看四嶽薦虞鯨。閱歲三千一瞬間。歸臥青山孤絕處。白驢常伴白雲閑。張果

又

蓮花峯下張超谷。此老何曾有死生。聞道風清月明夜。至今鼻息亂松聲。陳搏

自賈

窮途敢恃舌猶存。小築城西十里村。未掛衣冠慙士節。免輸薪粲荷君恩。文章跌宕忘繩墨。學問荒唐失本原。仕宦一生成底事。子孫世世記吾言。

自解

四十頭顱已可知。殘年至此復何爲。著書不直一盃水。看鏡空添千縷絲。達宦獨驕儒作戲。後生遽化吏爲師。有冠當掛無餘說。但恨衰翁見事遲。

午睡起消搖園中因登山麓薄暮乃歸

老病攻百骸。微纏困束縛。頽然一熟睡。如獲萬金藥。窗明竹影亂。林暖鳥聲樂。夜深香欲上。火焙湯正作。臺甌羞茗荈。銅洗供盥濯。整巾出庭戶。曳杖歷巖壑。遙岑見木杪。細水齧籬腳。踟躕遂忘歸。清嘯送日落。

羣兒

野行遇羣兒。呼笑運甕忙。共爲小浮圖。嶙峋當道旁。蜆殼以注燈。梔足以焚香。須臾一闕散。無益亦何傷。古來富貴人。峨冠登廟堂。謀謨一悖謬。縣宇失太康。坐令安業民。血喋而屍僵。傳呼一朝寵。遺患日月長。均爲兒戲爾。禍機孰深藏。我作羣兒詩。持用砭世盲。

久疾灼艾小愈晚出門外

老境侵凌病滿軀。火攻下策得枝梧。沽來村酒初判醉。吐去山童不遺扶。霜重木凋鴉可數。溪清魚見鷁相呼。興闌卻掩齋扉臥。閑看青燈照藥爐。

夙興弄筆偶書

憂患熏心少睡眠。雞號窗白一欣然。道旁歲晚貂裘弊。燈下書成鐵硯穿。杜老慣聽兒索飯。鄭公何管客無氈。春風不解嫌貧病。尙擬花前醉放顛。

縱筆

山合水將窮。真宜著放翁。醉嫌天地迳。老覺歲時公。偃蹇松逃世。翩仙鶴駕風。舊交零落盡。一笑與誰同。

冬晴閑步東村由故塘還舍作

故園三徑可婆娑。遇興遵塗負杖歌。霜重天寒山色淡。草枯野曠獵徒多。解刀尙可謀黃犢。揮帖無由致白鵝。自計長閑何所恨。一生心事在煙波。

紅藤拄杖獨相羊。路遶東村小嶺傍。水落枯萍黏蟹根。鄉人植竹以取蟹。謂之曰棍。雲開寒日上魚梁。洛陽二頃言良是。光範三書計本狂。歷盡危機識天意。要令閑健返耕桑。

十二月八日步至西村

臘月風和意已春。時因散策過吾鄰。草煙漠漠柴門裏。牛迹重重野水濱。多病所須唯藥物。差科未動是閑人。今朝佛粥更相餽。更覺江村節物新。

夜聞湖中漁歌

夢回一燈翳復明。臥聞湖上漁歌聲。嗚嗚年低忽更起。孀孀欲斷還微縈。初隨缺月墮煙浦。已和殘角吹江城。悲傷似擊漸離筑。忠憤如撫桓伊箏。放臣萬里憂國淚。戍客白首懷鄉情。峽猿失侶方獨宿。沙雁垂翅猶還征。巴巫竹枝短亭晚。瀟湘欸乃孤舟橫。世間此恨故相似。使我百感何由平。

忽得京書有感

白髮蒼顏七十翁。朽株枯木略相同。如山儲藥難醫拙。齊斗堆金不換窮。昨夢已拋空劫外。殘年全付醉眠中。故人苦未知心事。一紙空煩寄斷鴻。

晚步門外書觸目

數椽茆屋鏡湖傍。喬木蒼煙一徑長。酒賤過門多醉叟。天寒棲畝有餘糧。歌呼草市知人樂。簫鼓叢祠喜歲穰。只道老來詩思盡。未妨擊壤頌時康。

親舊書來多問近。况以詩答之。

耐辱推顏百不能。居然老病住菴僧。流年速似一彈指。更事多於三折肱。庭樹影中聞夜汲。隣機聲裏對寒燈。沈詩任筆俱忘盡。酒戶新來卻少增。

開書篋見韓无咎書有感

老覺人間萬事非。幽棲幸已脫塵鞿。殘年得飽不啻足。舊友半空誰與歸。開眼不妨成一夢。翦翎何至羨羣飛。龍圖老子今安在。把卷燈前淚滿衣。

夜大雪歌

朔風吹雪飛萬里。三更菽菽鳴窗紙。初疑天女下散花。復恐麻姑行擲米。異哉凍碣已生冰。信矣重衾如潑水。山中臥爛松竹折。庭前蔽地烏鳶死。昨日之煖殊昏昏。桃李欲圻春滿園。陰陽錯繆世或有。物窮則變古所言。雖云明年幸一麥。凍餒溝壑知誰存。嗚呼今夕之雪未足論。所憂明日巉巖高塞門。

寄宇文成州

成州太守比何如。夢裏依然把臂初。復起卿當用卿法。長閑吾實愛吾廬。五湖風雨孤舟夜。萬里關山一紙書。正使兩翁長隔闊。子孫它日莫相疎。

示子聿

我鑽故紙似癡蠅。汝復孳孳不少懲。父子更兼師友分。夜深常共短檠燈。

雪

平郊漫漫覺天低。况復寒雲結慘悽。老子方驚飛蛺蝶。羣兒已說聚狻猊。中宵鳶墮頻摧木。徹旦雞啼重壓棲。只待新晴梅塢去。青鞵未怯踏春泥。

夜坐

耿耿殘燈夜未央，負牆閑對篆盤香。風號東北河冰合，月落西南竹影長。孤鶻欲棲頻繞樹，寒龜無息穩搢床。顏然坐睡那知曉，推戶朝曦已滿廊。

春雨

午夜聽春雨，發生端及期。世憂殊未艾，天意固難知。士節承平日，人材南渡時。後生聞見狹，撫枕歎吾衰。

夢與數客劇飲，或請賦詩，予已大醉，縱筆書一絕覺而錄之。

世事

世事說來猶可厭，宦情夢裏亦應無。山林已結三生願，朝市誰非九折途。醉舞盃盤無藉在，狂吟風月不枝梧。何人今擅丹青藝，爲畫蘇門長嘯圖。

二子

兩楹夢後少真儒，毀譽徒勞豈識渠。孟子無功如管仲，揚雄有賦似相如。敬王事業知誰繼，準易工夫故不疎。孤學背時空絕歎，白頭窮巷抱遺書。

謝郭希呂送石洞酒

從事今朝真到齊，春和盎盎卻秋凄。色如夷甫玉麈尾，價敵茂陵金覆蹄。瑞露頗疑名太過，囊泉猶恨韻差低。山園雪後梅花動，一榼常須手自攜。瑞露桂盃酒，得名甚盛。囊泉岐下酒，自昔名冠關中，而失之太勁。

飲酒

六十四民安在哉，千八百國俱煙埃。世人一漚寄巨海，對酒不醉吁可哀。平生清狂今白首，芒屨布裘稱野叟。晨興窗几網蛛絲，石洞書來餉名酒。看月直到無月時，尋花直到花片飛。醉中往往花壓帽，鄰里聚看湖邊歸。先生兩耳不須洗，利名不到先生耳。狂歌起舞君勿嘲，青山白雲終醉死。

無題

金鞭朱彈憶春遊，萬里橋東罨畫樓。夢倩曉風吹不去，書憑春雁寄無由。鏡中顏鬢今如此，幙下朋儔好在不。篋

有吳牋三萬箇。擬將細字寫新愁。

兩雪兼旬有賦

冬溫思雨雪。稍久已復厭。祁寒人怨咨。千載語猶驗。人心自無常。天命本不僭。積陰勢已極。浮雲會當斂。山花紅酣酣。谿水綠瀾瀾。短蓬倘可具。與子東入剡。

北窗睡起

違物離人不計年。萬金難買北窗眠。高懷元在羲皇上。大事已明空劫前。樵路細盤雲外嶺。釣筒倒插水中天。此時消息君知否。千載巢由未足賢。

立春

紹熙又見四番春。春日春盤節物新。獨酌三盃愁對影。例添一歲老催人。菊芽冒土如爭出。柳色搖村已漸勻。身是蘭亭山下客。未容逸少擅清真。

曉枕

殘漏鑿鑿急。明星磊磊高。一從安枕臥。無復攬衣勞。熨斗生晨火。熏籠覆縵袍。一盃山藥酒。紅日滿亭臯。

落梅

雪虐風饕愈凜然。花中氣節最高堅。過時自合飄零去。恥向東君更乞憐。

又

醉折殘梅一兩枝。不妨桃李自逢時。向來冰雪凝嚴地。力幹春回竟是誰。

閑居無客所與度日筆硯紙墨而已戲作長句

水複山重客到稀。文房四士獨相依。黃金那得與齊價。白首自應同告歸。韞玉面凹觀墨聚。浣花理膩覺豪飛。蠶玉滯硯名。浣花。蜀牋名。興闌卻欲燒香睡。閑聽松聲畫掩扉。

壬子除夕

前村後村燎火明。東家西家爆竹聲。老逢新正幸強健。卻視徂歲何崢嶸。兒時祝身願事主。談笑可使中原清。豈

知一出踐憂患。斂縮豈復希功名。雪霜滿鬢覺死近。節物到眼空歎驚。蠶官社公正暖熱。春盤饑鼓爭施行。蓬門車馬所不至。山僧野叟相逢迎。嗚呼吾曹見事晚。古俗實在蚩蚩氓。芴簷一笑語兒子。明當滿舉屠蘇觥。

癸丑正月二日

朱顏不老畫中人。綠酒追歡夢裏身。堪笑三山衰病叟。閉門寂寂過新春。

又

菊叢抽綠滿枯菱。繞舍梅花已遍開。須信今春春事早。江鄉開歲有奔雷。

避世行

君渴未嘗飲鳩羽。君飢未嘗食烏喙。惟其知之審。取捨不待議。有眼看青天。對客實少味。有口啖松柏。火食太多事。作官蓄妻孥。陷罪安所避。刀鋸與鼎鑊。孰匪君自致。欲求人迹不到處。忘形糜鹿與俱逝。杳杳白雲青嶂間。千歲窠居常避世。

稽山農余作避世行以爲不可常也復作此篇

華胥氏之國。可以卜吾居。無懷氏之民。可以爲吾友。眼如巖電不看人。腹似鷗夷惟貯酒。周公禮樂寂不傳。司馬兵法亡亦久。賴有神農之學存。至今扶犁近可師。野叟粗繪大布以禦冬。黃梁黑黍身自舂。園畦剪韭勝肉美。社瓮撥醅如粥醲。安得天下常年豐。老死不見傳邊烽。利名畫斷莫挂口。子孫世作稽山農。

牧牛兒

南村牧牛兒。赤腳踏牛立。衣穿江風冷。笠敗山雨急。長陂望若遠。隘巷忽相及。兒歸牛入欄。煙火茆簷溼。

讀書未終卷而睡有感

暮年緣一嬾。百事俱棄置。今遂嬾到書。把卷輒坐睡。其餘嬾則已。感此獨歎歎。念昔少壯時。日夜痛磨礪。誓言死爲期。身在敢暴棄。寧知未死前。殆欲負此志。顏回稱好學。揚雄乃識字。勉哉慕前修。自畫聖所諱。

早春新晴

柳弄春柔拂小潭。山橫霽色卷浮嵐。飛揚旛腳擲東北。零落梅花餘二三。村店疎燈新賣酒。神祠疊鼓正祈蠶。幽

人睡起東園去。芹茁萱芽又滿籃。

枕上聞禽聲

屏掩輕寒酒半消。斷香殘夢兩無憀。開年春意遽如許。破曉一聲婆餅焦。

感舊

憶從南鄭入成都。氣俗豪華海內無。故苑燕開車載酒。名姬舞罷斗量珠。浣花江路青螭舫。槎柳毬場白雲駒。回首壯遊真昨夢。一竿風月老南湖。

夜雨

澤國寒多雨。疇人夜少眠。不緣醒作病。只合醉終年。庭草已爭茁。園梅空自憐。重雲不難扶。無劍倚青天。

又

寒雨連三夕。幽居只數椽。家貧輕過節。身老怯增年。日月悲歌裏。關山淚眼邊。梅花自開落。歎息爲誰妍。

又

人日春猶淺。雞晨夜向闌。殘缸燈暈小。單枕雨聲寒。難補皇天漏。空思后土乾。山家尊酒薄。懷抱若爲寬。

初晴野步

入市路三叉。綠山港半斜。疎籬帶殘雪。幽竇瀉湍沙。好鳥晴相語。芳蘭暖欲芽。病餘無腳力。隨處憩人家。

明日復雨排悶

湖上孤村冷欲冰。更堪衰與病相乘。夢回點滴簷間雨。心折青熒帳外燈。雖有數椽常似客。僅存一肉未成僧。披衣偶取南華讀。打破愁城喜不勝。

又

此老在家如出家。蒲團趺坐讀南華。溼雲不散雁呼伴。幽室無聲燈墜花。心法先當破窠窟。世緣最忌養萌芽。行年七十方知悔。萬事無涯生有涯。

小室

小室僅容膝。焚香觀昨非。出門寧有礙。知我正須希。霜橘爭其樂。仙壺賣藥歸。平生釣竿手。不解叩黃扉。

浮世

浮世如流水。滔滔日夜東。百年均夢寐。萬古一虛空。青鳥來雲外。銅駝臥棘中。相逢惟痛飲。令我憶無功。

紅梅

苧蘿山下越谿女。戲作長安時世粧。白白朱朱雖小異。斷知不是百花香。

又

雪裏溪頭已占春。小園又試晚粧新。放翁老去風情在。惱得梅花醉似人。

湖上

今朝雨初晴。湖上好天色。落梅紛可藉。桑柳亦已坼。老夫病良已。並水散輕策。冉冉春物新。忽忽衰髮白。四方豈不樂。懶情畏遠客。惟常勤買酒。東城復南陌。

晴甫一日復大風雨連日不止遣懷

書劍當年隘九州。白頭歸臥一窗幽。染成草色春猶淺。老盡梅花雨未休。得句已無前輩賞。開編時與古人遊。山房小甕今朝熟。不恨尊前自獻酬。

癸丑上元三夕皆大雨雪

雨雪連三日。孤城冷欲冰。泥深唯響屐。風惡更吹燈。空惱追歡客。何關在定僧。一盃嘗豉煎。寒影對峻嶒。

寓歎

人生各自有窮通。世事寧論拙與工。裹馬革心空許國。不龜手藥卻成功。早朝玉勒千門雪。夜坐蓬窗萬壑風。借得奇書且勤讀。小兒能續地爐紅。子坦以薪昌木炭二百斤來。

幽興

雨後梅花無復在。老來酒盞頓成疎。身如海燕不逢社。家似瓜牛僅有廬。短髮垂肩懶中散。深居謝客病相如。從今何以消長日。剩種芭蕉學草書。

緜梅

疎影橫斜事已非。小園日暮鎖芳菲。素綃應怯東風思。故著重重淺色衣。

又

香似海沉黃似酒。不禁風雪最遲開。放翁欲作梅花譜。蠟屐搢笻日下來。

又

紅梅眼開風吹盡。更有緜梅亦已無。天與色香天自愛。不教一點上蜂鬚。

卷二十七

僧廬

僧廬土木塗金碧。四出徵求如羽檄。富商豪吏多厚積。宜其棄金如瓦礫。貧民妻子半菽食。一飢轉作溝中瘠。賦斂鞭笞縣庭赤。持以與僧亦不惜。古者養民如養兒。勸相農事憂其飢。露臺百金止不爲。尙媿七月周公詩。流俗紛紛豈知此。熟視創殘謂當爾。傑屋大像無時止。安得疲民免飢死。

春日

節節足足雀噪檐。朱朱白白花窺簾。坐旁設酒隨時飲。床上堆書信手拈。寓世無求猶役役。杜門不病亦厭厭。春濃日永有佳處。睡味著人如蜜甜。

春遊

鏡湖春遊甲吳越。鶯花如海城南陌。十里笙歌聲不絕。不待清明寒食節。青絲玉瓶挈新釀。細柳穿魚初出浪。花外金羈絡雪駒。橋邊翠幙圍螭舫。怕雨愁陰人未知。時時微雨卻相宜。養花天色君須記。正在輕雲嫩靄時。

懷昔

昔遇高皇帝。華纓接俊遊。年光一彈指。世事幾浮漚。故國但青嶂。羈臣今白頭。平生笑李廣。癡絕望封侯。

記夢

夢不出心境。曠然成遠遊。花殘杜城醉。木落華山秋。戰血磬長劍。塵痕洗故裘。那知覺來處。身臥五湖舟。

春陰

老境三年病。新春十日陰。孤舟鏡湖客。萬里玉關心。出岫雲多態。呼風鳥獨吟。讀書惟恐盡。傾酒卻愁深。

睡起行至門外有賦

窗黑停書課。屏深養病眸。雨聲工破睡。酒力不禁愁。兀兀披衣起。昏昏良杖遊。柴荆晚未閉。隔水數歸牛。

早春

舊學樊遲稼。新通汜勝書。不成籌國論。且復愛吾廬。

又

具牛將犢行。野雉挾雌鳴。農事不可緩。閑人亦勸耕。

又

近陂牛渾白。遠浦鴨頭青。一櫂悠然去。東風吹酒醒。

又

西村一抹煙。柳弱小桃妍。要識春風處。先生拄杖前。

醉吟

少日沉迷汗簡青。如今毀譽兩冥冥。書生弄筆如何信。只合花前醉不醒。

又

驅使難憑赤丁子。傳呼底用蒼頭兒。世間如夢身如寄。春去花空欲泥誰。

又

牽經引禮人誰聽。是古非今世共憎。何似對花傾綠酒。自歌一曲醉騰騰。

贈劉政之秀才

君居古荊州。醉膽天宇小。尚不拜龐公。况肯依劉表。胸中九淵蛟龍蟠。筆底六月冰雹寒。有時大叫脫烏幘。不怕

酒盃如海寬。放翁七十病欲死。相逢尙能刮眼看。李廣不生楚漢間。封侯萬戶宜其難。

蓬門

莫笑蓬門雀可羅。老農正要養天和。穿林裊裊孫登嘯。叩角嗚嗚寧戚歌。睡美到明三展轉。飯甘捧腹一摩挲。牀頭更聽糟牀注。造物私吾亦已多。

龍鍾

龍鍾一老寄荒村。鼎食山棲久已分。平日氣吞雲夢澤。暮年緣在武夷君。搶榆敢羨垂天翼。倚市從嗤刺繡文。幸有筆牀茶竈在。孤舟更入剡谿雲。

送佛照光老赴徑山

大覺住育王。拗折拄杖強到底。佛照住育王。挑得鉢囊隨詔起。從來宗門話。只要句不死。說同說異菴外人。若是吾宗寧有此。日日風青今日晴。萬里春光入帝城。傳宣江上走中使。開堂座下羅公卿。御香靄靄雲共布。法音浩浩潮收聲。報恩一句作麼道。常遣山林見太平。

春社有感

顛顛前朝白髮郎。祠庭賦祿玷恩光。寸心未與年俱老。萬事惟憑酒暫忘。穿仗兩曾觀揖遜。扶犁獨幸返耕桑。蒼年凋落還堪歎。社飲推排冠一鄉。三山百家之聚。年莫余先者。

春社

桑眼初開麥正青。勃姑聲裏青冥冥。今朝有喜君知否。到處人家醉不醒。

又

社肉如林社酒濃。鄉鄰羅拜祝年豐。太平氣象吾能說。盡在鑿鑿社鼓中。

又

柴門西畔枕陂塘。社雨新添一尺強。渠省諸公方袞袞。故應分喜到耕桑。

又

太平處處是優場。社日兒童喜欲狂。且看參軍喚蒼鶻。京都新禁舞齋郎。

村夜

寂寂山村夜。悠然醉倚門。月昏天有暈。風軟水無痕。迹爲遭讒逐。身由不仕尊。敢嗟車馬絕。同社自雞豚。

山園遣興

輪遠告糴走比鄰。恤患分災累故人。安得此身無一事。林中數筍過殘春。

次韻陳機宜見贈

遲迨今年得若人。翛然不染庾公塵。思幽屈子歌山鬼。語妙陳王賦洛神。初接笑談忘老億。熟觀風度愛清真。花時飛盡頻行樂。莫學衰翁睡過春。

野意

疑長逾十里。村小只三家。山客弛樵擔。溪翁鳴釣車。花深迷蝶夢。雨急散蜂衙。衰疾新年減。青巖上若耶。

戒殺

物生天地間。同此一太虛。林林各自植。但坐形骸拘。日夜相殘殺。曾不置新須。皮毛備裘褐。膏血資甘腴。雞鶩羊彘輩。尙食稗與芻。飛潛何預汝。禍乃及禽魚。豺虎之害人。亦爲飢所驅。汝顧不自省。何暇議彼歟。又於人類中。各私六尺軀。方其忿怒時。流血視若無。我欲反其源。默觀受氣初。挺刃之所加。慘若在我膚。朝飯一脯豆。暮飯一盃蔬。捫腹茆簷下。陶然歡有餘。

余年四十六入峽忽復二十三年感懷賦長句

當年弔古巴東峽。雪灑扁舟見早梅。宋玉宅邊新酒笑。巫山廟下暮猿哀。樵柯爛盡棋方劇。客甌炊成夢未回。已把癡頑敵憂患。不勞團扇念寒灰。劉夢得團扇歌曰。當時初入君懷袖。豈念寒爐有死灰。

山行

七十衰翁短鬢斑。藥瓢藤杖伴清閑。平生惡路羊腸阪。晚歲羸軀飯顆山。一寸塔餘青鶴外。數聲鐘下翠微間。往來處處皆奇絕。莫道先生興盡還。

雨中排悶

一春苦沈陰，未省見桃李。已逢暗寒食，更值雨甲子。重雲失南山，寸步困泥滓。揮龍已鱗鱗，一飽差可喜。

杜敬叔寓僧舍開軒松下以虛瀨名之來求詩

君不見洛陽八節灘，未至一舍聞驚湍。生綃大幅誰所畫，入眼能令三伏寒。又不見桐廬七里瀨，濺雪跳珠舞澎湃。半裘老子去千年，絕世孤風凜如在。杜陵之孫今勝流，飄然不必事遠遊。結茆古寺聽松吹，坐擅洛水桐江秋。放翁百念俱已矣，獨有好奇心未死。約君少待秋月明，抱琴來宿寫灘聲。

贈徑山銛書記

徑山老將無勍敵，百萬魔軍俱掃迹。座下何人策雋功，籌略縱橫銛記室。銛公聲名滿吳會，惟有放翁最先識。奕奕揮毫王粲詩，翩翩插羽陳琳檄。風雷東海起伏龍，繅藉圖丘薦蒼璧。徑山入門第一義，萬口譁言真稱職。我謂銛公豈止此，徑山鉢袋渠能得一枝。白拂倘付之，會見青天飛霹靂。

五月一日作

處處稻分秧，家家麥上場。敢悲身老大，獨幸歲豐穰。酪美朱櫻熟，菰青角黍香。脩然一竹尺，飽受北窗涼。

春夏之交衰病相仍過芒種始健戲作

藥裏關心百不知，可憐筆硯銷蛛絲。倒壺猶有暮春酒，開卷遂無初夏詩。戶外逢人驚隔闕，燈前顧影歎支離。癡頑未伏常愁臥，鼓缶長謠樂聖時。

自嗟

青蔬半畝老生涯，霜鬢蕭蕭只自嗟。勦業蹉跎空許國，文詞淺俗不名家。殘骸皆作麒麟植，舊友仍非處士牙。收得平生釣竿手，長安西日更須遮。

枕上述夢五月十二日雞鳴時作

江湖送老一漁舟，清夢猶成塞上遊。生馬駒馳鐵蹏腕，古鏡歌奏錦衣襦。玉關雪急傳烽火，青海雲開見戍樓。白首不侯非所恨，咿嚶牀簾死堪羞。

雨中排悶

潤入盆山綠葉稠。倦攤書帙小窗幽。浮雲不卷時時雨。薄酒無功日日愁。積潦漲來妨躡屐。好山遮盡罷登樓。青秧搖蕩湖堤決。一飽前知未易謀。

小軒夏夜涼甚偶得長句呈杜叔高秀才

遙夜簾櫳已借秋。闌干星斗挂檐頭。鶻翻清影移枝宿。螢弄孤光拂篔簹。榻上琴書紛枕藉。髮根風露冷颼颼。故人莫笑幽居陋。此夕真從造物遊。

憶昔

憶昔西征日。飛騰尚少年。軍書插鳥羽。戍壘候狼煙。渭水秋風夜。岐山曉雪天。金鞵馳叱撥。繡袂舞嬋娟。但恨功名晚。寧知虎病纏。虎頭空有相。麟閣竟無緣。壯士埋巴峽。獨孤策。孤身臥海壖。安西九千里。孫武十三篇。裘歎蘇秦弊。鞭憂祖逖先。何時聞詔下。遣將入幽燕。

夏日晚興

高掛虛窗對綠池。鳥啼聲歇柳陰移。含風珍簾閑眠處。疊雪輕衫新浴時。泉冷甘瓜開碧玉。手香素藕買一作雪。長絲。夕陽四面漁歌起。又赴鄰翁把釣期。

老翁

老翁垂七十。不復歎頭顱。浩蕩新漁艇。凋零舊酒徒。嚴徐元袞袞。管葛亦區區。獨有欣然處。登山未用扶。

困甚戲書

官如枝頭乾。不受雨露恩。身如水上浮。泛泛寧有根。刈茆以苫屋。縛柴以爲門。故人分祿米。鄰父餉魚飧。前門吏徵租。後門質糶暉。不敢謀歲月。且復支朝昏。雨餘幽花坼。亦可侑清尊。吾生信已平。終老此山村。

歲晚

日月忽其逝。吾生猶幾何。不從屠狗醉。即和飯牛歌。斧鉞稽天討。金縢約虜和。無情恨荆棘。歲晚暗銅駝。

戲詠山陰風物

萬里秦吳稅駕遲。還鄉已歎鬢成絲。城邊綠樹山陰道。水際朱扉夏禹祠。項里楊梅鹽可徹。大白梁園吟云。玉盤楊梅爲君設。吳鹽如花皎白雪。不知楊梅酸者乃薦以鹽。佳品未嘗用也。湘湖蓴菜鼓偏宜。蓴菜最宜鹽鼓。所謂未下鹽鼓者。言下鹽鼓則非牟酪可敵。蓋感言蓴羹之美爾。圖經草草常堪恨。好事他年采此詩。

老健

才智不足狂有餘。此身老健更誰如。齒牢尚可決乾肉。目瞭未妨觀細書。不怪模稜噉了了。但驚矜臂勸徐徐。曉看瓜瓞初牽蔓。一笑呼兒勿廢鉏。

六月晦日作

長夏忽云過。徂年行且休。川原方渴雨。草木已驚秋。露蔓晨猶炫。風蟬暮更遒。明窗對清鏡。世事判悠悠。

喜雨

雷車隆隆南山陽。電光煜煜北斗傍。急雨橫斜生土香。草木蘇醒起仆僵。芭蕉抽心鳳尾長。薜荔引蔓龍鱗蒼。葛罽竹簟夜更涼。超然真欲無羲皇。常年七月蚊殷廊。今夕肅肅疑飛霜。水車罷踏屏斗藏。家家買酒歌時康。

門外納涼

玄雲障落日。早得數刻涼。寒泉灑門前。浴罷倚胡牀。蟬聲晚愈壯。藕花凋更香。嘯詠忽已久。野色來蒼蒼。新月淡無輝。大星森有芒。水鳥亦歸宿。飛鳴掠橫塘。人生各有時。何至終身忙。撫髀三太息。墜露溼衣裳。

贈蘇趙叟兄弟

君家真德門。才傑生衰衰。託契則甚深。所恨相識晚。攜文數過我。每讀必三反。譬如天廐駒。真是渥洼產。閉門萬卷讀。更要極源本。才難聖所歎。期子敢不遠。

癸丑七夕

風露中庭十丈寬。天河仰視白漫漫。難尋仙客乘槎路。且伴吾兒乞巧盤。秋旱時聞桐葉墜。夜涼已怯紵衣單。民無餘力年多惡。退士私憂實萬端。

共語

喬嶽成塵巨海枯。欲求共語一人無。黃金已作飛煙去。凝漢終身守藥爐。

書歎

少年志欲掃胡塵。至老寧知不少伸。覽鏡已悲身潦倒。橫戈空覺膽輪囷。生無鮑叔能知己。死有要離與卜鄰。西望不須揩病眼。長安冠劍幾番新。

秋曉倚闌

雲罇織織玉一鈎。小庭風露更清柔。老來朋舊凋零盡。獨倚闌干特地愁。

癸丑七月二十七夜夢遊華嶽廟

驛樹秋風急。關城暮角悲。平生忠憤意。來拜華山祠。

又

牲碑僞正朔。祠祝虜衣冠。神亦豈堪此。出門山雨寒。

僕頃在征西大幕登高望關輔樂之每冀王師拓定得卜居焉暇日記此意以示子孫

八月殘暑退。秋聲滿庭樹。豈無四方志。衰病迫霜露。遼東黃頭奴。稔惡天震怒。南北會當一。老我悲不遇。子孫勉西還。俗厚吾所慕。約已收孤孽。教子立門戶。黍稷暗阡陌。鶉雉足七箸。永爲河渭民。勿憚關山路。

讀陶詩

我詩慕淵明。恨不造其微。退歸亦已晚。飲酒或庶幾。雨餘鉏瓜壟。月下坐釣磯。千載無斯人。吾將誰與歸。

秋夜感蘇十二韻

冷螢綴蓬根。忽復照高樹。年光逝不留。百感集遲暮。往者秦蜀間。慷慨事征戍。猿啼鬼迷店。馬噤飛石鋪。鬼迷店在大散關下。飛石鋪在小益道中。常有崩石。危嶺高入雲。朽棧劣容步。天近星宿大。江惡蛟蠱怒。意氣頗自奇。性命那復顧。最懷清渭上。衝雪夜掠渡。封侯細事爾。所冀垂竹素。兜鍪竟何成。豈獨儒冠誤。當時妄校尉。旗纛今照路。浩歌遂成章。聊慰老不遇。

幽居

海澨結茆新。退藏常畏人。已侵垂老境。尙愛不貲身。丹灶長生藥。巢居上古民。秋來有奇事。鷗鷺日相親。

醉題

勿笑山翁病滿軀。胸中俠氣未全無。雙瞳遇醉猶如電。五木隨呼盡作盧。代北胡兒富羊馬。江南奇士出菰蘆。何由親奉平戎詔。蹴踏關中建帝都。

雨涼小飲戲作

孤村小院雨輪涼。團扇流塵簟避牀。蛩思感秋吟壞壁。螢光乘暗繞高梁。巾箱字細成褫懶。醴醪盃深斷送狂。坐睡覺來人已散。簾櫳時度玉簪香。玉簪花名。

題齋壁

迹是滄浪客。家居擺耜村。秋菰莖糝滑。社酒帶醅渾。勛業知難遂。文章不更論。惟餘此身在。分付與乾坤。

書憤

山河自古有乖分。京洛腥羶寶未聞。劇盜曾從宗父命。遺民猶望岳家軍。上天悔禍終平虜。公道何人肯散羣。白首自知疎報國。尙憑精意祝爐熏。宗澤守東都巨盜來歸百萬。號宗爺。岳家軍蓋紹興初語。

秋興

秋風又滿會稽城。有客飄然萬事輕。久向林間得佳趣。不知身外有浮名。蒲萄雨足初全紫。烏柏霜前已半赭。欲把一盃終鬻嬾。老來懷抱爲誰傾。

雨夜排悶

羸病愁燈影。羈懷怯雨聲。新秋忽已半。垂老若爲情。金印兒嬉事。青編身後名。何如破窗下。袖手送餘生。

又

村巷時時雨。江城夜夜砧。沉憂鬪客夢。孤憤透臣心。身病常須藥。囊空未贖琴。明朝鏡中髮。飽受雪霜侵。

秋日出遊戲作

蒞帽蓑衣自適宜。不論晴雨著無時。半醒半醉人爭看。是聖是凡誰得知。

薄雲翳日未成雨。野水齧沙爭赴溪。書冊嬾看聊作伴。酒壺不飲亦慵攜。

又
雨中夕食戲作

高秋滴階雨作泥。黃昏爭林雀欲棲。臨窗一飯頗簡快。半升脫粟澆黃齏。

又

粗飯寒菹到手空。屬饜也與八珍同。家人見慣渾閑事。笑殺新來兩髻童。

又

糗粒微紅愧食珍。蔣芽初白喜嘗新。摩挲便腹無憂責。我是人間得計人。

自警

隨髮滿晨梳。荒畦入晚鋤。涼生團扇陌。病退短筇踈。聖道功殊淺。塵緣習未除。青燈幸如故。勉近讀殘書。

寄方瞳胡先生

形槁神彌王。心虛腦自凝。平生一酒榼。萬里兩行滕。安枕存玄牝。齋居養絳陵。他年喬嶽下。正晝看飛騰。古仙人飛升。皆在五嶽名山。故人少見者。

兩夕焚香

芭蕉葉上兩催涼。蟋蟀聲中夜漸長。繡十二經真太漫。與君共此一爐香。

秋雨初霽徙倚門外有作

三十餘年此結廬。客來不用笑迂疎。前身已預蘭亭會。老眼曾窺禹穴書。浮瓮社醅香出屋。登場秋稼穗盈車。蕭蕭蓬鬢雖衰矣。追逐鄉鄰尚有餘。

雨中作

野外偏於看雨宜。映空渡水細如絲。川雲借潤支琴石。澗水分流洗藥池。未肯高眠成老態。卻緣危坐得新詩。悠然更助鄰丁喜。漸近收菑下麥時。

贈老雞

峨峨赤幘先羣輩。喔喔長鳴蓋四郊。意氣雖雌無處用。風霜從我老衡茆。

又

場中啄粟樹頭棲。三唱明星出尚低。關路元無孟嘗客。吳兒莫議會稽雞。

秋晚閑步鄰曲以予近嘗臥病皆欣然迎勞

放翁病起出門行。續女窺籬牧豎迎。酒似粥釀知社到。餅如盤大喜秋成。歸來早覺人情好。對此彌將世事輕。紅樹青山只如昨。長安拜免幾公卿。

兩夜

歲晚茆茨劣自容。齒搖將脫髮將童。心遊萬里關河外。身臥一窗風雨中。醫不可招惟忍病。書猶能讀足忘窮。夜闌睡覺蛩聲裏。時見燈花落碎紅。

醉臥道傍

爛醉今朝臥道傍。鄉閭共爲護牛羊。高懷那遣羣兒覺。至理真能萬事忘。喚起瘦軀猶鬼蛾。扶歸困睫更芒洋。凍壺快嚼茆簷下。拍手從人笑老狂。

枕上聞急雨

枕上雨聲如許奇。殘荷叢竹共催詩。喚回二十三年夢。燈火雲安驛裏時。

又

酒病羈愁一洗空。長歌高枕雨聲中。傳聞谿港深三尺。明日扁舟處處通。港澗久不通舟楫。兩日雨殊可喜也。

得趙若川書因寄

澤居路絕人不到。晨起忽傳雙鯉魚。儲淚一升悲世事。減愁三尺看君書。龍墀對策言傷直。山邑迎親計未疎。老病閉門誰省錄。因風時肯問何如。

夢至洛中觀牡丹繁麗盜目覺而有賦

兩京初駕小牟車。顛顛江湖歲月賒。老去已忘天下事。夢中猶看洛陽花。妖魂豔骨千年在。朱彈金鞭一笑譁。寄語甌裘莫癡絕。祈連還汝舊風沙。

閑居對食書媿

遊宦無功坐免歸。誰令盤筋極甘肥。錦鱗差尾魚登俎。繡羽駢頭雉觸機。桑落滿壺春盎盎。兩前轉磴雪霏霏。殘年何地酬君賜。自古羈臣厭蕨薇。

又

老病家居幸歲穰。味兼南北飫枯腸。滿脾蜜熟餠鯁笑。下棧牟肥鱖魠香。潑刺河魴初出水。迷離穴兔正迎霜。山僧一鉢無餘念。應笑先生爲口忙。

秋夜獨酌

壯志隨年減。羈愁與夜長。月高寒暈淡。花坼露叢香。仕畏讒銷骨。歸判酒腐腸。青燈寫孤影。相勸盡餘觴。

風雲交作戲題

雲脚如龍爪。空中挾雨來。何關風伯事。欲到卻吹回。

自嘲

歲月推遷萬事非。放翁可笑白頭癡。此生竟出古人下。有志尙如年少時。僻學固應知者少。長歌莫問和予誰。自嘲自解君毋怪。老大從人百不宜。

書室

客來莫笑席塵凝。靜處工夫卻少增。黑蟻常繙魯壁簡。瘦蛟時落越溪藤。尙能豪健如霜鶻。未遽衰殘學凍蠅。更喜論文有兒子。夜窗相對短檠燈。

數日秋氣已深清坐無酒戲題長句

漸近重陽天氣嘉。數椽茆竹淡生涯。山童擁篲掃黃葉。鄰女傍籬收碧花。避俗要生輪四角。出門何管路三叉。晚窗酒盡無多歎。試問前村好事家。

五更起坐

世間醉夢過浮生。誰肯披衣坐五更。煜煜心光回自照。縣縣踵息浩無聲。古人得意捐糟粕。癡子何知墮化城。七十老翁須努力。鄰雞纔唱又窗明。

谿上雜言

谿上之丘。吾可以休。谿中之舟。吾可以遊。一裘雖弊。可度風雪虐。一簞雖薄。未有旦夕憂。媿於此心。鼎食其敢飽。負其所學。蟬冕增吾羞。古人誰謂不可見。黃卷猶能覩生面。百穀疑疑知稷功。九州茫茫開禹甸。巍巍成功亦何有。治亂但如翻覆手。逢時皆可致唐虞。比身管樂寧非苟。樹桑釀酒著雞豚。是中端有王業存。一朝遇合得施設。千載始知吾道尊。

厭事

厭事便微疾。貪眠幸早寒。人雖笑疎懶。天實閔衰殘。韋布何曾賤。茆茨本自寬。黃花插烏帽。一醉有餘歡。

方池

莫笑方池小。清泉數斛寬。照花紅錦爛。洗研黑蛟蟠。日取供茶鼎。時來擲釣竿。秋風過欄角。也解作微瀾。

癸丑重九登山亭追懷頃在興元常以是日獵中梁山山下樂甚慨然賦詩予於是生六十有九年矣

生年六十九重陽。轍遍秦吳歲月長。南鄭從戎嗟尙壯。中梁縱獵最難忘。離披雉拂雕鞍墮。獨悚狐穿古冢藏。夢斷酒醒今萬里。亦逢佳節重悲傷。

卷二十一

感懷

老病與世絕。屏迹三家村。我居一何陋。舉手屋可捫。客至不能迎。堅坐度朝昏。一窗修竹下。超然傲羲軒。外物自變遷。內景常默存。黃流不注海。皓皓朝崑崙。妙道本自得。至言初不煩。功成出緒餘。猶足康黎元。

又

卜居鏡湖上。一葢環翠屏。竹林藏蛤蜊。嶺路蟠青冥。鸞騰立奇石。嶄絕瞻危亭。車馬雖掃迹。猿鳥與忘形。我行半九州。躅盡芒砀青。豈知雪滿鬢。于茲做雲局。丹砂收箭鏃。茯苓斲人形。遼天渺歸鶴。一瞬三千齡。

又

平生喜栽花。賴以娛寂寞。小園財一畝。粲粲萬跗萼。典衣買紫桂。輟食致紅藥。汗眠香草茂。掩苒煙柳弱。踏雨探花開。障風畏花落。雖慚童心在。終勝塵事縛。今日疾稍間。天氣亦清廓。啼鳥寒不歸。可以侑吾酌。

又

殘年迫衰謝。嬰疾歸鄉枿。諸賢渡江初。總角幸有聞。才非楚倚相。亦能讀典墳。夫豈或使之。後死與斯文。世儒鑿戶牖。道術將瓜分。孤陋守一說。百氏殆可焚。後來豈無人。鼻堊誰揮斤。巍巍貞觀治。房魏出河汾。

出遊

采藥今朝偶出遊。溪邊小立喚漁舟。未須著句悲搖落。嫩日和風不似秋。

又

朝行躡屨穿幽谷。暮返褰裳涉亂流。提起短筇成一笑。每煩上座爲分憂。

讀杜詩偶成

一念寧容事物侵。天魔元自是知音。拾遺大欠修行力。小吏相輕尙動心。

秋夜即事

烏宿牛歸戶欲扃。燈前老子影伶俜。溼雲不散初聞雁。深竹微明尙有螢。一卷舊書開蠹簡。半升濁酒倒餘瓶。乘閑欲擬歸來作。小草斜行滿曲屏。

物有可歎者因戲作數語以識之

雞棲及我未掩扉。犬雖遠出暮自歸。司晨警夜職交舉。簾糲棄粒報亦微。查查雙鵲更媿汝。庭樹夜宿常相依。豈憐主人老寂寞。暖熱蓬戶不忍違。養鴟甚恩健即去。養鷹雖久飽亦飛。嗟哉物性厚薄異。使我隱几空歎欷。

老懷

身見高皇再造初。名場流輩略無餘。舊書科斗纔存字。薄業蝸牛僅有廬。迂士豈堪新貴使。少年自與老人疎。荒園寂寂堆霜葉。抱瓮何妨日灌蔬。

對酒

古今共有死。長短無百年。方其欲瞑時。如困得熟眠。世以生時心。妄度死者情。疑其不忍去。一笑可絕纒。區區計生死。不如持一觴。一觴澆不平。萬事俱可忘。待酒忘萬事。猶是役於酒。醉醒不到處。天魔自奔走。

東村散步有懷張漢州

扶杖村東路。秋來始此回。寒雅盤陣起。野菊臥枝開。憂國丹心折。懷人雪鬢催。房湖八千里。那得尺書來。

晚寒自東村步歸

夕陽下平野。落葉滿荒街。村店賣麪。人家燒豆蕪。溪風透布褐。草露溼芒屨。骨相元如此。何由與世諧。

排悶

丈夫結髮志功名。大事真當以死爭。我昔駐車籌筆驛。孔明千載尙如生。

又

曾攜一劍遠從戎。秦趙關河顧盼中。老去功名無復夢。凌煙分付黑頭公。

又

四十從軍渭水邊。功名無命氣猶全。白頭爛醉東吳市。自拔長刀割曉肩。

又

西塞山前吹笛聲。曲終已過雒陽城。君能洗盡世間念。何處樓臺無月明。

又

萬里風中寄斷蓬。古來虛死幾英雄。拔山力與回天勢。不滿先生一笑中。

又

風霜九月冷颼颼。湖海飄然一布裘。親見宮籤初畫卦。轉頭三十萬春秋。

初寒病中有感

楚水楓林霜露新。白頭一叟正吟呻。牛衣未起王章疾。馬磨何傷許靖貧。治道本來存簡冊。神州誰與靜煙塵。新亭對泣猶稀見。況覓夷吾一輩人。

放歌行

君不見。汾陽富貴近古無。二十四考書中書。又不見。慈明起自布衣中。九十五日至三公。人生窮達各有命。拂衣徑去猶奚勝。介推焚死終不悔。梁鴻寄食吾何病。安用隨牒東復西。獻諛耐辱希階梯。初無公論判涇渭。使徒新貴矜雲泥。稽山一老貧無食。衣破履穿面黧黑。誰知快意舉世無。南山之南北山北。

山頭石

秋風萬木實。春雨百草生。造物初何心。時至自枯榮。惟在山頭石。歲月浩莫測。不知四時運。常帶太古色。老翁一生居此山。腳力欲盡猶躋攀。時時撫石三歎息。安得此身如爾頑。

有客

有客隱華山。學道忘歲月。靈苗生絕壁。光景中夜發。斲根食之盡。倏爾換金骨。通籍虎豹關。日預通明謁。綠章奏封事。誤字坐責罰。後身幸不忘。去日苦飄忽。白首三入朝。未省及黔突。方逃申公錯。已取卞和則。福微不盈背。罪衆幾擢髮。上天豈憐之。寸步使屢蹶。拔其利欲根。還之山水窟。洗心謝宿愆。世事等胡蝶。

幽居

窮老苦畏事。雅意在丘壑。結茆鏡湖上。卒歲安寂莫。有門常嬾開。壁間挂雙屨。猶恨未遠人。靜夜聞城角。

又

來客無僮奴。剝啄自叩戶。主人亦蕭然。茗飲不能具。清言正絕倒。日暮亟散去。更欲盡所懷。衣薄畏霜露。

又

山園手栽花。日夜數花時。花開亦已落。一歡自無期。勸君強自娛。勿作兒女悲。春風染柳條。不染君鬢絲。

又

種菜三四畦。畜豚七八個。永言給賓祭。且復課慵惰。霜清黃犢健。土潤小雨過。冬耕不可失。努力勿安臥。

又

放翁家山陰。其貧蓋一國。骨相異虎頭。祠祿真雞肋。有米耕未具。坐待至曠黑。躬耕豈所難。一飽非爾力。

野興

身似孤鴻鍛羽翰。悲鴻飲啄住江干。酒闌客思多新感。病起衰顏失故丹。倦枕忽聞中夜雨。疎砧又報一年寒。幽窗晤語無來客。空倚詩情強自寬。

又

老去癡頑百不能。非醒非醉日騰騰。敲門惟有徵租吏。好事元無送米僧。舊俗不遺誰復念。古書雖在漸難憑。平生意氣今如此。惆悵西窗半夜燈。

又

殘水涓涓入野塘。菊花猶放數枝黃。悶思野步便晴日。病怯冬溫喜薄霜。湯餅鬻成新兔美。膾齏搗罷綠橙香。人間富貴知何得。商略山林卻味長。

又

水作縠紋微起伏。天如卵色半陰晴。偶來竹下搯頭坐。卻向藤陰曳杖行。西埭人喧荻船過。東村燈上緯車鳴。幽居應接真無暇。莫訝經年嬾入城。

買油

習氣年來掃未平。夢回猶喜讀書聲。冬裘不贖渾閑事。且爲吾兒續短檠。

繫舟

繫舟江浦待潮平。歎息無人共月明。歷盡世間多少事。飄然依舊老書生。

又

地曠月明鋪素練。霜寒河淺拂輕綃。手扶萬里天壇杖。夜過前村馬會橋。

初冬至近村

南國霜常晚。初冬葉始紅。曠懷牛屋下。美睡雨聲中。沮水憶浮馬。西鄰軍行溪。過澗皆浮而。嶠山思射熊。何由效唐將。八十下遼東。

古築城曲

築城聲酸嘶。漢月傍城低。白骨若不掩。高與長城齊。

又

長城高際天。三十萬人守。一日詔書來。扶蘇先授首。

又

百丈築城身。千步掘城壕。咸陽三月火。始悔此徒勞。

又

嶧山訪秦碑。斷裂無完筆。惟有築城詞。哀怨如當日。

山園

山泉引派漲清池。野蔓移根絡短籬。藝果極知非老事。接花聊復效兒嬉。提壺言語開顏聽。斲木衣襦緩步窺。莫笑題詩還滿紙。小園幽事要君知。

將軍行

將軍入秦平燕策。持笏榻前親指畫。天山熱海在目中。下殿即日名桓赫。馳出都門雪初霽。直過黃河冰未坼。繡旗方掠桑乾渡。羽檄已入金臺陌。勇士如鷹健欲飛。虜王似兔何勞掣。戎服押俘獻廟社。正衙第賞頒詔冊。端門賜酺天下慶。御觴尚恨滄溟迮。從來文吏喜相輕。聊遣濡毫書竹帛。

古別離

孤城窮巷秋寂寂。美人停梭夜歎息。空國露溼荆棘枝。荒蹊月照狐狸迹。憶君去時兒在腹。走如黃犢爺未識。紫姑吉語元無據。况憑瓦兆占歸日。嫁來不省出門前。魂夢何因識酒泉。粉縣磨鏡不忍照。女子盛時無十年。

寄子虞

吾兒適淮壖。送之梅市橋。三年安得過。思汝雙鬢凋。今年當代歸。秋色已蕭蕭。迎汝不憚遠。夢泝錢塘潮。人事不可料。邑民挽歸橈。郡牧部使者。交章聞之朝。增秩復使留。此事久寂寥。念汝未育子。大女方垂髫。小女聞學行。想像扶牀嬌。汝少知讀易。外物莫能搖。但願早舉孫。不必七葉貂。歸來耶罷前。相從樂箠瓢。

泛舟自中堰入湖

水縮沙洲出。霜清木葉丹。鷺羣橫澹靄。鴉陣報初寒。冷落人情見。衰遲世念闌。惟留一句子。村舍話團圓。

夜歸舟中作

意薄楊脩喚小兒。孤舟自笑髮成絲。放開燒腹無非夢。拈起幽懷總是詩。霜下忽驚桐葉盡。灘生更覺水聲奇。餘年那恨驅黃犢。除卻爲農百不宜。

蓬萊閣聞大風

天風搖蕩萬松聲。卷海頽山得我驚。觸灑瀕堆秋起柂。塵臯闌下夜還營。荷戈老氣縱橫在。看劍新詩效睡成。興盡卻尋湖上路。醉看月墮斗杓傾。

小出塞曲

全師出雁塞。百戰運龍韜。金絡洮州馬。珠裝夏國刀。度沙風破肉。攻壘雪平壕。明日受降處。甲齊熊耳高。

冬日園中作

園荒闕掃除。籬敗且枝梧。久旱池萍死。新霜野蔓枯。寒爐殊未議。濁酒卻時酤。飛動郊原興。飢鷹待指呼。

登山亭

新得天台古澗藤。強扶衰疾躡峻嶒。登高臨遠雖多感。歎老嗟卑卻未曾。紙上是非難盡信。人間禍福有相乘。早知等是枯魚肆。乞水何須望斗升。

拄杖歌

道人四壁空無有。一炷清香閑袖手。牀邊獨有拄杖子。疾病相扶真我友。禪房按膝秋聽雨。野店敲門暮賒酒。畏

途九折歷欲盡世上誰如君耐久老矣更踏千山雲何可一日無此君歸來燈前夜欲半露柱說法君應聞

冬晴

吳中霜雪晚初冬正佳時丹楓未辭林黃菊猶殘枝鳴雁過長空鱗泳清池氣和未重裘臨水照鬢眉悠然據石坐亦復出門嬉野老荷鉏至一笑成幽期

冬夕

犬吠驚飄葉禽喧換宿衾墮空霜肅肅垂地斗離離野叟讀書罷高城吹角悲功名渾錯料老病卻如期

又

不寐起中夕披衣增慷慨千金空市骨三沐竟剝腸世事儻能識吾生安用長布裘茆屋底死去亦芬芳

十月十五夜對月

離海月盈丈寒光萬里明衆星斂欲盡一鏡獨徐行重露滴松鬣高風吹鶴聲老來殊畏冷不盡倚闌情

久疾

久疾無時已殘年莫更論流離魂未返窮困舌空存耕墾關心事祠官荷主恩但愁垂老眼不見定中原

又

殘年仍臥疾窗戶夜情情一日且復過久生非所欽暗塵侵藥笥微月伴衣砧萬里懷良友前盟可得尋

又

幽屏元無事沉懸自解歡脛長猶可截冠挂豈容彈擣藥香塵細尋書蜜炬殘晚來羞覺健風月小庭寬

舍北望牛頭山山有延勝寺先太傅書堂在焉六年前嘗泛小江往遊寺焚於睦寇書堂無復存矣

太傅讀書處秋風曾問途江如青弋險山似白鹽孤山形絕類夔府之白鹽但差卑小耳路盡還登嶺林開忽見湖草堂無復識流涕想規模

十月十九日大風作寒閉戶竟日

霜風捲地起落葉擁蝸廡終日澹無事一窗寬有餘坐多知力耗食少覺心虛懶情無新句松聲忽起予

寄天封明老

浪迹天台一夢中。距今四十五秋風。勝遊回首似昨日。衰病侵人成老翁。聖寺參差石橋外。仙蓬縹緲玉霄東。因君又動青鞵興。目斷千峯翠倚空。

村居

衰病汗朝著。思寬得免歸。僦能心自信。不恨世相違。草市寒沽酒。江城夜擣衣。是中堪送老。高枕謝招麾。

又

自笑觸藩羝。人嘲失旦雞。囊慳衣任短。山冷屋便低。宦拙讒銷骨。言狂悔噬臍。自今焚筆研。有手但扶犁。

十日下午旬暄甚戲作小詩

老怯霜風盡日眠。素屏紙帳擁蠻氈。爲君小試回春手。便似暄妍二月天。

霜天雜興

楓葉全丹。料葉黃。江城殘角伴斜陽。琴書自足閑中樂。天地能容醉後狂。老死山林初不憾。夢遊河渭獨難忘。穀城黃石今安在。取履猶思效子房。

又

萬鼓風聲吼屋邊。老人裘袴旋裝綿。晨梳墮髮知衰甚。夜枕聞雞尙慨然。身後文章空飽蠹。眼前交舊半沉泉。飯蔬飲水平生慣。恥向天公更乞憐。

又

少學愚公一味愚。暮年仍似病相如。閑吟寄友惟生紙。草具留僧只野蔬。雨澀溪流殊未足。霜高木葉已無餘。潭州丞相憐衰疾。細字時收尺素書。

連日風雨寒甚夜忽大風明日遂晴

萬里浮雲一掃空。碧天無際日曛曛。歡聲四起春風裏。恰似祥符景德中。

懷昔

昔者戊梁益。瘦飯鞍馬間。一日歲欲暮。揚鞭臨散關。增冰塞渭水。飛雪暗岐山。悵望釣璜公。英概如可還。挺劍刺乳虎。血濺貂裘殷。至今傳軍中。尙媿壯士顏。豈知墮老境。槁木蒙霜菅。澤國氣候晚。仲冬雪猶慳。囊事空夢想。擁褐自笑孱。胡星未賈地。大弓何時彎。

寄題王俊卿看山堂

廣文風度絕清真。一代論交不數人。車馬到門常謝病。北山雖遠卻相親。
又

閉戶終年嬾出遊。北山山色可消愁。何時一掃胡塵盡。更約同吟太華秋。

絕歎

老屋環青嶂。衰翁臥白頭。殘書且遮眼。薄酒不澆愁。世故真難料。吾生愈覺浮。餘年更須惜。幸得返山丘。

風雨

風雨連三日。衰翁不下堂。弄書聊自適。與世已相忘。坼栗經霜飽。揜橙帶露香。地爐供小飲。亦足慰淒涼。

晚過鄰曲

陽狂跌宕送年華。信步來尋野老家。淺瀨水清逢立鷺。橫林葉盡數栖鴉。書生一飽依耕耒。壯士孤愁入戍笳。王績但思酣笑釀。葛洪不復問丹砂。

莫仲謙挽詞

懷器潛山澤。逢時起薜蘿。星辰占寶劍。雷雨化龍梭。禹穴書雖富。浯溪石未磨。門閭更須築。有子繼三科。

病起

一病輒經旬。幾病能不死。誠知迫頽年。暫健亦自喜。半窗風竹影。晴景極清美。讀書雖益嬾。尙可日百紙。引鏡整角巾。病思真一洗。悠然度朝晡。萬事如覆水。

晚興

一聲天邊斷雁哀。數蕊籬外蚤梅開。幽人耐冷倚門久。送月墮湖歸去來。

贈粉鼻畜貓名也

連夕狸奴磔鼠頻。怒髯嘖血護殘園。問渠何似朱門裏。日飽魚飧睡錦茵。

與兒輩論李杜韓柳文章偶成

吏部儀曹體不同。拾遺供奉各家風。未言看到無同處。看得同時已有功。

夢至小益

夢覺空山淚漬衿。西遊歲月苦駸駸。葭萌古路緣雲壁。桔柏浮梁暗櫟林。坐上新聲猶蜀伎。道傍逆旅已秦音。荷戈意氣渾如昨。自笑摧頽負壯心。

懷紹興間往還諸公

早歲從諸傑。森然盡國華。辭工出月脇。筆健拔鯨牙。道在窮何憾。年徂生有涯。湖山元不改。老淚溼風沙。

磨納道衣

久脫朝衣學道裝。溪雲野鶴作身章。何時九轉丹砂熟。卻插金貂侍紫皇。

溪上作

落日溪邊杖白頭。破裘不補冷飈颼。慙愚酷信紙上語。老病猶先天下憂。未俗陵遲稀獨立。斯文崩壞欲橫流。紹興人物嗟誰在。空記當年接俊遊。

又

僵僂溪頭白髮翁。暮年心事一枝筇。山銜落日青橫野。鴉起平沙黑蔽空。天下可憂非一事。書生無地效孤忠。東山七月猶關念。未忍沉浮酒醜中。

小憩

徐行散腰膂。小憩齋精神。休養觀書眼。調娛宴坐身。青氈我家舊。紅粟太倉陳。溫飽無餘事。寒龜息白勻。

癸丑十一月下旬溫煥如春晦日忽大風作雪

今年一冬晴日多。草木萌甲風氣和。百錢布被未識贖。老翁曝背兒行歌。吾儕小人慮不遠。積雪苦寒來豈晚。青

天方行三尺烏。不料黑雲高。曉曉。明朝雪惡凍復餒。兒啼頰皺翁噤臥。九重巍巍那得知。閣門催班百官賀。

占城櫻竹拄杖

參雲氣壓葛陂龍。跨海來扶笠澤翁。八十尙思行脚在。與君處處現神通。

西城

市步羣鷺散。關門夕照明。河流倒橋影。雪野聚鳥聲。繁杵聞深巷。寒煙下廢城。匆匆船盡發。爭趁早潮平。

東城

墟落斂暮煙。林梢偃新月。河橋燈漸鬧。柳岸船猶發。薄酒吹欲無。佇立搔短髮。誰知七十翁。歲晚念裘褐。

斯道

斯道有顯晦。所憂非賤貧。乾坤均一氣。夷狄亦吾人。朋黨消廷論。鉏耰洗戰塵。清時更何事。處處是堯民。

病起山居日有幽事戲作

靈府超然外物輕。靜中談笑卻三彭。晴窗風竹參差影。霜樹山禽格磔聲。客出異苗咨藥品。僧攜奇篆乞書評。幽居亦未全無事。更用人間有姓名。

又

鶴骨龜腸欲不禁。扶衰初喜罷呻吟。盆山冰釋書窗暖。藥竈香濃道院深。筆健乍臨新獲帖。手生重理舊傳琴。閉門局促還堪恨。雲海何時豁此心。

蝸廬

蝸廬四壁空。也過百年中。葑火朝供爨。蘆綿夕禦風。不憎窮有祟。自以放名翁。但恨村醪薄。衰顏只暫紅。

冬夜讀書有感

一指頭禪用不窮。一刀七藥去凌空。汗牛充棟成何事。堪笑迂儒錯用功。

又

胸中十萬宿貔貅。卓犖黃旗志未酬。莫笑蓬窗白頭客。時來談笑取幽州。

十二月九日枕上作

臥聽百舌語簾櫳。已是新春不是冬。堪歎老來如許病。正令無病亦無悰。

記夢

黃河袞袞抱潼關。蒼翠中條接華山。城郭丘墟人盡老。藥爐依舊白雲間。

又

西巖老宿雪垂肩。白石爲糧四百年。喜我未忘山下路。慙慙握手一欣然。

又

三髻山童喜欲顛。下山迎我拜溪邊。松陰拂罷蒼苔石。接竹穿雲理舊泉。

鏡湖女

湖中居人事舟楫。家家以舟作生業。女兒粧面花樣紅。小繖翻翻亂荷葉。日暮歸來月色新。菱歌縹緲泛煙津。到家更約西鄰女。明日湖橋看賽神。

卷二十九

水村曲

山村今年晚禾旱。奏下民租蠲太半。水村兩足米狼戾。也放三分慰民意。看榜歸來送歌舞。共喜清平好官府。老翁猶記軍興時。汝輩少年那得知。

石洞餉酒

忘憂自古無上策。欲飲家貧酒盃乏。今朝鵲喜報遠餉。未坼赤泥先動色。魚長三尺催膾玉。巨蟹兩螯仍斫雪。勿言地僻少過從。清風明月俱吾客。驅除二豎走三彭。零落眼花生耳熱。陶然酣臥聽松聲。媿爾公卿足憂責。

病退

病退身仍健。春回日漸長。神訶金鼎藥。龍出玉函方。美睡三竿日。安禪半篆香。殘年已如許。幸復起膏肓。

偶書

身放江湖遠。年推里巷尊。鄰翁分酒子。羽客借桐孫。泱泱冰消澗。纖纖柳映門。小車非漢相。時亦到前村。

讀史

南言萑菜似羊酪。北說荔枝如石榴。自古論人多類此。簡編千載判悠悠。

飲石洞酒戲作

酣酣霞暈力通神。澹澹鵝雛色可人。一笑破除垂老日。滿懷搖蕩隔年春。梅花的的吹初破。楊柳纖纖染未勻。醉倒橋邊人不怪。西曹免護相君茵。

霜寒

霜重晨簷滴。薪乾夜焙溫。老惟便布褐。病不出柴門。瓶裏梅花墮。窗間鶻語喧。閑人信無事。午睡到黃昏。

賽神曲

擊鼓坎坎吹笙嗚嗚。綠袍槐簡立老巫。紅衫繡裙舞小姑。烏臼燭明蠟不如。鯉魚糝笑出神廚。老巫前致詞。小姑抱酒壺。願神來享常驩娛。使我嘉穀收連車。牛牟暮歸塞門閭。雞鶩一母生百雛。歲歲賜粟。年年蠲租。蒲鞭不施。園土空虛。束草作官。但形模。刻木爲吏。無文書。淳風復還。羲皇初。繩亦不結。況其餘。神歸人散。醉相扶。夜深歌舞官道隅。

涼州行

涼州四面皆沙磧。風吹沙平馬無迹。東門供帳接中使。萬里朱宣布襖勅。勅中墨色如未乾。君王心念兒郎寒。當街謝恩拜舞罷。萬歲聲上黃雲端。安西北庭皆郡縣。四夷朝貢無征戰。舊時胡虜陷關中。五丈原頭作邊面。

望夫石

送君遠戍交河北。男兒自以身許國。不能彎弓騎惡馬。欲隨君去何由得。登山矯首西北雲。形容雖變心猶存。月明夜夜照猴痕。鐵心石腸輸與君。

江村道中書觸目

短籬曲曲對開門。脩竹陰陰不見村。別浦回潮魚滬密。孤舟春近雁沙溫。路逢行客時交轡。店賣新醅一舉樽。忽過亂山幽絕處。恍如白帝到東屯。

采蓮曲

采蓮吳姝巧笑倩。小舟點破煙波面。雙頭折得欲有贈。重重葉蓋羞人見。女伴相邀拾翠羽。歸棹如飛那可許。傾鬟障袖不應人。遙指石帆山下雨。

兀坐頗念遊歷山水戲作

萬里當時寄一官。十年客枕不曾安。鬼愁灘下扁舟晚。蛇退陂前古驛寒。昔歎遠遊生雪鬢。近緣多病學金丹。功名非復衰翁事。獨有江山興未闌。鬼愁灘在安康漢江中。蛇退陂在夔施兩郡之間。皆畏途也。然山水特奇。

五雜組

五雜組。山雉羽。往復還。江頭路。不得已。貴臣去。

又

五雜組。機上綺。往復還。冶遊子。不得已。富兒死。

漁扉

湖上千峯翠作圍。正應佳處著漁扉。迂疎自計難謀食。老病誰令未拂衣。萬里滄波鷗乍沒。千年華表鶴重歸。一盂粟飯吾何恨。自古高人有采薇。

詠史

夜雨燈前感慨深。爲邦一土重千金。風雲未展康時略。天地能知許國心。劍忽拄頤都將相。帽曾壓耳隱山林。英雄自古常如此。君看隆中梁甫吟。

烏棲曲

楚王手自格猛獸。七澤三江爲苑囿。城門夜開待獵歸。萬炬照空如白晝。樂聲前後震百里。樹樹棲鳥盡驚起。宮中美人謂將旦。髮澤口脂費千萬。樂聲早暮少斷時。莫怪棲鳥無穩枝。

古別雜

君北遊司并。我南適熊湘。邂逅淮陰市。共飲官道傍。丈夫各有懷。窮達詎可量。臨別一取醉。浩歌神激揚。勳業有際會。風雲正蒼茫。亂點劍峯血。苦寒芒屨霜。死即萬鬼鄰。生當致虞唐。丹雞不須盟。我非兒女腸。

書歎

夜深青燈耿窗扉。老翁稚子窮相依。齋鹽不給脫粟飯。布褐僅有懸鶉衣。偶然得肉思共飽。吾兒苦讓不忍違。兒飢讀書到雞鳴。意雖甚壯氣力微。可憐落筆漸健快。其奈瘦面無光輝。布衣儒生例骨立。紈袴市兒皆瓠肥。勿言學古徒自困。吾曹捨此將安歸。作詩自寬亦慰汝。吟罷撫几頻歎歎。

十二月二十六夜聽雨

新春尙七日。小雨暗江城。蒨簷夜點滴。已作春雨聲。輕黃上柳枝。嫩綠抽菊萌。造物本何心。誰主此發生。頗疑重雲外。斗杓已東傾。老至不可卻。一尊忘濁清。

起晚

倚簷百舌語瓊瓏。已覺新春在眼中。欲起未成還小睡。忽看初日滿窗紅。

陳少監餉澄清堂酒

酣暢年來豈易逢。齋湯蜜汁亦時中。玉醅忽逐春風至。一吸懸知百榼空。

雪中作

黑風卷地連三日。密雪穿簾又一回。衰病不禁天色惡。笑談誰共酒尊開。忍寒瘦馬嘶空櫪。覓食飢鴉啄廢臺。笑遣蠻童撼園竹。輟羹分火待歸來。

甲寅元日予七十矣酒間作短歌示子

我昔自蜀歸。百年已過半。觀棋未終局。回視斧柯爛。飽知山林樂。富貴何足換。退休失健決。正坐闔且懦。齒髮日衰殘。歲月難把玩。蕭朱尙或隙。籍湜固宜畔。出門無一欣。撫事有三歎。新年遂七十。推敬媿里閭。眷眷惜茲夕。凜凜畏長明。且豁然忽大笑。愁若春冰泮。窮遠真兩忘。生死付一貫。清尊既激灑。碩果亦璀璨。擁門紛鼓笛。上壽列童

冠。老翁亦忘疲。起舞影零亂。不獨誇癡頑。自足洗患難。投床判宿醒。美睡到日旰。

七十

七十殘年百念枯。桑榆元不補東隅。但存隱具金鴉背。那夢朝衣玉鹿盧。身世蠶眠將作繭。形容牛老已垂胡。客來莫問先生處。不釣娥江即鏡湖。

正旦後一日

七十今年是。連朝樂未休。比鄰更頌禱。親黨共遲留。半映紅纒酒。花簪絳帕頭。從今日有喜。農事起西疇。絳帕頭。蓋以絳帛飾巾幘之類。

立春

探花枝上寶曆新。看遍秦山楚水春。村舍不知時節換。傍簷百舌苦撩人。

老境

髮白未及童。齒搖未及脫。正如一席飲。燒燭將見跋。谿山環草舍。霜露侵布褐。文章雖自力。亦已強弩末。寧將垂老耳。更受世事聒。匡廬入我夢。行已寄瓶鉢。

偶懷小益南鄭之閭悵然有賦

西戍梁州鬢未絲。蟠山漾水幾題詩。劍分蒼石高皇迹。蟠冢廟傍有高皇試劍石。中分如截。巖擁朱門老子祠。三泉道上有老君洞。景趣幽邃。燒兔驛亭微雪夜。騎驢棧路早梅時。登臨不用頻悽斷。未死安知無後期。

再用前韻不依次

憶昨從戎丞相府。元瑜書檄仲宣詩。雲屯騎士臨邊日。魚貫降胡獻捷時。史冊誤人悲壯志。關河回首負初期。豈知二紀身猶在。衰鬢星星老侍祠。

北坡梅開已久一株獨不著花立春日忽放一枝戲作

日日來尋坡上梅。枯槎忽見一枝開。廣寒宮裏長生藥。醫得冰魂雪魄回。

人日

新歲逢人日。老夫持道齋。斷冰浮野水。微綠發枯荄。霽景豐年象。今年元日至。人日皆晴。閑吟曠士懷。春旂已陳迹。鬪巧笑吳娃。前一日立春。

夜讀呂化光文章。拋盡愛功名之句戲作。

玉關西望氣橫秋。肯信功名不自由。卻是文章差得力。至今知有呂衡州。

遇術士飲以卮酒

行藥來村北。觀魚立水邊。忽逢長揖客。能算小行年。酒薄聊頰頰。囊空闕贈錢。時清君未死。訪我華山前。

閑趣

老子卽今雙白鬢。鏡湖自古幾青山。半窗蘿月獨欹枕。滿院松風常掩關。天地許寬誰礙汝。琴尊是處可開顏。將行亦莫買春草。幸有一筇相伴閑。

正月二十日晨起弄筆

深院窗扉曉色遲。新愁宿醉兩參差。雨聲欲與夢相入。春意不隨人共衰。零落殘梅臨小約。縱橫野水赴清池。物華撩我緣何事。以恐新年漸廢詩。

春夜讀書

枉是儒冠遇太平。窮人那許共功名。枯腸不飽三升稷。皓首猶親二尺檠。寓世已爲當去客。愛書更付未來生。夜闌撫几愁無奈。起視離離斗柄傾。

春晴泛湖入城

春色初回杜若洲。隔煙時見矯輕鷗。嵩雲綠月年年夢。楚柁吳檣處處愁。魚躍銀刀論網買。酒傾綠蟻滿盃浮。前生杜牧吾身是。又向江南遍倚樓。

書齋壁

老病人扶氣力微。闌干西角立斜暉。流年冉冉功名誤。新冢纍纍故舊稀。仗馬曾鳴宜永棄。牧羝雖乳敢言歸。住菴活計無多子。只要筇枝與衲衣。

又
落魄人間不記年。晚營茆棟鏡湖邊。室空惟是四壁立。面瘦漸生雙頰顛。地僻門無殘客到。歲豐路有醉人眠。君看朝市紅塵鬧。始信吾曹是地仙。

春日睡起

睡起悠然弄衲琴。銅猊半燼海南沉。淒涼故里逢春處。忠憤孤臣許國心。水滿鳧鷖初拍拍。雨餘花木已陰陰。吾兒捩柂淮邊未。歸近清愁轉不禁。子虞書報月礪古壽。

老病謝客或者非之戲作

病侵腰臂兩經秋。欲下繩床不自由。客至難令三握髮。佛來僅可小低頭。安禪還我閑蒙衲。怒氣從渠勇挾鞦。亦欲署門還嬾去。死生貴賤本悠悠。

永日無一事作詩自詒

目昏罷觀書。足蹇停遊山。二事差可樂。造物乃復慳。得非閱我老。作意鑄其頑。掃除盡宿習。使得終日閑。閑亦何負汝。剡曲茆三間。奇石玩犖角。清流聽淙潺。勿言村醪薄。數酌可解顏。翛然日已夕。臥看飛鳥還。

窗前作小土山藝蘭及玉簪最後得香百合併種之戲作

芳蘭移取徧中林。餘地何妨種玉簪。更乞兩叢香百合。老翁七十尙童心。

泛舟觀桃花

花溼二月桃花發。霞照波心錦裏山。說與東風直須惜。莫吹一片落人間。花溼。桃花最感處。

又

桃源只在鏡湖中。影落清波十里紅。自別西川海棠後。初將爛醉答春風。自梅仙塢至花溼。恰十里。

又

種桃亦解比封君。世故紛紛寂不聞。九轉金丹應已熟。全家仙去隱紅雲。

又

湖南小山花更多，不醉將如春色何。釣得鮮鱗堪斫脍。任教微雨溼漁蓑。湖南山名。在柯山之南。

又

鄰曲一生花裏活。村翁疑是古遺民。初來自被春留住。枉道當時爲避秦。

新闢小園

人生如意每難全。草草園池卻自然。世事已拋高枕外。春風常在短筇前。墮空花片紛紅雨。徧地苔痕長綠錢。酒戶漸增詩興在。天容此老剩狂顛。

又

西戍歸來鬢已霜。生兒又過乃翁長。眼明身健殘年足。飯軟茶甘萬事忘。學廢僅能書姓字。客來嬾復倒衣裳。山園寂寂春將晚。酷愛幽花似蜜香。

又

席地幕天君勿嘲。隨宜野蔌與山肴。幽花避日藏深葉。歸燕尋人理舊巢。曲水詠觴空念昔。斜川鄰曲自論交。清貧尙媿茶山在。送老湖邊有把茆。曾文清至歿常寓僧舍。

又

新展山園半畝強。笑人車馬出籠坊。山禽乍暖慙勸語。野花無風自在香。點點水紋迎細雨。疎疎籬影界斜陽。出門遙向鄰翁說。釋耒相從共一觴。

又

東軒嫩日上疏櫺。吹盡浮雲作意晴。林暖牆頭雙鶯語。水清池面小魚行。畦添藥品誰能別。架引藤陰忽已成。倚杖怡然便終日。老夫那復不平鳴。

又

祠祿糜人未棄官。春深幽國有餘歡。筍生遮道妨行藥。果熟團枝礙整冠。煮酒坵泥初灑灑。生綃裁扇又團團。退飛風際由來事。莫羨青霄刷羽翰。

上巳小飲追憶乾道中嘗以是日病酒留三泉江月亭悽然有感
零落殘花一兩枝。綠陰庭院燕差池。隔牆笑語鞦韆散。惆悵三泉驛裏時。元微之詩。三泉驛內逢上巳。

晚步門外散懷

大千沙界一浮漚。成壞元知不自由。寓迹箇中誰耐久。問君底事不歸休。春陂欲雨黃鶉鬧。晚渡無人白犢浮。七十之年何管足。戲憑藥物小遲留。

又

萬化紛紛本一機。不爲腐骨欲安歸。彭殤共盡孰脩短。堯桀兩忘無是非。濡首極知當痛飲。剪翎那復許羣飛。江郊未解春寒惡。高柳吹花又滿衣。

欲出遇雨

東風吹雨惱遊人。滿路新泥換細塵。花睡柳眠春自嬾。誰知我更嬾於春。

飢坐戲詠

衰鬢蕭然滿鏡霜。一菴歸老鏡湖傍。有懷每恨交朋遠。無食方知日月長。落筆未妨詩袞袞。閉門猶喜氣揚揚。晚來袖手蒲團穩。笑喚兒童代夜香。

蔬食

今年徹底貧。不復具一肉。日高對空案。腸鳴轉車軸。春薺忽已花。老筍欲成竹。平生飯蔬食。至此亦不足。孰知讀書卻少進。忍飢對客談堯舜。但令此道爲有傳。深山餓死吾何恨。

山亭

風惡闌回雨。天寒勒住花。尋幽扶柳栗。息倦倚槎牙。分韻僧吟苦。爭棋客笑譁。相逢仍草草。歸路並山斜。
久不得張漢州書

儘道三巴遠。那無一紙書。衰遲自難記。不是故人疎。

春晚村居

一事元無可得忙。悠然半醉倚胡牀。牡丹枝上青春老。燕子聲中白日長。身世已如風六鷁。文章仍似閨黃楊。太平有象無人識。南陌東阡搗麩香。

遊雲門諸蘭若

花過木陰合。溪雲生暮涼。牛行響白水。鷺下點青秧。古寺宛如昔。穉松森已行。道傍松及三十年。則僧輒伐去。復種小者。予自幼歲至今。已見三種矣。耆年不下榻。童子爲燒香。

與子坦子聿遊明覺十四韻

我自何山來。覓路占樓鐘。聯翩兩葛巾。跌宕一短筇。深谷已曠黑。夕陽猶半峯。堂中千歲師。磊砢如古松。殘僧三四輩。斗粟各自春。長廊久寂寞。香火亦闕供。頗聞在世時。一鉢制惡龍。時時出雷雨。百里常年豐。宿緣忽云盡。獻供無春農。饑鳥晨攫飯。飢鼠夜穿墉。而況我輩人。生世本不逢。胡不安汝分。終年抗塵容。靜觀興廢事。可洗芥蒂胸。一笑下山去。村塢煙重重。

淨智西窗

一窗新綠愜幽情。袖手哦詩取次成。牆外蜜蜂來又去。可憐終日太忙生。

小僧乞詩

風前掩苒草吹香。溪上霏微雨送涼。萬里安西無夢到。卻尋僧話破年光。

西窗睡起

老便寂寂厭紛紛。借得禪房臥看雲。夜宴怕逢觥錄事。秋山傭伴獵將軍。餘年敢望十寒暑。夙習正須三沐薰。斜日滿窗誰喚起。數聲啼鳥隔溪聞。

平水

旅飯風埃小市傍。卻呼拄杖踏斜陽。可憐陌上離離草。一種逢春各短長。

三月二十五夜達旦不能寐

愁眼已無寐。更堪衰病嬰。蕭蕭窗竹影。磔磔水禽聲。捶楚民方急。煙塵虜未平。一身那敢計。雪涕爲時傾。

又

憂國心常折。觀書眼欲枯。百年終坎壈。一飯且枝梧。忽忽殘春過。迢迢清夜徂。壯心空萬里。老病要人扶。

園中小飲

此老胸中萬頃寬。小園幽徑日追歡。寧教酒欠尋常債。恥就人求本分官。高柳陰濃煙欲暝。叢花紅溼露初溥。時月桂方盛開。要知澤國年光晚。已過清明尙淺寒。

舟中夕望

船掠湖堤不入城。葛巾羽扇試春行。女牆迤邐橫輕鬪。佛閣崢嶸倚晚晴。樹冒藤花堆故繡。風吹鶯語送新聲。細思造物何由報。遺作閑人過此生。

四月一日作

桃李逢春次第開。坐看零落付蒼苔。壓車麥穗黃雲重。食葉蠶聲白雨來。鏡裏頓驚年事速。天邊誰挽斗杓回。可憐團扇塵侵損。又見生綃月樣裁。

舟行過梅市

新換單衣細葛輕。翛然隨處得閑行。綠陰浦口維舟處。霽日場中打麥聲。醉叟臥途知酒賤。耕農滿野喜時平。老來無復雕龍思。遇興新詩取次成。

山園雜賦

初夏未覺暑。微陰殊勝晴。藤冠稱新沐。蓴菜解餘醒。偶據盤陀坐。還扶柳栗行。平生志勛業。今日一毫輕。

又

藤陰初覆架。菱蔓漸穿萍。水繞籬根綠。山從樹罅青。長辭帝所夢。不媿草堂靈。賴有黃醅法。終年任醉醒。

又

一日老一日。一年貧一年。元無肉食相。且作地行仙。本不營三窟。何須直一錢。村墟櫻筍鬧。剩放醉中顛。

又

芳荃真妙士。霜菊亦奇才。邂逅心生敬。懇懃手自培。扶持新長桂。護惜欲殘梅。此意何人解。頽然付酒盃。

西窗

西窗偏受夕陽明。好事能來慰此情。看畫客無寒具手。論書僧有折釵評。葦宜山茗留閑啜。鼓下瀟蓴喜共烹。酒肉朱門非我事。諸君小住聽松聲。

山頭鹿

呦呦山頭鹿。毛角自媚好。渴飲澗底泉。飢齧林間草。漢家方和親。將軍灞陵老。天寒弓力勁。木落霜氣早。短衣日馳射。逐鹿應弦倒。金槃犀筋命有繫。翠壁蒼崖迹如掃。何時詔下北擊胡。卻起將軍遠征討。泉甘草茂上林中。使我母子常相保。

夏四月渴雨恐害布種代鄉鄰作插秧歌

浸種二月初。插秧四月中。小舟載秧把。往來疾於鴻。吳鹽雪花白。村酒粥面濃。長歌相贈答。宛轉含幽風。日暮飛槳歸。小市鼓鼙聲。起居閭尊老。勤儉教兒童。何人采此謠。爲我告相公。不必賤民租。但願常年豐。

雲童童行

雲童童。挾雨來。雨未濡。土雲已開。不能爲人斂浮埃。山南山北空聞雷。青秧欲稿吁可哀。

董逃行讀古樂府擬作

漢末盜賊如牛毛。千戈萬槩更相鏖。兩都宮殿糜雲高。坐見霜露生蓬蒿。渠魁赫赫起臨洮。僵屍自照臍中膏。危難繼作如崩濤。王朝荒穢誰復薶。踰城散走墜空壕。扶老將幼山中號。昔者羣枉根株牢。衆憤不能損秋毫。誰知此亂亦不遭。名雖放斥實遁逃。平民跽死聲嗷嗷。今茲受禍乃我曹。

閔雨

黃沙白霧晝常昏。嗣歲豐凶詎易論。寂寂不聞秧鼓動。啞啞實厭水車翻。粟困久盡無遺粒。淚席嘗沾有舊痕。聞道憂民又傳詔。蒼生何以報君恩。有詔禱雨天竺山。

又

赤日黃塵江上村。微租惟有吏過門。微風敢喜北窗臥。大旱恐非東海冤。千載傳疑疑可致。一篇洪範向誰論。青蔬半畝垂生死。且喚鄰翁共灌園。

喜雨

楚巫奔走畏天慳。變化寧知轉盼間。初夜電光搖北斗。父老以北斗下有電候雨。平明雲氣冒南山。坐令沃野新秧遍。已覺豐年舊觀還。白首老農愁破處。夢回高枕聽潺潺。

初夏

已作梅黃雨。猶餘麥秀寒。穿林紅練帶。拔地碧琅玕。酒向愁邊薄。衣從病後寬。所欣消渴減。乳酪正甘酸。

村舍

門巷桑麻暗。庖廚笏鼓香。僮奴課鉏菜。婢子學燒糠。貧任青春過。閑知白日長。非關愛疎嬾。無事可成忙。

烏啼

野人無曆日。烏啼知四時。二月聞子規。春耕不可遲。三月聞黃鸝。幼婦閔蠶飢。四月鳴布穀。家家蠶上簇。五月鳴鴉舅。苗稚憂草茂。人言農家苦。望晴復望雨。樂處誰得知。生不識官府。葛衫麥飯有即休。湖橋小市猶如油。夜夜扶歸常爛醉。不怕行逢灞陵尉。

感舊

廢隴荒陂泥涸耕。生無勛業死無名。衰頽日甚君休問。三十年前白髮生。紹興壬午。予年三十八。與查元章。王危叟。同出垂拱殿門。二君指予問曰。子亦有白髮耶。相與太息。今三十二年矣。

讀書至夜半燈盡欲睡慨然有感

白髮蕭蕭老空谷。人歎厄窮心自足。東郊曉射墮錦雉。北嶼春耕叱黃犢。區區世事何足論。未死斷知常閉門。關河好在萬里路。理亂不至三家村。夜分燈暗月入戶。賦詩肯道儒冠誤。飢鷹勁翮高有聲。橫截陂湖正南去。

遣興

壯歲元多病。長年敢自期。賤貧交易絕。憂患夢常悲。續食叨微祿。寬心賴小兒。平生鏡湖上。天乞小茆茨。

農舍

農舍雖云苦。君恩詎可忘。鷓鴣初滿簇。麥熟已登場。渺渺開村路。登登築野塘。但須時雨足。擊壤詠時康。

四月晦日小雨

霏霏亂點暗朝光。款款奇聲渡野塘。一浦未輪新漲綠。四郊聊壓旱塵黃。風生團扇清無暑。衣覆熏籠潤有香。竹屋茆簷得奇趣。不須殿閣詠微涼。

泛舟過吉澤

蕭蕭菰蒲如荻林。五月已覺秋意深。煙波滅沒無漁艇。浦溆飛鳴多水禽。稽山出雲極奇變。陸子岸幘方微吟。一聲菱唱起何許。洗盡萬里功名心。

書歎

高廟衣冠月出遊。中原父老淚交流。諸公誰效回天力。散吏空懷恤緯憂。雨細漁菴晨舉網。月明耕隴夜驅牛。神州克復知何日。北望飛蓬萬里秋。

五月得雨稻苗盡立

城郭迎龍鼓吹喧。甘膏三夕慰黎元。草荒常日經行路。水到前村舊漲痕。黃犢盡耕稀曠土。綠苗無際接旁村。家家足食山無盜。安枕何勞夜閉門。

薄醉遣懷

踟躕蝸廬迤。蕭條鶴髮新。途窮貧入夢。身老病欺人。帶索忘三組。羹藜抵八珍。蓬窗一盃酒。自覺膽輪囷。

卷二十一

五月十一日夜坐達旦

莫笑耽書不計年。寒儒業定幾生前。讀經今日韋編絕。作賦當時鐵硯穿。公路晚悲身至此。令威歸歎塚纍然。三更聽雨蓬窗底。又作鰥魚夜不眠。

題陽關圖

誰畫陽關贈別詩。斷腸如在渭橋時。荒城孤驛夢千里。遠水斜陽天四垂。青史功名常蹭蹬。白頭襟抱足乖離。山河未復胡塵暗。一寸孤愁只自知。

新暑書事

城中五月汗霑衣。吾愛吾盧喜氣微。珍簞含風來遠餉。輕羅疊雪出鳴機。艾人當戶佳時過。筒黍堆盤舊俗非。漫欲題詩還嬾去。老來百事與心違。去歲葉正則餉薪簞。得以禦暑。今年蠶事。僅得五六分。遂辦暑服。

時雨

時雨及芒種。四野皆插秧。家家麥飯美。處處菱歌長。老我成惰農。永日付竹床。衰髮短不櫛。愛此一雨涼。庭木集奇聲。架藤發幽香。鶯衣溼不去。勸我持一觴。卽今幸無事。際海皆農桑。野老固不窮。擊壤歌虞唐。

示客

桑柘成陰百草香。縑車聲裏午風涼。客來莫說人間事。且共山林夏日長。

南堂默坐

日日樹頭鶉鷓鳴。夜夜谿邊姑惡聲。堂中老子獨無語。寂然似可終吾生。大鵬一舉九萬程。下視海內徒營營。秋蟲春鳥非我類。何至伴渠鳴不平。

夏日

燕子生雛梅子黃。斷雲殘雨過林塘。孤舟正作芰簞夢。九陌難隨襤褸忙。團扇與來閑弄筆。寒泉漱罷獨焚香。太平處處熏風好。不獨宮中愛日長。

小酌

白髮蕭然海上村。猶能草草置清樽。今年項里楊梅熟。綠李來禽不足言。

夏夜

露溼芙蓉冷。月明薔薇香。殘醉吹欲無。颺颺髮根涼。豈惟棄世事。形影亦相忘。空憶南山下。新秋射虎場。

又
我昔在南鄭。夜過東駱谷。平川月如霜。萬馬皆露宿。思從六月師。關輔談笑復。那知二十年。秋風枯首楮。

看鏡

凋盡朱顏白盡頭。神仙富貴兩悠悠。胡塵遮斷陽關路。空聽琵琶奏石州。

又

七十衰翁臥故山。鏡中無復舊朱顏。一聯輕甲流塵積。不爲君王戍玉關。馬正喜公喜功名。每日幸未甚衰。若有邊警。願預征行。得良馬數疋。輕甲一聯足矣。

明妃曲

漢家和親成故事。萬里風塵妾何辜。掖庭終有一人行。敢道君王棄憔悴。雙駝駕車夷樂悲。公卿誰悟和戎非。蒲桃宮中顏色慘。雞鹿塞外行人稀。沙磧茫茫天四圍。一片雲生雪即飛。太古以來無寸草。借問春從何處歸。

思遠遊

我志日已衰。詩亦無傑句。正如隨翅鶴。悵望遼海路。雖云須藥物。幸未迫霜露。裂裳裹兩踵。此詩亦已屢。巖岷青城雲。慘淡嵒冢樹。秋風吹短裘。萬里入芒屨。

太息

太息重太息。吾生誰與歸。那知暮景迫。但覺故人稀。避禍歸猶困。憂讒默亦非。今年貧徹底。擬賣舊漁磯。

六月二十六日夜夢赴季長招飲

少城駿馬逐春風。二十年間萬事空。清夢都忘雙鬢改。繡筵還喜一尊同。烏巾掩冉簪花重。羯鼓敲鏗列炬紅。安得此歡真入眼。碧油幢擁主人翁。

夜分不寐起坐園中至旦

涼氣漸衰疾。幽情入杖藜。月驚孤鶴起。天帶衆星西。松菊今彭澤。山川古會稽。清吟殊未愜。喔喔已晨雞。

露坐

此手乃可憐。經月不把酒。著書又苦晚。何以圖不朽。空庭坐三更。磊落垂北斗。向來歷關河。萬里空回首。豈知三十年。竟作越中叟。後生雖滿眼。非復舊交友。形體迫衰謝。妻子亦何有。悵望懷古人。吞聲死農畝。

晨起

心安已到無心處。病去渾如未病前。晨起更知秋色好。一庭風露聽鳴蟬。

散步東邨

偶從北嶼繚東崗。曳杖行歌踏夕陽。一徑入雲多鹿跡。數家臨水共漁梁。野風蕭瑟知秋早。社酒淋漓喜歲穰。鄰曲不須憐老僊。尙能尋句答年光。

早秋

涼颼浙浙撼庭柯。微雨蕭蕭集浦荷。草閣簷虛覺山近。蓬窗地迥得香多。謀身自拙窮無鬼。閉戶長閑睡有魔。臺省諸公盛冠劍。固應老子得婆娑。

又

秋入房櫳夜漸長。紗廚笛簟怯新涼。螢光得意穿簾隙。桐葉知時拂井牀。世事本來誰得鹿。人生何處不亡羊。燈前笑向吾兒說。又過銅匱半篆香。

又

落魄巴江號放翁。斯名歲晚亦成空。酒醒遙夜孤舟雨。睡笑清秋一榻風。駭浪千重無死地。神丹九轉有新功。雲端不遇飛仙過。誰顧幽人寂寞中。

又

貂裘塵土憶東周。瓜隴風霜隱故侯。嬾似老雞頻失旦。衰如蠹葉早知秋。壺觴非復平生友。歲月空添客子愁。病起筆端猶健在。未妨揮灑賦登樓。

七月二十一日午睡夢泛江風濤甚壯覺而有賦

夢中不記適何邦。風鮑蒲颿入大江。久矣眼中無此快。蹴天雪浪撼船窗。

幽居戲贈鄰曲

暮年遠屏天所借。落佩倒冠如得謝。雖無壺酒助歌呼。幸有蠹書供枕藉。市聲不聞耳益靜。車轍掃空身轉暇。兩慳葵葉未吐甲。露重榴房初拆罅。深紅菱角密覆水。爛紫蒲桃重垂架。直令掩關避世俗。未害煎茶喚鄰舍。蕭蕭雞犬衡門晚。寂寂燈火幽窗夜。勸君切勿縱高談。性命如絲不禁嚇。

遣興

失馬真成福。移山未必愚。故園三徑廢。餘俸一錢無。望道心常渴。觀書眼欲枯。宦遊歸自好。不必爲葦臚。

又

療飢惟恃粥。動步已須人。欲午猶支枕。經旬不過鄰。鵲棲寒自穩。鷗沒遠難馴。莫笑謀身拙。黃冠學季真。

步至湖上寓小舟還舍

淒涼懷古地。慘澹暮秋天。紅樹秦馳道。青山禹廟壩。湖風飄斷角。墟日起孤煙。老恨功名晚。無人共著鞭。

又

山居苦無事。攜稚出門行。酒賤逢人醉。農閑到處耕。巷牛聽晚笛。池鷺唼枯萍。東望生秋興。樓臺壓綠城。

又

病墮支離境。閑尋漫浪遊。湖平天鏡曉。山峭石帆秋。賒酒家家許。看花處處留。歸途倦扶杖。卻上釣魚舟。

又

萬壑爭流地。身閑得縱觀。未能容蟹舍。聊得寄漁竿。遠浦樵風急。空山望石寒。踟躕不知晚。磔磔有歸翰。

又

細浪隨搖櫂。新涼入岸巾。斷行初到雁。空擔暮歸人。漫道貧非病。誰知嬾是真。疎鐘起詩思。迢遞度煙津。

送王仲言倅泰州絕句

汝陰太史萬籤藏。酸棗先生六世芳。豹尾屬車留不住。卻尋陳迹海陵倉。晁景任與先太史。有海陵酬唱。

又

紫薇傑作傳千載。物色分留待下車。老病難陪曳裾客。因來時寄一行書。劉貢甫嘗爲泰侔。

醉中作

舴艋爲家雲作友。流年盡付樽中酒。清歡穿林鸞鳳吟。草書落紙龍蛇走。人間無復王景略。千載風雲常寂寞。安得熊羆十萬師。蹴踏幽并洗河洛。

秋夜書感

闌干斗插西。慘淡河絡角。開歲財屬爾。草木忽搖落。平生歷畏塗。赤手犯蛟鱗。幸收垂盡日。歸臥一丘壑。鄉鄰怪此老。骭髀尙如昨。使無湖海寬。朝市何處著。諸公方袞袞。一士要諤諤。謀食古所羞。終身笑藜藿。

八月三日驟涼有感

殘暑侵人畏汗霑。清秋乍見月纖纖。自燒熟火添香獸。旋把寒泉注硯蟾。佳客誤占螢入戶。遠書空喜鵲鳴簷。悠然獨對清燈臥。誰念柴門老病兼。俗以螢飛入室爲有客至之兆。

南堂與兒輩夜坐

殘暑初歸肺病蘇。胡床清夜集前除。風高木葉危將脫。月上天河淡欲無。鵲影繞枝棲未穩。荷盤擎露重相扶。凄然又起流年感。兩鬢如蓬日夜枯。

泛舟至魯墟

南蕩東陂弄夕霏。葛巾鶴氅試秋衣。纖纖新月迎船出。兩兩珍禽背水飛。病思漸蘇開酒戒。宦情已絕謝塵鞿。郊居是處堪乘興。不怕城笳苦喚歸。

園蔬薦村酒戲作

身入今年老。囊從早歲空。元無擘鮮事。常作啜醜翁。菹有秋菰白。羹惟野蕘紅。何人萬錢筋。一笑對西風。

雨夕排悶

買牛耕剡曲。舉世笑迂疎。流落愈憂國。衰殘猶讀書。滔滔安稅駕。耿耿獨愁余。破屋秋多雨。情懷用底據。

又

煙雨暗郊墟。頽然臥草廬。蟲喧夢回枕。燈伴讀殘書。短褐頻關念。荒畦久廢鋤。更堪湖水漲。累日食無魚。湖水作則魚不可捕。

雨中作

社瓮醅香燕子歸。陰風吹雨暗郊扉。疏溝園叟方攜鍤。采藥蠻童已溼衣。山雉尾垂衝霧去。水雞翅重躡波飛。憑闌一笑君知否。肺渴秋來勢漸微。

讀易

揖遜干戈兩不知。巢居穴處各熙熙。無端鑿破乾坤秘。禍始羲皇一畫時。

郊行夜歸有感

小市歌呼散。幽人悄獨行。斷鴻沙際冷。重露草根明。信古癡常絕。酬恩命本輕。還家掩扉臥。衰海浩縱橫。

醉歌

三十六策醉特奇。竹林諸公端可師。秋風蕭蕭吹鬢絲。蟹螯正可左手持。醉倒村路兒扶歸。瞠目不識問是誰。浩歌起舞夜何其。北斗磊落明河移。貴人惜醉渠自癡。黃金絡馬誇市兒。一朝禍來莫支持。新州如山不可移。

買酒

放翁病起不禁愁。買酒看山自獻酬。八月吳中未搖落。誰令衰鬢早知秋。

秋雨歎

淙淙雨聲瀉高秋。稻梁浸瀾雨不休。志士仁人萬行淚。孤臣孽子無窮憂。一身窮困未暇恤。如此無事理有不。聖言古訓舉不驗。簡編可用汗馬牛。嗚呼有粟吾得食。夜睡何時得安席。我生猶及宣和年。建炎以來身所歷。高皇一言感天地。盜賊千羣掃無迹。疽囊雖慘固可醫。誰爲聖代施鍼石。

憂國

恩許還山已六年。誓憑耕稼餞華顛。養心雖若冰將釋。憂國猶虞火未然。議論孰能忘忌諱。人材正要越拘攣。羣公亦采芻蕘否。貞觀開元在目前。

夜意

居家元是客。在俗亦如僧。點滴簷間雨。青熒帳外燈。壯心終蹭蹬。去日捷飛騰。不及寒沙雁。來時下杜陵。

大風雨中作甲寅八月二十三日夜

風如拔山怒。雨如決河傾。屋漏不可支。窗戶俱有聲。烏鳶墮地死。雞犬噤不鳴。老病無避處。起坐徒歎驚。三年稼如雲。一旦敗垂成。夫豈或使之。憂乃及躬耕。鄰曲無人色。婦子淚縱橫。且抽架上書。洪範推五行。

題齋壁

閉門無事不勝閑。心境超然一室寬。香岫火深生細鬻。硯池風過起微瀾。睡餘但欲依書几。坐久還思弄釣竿。擾擾平生成底事。鏡湖歸隱老黃冠。

又

手斲雲根結草廬。平生心事滿無餘。二升菰米晨炊飯。一碗松燈夜讀書。天理直須閑處看。人謀常向巧中疎。煙波有趣君知否。裂網伸鉤也得魚。

窮途

窮途多感慨。老境少知聞。酒裏閑消日。書中自策勳。全軀希碌碌。掃軌厭紛紛。每愧吾鄉老。頭童念致君。先友傳公給事。暮年髮髯。每酒酣脫幘。覽鏡歎曰。吾其已乎。

貧病

行年七十尚攜鉏。貧悴還如白紵初。好事鄰僧勤送米。過門谿友強留魚。客來旋過牆頭酒。睡起閑抽架上書。要信榮枯元不動。胸中浩浩著空虛。

秋晚

春粳入甑香炊玉。壓酒鳴槽滴碎珠。甲第朱門漫豪俊。山家風味定應無。

又

新築場如鏡面平。家家歡喜賀秋成。老來懶惰慚丁壯。笑睡中聞打稻聲。

又
秋菰出水白於玉。寒齋繞牆甘若飴。正是長齋豈不可。凜然大節固難移。

又
竹竿坡面老別駕。飯顆山頭瘦拾遺。自古詩人例如此。放翁窮死未須悲。

山村書所見

老杖垂藤晝常黑。雞鷹聲作嬰兒啼。伐薪歸來遇急雨。石路下山如踏梯。

又

荒坡茫茫牧牛童。扳角上背捷如風。腰間一枝搢枯竹。橫吹短笛過村東。

三年前嘗與兒輩步過東涇小嶺得勝處可營別墅貧不能成偶復至其地悵然有感

前年度嶺踏斜陽。曾卜松陰置草堂。只倚氣吞雲夢澤。竟無錢買雪堆莊。煙脂菱角空頻摘。火齋楊梅已再嘗。事不如心居十九。往來常羨捕魚郎。山多楊梅。有合抱者。下臨鏡湖。皆菱蕩。

園中秋夕

季秋哉生明。風露正悽冷。放翁澹無事。樂此清夜永。飢鷹棲不穩。勁翅起東嶺。湖邊千樹柳。何處寄幽影。人生寓宇內。俯仰一炊頃。此心無媿負。簞食均五鼎。許身輩稷卨。終亦輸箕穎。天風倘可乘。采蓮登玉井。

秋晴每至園中輒抵暮戲示兒子

老翁七十如童兒。置書不觀事遊嬉。園中壘瓦強名塔。庭下埋盆聊作池。青蒲紅蓼共掩映。病棕瘦竹相扶持。衰顏已作老驥臥。來往尙如黃犢馳。但知身存百無害。莫問老健能幾時。汝勤挾筴乃堪笑。且共飯豆羹秋葵。

醉睡初覺偶作

小園醒還醉。幽窗起復眠。虛明炷香地。清潤斲花天。老去才雖盡。窮來志益堅。阿瞞那可語。平日笑橋玄。

汪茂南提舉挽詞

學已三冬富。書猶萬卷藏。名場雖踳躓。朝論極揄揚。小試禱詩詠。遂辭鵷鷺行。秋風九原路。挽鐸倍淒涼。

又

往者紹興末。江淮聞戰警。上流煩舊德。下客辱深知。陳迹成今古。追懷每涕洟。郎君雖不識。撫事亦增悲。先相公督師荆襄。游首蒙招致幕府。會留樞處不克行。

謝徐居厚汪叔潛攜酒見訪

我雖生亂離。猶及見前輩。衣冠方南奔。文獻往往在。幸供掃灑役。迹忝諸生內。語言猶在耳。造次敢不佩。殘年趨死近。孤學與時背。妄出更何求。終老事耕耒。史君稽古學。力大障橫潰。廣文亦偉士。名字震當代。同舟肯過我。凜與前脩配。憂時抱忠鯁。論事極慷慨。嗟予雖益衰。耳目幸未廢。何當卜鄰牆。早暮聆聲教。

喜鄭唐老相過

鄭子有書癖。對書百事忘。頭亂不暇櫛。鬢冷不暇嘗。持此金石心。力求古文章。吟哦屈宋作。蚤夜聲環珞。方揮卻日戈。恥窺及肩牆。不見今六年。所得非復常。扁舟夜過我。劇論神激揚。徐出二三篇。穉米於太倉。已足起衰懦。黑絲生鬢霜。使得盡見之。殆可鍼膏肓。願子繼自今。勿惜傾錦囊。因來數爲寄。歲晚慰所望。

秋晚散步門外

栗里歸栽菊。青門隱賣瓜。羸軀病天色。衰鬢怯年華。野曠烏聲樂。溪清雁影斜。門前秋潦退。也擬築堤沙。涼水壞道數丈。方與鄰曲共修之。

寄徐秀才斯遠并呈莊賢良器之

徐子作別十年餘。無人可寄一紙書。閑門笑睡長剝啄。自怪一念常關渠。西風蕭蕭吹槁葉。秋光正滿蝸牛廬。讀書易倦出無友。撫几惘恍空愁予。蜀莊之孫住南郭。亦復迹遠非情疎。何時同載過老子。共飯赤米羹青蔬。

閑中

閑中高趣傲羲皇。身臥維摩示病床。活眼硯凹宜墨色。長毫甌小聚茶香。門無客至惟風月。案有書存但老莊。問我東歸今幾日。坐看庭樹六番黃。

秋鬢

驅除雲霧極知難。敢意天公不作慳。汛掃中庭待明月。攀躋危榭望青山。取琴理曲茶煙畔。看鶴梳翎竹影間。不爲新晴宜著句。擬將幽事破除閑。

晨起

晨起梳頭拂面絲。行年七十豈前期。此生猶著幾兩屐。長日惟消一局棋。空釜生魚忍貧憤。閑門羅雀與秋宜。區區名義真當勉。正是先師戒得時。

篋後謠二首寄季長少卿

庭樹非不榮。霜竄萬葉枯。朋友豈我棄。漸遠勢自疎。中夜起太息。發篋覓舊書。塵昏蠹蝕損。行缺字欲無。一讀色已變。再讀涕淚濡。卷書置篋中。寧使飽蠹魚。

又

少壯離別時。回顧日月長。會合終有期。何恨天一方。我齒如敗屐。君髮如新霜。餘日復幾何。萬里遙相望。欲泣老無淚。欲夢不可常。寄書何時到。江漢春茫茫。

悶極有作

貴已不如賤。狂癡又勝癡。新寒壓酒夜。微雨種花時。堂下藤成架。門邊枳作籬。老人無日課。有興即題詩。

自詠

常記當年入洛初。華燈百萬擲樽蒲。平生意薄刀筆吏。投老身爲山澤臞。已罷向空書咄咄。尙能擊缶和嗚嗚。今朝客至無尋處。正伴園丁斲芋區。

夢范參政

夢中不知何歲月。長亭慘淡天飛雪。酒肉如山鼓吹喧。車馬結束有行色。我起持公不得語。但道不料今遽別。平生故人端有幾。長號頓足淚迸血。生存相別尙如此。何況一旦泉壤隔。欲懷雞黍病爲重。千里關河阻臨穴。速死從公尙何憾。眼中寧復見此傑。青燈耿耿山兩寒。援筆詩成心欲裂。

乞奉祠未報食且不繼

富貴常求繫日繩。阨窮卻羨棄家僧。強顏始覺貧爲害。對鏡方嗟老可憎。出戶風霜欺短褐。讀書父子共昏燈。聖師夢奠二千載。一卷遺書終可憑。

山寺

信步得佳寺。入門吹斷香。林深栗鼠健。屋老瓦松長。弔古增懷愴。憑高寄慨慷。忽忽與未盡。新月映方塘。

太師魏國史公挽歌詞

早擅淵源學。常懷懇款忠。雲龍際千載。典冊冠三公。論諫寧中止。謀謨不苟同。此心誰復識。志士泣秋風。

又

位歷公卿貴。身兼將相榮。珥貂儀一品。錫帶價連城。入告推忠厚。躬行本志誠。斯民何以報。萬里徧春耕。

又

道德補天石。勛勞夾日龍。犯顏無不盡。造膝略皆從。歲貢來戎幣。秋防滅塞烽。畫圖麟閣上。猶足折遐衝。

又

舊弼初收召。惟公力贊揚。都亭移供帳。全魏徹封疆。大度寧猜阻。羣言自中傷。拳拳虛左意。猶可竄穹蒼。公初擢附。卽力薦張忠獻公于壽王。如賜館都亭驛。起封魏國公。皆公密奏。且嘗乞用張公爲首相。而已佐之。

又

壠干勞久戍。大將未班師。抗議回天意。忘身爲聖時。人心嶮莫測。時事遠難知。汗簡方傳信。孤生欲語誰。吳璘戍德順軍。師老欲還。不敢自請。公爲相。察其情。卽力請班師。西鄙賴以無事。後議者乃指公爲棄地。公不辨也。

三峽歌

乾道庚寅。予始入蜀。上下三峽屢矣。後二十五年。歸耕山陰。偶讀梁簡文巴東三峽歌。感之。擬作九首。

實紹熙甲寅十月二日也。

神女廟前秋月明。黃牛峽裏暮猿聲。危途性命不容恤。百丈牽船侵夜行。

又

不怕灘如竹節稠。新灘已過可無憂。古粧峨峨一尺髻。木盞銀盃邀客舟。

又
十二巫山見九峯。船頭彩翠滿秋空。朝雲暮雨渾虛語。一夜猿啼明月中。

又
錦繡樓前看賣花。麝香山下摘新茶。長安卿相多憂畏。老向夔州不用嗟。

又
險詐沾沾不愧天。交情回首薄如煙。東遊萬里雖堪樂。瀕澗瞿唐要放船。

又
蠻江水碧瘴花紅。白舫黃旗無便風。涪萬四時常避水。棚居高出亂雲中。

又
亂插山花簪子紅。蠻歌相和灑西東。忽然四散不知處。踏月捫蘿歸峒中。

又
萬州溪西花柳多。四鄰相應竹枝歌。問君今夕不痛飲。奈此滿川明月何。

又
我遊南賓春暮時。蜀船曾繫挂猿枝。雲迷江岸屈原塔。花落空山夏禹祠。

十月三日泛舟湖中作

桑落可釀酒。草枯可呼鷹。平生當此時。意氣十倍增。卽今境界別。千錢買短篷。鏡湖三百里。往來寒日中。小甌炊彫胡。玉食無此美。臥聞水鳥聲。世念去如洗。知此恨太晚。享此恐不足。南山忽已昏。更就漁村宿。

早行

寒漏參差斷。晨雞次第鳴。匆匆半枕夢。草草一盃羹。澤國多逢雨。閑人不計程。雲間出寸塔。迎我有餘情。

晚泊

樓上嗚嗚角。橋邊點點燈。聚沙新到雁。趁渡獨歸僧。日隱山光暗。天低海氣蒸。居人笑老子。醉髮亂鬢髥。

遺懷

暮年世事轉悠悠。攬涕悽然類楚囚。不道渾無排遣處。病觀周易悶梳頭。

舟行戲書

世事無窮膏火煎。羈魂病骨久羸然。覺時不及夢差樂。死去始嗟生可憐。慷慨知非請纆日。推移忽及挂冠年。揚帆海浦差強意。臥看秋濤蹴遠天。

卷二十一

久雨

黃葉雨中盡。飢鴻煙際來。時艱歲仍惡。身死病相催。西埭無行路。南山有疾雷。囊空罷沽酒。一醉轉悠哉。

偶得長魚巨蟹命酒小飲蓋久無此舉也

老生日日困鹽齏。異味櫻魚與楮雞。敢望槎頭分縮項。況當霜後得團臍。堪憐妄出綠香餌。尙想橫行向草泥。東噏夜來梅已動。一樽芳醞徑須攜。

泛舟湖山間有感

我似人間不繫舟。好風好月亦閑遊。歸來華表千年鶴。滅沒煙波萬里鷗。歲晚客貂那復歎。時艱婺緯未忘憂。野人只欲安耕釣。江左夷吾可見不。

望永思陵

綠衣迎拜屬車塵。草木曾霑雨露春。三十五年身未死。卻爲天下最窮人。

又

肝食憂民宴樂疎。太倉幾有九年儲。賈生未解人間事。北闕猶陳痛哭書。紹興庚辰辛巳間。游處真督言。略蒙施

糟蟹

舊交髯簿久相忘。公子相從獨味長。醉死糟丘終不悔。看來端的是無腸。

霜夜

梅花欲動夢魂狂。橙子閑搓指爪香。莫怪草堂清到骨。一梳殘月伴新霜。

又

黃甘磊落圍三寸。赤蟹輪囷可一斤。更喚東陽癩道士。與君霜夜策奇勳。時東陽餉酒。

又

澹月窺窗似有情。更堪梅影向人橫。放翁不受天魔惱。獨擁青氈睡到明。

書室明煖終日婆娑其間倦則扶杖至小園戲作長句

放翁老手竟超然。俗子何由與作緣。百榼舊曾誇席地。一窗今復幻壺天。夢回橙在屏風曲。雨鬢梅迎拄杖前。吾

愛吾廬得安臥。笑人思穎憶平泉。李衛公憶平泉山居。歐陽公思穎詩。皆數十篇。

又

笑睡宜人勝按摩。江南十月氣猶和。重簾不捲留香久。古硯微凹聚墨多。月上忽看梅影出。風高時送鴈聲過。一杯太淡君休笑。牛背吾方扣角歌。

初冬

老客人間百事慵。樂哉閉戶過今冬。朝爐獸炭騰紅焰。夜榻蠻氈擁紫茸。蝟刺坼蓬新栗熟。鵝雛弄色凍醅濃。題詩正自消閑日。本不爭先萬戶封。

買屐

一兩三日泥。泥乾雨還作。出門每有礙。使我慘不樂。百錢買木屐。日日繞村行。東阡與北陌。不問陰與晴。青鞋豈不佳。要是欠耐久。何當踏深雪。就飲湖橋酒。

十月晦日作

藤疎不覆架，桐落欲平溝。閨歲風霜晚，衰年日月遒。觀書方坐石，把釣又登舟。不是無羈束，閑人得自由。

贈道友

凡骨已蛻身自輕，勃落葉上行無聲。華陰市樓醉舞罷，卻上蓬峯看月明。

又

憶在長安爛漫遊，大明宮闕與雲浮。今朝偶上慈恩塔，北望茫茫禾黍秋。唐舍光殿與慈恩塔南北相直。

又

當時辛苦學長生，準擬中原看太平。今日醉遊心已足，一瓢歸去隱青城。

又

二盃兀兀復騰騰，服氣燒丹總不能。借問生涯在何許，孤舟風雨伴漁燈。

又

零落殘碑草棘中，北邙蕭瑟又秋風。舊時憶在鷓行裏，幾見宣麻拜相公。

示子聿

儒林早歲竊虛名，白首何曾負短檠。堪歎一衰今至此，夢回聞汝讀書聲。

老境

平生百不遂，惟有老如期。眼澀觀書夜，心衰把酒時。僧分新掘藥，客誦舊題詩。四十年前我，回看定是誰。

予所居三山在鏡湖上近取舍東地一畝種花數十株彊名小園因戲作長句

出郭西南十里過，小園風月得婆娑。翠屏三扇恰相倚，玉鏡一奩誰爲磨。投鐻未嫌衰鬢白，插花聊喜醉顏酡。耶溪更盡青鞋興，免使將軍怒脫靴。

被命再領冲佑有感

殘骸日益衰，晨夜抱疾痛。地爐得微火，終日不熈動。讀書舊成癖，今但坐作夢。未能追鴻冥，乃復分鶴俸。風霜舍邊柳，合抱皆三種。眼中人盡非，欲話誰與共。

冬夜戲書

東歸剡曲寄彷徨。閑日雖冬亦自長。梅瘦有情橫淡月。雲輕無力護清霜。長魚通印鹽花白。珍鮓披緜麴糝香。一飽喟然還自憫。彊顏垂老食官倉。

又

將挂衣冠彊小留。期年畢竟是歸休。青氈獨擁欺霜夜。濁酒頻傾洗客愁。鶴影冷飈丹井月。雁聲遙帶玉關秋。一生自笑閑中過。不爲功名也白頭。

又

老樹霜餘已盡紅。縱橫落葉滿庭中。一鈎澹澹西南月。萬鼓憑憑東北風。賒酒每慚添舊券。賣書何計策新功。蓬窗坐睡摧頽甚。隔竹敲茶賴小童。

幽居

落葉紛可掃。幽花寒自開。困空無雀噪。門靜有僧來。孤學時方棄。窮途勢莫回。呼兒了租賦。莫待縣符催。

又

兩鬢雞栖早。風高雁陣斜。園丁刈霜稻。村女賣秋茶。缺井磨樵斧。枯桑繫釣槎。客來那用問。此是放翁家。

送蘇召叟秀才入蜀效宛陵先生體

士勇赴知己。義重身固輕。尊公況有命。子得辭此行。結廬出門去。迢迢過蠻荆。泝江卜風色。入峽聽猿聲。萬里一紙書。南寄孤雁征。山陰在何處。計子難爲情。願言早來歸。鄰曲當出迎。檣舟柯橋市。一榼手自傾。

寄題哲上人漫堂

老子從來任運行。愛君堂以漫爲名。北邙大有英雄骨。枉用工夫過一生。

冬夜獨酌

寒水茫茫浸月明。疎鐘杳杳帶霜清。一樽濁酒有妙理。十里荒雞非惡聲。物外雖增新跌宕。胸中未洗舊崢嶸。頽然坐睡蒲團穩。殘火昏燈伴五更。

夜坐燈滅戲作

冷飯黃齋傲太平。鬢絲原不爲愁生。忽因燈死得奇觀。明月滿窗梅影橫。

艾如張

錦膺繡羽名山雞。清泉可飲林可栖。稻梁滿野棄不啄。雖有奇禍無階梯。東村西村煙雨晚。蕭艾離離林薄淺。翩然一下駭機發。汝雖知悔安能免。漢家天子南山下。萬騎合圍窮日夜。犬牙鷹爪死不辭。觸機折頸吁可悲。

上之回

咸陽宮闕天下壯。五更衛士傳雞唱。重門洞開變駕出。回中更在雲霄上。雲霄一路蟠青冥。車聲隱轡馳雷霆。宓妃穿仗王母下。何必軒皇居大庭。君王遊幸無終極。萬年盡是歡娛日。文成已死方不饑。茂陵松柏秋蕭瑟。

雜詠園中菓子

不酸金橘種初成。無核枇杷接亦生。珍產已從幽園得。濁醪仍就小槽傾。

又

漿石榴隨餠作節。蠟櫻桃與酪同時。兩株偶向池邊種。可喜今年墜折枝。

又

架垂馬乳收論斛。港種雞頭采滿船。龜鼎若爲占食指。麴車未用墮饑涎。

又

山杏谿桃本看花。纍纍成實亦堪誇。鹽收蜜漬饒風味。送與山僧下夜茶。

閉戶

聲利能令智者愚。放翁閉戶養迂疎。地爐枯葉夜煨芋。竹窠寒泉晨澆蔬。徇俗不如飜著屨。愛山只合倒騎驢。今朝更有欣然處。萬里知心一紙書。蜀兵來。得張季長歸唐安江原書。

又

冠蓋長安幾番新。放翁只似向來貧。滿窗紅日價無敵。半榼新醅香動人。宴坐心光無蔽障。橫眠踵息自清勻。世

間不用詢名字。身是無懷上古民。

連日大寒夜坐復苦飢戲作短歌

翁飢不能具小飧。兒凍何由成複禪。藏書充棟讀至老。固願少出蘇黎元。念當萬事度可否。肯使一恨彌乾坤。古來賢達少晚謬。千載遺笑綺與園。老翁肝心等鐵石。他年骨朽此固存。村沽雖薄亦取醉。起看江月傾金盆。

園中對酒作

偃僂衰翁雪滿顛。愛花耽酒似當年。雖無錦障七十里。也有青銅三百錢。數掩竹籬分小徑。一泓沙井貯寒泉。栽紅接白株株活。坐擁春工太半權。

孝宗皇帝挽詞

大道本生知。崇高志不移。凝神超事物。觀妙極希夷。訪藥三山遠。遺弓萬國悲。神孫昔鍾愛。天作太平基。

又

代邸膺圖日。臨朝涕泗橫。誠心非外飾。至孝化羣生。高廟聯龍袞。思陵接柏城。平生奉親意。一理貫幽明。

又

便殿諮詢早。深宮宴樂稀。欲頒傳位詔。猶索未明衣。壽損名方永。身癯國愈肥。孤臣泣陵柏。心折九虞歸。

小兒入城

小兒破帽出求師。老父寒爐夜畫詩。不耐青燈寫孤影。聊呼薄酒慰長飢。我今僅守詩書業。汝勿輕捐少壯時。但恨北風如許惡。湖橋歸路想流澌。

夜坐

萬蠹披書卷。孤螢引篆香。病思無事樂。老悔少年狂。南渡衣冠盛。西征道路長。如今俱夢破。高枕看人忙。

又

葉盡木無聲。天高夜自明。映窗燈半滅。掠野雁孤征。瓦裂人間事。雲浮身後名。惟應托長鑱。寂寞送浮生。

縱筆

情游不能耕。心媿新春白。歡傲茅三間。主人終勝客。

又

朝土腰下黃。山僧鼻端白。放翁俱笑汝。飽飯作閑客。

又

溫溫地爐紅。皎皎紙窗白。忽聞啄木聲。疑是敲門客。

又

雪晴蓼甲紅。雨足韭頭白。雖無萬錢具。野飯可留客。

又

小兒勿大勤。使汝髮早白。長爲南畝民。殊勝東閣客。

郊行夜歸書觸目

老翁病起厭端眉。隨意東西不問途。霜野草枯鷹欲下。江天雲溼雁相呼。空垣破竈逃租屋。青帽紅燈賣酒爐。未畏還家踏泥燎。園丁持炬小兒扶。

閉戶

老人閉戶動經月。嬾就東家借蹇驢。身後有名豈如酒。體中不佳聊讀書。秦王開圖見匕首。漢相徇市載廚車。人間憂怖古如此。莫怪荒畦常荷鋤。

十一月五日夜半偶作

草徑江村人迹絕。白頭病臥一書生。窗間月出見梅影。枕上酒醒聞雁聲。寂寞已甘千古笑。馳驅猶望兩河平。後生誰記當年事。淚灺龍牀請北征。

晴和出遊湖山間

日出氣稍和。呼船渡煙津。微風西南來。水面生魚鱗。適此一日佳。聊娛百年身。持鬢俯船舷。一笑彼何人。聞餘春事早。已覺陽和新。梅花處處開。幽香襲衣巾。久病喜我出。問訊傾鄉鄰。舟回不須遠。看蒲白玉輪。

病思

賣劍還山學老農。不堪衰與病交攻。將軍閉戶方鋤菜。處士攜家欲負舂。殘齒彊留終脆確。病腰扶拜苦龍鍾。壯遊誰信梁州日。大雪登城望夕烽。

寄子虞

老自安故鄉。況復觸罪罟。五年三奉祠。每請幸聽許。貧家似破屋。隨事且撐拄。雖殊乞墾肉。已近掘野鼠。平生膽力薄。不敢犯張禹。有時一言失。恐懼氣如縷。念此思挂冠。白首冀安處。吾兒哀乃翁。歲暮忍羈旅。何時得斗粟。歸舍聊共煮。便草北關書。乞骸歸卒伍。

紙閣午睡

紙閣甌爐火一枚。斷香欲出礙蒲簾。放翁不管人間事。睡味無窮似蜜甜。

又

黃紬被煖青氈穩。紙閣油窗晚更妍。一飽無營睡終日。自疑身在結繩前。

夜分復起讀書

愁極不成寐。起開窗下書。似囚逢縱釋。如癯得爬梳。燈火夜過半。風霜歲欲除。平生濟時意。卻作愛吾廬。

效蜀人煎茶戲作長句

午枕初回夢蝶牀。紅絲小磴破旗槍。正須山石龍頭鼎。一試風爐蟹眼湯。巖電已能開倦眼。春雷不許殷枯腸。飯囊酒瓮紛紛是。誰賞蒙山紫筍香。

書逆旅壁

百憂襲暮年。懷抱日騷屑。雖云歸故鄉。何異萬里客。窮冬迫寒餓。凜有在陳厄。駕言適近村。慘慘天欲雪。人沽村市酒。馬齧山坡麥。旅炊雜沙土。得飽何暇擇。手皸若龜兆。面槁無人色。士窮自其分。所幸全大節。功名已甌墮。身世真瓦裂。不學玉關人。飢鷹方夜掣。

癩趣

謝病掩柴荆。年來癩趣成。舌根茶味永。鼻觀酒香清。已矣馳驅息。悠然磊砢平。高眠得三昧。夢斷已窗明。

閑中富貴

要信人生各有緣。閑中富貴亦關天。綠窗靜對千梢竹。翠竇新疏一脈泉。愛百衲琴常鎖匣。買雙鉤帖不論錢。箇中得意君知否。不換金貂與玉蟬。

又

天爲疎慵剩與閑。一菴青嶂白雲間。衲僧過別歸廬阜。羽客來尋說華山。冬筍生林龍鱗鱗。寒泉落澗珮珊珊。俗人自是無因到。雖設柴門不上關。

書近況寄蜀中道舊

遺事復遺榮。空齋一榻橫。宿醒投未正。新句煅初成。山嶠傳梅信。天窗送雪聲。戲題勻碧紙。遺鶴報青城。

醉中自贈

富貴猶宜早退休。一生齟齬更何求。賦形未至欠王甲。語命寧須增斗牛。粟里收身貧亦樂。平陵埋骨死無憂。狂歌醉舞真當勉。剩折梅花插滿頭。

明日自和

二頃元知未易求。不如馬磨學文休。正令未死有幾日。那得殘年叢百憂。霜野挾弓朝射雁。煙陂吹笛暮呼牛。興來醉倒尋常事。莫信兒童笑白頭。

雪中至近村

荒山風雪歲將殘。貸粟迢迢犯苦寒。急燎征裘憩牛屋。旋沽村酒挂驢鞍。清貧徹骨初無憾。老健逢人彊自寬。深夜還家未能睡。解囊吹火取詩看。

歲暮感懷以餘年諒無幾休日愴已迫爲韻

昨暮送客歸。短襪過魯墟。故廬有遺趾。青山遶牆隅。桑竹雖鬱然。舊植已無餘。瓦礫不可求。而況屋壁書。繫舟問鄰人。搔首久躊躇。行當挂朝衣。躬耕返吾初。

又
我家釋耒起，遠自東封前。詩書守素業，蟬聯二百年。長老日零落，念之心惕然。每恐後生輩，或爲利欲遷。我少亦知學，蹭蹬及華顛。訟過豈不力，壽非金石堅。

又
我壯已早衰，晨鏡每惆悵。藥物姑自持，耆老曷敢望。造物有乘除，貧悴博無恙。歸鄉更多感，朋舊盡凋喪。客來多避席，謂我丈人行。此意詎敢忘，報子以直諒。

又
士生始志學，固爲聖人徒。人人可稷禹，世世皆唐虞。仰事與俯育，治道無絕殊。孔孟之所傳，世俗顧謂迂。申韓尙刻薄，老莊競虛無。爾車非不良，蓋行九軌途。

又
江左謝太傅，高臥頗自喜。東山豈不佳，惜也終一起。阿堅偶自敗，元子亦適死。區區疑謗中，勳業端有幾。當時嘲小草，雖戲實中理。所以山中人，至今笑園綺。

又
家世本無年，甲子近一周。小子獨何幸，七十今平頭。往者收朝迹，亟欲求歸休。厚恩許奉祠，得祿歲愈憂。三釜不及親，顧爲妻子留。何由洗此媿，欲挽天河流。

又
高皇昔中興，風雨躬沐櫛。一士未嘗遺，萬里皆馳駟。廉聽闢言路，虛懷詢得失。孤臣實草芥，亦獲對宣室。龍顏宛在目，德不報萬一。橋山松柏寒，淚盡史臣筆。

又
王師宿梁益，行臺護諸將。腐儒忝辟書，萬里至渭上。旌旗照關路，風雪暗戎帳。堂堂鐵馬陣，臺臺木牛餉。誰知骨相薄，空負心膽壯。回首二十年，撫事增悲愴。

又

在昔祖宗時。風俗極粹美。人材兼南北。議論忘彼此。誰令各植黨。更仆而迭起。中更夷狄禍。此風猶未已。臣不難負君。生者固賈死。儻築太平基。請自厚俗始。

又

井地以養民。整整若棋畫。初無甚貧富。家有五畝宅。哀哉古益遠。禍始開阡陌。富豪役千奴。貧老無寸帛。困窮禮義廢。盜賊起。蹙迫誰能講古制。壽我太平脈。

桐江哲上人。以端硯遺子。韋纔寸餘。而質甚奇。天將兩輒。先流泚。予爲效宛陵先生體作詩一首。吾兒得巖硯。其徑甫踰寸。奇哉掌握物。乃有珠璧潤。器寶備才德。初不以形論。汝能忘山林。懷之可嘉蹶。

立春前三日作

春近寒尤苦。先生不下堂。烏皮蒙燕几。白拂挂禪牀。書架斜斜設。梅花細細香。悠然睡還起。已覺日微長。

贈應秀才

過宋不見元城公。濩淮不見陳了翁。當時人人皆太息。至今海內傾高風。老夫七十居鄉縣。齷齪龍鍾何足見。辱君雪裏來叩門。自說辛勤求識面。我得茶山一轉語。文章切忌參死句。知君此外無他求。有求寧踏三山路。

春耕

今年液水滿西疇。父老人人卜有秋。只要耕犁及時節。裹茶買餅去租牛。

首春連陰

入春十日九日陰。積雪未解雨復霽。西家船漏湖水漲。東家驢病街泥深。去秋宿麥不入土。今年米貴如黃金。老嫗哭子那可聽。僵死不覆黔婁衾。州家遺騎餽春酒。欲飲復止吾何心。出門空歎歲華速。已見微綠生高林。

夜坐

衰翁不出門。歲月過電雹。窗明地爐煖。袖手坐寂寞。可憐瓶中梅。爛漫幾開落。小園亦數樹。曾未破一萼。三更北風急。雨雪忍復作。且當勸舉杯。莫畏學義薄。

新春

老境三年病。新元十日陰。疎籬枯蔓綴。壞壁綠苔侵。憂國孤臣淚。平胡壯士心。吾非兒女輩。肯賦白頭吟。

得季長書追懷南鄭幕府慨然有作

從戎昔在南山日。殫半春光醉裏銷。綠樹啼鶯窺帽影。畫橋飛絮逐鞭梢。花經小雨開差晚。笙怯餘寒纏未調。惆悵流年又如許。羈魂欲仗楚詞招。

正月十一日夜夢與亡友譚德稱相遇於成都小東門外既覺慨然有作

當年與子別江干。漸老心知後會難。豈料今宵清夢裏。東門交轡說春寒。

送陳吏部還朝

邂逅稽山許攬鬚。塵埃時得近冰壺。不辭我老雞豚社。且喜公歸櫻筍廚。滿室琴書懷燕几。一川風雨送行轍。勉哉早了功名債。要畫騎牛第二圖。先賢良與劉凝之有廬山騎牛圖。

觀棋

一枰翻覆戰枯棋。慶弔相尋喜復悲。失馬翁言良可信。牧豬奴戲未妨爲。白蛇斷處真成快。黑幟空時又一奇。斂付兩奩來對酒。泠泠聽我誦新詩。

春行

簞帽絲絲雨。芒鞋策策泥。柳斜風帶北。花斂日平西。社酒誇新壓。春燕喜遍犁。深村無客過。父子自扶攜。

雨霽春色粲然喜而有賦

應接年光老漸慵。猶能一飲百分空。半霑蝶粉簾櫳雨。遠送鶯聲巷陌風。千縷麴塵楊柳綠。萬枝猩血海棠紅。從來造物陶甄手。卻在閑人詩句中。

幽思

雲際茅茨一兩間。春來幽事日相關。臨窗靜試下巖硯。欹枕臥看靈壁山。紅練帶飛俱意得。錦熏籠煖尙香慳。錦熏籠帶瑞香。今朝社過添惆悵。高棟巢空燕未還。

贈持鉢道人

青鐵作小冠。白紵縫短褐。右扶九節杖。左執七綴鉢。何嘗有定止。到處可生活。惟有烈士心。白刃不能奪。相逢一笑粲。滯思得披豁。揮袂去若飛。跂望已天末。

柳

楊柳春風綠萬條。憑鞍一望已魂消。當年鳳集城邊路。曾愛纖纖拂畫橋。

又

西園雨打杏花稀。便面章臺事已非。只恐無情堤上柳。又將風絮送春歸。

山園雜詠

祠祿留人未挂冠。山園三畝著身寬。百年竟向愁邊老。萬事元輸靜處看。花徑糝紅供晚醉。月天生暈作春寒。汗青事業都忘盡。時賴吾兒舉話端。

又

殘春終日在林亭。散髮披衣醉復醒。科斗已成蛙閣閣。櫻桃初結子青青。魚遊滄海寧濡沫。禽慕雕籠卽翦翎。薄晚東風吹小雨。笑攜長鏡伴畦丁。

又

桃花爛熳杏花稀。春色撩人不忍違。俗客年來真掃迹。清樽日暮獨忘歸。魚行池面紅雲散。鵲起枝頭絳雪飛。莫道顛狂無訴處。臥看香篆掩齋扉。

又

已過社雨尙春寒。小醉初醒怯依欄。柳帶花移宜土潤。鶴和雞養要籠寬。孤翁白首投村社。諸彥青雲接羽翰。誰信幽居多樂事。晚窗兒女話團圓。

又

春光何止二分空。寒食都無數日中。密葉成陰花寂寂。舊巢添土燕怱怱。紙齋收線愁風惡。秧馬掀泥喜雨濛。堪

歎今年衰更甚。蒼顏縱醉不成紅。

卷三十一

兩夜書感

宦遊四十年。歸逐桑榆暖。皇恩念黎老。一官猶置散。春殘桃李盡。風雨閉空館。有懷無與陳。萬事付酒碗。近代固多賢。吾意終不滿。可憐杜拾遺。冒死明房瑄。慷慨詎非奇。經綸恨才短。羣胡穴中原。令人歎微管。

又

儒生不自貴。執藝等卜祝。詩書定何物。爲汝市爵祿。唐虞雖日遠。凜凜猶在目。誰能舉其要。治功端可復。平生羸知此。俛仰髮已禿。一豪不獲施。老病死巖谷。安知萬世後。終無可封俗。願廣稽古心。端拱咨嶽牧。

鏡湖

躬耕蘄一飽。閔閔望有年。水旱適繼作。斗米幾千錢。鏡湖泆已久。造禍初非天。孰能求其故。遺迹猶隱然。增卑以爲高。培塿使之堅。坐復千載利。名託亡窮傳。民愚不能知。仕者苟目前。吾言固應棄。悄愴夜不眠。

舟中戲書

平生萬事付之天。百折猶能氣浩然。試問軟塵金絡馬。何如柔艣月侵船。英雄到底足癡絕。富貴但能妨醉眠。三百里湖隨意住。人間真有地行仙。

春晚懷山南

梨花堆雪柳吹絲。常記梁州古驛前。二十四年成昨夢。每逢春晚即悽然。

又

壯歲從戎不憶家。梁州裘馬鬪豪華。至今夜夜尋春夢。猶在吳園藉落花。

又

梁州一別幾清明。常憶西郊信馬行。桃李成塵總閑事。梨花楊柳最關情。

又
身寄江湖兩鬢霜。金鞭朱鞵夢猶狂。遙知南鄭城西路。月與梨花共斷腸。

春晚書齋壁

海棠已成雪。桃李不足言。纖纖麥被野。鬱鬱桑連村。禪蠶細如蝨。杜宇號朝昏。展墓秋餌笑。坐社黍酒渾。早筍漸上市。青韭初出園。老夫下箸喜。盡屏雞與豚。幽居亦何樂。且洗兩耳喧。呼兒燒柏子。悠然坐東軒。

七十一翁吟

七十一翁心事闌。坐叨祠祿養衰殘。樽中無酒但清坐。架上有書猶縱觀。吏部齒搖心悵望。將軍髀滿淚沈瀾。客來共飯增羞澀。小摘山蔬不揜槃。

山茶一樹自冬至清明後著花不已

東園三日雨兼風。桃李飄零掃地空。惟有山茶偏耐久。綠叢又放數枝紅。

晨起

初日破蒼煙。零亂松竹影。老夫起燒香。童子行汲井。平生水雲身。不墮車馬境。願言學龐公。全家事幽屏。

春晚雜興

人寂野人家。柴扉傍水斜。僧分晨鉢筍。客共午甌茶。燕戶添新土。蛛絲罥落花。悠然便終日。惟此送年華。

又
澤國固多雨。暮春猶薄寒。兒童葺茶舍。婦女賽蠶官。閱世年雖往。爲農興未闌。窮途得一飽。亦足慰艱難。

又

池面萍初紫。牆頭杏已青。攜兒撐小艇。留客坐孤亭。相法無侯骨。生年直酒星。正須遺萬事。莫遣片時醒。

又

小市湖橋北。幽居石埭西。蒲深姑惡哭。樹密秣歸啼。山茗封青箬。村醪坵赤泥。平生汗簡手。投老慣扶犁。

又

病瘍無意緒。閉戶作生涯。草草半盂飯。悠悠一盃茶。笑穿居士屨。閑看女郎花。唐人謂辛夷爲女郎花。園中有此花。一叢二百朵。莫問明朝事。忘家卽出家。

又

青梅薦羹酒。綠樹變鳴禽。處世已如客。傷春無復心。焚香惟默坐。曳杖亦幽尋。一日悠然過。深慚惜寸陰。

齋中雜題

列屋娥眉不足誇。可齋別自是生涯。閑將西蜀團窠錦。自背南唐落墨花。

又

小醉微吟過一春。人間儂是最閑人。龜毛拂子長三尺。拈起風光處處新。

又

柴几硯涵鸚鵡眼。古奩香斲鸚鵡斑。絕知造物慙懃意。成就衰翁到死閑。

又

幽居厭見凡花草。紅紫紛紛不復栽。自斲蒼苔換黃土。南山移得玉芝來。窗外新移雲門玉芝一本。甚茂。

老疾戲自贈

年過七十日夜衰。羸然骨立不支持。一身百病作無時。飯且不足那論醫。鏡中之人定是誰。面骨突兀鬢成絲。買

棺作冢計已遲。一旦寧免累諸兒。門前湖山可處嬉。心雖欲往力不隨。左車牙脫吁可悲。問汝何不食肉糜。

夜坐聞湖中漁歌

少年嗜書竭目力。老去觀書纏如棘。短檠油盡固自佳。坐守一窗如漆黑。漁家曩曩起三更。哀而不怨非凡聲。明

星已高聲未已。疑是湖中隱君子。

上巳書事

單衣初著下湖天。飛蓋相隨出郭船。得兩人人喜秧信。祈蠶戶戶斂神錢。黃雞羹臠無停筯。青韭菹菹欲墮涎。丞

相傳聞又三押。衡茅未改日高眠。

對酒

手摘醱醞翦牡丹。山家草草亦杯盤。溪頭一夜風吹雨。又作殘春幾日寒。

自規

陸君拙自謀。七十猶糲食。著書雖如山。身不一錢直。默自觀我生。困弱良得力。轉喉長或觸。唾面敢自拭。世路方未夷。機穽寧有極。但能常閉門。食糝貸雞肋。

窮居有感

孤村煙草暮淒迷。笠子蓑衣自架犁。生計似蛛聊補網。弊廬如燕旋添泥。人上蒼蒼多時學。地廢陂湖失古隄。迂闊自知無著處。敢因窮厄怨推擠。

春夏之交風日清美欣然有賦

日鑄珍芽開小缶。銀波煮酒湛華觴。槐陰漸長簾櫳暗。梅子初嘗齒頰香。戶戶祈蠶喧鼓笛。村村乘雨築陂塘。年光何預衰翁事。伴蝶隨鶯也解狂。

又

天遣殘年脫屣轡。功名不恨與心違。綠陂細雨移秧罷。朱舫斜陽擘紙歸。花市丹青賣團扇。象牀刀尺製單衣。白頭曳杖人爭看。共歎浮生七十稀。

又

芳潤園林不似貧。年光無盡逐番新。來禽顏色不禁雨。搏黍語言如惜春。身外豈關吾輩事。鏡中已換昔時人。神仙定未超塵俗。猶插金貂侍帝晨。

夜歸

疎鐘渡水來。素月依林上。煙火認茅廬。故倚船篷望。

農家歎

有山皆種麥。有水皆種杭。牛領瘡見骨。叱叱猶夜耕。竭力事本業。所願樂太平。門前誰剝啄。縣吏徵租聲。一身入

縣庭。日夜窮苦撈人，孰不憚死。自計無由生，還家欲具說，恐傷父母情。老人儻得食，妻子鵠毛輕。

三月十一日郊行

到處人家可乞漿。槐陰巷陌午風涼。水陂漫漫新秧綠。山壠離離大麥黃。父子力耕春漸老。婦姑共績夜猶長。堯民擊壤雖難繼。芹笑懷君未敢忘。

初夏行平水道中

老去人間樂事稀。一年容易又春歸。市橋壓擔葺絲滑。村店堆盤豆莢肥。傍水風林鶯語語。滿原煙草蝶飛飛。郊行已覺侵微暑。小立桐陰換夾衣。

初夏幽居偶題

放逐還家一老翁。癡頑自笑更誰同。倚欄風月黃昏後。攜杖園林綠潤中。泳水小魚依藻荇。窺巢輕燕拂簾櫳。此身要豈堅牢物。莫遣須臾酒盞空。

又

展盡高槐日漸長。了無蜂蝶爲花忙。青梅旋摘宜鹽白。衰酒初嘗帶臘香。林下光陰無一事。水邊窗戶有餘涼。應門不用辭衰疾。車馬何由到野堂。

又

昔如轉戰墮重圍。今幸羸翎脫駭機。曉樹好風鶯獨語。夜窗細雨燕相依。安居不恨蝸廬迮。得食寧論鶴料微。更喜暮年彊健在。又看刀尺製綠衣。

又

朱櫻半酪喜新舊。碧井桐陰轉午涼。書几得晴宜試墨。衣篝因潤稱熏香。枯龜自覺支牀穩。老馬安能試草長。半世學騷終不近。空餘清夢上沅湘。

晨起

青青水中萍。粲粲牆下草。開歲纔幾時。已歎春事老。鳴禽傍窗戶。怪我倦幽討。長吟感人懷。病枕起亦早。下牀呼

獠奴。浩蕩恣灑掃。綠陰列蒼石。芳樽得頻倒。客來但與飲。談天有何好。亦莫雕肺肝。吟哦學郊島。

小園

剡曲西邊築草堂。小園聊復寄相羊。魚行水際汀蘋動。麝過林中野草香。覓句有時攜筆硯。遣懷隨事具杯觴。少年朋舊凋零盡。不獨思人亦自傷。

幽居

青門不種故侯瓜。揀得湖山便寄家。老境一塵依水竹。壯遊萬里犯風沙。氣衰那辦飲無算。病著更知生有涯。莫道吾廬全索寞。牆東新補數株花。

夜賦

小齋寂寂似禪寮。臥數更籌覺夜遙。帳外殘燈欺不寐。梁間棲燕伴無聊。江湖踏蹬朱顏改。憂患侵凌壯志消。挂旆天山少年事。此身終負聖明朝。

閑中書事

病過新年逐日添。清愁殘醉兩厭厭。惜花萎去常遮日。待燕歸來始下簾。堂上清風生玉麈。澗中寒溜注銅蟾。一生留滯君休歎。意望天公本自廉。

又

一畝山園半畝池。流年忽遽挂冠期。賣花醉叟剝紅桂。種藥高僧寄玉芝。午枕爲兒哦舊句。晚窗留客算殘棋。登庸策免多新報。老子癡頑總不知。

初夏

紛紛紅紫已成塵。布穀聲中夏令新。夾路桑麻行不盡。始知身是太平人。

又

翦韭醃蔬粟作漿。新炊麥飯滿村香。先生醉後騎黃犢。北陌東阡看戲場。

又

稻未分秧麥已秋。豚蹄不用祝甌窶。老翁七十猶彊健。沒膝春泥夜叱牛。

又

買得新船疾似飛。蠶飢遙望采桑歸。越羅蜀錦吾何用。且備幽人卒歲衣。

又

槐柳成陰雨洗塵。櫻桃乳酪併嘗新。古來江左多佳句。夏淺勝春最可人。夏淺卻勝春。徐陵詩也。

又

杜鵑血盡啼未歇。蝴蝶夢殘心更狂。我自人間少情者。老來十倍惜年光。

又

賜食金盤出寶闈。玄熊掌映紫駝蹄。侯家但詫承恩澤。豈識山廚苦蕘蕘。

又

隋家古寺郡西南。寺廢殘僧只二三。藜藿滿庭塵闥佛。時聞鐃鼓賽春蠶。

又

渺渺荒陂古埭東。柳姑小廟柳陰中。放翁老憊扶藜杖。也逐鄉人禱歲豐。

又

老翁賣卜古城隅。兼寫宜蠶保麥符。日日得錢惟買酒。不愁醉倒有兒扶。

四月旦作時立夏已十餘日

京塵相值各匆忙。誰信閑人日月長。爭葉蠶飢鬧風雨。趁虛茶嬾闕旗槍。林中晚筍供廚笑。庭下新桐覆井涼。堪

笑山家太早計。已陳竹几與藤牀。

春夏之交鳴鳥百族惟布穀聲最悲急動人戲作十韻

春風捨人去。陸子歎以驚。欲挽春使回。無奈布穀聲。春亦何負汝。且暮聲不停。或謂布穀者。一氣感使鳴。春老自當去。微禽彼何情。上天運四時。斗柄亦崢嶸。奈何獨私春。欲使久不傾。南風吹衆綠。一掃紫與赭。此時豈不佳。乃

爾懷不平。勿作兒女態。起視東郊耕。

倚杖

倚杖柴門外。踟躕到日斜。兒童拾筍籜。婦女賣茶芽。掠岸過漁艇。隔籬聞緯車。年來詩料別。滿眼是桑麻。

野步

蝶舞蔬畦晚。鳩鳴麥野晴。就陰時小息。尋徑復微行。村婦窺籬看。山翁拂席迎。市朝那有此。一笑慰餘生。

竹窗晝眠

初夏暑雨薄。但覺白日長。向來萬里心。盡付一竹牀。新筍出林表。森然羽林槍。時聞解籜聲。靈府生清涼。平生喜晝眠。此志晚乃償。安枕了無夢。孰為蝶與莊。徐起掬寒泉。中有菱絲香。清獻送落日。與世永相忘。

騰騰

騰騰吾喪我。兀兀我忘吾。萬事皆墮甌。一身真朽株。江天號鸛鶴。村巷暗楸梧。薄酒猶堪醉。歸來稚子扶。

幽棲

閑人了無事。地僻稱幽栖。甌米留雞食。移琴避燕泥。桐生窗欲暗。筍長徑還迷。不作容車計。門閭儘放低。

又

誰謂幽棲陋。茅茨足庇牀。雨便梧葉大。風度練花香。浴佛兒童喜。繅絲婦女忙。竭來三十載。吾鬢固宜霜。乾道丙戌。始卜居鏡湖之三山。今甫三十年矣。

睡起

虛堂四簷竹。脩脩朱夏正。午如高秋。八尺風漪雲碧稠。一榻寬如禹九州。屈信展轉俱自由。息以兩踵無與喉。世方窘若魚吞鈎。我獨超然鷹脫鞲。一物不向靈臺留。非睡非覺以神遊。青城紫閣多朋儔。相逢握手笑不休。

愁坐忽思南鄭小益之間

當年蜀道秦關。萬里飄然往還。酒病曾留西縣。眼明初見南山。

又

籌筆門前芳草。回龍道上青山。萬里猶能夢到。再遊未信天慳。

四月十三夜四更起讀書

七十未捐書。正恐死乃息。起挑窗下燈。度此風雨夕。

夏雨初霽題齋壁

楸花練花照眼明。幽人浴罷葛衣輕。燕低去地不盈尺。鵲喜傍簷時數聲。對奕軒窗消永晝。曬絲院落喜新晴。忽驚重五無多日。采縷纏筒弔屈平。

東窗

萱草石榴相續開。數枝晚筍破蒼苔。背人紅練穿林去。直是無情不再來。

聞鼻

兩忘堯桀自心平。此念胡爲掃復生。幸是安眠無一事。苦憐鶯語惡鼻聲。

兩中示子聿

窮閭父子自相依。寂寂茅廬映竹扉。瓜蔓水生初抹岸。練花寒動卻添衣。吾玄自笑豈尙白。汝瘦元知能勝肥。苦學勿爲干祿計。宦途雖樂不如歸。

山園屢種楊梅皆不成。枇杷一株獨結實。可愛戲作長句。

楊梅空有樹團團。卻是枇杷解滿盤。難學權門堆火齊。且從分子拾金丸。枝頭不怕風搖落。地上惟憂鳥啄殘。清曉呼僮乘露摘。任教半熟雜甘酸。枇杷盡熟時。鴉鳥不可復繫。故熟七八分則取之。

夢遊山寺焚香煮茗甚適。既覺悵然以詩記之。

平日居山恨不深。豈來差足慰幽尋。僧歸共說道逢虎。院靜惟聞風滿林。臺盞雪瀉驅滯思。象盤雲縷洗塵襟。此行殊勝邯鄲客。數刻清閑直萬金。

夏日

柴扉晝掩竹林幽。坐使炎天變素秋。扇月團團似秋滿。簟波細細欲平流。朋儕零落關河阻。疾病沉懸歲月遒。賴

有澄湖常在眼。虎頭不用畫滄洲。

巢山

巢山避世紛。身隱萬里雲。半谷傳樵響。中林過鹿羣。蟲蝨葉成篆。風蹙水生紋。不躡溪橋路。仙凡自此分。

又

短髮巢山客。人知姓字誰。穿林雙不借。取水一軍持。渴鹿羣窺澗。驚猿獨裊枝。何曾畜筆硯。景物自成詩。

四月二十三日作

颯颯荷難水。翩翩燕出窠。苦添雨後暈。筍放露中梢。世路千重浪。生涯一把茅。款門僧亦絕。無句鍊推敲。

又

莫笑茅廬迳。何曾厭日長。飯餘醪酪滑。浴罷葛巾涼。落日桐陰轉。微風梔子香。貧家猶裹粽。隨事答年光。

觀月

清風發疎林。瞰月上素壁。悠然倚庭楯。愛此風月夕。人間好時節。俯仰成宿昔。少年不痛飲。老大空歎息。

溽暑

溽暑雨將作。南風來解圍。幽花臨砌墀。乳燕傍窠飛。腰斧剝桑去。攜籃采藥歸。翻憐少年老。疊雪詫宮衣。

晨起

衰老少睡眠。睡晚覺常早。五更攬衣起。漏鼓猶考考。青燈耿孤影。不睡坐亦好。讀盡一編書。南窗朝日杲。

閑思

溝水細無聲。窗扉晚更明。簾開燕雙入。人靜鶻羣行。青李求初至。黃醅釀已成。出門無奈嬾。不是傲公卿。

又

小雨時時作。幽花續續紅。新蟬落庭樹。疑燕集屏風。傍枕拋書卷。臨池下釣筒。閑中有真樂。那得歎途窮。

梅天

稻壠移初過。梅天澀未晴。輕陰昏蒼色。餘潤咽琴聲。時傍菱塘立。還尋沙徑行。杜門終此世。更誓未來生。

夜坐

燈暗一室幽。鳥鳴四山靜。道人坐倚壁。度此清夜永。少時志功名。癡絕如捕影。造物逼以窮。磨礪發深省。坐令盆盎淺。渺渺波萬頃。雖未造道真。南轅終至郢。

麥熟市米價減鄰里病者亦皆愈欣然有賦

凶年已度麥方秋。學道從來幸寡求。荷鍤自隨身若寄。甕籩可賣飯何憂。鄰翁瀕死復相見。村市小涼時獨遊。不怕歸時又侵夜。新添略徇跨清溝。

雨中作

風聲如翻濤。雨點如撒菽。皇天念此老。一爲洗煩促。呼童取短檠。聊展舊書讀。悽然對孤影。感歎衰鬢禿。兀如老病馬。關河久在目。伏櫪雖已疲。連雲思苜蓿。

夜雨

齒牙搖動鬢毛疎。四壁蕭然臥草廬。急雨聲酣戰叢竹。孤燈焰短伴殘書。壯心未減從戎日。苦學猶如覓舉初。自笑堅頑誰得似。同儕大半已丘墟。

乙卯重五

重五山村好。榴花忽已繁。粽包分兩髻。艾束著危冠。舊俗方儲藥。羸軀亦點丹。日斜吾事畢。一笑向杯盤。

夏夜風雨極涼枕上口占

北窗八尺臥文藤。夜雨生涼洗鬱蒸。裊裊清愁縈斷角。悠悠孤夢伴殘燈。羸軀垂老嗟焉往。公論猶存似可憑。聊向斯文圖不朽。未甘粥飯學山僧。

窮居

半世偃偃信所之。窮居仍抱暮年悲。燒金術謬囊衣薄。種黍年凶酒味醜。大廈萬間空有志。後車千乘更無期。掩書常笑城南杜。麻屨還朝授拾遺。

思蜀

白首躬耕遇澁饑。江南自笑欲疇依。凌煙勳業無人許。濯錦園林有夢歸。心似遊僧思遠適。身如敗將陷重圍。客來疆欲相寬釋。每說人生七十稀。

五月二十三夜記夢

夜漏欲盡雞初唱。夢到神仙信非妄。泉流直春碧澗底。松根橫走蒼崖上。徐行林際遇飛橋。峭壁驚濤臨萬丈。非惟履嶮足踈蹕。已覺處幽神悄愴。空巖滴乳久化石。寶蓋珠璣紛物象。鬼神慘澹疑欲搏。龍蜃蜿蜒誰敢傍。長眉老仙乘白雲。握手授我綠玉杖。三生汝有世外緣。一念已斷塵中障。雖云曩事不復憶。憐汝瞳子神猶王。何須更待熟金丹。從我歸哉住崑閬。

送葉尙書

曩歲榜扁舟。萬里歸自蜀。五月下瞿唐。六月過浮玉。於時始識公。一笑忘暑毒。羽扇臨清流。華觴跋紅燭。一別十五年。去日如電速。孤生晚還朝。斂退慚陸陸。要津非所冀。見公心自足。斥歸又七載。衰病將就木。造物哀其窮。公來位嶽牧。每見語諄諄。與世異寒燠。聖朝方急賢。登用及釣築。如公實舊德。顧豈待夢卜。初聞一札下。已報四輩趣。懸知新天子。虛懷須啓沃。願公論其大。始爲天下福。即宣垂拱麻。寧復摛文宿。

路傍曲

冷飯雜沙礫。短褐蒙霜露。黃葉滿山郵。行人跨驢去。

又

大道南北出。車輪無停日。彼豈皆奇才。我獨飢至夕。

又

淒涼路傍曲。朱門人不知。秋街槐葉落。正是斷腸時。

贈汪叔潛

火雲嵯峨如疊嶂。百病攻衰非一狀。低簷小屋桑竹村。忽辱君來問亡恙。蹶然攬衣起闔門。裹飯仍煩遠相餉。歲饑野外無供給。羞糲餘糧不盈盎。我守此窮三十年。尙恐死前無力量。君誠不以老棄予。苦語見規宜勿讓。

出遊

莫笑衰殘百不能。一枝筇杖捷飛騰。山空野火焚秦冢。日澹煙蕪遍禹陵。小浦漲潮迎釣艇。疎鐘出谷送行僧。踟躕不覺歸途晚。村落人家已上燈。

卷三十二

立秋後四日雨

天爲新秋故作涼。海風吹雨入虛堂。涼生庭樹陰陰綠。潤襲箒衣泔泔香。杯泛鵝兒供小酌。碓春雲子喜新嘗。一年又見星橋近。未信仙家日月長。

夙興

老眼無眠覺夜長。攬衣不復待窗光。明星漸淡避初日。秋露已濃生曉涼。出草幽花紅紫雜。穿林啼鳥去來忙。是中有趣君知否。喧寂年來已兩忘。

存養堂爲汪叔潛作

絳帳先生見處別。少年立節如冰雪。胸中凜凜萬卷書。一字不爲庸人說。存心養性以事天。人知不知渠晏然。窮經日夜廢寢飯。不怕諸生嘲腹便。三旌五鼎俱忘想。致一工夫在存養。我今老病死即休。未死尙欲從公講。

感昔

三著朝冠入上都。黃封頻醉渴相如。馬慵立仗寧辭斥。蘭偶當門敢怨鋤。富貴尙思還此笏。衰殘故合愛吾廬。燈前目力依然在。且盡山房萬卷書。

又

五丈原頭秋色新。當時許國欲忘身。長安之西過萬里。北斗以南惟一人。往事已如遼海鶴。餘年空羨葛天民。腰間白羽凋零盡。卻照清溪整角巾。

病稍平示兒輩

人與鴉俱曉。天憑雁送秋。極知生意盡。彊爲汝曹留。藥餌傾殘橐。風霜迫故裘。倚屏搔短髮。且復寄悠悠。

野堂

野堂蕭颯雪侵冠。歷盡人間行路難。病馬不收煙草暝。孤桐半落井牀寒。長瓶濁酒猶堪醉。敗篋殘編更細看。此興不隨年共老。未容城角動憂端。

又

姓名無復世人聞。靜處何妨獨策勳。久矣不堪東閣客。歸哉無媿北山文。橫林霜近有丹葉。平野雨餘多斷雲。更喜鸕鷀來漸熟。一溪煙水與中分。

又

野堂地僻無車馬。草徑柴門晝亦扃。栗里雖貧儲舊粟。玉川終老抱遺經。病身凜凜殘秋葉。故友寥寥欲旦星。賴有吾兒堪暖眼。夜闌常共一燈青。

又

鼓缶酣歌樂太平。野堂窗戶極疎明。棄官正爲愚無用。謝客新緣病有名。閑入鄉人賽神社。時從長者放魚行。雖然要有關心處。打稻家家趁晚晴。

七月下旬得疾不能出戶者十有八日病起有賦

秋風吹海氛。氣候頗不令。昏昏七十翁。擾擾半月病。著書殊未成。即死目不瞑。扶持賴藥物。僅得全性命。兩添苔暈青。風入桐枝勁。深巷無人聲。搔頭發孤詠。

夢有餉地黃者味甘如蜜戲作數語記之

有客餉珍草。發奩驚絕奇。正爾取嚼齧。炮製不暇施。異香透崑崙。清水生玉池。至味不可名。何止甘如飴。兒稚喜語翁。雪領生黑絲。老病失所在。便欲棄杖馳。晨雞喚夢覺。齒頰餘甘滋。寄聲山中友。安用求金芝。

秋夜

豈次菱寺西半宵。斷礎疎雨共無膠。老來萬事渾非昔。惟有詩情似灞橋。

又
夜雨淒涼客思迷。聞磴卻是夢回時。人人解說悲秋事。不似詩人徹底知。

病起憊甚有歎

殘年迫衰謝。一病不枝梧。書倩傍人讀。行須稚子扶。真心付天地。畢世釣江湖。無米博佳傳。虛名那可圖。

小舟晚歸

扶病尋溪友。忘憂泛釣槎。渚寒無宿鷺。月白有啼鴉。敗壁青燈暗。幽窗稚子譁。無生未暇說。且復議桑麻。

又

秋晚吾廬好。柴門映斷山。潮生魚箔短。木落雉媒閑。繚襟蒼茫外。漁舟浩蕩間。客來常謝病。老鈍耐嘲訕。

夜坐

老眼清無寐。孤懷默自傷。思人交舊盡。撫事歲時長。籬犬吠殘月。江楓凋早霜。放翁殊耐事。掩卷撥爐香。

幽事

老夫病起日支離。幽事關心只自知。社近鄰翁餽新釀。客歸童子拾殘棋。功名已付來生了。筆墨尤非晚歲宜。餘習可憐除未盡。移花引水伴兒嬉。

病後衰甚非盃與不能出門感歎有賦

酒興詩情尙自如。形骸可怪頓成疎。平生只倚雙鳧舄。此日常須一鹿車。寂寂豈惟慚鄧禹。厭厭更覺類曹蜍。晚窗弄筆聊瀟裊。數首清詩手自書。

秋思

人生四十歎頭顱。久矣心知負壯圖。未死皆爲閑日月。無求儘有醉工夫。風凋木葉流年晚。秋入窗扉病骨蘇。信步出門湖萬頃。羣鷹不用憶尊鱸。

題村店壁

五十年來命壓頭。卽今殘髮不禁愁。亂鴉陣起霜天晚。落葉聲乾古渡秋。小市歡醜聊兀傲。長亭秣蹇得遲留。一

身自處窮如許。幸是無因爲國謀。

病去

病去身差健。秋高氣漸寒。未甘常伏几。時作一憑闌。玉粒炊粳軟。香塵搗藥殘。欣然顧兒輩。燈下語團圓。

白首

白首稱祠吏。清時作幸民。招呼林下客。遊戲夢中身。山路烏驄穩。煙波畫檝新。村村有花柳。無事卽尋春。

書病乙卯七月二十二日臥病兩旬始平九月二日作此詩

暮年雖病不甚劇。啜藥啜粥猶自力。今年七月風眩作。兒子在前不能識。杯中藥冷呼不醒。全家相顧無人色。昏昏但思向壁臥。蟲臂鼠肝寧暇恤。醫巫技殫欲斂手。天高鬼惡吁莫測。偶然得活出望外。扶杖下牀猶屢踣。讀書心在目力短。袖手堅坐到窗黑。無功祿食四十年。歎息此責何由塞。

舍北晚眺

紅樹青林帶暮煙。並橋常有賣魚船。樊川詩句營丘畫。盡在先生拄杖邊。

又

日日津頭繫小舟。老人自懶出門遊。一枝筇杖疎籬外。占斷千巖萬壑秋。

夜閱篋中書偶得李德遠數帖因思昔相從時所言後多可驗感歎有作

早歲傳聞月旦評。殿門邂逅眼偏明。當時一坐推談止。今日叢林見話行。老臥煙村身偶在。夜開蠹紙淚如傾。豈知三十餘年後。河洛胡塵訖未平。予送德遠歸臨川詩有旣食頗明主。胡沙暗舊京之句。頗爲前輩所稱。時紹興辛巳春也。

登東山

漆園傲吏養生主。栗里高人歸去來。俱作放翁新受用。不妨平地脫塵埃。松崖壁立臨樵塢。竹徑蛇蟠上獻臺。送盡夕陽山更好。與君踏月浩歌回。

貧樂

蕭然曲肱地自號直心翁。爵名書云直心是道場。拙宦三災過。勞生一笑空。新蔬經雨綠。晚稻得霜紅。飽食真無事。浩歌明月中。

乙卯重九

九日村醅熟。逢迎不用呼。樽前狂起舞。陌上醉相扶。殘髮新霜白。衰顏落葉枯。明年何足問。且復插茱萸。

縱步近村

病去身輕試杖藜。滿村麴麥正離離。照溪自歎尙微瘦。趁渡人言殊未衰。草塞瓶頭沽濁酒。花簷笠頂引羣兒。裴回不恨歸差晚。正愛青燈映竹籬。

題齋壁

看盡人間利與名。歸來始覺此身輕。禍機不敗漁舟興。樂事渾輸地碓聲。破篋雖無衣可典。寒畦已有芋堪烹。餘年且健貧何害。剩與鄰翁醉太平。

范參政挽詞

屢出專戎閫。遄歸上政途。勳勞光竹帛。風采震羌胡。籤帙新藏富。園林勝事殊。知公仙去日。遺恨一毫無。

又

孤拙知心少。平生僅數公。凋零遂無幾。遲暮與誰同。瓊樹世塵外。神山雲海中。夢魂寧復接。慟哭向西風。

病後往來湖山間戲書

周公居東三食新。夷吾在魯丘厄陳。聖賢憂患尙如此。況我本是羈窮人。今秋危病輒不死。餘業自笑堅頑身。結茅所幸得佳處。石帆天鏡無纖塵。捫蘿峭壁上采藥。腰斧長歌行負薪。尋僧獨泛若耶月。攜友共采湘湖蓴。蠡亡範金陋勾踐。斯頌刻石憎嬴秦。不如一酌禹祠去。惡衣菲食真吾鄰。禹祠在吾廬東南十餘里。

秋夜遣懷

六年歸臥水雲鄉。本自無閑可得忙。羸病豈知身尙健。迂疎真與世相忘。霜清水落年華晚。月黑鼻鳴夜漏長。瑣瑣井蛙何足計。一篇秋水笑蒙莊。

初冬暄甚

吳中十月雪霜慳。風景暄妍葉未殷。杲日還看浴東海。薄雲不解冒南山。蛙鳴閣閣荒池曲。蠅出營營食案間。安得玄冥正時令。紅爐綠酒一開顏。

贈湖上父老十八韻

一鏡三百里。環以碧玉峯。天公賜我厚。極目爲提封。煙收見石帆。雨霽望臥龍。嵯峨寶林塔。迢遞天章鐘。興來思一出。霜晴及初冬。父老捨杖迎。衣冠頗嚴恭。語我相識久。幸未棄老農。間者傳伏枕。喜聞足音聲。貧舍有盤食。勿責異味重。麴麩新油香。黍酒甕面濃。已遣買撲握。亦可致唵鳴。願公領此意。秣蹇聊從容。我起爲太息。厚意敢不從。吾生行逆境。平地九折叩。況今又老退。如子豈易逢。但願從今健。衰疾緩見攻。遇興卽扣門。草具煩炊春。但恐乘月來。妨子睡味濃。

初冬感懷二首

落葉掃還積。斷鴻飛更鳴。羸軀得霜健。老眼向書明。水瘦河聲壯。莢枯馬力生。竟爲農父死。白首負功名。庭蕪失故綠。園樹染新丹。病思閑支枕。詩情獨倚闌。帶移頻覺瘦。貂弊不禁寒。惟有牆陰薺。離離又滿盤。

讀杜詩

城南杜五少不羈。意輕造物呼作兒。一門酣法到孫子。熟視嚴武各挺之。看渠胸次隘宇宙。惜哉千萬不一施。空回英概入筆墨。生民清廟非唐詩。向令天開太宗業。馬周遇合非公誰。後世但作詩人看。使我撫几空嗟咨。

記九月三十日夜半夢

一夢邯鄲亦壯哉。沙堤金轡絡龍媒。兩行畫戟森朱戶。十丈平橋夾綠槐。東閣羣英鳴珮集。北庭大戰捷旗來。太平事業方施設。誰遣晨雞苦喚回。

小舟遊近村捨舟步歸

數家茅屋自成村。地確聲中畫掩門。寒日欲沉蒼霧合。人閒隨處有桃源。

又

借得漁船泝小谿。繫船浦口卻扶藜。莫言村落蕭條甚也。勝京塵沒馬蹄。

又

不識如何喚作愁。東阡南陌且閑遊。兒童共道先生醉。折得黃花插滿頭。

又

斜陽古柳趙家莊。負鼓盲翁正作場。死後是非誰管得。滿村聽說蔡中郎。

蜀僧宗傑來乞詩三日不去作長句送之

看遍東南數十州。寄船卻泝蜀江秋。孤雲兩角山亡念。斗米三錢路不憂。今年所在皆大稔。萬里得詩長揖去。它年挈笠再來不。放翁爛醉尋常事。莫笑黃花插滿頭。

叢農

叢農去不反。釋老似而非。太息衆皆醉。逝將誰與歸。經時忘肉味。盡日掩柴扉。安得同心者。燈前語造微。

冬夜不寐

蒙眼睡眠少。空村霜露淒。鏗鏘聞叩鐵。喔喔數鳴雞。月入知窗破。衾單幸屋低。明晨炊米盡。吾起不容稽。

十月

塞向傾書櫃。開爐積豆萁。林居得溫暖。天遣養衰遲。甕盎藏蔬後。鉏耰下麥時。農家冬最樂。我老頗能知。

讀易

羸軀抱疾時時劇。白髮乘衰日日增。淨掃東窗讀周易。笑人投老欲依僧。

又

老喜杜門常謝客。病惟讀易不迎醫。冬來更愧乖慵甚。醉過收蕎下麥時。

聞雁

霜高木葉空。月落天宇黑。哀哀斷行雁。來自關塞北。江湖稻粱少。念汝安得食。蘆深洲渚冷。歲晚霰雪逼。不知重雲外。何處避畢弋。我窮思遠征。羨汝有羽翼。

悲歌行

士如天馬龍爲友。雲夢胸中吞八九。秦皇殿上奪白璧。項羽帳中撞玉斗。張綱本不問狐狸。董龍何足方雞狗。風埃蹭蹬不自振。寶劍牀頭作雷吼。憶過高皇諸隆準。豈意孤臣空白首。即今埋骨丈五墳。骨會作塵心不朽。胡不爲長星萬丈掃幽州。胡不如昔人圖復九世讎。封侯廟食丈夫事。齷齪生死真吾羞。

村飲

吳中霽霜晚。冬草有未衰。坐令老病叟。遂失凋年悲。翩翩烏紗帽。裊裊殘菊枝。雖無車馬客。時與鄰翁期。新醅壓尙渾。雉兔亦及時。自覺勝淵明。但醉不賦詩。

鏡湖西南有山曰外山民某氏居之其居少西小潭受飛泉羣山環合真異境也爲作短歌

漢東九九重岡。武都九九脈泉。豈如君家環翠阜。小潭珮玦聲鏘然。我欲從君乞菴地。開軒下看泉中天。金丹九轉太多事。服水自可追飛仙。雲孫相遇不相識。笑問塵世今何年。掬泉弄月清獻罷。卻折玉井秋風蓮。

十月十七日予生日也孤村風雨蕭然偶得二絕句予生淮上是日平旦大風雨駭人及予墮地雨乃止少傅奉詔朝京師。穰船生我淮之湄。宣和七年冬十月。猶是中原無事時。

又

我生急雨暗淮天。出沒蛟鼉浪入船。白首功名無尺寸。茅簷還聽雨聲眠。

遊山舟中遇風雨戲作

龍驤萬斛去如鴻。巨浪惟能窘短篷。不是山靈嫌俗駕。一生常值打頭風。

一齒動搖似不可復留有感

晚境常憂豁可惜。苦留終不受丁寧。主貧何恨客辭去。木老元知葉自零。未害朵頤臨肉俎。但妨叩齒讀仙經。從今有酒須勤買。莫學騷人要獨醒。

山行

老翁七十亦何求。尙賴山行散百憂。撥耳帽寬新小疾。獨懷直穩正閑遊。酒旗滴雨村場晚。茶甌炊煙野寺秋。若

論人間長久事。高吟何管傲封侯。

老學菴予取師曠老而學如秉燭夜行之語名菴

窮冬短景苦慙忙。老學菴中日自長。名譽不如心自肯。文辭終與道相妨。吾心本自同天地。俗學何知溺糝糠。已與兒曹相約定。勿爲無益費年光。

枕上偶成

放臣不復望脩門。身寄江頭黃葉村。酒渴喜聞疎雨滴。夢回愁對一燈昏。河潼形勝寧終棄。周漢規模要細論。自恨不如雲際雁。南來猶得過中原。

舍北閑望作六字絕句

潘岳一篇秋興。李成八幅寒林。舍北偶然倚杖。盡見古人用心。

題菴壁

竹間僅有屋三楹。小菴纔兩間。雖號吾廬實客亭。已斷雨聲重點滴。欲殘燈影更晶熒。酒惟排悶難中聖。茶卻名家可作經。頭眩減來還病蹇。何時徹底得康寧。

又

身似蝸牛羸有廬。卻緣無用得安居。地爐封火欺寒雨。紙閣油窗見細書。麪熟山僧分鱠飪。船來溪友餉薪樗。閉門莫笑衰頹甚。讀易論詩亦未疎。

縱筆

老眼輕千乘。枯腸卻八珍。直令身潦倒。未害膽輪囷。酒裏遺浮世。書中見古人。平生笑園綺。老躅帝城塵。

又

壯歲志天下。崎嶇無一施。高談對鄰父。朴學付癡兒。補柵憐雞冷。分糧憫雀飢。吾生忽至此。惆悵鏡中絲。

又

天道何時定。人生固有涯。壯年行出塞。晚歲病還家。積憤憑誰豁。孤忠祇自嗟。今朝茅屋底。隱約聽霜笳。

十月二十八日夜雞初鳴時夢與數女仙遇其一作詩示予頗哀怨如人間語惟末句稍異予戲之曰若無此句不可爲神仙矣其一從傍戒曰汝當勿忘此規作詩者甚有愧色予頗悔之既覺賦兩絕句以解嘲

玉姝眉黛翠連娟。弄翰閑題小碧牋。人世愁多無著處。故應分與蕊宮仙。

又

虹作飛橋蜃吐樓。羣仙來賦海山秋。玉姝定自多才思。更與人間替說愁。

山行

緣崖曲曲半腸路。傍水疎疎麕眼籬。舉起短鞭成一笑。吾詩正是策勳時。

又

眼邊處處皆新句。塵務經心苦自迷。今日偶然親拾得。亂松深處石橋西。

貧甚作短歌排悶

閒何闊。逢諸葛。畏人常憂不得活。事不諧。問文開。不躡權門更可哀。即今白髮如霜草。一飽茫然身已老。惟有躬耕差可爲。賈劍買牛悔不早。年豐米賤身獨飢。今朝得米無薪炊。地上去天八萬里。空自呼天天豈知。

過張王行廟

烈士生不遇。栖栖爲旅人。英魂死不沒。凜凜爲明神。明神受帝命。廟食福我民。牲酒何足言。壓抑姑少伸。火旱千里赤。與人下雷雨。降水不反壑。談笑出乎土。善人錫之福。姦僞亦擊汝。豈若世上人。吞聲氣如縲。

秋月曲

舊時家住長安城。萬戶千門秋月明。紫陌朱樓歌吹海。酣宴不覺銀河傾。受降城頭更奇絕。莽莽平沙千里月。選兵夜出打番營。鐵馬蹴冰冰欲裂。塞月未落成。功回。腰鼓橫笛如春雷。長安高樓豈不樂。與此相去何遠哉。丈夫志在垂不朽。漆胡骷髏持飲酒。舉頭雲表飛金盤。痛飲不用思長安。

即事

蕭騷白髮滿綸巾。猶是人間詩酒身。湖上悲秋新有作。眼邊敗意絕無人。稻梁栖畝雁初下。煙水粘天鷗自馴。堪笑推移成老大。時時几杖接鄉鄰。

悲歌行

感慨常自悲。發爲窮苦辭。偃仄不少伸。夢中亦酸辛。脂車思遠道。太息令人老。中原宋輿圖。今乃傳胡雛。此責在臣子。諸公其可已。談笑復舊京。令人憶西平。

讀李泌事偶書

莘渭當時已誤來。商山芝老更堪哀。人生若要常無事。兩顆梨須手自煨。

晨起

晨起梳頭懶。披衣立草堂。霧昏全隱樹。氣暖不成霜。灘急回魚隊。天低襯雁行。新春猶一月。已覺日微長。

喜雨

一秋未雨冬未雪。坐使肺肝生客熱。不惟裘褐藏篋笥。臥毯坐氈俱未設。樽中有酒不敢嘗。小甕黃齏卻時啜。新春距今一月爾。便恐蝗生殘宿麥。天公老手真可人。夜雨蕭蕭洗旱塵。北風吹雪定不晚。喜入三山湯蕤椀。

閑趣

堅閉門來又過冬。一裘且復擁龍鍾。不辭陋巷如糞冷。自愛新醅似粥醲。迎婦橋邊燈煜煜。賽神林外鼓鞞鞞。豈惟自得閑中趣。要遣兒孫世作農。

自警

人生非金石。壽夭不自知。一日復一日。亦或至耄期。方其未死間。早夜勿自欺。嗟彼陷溺者。太山起毫釐。努力戒惰偷。堯舜可庶幾。我今齒髮弊。彊健復幾時。一寸學古心。自視猶可爲。雞鳴推枕起。爲善亦孳孳。天定終勝人。吾世或未衰。素業果有傳。三復吾此詩。

雨後

鏡湖歸隱老黃冠。布褐蕭然一室寬。燈影青熒人未睡。雨聲點滴夜將闌。四朝出處朋儕盡。半世漂流骨相寒。青

史無名端可恥。著書留與後人看。

又

蕭蕭殘髮雪侵冠。冉冉清愁用底寬。把卷昏眸常欲閉。投牀睡興卻先闌。惟須酒沃相如渴。未分人哀范叔寒。雨霽定知梅已動。佩壺明日試尋看。

窗黑

風兩窗常黑。衰翁罷讀書。縱橫慚七略。廢惰失三餘。寔坐工夫熟。多聞習氣除。韓公未解此。誤謂腹空虛。

雨止行至門外戲作

簷雨收殘滴。溪雲弄晚晴。出門還浩歎。幾屐了吾生。

野飲

綠岸波生染麴塵。碧天雲細盛魚鱗。山居剩得舒長日。野飲自無拘忌人。元結詩云。坐無拘忌人。勿限醉與醒。酒甕石邊孤店晚。樵風溪畔早梅春。懷章正可驚奴輩。未勝行歌獨負薪。

兩夜有懷張季長少卿

放翁雖老未忘情。獨臥山村每自驚。鼎鼎百年如電速。寥寥一笑抵河清。梅初破藟行江路。燈欲成花聽雨聲。正用此時思劇飲。故交零落愴餘生。

雨中熟睡至夕

擁爐聽雨生睡思。澀眼瞢瞢惟欲閉。丈夫少壯要自力。飽食養慵真可媿。我今不睡欲何爲。常恐兒曹落吾事。蠻氈紙帳方施行。五鼎八珍無此味。

又

少陵今雨無客至。寂寞衡門晝常閉。孝先酣枕夢周公。弟子雖嘲可無媿。世上紛紛榮辱多。不如睡中差省事。小兒忽報煎茶熟。起擁寒爐究餘味。

憶昔

憶昔輕裝萬里行。水郵山驛不輪程。屢經漢帝燒餘棧。曾宿唐家雪外城。壯志可憐成昨夢。殘年惟有事春耕。西窗忽聽空階雨。獨對青燈意未平。

燈下看梅

風雨經旬怯倚闌。梅花折得就燈看。有情應寄去年別。無寐不禁清夜寒。病起搭筇幽興在。春遲載酒後期寬。籬東數樹尤奇絕。日遣蠻童候路乾。

程泰之尙書挽詞

又
文古唐元結。經明漢仲舒。三朝八座貴。千載九丘書。早接遊從末。常聞議論餘。死生今永訣。追恨寄聲疎。

昔在紹興末。同趨行殿門。方思尋宿好。忽已奉遺言。誅行曲臺議。飾終明主恩。高皇舊朝士。今復幾人存。

兩夕獨酌書感

數掩蘆藩常不開。飢雅兩兩啄青苔。兩來十日未成雪。歲盡一枝初見梅。池上晚行攜獨鶴。燈前夜酌撥新醅。漁村老景今如許。駿馬舊遊安在哉。

白首

白首元無一事成。朝來大笑絕冠纓。花飛早已知春減。漏盡寧容更夜行。蕭散且爲無算飲。猖狂未免不平鳴。玉關青海今安在。麥野桑村送此生。

客言來自上臯道中以其語作一絕

日曬霜融作淺泥。酒家卻在斷橋西。五陵今代無豪俠。獨臥茅簷聽午雞。

睡起

老怯年華速。閑知晝漏長。已回酣枕夢。未過古匳香。洗面宮眉綠。開茶帶胯方。山家風味在。雖病意差彊。

卷三十四

歲暮

案闌官曆喜更端。鬢畔羅幡巧耐寒。篩辣擣香笏臘酒。染紅絲綠簇春盤。衰容未覺餘年迫。佳日猶思一笑歡。太息兒童癡過我。鄉儻雖陋亦爭看。

殘臘二首

破臘春先到。微陰日易曠。鳥聲猶寂寂。木意已欣欣。雲起山分疊。風生水蹙紋。斷腸何處笛。偏向醉中聞。殘臘無多日。吾生又一年。林塘明夕照。墟落淡春煙。山色危欄角。梅花綠酒邊。歲時元自好。老病獨悽然。

一壺歌

悠悠日月沒根株。常在人閒醉一壺。傾倒欲空還潑灑。不曾教化不曾沽。

又

先生醉後即高歌。千古英雄奈我何。花底一壺天所破。不曾飲盡不曾多。

又

自從軒昊到隋唐。幾見中原作戰場。三十萬年如電掣。不曾記得不曾忘。

又

恥從嶽牧立堯庭。況見商周戰血腥。攜得一壺閑處飲。不曾苦醉不曾醒。

又

長安市上醉春風。亂插繁花滿帽紅。看盡人間興廢事。不曾富貴不曾窮。

屬疾

白頭屬疾臥丘園。藥物枝梧且僅存。月黑淺山聞鷓鴣。窗明高樹送鴉翻。讒欺薄命深消骨。憂集窮途黯斷魂。回視少時真隔世。但餘一念在元元。

新歲

風入鞭梢緊。春從草色深。山坡臥新犢。園木轉幽禽。勳業少年夢。關河遊子心。爾來都掃盡。燭酒帶醅斟。

早春

數聲屋角聽鳴禽，紅糝青梢忽滿林。雨過東臯一犁潤，冰消南澗半篙深。逢僧竹院閑評藥，攜鶴山村醉擁琴。青史功名黃閣貴，有時應不到如今。

太古

太古安知慮與堯，茹毛飲血自消搖。不須追咎爲書契，初結繩時俗已澆。

春夜

老僊生如寄，春寒夢亦孤。燈花時自墜，鼻語迭相呼。萬里書難得，三年病未蘇。窗深不知曉，但覺動林烏。

正月六日作

上天四序分寒燠，以漸相尋不相瀆。今年立春七日耳，暖景溫風何迫促。羣蛙怒鳴蚊蚋出，蚍蜉插翅飛滿屋。兒童便欲覓團扇，我亦汗垢思湯沐。山坡梅花常恨晚，一夕開盡如雪谷。籬邊已放桃蕊紅，庭下頓長萱芽綠。小人識淺喜欲舞，輕衫冷澁相追逐。春深癘鬼不貸人，此暖但憂非汝福。

寄題吳斗南玩芳亭

北斗以南有吳侯，人物知非第二流。讀書不放一字過，閉戶忽驚雙鬢秋。平生離騷讀千遍，屈泥秭歸要親見。歸來落筆愈驚人，宋玉景差俱北面。玩芳亭中蘭芷芳，朝回解帶春晝長。愛君憂國有奇作，坐令壯觀還沅湘。老人曩亦同此趣，甚欲閑題玩芳句。無奈生涯今已別，倒壑枯楠忘歲月。

春初驟暄一夕梅盡開明日大風花落成積戲作

暖逼梅花爛漫開，飄零便恐付蒼苔。更堪連夜風如許，似妒愁人把一杯。

又

殘梅零落不禁吹，真是無花空折枝。堪笑老人風味減，三年不作送梅詩。予往歲多有送梅之作，今鬮筆已累年。

又

年年爛醉萬梅中，吸酒如鯨到手空。花欲過時常惜別，今年此別更怱怱。

讀老子傳

巍巍闕里與天崇。禮樂詩書萬世宗。但說周公曾入夢。寧於老氏歎猶龍。

示元用

德孫學語已驚人。悶裏時時一笑新。老子已應如櫪驥。此郎端恐是天麟。會看神授如椽筆。莫改家傳折角巾。汝叔不疑當愛汝。夜窗燈火勉相親。

春思

七十老翁身退耕。可憐未減舊風情。典衣取酒那論價。秉燭看花每到明。江浦時時逢畫楫。寺樓處處聽新鶯。此生無復陽關夢。不怕樽前唱渭城。

春望

天地回春律。山川掃積陰。波光迎日動。柳色向人深。霑灑憂時淚。飛騰滅虜心。人扶上危榭。未廢一長吟。

丙辰上元前一日

弊裘破帽髮鬢髻。宛似山房罷講僧。身病不禁連夜雨。家貧只挂舊年燈。修椽柳外掀樓角。危檻雲間露塔層。自笑閑遊本無定。興闌隨處倚枯藤。

夜雨思枯蒼遊

道心退情如風鷁。世念堅彊似火牛。安得短篷湖海去。夜深聽雨琵琶洲。

春陰

麴塵柳色正遮門。石黛江流曲抱村。小院春光方盎盎。遠山雨氣又昏昏。傍簷林鳥驚幽夢。極目煙蕪捲燒痕。只道餘寒尙如許。不知生意滿乾坤。

寒夜歌

陸子七十猶窮人。空山度此冰雪晨。既不能挺長劍以抉九天之雲。又不能持斗魁以回萬物之春。食不足以活。妻子化不足以行鄉鄰。忍飢讀書忽白首。行歌拾穗將終身。論事憤叱目若炬。望古踊躍心生塵。三萬里之黃河。

入東海五千仞之太華磨蒼旻坐令此地沒胡虜兩京宮闕悲荆榛誰施赤手驅蛇龍誰恢天網致鳳麟君看煌煌藝祖業志士豈得空酸辛。

正月十六日園中偶賦

又向柴荆過上元。豪華前事不須論。偶逢花發閑持酒。不得人扶嬾出門。薄技號山曾獻玉。榮途染指亦嘗醜。年來洗盡東陵夢。瓜瓞蕭蕭老故園。

陵霄花

庭中青松四無鄰。陵霄百尺依松身。高花風墮赤玉盞。老蔓煙煙蒼龍鱗。古來豪傑人少知。昂霄聳壑寧自期。抱才委地固多矣。今我撫事心傷悲。

懷舊

鶴鳴山下竹連雲。鳳集城邊柳映門。當日不知爲客樂。如今回首卻消魂。

又

駿驟西過雨漫天。千里江山在眼邊。二十四年如昨夢。憑誰問訊帶枷仙。

又

狼煙不舉羽書稀。幙府相從日打圍。最憶定軍山下路。亂飄紅葉滿戎衣。

又

翠崖紅棧鬱參差。小益初程景最奇。誰向豪端收拾得。李將軍畫少陵詩。

又

回龍寺壁看維摩。最得曹吳筆意多。風雨塵埃昏欲盡。何人更著手摩挲。

又

蟠冢山頭是漢源。故祠寂寞掩朱門。擊鮮藉草無窮途。送老那知江上村。

夜坐

蓬窗夜半竹騷然。坐守殘編悄不眠。辛苦空成左傳癖。逍遙常媿大慈仙。風寧可繫功名誤。日不能黏歲月還。明
旦覓船湖上去。西村桃李淡春煙。

入城舟中作

樓邊蘸岸接藍水。蓬外橫空破墨山。更著灘頭一行鷺。此身真在畫圖間。

寫蓬萊館

朱門高柳畫橋南。掠面風埃喜解驂。霽日偶逢春盎盎。野人不慣屋潭潭。堂中剩喜簪裾集。樓上時聞鼓角酣。明
發扁舟覓歸路。趁時吾欲事農蠶。

過能仁光孝寺欲訪听老會府中速客遂不果入

春日城南過寶坊。馳驅不得駐車箱。高門臨道淨如拭。傑屋凌空勢欲翔。齋近鐘魚初送響。風微松檜自生香。暫
來堪笑忙如許。坐爇高人白晝長。

夜二鼓留西城門歸三山

秉炬夜離驛。戴星出西關。舟人飛畫檝。門鎖響銅環。漁火明遙浦。溪風解醉顏。鄰家亦驚起。迎我笑堅頑。

讀杜詩

千載詩亡不復刪。少陵談笑即追還。常憎晚輩言詩史。靖廟生民伯仲間。

蘇韜光節推挽歌詞

才名京兆掾。門閤魏公孫。遇事雖骯髒。接人終靜溫。寧吟灑橋雪。不掃舍人門。二妙凋零盡。衰翁慨獨存。韜光與
訓直吏部下世。相距三年。

村翁

放翁真箇是村翁。釣渭耕莘事不同。蹴躡煙雲兩芒屨。憑陵風雪一蓬籠。屢經駭浪身終免。遍閱浮漚壽未窮。幸
有春衣堪換酒。道邊醉臥示神通。

寄子布

釣灘耕壠雪盈簪。從入新年病至今。遠使有書常灑淚。長宵無夢更傷心。何由老眼迎歸櫂。空爲秋風感暮砧。一紙新詩千萬恨。臨風悵望獨長吟。

落花

朱朱白白不禁吹。老未忘情作許悲。瑞錦已殘猶有夢。明霞初散可無詩。人應偷樣傳圖本。天亦收香付蜜脾。榮悴相尋君看取。曉來青子已團枝。

南窗

身輕婚嫁畢。耳靜市朝疎。褌帶脫烏幘。一窗寬有餘。

排悶

白髮無端日日新。自憐猶作百憂身。孤燈聽雨常終夜。一榼尋花又送春。旋壓麥饊邀父老。時分菜把餉比鄰。不須頻起陳人歎。已是清朝六世民。

過鄰家戲作

老脫朝冠岸幅巾。時時乘興過比鄰。瓶無儲粟吾猶樂。步有新船子豈貧。醅甕香浮花露熟。藥欄土潤玉芝新。玉芝謂鬼曰。山家多有之。相從覓笑真當勉。又過浮生一歲春。

看花

好樹典衣買。新花扶杖看。村醪雜清濁。山果半甘酸。家事貧尤簡。詩情老未闌。鷓鴣閑似我。日暮立清灘。

閑趣

同儕零落曉星稀。久住人間豈自期。衰病已成垂白叟。春寒又到牡丹時。溪邊喚客閑持釣。燈下留僧共覆棋。一日轉頭還過卻。紛紛世事不須知。

春盡遣懷

裊裊爐香晝掩扉。殘年真是解塵鞿。青磁旋擣通鄰好。白葛新裁製暑衣。避日小魚穿藻去。倚風輕燕拂簾飛。要知名宦非初意。三十年前已念歸。予以乾道乙酉卜築湖上。今三十有二年矣。

二友

清芬六出水梔子。堅瘦九節石菖蒲。放翁閉門得二友。千古夷齊今豈無。

半丈紅盛開

滿酌吳中清若空。共賞池邊半丈紅。老子通神誰得似。短筇到處即春風。

感事

雞犬相聞三萬里。遷都豈不有關中。廣陵南幸雄圖盡。淚眼山河夕照紅。

又

堂堂韓岳兩驍將。駕馭可使復中原。廟謀尙出至導下。顧用金陵爲北門。

又

渭上晝昏吹戰塵。橫戈慷慨欲忘身。東歸卻作漁村老。自誤青春不怨人。

又

捫蝨當時頗自奇。功名遠付十年期。酒澆不下胸中恨。吐向青天未必知。

豐年行

南村北村春雨晴。東家西家地碓聲。稻陂正滿綠針密。麥隴無際黃雲平。前年穀與金同價。家家涕泣伐桑柘。豈知還復有今年。酒肉如山賽春社。吏不到門人晝眠。老穉安樂如登仙。縣前歸來傳好語。黃紙續放身丁錢。

四月一日夜漏欲盡起坐達旦

春歸不可留。斗柄已崢嶸。老至不可卻。雪鬢森千莖。少年所讀書。廢忘如隔生。舊交死欲盡。存者萬里程。高談無與廢。欲語輒吞聲。悠悠一飽計。泯泯千載名。逝將山丘歸。不見河雒清。挑燈坐待旦。攬筆衰涕傾。

蓬萊行

山峭插雲海。樓高入煙霄。不知何宮殿。東望鬱岿嶮。是時青童君。初散通明朝。風濤中破裂。涌出黃金橋。授我玉芝房。服之塵念消。凡骨一朝換。八極坐可超。

尊公同故里。季父接周行。晚蕙烏衣巷。重逢玉樹郎。名流多賞識。榮路正騰驤。愁絕河梁上。風煙暮莽蒼。

幽居初夏

湖山勝處放翁家。槐柳陰中野徑斜。水滿有時觀下鷺。草深無處不鳴蛙。籜龍已過頭番筍。木筆猶開第一花。歎息老來交舊盡。睡餘誰共午甌茶。

又

藤冠草屨病支離。門外紛紛百不知。解籜有聲驚倦枕。飛花無力點清池。閑思舊事惟求醉。老感流年只自悲。綠樹陰中紅練起。一團零亂溼臙脂。

又

長歌嫋嫋插秧天。小繖翻翻入市船。高棟巢乾初乳燕。綠槐陰密已鳴蟬。只言末俗人情惡。未廢先生日晏眠。推枕起來閑弄筆。銅蟾手自挹寒泉。

又

鬢毛禿盡齒牙疎。難受人間折簡呼。詩酒本來無藉在。形骸況復不枝梧。槐陰漸密能鄣日。池水新生可浴鰻。移得太行終亦死。平生常笑北山愚。

出蜀十九年故交零落殆盡慨然有作

西遊邂逅得諸君。落筆千言酒百分。聚散亦知元有數。死生豈料不相聞。平芜空憶吟江月。小益何由度棧雲。一事與君聊自慰。兒曹或可付斯文。

憶天彭牡丹之盛有感

常記彭州送牡丹。祥雲徑尺照金盤。豈知身老農桑野。一朵妖紅夢裏看。

五月七日夜夢中作

征行過孤壘。寂寞已千年。馬病霜菅瘦。狐鳴古冢穿。煙塵身欲老。金石志方堅。零落英雄盡。何人共著鞭。

又

霜露薄貂裘。連年塞上留。蘆笳青冢月。鐵馬玉關秋。振臂忘身憊。憑天報國讎。諸公方袞袞。好運幄中籌。

急雨

急雨清風發。土香。靈臺如受寶。犀涼。華胥一枕遽然覺。卻聽蟬聲送夕陽。

夜中步月

夜半不成寐。起尋微月行。風生驚葉墮。露重覺荷傾。兀兀酒中趣。悠悠身後名。興闌還掩戶。坐待日東生。

晨起

齒豁不可補。髮脫無由栽。清晨明鏡中。老色蒼然來。餘年亦自惜。未忍付酒杯。抽架取我書。危坐闔復開。萬世見唐堯。夔龍獲親陪。寥寥三千年。氣象挽可回。豈以七尺軀。顧受世俗衰。道在無不可。廊廟均蒿萊。

枕上聞布穀聲

老去惟思日月遲。更堪青鬢總成絲。無端催取流年去。最恨溪頭布穀兒。

兩夜

北風吹雨亂疎鐘。款款燈花破碎紅。孤夢正行天一握。高城俄報鼓三通。衰遲空抱屠龍技。豪俊誰收汗馬功。但願輿圖早來復。白頭敢望起雲中。孤雲兩角。去天一握。蓋褒斜道上也。

焚黃

啼呼梨棗憶兒時。駒隙頻經日月馳。早歲已興風木歎。餘生永廢蓼莪詩。燎黃恩重空垂泣。戴白身存敢自期。足蹇僅能成拜起。籃輿歸路不勝悲。

即事

陶令常耽酒。龐翁不出家。安貧炊麥飯。省事嚼茶芽。池滿浮雞鴨。庭荒噪渴蛙。詩成賞音絕。自向小兒誇。

失鷓鴣

不見池邊整羽衣。繞村散覓走羣兒。卑飛正恐爲人得。徑去何須報我知。久憶蘋洲應自喜。尙餘菰米亦堪悲。放

翁未到忘情處。日暮憑欄獨詠詩。

贈童道人蓋與予同甲子

吾儕之生乙巳年。達者寥寥窮此肩。退士一生藜藿食。散人萬里江湖天。忍貧不變我自許。挾術自營君豈然。一事尙須煩布策。幾時能具釣魚船。方謀買一小舟。未到也。

上方鉅老求宿蘆詩宿蘆蓋所寓室名以其似漁舟也

一曲亭前水接天。放翁短棹弄風煙。宿蘆縱有江湖趣。猶是人間質釣船。

夜坐園中至夜分

岸巾閑倚胡牀坐。步履還扶拄杖行。漸近秋清知病減。盡捐世累覺心平。翻翻雙鶻風枝爽。熠熠孤螢露草明。更欲裴回盡幽興。鐘譙傳漏報三更。

而巳
六月二十四日夜分夢范至能李知幾尤延之同集江亭諸公請予賦詩記江湖之樂詩成而覺忘數字

露簷霜筠織短篷。飄然來往淡煙中。偶經菱市尋谿友。卻揀蘋汀下釣筒。白菡萏香初過雨。紅蜻蜓弱不禁風。吳中近事君知否。團扇家家畫放翁。

晨起

月澹知將曉。風清喜近秋。狂吟詞跌宕。新沐髮颼颼。桐葉危先墮。蟬聲斷更遒。達生隨處樂。自笑替人愁。

村飲示鄰曲

七年收朝迹。名不到權門。耿耿一寸心。思與窮友論。憶昔西戍日。孱虜氣可吞。偶失萬戶侯。遂老三家村。朱顏捨我去。白髮日夜繁。夕陽坐溪邊。看兒牧雞豚。雕胡幸可炊。亦有社酒渾。耳熱我欲歌。四座且勿喧。即今黃河上。事殊曹與袁。扶義孰可遣。一戰洗乾坤。西酌吳玠墓。南招宗澤魂。焚庭涉其血。豈獨清中原。吾儕雖益老。忠義傳子孫。征遼詔儻下。從我屬囊鞬。

醉歸

十畝春燕手自犁。瓜牛廬在鏡湖西。禪心每笑彈棋局。道眼長捐刮膜篋。絕食就官分鶴料。無車免客笑雞栖。頃
獨有一竹輿。今亦壞矣。旗亭酒賤秋風近。夜夜歸來醉似泥。

二愛并序

陶淵明詩云。孟夏草木長。遶屋樹扶疎。衆鳥欣有託。吾亦愛吾廬。孟東野亦云。遠岸雪難暮。勁枝風易
號。霜禽各嘯侶。吾亦愛吾曹。予暇日詠二詩有感。作二愛詩。

結屋不袤丈。著身還有餘。破壁作小窗。亦足陳吾書。無酒當飲水。無肉當飯蔬。知止乃不殆。此語良非虛。古人造
道處。正自無絕殊。願君勿它求。且復愛吾廬。

門外秋水深。日日集鷗鷺。是豈相與期。正以同類故。殘年過七十。朋舊半丘墓。非吾濟世心。歎息莫予助。人生非
金石。去日如脫兔。三復東野詩。獨立悲歲暮。

蜻蜓浦

舍北蜻蜓浦。新秋偶一來。菱絲煙際老。芡背露中開。漁火明還滅。沙禽去卻回。吾行興無盡。舟子莫相催。

題韓運鹽竹隱堂絕句三首茂卿字立道

鄴下王孫今勝流。相逢三伏凜生秋。未嘗一日可無竹。似是前身王子猷。

又

塵埃車馬日駸駸。誰解從君一散襟。待我清秋有閑日。抱琴來寫萬龍吟。

又

靜處知君解策勳。爐香裊裊起微雲。岸巾不住尋青士。敲枕還應對墨君。

哭杜府君

叔高初過我。風度何玉立。超然衆客中。可慕不待揖。入都多賓友。伯高數來集。質如琮璧潤。氣等芝蘭襲。晚乃過
仲高。午日曬行笠。忽忽遽別去。悵望空快悒。有如此三高。青紫何足拾。豈無知之者。相視莫維繫。窮魚雖相憫。可
媿吐微鱗。亦知尊公賢。何止蓋鄉邑。向風每拳拳。識面真汲汲。秋風忽聞訃。執書歎以泣。造門不自決。追悔今何

及又聞著書富。手澤溢巾笈。哀毀要無益。遺稿勤綴緝。

初秋夜坐

徂歲又如許。吾生真若浮。露蟬鳴遠曉。風葉墮先秋。野迴星辰大。天空河漢流。胡牀幸亡恙。且復寄悠悠。

冥坐自午至暮

身外寥寥掃怨恩。胸中浩浩納乾坤。飽經世事常高枕。慣見人情不署門。孤日夜分生海底。百川秋漲泝河源。珥貂碧落從來事。東訪蓬萊不足言。

舟中詠落景餘暉輕橈弄溪渚之句蓋孟浩然耶溪泛舟詩也因其句爲韻賦詩

獨鶴還故鄉。歸然但城郭。出門無與遊。所至苦寂寞。裹飯事幽討。此計殊不惡。薄暮宿漁家。蒼煙帶墟落。

又

維舟入谷口。信步造異境。隔籬雞犬聲。滿地梧桐影。瓦甑炊香稻。石泉汲新井。人間苦徧仄。愛此須臾景。

又

老圃髮如霜。見客能廢鋤。與坐使之年。自云八十餘。老身六朝民。草舍數世居。力守遠祖言。一字不學書。

又

沿溪得茅店。酒旗出柴荆。杖頭錢已空。一醉何由成。主人語鄭重。手把甕面清。勸我姑小留。溪魚亦可烹。

又

秦皇酒甕邊。古有釣魚磯。我來必竟日。時挈雙鯉歸。白鷺真可人。常先孤棹飛。高詠江練句。令人憶玄暉。

又

鏡湖三百里。風止鏡面平。持以照吾心。俗塵安得生。散髮鷗鷺間。萬事秋毫輕。誰能拂東絹。寫我孤舟橫。

又

朝發雲根寺。暮宿煙際橋。冷螢溼不飛。潛魚驚自跳。菱船歌裊裊。荻浦風蕭蕭。平明宿鳥起。我亦理歸橈。

又

古祠照滄波。老木闌雲洞。輕舟不搖楫。正用一風送。汲井漱甘液。掃榻寓幽夢。所恨山未深。城笳聽三弄。

又

禹穴探斷簡。樵風泛清溪。倒影森松桂。避船散鳧鷺。塵中有異境。十里青玻璃。高塔忽招人。湖邊日未低。

又

溪行已清秋。還舍尙殘暑。天公爲解圍。簾櫳過疎雨。青蔬喜小摘。紅粒亦新杵。一飽坐北軒。蘋花泣煙渚。

卷三十五

浮生

浮生真是寄郵亭。短鬢怱怱失故青。睡少始知愁有力。病增方歎藥無靈。謀生嬾似逢秋燕。訪舊疎於欲旦星。自笑若爲銷此恨。濁醪聊復倒餘瓶。

秋夜

高屐枯筇一老翁。燈前自笑髮如蓬。泠泠月浸荒庭竹。淅淅風凋古井桐。病思未蘇秋尙淺。醉魂初醒夜方中。故人萬里無消息。便擬江頭問斷鴻。

秋夜紀懷

缺月淡欲盡。老雞鳴苦遲。聊爲待旦坐。不作感秋悲。魯叟一王法。幽人七月詩。平生經世志。老死欲誰期。

又

瞿曇起西域。老氏奮中州。談理一家說。蠹民千載憂。橫流當有自。獨立豈相仇。垂世詩書在。兒童勿外求。

又

北斗垂莽蒼。明河浮太清。風林一葉下。露草百蟲鳴。病入新涼減。詩從半睡成。還思散關路。炬火驛前迎。

書懷

蕭颯先秋鬢。龍鍾未死身。不惟今日老。已是一生貧。食菜從兒瘦。關門任客嗔。世間餘一念。河雒尙胡塵。

林居秋日

桔槔引水遶荒畦。病臥蝸廬不厭低。小聚數家秋鷄裏。平波千頃夕陽西。亭臯草木猶葱蒨。天上風雲已慘悽。道負如山炊米盡。終年枉是把鉏犁。

七月二十四日作

閑拂青銅一惘然。此生應老海雲邊。涼颼入袂詩初就。幽鳥呼人夢不全。天上鵲歸星渚冷。月中桂長露華鮮。射胡羽箭凋零盡。坐負心期四十年。

枕上作時聞臨海四明皆大水

撫枕時時猶歎秋。阨窮已極畏凶饒。雨聲淅瀝孤齋冷。客夢蕭條萬里歸。山邑風雷移蜃穴。海城水潦半民扉。如雲秋稼方相賀。一飽還憂與願違。

書懷

漫道年來未極衰。窮途憔悴實難支。半分臂減休文瘦。七尺軀存曼倩飢。尙憶青衫陪衆雋。寧期白首負明時。悠然萬里煙波興。除卻沙鷗總不知。

秋陰至近村

村店閑尋酒。筇枝瘦倚肩。雲齊龍卷雨。野曠鶴盤天。露井飄桐後。清觴泛菊前。欲歸還小立。搔首意悠然。

閑居自述

自許山翁嬾是真。紛紛外物豈關身。花如解笑還多事。石不能言最可人。淨掃明窗憑素几。閑穿密竹岸烏巾。殘年自有青天管。便是無錐也未貧。

秋雨初霽試筆

墨入紅絲點漆濃。閑將倦筆寫秋容。雨聲已斷時聞滴。雲氣將歸別起峯。斜日半穿臨水竹。好風遙送隔城鐘。遠遊更動輕舟興。太息何人解見從。

幽懷

苦茅架竹亦吾廬。病起幽懷得小據。愛酒已捐身外事。閉門猶讀死前書。鄰家人喜添新犢。小市奴歸得早蔬。但使身安歲中熟。敢辭老境落樵漁。

雨後出門散步

細水穿沙溜。殘雲扶雨歸。不成遊酒市。且作倚漁扉。老大徂年速。羈窮壯志違。破裘雖百結。猶勝泣牛衣。

又

病葉常先實。寒潮只暗生。扶衰賴藥石。隨意出柴荆。細路牛欄濕。疎籬續火明。枯榮不須計。千古一棊枰。

秋夜示兒輩

吳下當時薄阿蒙。豈知垂老歎途窮。秋砧巷陌昏昏月。夜燭簾櫳裊裊風。縮項鱸魚收晚釣。長腰粳米出新礪。兒曹幸可團樂語。憂患如山一笑空。

七十二歲吟

七十人言自古稀。我今過二未全衰。讀書似走名場日。許國如騎戰馬時。秋晚雁來空自感。夜闌酒盡不勝悲。渭涓星實逾千載。一表何人繼出師。

雨夜讀書

風雨瀕洞吞孤村。讀書擁褐不出門。歷觀忠邪見肝肺。直與治亂窮根原。傅巖之野感帝夢。此事難以今人論。危冠長劍一見用。萬里耕桑吾道尊。

又

一燈如螢雨瀟瀟。老夫讀書蓬戶間。但與古人對生面。那恨鏡裏凋朱顏。功名本來我輩事。人自蹭蹬天何慳。君看病驥瘦露骨。不思仗下思天山。

秋晚

聚落蕭條古埭東。蘆藩蓬戶臥衰翁。井桐葉盡新霜後。衣杵聲繁夕照中。身似敗棋難復振。心如病木已中空。村醪酸澀君無笑。也解燈前作臉紅。

新菊

已過重陽十日期。菊叢初破兩三枝。自憐短鬢蕭蕭白。不似黃花驛裏時。黃花驛在岐鳳間。予嘗過之。

又

老去流年不耐催。微霜又見菊花開。莫言冷落西風晚。也有飛飛小蝶來。

九月二十八日五鼓起坐抽架上書得九域志恂然有感

一事無成老已成。不堪歲月又崢嶸。愁生新雁寒初下。睡起殘燈曉尚明。天地何由容醜虜。功名正恐屬書生。行年七十初心在。偶展輿圖淚自傾。

題橋南堂圖

平生不識橋南路。聞道清流帶煙樹。今朝開卷一欣然。恍若身親到其處。徐郎獨立巖如山。招不能來麾不去。舊居萬瓦碧浮煙。結茅卻就橋南住。雪盡春生水似藍。想君清獻釣魚菴。道上紅塵高十丈。斷無一點到橋南。

題吳參議達觀堂堂榜蓋朱希真所作也僕少亦辱知於朱公故尤感慨云

中原遺老雒川公。鬢鬢白盡雙頰紅。揮毫爲君作齋榜。想見眼中餘子空。餘子碌碌何足數。獨付莊周賈主語。看君踐履四十年。始知此公不輕許。公今度世爲飛仙。開卷使我神凜然。清時臺省要才傑。諸公誰致雒川容。

舍北搖落景物殊佳偶作

今年冬候晚。仲月始微霜。野日明楓葉。江風斷雁行。窮塗多藉躡。老境易悲傷。自笑詩情嬾。蕭然舊錦囊。

又

路擁新霜葉。溪餘舊漲沙。栖烏初滿樹。歸鴨各知家。世事元堪笑。吾生固有涯。南村聞酒熟。試遣小僮賒。

又

小聚鷗沙北。橫林蟹舍東。船頭眠醉叟。牛背立村童。日落雲全碧。霜餘葉半紅。窮鱗與倦翼。終勝在池籠。

又

屋角成金字。溪流作縠紋。斜通小橋路。半掩夕陽門。孤艇衝煙過。疎鐘隔塢聞。杜門非獨病。實自厭紛紛。

又
草徑人稀到。柴扉手自開。林疎鴉小泊。溪淺鷺頻來。簷角除瓜蔓。牆隅斲芋魁。東鄰腩肉至。一笑舉新醅。

自嘲

身見紹興初。改元百罹敢料至今存。生涯破碎餘龍具。學問荒唐守兔園。獨立未除還笏氣。餘生猶待闔棺論。北窗燈暗霜風惡。且置孤愁近酒樽。

作夢

作夢今逾七十年。平生懷抱尚依然。結茅杜曲桑麻地。覓句灞橋風雪天。驃騎向來求作佛。淮南末路望登仙。世間妄想何窮盡。輸與山翁一醉眠。

夜坐

杳杳霜鐘十里聲。娟娟江月半窗明。陳編欲絕猶堪讀。微火相依更有情。九曲煙雲新散吏。時方被命再領武夷祠。百年鉛槧老諸生。頽然待旦君無笑。尚勝聞雞賦早行。溫岐詩云。雞聲茅店月。人迹板橋霜。蓋人早行絕唱也。

北園雜詠

西村林外起炊煙。南浦橋邊繫釣船。樂歲家家俱自得。桃源未必是神仙。

又

舍北橋東幽事多。老夫飯飽得婆娑。簷茅日落聞春相。荻浦煙深有樵歌。

又

小橋密接西岡路。支徑深通北嶼村。老子意行無遠近。月中時打野人門。

又

東吳霜薄富園蔬。紫芥青菘小雨餘。未說春盤供采擷。老夫湯餅亦時須。

又

鉏麥家家趁晚晴。築陂處處待春耕。小槽酒熟豚蹄笑。剩與兒童樂太平。

又

閑伴鄰翁去荷鉏。林疎歷歷見村墟。怪生白鷺飛無數。水落灘生易取魚。

又

短筇行樂出柴荆。雪意闌珊卻變晴。林際已看春雉起。屋頭還聽歲猪鳴。

又

歲殘已似早春天。隔水橫林一抹煙。聞道埭西梅半吐。攜兒閑上釣魚船。

又

白髮蕭蕭病滿身。凍雲野渡正愁人。揚鞭大散關頭日。曾看中原萬里春。

又

暮年身似一虛舟。付與滄波自在流。垂地雪雲吹不散。且傾桑落脍槎頭。

龜堂獨坐遺悶

髮已凋疎齒已搖。高談誰與慰無聊。苦心雖嘔何由出。病骨非讒亦自銷。玉雪細塵烹瑞草。煙脂小把斲靈苗。防風苗色紅如臘脂。可作菹。賀公吳語吾能似。太息遺魂不可招。

又

放逐還山入見春。枯顛槁項雪霜新。大牀不解除豪氣。凡眼安能識貴人。食有淖糜猶足飽。衣存短褐未全貧。北窗坐臥君無笑。拈起烏藤捷有神。

復竊祠祿示兒子

得飽不啻足。閉門還讀書。翁猶羹不糝。兒固食無魚。袞繡曷加我。箠瓢常晏如。人生隨所遇。勿替此心初。

隴頭水

隴頭十月天雨霜。壯士夜挽綠沉槍。臥聞隴水思故鄉。三更起坐淚數行。我語壯士勉自彊。男兒墮地志四方。裹

尸馬革固其常。豈若婦女不下堂。生逢和親最可傷。歲輦金絮輸胡羌。夜視太白收光芒。報國欲死無戰場。

雪歌

黑雲黯黯如飀鷗。急霰颯颯疑投沙。初聞萬竅號地籟。已見六出飛天花。寧論異事吠羣犬。且喜和氣連千家。穿簾投隙矜嫵媚。平坑塞谷迷綰紉。遙遙林塔出玉筍。渺渺江路蟠脩蛇。扣門方擬貰鄰酒。篝火更欲尋僧茶。懸知朝士集闕角。靴聲入賀趨正衙。吾衰久矣尙何說。所幸一稔均幽遐。

春近

短褐枯筇老病身。龍鍾也復喜新春。已知不解多年住。且作都無一事人。簷角鳥聲呼醉夢。室中花氣襲衣巾。朝來更有欣然處。一筴山蔬勝八珍。

望永阜陵

聖主乘乾臨斧屐。小臣承詔上丹墀。寧知齒豁頭童後。更遇天崩地陷時。泣至眼枯無血續。夢隨魂斷獨心知。白頭才盡空濡筆。寧繼生民下武詩。

初拜再領祠宮之命有感

黃紙初開喜可知。追懷平昔卻成悲。生當京國承平日。仕及皇家再造時。小草出山初已誤。斷雲含雨欲何施。兒孫賀罷仍無事。卻赴幽人把釣期。

醉中信筆作四絕句既成懼觀者不知野人本心也復作一絕

麥野桑村有酒徒。過門相覓醉相扶。朱門日日教歌舞。也有儂家此樂無。

又

過得一日過一日。人間萬事不須謀。鄰家幸可賒芳醞。紅蕊何曾笑白頭。

又

今朝賣穀得青錢。自出街頭買麩肩。草火燎來香滿屋。未容下筯已流涎。

又

老覺人間足畏塗。怕人彈似怕於菟。清明頗動青鞵興。先探門前有客無。

又

治道巍巍本易成。狂言安得略施行。太平事業人皆見。不計封倫死與生。

臘月十九日午睡覺復酣臥至晚戲作

枕痕著面眼芒牟。欲起元無抵死忙。擁被卻尋初斷夢。掩屏重撥欲殘香。雪雲雖散寒猶緊。春意將回晝已長。老去此身無著處。華胥真恐是吾鄉。

睡起至園中

春風忽已遍天涯。老子猶能領物華。淺碧細傾家釀酒。小紅初試手栽花。野人易與輸肝肺。俗語誰能挂齒牙。更欲世間同省事。勾回蟻戰放蜂衙。

北園籬外散步

北園西出路逶迤。荆作門扉枳縛籬。鋤麥正忙人滿野。營巢未定鵲爭枝。招呼父老嘗新釀。約束兒童築壞陂。選興閑行便終日。隔溪續火已參差。

歲暮獨酌感懷

明時頻忝武夷仙。俯仰人間只自憐。總角回思如昨日。挂冠過限已三年。病多晴日思行藥。睡少清宵學坐禪。更歎衰孱不禁酒。地黃一盞即頽然。

盆池

兩送疎疎響。風吹細細紋。猶稀綠萍點。已映小魚羣。傍有一拳石。又生膚寸雲。我來閑照影。一笑整綸巾。

對食

蓬蘽生庭葉擁堦。經旬飯豆爨枯蕪。煙霄舊謂行夷路。薪水今悲繫病懷。夢裏百年元易過。人間萬事苦難諧。癡兒自墮闍黎計。歡喜聞鐘已過齋。

踏踏

少慕功名頗自奇。一生蹭蹬鬢成絲。市樓酒美貧何預。斗柄春回老不知。黑幟遊魂應有數。白衣效命永無期。魚梁東畔牛欄北。舉世誰能識此悲。

海棠圖

人間奇草木。天必付名流。菊待陶元亮。竹須王子猷。我爲西蜀客。辱與海棠遊。再見應無日。開圖特地愁。

丁巳正月二日雞初鳴夢至一山寺名鳳山其尤勝處曰珠軒予爲賦詩既覺不遺一字

已窮阿閣勝。更作味軒遊。不盡山河大。無根日月浮。吾身元是幻。何物彊名愁。久覓卓菴處。是間應可留。

初春

誰把鵝黃染柳絲。似催鄰曲躡青期。已忘萬里封侯志。但憶千回上樹時。朝雨池塘光滌滌。暮煙樓觀碧參差。紫姑一作行藏欲問還休去。身世從來心自知。

雨中作

三日雨頻作。昏昏饒睡眠。泥深散酒市。風惡惱登天。茅屋松明照。茶鐺雪水煎。山家自成趣。撫枕寄悠然。

又

浙浙連江雨。愔愔一室幽。茶甘留齒頰。香潤上衣裘。泥滓將雛鴨。林樊喚婦鳩。短章雖漫興。聊足散吾愁。

又

短鬢白如絲。梅花似舊時。掩屏愁入夢。隱几雨催詩。病爲陰天劇。春緣閨歲遲。非關畏車馬。衰甚實難支。

縱筆

氣本充天地。書非汗馬牛。人人見堯舜。世世有巢由。朝市紅塵鬧。山村白髮稠。所欣吾道在。江漢古東流。

題慧老芋巖

煨芋當時話已新。如今拈出更精神。十年相國非吾願。半顆君當別付人。

立春日

江花江水每年同。春日春盤放手空。天地無私生萬物。山林有處著衰翁。牛趨死地身無罪。梅發京華信不通。數

片飛飛猶臘雪。村鄰相喚賀年豐。去冬無雪。今年以正月十日巳時立春。而平日有雪數片。猶臘雪也。

病中作

老軀百病集。頽然仰天呼。汝病勿怨天。藥石幸可扶。寓形天地間。疾病誰能無。不從酒色來。病自無根株。但使元氣在。雖劇行當蘇。哀哉忿慾子。永棄元化爐。

又

牧羊知治民。解牛得養生。一理儻造微。何事不可明。我老抱病久。頗窺古人情。唐堯授四時。帝道所以成。周家七百年。王業本農耕。造端無甚奇。至今稱太平。人生正如此。默默要無營。心君但高拱。萬物安能撓。

立春日

花壓烏巾酒滿卮。舊逢春日恨春遲。如今病臥孤村裏。過了新春也不知。

又

慶元丁巳春來晚。人日初過近上元。空對一樽三太息。無人爲戴縷金旂。

北望

中原墮胡塵。北望但莽莽。耆年死已盡。童稚日夜長。半裘左其袵。寧復記曠曩。豈無豪俊士。憤氣塞穹壤。我欲友斯人。悲詫寄遐想。夢行黃河濱。雲開見仙掌。

上元夜作

百年古謂風前燭。我逾七十飯不足。只知生世無工拙。久向人間耐榮辱。今年上元燈滿城。十里東風度絲竹。蓬窗溼薪不禦寒。獨取殘書伴兒讀。忽然得意見古人。半椀凍齋甘勝肉。書生蓋棺事未定。論著儻存終見錄。富貴無名豈勝數。意氣空能驕世俗。君不見拄天拄地邢君牙。不如詩人窮瞎張太祝。

長歌行

不羨騎鶴上青天。不羨峨冠明主前。但願少賒死。得見平胡年。一朝胡運衰。送死桑乾川。胡星澹無光。龍庭爲飛煙。西琛過葱嶺。東戍踰朝鮮。巍巍天王都。九鼎奠澗瀍。萬國朝未央。玉帛來聯翩。黃頭汝小醜。汗我王會篇。盡誅

非無名。不足煩戈鋌。還汝以舊職。牧羊遼海邊。

讀書

兩眼欲讀天下書。力雖不迨志有餘。千載欲追聖人徒。慷慨自信寧免愚。置書不讀談虛無。誰其始爲此創疽。古時澤被禽與魚。博施所以爲唐虞。正使老釋信不認。爲我未免近楊朱。高軒大旆塞路衢。臺閣尊顯來于予。安得禹臯日陳謨。沾濡四表無焦枯。坐令專業見真儒。老農不恨老耕鋤。

枕上作

龍鍾七十豈前期。矮帽枯筇與老宜。愁得酒卮如敵國。病須書卷作良醫。登山筋力雖猶健。閉戶工夫頗自奇。今日快晴春睡足。臥聽簷鳥語多時。

書志

往年出都門。誓墓志已決。況今蒲柳姿。俛仰及大耋。妻孥厭寒餓。鄰里笑迂拙。悲歌行拾穗。幽憤臥齧雪。千歲埋松根。陰風蕩空穴。肝心獨不化。凝結變金鐵。鑄爲上方劍。釁以佞臣血。匣藏武庫中。出參髦頭列。三尺粲星辰。萬里靜妖孽。君看此神奇。醜虜何足滅。

夜賦

簷滴新春雨。窗昏半夜燈。病無詩一字。窮賴酒三升。郡中月設折酒九斗。日恰得三升。世路澀如棘。祠宮冷欲冰。殘年只此是。年少解飛騰。

晚步

晚步清溪上。微陰忽快晴。鴉棲先小泊。魚暖已羣行。藥餌扶垂老。耕桑樂太平。非關戀鄉社。久客倦還征。

漁歌

斜陽收盡暮煙青。嫋嫋漁歌起遠汀。商略野人何所恨。數聲哀絕不堪聽。

殘夢

少時鐵馬蹴河冰。老去摧藏百不能。風雨滿山窗未曉。只將殘夢伴殘燈。

書憤

白髮蕭蕭臥澤中。祇憑天地鑿孤忠。阨窮蘇武餐麩久。憂憤張巡嚼齒空。細雨春燕上林苑。頽垣夜月洛陽宮。壯心未與年俱老。死去猶能作鬼雄。

又

鏡裏流年兩鬢殘。寸心自許尙如丹。衰遲罷試戎衣窄。悲憤猶爭寶劍寒。遠戍十年臨的博。壯圖萬里戰臯蘭。關河自古無窮事。誰料如今袖手看。

小舟遊西涇度西岡而歸

小雨重三後。餘寒百五前。聊乘瓜蔓水。閑泛木蘭船。雪暗梨千樹。煙迷柳一川。西岡夕陽路。不到又經年。

春行

九日春陰一日晴。輪扶衰病此閑行。猩紅帶露海棠溼。鴨綠平堤湖水明。杜子美曉看紅溼處。花重錦官城。李太白蜀江紅且明。用徑字明字。可謂奪造化之功。世未有拈出者。酒賤柳陰逢醉臥。土肥稻壟看深耕。山翁莫道渾無用。解與明時說太平。

姜總管自築墓舍名蘭菴求詩

君不見贅翁退隱真皇時。齋室遺名星日垂。雖無豪士千車送。不媿高人一錫隨。又不見貞觀故人有王顯。抵老摧頽不作齷。一時戲語今尙傳。人生窮達誰能免。蘭菴知君出游戲。壽過期頤乃常事。青松手種三千本。會看半空飄鼓吹。人老則衰君不然。快瀉玉船鯨吸川。釣璜遠祖應相似。八十方爲筮仕年。

湖上今歲遊人頗盛戲作

龍船看罷日平西。柳闇花穠步步迷。射的山前朱舫小。樵風涇上紫鸞嘶。

又

畫船鼓吹載涼州。不到三更枉出遊。忽有歌聲出霄漢。誰家開宴五雲樓。

又

翠阜青林煙疊重。朱樓畫閣雨空濛。禹祠西走蘭亭路。一片湖山錦繡中。

又

臺府官醅歲歲新。蘭亭春勝鏡湖春。三山小瓮雖堪笑。也向湖邊作醉人。

賞花至湖上

吾國名花天下稀。園林盡日敞朱扉。蝶穿密葉常相失。蜂戀繁香不記歸。欲過每愁風蕩漾。半開却要雨霏微。良辰樂事真當勉。莫遣匆匆一片飛。

暮春

季子黃金盡。安仁白髮新。無情五更雨。便送一年春。難續西樓夢。空存北陌身。海棠應似舊。惆悵又成塵。

又

綠葉枝頭密。青蕪陌上深。江山妨極目。天地入孤吟。身已雙蓬鬢。家惟一素琴。世情君莫說。頭痛欲涔涔。

暮春

數間茅屋鏡湖濱。萬卷藏書不救貧。燕去燕來還過日。花開花落即經春。開編喜見平生友。照水驚非曩歲人。自笑滅胡心尚在。憑高慷慨欲忘身。

卷三十一

九里

破曉憑鞍野興濃。鷺飛先我過村東。綠鍼細細稻浮水。絳雪紛紛花舞風。陌上鞦韆喧笑語。擔頭榘杖簇青紅。誰知老子裴回意。絕愛山橫淡靄中。

清明

氣候江吳異。清明乃爾寒。老增丘墓感。貧苦道途難。燕子家家入。梨花樹樹殘。一春回首盡。懷抱若爲寬。

一百五日行

一百五日東郊時。陂塘水滿雨如絲。人家青煙不禁火。但俗豈復思子推。舊墳年多木已拱。新墳積土高纍纍。老鴉飛鳴啣肉去。紙錢兩溼挂樹枝。深松茂柏死自樂。地下應笑生人悲。眼中青山身後塚。此事決定君何疑。風吹雲破日下照。小灘碎礫光陸離。停車暫憩道傍舍。解囊且補殘春詩。

送李憲被召舊與其先侍郎遊從

早謁龍門鬢未秋。暮年乃復接英遊。海瀕已幸見公子。瓜壘仍煩訪故侯。霖雨卽陪諸老進。德星肯爲一方留。西城柳色青如許。欲挽長條特地愁。

初夏

已過浣花天。行開解粽筵。店沽浮蠟酒。步屨載秧船。古俗交情久。豐年樂事偏。出波蓴菜滑。上市鯊魚鮮。僧閣梅山麓。漁扉禹廟壩。丹青不可畫。得句一欣然。

幽居

社結山林友。家藏種樹書。蔽牀欣卜宅。容駟笑高閭。薄飯頻薤韭。單衣旋製練。東家借蹇罷。南市買船初。美景遊俱遍。鄰翁好不疎。時時得乘興。豈獨愛吾廬。

閑適

朝讀易一卦。時鈔史數行。花開聊把酒。睡起獨焚香。寂寂市聲遠。悠悠村日長。吾衰尙何恨。兒女解耕桑。

病中夜賦

客如病鶴臥還起。燈似孤螢闔復開。首著花催春事去。梧桐葉送雨聲來。滎河溫洛幾時復。志士仁人空自哀。但使胡塵一朝靜。此身不恨死蒿萊。

閑身

炊煙漠漠閉柴荆。聊用閑身答太平。重碧飛觴心未老。硬黃臨帖眼猶明。吳蠶滿箔含桃熟。瓏麥登車搏黍鳴。補剡息隸今有地。問君何處用虛名。

書感

奪壁元知價不贖。屠龍誰信本無求。哦詩聲裏歲時速。憂國淚邊天地秋。已欠謝安俱泛海。況無王粲與登樓。此身著處憑君記。萬里煙波沒白鷗。

衰病

衰病集餘日。推移成老翁。衡門隱者趣。大布古人風。几杖呻吟裏。山川莽蒼中。從來世緣薄。不是坐詩窮。

雜題

少談王霸謀身拙。晚好詩騷學道疎。賴有一籌差自慰。閉門不作子公書。

又

莫笑花前白髮新。宣和人醉慶元春。何時道路平如砥。卻就清伊整幅巾。

又

三生元是出家人。一念差來墮薦紳。二寸楮冠雙草屨。天公還我水雲身。

又

黃庭兩卷伴身閑。盤篆香殘日未殘。泛泛孤身似萍葉。始知天地不勝寬。

又

年華偃蹇留不住。鬢雪縱橫耘更多。樂天不生夢得死。恨無人續竹枝歌。

又

年來世事掃除盡。猶有閑吟頗自奇。安得陟釐九萬箇。爲君盡寫暮年詩。

自傷

朝雨暮雨梅子黃。東家西家鬻蘭香。白頭老鰥哭空堂。不獨悼死亦自傷。齒如敗屐鬢如霜。計此光景寧久長。扶杖欲起輒仆牀。去死近如不隔牆。世間萬事俱茫茫。惟有進德當自強。往從二士餓首陽。千載骨朽猶芬芳。

雨後絕涼偶作

槐陰日色薄。桐葉雨聲長。林下有餘適。城中無此涼。浮瓜寒水碧。斲藥小鉏香。未許陶潛達。華簪何足忘。陶詩云。

村居

黍酒濃浮瓮。瓜蒞綠映槃。老便藜藿笑。病喜粟漿酸。紗帽新裁穩。絕袍舊製寬。村居亦何好。聊用發詩端。

久雨

水長平侵岸。雲低半失村。菰蒲亂鳧鴨。泥潦困雞豚。弄筆排孤悶。煎茶洗睡昏。荒郊多狗盜。及早閉柴門。

七十三吟

七十三年事事新。涵濡幸作六朝民。髮無可白方爲老。酒不能賒始覺貧。末路已悲身是客。此心猶與物爲春。柴門勿謂常岑寂。時有鄉鄰請藥人。

會稽

海近風雲惡。城高鼓角雄。山川橫慘淡。樓閣半虛空。故國千年鶴。征途萬里篷。餘生猶幾日。盡合付杯中。

泛舟

山照澄波髮鬢青。新蒲梢上立蜻蜓。孤舟每爲尋詩出。輸與漁翁醉不醒。

夜觀子虞所得淮上地圖

閉置空齋清夜徂。時聞水鳥暗相呼。胡塵漫漫連淮潁。淚盡燈前看地圖。

水村

家住煙波似畫圖。殘年不復歎頭顱。深深竹塢見螢度。翳翳菰叢聞鳥呼。十里笳聲上雲漢。一空星影落陂湖。天公著我非無地。卻悔從來錯怪渠。

題菴壁

萬里東歸白髮翁。閉門不復與人通。綠樽浮蟻狂猶在。黃紙棲鴉夢已空。薄技徒勞真刻楮。浮生隨處是飛篷。湖邊吹笛非凡士。儻肯相從寂寞中。每風月佳夕。輒有笛聲起湖之西南。莫知何人。意其隱者也。

又

俠氣當年蓋五陵。今成粥飯在家僧。身在此倚貧非病。齒落方慚豁可憎。踏月閑穿雙仙屨。聽琴橫按一枯藤。年來萬事都經遍。強笑看人獨未曾。

晚歸舟中作

路入芙蓉浦。家依罷穉村。急灘雙鷺立。平野萬鷗翻。市散人爭渡。僧歸寺掩門。淒涼誦新句。招得欲殘魂。

送嚴居厚棄官歸建陽溪莊

曼容不過大百石。淵明僅留八十日。寥寥千載有兩公。海內至今推絕識。放翁貪祿老始歸。自今不作一錢直。見人勇退輒欣慕。亟欲起拜忘衰疾。吾廬近在官道傍。門外未掃車馬迹。溪莊有地肯見分。會結茅齋傍青壁。

次朱元晦韻題嚴居厚溪莊圖

鶴俸元知不療窮。葉舟還入亂雲中。溪莊直下秋千頃。羸取閑身伴釣翁。

夢中遊禹祠

湖上無人月自明。夢中髣髴得閑行。庭空滿地楸梧影。風壯侵雲鼓角聲。世異客懷增慘愴。秋高歲事已崢嶸。長歌忽遇騎鯨客。喚取同朝白玉京。

感懷

老抱遺書隱故山。鏡中衰鬢似霜菅。規模肯墮管蕭亞。夢想每馳河渭間。竹帛竟孤千載事。江湖敢恨一生閑。殘功賴有吾兒續。把卷燈前爲破顏。

酒熟

侯印何由得酒泉。小槽新熟亦欣然。放翁達處過彭澤。客自在傍吾自眠。

病起遊近村

老人摧頹絕造請。門設常關草生徑。一年三百六十日。三百五十九日病。一日不病出忘歸。繞村處處扣柴扉。水東溪友新酒熟。舍北園公菰菜肥。平生養氣心不動。黜陟雖聞了如夢。從今病愈卽相尋。共聽糟牀滴春瓮。

秋夜讀書示兒子

久病少睡眠。往往中夕起。呼燈取書讀。不能盡數紙。喟然置之歎。生世後關里。持蠡欲測海。遽復迫老死。人生各有業。唐虞本吾事。詩書脫秦厄。天意固在此。異端塞穹壤。作俑孰爲始。神禹逝不還。吾其如降水。

秋晚書感

丘塚相望故舊空。放翁猶復寄漚中。少眠危坐待窗白。得酒細傾生頰紅。雖媿蛟龍起雲雨。尙勝魚鳥困池籠。秋來莫道無遊興。野渡村橋處處通。

王成之給事挽歌辭

昔泝黃牛峽。曾經白鷺洲。從容參步武。談笑極風流。晚預蓬萊客。時從襖被遊。揮毫看半醉。追想只添愁。

又

詩騷湘水客。風度曲江公。一夕南樓去。千秋東省空。囊封震朝右。墨敕絕宮中。贈極文昌貴。君恩厚飾終。

書南堂壁

偶築湖邊舍。侵尋四十春。山丘未埋骨。詩酒尙關身。樵路霜侵屨。漁舟雨墊巾。忝蒙鄉黨敬。六聖有遺民。予生於宣和乙巳歲。

又

荒寒淺村步。隱翳小茅茨。偶逐漁樵住。都忘歲月移。閑惟接僧話。老始愛陶詩。耆齒猶須幾。羸然敢自期。

秋晚

寒渚雁新下。壞牆蛩夜吟。庭莎欲無色。園樹不成陰。露灑孤臣淚。馳驅壯士心。明朝鏡中髮。飽受雪霜侵。

晨起待子聿歸

老人盥櫛罷。坐待汝晨省。忽思隔重關。懷抱增耿耿。小雨暗北窗。誰與慰淒冷。卷書默袖手。奈此清晝永。懸知河橋下。亦已喚舴艋。長路歸當飢。呼童具湯餅。

信筆

吾生本暫寓。無日不可死。區區遲速間。何地著愜喜。朝移一株石。暮引一脈水。是中亦何樂。一笑聊爾耳。

有酒或一醉。無酒終日閑。雨足通南澗。木落見西山。飯飽出柴門。本散腰脚頑。偶然遇野人。笑語欲忘還。

龜堂東窗戲弄筆墨偶得絕句

身如蠶老已三眠。一繭何妨自裏纏。豆飯藜羹支永日。檜籬竹屋送餘年。

又

一樽且復罄幽歡。不是癡頑強自寬。死去何憂累兒子。千錢可買市成棺。

又

北菴睡起坐東廂。無事方知日月長。天與詩人送詩本。一雙黃蝶弄秋光。

又

老衰有驗詩先退。勳業無心夢漸稀。淺浦小小孤絕處。數家煙火自相依。

又

老人孤寂似無家。午枕初回日已斜。偶得風和身亦健。舍南舍北探梅花。

次呂子益韻

呂子奇才非復常。詩來起我醉中狂。大音誰和陽春曲。真色一空時世妝。東閣獻諛無轍迹。西湖寄傲有杯觴。病懷正待君瀟被。墨妙時須寄數行。

舍北行飯書綱目

晚殮初爨一甌茶。曳杖閑行興未涯。煙樹參差墨濃淡。風鴉零亂字橫斜。夕陽偏傍平橋路。寒蝶猶依晚菊花。堪笑衰翁耐荒寂。短衣霑露未還家。

又

落雁昏鴉集遠洲。青林紅樹擁平疇。意行舍北三叉路。閑看橋西一片秋。小婦破煙撐去艇。丫童橫笛喚歸牛。形容野景無餘思。自怪癡頑不解愁。

明日復得五字

羸病偶不死。端居思出遊。山寒麥苗短。天闊雁聲遙。學劍元癡絕。脂車久罷休。鄰翁獨眷眷。同好自相求。

又

腰痛今朝愈。寒裳野興長。黃鴉號亂篠。碧蝶繞枯桑。陂壞長疇廢。村空舊路荒。十年逢九潦。誰與問蒼蒼。

十一月二十二日夜待子聿未歸

寒爐火半銷。壞壁燈欲死。人行籬犬吠。月出林鵲起。吾兒信偶非長路。老子可憐煎百慮。人人父子與我同。立朝勿遣交河戍。

南窗

暄妍一窗日。的皜數枝梅。小鼎煎茶熟。幽人作夢回。新春又將近。晚景但堪哀。用底舒懷抱。殘書闔復開。

幽居

衰鬢蕭條笑舊青。一枝棲穩寄餘齡。徐行不媿衣露肘。安臥何妨席見經。視客恰如堂上燕。捐書那願案頭螢。時時開說前賢事。聊遣鄉閭識典刑。

春近山中即事

乞得松楠手自栽。結茅聊喜避風埃。百年孰與夢長短。萬事只如雲去來。雪後梅花初半吐。身閑樽酒盍頻開。錦官城外青羊路。常記當年小獵回。

又

節物貧家有故常。春盤臘粥逐時忙。悠悠歲月催雙鬢。草草雞豚薦一觴。人意自殊平日樂。梅花寧減故時香。小園新展西南角。挂樹青蘿百尺長。

又

世亂王孫泣路隅。時平野老醉相扶。種橙正可三年大。愛竹何曾一日無。細路迢迢上雲雨。輕舟渺渺入菰蒲。暮歸剩欲談幽勝。安得丹青爲作圖。

雪夜感舊

江月亭前樺燭香。龍門閣上獸聲長。亂山古驛經三折。小市孤城宿兩當。晚歲猶思事鞍馬。當時那信老耕桑。綠沉金鎖俱塵委。雪灑寒燈淚數行。

將進酒

我欲挽住北斗杓。常指蒼龍無動搖。春風日夜吹草木。只有榮盛無時凋。我欲剗斷日行道。陽烏當空月杲杲。非惟四海常不夜。亦使人生失衰老。如山積麴高崔嵬。大江釀作蒲萄醅。頽然一醉三千杯。借問白髮何從來。

歲暮懷張季長

已迫桑榆景。況逢梅柳時。功名終自誤。老病獨如期。醉眼嫌天迤。孤吟覺鬼悲。唐安在何許。無字寄相思。

謝朱元晦寄紙被

木枕藜牀席見經。臥看飄雪入窗櫺。布衾紙被元相似。只欠高人爲作銘。

又

紙被圍身度雪天。白於狐腋軟於綿。放翁用處君知否。絕勝蒲團夜坐禪。

送王季嘉赴湖南漕司主管官

它人作陵邑。榜笞朝暮急。王子乃不然。袖手萬事集。它人西入都。競裁丞相書。王子掉頭去。長沙萬里餘。問子謀身無乃左。凜加霜松姿磊砢。屈原賈誼死有靈。計此兩人心獨可。

巷中夜興

示疾維摩無侍者。夜闌自掩草巷門。有情梅影半窗月。相應雞聲十里村。紙帳擁裘尋斷夢。地爐撥火煖殘樽。扶衰又踐新春境。萬事元知不足論。

初春欲散步畏寒而歸

峭寒漠漠入重貂。酒力欺人凝不消。春困苦多無處賣。客魂欲斷倩誰招。一溪水淺梅枝瘦。四野雲酣雪意驕。欲到前村無奈嬾。卻尋歸路度西橋。

憶昔

憶昔從戎出渭濱。壺漿馬首泣遺民。夜棲高冢占星象。晝上巢車望虜塵。共道功名方迫逐。豈知老病只逡巡。燈前撫卷空流涕。何限人間失意人。

戊午元日讀書至夜分有感

七十年來又四年。兩聲燈影故依然。未收浮世風樞夢。尙了前生蠹簡緣。老學辛勤那有補。舊聞零落恐無傳。先師鉢袋終當付。歎息誰能共著鞭。

又

強戴羅檐怯歲增。光陰堪歎捷飛騰。簷間點滴新春雨。窗下青熒半夜燈。傍架討尋書散亂。倚屏吟嘯髮鬢聳。極知老境惟當佚。絕學端居恨未能。

雜感

志士山棲恨不深。人知已是負初心。不須先說嚴光輩。直自巢由錯到今。

又

勸君莫識一丁字。此事從來誤幾人。輸與茅簷負暄叟。時時睡覺一頻伸。

又

世事紛紛無已時。勸君杯到不須辭。但能爛醉三千日。楚漢興亡總不知。

又

百年鼎鼎成何事。寒暑相催卽白頭。縱得金丹真不死。摩挲銅狄更添愁。

又

世間魚鳥各飛沉。茅屋青山無古今。畢竟替他愁不得。幾人虛費一人心。

又

一杯濁酒卽曠然。自笑閑愁七十年。今日出門天地別。此身如在結繩前。

又
山人那信宦塗艱。強著期衣趁曉班。豪氣不除狂態作。始知只合死空山。

又
老子傾囊得萬錢。石帆山下買烏犍。牧童避雨歸來晚。一笛春風草滿川。

又
故舊書來訪死生。時聞剝啄叩柴荆。自嗟不及東家老。至死無人識姓名。

又
忍窮待死十年間。老子誰知老更頑。溪友留魚供晚酌。鄰僧送米續朝餐。

歎老

崩儕什九墮丘墟。自笑身如脫網魚。委命已悲吾道喪。垂名真負此心初。齒殘僅可決滯肉。眼澀知難讀細書。家事豈容關老子。兒曹努力事耕鋤。

朝飢食齋麵甚美戲作

一杯齋餽餽。老子腹膨脞。坐擁茅簷日。山茶未用烹。

又

一杯齋餽餽。手自芼油葱。天上蘇陀供。懸知未易同。

漁隱堂獨坐至夕

斜倚筇枝岸幅巾。閉門久已謝知聞。中庭日正花無影。曲沼風生水有紋。三尺桐絲多靜寄。一樽玉瀝足幽欣。世間萬事都忘盡。惟向閑中屢策勳。

讀書

讀書肝膽尚輪囷。蠹簡堆中著此身。飽識三千餘歲事。已爲七十四年人。鏡中衰鬢難藏老。海內虛名不救貧。只欲從今都掃盡。剩沽春酒答新春。

北望

昔我初生歲。中原失太平。寧知墓木拱。不見塞塵清。京洛無來信。江淮尙宿兵。何時青海月。重照漢家營。

蘭

南巖路最近。飯已時散策。香來知有蘭。遽求乃弗獲。生世本幽谷。豈願爲世娛。無心託階庭。當門任君鋤。

古梅

梅花吐幽香。百卉皆可屏。一朝見古梅。梅亦墮凡境。重疊碧蘚暈。天矯蒼虬枝。誰汲古澗水。養此塵外姿。

山脚散步由舍北歸

偶散東岡步。因成北渚遊。鴉昏先小泊。魚暖欲羣浮。緩曳紅藤杖。斜披紫綺裘。閑身病亦可。隨處得無愁。

又

幽徑欣行藥。衰年困負薪。梅殘香更遠。草動綠初勻。魚似濠梁樂。鷗如海上馴。度橋成一笑。微健及新春。

又

空碧升團月。江郊弄夕霏。生涯今始是。年事古猶稀。冰解魚初躍。風和雁欲歸。興來忘遠近。草露已沾衣。

寄題連江陳氏拂石軒李似之嘗有歌詞

平生聞說西江水。百丈齋淪深見底。漁舟來去白鷗飛。上有綸巾隱君子。作詩自許輩陶謝。歡傲煙雲弄清泚。紛紛聲利滿人間。耳本不聞安用洗。李公過江號高流。逸氣凜凜橫清秋。沙邊一笑偶邂逅。掃石蔭松相獻酬。浩歌聲斷七十載。尙寄萬壑風颼颼。放翁老憊狂未歇。買船欲作西江遊。

得張季長書以大蓬見稱蓋以予寄祿官視昔秘書監也因作五字寄之

老病江湖上。煩公問死生。仙蓬雖誤到。殘錦只虛名。近歲裁損隘。所謂十色錦者。所存亡幾。點滴三更雨。淒涼萬里情。向來遺恨極。不遂隱青城。

病足累日不能出菴門折花自娛

頻報園花照眼明。蹒跚正廢下堂行。擁衾又聽五更雨。屈指元無三日晴。不奈病何拋酒醜。羸知春在賴鶯聲。一

枝自浸銅瓶水。喜與年光未隔生。

書意

帝命煌煌敕百神。方傾天漢洗胡塵。但須荊州一好漢。安用商山四老人。竹帛恐貽千古笑。江湖未愧百年身。此心欲與何人說。病足呻吟又過春。

新燕

天工不用翦刀催。山杏溪桃次第開。要信今年春事早。社前十日燕新來。

北巖采新茶用忘懷錄中法煎飲欣然忘病之未去也

槐火初鑿燧。松風自候湯。攜籃苔徑遠。落爪雪芽長。細啜襟靈爽。微吟齒頰香。歸時更清絕。竹影踏斜陽。

連日至梅仙塢及花涇觀桃花抵暮乃歸

千載桃源信不通。鏡湖西塢擅春風。舟行十里畫屏上。身在西山紅雨中。俗事挽人常故故。夕陽歸櫂莫匆匆。豪華無復當年樂。爛醉狂歌亦足雄。

又

桃花塢近釣魚磯。不比劉郎萬里歸。水底紅雲迷醉眼。樽前絳雪點春衣。病依几杖猶能出。老愛風光未忍違。天借清遊每窮日。夜深炬火候柴扉。

卷三十七

病中作

破裘縫更暖。糲食美無餘。摩詰病說法。虞卿窮著書。身羸支枕久。足蹇下堂疎。今日晴窗好。幽懷得好據。

題郭太尉金州第中至喜堂

安康甲第天下傳。玉題繡井摩雲煙。落成鼓吹震百里。意氣欲壓秦山川。第中築堂最宏麗。奎畫岌岌蛟龍纏。知公所喜在勇退。顧視解組如登仙。公心雖爾天未可。終倚北伐銘燕然。十年宿衛功第一。小却臥護長淮邊。帳前

犀甲羅十萬。幕下珠履逾三千。願公小緩高枕計。即今河雒猶腥羶。出師雞鹿擁皂纛。畫象麒麟蛾玉蟬。是時公
喜客亦樂。爲公滿瀉黃金船。

暮春

山陰又見暮春初。禁火園林社雨餘。世事不妨隨日改。年光未遽與人疎。豉香下箸嘗葷菜。鹽白開奩得製魚。草
草一杯終可喜。數間茅屋亦吾廬。

小園新晴

散髮陽狂不計年。園林只在小窗前。斷虹千尺卷殘雨。新月一鉤生暮天。臘醜坵泥留客醉。山茶落磴喚兒煎。物
華心賞元無盡。剩住人間作地仙。

又

衰病猶煩藥石功。殘春終日在園中。地偏幽草爲誰綠。雨霽新花如許紅。足蹇扶持須釋子。杯深暖熱賴鄰翁。此
身雖向閑中老。若比休休却未同。司空表聖休亭歌曰。休休休。莫莫莫。伎倆雖多性靈惡。賴是常教閑處著。

春晚感事

據鞍千里何曾病。閉戶安眠百病生。每憶嘉陵江上路。插花藉草醉清明。

又

寒食梁州十萬家。鞦韆蹴鞠尙豪華。犢車輕轆歸城晚。爭碾平蕪入亂花。

春晚園中作

杏子青青梅子酸。山園轉眼又春殘。老懷豈復少年樂。病骨不禁清曉寒。學術背時甘義墮。功名無路久心闌。蠶
收麥熟吾何恨。但遣銀杯似海寬。

題夷堅志後

筆近反離騷。書非支諾臯。豈惟堪史補。端足擅文豪。馳騁空凡馬。從容立斷鼇。陋儒那得議。汝輩亦徒勞。

幽居

小舫藤爲纜。幽居竹織門。短籬圍藕蕩。細路入桑村。魚膾槎頭美。醅傾粥面渾。殘年謝軒冕。猶足號黎元。

聞鳥聲有感

小市提壺酤濁酒。東陂脫袴插青秧。歸來靜臥茅簷底。如覺閑中白日長。

又

流年冉冉去無情。日夜溪頭布穀聲。城郭雖存人換盡。令威應悔學長生。

與子虞子坦坐龜堂後東窗偶書

時鳥朝暮鳴。芳草日夜生。春風捨我去。歲律俄崢嶸。綴簇鬪白白。出陂稻青青。鳴機織苧葛。暑服亦已成。小兒結山房。窗戶頗疎明。萬事不挂眼。朱黃浩縱橫。佳哉東北風。吹下讀書聲。功名詎敢望。且復慰父兄。是日午間。聞子聿在山半讀書。相與欣然。

行年

行年過七十。與世兩相忘。墨沼龜魚樂。藥園芝朮香。吾生一蟲臂。世路幾羊腸。楮弁新裁就。翛然學道裝。新作兩褚冠。

東窗小酌

烏帽翻僊白苧涼。東窗隨事具杯觴。流年不貸世人老。造物能容吾輩狂。藤葉成陰山鳥下。檜花滿地蜜蜂忙。何人畫得農家樂。咿軋繰車隔短牆。

又

市塵遠不到林塘。嫩暑軒窗晝漏長。蠶妾趁時爭鹽鹵。農去得雨正移秧。徒行有客驚頑健。爛醉無人笑老狂。卻掩菴門徑投枕。軒聲雷起撼黎牀。

西林傳菴主求定菴詩

粥後鐘魚未動時。夜燈仍對碧琉璃。不須更說能生慧。枯木寒灰也自奇。

又

業力驅人舉世忙。西林袖手一爐香。未能成佛渾閑事。十劫看渠坐道場。

夏日

將雛燕子漸離巢。過母龍孫已放梢。日出並湖初曬網。雨餘乘屋旋添茅。家貧舊業元知廢。身老微官久合拋。莫恨門前車馬絕。豈無農圃與論交。

又

過眼春光久已空。曬絲擣麥又匆匆。新泥滿路梅黃雨。古木號山月暈風。角黍茱萸新問罇。靈符墨溼照房櫳。歲華不爲翁衰駐。且付餘生一笑中。

又

吳中五月暑猶微。竟日南堂坐掩扉。綠樹露一作霧香鶯獨語。畫廊風惡一作急燕雙歸。三千界內人人錯。七十年來念念非。投老萬緣俱掃盡。從今僧亦不須依。

又

雨斷雲歸旋作晴。尙餘紅溼在簾旌。燕雛掠地飛無力。梅子臨池墜有聲。米糲解包供午餉。萍齏傍枕析朝醒。此翁不負頑軀處。捫腹時時繞舍行。

又

梅雨初收景氣新。太平阡陌樂閑身。陂塘漫漫行秧馬。門巷陰陰挂艾人。白葛烏紗稱時節。黃雞綠酒聚比鄰。掀髯一笑吾真足。不爲無錐更歎貧。

夜酌

酒淥孤燈夜。梅黃細雨天。聊成顧影醉。復作曲肱眠。腰下蘇秦印。囊中趙壹錢。丈夫隨所遇。底處不陶然。

夏夜

夏夜誰知亦自長。幽居渺在水雲鄉。月侵竹簟清無暑。風度衣篝潤有香。棲鵲自驚移別樹。流螢相逐過橫塘。放翁尙苦餘醒在。細綆銅餅落井牀。

又
山崦風生鷓鴣悲。柴門月上樹陰移。薰衣汗雨初乾後。把卷蚊雷不動時。孤悶難禁終歲病。浮生易滿百年期。釣竿只待清秋近。一棹煙波信所之。

又
展轉紗幮睡不成。一藤扶僂繞廊行。月昇雙鶻移枝宿。露下孤螢綴蔓明。汲井忽驚人已起。開門堪歎事還生。羽衣道帽從吾好。柏子煙中起磬聲。

又
龜息綿綿破五更。起扶藤杖並南榮。擇栖孤鶻尙三匝。司旦老雞俄一鳴。移坐徐看山月吐。脫巾聊受水風清。不知竟是真仙未。夜夜神遊白玉京。

泛舟
水鄉元不減吳松。短櫂沿洄野興濃。鬱鬱冬青森翠葆。離離夜合散紅茸。水涯多此二樹。村深初度穿林笛。寺近先聞出塢鐘。歸路夕陽猶滿岸。憑絃一笑覽衰容。

感舊
要識梁州遠。南山在眼邊。霜郊熊撲樹。雪路馬蒙氈。慘淡遺壇側。拜韓信壇至今猶存。蕭條古廟孺。沔陽有蜀後主所立武侯廟。百詩猶可想。歎息遂無傳。予山南雜詩百餘篇。舟行過望雲灘。墜水中。至今以爲恨。

又
夜涉南沮水。朝過小益城。梯山天一握。度棧土微平。雨近秦雲暗。霜高隴月明。至今孤夢裏。鳴馬有遺聲。鳴馬皆七字韻語。聞之悲愴動人。

又
早發金堆市。更衣石櫃亭。灘聲秋後壯。山色雨餘青。道瀟愁車轍。橋危避駝鈴。功名竟何在。撫事感頽齡。

又

塵土暗貂裘。森然白髮稠。年光真袞袞。吾事竟悠悠。馬宿平沙夜。軍中馬及虜卒。夏夜皆露宿沙上。烽傳絕塞秋。平安火竝南山來。至山南城下。故人零落盡。追寫只添愁。

又

凜凜隆中相。臨戎遂不還。塵埃出師表。草棘定軍山。壯氣河潼外。雄名管樂間。登堂拜遺像。千載愧吾顏。

又

我思杜陵叟。處處有遺蹤。錦里瞻祠柏。綿州弔海棕。蹉跎悲櫪驥。感會失雲龍。生世後斯士。吾將安所從。

書喜

兩足郊原正得晴。地縣萬里盡春耕。陰陰阡陌桑麻暗。軋軋房櫓機杼鳴。亭鼓不聞知盜息。社錢易斂慶秋成。天公不負書生眼。留向人間看太平。

自詠

平生萬事付愁癡。兀兀騰騰到死時。夜踏亂雲過略約。曉分寒溜注軍持。東薪山客招烹石。渡海番僧乞製碑。作個生涯君勿笑。挂天勲業亦兒嬉。

露坐立秋前五日

旋削甘瓜進酒卮。斷雲漠漠斗離離。北臨積水風來壯。東恨長林月上遲。秋近不堪聞急杵。夜涼已復怯輕絺。天孫老抱河梁恨。豈獨人生事可悲。

又

岸幘臨窗意未便。又拖筇杖出庭前。清秋欲近露霑草。皎月未升星滿天。過埭船爭明旦市。躡車人廢徹宵眠。齋民一飽勤如許。坐食官倉每惕然。

親舊或見嘲終歲杜門戲作解嘲

十年蕭散住林間。只是幽居不是閑。續得茶經新絕筆。補成僧史可藏山。詩題紫閣憑雲寄。藥報青城附鶴還。自笑何曾總無事。枉教人道閉柴關。

北窗

寒泉斷藕。素絲長。紋簾開。瓜碧玉香。午睡覺來桐影轉。無人可共北窗涼。

新秋以窗裏人將老門前樹欲秋爲韻作小詩

殘暑無多日。幽居近小江。酒醒中夜起。松月入山窗。

又

陸子江海人。所願守節死。潮生釣瀨邊。月落菱歌裏。

又

小智每自私。大患緣有身。孰能忘彼己。吾將友斯人。

又

野艇千錢買。明當泛渺茫。但能容一榼。家具不須將。

又

立朝紹興間。猶及見諸老。魂夢不可逢。丘墳閉秋草。

又

朝真方捨杖。步月始開門。零落山花後。經旬掩綠樽。

又

唐虞雖已遠。至道豈無傳。度日一編裏。懷人千載前。

又

秋風昨夜來。聲滿梧桐樹。故人渺天末。此夕誰與度。

又

少年雖婚宦。淡然本無欲。娑娑三畝園。自歎不啻足。

又

無食妨何事，吾兒可散愁。焚香正巾褐，聽汝讀春秋。

食新有感貧居久蔬食至是方稍得肉

壯遊車轍遍天涯，晚得祠官不去家。優老每慚千載遇，食新又歎一年加。出波魚美如通印，下棧羊肥抵臥紗。捫腹笑歌仍索酒，不嫌鄰舍怪譁譁。

秋夕露坐作

銀河半落露華清，南斗闌干北斗明。冉冉方悲老將至，纖纖又歎月初生。酒牀細滴香浮瓮，衣杵相聞聲滿城。萬卷讀書無用處，却將耕稼報昇平。

有年

不向神林乞雨晴，天公自解相西成。急符收盡無遺賦，新酒沽多足笑聲。外戶徹扃停夕柝，齊民相勸力春耕。傳聞夜市連三鼓，却恨龐公不入城。

大雨

北風挾驕雲，突起塞宇宙。赫日初未西，盼轉失白晝。翻空黑幟合，列陣奇鬼鬪。雨鏃飛縱橫，雷車助奔驟。平階水入戶，溝瀆不能受。對面語不聞，持繖避屋漏。兒童抱圖書，衣屨那暇救。縱暴理豈長，忽已收簷鬣。比鄰更相勞，捃拾如過寇。老子獨癡頑，長歌對醇酎。

東西家

東家雲出岫，西家籠半山。西家泉落澗，東家鳴珮環。相對籬數掩，各有茆三間。芹羹與麥飯，日不廢往還。兒女若一家，雞犬意自閑。我亦思卜鄰，餘地君勿慳。

予自春夏屢病至立秋而愈作長句自賀

良藥扶衰抵萬金，漸加糜粥輟呻吟。溪風拂簟有秋意，山影半庭生夕陰。薄俗只成驚老眼，幽居正得遂初心。岸巾待月欄干曲，更覺天公愛我深。

七月十一日雨後夜坐戶外觀月

浴罷淡無事。岸幘臨前軒。雷雨始退散。雲月相吐吞。風蟬斷還續。枝間終夕喧。露螢闌復開。熠熠綴草根。殘暑會當去。孰敢厭炮燔。四時莽相代。所歎歲月奔。歡悰挽不留。白髮生無根。兒女日夜長。子且復有孫。澗松偶未斲。野鶴猶孤鶩。華表幸來歸。餘事何足言。

王與道尙書挽詞

明明百間屋。汪汪千頃陂。直能彰主聖。清不願人知。許國多艱日。逢辰獨斷時。人猶望霖雨。殄瘁不勝悲。

又

昔遇開藩日。嘗叨下榻榮。從容陪讌會。傾倒及平生。借譽言猶在。懷知涕易橫。終慚五字句。不盡百年情。

初秋

雨氣排殘暑。風聲送早秋。拂窗聞葉落。繞井看螢流。臥起須人助。炊春尙自謀。蕭條歲將晚。百慮入搔頭。

感秋

秋色關河外。秋聲天地間。壯士感此時。朝鏡凋朱顏。一身寄空谷。萬里夢天山。噫嗚怒皆裂。憤激悲滂漚。古來真龍駒。未必置天閑。長松倒澗壑。委棄同蓁菅。得志未可測。談笑濟時艱。凜然出師表。一字不可刪。

北窗試筆

老來日月速。去若弦上箭。方看出土牛。已復送巢燕。清晨覓綠衣。正午廢紈扇。北窗小雨餘。盆山鬱葱蒨。病體爲之輕。一笑玩筆硯。雖無顏柳工。揮灑亦忘倦。紙窮墨漸燥。蛇蚓爭入卷。屬兒善藏之。勿遣俗子見。

秋思

秋毫不受俗塵侵。隨處悠然一散襟。天際挂虹初斷雨。雲頭翳日又成陰。引泉北澗長澆竹。拂榻西窗自斲琴。藥石掃空身便健。始知萬事要無心。

又

兩長蒼苔滿釣磯。坐令秋暑斂餘威。天高月破殘雲出。野曠風驚蠹葉飛。終歲鉏犁猶不飽。萬家碨杵獨無衣。早知竟坐儒冠誤。射虎南山未必非。

又
身似龐翁不出家。一窗自了淡生涯。山薑零落初成子。石竹淒涼半吐花。寒澗挹泉供試墨。隨巢篝火喚煎茶。掩關本意君知否。兩耳衰年不耐譁。

又
老懷不慣著閑愁。信脚時爲野外遊。過雁未驚殘月曉。片雲先借一天秋。村醅似粥家家醉。社肉如林處處留。七十已稀今又過。問君端的更何求。

新涼

山居謝來客。病體喜新涼。幽草上牆綠。落花霑土香。捐書心自息。聽雨夢偏長。菰葉鄰人餉。欣然獨舉觴。

又

菰首初離水。薑芽淺漬糟。粳香等炊玉。韭美勝炮羔。露下殘蕪濕。風生萬木號。從今更何事。痛飲讀離騷。

自遣

踽踽人間未死身。鄉閭共敬六朝民。睡無由著緣多感。醉不能成坐一貧。幽屏最憎蟲弔夜。狂吟略似鳥鳴春。也知世俗誰知我。猶待君王獵渭濱。

自規

曲肱飲水彼何人。汝獨何爲厭賤貧。大節勿汙千載史。少時便盡百年身。圖書幸可傳遺業。雞黍何妨約近鄰。今日仲秋還小雨。剩鉏麥壟待新春。鄉人謂八月一日得用。宜來年麥。

感舊末章蓋思有以自廣

庚寅歲入巴東峽。臥聽清猿月下聲。二十九年窮未死。卻思當日似前生。

又

百堂小益最初程。朱棧青崖照眼明。十日經行圖障裏。時時馬上聽鶯聲。

又

路入梁州似掌平。鞦韆蹴鞠趁清明。未論日遠長安近。且喜南山天際橫。

又

青城山裏屏風疊。太華峯頭腰帶鞋。跨鶴橫空吾欲去。九秋月露看青冥。

秋日獨酌

草木秋始繁。黃碧照籬落。雖云各有時。意緒終索莫。老人固多感。對此聊命酌。風霜肅萬物。過雁在寥廓。吾當識其大。微物不足託。何以豁曠懷。短章可時作。

夙興

草堂風雨少睡眠。骨冷始覺非壯年。水鳥長鳴聲戛然。庭中棲鴉亦已翩。老人清餓如蟲蟬。起坐甚愛小窗妍。一生宦遊膏火煎。歸來杜門氣羸全。人看雖不直一錢。知我自有穹穹天。賦詩藁成棄不傳。殘鐘斷磬知誰編。

身世

身世浮沉等一漚。臥看校尉例封侯。青燈微火藥鐺夜。淡月淒風衣杵秋。醉裏不辭嘲兀兀。吟邊時得寄悠悠。卽今老眼無開處。又向城南倚寺樓。

憶昔

憶自梁州下益州。身閑處處醉紅樓。早知虛起彈冠意。悔不常爲秉燭遊。詩思已慚馳陣馬。目光猶覺射車牛。蓮峯日觀何時到。下看人間萬里秋。

豐歲

豐歲驩聲動四鄰。深秋景氣祭如春。羊腔酒擔爭迎婦。鼉鼓龍船共賽神。處處喜晴過甲子。家家築屋趁庚申。老翁欲伴鄉閭醉。先辦長衫紫領巾。

村居

孤村淺浦近江城。西折坡陁一嶺橫。墟落煙生含暮色。園林風勁作秋聲。年豐租稅無逋負。酒熟鄉鄰遞送迎。老病愈知難報國。只將高枕送餘生。

中秋夜半後無雲而月色微淡尤爲絕景

輕煙薄靄九霄寒。素月渾如隔縠看。此夕洞庭應更好。誰能從我跨青鸞。

夜賦

老人不食覺魂清。恍若身遊白玉京。夜靜月驚林鶻起。水涼風颭露荷傾。昏燈一點窺孤夢。畫角三終轉五更。欲醉海山還嬾去。且攜羽扇憩青城。

遣興

學廢文章傳世少。身閑車馬過門疎。壯心易盡彘肩酒。義氣肯貪熊掌魚。列聖仁恩深雨露。兩京宮闕尙丘墟。素懷華渭嗟誰問。且作狂歌楚接輿。

秋賽

柳姑廟前煙出浦。冉冉縈空青一縷。須臾散作四山雲。明日來爲社公雨。小巫屢舞大巫歌。士女拜祝肩相摩。芳茶綠酒進雜遝。長魚大鰲高嵯峨。常年徵科煩箠楚。縣家血溼庭前土。妻啼兒號不敢怨。期會常憂累官府。今年家家有餘粟。縣符未下輸先足。木刻吏蒲作鞭。自然粟帛如流泉。儲積不愁無九年。

寄題周丞相平園

先生道心平如砥。秋毫忿慾何曾起。漫將周易著牀頭。本不洗心那洗耳。先生國論如砥平。三朝倚之作權衡。泰階兩兩元不動。自然萬里無檣槍。如今歸來曲肱臥。世事無窮俱看破。不栽桃李不鉏蘭。山僧野叟時來過。吾儕七十固已壽。更到期頤亦何有。倘知生死本自平。拈放一邊如把酒。

兩三日歌

秋風戒寒兩三日。空村無人暮蕭瑟。北窗書生萬卷書。齒豁頭童真可惜。輪囷新蟹黃欲滿。磊落香橙綠堪摘。興來尙能氣吞酒。詩成不覺淚漬筆。士生蓬矢射四方。掃平河雒吾儕職。湖中隱士倘可逢。握手與君談至夕。

戲作治生絕句

治生何用學陶朱。少許能慳便有餘。惜酒已停晨服藥。省油仍廢夜觀書。

龜堂雜題

龜堂端是無能者。妄想元無一事成。最後數年尤可笑。飽餐甘寢送浮生。

又

癡頑老子老無能。遊惰農夫酒肉僧。閉著菴門終日睡。任人來喚不曾應。

又

長腰玉粒出新春。秋獲真成畝一鍾。衣食羸供官賦足。何妨世世作耕農。

又

冷雨蕭蕭澀不晴。亂書圍坐正縱橫。忽聞小洗新醅熟。急喚兒童洗破觥。

又

偶讀陳無已芍藥詩云一枝剩欲簪雙髻。未有人間第一人。蓋晚年所作也。爲之絕倒。戲作小詩。

村舍

過埭六七里。竝江三四家。潮生魚滬短。風起鴨船斜。世守桑麻業。長無市井譁。

雨中作

雨聲可愛秋方見。睡味無窮老始知。半醉擁衾支倦枕。誰能三復放翁詩。

江郊

白草江郊暮。青帘野店秋。喧呼估船客。鬼蜮飲家流。老豈題橋柱。愁惟倚寺樓。更傷昏澀眼。煙際數歸牛。

閑趣

被擁聽秋雨。兒扶上夜香。飭炊霜後稻。糟瀆社前薑。馬病空思路。僧歸却住房。風扉久嘔軋。錯認鷓聲長。

又

飯滿七綴鉢。香凝百衲窗。雨聲酣曉枕。燈燼落秋缸。疾豎元知遜。天魔亦已降。超然對兒子。未媿鹿門龐。

又

老至衰滋劇，秋高病尙侵。坐看兒學字，臥聽客彈琴。困滿雀方鬪，栖寒雞欲瘖。世情元自嬾，不是事違心。

小飲

莫笑放翁顛，歌呼覆酒船。雙螯初斫雪，珍鯨已披緜。寒雨連旬日，新橙又一年。更須重九到，作意菊花前。

作字

整整復斜斜，翻如風際鴉。書成半行草，眼倦正昏花。未辦倉盛筆，寧能錐畫沙。老夫端可媿，頭白不名家。

晝睡起偶賦

蝴蝶與蒙莊，頽然寓一牀。日隨香篆過，夢逐雨聲長。酒喜新鷄綠，橙如故歲黃。昏昏還隱几，誰識老龜堂。

小舟過吉澤效王右丞

澤園霜露晚，孤村煙火微。本去官道遠，自然人迹稀。木落山盡出，鐘鳴僧獨歸。漁家閑似我，未夕閉柴扉。

湖山雜賦

門前天鏡倒千峯，舍後菰蒲與海通。乘興出遊無遠近，煙波何處覓孤篷。

又

一生到處賈胡留，身屬官倉不自由。白首歸來更何恨，十年爛醉石帆秋。

又

東西相望兩湖橋，來往無時一畫橈。買酒每尋村市步，衰蔬時就野僧寮。

又

不到梅山二十霜，望中常似隔他鄉。一杯甕粟紗燈下，最憶初寒宿上方。梅山寺，與嚴廬南北相望，無二十里，然不到最久。

又

煙中一棹小江秋，憶上牛頭倚寺樓。今日籬邊殘照裏，却從西北望牛頭。

太息

早歲元于利欲輕。但餘一念在功名。白頭不試平戎策。虛向江湖過此生。

又

書生忠義與誰論。骨朽猶應此念存。砥柱河流僂掌日。死前恨不見中原。

又

自古才高每恨浮。偉人要是出中州。卽今未必無房魏。埋沒胡沙死卽休。

又

關輔堂堂墮虜塵。渭城杜曲又逢春。安知今日新豐市。不有悠然獨酌人。

學書

九月十九柿葉紅。閉門學書人笑翁。世間誰許一錢直。窗底自用十年功。老蔓纏松飽霜雪。瘦蛟出海擎虛空。卽今譏評何足道。後五百年言自公。

晚興

壯遊車轍遍天涯。晚落農桑不自知。許國雖堅身遽老。讀書未倦眼先衰。雲深嶺路樵歸晚。雨細江亭渡發遲。一事猶堪慰孤寂。錦囊傾倒有新詩。

秋晴見天際飛鴻有感

新晴天宇色正青。羣鴻高蹇在冥冥。兒童相呼共仰視。我亦扶杖來中庭。豐年到處稻梁滿。胡不暫下栖沙汀。應須江海寄曠快。肯爲霜雲差飄零。書生可笑不自喜。憔悴久翦籠中翎。鷗波萬里每媿杜。鶴化千載知非丁。風前哀號漫激烈。月下孤影常玲瓏。詩成欲寫復嬾去。誦似溪友聲泠泠。

初寒獨居戲作

開穀一作蠶得紫栗。帶葉摘黃甘。獨臥維摩室。誰同彌勒龕。宗文樹雞柵。靈照挈蔬籃。一段無生話。燈籠可與一作自可談。

夢觀牡丹

忘却晨梳滿把絲。棟花嫌不似臙脂。起來一笑看清鏡。惟插梨花卻較宜。

書喜

水際柴荆鍵不開。野人相覓漫敲推。寒雅陣黑疑雲過。老木聲酣認雨來。酒價日低常得醉。官租時辦不勞催。平生未省如今樂。却笑傍觀誤見哀。

又

今年端的是豐穰。十里家家喜欲狂。俗美農夫知讓畔。化行蠶婦不爭桑。酒坊飲客朝成市。佛廟村伶夜作場。身是閑人新病愈。賸移霜菊待重陽。

又

滿川秋穫重頰肩。拾穗兒童擁道邊。夜夜江村無吠犬。家家市步有新船。奪攘不復憂山越。安樂渾疑是地仙。惟有衰翁最知達。避胡猶記建炎年。

小飲罷行至湖塘而歸

社酒真如粥面濃。朱顏頃刻換衰容。霜輕已覺樹搖落。雲起始知山疊重。梅市魚歸衝兩棹。寶林人定隔成鐘。此翁大似遊僧樣。爐煖窗深又過冬。

病雁利祿將滿幸蠱支朝夕益不敢復有請而作是詩

蘆洲有病雁。雪霜摧羽翰。不辭道路遠。置身湖海寬。稻梁亦滿目。鳴聲自辛酸。我正與此同。百憂雙鬢殘。東歸忽十載。四忝待祠官。雖云幸得飽。早夜不敢安。乃知學者心。羞愧甚飢寒。讀我病雁篇。萬鍾均一簞。

澤居

澤居僅足不求餘。曠快真同縱壑魚。平日酷憎蠅附驥。暮年肯作鶴乘車。齒搖但羨嶮山芋。眼纏惟觀胃監書。此際自應遷往絕。本無心與俗人疎。

秋穫歌

牆頭累累柿子黃。人家秋穫爭登場。長碓擣珠照地光。大甌炊玉遠村香。萬人牆進輸官倉。倉吏鬻冷不暇嘗。訖

事散去喜若狂。醉臥相枕官道傍。數年斯民阨凶荒。轉徙溝壑殍相望。縣吏亭長如餓狼。婦女怖死兒童僵。豈知皇天賜豐稔。畝收口鍾富萬箱。我願鄰曲謹蓋藏。縮衣節食勤耕桑。追思食不饜糟糠。勿使水旱憂堯湯。

戊午重九

朋舊相望天一涯。登高結伴只鄰家。秋風自欲吹紗帽。衰鬢何曾泥菊花。藥市神仙思益部。鮓盤節物記京華。自憐病後歡悰薄。小醉歸來日未斜。

重九懷獨孤景略

昔逢重九日。初識獨孤君。竝轡洮河馬。聯詩劍閣雲。已悲吳蜀遠。更歎死生分。安得持卮酒。澆君丈五坟。

晨鏡

晨起覽清鏡。有叟鬢已皤。馘黃色類梔。面皺紋如鞞。熟視但驚歎。初不相誰何。久乃稍醒悟。舉手自摩挲。與汝周旋久。流年捷飛梭。生當老病死。求脫理則那。切勿彊撐拄。據鞍效廉頗。惟須勤把酒。暫遺衰顏醜。

秋霽遣懷

陸生少日心膽壯。萬里憑陵寄疎放。玉關曾誓馬草裏。滄海豈憂魚腹葬。人生富貴本細事。釣築逢時俱將相。正令不遇亦何慊。藥鑊丹爐老青嶂。今年秋晚苦多雨。三十六溪新綠漲。極知世事不足論。霽日小舟行可榜。

屏迹

昔者航濤江。雲山迎我東。擊楫誓江神。永託冥冥鴻。十年桑榆暖。萬事馬牛風。邇來愈屏迹。庭戶深蒿蓬。就甕挹新醅。傍畦擷晚菘。鄰曲或念我。小鮮亦時供。喟然撫几歎。恨今已龍鍾。向使早十年。何愧柴桑翁。

初寒

今日霜露冷。凜然悲暮秋。垂帷跨微火。發篋出輕裘。徂歲逝將換。殘生愈覺浮。一杯還自閱。小獵記梁州。

風雨

風雨從北來。萬木皆怒號。入夜殊未止。聲亂秋江濤。渺然老書生。白頭臥蓬蒿。閉門不敢出。裂面風如刀。鄰人閤我寒。牆頭過濁醪。時哉一昏醉。新橙宜蟹螯。

龜堂自詠

龜堂一老翁。短褐立秋風。時過同籬菊。身衰似井桐。新霜萬瓦白。朝日數櫺紅。且復尋書卷。悠然度歲窮。

又

采藤持織履。剝楮治爲冠。看劍心空壯。騎驢骨本寒。病多辭酒伴。老甚解祠官。予十月奉祠歲滿。不復敢請。賴有扁舟在。秋濤萬里寬。

閑居初冬作

香椀蒲團又一新。天將閑處著閑身。東窗換紙明初日。南圃移花及小春。婦女晨炊動井臼。兒童夜誦聒比鄰。早知閭巷無窮樂。悔不終身一幅巾。

病中排悶

面骨崢嶸鬢雪新。承平版籍有遺民。予生於宣和中。心雖願繼無傳學。力不能支已廢身。開卷眼昏如隔霧。擁爐肺渴欲生塵。老龐亦有兒孫念。付與天公不問人。

季秋已寒節令頗正喜而有賦

霜降今年已薄霜。菊花開亦及重陽。四時氣正無愆伏。比屋年豐有蓋藏。風色蕭蕭生麥隴。車聲碌碌滿魚塘。老夫亦與人同樂。醉倒何妨臥道傍。

卷二十八

秋懷

形骸歲歲就枯朽。意氣時時猶激昂。永遠浮鷗方浩蕩。霜高殘菊更芬芳。人皆有舌是非在。劫未成灰時世長。三百里湖行自復。子孫努力事耕桑。鏡湖廢百七十餘年。故吾鄉多凶。會有復之者。

吳體寄張季長

九月十月天雨霜。江南劍南途路長。平生故人阻攜手。萬里一書空斷腸。人生彊健已難恃。世事變遷那可常。兩

家子孫各長大。他年窮達毋相忘。

嘲畜貓

甚矣翻盆暴。嗟君睡得成。但思魚饜足。不顧鼠縱橫。欲騁銜蟬快。先憐上樹輕。胸山在何許。此族最知名。俗言貓爲虎舅。教虎百爲。惟不教上樹。又謂海州貓爲天下第一。

立冬日作

室小財容膝。牆低僅及肩。方過授衣月。又遇始裘天。寸積篝爐炭。銖稱布被綿。平生師陋巷。隨處一欣然。

初冬

志士逢秋已自傷。老人況復惜年光。正看鏤碓春粳滑。又見山坡下麥忙。桐落井牀多槁葉。菊殘衫袂尙餘香。讀書有課真當勉。剩貯明膏伴夜長。是日方買曲。

醉題

生來避世傲公卿。海內無人識姓名。九節筇邊秋萬里。長明燈下雨三更。心安白髮何勞掃。藥熟黃金固可成。只待蓬壺賦詩罷。卻來京洛看昇平。

新作火閣

旋設篝爐下紙簾。樂哉容膝似陶潛。囊中佩藥無時服。架上堆書信手拈。似玉秋菰殊未老。如雲宿麥不須占。掃空祠祿吾何欠。陋巷簞瓢易屬厭。祠祿止此月。

又

山路霜清葉正黃。地爐火煖夜偏長。中安菹蔞膨脗鼎。傍設安禪曲肱牀。木槁不知年自往。雲閑已與世相忘。更闌坐穩人聲靜。時聽風簾響暗廊。

舍北行飯

蔓絡疎籬草滿塘。飽嬉聊復步斜陽。一霜驟變千林色。兩犢新犁百畝荒。野寺僧殘尙鐘鼓。官堤舟過見帆檣。歸來笑補空囊課。寒日誰知亦自長。

遣興

轍迹當年遍九州。晚歸始解臥林丘。愛身每戒玉抵鵲。養氣要如刀解牛。柔艣搖殘天鏡月。短筇領盡石帆秋。儘言未辦常扃戶。竟是吾身得自由。

又

出任纔堪斗大州。初歸便擬築糟丘。虛名大似月蟾兔。榮路久如風馬牛。唧唧悲蛩常弔夜。蕭蕭蠹葉更禁秋。靜觀世事頻與歎。千載前時有許由。

舟中

拖邊潮水落還生。篷底寒燈滅復明。約束長年牢繫纜。報人風雨有鬪鳴。

又

蕭蕭風雨小江秋。不是愁人亦合愁。忽聽疎鐘知寺近。笑尋沙路上牛頭。

又

龕山古戍更漏聲。白塔小市燈火明。六十年間幾來往。依然惻愴路傍情。

兩夜感舊

兩來猛打窗。燈暗猶照壁。老人耿不寐。撫事悲夙昔。風生桔柏渡。馬病金牛驛。裊枝猿下飲。登樹熊自擲。危巢窺鵲栖。深雪見虎跡。至今清夜裏。猶想嶓山碧。廢棄謝功名。老疾輟行役。賦詩雖不工。聊用慰今夕。

夜聞落葉

我行出柴門。初喜春草生。俛仰幾何時。落葉終夜聲。嗟我日益老。抱疾況未平。晨興就盥櫛。顧亦彊支撐。齋中有兩童。熟視不能名。定非張睢陽。大笑頽冠纓。死至人所同。此理何待評。似有一可恨。不見復兩京。

閉門

閉門高臥鏡湖傍。元自無閑可得忙。泛罷杯觴餘菊苦。玩殘指爪帶橙香。燈昏共度空階雨。蛩冷偏依丈室牀。不待衰年宦情盡。未來如雁到衡陽。

祠祿滿不敢復請作口號

今年高謝武夷君。飯豆羹藜亦所欣。參透莊生齊物論。掃空韓子送窮文。心如脫筭奔林鹿。迹似還山不雨雲。猶幸此身強健在。鄉鄰爭看布襦裙。

又

祠庭入載竊榮名。一飽心知合自營。牘後落銜便手卷。月頭鐫俸喜身輕。弊衣不補惟頻結。濁酒難謀且細傾。賴有東臯堪肆力。比鄰相喚事冬耕。

又

白首還山不自存。天書四降海邊村。慚非故將前侯比。誤辱優賢養老恩。龜壽自應能食氣。鶴歸那得更乘軒。從今再草公車奏。惟有挂冠神武門。

過鄰家

扶杖過吾鄰。相誇自在身。年豐稱貸少。酒賤往來頻。羣散雞歸柵。聲喧雀噪囷。丁寧語兒子。切勿厭沉淪。

舍北野望

短景妨遊興。長歌慰作勞。葉凋西域近。水落北橋高。病每隨時劇。衰難與世鏗。旗亭新釀美。萬事一秋毫。

又

斷壠圍蔬圃。枯桑繫釣查。經行橋獨木。佇立路三叉。野卉棲孤蝶。平川起亂鴉。搯筇無定處。興盡卽還家。

又

溪徇通西崦。山蹊繚北村。殘霞明水面。落葉擁籬根。野父編龍具。樵兒習兔園。吾今井蛙耳。敢復慕鰲鯤。

又

早歲遭逢異。中年促召頻。馳驅猶許國。臥起已須人。藥石三秋病。風波萬里身。籬門殘照裏。慘淡易傷神。

書感

常記當年賦子虛。公卿交口薦相如。豈知鶴髮殘年叟。猶讀蠅頭細字書。出處幸逃千載笑。功名從負此心初。荒

園落葉紛如積。日暮歸來自荷鋤。

冬夜爐邊小飲

擁爐可使曲身直。飲酒能回槁面紅。若使金丹真入手。飛騰亦在立談中。

龜堂獨酌

幅巾蕭散餞餘齡。江左諸賢可乞靈。護枕小屏圖紫閣。映窗矮卷寫黃庭。曠懷與世元難合。幽句何人可遣聽。一酌蘭溪遺萬事。時看牆底臥長瓶。偶得蘭溪十餘樽。清醇醲烈殆不可名。

又

一榼蘭溪自獻酬。徂年不肯爲人留。巴山頻入初寒夢。江月偏供獨夜愁。越石壯心雞喔喔。子卿歸信雁悠悠。天生我輩初何用。病骨支離又過秋。

冬夜作短歌

飢鼠窺殘燈。寒犬踏枯葉。小室擁燎爐。清笳下危堞。老人素多疾。舉動常畏怯。衣裘視寒煖。日夜自調燮。食必按本草。下箸未嘗輒。體安疾自去。藥石無此捷。敢學李輕車。灞亭夜遊獵。況如馬新息。萬里聽鳶跼。欲求神氣住。先戒事物撻。寧爲子光瘡。不效喬夫喋。明晨一杯粥。跌坐橫白氈。無魚何足道。爲爾歌長鉞。

病愈

倦榻呻吟每自哀。占蓍來告一作吉出餘災。自能洗研拂書几。時亦折花尋酒杯。久類寒蛟潛岫穴。忽如老馬噴風埃。霜晴爛熳東窗日。一笑山坡訪早梅。

自遣

枳籬茅屋枕孤峯。偃盡初來手種松。睡少未成千里夢。愁深先怯五更鐘。中天日月逢真主。數畝桑麻伴老農。世事古今誰料得。不堪陂水照衰容。

感舊

君不見竇中名士有李石。八月秋濤供筆力。初爲博士不暖席。晚補臺郎俄復斥。諸公熟睨亦太息。摧壓至死終

不惜生前何曾一錢直。沒後遺文價金璧。後之視今猶視昔。此事誠非一朝夕。山城舊廬暗荆棘。羸然諸孫守墳籍。撫孤我負朋友責。萬里詩成淚空滴。

又

君不見蜀師渾甫字伯渾。半身高臥葦頤村。才不得施道則尊。死已骨朽名猶存。文章落筆數千言。上友離騷下招魂。望之眉宇何軒軒。高談浩若洪河翻。范尹敬如綺與園。方飾羔雁登衡門。小人謗傷實不根。妄指拱璧求瑕痕。窮通在公豈足論。浮雲終散期陽曦。安得此老起九原。入贊國論蘇黎元。范至能帥成都。欲以遺逸起之。幕客有沮之者。遂不果。

寒雨中偶賦

鬢毛蕭颯齒根浮。徂歲翩翩肯暫留。窮巷多泥誰問疾。空階滴雨又經秋。自營可笑誇三窟。善守寧須築百樓。但使胸中機事盡。一樽隨處送悠悠。

又

暮年心事與誰同。到處飄然一病翁。斷夢淒涼燈影裏。殘詩零落雨聲中。莫驚顏鬢渾非昨。略數朋儕已半空。祠祿上還猶負媿。何功班綴冠仙蓬。予官視祕書監。

壽考如富貴

壽考如富貴。初亦不自知。邂逅偶不死。亦或至期頤。予少多疾恙。五十已遽衰。齒搖頰鬢白。蕭然蒲柳姿。俛仰忽二紀。臥病實半之。富貴不可求。壽亦豈汝私。萬事付自然。孰爲樂與悲。惟當老益學。易簪以爲期。

午飯

我望天公本自廉。身閑飯足敢求兼。破裘負日茆簷底。一椀藜羹似蜜甜。

又

民窮豐歲或無食。此事昔聞今見之。吾儕飯飽更念肉。不待人嘲應自知。

題王仲信畫水石橫幅

王郎書逼楊風子。薑亦憑陵蜀雨孫。豈是天公憎絕藝。一生憔悴向衡門。

治圃

槁蔓殘蕪滿幽圃。多具鉏耨課僮豎。非惟吾圃要翦除。亦恐爾輩成情窳。老桂盤壑飽風霜。修篁當軒弄煙雨。一松孤立信豪傑。兩槐對植如賓主。珍禽揀枝春欲動。蠹穴掃空吾甚武。靡蕪芽蘖已暗長。甘菊根芽亦潛吐。山薑潤蒲乃微草。露葉參差看仰俯。世間安得有遺才。位置要須令得所。

冬日感興十韻

霧雨天昏墜。陂湖地阻深。蔽空鴉作陣。暗路棘成林。有客風埃裏。頻年老病侵。夢魂來二豎。相法欠三王。舊憤開孤劍。新愁感斷砧。唐衢惟痛哭。莊舄正悲吟。瘦跨秋門馬。寒生夜店衾。但思全舊壁。敢冀訪遺簪。樓上蒼茫眼。燈前破碎心。長謠傾濁酒。慷慨壓層陰。

冬日出遊十韻

吳會寒常薄。冬深略未冰。荒郊觀雉鬪。大澤見魚騰。釣艇頻容借。籃輿漸可乘。有時穿密篠。隨處倚枯藤。金石秦遺刻。衣冠禹舊陵。叢祠祈臘雪。小市試春燈。問路鉏畬叟。爭橋乞供僧。踈狂違俗久。衰疾與年增。干祿雖知恥。懸車媿未能。陪官有微俸。醉髮任鬢鬢。

思蜀

園廬已卜錦城東。乘驛歸來更得窮。只道驪羅開道路。豈知魚鳥困池籠。石犀祠下春波綠。金雁橋邊夜燭紅。未死舊遊如可繼。典衣猶擬醉郵筒。

又

二十年前客錦城。酒徒詩社盡豪英。才名吏部傾朝野。意氣成州共死生。吏部郎宇文紹。奔衮自成州守字。文字震子友。廢苑探梅常共醉。遺祠訪柏亦俱行。即今病臥寒燈裏。欲話當時涕已傾。

又

譚侯才氣敵文園。國子監丞譚季壬德。日日銀鞍畫戟門。奇芻入神聞鬼泣。巨觥如海看黥吞。一官曾監能令

死。萬里銘旌忍更論。湖上秋來頻入夢。憑誰詞翰與招魂。

作雪

雪雲寒不動。林鳥噤無聲。病起衰何劇。囊空醉不成。中原亂方作。弱虜運將平。臺省多賢俊。常談媿老生。

又

荒村雪欲作。老叟病無聊。樹暝烏鳶集。茆深雉兔驕。溪灘觀趁渡。嶺路數歸樵。即死無它憾。終身負聖朝。

戲詠山家食品

牛乳抨酥淪茗芽。蠶房分蜜漬棕花。舊知石芥真尤物。晚得蕪蒿又一家。疎索鄉鄰緣老病。團樂兒女且喧譁。古人不下藜羹糝。斟酌龜堂已太奢。

耕罷偶書

新甌東臯畝一鍾。烏犍羸足事春農。灞橋風雪吟雖苦。杜曲桑麻與本濃。老大斷非金谷友。生存惟冀酒泉封。莫嘲野餉蕭條甚。箭茁葦絲亦粗一作且供。

兩夜

末路蕭條客子心。不堪徂歲更沉陰。低簷雨滴睡眠少。敗壁燈殘感慨深。不辦典衣謀盡醉。尙能擁鼻作微吟。交朋一散如天遠。試向今宵夢裏尋。

菴中晨起書觸目

山重水複怯朝寒。一卷窗間袖手看。朱膽長瓶列雲液。絳囊細字坼龍團。數峯移自侏儒國。一研來從黯淡灘。要識放翁頑鈍處。胸中七澤著猶寬。雲液揚州酒名。近淮帥餉數十尊。營道小山及劍硯。得自張季長。張仲鈞。適在案間。

又

暉暉初日上簾鉤。漠漠清寒透衲裘。雪棘並棲雙鵲暝。金環斜絆一猿愁。廉宣臥壑松楠老。王子穿林水石幽。戲事自憐除未盡。此生行欲散風漚。唐希雅畫鵲。易元吉畫猿。廉宣仲老木。王仲信水石。皆菴中所挂小軸。

又
賦形不使面團團。聳臍心知到骨寒。晏子元非枕鼓士。杜生那有切雲冠。時扶遷客桃榔杖。日厭詩人首稽盤。賴是平生憎阿堵。今年初解侍祠官。

又
初歸誓墓老鄉邦。手結茆茨近小江。北渚露霑行藥屐。東廂日射勘書窗。孤忠自信丹心折。萬事空成雪鬢雙。長媿宗人白崖老。贈行期我鹿門龐。予自成都召還。禱射洪白崖陸使君祠。使君以杜詩爲籀。予得全家隱鹿門之篇。

三山杜門作歌

我生學步逢喪亂。家在中原厭奔竄。淮邊夜聞賊馬嘶。跳去不待雞號旦。人懷一莛草間伏。往往經旬不炊爨。嗚呼亂定百口俱得全。孰爲此者寧非天。

又
高宗下詔傳神器。嗣皇御殿猶揮涕。當時獲綴鸚鵡行。百寮拜舞皆歔歔。小臣疎賤亦何取。卽日趨召登丹陛。嗚呼橋山歲晚松柏寒。殺身從死豈所難。

又
中歲遠遊踰劍閣。青衫誤入征西幙。南沮水邊秋射虎。大散關頭夜聞角。畫策雖工不見用。悲吒那復從軍樂。嗚呼人生難料老更窮。麥野桑村白髮翁。

又
晚入南宮典牋奏。濫陪太史牛馬走。忽然名在白簡中。一櫂還家傾臘酒。十年光陰如電雹。綠蓑黃犢從鄰叟。嗚呼古來翫麟例倚門。況我本自安丘園。

又
寬恩四賦仙祠祿。每忍慚顏救枵腹。五秉初辭官粟紅。一瓢自酌巖泉綠。天公乘除不負汝。宿疾微平歲中熟。嗚

呼字字細讀逍遙篇。此去八十有幾年。

老境

白髮短欲盡。人嗤心尙孩。埋盆池激灑。累瓦塔崔嵬。輒飯三春米。醇醪九醞醅。忽然拈筆起。記著早梅開。

又

今日霜殊重。衰翁老可憐。朝晡兩炊火。覆藉一牀氈。人客容稱疾。兒童不攪眠。雲開見殘日。更愛小窗妍。

記戊午十一月二十四夜夢

街南酒樓粲丹碧。萬頃湖光照山色。我來半醉躡危梯。坐客驚顧聞飛屐。長緇短帽黃絕裘。從一山童持藥笈。近傳老仙嘗過市。此翁或是那可識。逡巡相請或稽首。爭獻名樽冀餘瀝。我欲自言度不聽。亦復軒然爲專席。高談方縱驚四座。不覺鄰雞呼夢破。人生自欺多類此。撫枕長謠識吾過。

六經示兒子

六經如日月。萬世固長懸。學不趨卑近。人誰非聖賢。馬能龍作友。螭乃翁爲天。我老空追悔。兒無棄壯年。

舍北晚步

漠漠炊煙村遠近。萋萋健鼓墟西東。三叉古路殘蕪裏。一曲清江淡靄中。外物已忘如棄屣。老身無伴等羈鴻。天寒寂寞籬門晚。又見浮生一歲窮。

對酒

老子不堪塵世勞。且當痛飲讀離騷。此身幸已免虎口。有手但能持蟹螯。牛角挂書何足問。虎頭食肉亦非豪。天寒欲與人同醉。安得長江化濁醪。

夜坐求酒已盡喟然有賦

澹月微霜夜漏徂。披裘不睡附寒爐。清笳嫋嫋已三弄。殘火熒熒纔一銖。報國無期心欲折。讀書自力眼將枯。麴生作態年來甚。不受閑人折簡呼。

食粥張文潛有食粥說謂食粥可以延年予竊愛之

世人箇箇學長年。不悟長年在目前。我得宛丘平易法。只將食粥致神仙。

寒夜

堅冰塞川厚莫測。斷雁叫羣聲可哀。草圍小甕酒未熟。霜壓瘦枝梅不開。穉子忍寒守蠹簡。老夫忘睡畫爐灰。低頭就世吾所諱。千載伯鸞安在哉。

梅花

五十年間萬事非。放翁依舊掩柴扉。相從不厭閑風月。只有梅花與釣磯。

又

山村梅開處處香。醉插烏巾舞道傍。飲酒得仙陶令遠。愛花欲死杜陵狂。

又

一花兩花春信回。南枝北枝風日催。爛熳卻愁零落近。丁寧且莫十分開。

又

廣寒宮中第一仙。情深不礙韻超然。勸君莫作兒女態。但向花前傾玉船。

又

秭歸江頭煙雨昏。客舟夜繫梅花村。相逢萬里各羈旅。不待猿啼已斷魂。

又

青羊宮前錦江路。曾爲梅花醉十年。豈知今日尋香處。卻是山陰雪夜船。

三山卜居今三十有三年矣。屋陋甚而地有餘。數世之後當自成一村。今日病少間作詩以示後人。

印累累。綬若若。換君朱顏君不覺。冠如箕。劍掛頤。蒼頭廬兒笑君癡。不如短褐歸鄉舍。上畢租庸下婚嫁。橫陂引水蒔禾黍。高陸犁荒種桑柘。比鄰畢出觀夜場。老稚相呼作春社。雞爭春米茅簷底。犬吠行人槿籬罅。數椽幸可傳子孫。此地它年名陸村。藜羹一飽能世守。殊勝養牛井上尊。

又

再見封侯未爲快。一擲成盧安用再。世間得意固多矣。堪笑窮人事常敗。我生出仕四十年。寸進恰如船上塊。卽今臥病茅簷裏。回首窮通竟何在。荆山之下玉抵鵲。兩京春薺論斤賣。蘇秦煌煌佩六印。尼父栖栖厄陳蔡。玄傑笑官輒見思。東野出門常有礙。躬耕至老豈不佳。子孫當以吾爲戒。

南園觀梅

小嶺清陂寂寞中。綠梅歲晚與君同。高標賴有詩人識。絕豔真窮造物工。正喜參差橫夜月。又驚零落付春風。老諳世事寧多歎。身自人間一轉蓬。

歲盡苦寒

曉寒無賴透重裘。三日江雲暝不收。歲月推移吾輩老。交朋零落此生浮。東臯苦潦猶中熟。舊疾雖存亦小瘳。禹廟蘭亭俱在眼。剩沽春酒破春愁。

己未新歲

錢歲愁雖劇。迎年喜亦深。桃符帶草寫。椒酒過花斟。車馬久無迹。兒孫聊慰心。更欣春意早。處處有鳴禽。

歲首書事

東風入律寒猶劇。多稼占祥雪欲成。雲陰作雪彌旬。至開歲。雪意愈濃。明日戊初立春。猶可爲臘雪也。鬱壘自書誇腕力。屠蘇不至歎人情。今歲無餽屠蘇者。呼盧院落諱新歲。鄉俗歲夕聚博謂之試年。庚賈困兒童起五更。立春未明相呼賣春困。亦舊俗也。白髮滿頭能且健。剩隨鄰曲樂昇平。

又

扶持又度改年時。耄齒侵尋敢自期。中夕祭餘分餽餽。鄉俗以夜分畢祭享。長幼共飯其餘。又歲日必用湯餠。謂之冬餽餠。年餽餽。黎明人起換鐘馗。春盤未抹青絲菜。今年正月二日立春。壽學先酬白髮兒。聞道城中燈絕好。出門無日歎吾衰。客來多言府中今歲上元燈甚盛。

初春

元日人日來聯翩。轉頭又見試燈天。且欣一雪壓災瘴。不怕連陰咽管絃。陌上漸多酤酒舍。岸邊初理下湖船。紫

姑擬卜元無事。只問今春幾醉眠。

菴中獨居感懷

身愈龍鍾髮愈稀。流年冉冉迫殘暉。讀書十紙勤雖在。上樹千回事已非。仗馬曾鳴宜取斥。牧羝雖乳亦忘歸。餘生自笑知何似。萬里遼天老令威。

又

自閉菴門不點燈。情耕村叟罷參僧。一生已是膠黏日。投老安能夏造冰。頑面敢辭乾汝唾。蔬餐聊得曲吾肱。高春睡熟無多笑。那有禪師解放鷹。

又

無錢溪女亦留魚。有雨東家每借鹽。藜粥數匙晨壓藥。松肪一椀夜觀書。黃紬被暖閑無厭。白布衫長樂有餘。南陌東阡春事動。放翁作計未全疎。

戲作貧詩

垂老貧彌甚。虛教遇太平。甕閑無馬穴。釜冷有魚生。妾病常停織。兒飢屢輟耕。癡頑惟此老。未廢浩歌聲。

又

左券頻稱貸。西成少蓋藏。苦飢炊稻種。緣病賣桑黃。土焙憐煙煖。藜羹愛糝香。君看首陽叟。窮死亦何傷。

春日園中作

杏花開過尙輕寒。盡日無人獨倚闌。久別名山憑夢到。每思舊友取書看。塵埃幸已賒腰折。富貴深知欠面圓。老去逢春都有幾。一杯行復送春殘。

中春連日得雨雷亦應候

誰言白首意低摧。老子逢春亦樂哉。犁畔方吹社公雨。壠頭又轉阿香雷。睡餘支枕聽鶯語。醉裏題窗記燕來。更有山家堪喜事。吾孫上樹欲千回。德孫幼病足。今已行步健甚。

雨後微陰光景益奇復得長句

結轍軒車已掃空。揮犀談笑與誰同。日消淺醉閑吟裏。春在輕陰薄霧中。百尺遊絲喜風定。一雙新燕說泥融。天工只費須臾力。開遍東闌半丈紅。

春日小園雜賦

久矣雲霄鍛羽翰。小園聊得賦春寒。魯望有春寒賦。風生鴨綠紋如織。露染猩紅色未乾。不向山丘歎零落。且從兒女話團圓。人言麥信春來好。湯餅今年慮已寬。

又

市塵不到放翁家。繞麥穿桑野徑斜。夜雨長深三尺水。曉寒留得一分花。悶從鄰舍分春瓮。閑就僧窗試露芽。自
此年光應更好。日驅秧馬聽繰車。

簡鄰里

今年意味報君知。屬疾雖頻未苦衰。獨坐空齋如自訟。三舍法行時。嘗上書言事者。屏置一齋日自訟。小鑄殘俸
類分司。樂天詩。猶彼妻孥敬斷退。莫求致仕且分司。閑撐野艇漁蕩溼。亂插花醉帽欹。有興行歌便終日。逢人
那識我爲誰。

客叩門多不能接往往獨坐至晚戲作

貧舍久疎羅酒漿。客來不復倒衣裳。宦情已盡詩情在。世味無餘睡味長。紅練帶飛穿柳去。錦熏籠暖撲簾香。蕭
然自笑渾無事。漁唱聲中又夕陽。

園中偶題

綠衣繁絮味微丹。映葉穿枝立畫欄。莫戀主人驚不去。五陵年少有金丸。

又

春深無處不春風。數樹桃花乃爾紅。鶯蝶紛紛自常事。不應也著白頭翁。禽名。

又

憶向彭州取牡丹。蠟封馳騎露初乾。如今歷盡人間事。縱有姚黃亦嬾看。

又
九日春陰一日晴。不堪風駕浪花生。畫船欲解還歸臥。寂寂窗扉聽鳥聲。

北窗偶題

兩叢香百合。一架粉長春。堪笑鸚鵡老。歡然不記貧。

又

曉晴林鵲喜。晝暖蜜蜂喧。我老詩情盡。逢春亦一言。

又

簾外燕翩翩。歸時在社前。不辭飛渡海。來看賽豐年。

又

煙波兩鷓鴣。宜爲放翁來。菰米猶能給。蒼顏得屢開。

沈園

城上斜陽畫角哀。沈園非復舊池臺。傷心橋下春波綠。曾是鶯鴻照影來。

又

夢斷香消四十年。沈園柳老不吹綿。此身行作稽山土。猶弔遺蹤一炷然。

卷二十九

戲贈園中花

橫風疾雨爲花厄。霽日暄風又不禁。我欲小施調變手。酌中寒暖半晴陰。

春思

兀兀治蠶酒未醒。霏霏潑火雨初晴。愁看入戶桃花片。閑聽爭巢燕子聲。百疾侵陵成老大。一春轉盼又清明。蘭亭禹廟彈如昨。回首兒時似隔生。

贈燕

燕來我何喜。感此中春時。燕去亦何有。無奈凋年悲。四序如循環。萬物更盛衰。我亦寓斯世。如客會當歸。驪車已在門。戀戀終何爲。達人付無心。欣厭兩俱非。豈有天壤間。會合無別離。對花不爛醉。燕子笑汝癡。

兩閣示兒子

東吳春雨多。略無三日晴。濛濛平野暗。淅淅空階聲。百花雨中盡。三月未聞鶯。重裘坐奧室。時序真強名。亦欲借臚出。泥淖沾衣纓。撫事每累歎。濁醪聊獨傾。景運今方開。關輔一日平。我家本好疇。灞澹可躬耕。買酒新豐市。看花下杜城。會當與汝輩。藉草作清明。

讀晉書

諸公日飫萬錢廚。人乳蒸豚玉食無。誰信秋風雒城裏。有人歸棹爲蓴鱸。

春晚苦雨

垂老臥村墅。餘寒欺病身。雞猶未忘旦。雨欲不容春。忽忽花時過。茫茫草色勻。蓴絲已上市。一飯未傷貧。

燕

春晝花明映柳纖。燕歸勝事始能兼。爭梁諱語驚幽夢。掠地斜飛避畫簾。雖食得蟲應自喜。巢泥經雨更頻添。去來要是知時節。常怪人嘲作附炎。

夜雨

空階雨聲夜轉急。壁竦窗破淒風入。一燈嫋嫋吹欲滅。老生獨傍書架立。取書欲讀輒復休。卻行出門搔白頭。市樓賣酒日千斛。衆人皆樂君胡憂。

寒食日九里平水道中

曉雨絲絲熟食時。泥深輟斷客行遲。亂雲重疊藏山寺。野水縱橫入稻陂。馬鬣松陰封舊隴。龜趺道左立新碑。扶衰此出知能幾。清淚臨風不自持。

春晴自雲門歸三山

乍行春野眼增明。漸減春衣體倍輕。人賣山茶先穀雨。鴉隨墻祭過清明。柳塘水滿雙鳧戲。稻隴泥深一犢行。晚到三橋泛舟去。掩關不復畏重城。

予數年不至城府。丁巳火後。今始見之。

陳迹關心已自悲。劫灰滿眼更增愁。山川壯麗昔無敵。城郭蕭條今已非。宰堵招提俱昨夢。祝融回祿尙餘威。故交減盡新知少。縱保桑榆誰與歸。

晚自北港泛舟還家

舒嘯蓬籠底。經行略約西。水深鵝唼草。雨細犢掀泥。醉倚乾坤大。閑知物我齊。衡門觸冠過。聊得賦幽棲。

書懷

羸馬常愁趁早朝。斥歸幸復侶漁樵。青黃未勝溝中斷。宮徵何殊爨下焦。心樂簞瓢同鼎食。身安山澤謝弓招。數間茅屋誰知處。煙雨濛濛隔斷橋。

初夏

淡靄輕颺入夏初。一窗新綠鳥相呼。出門易倦常歸臥。著句難工但自娛。花徑蝶閑無墮蕊。酒樓人散有空壚。閩川茶籠猶霑及。肺渴朝來頓欲蘇。閩中貢餘茶。初至。

小築

放翁小築寄江郊。屋破隨時旋補茅。暮看白煙橫水際。曉聽清露滴林梢。生來不啜猩猩酒。老去那營燕燕巢。目斷鹿門三太息。龐公千載可論交。

喜雨

幽人睡覺夜未央。四簷懸溜聲浪浪。樂哉甘澍及時至。九衢一洗塵沙黃。明朝鄰曲各驩喜。賽廟沽酒割猪羊。不勞輕輓蹋龍骨。轉盼白水盈陂塘。呼兒掃地設菅席。與汝一醉歌時康。豈惟磨鎌待收麥。小甑已覺吳粳香。

晨起

天公擇地養衰殘。著向桑村麥野間。曉色入簾初滉漾。幽禽窺戶已閒關。酒徒散去稀中聖。詩思衰來媿小山。一

炷沉煙北窗底。曲肱臥看。不勝閑。

五月初病體益輕偶書

世事紛紛了不知。又逢燕乳麥秋時。經年謝客常因醉。三日無詩自怪衰。乘兩旋移西嶮藥。留燈重覆北窗棋。但將生死俱拈起。造物從來是小兒。

己未重五時已請老

門楣東艾作神人。團糲盤中節物新。安用丹書襪赤口。風波雖惡不關身。

五月七日拜致仕勅口號

剡曲東歸日醉眠。冰銜屢忝武夷仙。思如長假容居里。官似分司不限年。一札疏榮馳厩置。兩兒扶拜望雲天。坐糜半俸猶多愧。月費公朝二萬錢。

又

黃紙東來墨未乾。孤臣恩許挂朝冠。小兒扶出迎門拜。鄰舍相呼擁路觀。白首奉身歸畎畝。清宵無夢接鷓鴣。從今剩把花前酒。憂患都空量自寬。

致仕後即事

休官拜命不勝榮。墨溼黃新照眼明。絡繹交親來作賀。牟腔酒擔擁柴荆。

又

救過鸞臺鳳閣來。清晨初拆驛書開。繡箱香案近門拜。身著朝衫止此回。

又

山村處處晴收麥。鄰曲家家午曬絲。正用此時身得謝。十分壽酒不須辭。

又

白髮三朝執戟郎。賜骸偶值歲豐穰。村東已種千畦麥。舍北新添百本桑。

又

老民一日脫朝衣。回首平生萬事非。赤脚婢沽村釀去。平頭奴馭草園歸。

又

一生病鶴寄樊籠。此去鴻冥萬里空。未論蓴羹與羊酪。新杭要勝太倉紅。

又

沉縣分已餞餘生。造物苛留未遣行。今日下牀還健在。一編來就小窗明。

又

清靜全勝欲界天。逍遙不減地行仙。衆中莫怪人嫌老。十五年前本命年。

又

一盃麥飯掩柴關。坐久不堪腰脚頑。拖得瘦藤閑信步。小橋東北望螺山。

又

閭門前客元無迹。諛墓中人本不工。猶有鄰僧能送米。未妨竊比玉川公。

又

歸耕所願雜民編。乍脫朝衫喜欲顛。但得吾兒能力穡。不請半俸更超然。

又

湘湖蓴菜勝羊酪。項里楊梅敵荔枝。八帙開來今過半。一杯引滿若爲辭。

又

不嫌雞瘦濁醪酸。草草杯盤具亦難。食指忽搖方竊喜。小兒來請賽鄱官。

又

甌中白飯出新春。瓮裏黃齋細芼葱。一飽坐兼南北美。始知造物念衰翁。

又

多事車前要入騶。老人惟與一藤遊。未教變化爲龍去。更踏人間萬里秋。

讀後漢書

貧春老子吾所慕。垂世文章寧在多。詩不刪來二千載。世間惟有五噫歌。

又

季英行年九十八。猶灌園蔬授六經。我欲圖之置齋壁。世無顧陸善丹青。

新裁道帽示帽工

故帽提攞二十霜。別裁要作退居裝。山人手段雖難及。老子頭圍未易量。花插露露那暇惜。塵侵鼠齧却須防。裹時嬾復呼兒問。一匣菱花每在傍。

新製道衣示衣工

良工刀尺製黃紵。天遣家居樂聖時。著上朱門應不稱。裁成烏帽恰相宜。客撐小艇招垂釣。僧掃虛窗約對棋。寶帶貂冠雖看好。定知不入野人詩。

兩翁歌

君不見塞上失馬翁。馬去安知不爲福。又不見新豐折臂翁。臂廢身全老鄉國。陸翁多難類兩翁。著書滿屋身愈窮。十年力耕遇水旱。老不能耕年始豐。人言翁窮可閔笑。霍食鶉衣天所料。翁方自謂實幸民。對人抱膝惟清嘯。卽今羣公佐明主。長劍拄頤來接武。向非老病又不才。縱欲歸休寧見許。

五月中連夕風雨氣候如高秋枕上有賦

擁被微吟短鬢秋。孤燈殘漏共悠悠。雨聲不貸三更夢。酒力寧禁萬里愁。身寄湖山鄰剡曲。心遊河嶽過關頭。世間可恨知多少。虛弊當年季子裘。

前詩感慨頗深猶吾前日之言也明日讀而悔之乃復作此然亦未能超然物外也

身世今如一老僧。病餘殘髮雪鬢髯。湖桑墟下漁舟雨。道樹山前野店燈。澗水潺湲供洗鉢。松風蕭颯入行牕。世人欲覓何由得。覲面相逢喚不應。

雨後過近村

賦罷淵明歸去來。紵衣桐帽一時裁。歲華新筍初成竹。天氣停雲未斷梅。江路醉歸常嵬峨。俗窗閑過卽徘徊。老人剩有凋年感。寄語城笳莫苦催。

銘座

天下本無事。庸人實擾之。吾身本無患。衞養在得宜。一毫不加謹。百疾所由滋。人生快意事。噬臍莫能追。汝願不少忍。殺身常在斯。深居勿妄動。一動當百思。每食視本草。此意未可嗤。賦詩置座右。終身作元龜。

致仕後述懷

彈冠紹興末。解組慶元中。灑灑危塗過。邯鄲幻境空。閑傳相牛法。醉挾鬪雞翁。衝雨歸來晚。山花滿笠紅。

又

壯歲江湖去。還朝六十餘。輩流俱已盡。勳業固知疎。遽走寧黔突。長閑祇荷鋤。如今更何憾。終作愛吾廬。

又

生理雖貧甚。胸中頗浩然。常辭問字酒。屢卻作碑錢。寧有駱堪鬻。尙無車可懸。小須梅雨霽。散髮醉江天。

又

昔自臺郎斥。頻年困負薪。四叨優老祿。十送故鄉春。衰瘁寧知活。蕭條敢厭貧。惟思逢樂歲。擊壤學堯民。

又

韋布還初服。蓬蒿臥故廬。所漸猶火食。更恨未巢居。叱叱驅黃犢。行行跨白驢。交親各強健。不必問何如。

又

店店容賒酒。家家可乞漿。白陂時雨足。綠樹午陰涼。病爲休官減。門緣謝客荒。今朝遇鄰叟。滿意說豐穰。

蝶

庭下幽花取次香。飛飛小蝶占年光。幽人爲爾憑窗久。可愛深黃愛淺黃。

戲贈酒榼

老去臥湖海。白髮朝朝新。賴有小道士。時來中聖人。形模雖簡古。風味絕清真。何當秋雨夕。傾倒見情親。

題菴壁

破屋颺颺雀鼠穿。邇來四壁愈蕭然。錢多孰謂可使鬼。人衆何嘗能勝天。秃尾驢遊雲外寺。長鬚奴引竹間泉。更餘一事猶當勉。讀易從今十絕編。

又

孤村寂寂潮生浦。小院昏昏雨送梅。蔬食一簞宜面槁。畏塗九折自心灰。古人骨朽有書在。今雨泥多無客來。散髮陽狂非寄傲。世間萬事本悠哉。

泛舟澤中夜歸

無窮煙海接空濛。秦望稽山醉眼中。虹斷已收千嶂雨。鶴歸正駕九天風。漁舟容與橫沙際。水鳥號鳴傍葦叢。興盡還家忽三鼓。半輪殘月斗杓東。

書嬾

此身不覺老侵尋。殘髮蕭蕭雪滿簪。那有新詩書觸目。亦無閑話問安心。塞垣西戍茫如夢。省戶東歸病至今。一嬾便知生世了。午窗酣枕敵千金。

晨起

清晨推枕起。盥面吾事足。豈無掃灑役。出市待歸僕。小殮亦已省。尙進藥盈掬。整衣登北堂。危坐巾一幅。徐行梧楸陰。愛此雨餘綠。幽鳥東山來。鱗鳴若琴筑。靜聽興未闌。穉子報飯熟。欣然往從之。寧計食不肉。

夜坐

仲夏苦鬱蒸。既夕熱未解。浴罷坐柴門。汲井痛掃灑。覆野天穹穹。垂地星磊磊。明河落無聲。北斗低飲海。三更缺月升。草木盡光彩。漁舟在何許。斷續聞欸乃。百憂集老境。坐歎雙鬢改。誰能擁雕戈。遺虜何足醜。

白樂天詩云倦倚繡牀愁不動。緩垂綠帶鬢低遠。陽春盡無消息夜合花前日。又西好事者畫之爲倦繡圖。此花以五六月開。山中多于茨棘人殊不貴之。爲賦小詩以寄感歎。

王室東遷歲月賒。兩京漠漠暗胡沙。繡牀倦倚人何在。風雨漫山夜合花。

蟬蟬行

蟬蟬至細能知時。春風磴雨占無靈。蜻蜓滿空乃不知。庭除一出無歸期。樂哉蜻蜓高下飛。蟬蟬未盡何憂飢。簷間蜘蛛亦伺汝。吐絲織網腹如鼓。

望霽

夜雨勿厭空階聲。天公欲作明朝晴。明朝甲子最畏雨。榜舟入市聞古語。今年雨暘俱及時。麥已入倉雲四垂。雨來不駛亦不遲。大點如菽細如絲。徐徐雲開見杲日。晚禾吹花早禾實。但令有米送官倉。豆飯藜羹甘似蜜。

久雨路斷朋舊有相過者皆不能進

今年風雨多。平陸成沮洳。吾廬地尤下。積水環百步。客從城市來。熟視卻復去。僮奴笑欲倒。繖屐知無路。計其各還家。對竈燎衣袴。嗟予久退藏。蓬灌生庭戶。誰如數子賢。裹飯肯來顧。清言雖不接。亦足慰遲暮。

散步至三家村湖桑埭西村名

人情簡朴古風存。暮過三家水際村。見說終年常閉戶。仍聞累世自通婚。罾船歸處魚殮笑。社瓮香時黍酒渾。記取放翁扶杖處。渚蒲煙草溼黃昏。

村東晚眺

興來信步過東陂。最愛村東物象奇。藤杖穿雲秋望處。葛衣露露夜歸時。殘聲淒斷蟬移樹。孤影荒寒鵲遶枝。自揣今年還得飽。一川新稻已離離。

又

飽食無營過暮年。筇枝到處一蕭然。清秋欲近露霑草。新月未高星滿天。遠火微茫沽酒市。叢蒲窳窳釣魚船。哦詩每恨工夫少。又廢西牕半夜眠。

露坐

星稀避月明。河白映天青。入夜蟬逾急。先秋葉自零。花枝栖霞蝶。簾罅度風螢。欲喚鄰翁坐。漁舟醉不醒。

又

落月無留照。殘河亦已傾。隆枝雙鵲暮。黏草一螢明。暑令忘三伏。涼颺逼五更。爲憐荷瀉露。故起繞池行。

致仕後歲事有望欣然賦詩

聖時恩厚賜餘生。日與鄉閭樂太平。已棄胡牀無長物。尙攜拄杖有同行。新裁烏帽人爭看。小摘青蔬手自烹。買得水車無用處。絕知造物相歸耕。

夜聞姑惡

湖橋東西斜月明。高城漏鼓傳三更。釣船夜過掠沙際。蒲葦蕭蕭姑惡聲。湖橋南北煙雨昏。兩岸人家早閉門。不知姑惡何所恨。時時一聲能斷魂。天地大矣汝至微。滄波本自無危機。秋菰有米亦可飽。哀哀如此將安歸。

村舍雜書

我本杞菊家。桑苧亦吾宗。種藝日成列。喜過萬戶封。今年夏雨足。不復憂螟蟲。歸耕始有相。所願天輒從。

又

中春農在野。蠶事亦隨作。手種臨安青。桑名可飼蠶百箔。累累繭滿簇。繹繹絲上篋。老子雖安眠。衣帛可無作。

又

舍北作蔬圃。敢辭灌溉勞。輪囷瓜瓠熟。珍愛敵豚羔。晨殮戒廚人。全項淨去毛。雖云發客笑。亦足慰老饕。

又

舍南種胡麻。三日幸不雨。晨起親按行。已見青覆土。窮人如意少。喜色漏眉宇。兒童勿惰偷。造物不負汝。

又

五月新麪成。六月甘瓜熟。作麪及夏時。火見金始伏。懸知桑落後。醅面釀如粥。再拜謝天公。無功叨美祿。予家釀用宛丘瓜麪法。

又

折蓮釀作醪。采豆治作醬。開歷揆日時。汲井滌瓮盎。上奉時祭須。下給春耕餉。咨爾後之人。歲事不可曠。

又

東山石上茶。鷹爪初脫講。雪落紅絲磴。香動銀毫甌。爽如聞至言。餘味終日留。不知葉家白。亦復有此不。

又

逢人乞藥栽。鬱鬱遂滿園。玉芝來天姥。黃精出雲門。丹苗雨後吐。綠葉風中翻。活人吾豈能。要有此意存。

又

我居大澤中。一舟不可無。短篷挾兩槳。疾若波中鳧。來往菰蘆村。按行瓜芋區。浮家亦可樂。何必愛吾廬。

又

軍興尙戎衣。冠帶謝褒博。禿巾與小裘。顧影每懷怍。及今反士服。始覺榮天爵。出入阡陌間。終身有餘樂。

又

讀書乃一癖。我亦不自知。坐書窮至老。更欲傳吾兒。吾兒復當傳。百世以爲期。君看北山公。太行尙可移。

又

爵祿九鼎重。名義一羽輕。人見共如此。吾道何由行。湖山有一士。無人知姓名。時時風月夕。遙聞清嘯聲。

避暑小飲熟睡至暮

桑落香浮檨葉杯。甘瓜綠李亦佳哉。虛堂頓解汗揮雨。高枕俄成鼻殷雷。靜聽風聲生檻竹。徐看日影轉庭槐。晚涼更動扁舟興。北渚紅蕖已半開。

又

槐影桐陰欲滿廊。綸巾羽扇自生涼。新蕪玉壘陳雙榼。平展風漪可一牀。馳騎遠分丹荔到。大盆寒浸碧瓜香。湖邊誰謂幽居陋。也愛迢迢夏日長。

夜坐庭中達旦

老矣常嗟去日遒。病來更覺此生浮。庭花無影月當午。簷樹有聲風報秋。足倦獨行驚蹀躞。髮稀久坐怯飈飈。雞號日出閑無事。又向清溪弄釣舟。

讀前輩詩文有感

我無前輩千鈞筆。造物爭功謝不能。已分文章歸委靡。可憐意氣尚憑陵。鸞旗廣殿晨排仗。鐵馬黃河夜踏冰。此事要須推大手。蟬嘶分付與吳僧。

自嘲

天公大度一何奇。養此無能老白癡。窗疾閑愁俱掃盡。美餐甘饍更無時。蛙鳴庭草何曾問。水半門扉亦不知。道似嬰兒猶有恨。小軒風月獨哦詩。

余讀元次山與瀼溪鄰里詩意甚愛之。取其間四句各作一首。亦以示予幽居鄰里。

峯谷互回映

北起成孤峯。東蟠作幽谷。中有十餘家。蘆箔映茆屋。土肥桑柘茂。雨飽麻豆熟。比鄰通有無。井稅先期足。煙中語。月。下。歌。相。續。兒。童。不。識。字。未。必。非。汝。福。張芸叟過鄭公故莊詩曰。兒童不識字。耕稼鄭公莊。

誰家無泉源

泉聲百步聞。泉脈高下通。潺湲亂雲外。屈曲明月中。八月稻登場。引之作機舂。羨流灌蔬畦。全家飽芥菘。洗沐及澣濯。蚤莫靡不供。斗水百憂寬。悲哉杜陵翁。

夾路多修竹

黃芴持覆屋。溪石運作垣。桑麻有餘地。家家養龍孫。春雷初起蟄。切玉供盤飧。一朝解風籜。飄颻蒼雲屯。我來倚拄杖。恐是辟疆園。千畝倘可致。封君何足言。

扁舟皆到門

千錢買輕舟。不復從人借。樵蘇晨入市。鹽酪夕還舍。豈惟載春秧。亦足穫秋稼。有時醉村場。老稚相枕藉。常侵落月行。不畏惡風嚇。無爲詫軒車。此樂予豈暇。

東山避暑用轉韻

避暑穿林隨所之。一奴每負胡牀隨。望秋槁葉有先隕。未暮赫日無餘暉。輪囷離奇澗松古。鉤輦格磔蠻禽悲。北巖竹間最慘慄。清獻倚石真忘歸。

喜雨六月二十七日

去年禹廟歸梅梁。今年黑虹見東方。巫言當豐十二歲。父老相告喜欲狂。插秧正得十日雨。高下到處水滿塘。六月欲盡日杲杲。造物已命摧驕陽。夕雲如豚渡河漢。占書共謂雨至祥。南山雷車載膏澤。枕上忽送聲淋浪。猛思濁酒大作社。更想紅稻初迎霜。六十日白最先熟。食新且領晨炊香。六十日白。稻名。常以六月下旬熟。

得故人書偶題

小築稽山下。狂歌剡曲傍。鄉鄰共雞黍。童穉學農桑。白首餘年促。青編後日長。此心誰復許。三歎付書囊。

喜雨歌

不雨珠。不雨玉。六月得雨真雨粟。十年水旱食半菽。民伐桑柘賣黃犢。去年小稔已食足。今年當得厭酒肉。斯民醉飽定復哭。幾人不見今年熟。

老學菴井

老學菴北井。六月寒如冰。大旱不涸雨不增。凜如人以常德稱。日濟千人不驕矜。置而不汲渠自澄。轆轤三丈青絲繩。對之已足涼肺膺。使我終日臥曲肱。顧謂此井真良朋。蕩除炎歊却塵垢。宜有鬼神來護守。嗚呼涇水一石泥數斗。正使逢時亦何有。

長歌行

我無四目與兩口。但在人間更事久。死生元是開闔眼。禍福正如翻覆手。消磨日月幾綑屐。陶鑄唐虞一杯酒。既非狗馬要蓋帷。那計風霜悴蒲柳。竈突無煙今又慣。龜蟬與我成三友。判知青史無功名。只用忍飢垂不朽。

七月二日夜賦

鄙人志趣在漁樵。四十年來負聖朝。本恥彈冠良易挂。未嘗刻印敢煩銷。盈盈微月生江渚。嫋嫋清笳下郡譙。衰病逢秋真一洗。井牀桐葉已先飄。

自述

二畝新蔬圃。三間舊草堂。病除身小健。秋近夜微涼。薄酒時醒醉。殘書半在亡。老懷常自笑。無事忽悲傷。

又

睡笑不知旦。氣衰先覺秋。有時浮小艇。隨意宿滄洲。未恨名風漢。惟求拜醉侯。更須多種竹。搔首送悠悠。

項羽

八尺將軍千里騅。拔山扛鼎不妨奇。范增力盡無施處。路到烏江君自知。

曹公

二袁劉表笑談無。眼底英雄不足圖。赤壁歸來應歎息。人間更有一周瑜。

卷四十

夜雨

濃雲如潑墨。急雨如飛鏃。激電光入牖。奔雷勢掀屋。漏濕恐敗書。起視自秉燭。移牀顧未暇。盆盎苦不足。不如卷茵席。少忍待其復。飛螢方得意。熠熠相追逐。姑惡獨何怨。菰叢聲若哭。吾歌亦已悲。老死終碌碌。

昔人有畫醉僧醉道士醉學究者皆見于傳記及歌詩中予暇日爲各賦一首

醉僧

殘雪覆枯顛。手扶短柳栗。送酒無蘇州。一醉未易得。青旗獵獵秋風吹。長瓶一吸亦足奇。但辨道傍常醉倒。不須解作藏真草。

醉道士

落托在人間。經旬不火食。醉後上江樓。橫吹蒼玉笛。大口如盆眼如電。九十老人從小見。曾攜一鶴過岳陽。滿城三日聞酒香。

醉學究

聖師飲百觚。儼然常齋莊。弟子習禮餘。兕觥躋公堂。至今遺風被洙泗。諸生雅歌老儒醉。衣冠簡朴未可輕。安知中無魯二生。

次季長韻回寄

野人蓬戶冷如霜。問訊今惟一季長。舊好自均親骨肉。新知何怪薄心腸。開書字字論疇昔。遣使年年有故常。萬念知公掃除盡。見衰底事獨難忘。

溪上小酌

岸幘出籬門。投竿俯溪瀨。魚聚忽千百。鳥鳴時一再。新涼社瓮香。亦有雉兔賣。歡言洗杯酌。又破止酒戒。

齋中夜賦

高居終日掩齋扉。幽事常多俗事稀。露重叢篁時自瀉。風高脫葉有先飛。秋衣漸製聞砧杵。社肉初分謝蕨薇。卻笑老身閑不得。一燈明滅亂書圍。

讀舊藁有感

我少則嗜書。于道本無得。譬如昌歛芟。乃自性一癖。老來百事廢。惟此尙自力。豈惟絕慶弔。乃至忘寢食。吟哦雜誦詠。不覺日既夕。文辭顧淺懦。望古空太息。世俗不可解。更爲著金石。收斂固已遲。雖悔終何益。君看老農夫。法亦傳后稷。持此少自寬。陶然送餘日。

新秋

秋氣入清笳。旗亭酒可賒。長歌穿小市。短帽插幽花。溪女留新蟹。園公餉晚瓜。誰知閑老子。解作醉生涯。

陳阜卿先生爲兩浙轉運司考試官時秦丞相孫以右文殿修撰來就試直欲首送。阜卿得予文卷擢置第一。秦氏大怒。予明年旣黜。先生亦幾蹈危機。偶秦公薨。遂已。予晚歲料理故書。得先生手帖。追感平昔作長句以識其事。不知衰癯之集也。

冀北當年浩莫分。斯人一顧每空羣。國家科第與風漢。天下英雄惟使君。後進何人知大老。橫流無地寄斯文。自憐衰鈍辜真賞。猶竊虛名海內聞。

書喜

乞得身歸鏡水濱。此生真作葛天民。眼明身健何妨老。飯白茶甘不覺貧。瓮酒又簞三斗熟。園花時報一枝新。挂

冠更作黃冠計。多事常嫌賀季真。

又

已向煙霞著脚深。世間萬事不關心。蒼攜鴉觜供鉏藥。新典魚須用買琴。井上引藤初滿架。地南移竹漸成陰。話行不必須今日。五百年間有賞音。

幽居

萬家水竹古山陰。揀得幽居愜素心。梁燕委巢知社近。井桐飄葉覺秋深。琴緣廢久塵常積。書爲開稀蠹漸侵。幸自杜門無一事。不須清夜感衣砧。

雜興

病養精神過服藥。貧知儉約勝營生。臯夔事業今何有。且與心君致太平。

又

東家飯牛月未落。西家打稻雞初鳴。老翁高枕葛幪裏。炊飯熟時猶鼾聲。

又

暮年常草睡爲祟。好事新分安樂茶。更得小瓢吾事足。山家風味似僧家。會召甫提幹。近送安樂茶來。

又

蛟鱷垂涎歷畏塗。如今歡喜去攜鋤。一生患難休回首。雅似元符會上書。

贈鷺

雪衣飛去莫匆匆。小住灘前伴釣篷。禹廟蘭亭三十里。相逢多在暮煙中。

贈鵲

爲梁星渚自何年。毛羽摧傷不怨天。知我齋餘常施食。翩然飛下北窗前。

東堂睡起

置身事外息吾黠。猶臥空堂一榻橫。簷影漸移知日轉。樹稍微動覺風生。每從山寺開經帙。間就園公辨藥名。若

論胸中淡無事。入珍何得望藜羹。

五鼓起坐待旦

睡覺初聞雞一鳴。披衣危坐待窗明。殘軀已向閑中老。癡夢猶尋熟處行。南北迢迢悲往事。古今莽莽歎浮生。伯倫一錫君休笑。冢象祁連亦已平。

功名

少年妄意慕功名。老眼看來一髮輕。金甲雖如朝邑尉。羊裘終媿富春生。連娟落月依山盡。寂寞寒潮蘸岸平。要識放翁新得意。蓼花多處釣舟橫。

搔首

玩畫無餘易。聞歌已盡詩。古人不可作。此理孰能推。白髮秋風裏。青燈夜雨時。初心竟當負。搔首歎吾衰。

小雨釣歸

雨點鳴叢葦。雲頭冒遠山。兒曹出籬望。老子榜舟還。濶入園畦裏。涼生窗戶間。秋陽方可畏。徙倚一開顏。

曉賦

八月江湖風露秋。時聞脫葉下梧楸。離離斗柄西南指。爛爛天河今古流。人語正謹過古埭。蠶桑墟。五鼓聞挽船聲。喧甚。角聲三弄下譙樓。百城已共豐年樂。一老猶懷卒歲憂。

急雨父老謂雲逆風則必用驗之信然

雲從西南興。風自東北至。老農占雨候。速若屈伸臂。亂點俄打窗。新涼已生袂。經旬苦肺渴。得此亦少慰。呼兒持故糲。買酒具一醉。薄言煮園蔬。雉兔未可識。

遣興

幾看人間歲月新。釣船猶繫鏡湖濱。會穿高帝朝元仗。卻作山陰版籍民。留病三分嫌太健。忍飢半日未全貧。早知畫繡能爲祟。翁子終身合負薪。

又

湖海元爲汗漫遊。誤思四領幔亭秋。掃空薄祿始無媿。閉上衡門那得愁。湯湫雪濤翻茗椀。火溫香縷上衣篝。牀頭亦有閑書卷。信手拈來倦卽休。

又

掃盡衣塵喜不勝。村居終日醉騰騰。閑投鄰父祈神社。戲入羣兒鬪草筋。幽徑有風偏愛竹。虛堂無暑不憎蠅。悠然又見江天晚。隔浦人家已上燈。

又

久矣微官絆此身。柴車歸老亦逢辰。阮咸臥摘孤風在。白墮閑傾一笑新。萬里馳驅曾遠戍。六朝涵養忝遺民。清閑卽是桃源境。常笑淵明欲問津。

讀林逋魏野二處士詩

君復仲先真隱淪。筆端亦自幹千鈞。閑中一句終難道。何況市朝名利人。

紙墨皆漸塌戲作

官庫誰能餉陟釐。漢宮無復賜險屨。不如掃盡書生事。閑伴兒童竹馬嬉。

讀隱逸傳

終南處士入都門。少室山人補諫垣。畢竟只供千載笑。石封三品鶴乘軒。

泛舟至東村

野水如天遠。漁舟似葉輕。颼颼風漸冷。淡淡月初生。沙際樵蘇路。籬間語笑聲。還家已薄暮。燈火照柴荆。

自詒

健忘閑何害。貪眠老正宜。本心惟泥酒。餘習略存詩。未廢春農業。猶堪幼學師。微官何所戀。請老五年遲。

野興

荷鋤通北澗。腹斧上東峯。秋水清見底。晴雲深幾重。擊擊傳社鼓。渺渺度樓鐘。歸覓村橋路。詩情抵酒濃。

讀書

平生愛客如愛書。力雖不逮意有餘。門前車馬久掃迹。老病又與黃卷疎。人情冷暖可無問。手不觸書吾自恨。今年入秋風雨頻。燈火得涼初可近。年過七十眼尙明。天公成就老書生。舊業雖衰猶不墜。夜窗父子讀書聲。

客有見過者既去喟然有作

又

永日安耕釣。餘年迫耄期。研朱點周易。飲酒和陶詩。帶箭歸飛鶴。搗牀不瞑龜。此生君看取。死是出門時。

秋陰

淡日披朝霧。輕雲結暮陰。菰蒲溪路暗。松竹草堂深。妙墨雙鉤帖。奇聲百衲琴。古人端未遠。一笑會吾心。

八月九日晚賦

薄晚悠然下草堂。綸巾鶴氅弄秋光。風經樹杪聲初緊。月入門扉影正方。一世不知誰後死。四時可愛是新涼。從今覓醉其當勉。酒似鵝兒破殼黃。

燕坐

赫日曛曛湧海門。黃流混混泝河源。功成一日書仙籍。鍊骨成金不足言。

村飲

不來東舍卽西家。野老逢迎一笑譁。試說暮年如意事。細傾村釀聽私蛙。

又

無念無營飽卽嬉。老翁真箇似嬰兒。昏鐘未動先酣枕。日上三竿是起時。

又

買來新兔不論錢。釣得鮮鱗細柳穿。野店渾頭更醇醖。一杯放手已醺然。

又

淡煙孤榜繫村橋。疊疊沙痕印落潮。最是一年秋好處。踏泥沽酒不辭遙。

秋雨益涼寫興

秋氣蕭蕭暑已歸。晚雲更送雨霏微。牀收珍簟敷菅席。筍疊纖絺換熟衣。遣醉縱橫馳筆陣。乘閑談笑解棋圍。出門未免流年歎。又見湖邊木葉飛。

耕米偶不繼戲書

仕宦不諧農失業。敗屋蕭蕭書數篋。藜羹不糝未足嗟。爨竈無薪掃枯葉。丈夫窮空自其分。餓死吾肩未嘗脅。世間大有乞墻人。放翁笑汝驕妻妾。

牧牛兒

溪深不須憂。吳牛自能浮。童兒踏牛背。安穩如乘舟。寒雨山陂遠。參差煙樹晚。聞笛翁出迎。兒歸牛入圈。與兒子至東村遇父老共語因作小詩

桑竹穿村巷。衡茅隔土垣。海氛成物象。秋氣肅川原。豆芋行將熟。雞豚亦已繁。豐凶歲所有。農事更深論。

微雨午寢夢憩道傍驛舍若在秦蜀間慨然有賦

吳中秋晚雨冥冥。自笑閑愁又爾馨。身世已歸南北陌。夢魂猶寄短長亭。濁醪可釀樽餘綠。明鏡無情鬢失青。賴有釣船堪送老。一汀鷗鷺共忘形。

晨起對鏡

雙鬢成絲高頰顛。曉窗臨鏡意茫然。朱顏豈是一朝去。暗鏤潛消五十年。

村思

揣分新辭祿。扶衰又度秋。已將窮博健。更賴學忘憂。船護煙陂鴨。欄歸草徑牛。作勞何以慰。茅店問新翁。

秋夜

倦叟投牀早。昏燈落燼頻。鵲翻驚缺月。犬吠逐行人。未喪詩書業。猶存老病身。菊花行可醉。作意插烏巾。

醉中書懷

既老心愈空。新涼體差健。登山每嗔扶。對案亦強飯。平生百事懶。惟酒不待勸。迨此桑落時。一醉適我願。羸然雲

水身。本非朱紫橙。少猶恥枉尺。老敢欺方寸。但令死瞑目。餘事無足論。不見鹿門翁。全家事潛遁。

次韻鄭盱眙見寄并簡其甥劉君

衣上空嗟京洛塵。故交半作白頭新。衆中初得見吾子。東觀已疑無若人。仗馬極知非久斥。沙鷗要時孰能馴。兩章英妙同時到。趙壹囊中却未貧。

書齋壁

平生憂患苦縈纏。菱刺磨成芡實圓。俗謂因折多者。謂菱角磨作雞頭。天下不知誰竟是。古來惟有醉差賢。過堂未悟鍾將覺。睨柱寧知壁偶全。自笑爲農行沒世。尙如鸞雀落空弦。

一老

太平一老醉騰騰。南陌東阡喜不勝。民力農桑家自足。士崇名節道方興。騎鯨仙去時猶遠。射虎歸來氣頗增。莫道幽棲交舊絕。月中亦有打門僧。

戲用方外語示客

紅粟青錢一掃空。蔗籬行賣學龐翁。身居本地風光裏。愁擲它方世界中。剩欲劇談明不二。誰能太息賞無同。踞牀一喝君聞否。三日猶應覺耳聾。

秋晚

西山破曉兩眉青。南浦無風一鏡平。食盡不容添鶴口。身閑且免負鷗盟。霜前草樹已無色。雨到菰蒲先有聲。只怪勝遊頻入夢。今朝蜀客話青城。故人范中立巨山自青城來見訪。

又

辭祿始知貧有味。杜門不覺老相催。寒鴉已占雁前到。黃菊猶須霜後開。團扇塵埃高掛壁。短檠書史亂成堆。羸軀自笑癡頑甚。撐拄新寒又一回。

又

世事無窮似奕棋。不如常采故山芝。蕭蕭雞犬三家聚。莽莽風煙十里陂。幸有濁醪從客醉。常憂黠鬼笑人癡。清

秋樂處君知否。庭下幽花漸可移。

次金溪宗人伯政見寄韻

道義流聞意已傾。豈知晚歲託齊盟。六經日月未嘗蝕。千載源流終自明。汝水家家書有種。吾宗世世士知名。讀君長句還增氣。俗耳那聞韶護聲。

新寒

碧蝶飛飛過短籬。山薑石竹有殘枝。誰知老子閑眠處。恰是新寒細雨時。

又

安石榴房初小坼。南天竺子亦微丹。新寒漠漠偏欺老。睡起無風怯倚欄。南燭草本。俗謂之南天竺。李端叔取以名僧軒。蓋用俗語也。

村鄰會飲

陸子白首安耕桑。樂事遽數烏能詳。長羅家家雪作麵。畫楫處處青分秧。迎荻船歸潮入浦。祈蠶會散月滿廊。有時鄰曲苦招喚。茅簷掃地羅壺觴。堆盤珍膾似河鯉。入鼎大羹勝胡羊。披縣黃雀麴糝美。斫雪紫蟹椒橙香。老人飽食可無患。摩挲酒瓮與飯囊。兒孫扶侍遞相送。笑語無間歌聲長。人間哀樂不可常。掠剩有鬼在汝傍。常憂水旱虞螟蝗。力行孝悌招豐穰。

試筆

烹葵飯豆飽還休。弄筆翻書歲又秋。靈府湛然如止水。擬將何地著閑愁。

又

紅絲玉斗紫毫銚。歲晚相從味更長。不似樂天歸老日。柳枝駱馬兩堪傷。

孤村

老寄孤村裏。悠然臥曲肱。算貧先放鶴。嫌鬧併疎僧。古戍高秋笛。寒窗半夜燈。平生羞詭遇。多獲豈吾能。

絕祿以來衣食愈不繼。小兒力圖之。殊未有涯。予謂不若痛節用。爾示以此詩。

予宿疾多已失去。獨氣痛時作賦詩自寬。

疾久難全去。扶持度歲年。垣牆完罅隙。匕筴禁芳鮮。漸減觀書課。常儲買藥錢。鄉人多不識。誰與問沉痾。

秋懷十首末章稍自振起亦古義也

皇天本無心。萬物各有時。飛鴻何預人。南翔每如期。仰看霜露墜。俯歎草木衰。英英籬下菊。秀色獨滿枝。豈無一樽酒。相與斟酌之。蓋老天所佚。行歌復何疑。

又

暑退財幾時。忽已迫霜露。西風一何厲。落葉紛滿路。老翁衰可笑。日夜念墮戶。衣裘先關懷。膏火亦當具。酒尤不可緩。傾聽糟牀注。供粲柿栗耳。何敢議雉兔。

又

兩滴大梧葉。風轉孤蓬窠。秋色固悽愴。二物感人多。日月行黃道。倏過如飛梭。大計百年間。貴賤俱銷磨。東家及西舍。更代哭與歌。若無杯中物。如此播落何。

又

身如行腳僧。放包卽爲家。家如道邊店。蕭然寄天涯。居室如小舟。風扉觸謳啞。坐傍陳琴書。庭下栽雜花。儉陋雖可笑。在我則已奢。何以善吾生。念念思無邪。

又

遇酒幸一醉。遇飯幸一飽。或遇空無時。豈復有他巧。鄉鄰哀其窮。叩戶餽麩麩。欣然出舍傍。菘韭青落爪。飢羸曾未起。吟諷已稍稍。袖手北窗前。枯腹困搜攪。

又

秋高天薄寒。夾衣已出笥。團團素紈扇。時至自當棄。明年機中練。與我亦何異。宮妾感物悲。此豈丈夫事。吾曹一出門。所遇皆有義。夷齊死千年。高風邈難嗣。

又
辟塵當以犀。濯纓當以水。龜堂一炷香。世念去如洗。人生天地間。太倉一稊米。哀哉不自悟。役役以至死。孰能從我遊。跌坐燔柏子。夜半清磬聲。悠然從定起。

又
改朔甫再宿。月見西南隅。纖纖一銀鈎。掛空疑有無。我行青楓岸。遠水浮雙鳧。新寒入短衣。感此風霜初。頗欲呼小艇。東村行芋區。衣薄且言歸。煙火望吾廬。

又
短蓑榜輕舟。時過野僧舍。長衫挂數珠。亦入法華社。平生無揀擇。生死均早夜。餘年猶幾何。久已付造化。常嫌樂天佞。卻肯退之罵。君看佛骨表。自是無生話。

又
我昔聞關中。水深土平曠。涇渭貫其間。沃壤誰與抗。桑麻鬱千里。黍林高一丈。潼華臨黃河。古出名將相。淪陷七十年。北首增慘愴。猶期垂老眼。一覩天下壯。

九月七日子坦子聿俱出。斂租穀雞初鳴而行。甲夜始歸。勞以此詩。
仲秋穀方登。螟生忽告飢。艱難糞一飽。俯仰事已非。貧糧助耕耘。客主更相依。一旦忽如此。欲語涕屢揮。共斂螟之餘。存者牛毛稀。吾兒廢書出。辛苦幸庶幾。夜半聞具舟。憐汝露濕衣。既夕不能食。念汝戴星歸。手持一杯酒。老意不可違。秋瘦酒味薄。食少雞不肥。頗聞吳中熟。多稼徹王畿。亦欲就飽處。無羽能奮飛。官富哀我民。榜笞方甚威。渠亦豈得已。撫事增歎歎。

醉題埭西酒家

陣陣新寒入布裘。偶乘小醉得閑遊。丹楓落日野橋晚。斷雁溼雲江路秋。馬得一鳴何恨斥。金經百鍊豈容柔。不知千載塵埃裏。更有吾曹強項不。

又

桑麻蒙豎不通鄰。就酒頽然一老民。遣客方眠那是醉。有衣可典未爲貧。曬翎斜日鷗來熟。印跡平沙雁到新。君看此間何境界。癡人猶說吐車茵。

秋晚

庭草猶殘綠。溪楓已半丹。誰知此翁健。又見一年寒。幻境槐安夢。危機竹節灘。如今渾過盡。摩腹且加餐。

省事

省事漸捐書。甘貧學藝蔬。心安閑夢少。病去俗醫疎。兀爾遊方外。超然到物初。此身猶是幻。況復愛吾廬。

晨起頗寒飲少酒作草數幅

衣食無多悉自營。今年真箇是歸耕。屏居大澤羣蠶息。乍得清寒百體輕。橋北潦收波淺碧。埭西霜近葉微頰。一杯弄筆元無法。自愛龍蛇入卷聲。

往事

海內橫流日。吾猶及建炎。衆醫雖共視。久疾固難痊。黠虜方觀釁。行宮未解嚴。時平逾五紀。話此涕常霑。

步至東莊

澤國寒雖晚。霜天已迫冬。麴花雪無際。稻米玉新春。身已風中葉。人方飯後鐘。兒能衰老子。努力事春農。

秋思

門巷蕭條秋色深。黃花始欲慰孤斟。久貧自笑不妨樂。過足固知非所欽。琴調已忘還漸省。詩聯未穩更常吟。吾兒西上無多日。安得相從老故林。時子虞將調官臨安。

又

日落江城聞擣衣。長空杳杳雁南飛。桑枝空後醅初熟。豆莢成時兔正肥。徂歲背人常冉冉。老懷感物倍依依。平生許國今何有。且擬梁鴻賦五噫。

讀退之人不知古今馬牛而襟裾之句有感

書生獨占世間癡。過計私憂無已時。知盡古今成底事。空將血淚向人垂。

病愈看鏡

鏡中稍復舊朱顏。一笑衰翁乃爾頑。三百瓮齏消未盡。不知更著幾年還。舊傳貧士死。見陰吏。爲言當環魂。有三百瓮齏祿料未盡。

讀韓致光詩集

渺莽江湖萬里秋。玉峯老子弄孤舟。猶勝宿直金鑿夜。凜凜常懷潑酢憂。

逆旅書壁

驢鞍懸酒榼。僮背負衣囊。但說市朝變。不知岐路長。下程先施藥。拂榻靜焚香。明旦又西去。河橋秋葉黃。

又

騎驢萬里行。歲一過秦城。下杜黃春酒。新豐聞曉鶯。綠槐新巷陌。白骨幾公卿。欲覓曲江水。連雲禾黍生。

初寒老身頗健戲書

一身百病老難支。病減身輕偶此時。窗暖不妨聊假寐。囊空久已罷招醫。山爐嶮絕香生岫。鑿研坡陀墨滿池。箇裏生涯君莫厭。癡人至死不曾知。

又

過雁聲悲落葉稠。孤村景物更禁秋。窮諳客路風塵惡。老判人間歲月遒。酒號賢人真古語。疾爲豎子豈吾憂。山房幸有初寒備。且傍篝爐擁褐裘。

子龍求煙雨軒詩口占絕句

烏柏迎霜已半丹。哦詩終日合憑欄。霜高木落應尤好。長挂西窗更怕寒。

又

規模正似釣魚菴。把酒纔容客二三。若比東偏參倚室。此中猶自覺耽耽。參倚。蓋之率書室名也。

居室甚隘而藏書頗富。率終日不出戶。

掩關小室動經旬。蠹簡如山伴此身。百億須彌藏粒芥。大千經卷寓微塵。危機已過猶驚懼。惡夢初回一欠伸。此段神通君會否。聽風聲雪待新春。

又

椰子微軀有百窮。平生風際轉枯蓬。豈知蟬腹龜腸後。更寄蜂房蠹穴中。學儉久判囊不糝。憚煩惟欲寐無聰。積書充棟元無用。聊復吟哦答候蟲。

無酒歎

不用塞黃河。不用出周鼎。但願酒滿家。日夜醉不醒。不用冠如箕。不用印如斗。但願身強健。朝暮常飲酒。造物不少恕。虐戲逐段新。坐令古銅槥。經月常生塵。平生得酒狂無敵。百幅淋漓風雨疾。造物欲以醒困之。此老醒狂君未知。

讀書

古人已死書獨存。吾曹賴書見古人。後之視今猶視古。吾書未泯要有取。賈生痛哭漢文時。至今讀之有餘悲。魏徵嘻笑封德彝。生亦豈賣絳灌知。窮秋風雨臥孤館。萬世悠悠百年短。垂死成功亦未晚。安知無人歎微管。

醉賦

霜楓照茅屋。露菊插紗巾。今古無窮事。江湖未死身。直令依馬磨。終勝拜車塵。我亦輕餘子。君當恕醉人。

掩扉

久臥空山獨掩扉。迂疎不恨世相違。新霜巷陌烏鳥樂。小雨園畦菘芥肥。驥病極知當伏櫪。鷗閑誰與共忘機。一編蠹簡從吾好。又見西窗掛夕暉。

六經

六經聖所傳。百代尊元龜。諄諄布方冊。一字不汝欺。抱書入家塾。自汝兒童時。老乃幸不驗。愚哉死何悲。

又

秦人燔六經。非與經爲仇。方其勇決時。亦爲子孫謀。斂金鑄巨人。豈復畏鉏耰。千載惡名在。尙與黃河流。

舟中作

沙路時晴雨。漁舟日往來。村村皆畫本。處處有詩材。炊黍孤煙晚。呼牛一笛哀。終身看不厭。岸幘興悠哉。

秋晚

門巷清如水。情懷淡似秋。詩吟唐近體。談慕晉高流。託命須長鑱。浮家只小舟。江南煙兩岸。何處不堪留。

又

木落寺樓出。江平沙渚生。牛羊下殘照。鼓角動高城。寒至衣猶質。憂多夢自驚。羣胡方鬪穴。河渭幾時清。

西窗獨酌

却掃衡門歲月深。殘骸況復病交侵。平生所學爲何事。後世有人知此心。水落枯萍黏破塊。霜高丹葉照橫林。一

樽濁酒西窗下。安得無功與共斟。

冬初薄霜病軀益健欣然有賦

古服追隨野老歡。豎裁布褐縮縫冠。霜清頓洗肺肝熱。木落更知山澤寬。斗酒敢言嫌魯薄。杯羹聊得學吳酸。一

貧自是書生分。忍媿看人却似難。

一錢

萬事紛紛不足論。滿庭枯草閉柴門。一錢留得終釜糲。持買饑蝗引福孫。

燈下讀書戲作

吾生如蠹魚。亦復類熠燿。一生守斷簡。微火寒自照。區區心所樂。那顧世間笑。閉門謝俗子。與汝不同調。

遊近山

羸病知難賦遠遊。尙尋好景送悠悠。亂山孤店雁聲晚。一馬二童溪路秋。掃壁有僧求醉墨。倚樓無客話清愁。殘

年敢望常強健。到處臨歸爲小留。

示兒子

祿食無功我自然。汝曹何以報明時。爲農爲士亦奚異。事國事親惟不欺。道在六經寧有盡。躬耕百畝可無飢。最親切處今相付。熟讀周公七月詩。

寄溧陽周丞文璞周寄詩卷殊可喜

滿握珠璣何自來。晴窗初喜拆書開。信哉天下有奇作。久矣名家多異才。隔閭經年如許進。超騰它日若爲陪。山陰道上霜天好。安得相從賦早梅。

旅思

支遁山前看月明。葛洪井上聽松聲。廢亭草滿青驂健。野店燈殘寶劍鳴。萬事竟當歸定論。寸心那得媿平生。悠然酌罷無人語。寄意孤桐一再行。

東村步歸

野渡霜風冷。前簷夕照明。催科醉亭長。聚學老書生。山果紛丹漆。村醪任濁清。路回家忽近。柳外小橋橫。

又

風陣鴉翻黑。霜林葉半丹。筋骸欣小健。裘褐戒初寒。代步雞栖足。充飢鶴料寬。平生自如許。況已掛吾冠。

觀方外書

司馬遺書有坐忘。顛翁止觀略相當。龜堂閉戶常終日。時得相從一炷香。

午睡初起

曲腰桑上午雞鳴。喔喔還如報五更。睡起展書摩病眼。油窗喜對夕陽明。

又

舍中未報壓新醅。閑弄流塵榭葉杯。得酒固佳醒亦好了。無一事到靈臺。

暮秋遣興

改盡朱顏白盡頭。杜門亦復弊貂裘。斷鴻影外玉關月。病驥嘶中青海秋。孤坐向空書咄咄。閑吟隨處送悠悠。如虹壯氣終難豁。安得雲濤萬里舟。

又

平生南地慣羈遊。放浪常同不繫舟。鼉作夜風經沌口。鶴鳴秋雨宿航頭。方傾意氣輕秦俠。俄困悲傷類楚囚。買屋數間聊作戲。豈知真用作菟裘。

種蔬

老翁老去尙何言。除却翻書卽灌園。處處移蔬乘小雨。時時拾礫繞頽垣。江鄉地暖根常茂。旱歲蟲生葉未繁。四壁愈空冬祭近。更催穉子牧雞豚。

起晚戲作

睡到僧廊響木魚。莊周蝴蝶兩蘊蘊。數聲林下華亭鶴。一卷牀頭笠澤書。雲子甌香炊熟後。露芽甌淺點嘗初。若論身逸心無事。臺省諸公恐不如。

老歎

八十未滿七十餘。山巔水涯一丈夫。長鳴未免似野鶴。生意欲盡如枯株。臨安宮闕經營初。銀鞍日日醉西湖。不須細數舊酒徒。當時兒童今亦無。

新治暖室

小堂穩暖紙窗明。低幌圍爐亦已成。日閣藏經忘歲月。時臨閣帖雜真行。詩才退後愁酣戰。酒量衰來喜細傾。從此過冬那復事。夜深時聽雪來聲。

暖閣

裘軟勝狐白。爐溫等鴿青。宮中供爐炭。用胡麻文鶻鶻青。紙屏山字樣。布被隸書銘。養目簾稀卷。留香戶每扃。日晡濃睡起。盥濯誦黃庭。

自詠

朋舊凋零盡。乾坤偶脫遺。食新心竊喜。話舊語多悲。泥醉醒常少。貪眠起獨遲。閉門誰共處。枕藉樂天詩。王元之自言在商州讀老莊外。枕藉白樂天詩。

夜坐

白首仍多病。青燈獨掩扉。雲低聞雁過。雨急待兒歸。

初冬有感

衰髮蕭蕭滿鏡絲。情懷非復似平時。風霜十月流年感。礎杵三更游子悲。閩嶠故人消息惡。傳聞方伯謨病卒。蜀江遺老素書遲。張季長居唐安。歲常通書。一簞豆飯休嫌薄。賦分羈窮合自知。

又

峨冠本願致唐虞。白首那知墮腐儒。碌碌不成千載事。駸駸又見一年徂。無僧解輟齋廚米。有吏頻徵瘦地租。要信此翁頑到底。只持一笑了窮途。

題酒家壁

智若禹行水。道如丁解牛。蘧蘧幾春夢。泛泛一虛舟。事定憂何益。狂來醉始休。青帘誇酒美。且復共登樓。

冬初出遊

風聲如雨曉颼颼。萬葉丹楓滿瓦溝。西望牛頭三十里。一枝柔艣作閑遊。

又

蹇蹙渺渺涉煙津。十里山村發興新。青旆酒家黃葉寺。相逢俱是畫中人。

早飯後戲作

湯餅滿盂肥笋香。更留餘地著黃梁。解衣摩腹西窗下。莫怪人嘲作飯囊。

又

髯鬚主簿方用事。冰壺先生來解圍。蠻童取火炷香椀。不讀南華誰與歸。

擬古

牛跡可使圓。羊角可使直。惟使剛者柔。造物不可得。世方貴軟熟。剛實不可爲。爲剛死道傍。已矣何所悲。

又

君看一鈎絲。能得幾日絡。君思幾州鐵。打此一大錯。目前豈不快。後悔將奈何。我非通神明。比汝更事多。

寧忍千日飢。野葛不可烹。寧枉百里途。捷徑不可行。自古風俗壞。善事亦淪胥。橘柚禹包貢。後世稱木奴。

又
坐臥北窗下。百事廢不治。脫粟與大布。衣食裁自支。溫飽豈不欲。違道予心悲。地下見先人。所冀尙有辭。

東村

野人知我出門稀。男輟鉏耨女下機。掘得芘菇炊正熟。一杯苦勸護寒歸。

又

野人喜我偶閑遊。取酒忽忽勸小留。舍後攜籃挑菜甲。門前喚擔買梨頭。村人謂小梨爲梨頭。

倚闌

滿庭晴日破朝寒。粥罷披裘小倚欄。殘菊抱叢香欲盡。一株南燭獨如丹。

霜寒不能出戶偶書

垂老仍多病。濃霜得快晴。猶能掇菊醉。今年菊晚。十月未嘗有花。但負探梅行。篝火烘裘暖。油窗潑眼明。小兒殊可喜。和我讀書聲。

冬晴與子坦子聿遊湖上

湖邊細鷺弄霏微。柳下人家晝揜扉。乘暖冬耕無遠近。小舟日晚載犁歸。

又

村南村北紡車鳴。打豆家家趁快晴。過盡水邊牛跡路。嶺頭猿鳥伴閑行。

又

道邊白水如牛渚。知是山泉一脈來。會挈風爐并石鼎。桃枝竹裏試茶杯。

又

海山山下百餘家。垣屋參差一帶斜。我欲往尋疑路斷。試沿流水覓桃花。

又

老僧八十無童子。禮佛看經終不能。雙手丫叉出迎客。自稱六十六年僧。

又

一榼無時可醉吟。一藤隨處得幽尋。先須挽取銀河水。淨洗人間塵霧心。

夢蜀

夢飲成都好事家。新粧執樂雁行斜。頰肩郫縣千筒酒。照眼彭州百獸花。醉帽傾欹歌未闕。罰觥激艷笑方譁。霜鐘喚覺晨窗白。自怪無端一念差。

歲晚

無窮世事浩難量。歲晚沉綿臥草堂。短褐圻圻移曲折。故書經盡失偏傍。賣刀擬買春耕犢。挾筴曾亡舊牧羊。點檢生涯還自笑。菜畦殘葉帶新霜。吳中冬蔬常茂。

又

扶藤據几久支離。敢料駸駸迫耄期。面槁自丹天所借。齒搖復住力何施。花前鯨吸猶堪酒。窗底蟬嘶未廢詩。浮世極知誰不死。比君終校幾年遲。

讀老子

道德五千言。魏巍衆妙門。管窺那見豹。指染僅嘗龜。正爾分章句。誰歟達本源。蜀莊猶不死。過我得深論。世傳莊君平不死。時在人間。猶讀老子。

貧病

窮愁病思兩茫茫。衰髮元知合變霜。酒要解醒猶有策。食求祝噎更無方。凋零坐上親朋少。寂寞人間歲月長。默計有時還自幸。幼安垂老始歸鄉。

洪雅葛仙硯探齋中物作題

異硯出漢嘉。溫潤蒼玉質。因形作獸背。得墨如點漆。才高德亦全。終月不更筆。蠻溪大沱輩。皆蜀硯之得名者。烏敢相甲乙。從我歸吳中。略計將萬日。塵拂不去手。有若琴在膝。名晦知者稀。體重盜計窒。惟當草太玄。不污管商術。

冬日讀白集愛其貧堅志士節病長高人情之句作古風

君子亦有慕。不慕要路津。君子亦有恥。不恥賤與貧。風俗未唐虞。詩書非一秦。展轉不能限。臥聽雞唱晨。

天下不難一。孰能凝使堅。自古功已成。或散如飛煙。惟唐用房魏。規模三百年。至今河潼路。過者猶依然。

漢禍始外戚。唐亂基宦寺。小人計已私。顧復指他事。公卿恬駭機。關河入危涕。草茅豈無人。死抱經世志。

成童入鄉校。所願爲善士。富貴本邂逅。不遇亦已矣。生輕名義重。固守當以死。堂堂七尺軀。勿使污青史。

勁風東北來。芴屋吹欲裂。出門有奇觀。湖上千峯雪。日高炊未具。歲晚衣百結。士豈無一長。所要全大節。

吾常慕昔人。石介與王令。挑燈讀其文。奮起失衰病。吾徒宗六經。崇雅必放鄭。人衆何足云。少忍待天定。

郊居四十年。草木日夜長。喬松已偃蓋。樛松出蒼莽。儒生學仁義。敢廢自培養。鬱鬱棟梁姿。拔地當百丈。

仕如柳柳州。賤奏典儀曹。君恩篤始終。賜骸老東臯。歷觀親黨間。如我亦已遭。世世當斂退。里門不須高。

鏡湖有隱者。莫知何許人。出與風月遊。居與猿鳥鄰。似生結繩代。或是葛天民。我欲往從之。煙波浩無津。

又

卜日家祭竈。牲肥酒香清。分胙雖薄少。要是鄰里情。衆起壽主人。一觥激灑傾。氣衰易成醉。睡覺窗已明。

十一月四日夜半枕上口占

小室悄悄夜向分。幽人殘睡帶殘醺。簷間雨滴愁偏覺。枕畔橙香夢亦聞。驚雁數聲投野澤。悲笳三疊上霜雲。年來萬事俱拋盡。自笑詩中尙策勳。

齋中弄筆偶書示子聿

左右琴樽靜不譁。放翁新作老生涯。焚香細讀斜川集。候火親烹顧渚茶。書爲半酣差近古。詩雖苦思未名家。一窗殘日呼愁起。裊裊江城咽暮笳。

飢寒吟

夜寒每達旦。懷抱安得寬。朝飢或過午。忍此良亦難。飢寒誠吾憂。憂有甚飢寒。彈琴不終曲。推去發永歎。大兒破綠襦。三歲待一官。小兒學耕稼。飯牛歌夜闌。老翁垂八十。捫壁行蹒跚。傍觀勿嘲笑。窮死心所安。

病愈小健戲作

路入江村跨蹇驢。鞍前分挂兩囊書。興來到處沽新酒。不爲閑愁要破除。

又

入市歸村不跨驢。蠅頭細字夜鈔書。身安自勝閑官職。不是虛名暗拆除。

祭竈與鄰曲散福

已幸懸車示子孫。正須祭竈請比鄰。歲時風俗相傳久。賓主歡娛一笑新。雪鬢坐深知敬老。瓦盆酌滿不羞貧。問君此夕茅簷底。何似原頭樂社神。

湖水愈縮戲作

瓜壟從來幾邵平。鏡湖復有一玄英。今秋雨少煙波窄。堪笑沙鷗也敗盟。

夜坐

夜永霜濃睡不成。團樂兒女話無生。金蓮妄想消除盡。一椀松肪徹曉明。

夢中作遊山絕句

霜風吹帽江村路。小蹇迢迢委轡行。忽到雲山幽絕處。穿林啼鳥不知名。

又

寺樓已斷暮鐘聲。照佛琉璃一點明。不道溪深待船久。老僧驚怪太遲生。

大姪挽辭前知鬱林州博白縣終

束髮已青袍。終身州縣勞。一官常骭髀。萬里忽烹蒿。竟負昂霄志。空傳擲印豪。君在博白與郡爭辨職事。袖印還之而去。兩疎心不遂。遺恨寄滔滔。

書幸

富貴不可爲。禍機發須臾。貧賤不可爲。飢寒死路衢。我亦貧賤者。死期幸少紓。春雨兩耕犢。西疇破煙蕪。秋風一釣舟。南浦宿菰蒲。辛勤異退之。亦復有屋廬。堂北鑿明窗。可以陳琴書。文章不傳世。自適亦有餘。

又

我身匪兕虎。豈是曠野物。生非洪水時。胡爲在巢窟。向來三入朝。薄命不黔突。未嘗識許史。况敢交平勃。滄波渺黏天。遠逐輕鷗沒。今年君恩厚。幸許賜骸骨。既逃申公鉗。又異卞和削。放懷歌嗚嗚。寧暇書咄咄。

退居

溪煙漠漠弈棋軒。篲水潺潺種藥園。醫爲疾平新掃跡。客知睡美罕敲門。談餘白拂懸牀角。飲散空樽臥壁根。賜帛更蒙優老詔。此生何以報君恩。比有詔書。賜致仕官半酒粟帛。丁寧甚至。

北望感懷

榮河溫洛帝王州。七十年來禾黍秋。大事竟爲朋黨誤。遺民空歎歲時過。乾坤恨入新豐酒。霜露寒侵季子裘。食粟本同天下賁。孤臣敢獨廢深憂。

白髮

蕭蕭白髮濯滄浪。剡曲西南一艸堂。飲水讀書貧亦樂。杜門養病老何傷。已成五畝扶犁叟。誰記三朝執戟郎。正似籬邊數枝菊。歲殘猶復耐冰霜。

老歎

事與年俱往。心於世轉疎。曼膚銷欲盡。鬢髮變無餘。野店通賒酒。鄰翁伴荷鋤。尙嗟餘習在。夢課吏鈔書。

作竹籬成因把酒其間戲題四十字

今日偶暄暖。臥聞林鳥呼。雖思大白飲。未免小蒼扶。柳色動籬外。梅花來座隅。夕陽紅滿野。更復倒殘壺。

新養白雞毛羽如玉殊可愛

赤幘峨峨玉羽明。籬間新織竹籠成。老人從此知昏曉。不用元戎報五更。

新籬

新籬三面北通門。藤架陰中細路分。天宇淡青成卵色。水波微皺作靴紋。參差村舍穿林出。縹緲漁歌隔浦聞。忽覺楚鄉來眼底。欲題幽句弔湘君。

蠹堂雜興

朝來地確玉新春。雞蹠脰肩異味重。便腹摩挲更無事。老人又過一年冬。

又

曳杖東岡信步行。夕陽偏向竹間明。丹楓吹盡鴉聲樂。又得霜天一日晴。

又

閩溪紙被輒於綿。黎峒花紬暖勝氈。一夜山中三尺雪。未妨老子日高眠。

又

三分帶苦檜花蜜。一點無塵柏子香。鼻觀舌根俱得道。悠悠誰識老龜堂。

又

方石斜栽香百合。小盆山養水黃楊。老翁不是童兒態。無奈菴中白日長。

少年身寄市朝中。俗論紛紛聒耳聾。清絕寧知有今日。高眠終夜聽松風。

又

二三鄰曲偶相尋。小醉悠然臥竹陰。醒後自看還自笑。溪雲猶未是無心。

又

蒲團安坐地爐溫。無位真人出面門。世上不知何歲月。斷鐘殘角送黃昏。

又

道妙從來亦麤聞。閉門方用十年勤。筆端小技深知悔。舊藁如山欲盡焚。

又

散樸澆淳萬事新。腐儒空有涕沾巾。唐虞不是終難致。自欠臯夔一輩人。

卷四十一

己未冬至

老人畏添歲。每歎時序速。今朝陽始生。在易得來復。扶衰奉先祭。拜起賴童僕。兒曹亦壽我。魚兔隨事足。歡言殫一醉。家釀及新熟。占年當得稔。冬至後九日遇壬。法當有年。喜笑動鄰曲。冀從宿麥始。載重車折軸。明年秋社時。處處饜酒肉。

冬至夜坐作短歌

一陽萌生從此日。老人堅坐坐午達夕。渾渾上泝河流黃。赫赫內視神珠赤。愛如嬰兒未離乳。危若遊絲裊千尺。君不見宣房塞河百萬人。一旦橫流由蟻隙。

新裁短褐接客以代戎服或以爲慢戲作

世事巧相逢。殘年幸許歸。雖云裁兔褐。不擬出漁扉。拂石襟靈爽。撻筇氣力微。朝衣猶挂卻。況遣著戎衣。

冬夜

多病睡眠少。長閑懷抱清。昏燈照殘夢。寒漏下高城。落月檐將沒。棲禽靜復驚。誰言冬夜永。輾轉已窗明。

書感

壯歲功名妄自期。晚途流落鬢成絲。臨風畫角曉三弄。釀雪野雲寒四垂。金鎖甲思酣戰地。皂貂裘記遠遊時。此心炯炯空添淚。青史它年未必知。

書意

領霜久矣不勝耘。殘髮今年白十分。憂國雖忘嫠婦緯。愛君敢進野人芹。牀頭酒滴空階雨。爐面香橫出岫雲。已向人間齊物我。不教驚起白鷗羣。

試茶

強飯年來幸未衰。睡魔百萬要支持。難從陸羽毀茶論。寧和陶潛止酒詩。乳井簾泉方徧試。柘羅銅碾雅相宜。山僧剝啄知誰報。正是松風欲動時。

對酒懷丹陽成都故人

勞生常羨蠲縲樂。死時卻悔生時錯。花前有酒不肯狂。回首朱顏已非昨。君看古來賢達人。終日飲酒全其真。世間萬事竟何有。金樽翠杓筮關身。放翁少日無凡客。飛觴縱樂皆豪傑。清歌一曲梁塵起。腰鼓百面春雷發。故人仙去蓬萊宮。鸞絲鳳竹醉春風。石帆山下孤舟雪。一段清愁付此翁。

三山卜居三十有四年矣。老身七十有五兒輩亦頗宦學。未爲非吉也。偶作五字示諸兒。

買地不占龜。心知百世宜。西鄰梅福隱。南望項王祠。菴小偷僧樣。陂長按古規。保家無異法。一念勿萌欺。

村興

身老交情見。孫生口數添。園丁上牛米。村婢博蠶鹽。妝奩堆盤白。餠餠出釜甜。閉門君勿誚。衰病正相兼。

枕上

迢遞孤村夜。淒涼半篆香。懷人悲夢短。聽雨怯更長。有術乾盤汞。無方掃鬢霜。高吟擬排悶。吟罷更偃偃。

得建業倅鄭覺民書言虜亂自淮以北民苦徵調皆望王師之至

邦命中興漢天心大討曹風雲助開泰河渭蕩腥臊日避揮戈勇山齊積甲高煌煌祖宗業只在馭羣豪

兩夜讀書

農家冬少事無地肆吾勤急雨生新健陳編寄一欣高風感華涓善治仰華勳老死今朝夕何由誦所聞

夢中作己未十二月五日夜作所書皆夢中事也

長隄行盡古河濱小市人稀霧雨昏樞馬垂頭齧菅草驛門移路避槐根斷碑零落苔俱徧漏壁微茫字半存催喚廚人燎狐兔強排旅思舉清樽

題傳神

雪鬢蕭然兩頰紅人間隨處見神通半醒半醉常終日非士非農一老翁樞蹟雖存千里志雲鷗已息九天風巉巖骨法吾能相難著凌烟劍佩中

紀懷

未斲要離冢畔雲僮牛得食寄鄉枌修身本欲善吾死臨事豈忘尊所聞時序管寧親饋奠江山龐老上丘墳飾巾家簞從來事萬種悠悠莫苦分

新作柴門戲書

雖設常關果是麼開門終日有誰過從來不省多車轍此際真宜置爵羅尙許漁樵時剝啄偶逢風月亦婆娑炎炙手須臾事也比柴荆較幾何

炊飯

米分齋鉢供薪拾墮菓枝偶爾成幽事欣然慰午飢炊時珠瀉甌嘗處雪翻匙欲作明朝計還須賣漚籬

愛閑

今日先生病體輕愛閑猶有舊心情帖看貞觀行間印琴記中郎夔下聲衣焙溫溫香欲透雪簷滴滴日初晴客來一笑明窗底枉道爲農事耦耕

與子聿讀經因書小詩示之

經中固多趣。我老未能忘。似獲連城璧。如傾九醞觴。信能明孔氏。何暇傲羲皇。努力晨昏事。躬行味始長。

登東山

老慣人間歲月催。強扶衰病上崔嵬。生爲柱國細事爾。死畫雲臺何有哉。熟計提軍出青海。未如喚客倒金甌。明朝日出春風動。更看晴天萬里開。

己未歲暮

七十六年將到時。龍鍾猶復強支持。寒燈照影始知瘦。薄酒作醒方覺衰。春日尙能持冷麵。花時未礙插繁枝。癡頑應有傍觀笑。自課園丁補槿籬。

冬夜讀書示子聿

宦途至老無餘俸。貧悴還如筮仕初。賴有一籌勝富貴。小兒讀遍舊藏書。

又

易經獨不遭秦火。字字皆如見聖人。汝始弱齡吾已老。要當致力各終身。

又

古人學問無遺力。少壯工夫老始成。紙上得來終覺淺。絕知此事要躬行。

又

簡斷編殘字欲無。吾兒不負乃翁書。絕勝鎖向朱門裏。整整牙籤飽蠹魚。

又

聖師雖遠有遺經。萬世猶傳舊典刑。白首自憐心未死。夜窗風雪一燈青。

又

殘雪初消薺滿園。糝羹珍美勝羔豚。吾曹舌本能知此。古學工夫始可言。

又

讀書萬卷不謀食。脫粟在傍書在前。要識從來會心處。曲肱飲水亦欣然。

又

世間萬事有乘除。自笑羸然七十餘。布被藜羹緣未盡。閉門更讀數年書。

幽興

午倦便高枕。朝飢美小殮。時穿幽圃屐。常掩小菴門。溪憶鷗盟約。花迷蝶夢魂。餘生猶幾許。萬事付乾坤。

寓歎

眼底誰爲耐久朋。倚肩按膝一烏藤。虛名但可欺橫目。薄俗何時復結繩。浮世百年悲冉冉。閉身萬事付騰騰。年來更歎龍鍾甚。欲探梅花病不能。

夢題驛壁十二月二十七日夜

半生征袖厭風埃。又向關門把酒杯。車轍自隨芳草遠。歲華無奈夕陽催。驛前歷歷埃雙隻。陌上悠悠人去來。不爲途窮身易老。百年回首總堪哀。

新春

柳淡春初破。梅寒瘦不禁。羈愁醉後減。睡思雨中深。閑試新收硯。重尋久廢琴。何時見朋舊。細話別來心。

庚申元日口號

數行晴日照青鷺。春入屠蘇激灑樽。兒報山僧留刺去。未爲無客到吾門。

又

黃紬五丈裁衫穩。黑黍三升作飯香。造物要教無媿怍。一身溫飽出耕桑。

又

南陌東阡自在身。老年喜見歲華新。洛中九老非吾侶。且作山陰十老人。

又

晚塗初入長生運。新歲仍當大有年。剩與鄉鄰同覓醉。市樓酒賤不論錢。

又
去年迎客已蹒跚。今歲人扶出亦難。堪笑此翁衰到底。重裘絮帽尙言寒。

又

仁和館外列鷓行。憶送龍舟幸建康。舍北老人同甲子。相逢揮淚說高皇。

視東臯歸

抱耒新湖葑。燒畚古廟壩。宦遊悲骭髀。歸臥困沉綿。日隱啼鴉戍。舟回落鴈天。衰殘知迫死。不忍負青編。

晚步舍東

遇興穿叢竹。尋香折野梅。暮天寒欲雪。幽徑綠生苔。栖雀爭枝噪。歸牛並壑來。高城角聲動。不盡古今哀。

人日東園

歲首未入春。風氣已稍和。我睡意慵起。如此鳴禽何。鴛言之東園。落梅亦已多。江南無堅冰。綠池生微波。挹彼蒲萄醅。酌我鸚鵡螺。雖無絲與竹。倚樹自高歌。矯首東南望。稽山鬱嵯峨。兒曹幸力穡。老子得婆娑。

逆旅行

古者謂死爲歸人。此身未死均是客。家爲逆旅身。在途久寓遽。歸初不擇。逆旅相看隨。薄厚非意相。干寧足責。世間何處無谿山。得酒盡醉當墮憤。傍觀嘲誚亦其宜。東海定非蠹可測。

小雨初霽

歸來偶似老淵明。消渴誰憐病長卿。小雨染成芳草色。好風吹斷畫簷聲。剪燈院落晨猶冷。賣酒樓臺晚旋晴。莫道此翁遊興懶。蘭亭禹寺已關情。

獨夜

村落泥淹雪。虛簷水結冰。長征荷戈客。暫到放包僧。妖鵬鳴高樹。飢鼯觸闇燈。誰能問良苦。衰病正相乘。

忍窮

短褐財遮骭。孤烟僅續炊。久窮方有味。古語不吾欺。堅坐忘昏旦。殘年迫耄期。尙餘書滿屋。手校付吾兒。

開歲半月湖村梅開無餘偶得五詩以煙濕落梅村爲韻

斷岸通別浦。孤舟入春煙。與梅本無期。忽到醉眼邊。折花插紗帽。花重覺帽偏。居人空巷看。疑是湖中仙。

又

我來梅花村。倚杖久佇立。惜哉風雨餘。零落綠苔濕。往年賦詩人。去袂不可執。明朝梅亦空。感舊百憂集。

又

梅花如高人。妙在一丘壑。林逋語雖工。竟未脫纏縛。乃知尤物側。天下無傑作。老我懷不紓。樽前幾開落。

又

斗柄忽東指。開盡湖邊梅。偉觀天下無。四顧雪千堆。時至當斂退。勿受曉角催。安知桃李輩。於子無嫌猜。

又

昨日春已來。盎盎滿江村。落梅亦多情。點點浮清樽。語離聊一醉。不恨村酒渾。人生共如此。已矣兩忘言。

老病

湖上歸耕一病翁。此心非復少年同。讀書初恨歲時速。聞道始知身世空。匠石不能材社櫟。弋人何意慕冥鴻。新春愈覺支離甚。又付生涯藥裏中。

三二年來夜夢每過吾廬之西一士友家觀書飲酒方夢時亦自知其爲夢也

西鄰好友工談笑。每見明知是夢中。樽酒不空書滿架。何時真得與君同。

又

清言亶亶岸綸巾。久矣吾遊無若人。自怪夢中來往熟。抱琴攜酒過西鄰。

上元雨

城中酒壚千百所。不憂不售惟憂雨。今年上元燈滿城。曲巷深坊鬪歌舞。天公不借一日晴。風吹燈死雨如傾。家家移牀避屋漏。不聞人聲聞屐聲。

雜興

造物乘除理固然。許將窮悴博頑堅。驥衰伏櫪心千里。龜冷搗牀壽百年。好事時供沽酒費。擁途爭笑插花顛。漁村宿願雖償盡。猶恨僧房欠畫眠。

又

散髮林間萬事輕。夢魂安穩氣和平。只知秋菊有佳色。那問荒雞非惡聲。達士招呼同嘯傲。福人分付與功名。一篇說盡逍遙理。始信蒙莊是遠生。

初春書喜

我生本癡絕。萬事不繫懷。一朝蛻形去。豈問棄與薶。遊宦三十年。所向無一諧。偶然有天幸。自退非人排。黃紙如鴉字。君恩賜殘骸。剡溪回雪舫。雲門散青鞵。兩犢掀春泥。一鉢隨午齋。更當擁布被。高枕聽鳴蛙。

幽居無一事戲作

長鬚僅有玉川奴。秃尾猶無漫漢驢。萬事已隨春枕斷。故人何啻曉星疎。出乘微雨鉏畬粟。歸傍荒畦擷野蔬。一字不看方睡笑。任人搜去帳中書。

贈道流

煙雲深處作生涯。回首人間歲月賒。留得朱顏憑綠酒。掃空白髮賴丹砂。七絃指下泠泠久。雙袖風中獵獵斜。他日相尋不知處。會從漁父問桃花。

病中作

牀席呻吟裏。衡茅隱約中。空與年往歎。未著日新功。世遠言猶在。身危道豈窮。但能無媿怍。天地本來公。

病愈偶書

枯蓬萬里寄飄風。晚落江頭號放翁。冉冉流年秋鏡裏。悠悠殘夢曉笳中。掃除藥裏病良已。棄置酒杯愁自空。閑處固應容老子。臥看年少起新豐。

小圃獨酌

少時裘馬競豪華。豈料今爲老圃家。數點霏微社公雨。兩叢閑淡女郎花。詩成枕上常難記。酒滿街頭卻易賒。自

笑邇來能用短。只將獨醉作生涯。

飯罷戲示鄰曲

今日山翁自治廚。嘉穀不似出貧居。白鵝肉美加椒後。錦雉羹香下豉初。箭茁脆甘欺雪菌。蕨芽珍嫩壓春蔬。平生責望天公淺。捫腹便便已有餘。

春日

開盡梅花柳漸青。東風又滿會稽城。放翁晨起有佳思。姪姪林鶯初試聲。

又

方池激激碧波平。曲徑纖纖細草生。席地幙天君但醉。苦無多日是清明。

又

桃花輕薄柳花狂。蛺蝶翩翩燕子忙。惟有龜堂無一事。閉門白日不勝長。

又

巷口東風吹酒旗。老人也惜早春時。雨來三日泥沒踝。過盡梅花渾不知。

又

雪山萬疊看不厭。雪盡山青又一奇。今代江南無畫手。矮牋移入放翁詩。

又

怕見公卿懶入城。野橋孤店跨驢行。天公遣足看山願。白盡髭鬚卻眼明。

新晴野步

吹盡浮雲旋作晴。郊原高下水縱橫。煙蕪漫漫如添色。谷鳥關關已變聲。迨酒賤時須痛飲。得人扶處儘閑行。隔湖遙指蘭亭路。鄰叟追隨羨眼明。

湖上作

鵝兒涇口曉山橫。蜻蜓港頭春水生。蘭亭之北是茶市。柯橋以西多鷓聲。

又

東涇西涇花極望。紅雲照波錦裏山。路似掌平身自倦。酒如土賤篋常慳。

夜行過一大姓家。值其樂飲戲作。

村豪聚飲自相歡。燈火歌呼鬧夜闌。醉飽要勝飢欲死。看渠也復面團團。

枕上作

水漲池新滿。山寒屋儘低。愁多憎夜雨。睡少喜晨雞。社肉初分胙。春蕪已再犁。明朝尋父老。不怕躡街泥。

又

山雨蕭蕭過。沙泉咽咽流。夢中無遠道。醉裏失孤愁。貧賣相如騎。寒思季子裘。兒童報新霽。裹飯出閑遊。

悽悽行

悽悽重悽悽。惻惻復惻惻。我媿師曠傍。人誰子思側。輿邦在人材。巖穴當物色。如何清廟器。老死山南北。小儒雖微陋。一飯亦憂國。豈無一得愚。欲獻懼非職。

春齋

食案何蕭然。春齋花若雪。從今日老硬。何以供采擷。山翁垂八十。忍貧心似鐵。那須萬錢筋。養此三寸舌。輒炊香粳飯。幸免煩祝噎。一瓢亦已泰。陋巷時小啜。

答客

人生各有營。爲吏最無策。其間小黠者。但肯乘下澤。絕筆光範書。掃迹翹才客。早收畏塗身。未老歸阡陌。嗟予昧擇術。誤計真累百。衰病始知悔。泯默每自責。孤舟寄渺莽。尙恨江湖迫。客來勿多談。窮命不禁嚇。

閑中自詠

小艇上時皆綠水。短筇到處卽青山。二十四考中書令。不換先生半日閑。

又

聲名本自不關身。富貴元知與禍鄰。但恨平生閑不足。再來真作臥雲人。

甲申雨

老農十口傳爲古。遇春甲申常畏雨。風來東北雲行西。雨勢已成那得禦。山陰洙湖二百歲。坐使膏腴成瘠鹵。陂塘遺迹今悉存。歎息當官誰可語。甲申畏雨古亦然。湖之未廢常豐年。小人那知古來事。不怨豪家惟怨天。

今歲遊花溼差晚戲作

滿地殘紅點綠苔。花溼弭棹小裴回。春風又作忽忽別。老病無端袞袞來。亦悟百窮緣骯髒。終羞萬事學低摧。吾文自欲忘憂耳。那博人間水一杯。

枕上口占

五十年前詩酒身。山陰風月尙如新。閑愁已是無闌障。一枕春寒更惱人。

又

躡雨敲門覓季夷。巽牋同和仲高詩。回思五十年前事。恰似今宵夢裏時。

又

五十年間萬事空。嬾將白髮對青銅。故人只有桃花在。惆悵無情一夜風。

贈謝正之秀才

君家麻源第三谷。我在鏡湖分一曲。平生夢亦不相接。忽然懷中瀉珠玉。誠齋老子主詩盟。片言許可天下服。長歌爲君定聲價。賞音但須一夔足。躡泥過我君豈誤。拱壁何至求凡目。只愁明日遽來索。北窗連夜挑燈讀。

連日往來湖山間頗樂卽席有作

晚春光景亦佳哉。野老蒼顏一笑開。莫問此生猶幾屐。但知相遇且銜杯。偶攜兒女祈蠶去。又逐鄉鄰賽麥回。不信年華如轉轂。城頭君聽角聲哀。

贈貓

鹽裹聘狸奴。常看戲座隅。時時醉薄荷。夜夜占氈毼。鼠穴功方列。魚殮賞豈無。仍當立名字。喚作小於菟。

歎老

小築依林藪。殘年迫耄期。衣寬方覺瘦。步蹇始悲哀。食飲常多忌。方書動自隨。園花幾分在。睡起問吾兒。
殘春

章甫從諸老。今爲兩世人。惟書尙開眼。非酒孰關身。遠水涵清鏡。晴雲蹙細鱗。籬邊花未盡。作意醉殘春。

東村

雨霽山爭出。泥乾路漸通。稍從牛屋後。卻過鶴巢東。泱泱沙溝水。翻翻麥野風。欲歸還小立。爲愛夕陽紅。

晚步舍北歸

昨日海棠開。今朝燕子來。偶行沙際去。卻傍柳陰回。酒是治愁藥。書爲引睡媒。吾生不乏此。外物信悠哉。

記夢

夜夢遊名山。翠壁開巖扉。主人喜迎客。劇談皆造微。下臨萬里空。渺渺一鶴飛。安得棄家去。丹竈常相依。

寄題揚州九曲池

清汴長淮莽蒼中。揚州畫戟擁元戎。南連近甸觀秋稼。北撫中原掃夕烽。茶發蜀岡雷殷殷。水通隋苑月溶溶。懸知帳下多豪傑。一醉何因及老農。

投老

投老百無成。山林送此生。薄才元易盡。古道竟難行。陋巷牛牟迹。衡門鳥雀聲。新年幸差健。作意事春耕。

茅亭

終日坐茅亭。蕭然倚素屏。兒圓點茶夢。客授養魚經。馬以鳴當斥。龜緣久不靈。詩成作吳詠。及此醉初醒。

貧甚賣常用酒杯作詩自戲

桃李成塵渾不數。海棠也作臙脂雨。清明未到春已空。枝上流鶯替人語。逢春日日合醉歸。莫笑典衣窮杜甫。生時不肯澆舌本。死後空持酌墳土。門前三百里湖光。天與先生作醉鄉。銀杯羽化不須歎。多錢使人生窟郎。

春晚泛湖歸偶賦

十日雨晴湖水深。暖催新綠上橫林。分泥海燕穿花徑。帶犢吳牛傍柳陰。夏近漸低遊舫價。日斜殊費寺樓吟。歸

來支枕還無事。一縷微煙看水沉。

卷四十三

東園小飲

少年萬里走塵埃。歸臥柴荆晝不開。十事真成九敗意。一春知復幾銜杯。波清憑檻觀魚樂。風緊鉤簾待燕回。催喚比鄰同晚酌。旋燒筍筍摘青梅。

又

入東又見幾春風。茆屋蘆藩寂寞中。道業雖如詩不進。世緣已與夢俱空。高枝濯濯辛夷紫。密葉深深躑躅紅。村巷斷無軒蓋到。一樽猶得伴鄰翁。

又

三月園林日漸長。閑從鄰曲答年光。醪醑獨殿羣芳後。醜醜能令萬事忘。下豉尊羹誇舊俗。供鹽梅子喜初嘗。烏靴席帽知何樂。自古京塵眯眼黃。

又

乞得殘骸老故山。草亭終日對孱顏。孤雲百尺起江際。幽鳥數聲鳴竹間。衆死一身今獨健。人忙萬物本常閑。此心欲語知誰聽。賴有漁樵日往還。

病退頗思遠遊信筆有作

平日身如不繫舟。曾從楚尾客秦頭。風生江浦千帆曉。月落山城一笛秋。萬事只能催白髮。百年終是臥荒丘。扶衰強項君休笑。尙憶人間汗漫遊。

春晚閑步門外

病退扶行力尙微。悠然隨意出荆扉。蜂貪釀蜜爭花去。燕喜分泥傍水飛。午渴坼瓶嘗煮酒。晴暄開筍換單衣。躊躇已久歸猶嬾。更向溪頭坐釣磯。

嘲布穀

時令過清明。朝朝布穀鳴。但令春促駕。那爲國摧耕。紅紫花枝盡。青黃麥穗成。從今可無語。傾耳舜弦聲。

題齋壁

出郭無十里。結廬纔數間。每將窮博健。不遣樂妨閑。賣藥雲邊市。尋僧雨外山。何妨搖楫去。却作跨驢還。

龜堂晚興

九日春陰一日晴。回塘閑院愜幽情。小魚出水圓紋見。輕燕穿簾折勢成。今日掩關真佚老。向來涉世亦遺名。巡簷更有欣然處。新筍初抽四五莖。

長干行

裙腰綠如草。衫色石榴花。十二學彈箏。十三學琵琶。寧嫁與商人。夫婦各天涯。朝朝問水神。夜夜夢三巴。聘金雖如山。不願入侯家。鄣袖庭花下。東風吹鬢斜。

養生

受塵故里老爲氓。三十餘年學養生。情盼作妖狐未慘。肥甘藏毒醜猶輕。忠言何啻千金藥。赤口能燒萬里城。陋巷藜羹心自樂。傍觀虛說傲公卿。

園中觀草木有感

木筆枝已空。玉簪殊未花。頰桐時更晚。春盡始萌芽。老人多感慨。俯仰悲歲華。兩曜如奔輪。疾去不可遮。城頭插雙旗。疊鼓催清笳。兀然一室間。不復過鄰家。午睡或至暮。亂髮垂髭髻。所嗟瘦僧死。莫致茶山茶。茶山僧道省歲餉新茶。今死已再歲矣。

恩賜龜紫

憶昔青衫上赤墀。領間未有一莖絲。豈知晚拜金龜賜。却是霜髯雪鬢時。

又

已挂朝衣神武門。暫紆紫綬拜君恩。兒孫賀罷還無事。兩笠煙蓑自灌園。

自警

少年不自量。妄意慕管葛。晚節雖知難。猶覩終一豁。悲哉老病馬。解縱誰復秣。既辭筮轡勞。始愛原野闊。飲澗醫霜管。亦可數年活。勿復思長途。嘶鳴望天末。

獨夜

一生食太倉。蠹耗均雀鼠。雖云久置散。飢飽尙撐拄。兩年失微祿。始覺困羈旅。傾身營薪米。得食已過午。人觀不堪憂。意氣終自許。藜藿若大庖。草廬如萬礎。平生師顏原。本自藐晉楚。悠然臥北窗。殘燈翳還吐。

兩夕枕上作

鬢毛日夜雪霜稠。冉冉年光逝肯留。酒力但資愁作祟。雨聲偏與睡爲仇。銘旌官職眼前事。史冊姓名身後憂。畢竟此生何處是。江湖萬里有孤舟。

喜晴

澤國風雨多。春盡尙裘褐。閉門不能出。飽受鳩婦聒。今朝雲忽歸。溝水清活活。偶爲東園行。魚鳥閒何闊。婦女蠶事終。桑柘光如潑。布穀汝勿憂。吾袴真可脫。

觀運糧圖

王師北伐如宣王。風馳電擊復土疆。中軍歌舞入洛陽。前軍已渡河流黃。馬聲蕭蕭陣堂堂。直跨井陘登太行。壺漿簞食滿道傍。芻粟豈復煩車箱。不須絕漠追敗亡。亦勿分兵取河湟。但令中夏歌時康。千年萬年無餽糧。

字文褒。臣吏部。予在蜀日與之遊。至厚契闊。死生二十年矣。庚申三月。忽夢相從。如平生。愴然有賦。英姿爽氣。字卬州。雖古人中豈易求。六月長途將暍死。一天風雹起龍湫。

阿姥

城南倒社下湖忙。阿姥龍鍾七十強。猶有塵埃嫁時鏡。東塗西抹不成粧。

初夏

兩足移秧後。風和剝繭初。昏昏時就枕。翼翼却尋書。晚步身須杖。晨興髮廢梳。滿城車馬客。誰復問何如。

讀書

稽古衰猶力。翻書夜達晨。思人須掩卷。感事忽霑巾。世閱幾春夢。身今一老民。忍窮端已慣。蔬食又經旬。

喜晴

江湖春暮多風雨。點滴空堦實厭聽。剩喜今朝有奇事。一窗晴日寫黃庭。

初夏北窗

作墨無聲紫玉池。年光又入放翁詩。風和柳岸吹綿後。雨足瓜畦引蔓時。病酒相如無奈渴。清言叔寶不勝羸。此生豈復功名事。付與城頭畫角悲。

又

水際柴荆畫不開。臥聽微雨雜輕雷。春蠶滿箔眠初起。社燕爭巢去復來。海檜屈蟠依怪石。山榴零落點蒼苔。一樽及此風光笑。車下長坡底用推。

書適

老人去健羨。飯足便有餘。此外一壺酒。薦以園中蔬。手種數畦花。時開一編書。近者苦足蹇。復營一柴車。時時訪溪父。亦或遊僧廬。上下山澤間。視身等禽魚。既歸則浩歌。幽抱亦少摅。一笑謂兒子。不須起犂鋤。

幽居初夏

路繚長隄北。家居小市西。陂塘晨飲犢。門巷午鳴雞。婦喜蠶三幼。鄉中謂蠶眠爲幼。兒誇兩一犁。衰翁亦放浪。未怕屐露泥。

又

梅塢青黃子。草陂紅紫花。雙鵝朝戲浦。羣鴨暮還家。赤腳挑殘筍。蒼頭摘晚茶。出門逢野老。滿意說桑麻。

又

詰曲穿桑徑。謳啞響竹門。疏泉灌藜莧。倚杖牧雞豚。江步橫新舸。茅簷弄幼孫。太平端有象。誰與畫吾村。

又

大耋光陰短。南訛日月長。松枯宜倒壑。龜老慣撐牀。寂寂三升稷。悠悠百本桑。飢寒猶骯髒。何術砭吾肱。

獨醉

老伴死欲盡。少年誰肯親。自憐真長物。何啻是陳人。江市魚初上。村場酒寒醇。頽然北窗下。不覺墮紗巾。

獨立

午醉初醒後。回廊獨立時。斜陽明兩葉。乳鶻裊風枝。造俗雖堪笑。師心頗自奇。傍人疑徙倚。向道是尋詩。

高臥

省戶歸來不計年。悠然高臥鏡湖邊。鉤簾每對千峯雨。接竹新分一脈泉。學問誠身元有道。阨窮知我豈非天。虛名自古能爲累。正恐人看直一錢。

趙彥膚修撰挽辭

朝路英聲早。宗盟宿望尊。謙談推醞藉。大筆擅雄渾。許國心猶壯。安邊策具存。悽涼故時客。痛哭望秋原。

讀香奩集詩戲效其體

金鋪一閉幾春風。咫尺心知萬里同。麝枕何曾覆夢惡。玉壺空解貯啼紅。晝愁延壽丹青誤。賦欠相如筆墨工。一事目前差自慰。月明還似未央中。

野步至村舍暮歸

草徑盤紆入廢園。漲餘野水有殘痕。新蒲漫漫藏孤艇。茂樹陰陰失近村。拄杖敲門求小憩。老盆盛酒瀉微渾。興闌却覓橋邊路。數點歸鴉已帶昏。

述悲

屏居不出門。終歲袖手坐。但怪意氣衰。那覺日月過。故人爲冢丘。老伴餘幾個。天高鬼神惡。回天夷齊餓。遺魂一零落。豈復聞楚些。且當醉濁醪。吾夢行亦破。

江東韓漕踰道寄楊庭秀所贈詩來求同賦作此寄之

三朝巍巍韓侍中。爛然彝鼎書元功。西戎北狄問安否。九州萬里涵春風。子孫繼踵皆將相。我猶及拜西樞公。顧

憐通家略貴賤。勞問教誨均兒童。西樞有孫又奇偉。凜然太華摩蒼穹。小試玉節江西東。文書如海到手空。政成蒲鞭亦不用。地上錢流倉粟紅。君持此手上廊廟。折衝禦侮知從容。桑乾不勞尺箠下。榆關正可丸泥封。却歸故里訪遺老。應記山陰九十翁。

雨夜

麥熟家家喜墮涎。龜堂依舊突無煙。雨中更覺淒涼甚。一點殘燈守蠹編。

小橋

漠漠輕陰隱隱雷。石榴半落點莓苔。小橋西北闌干角。獨岸綸巾待雨來。

自笑

三間茅屋寄滄浪。鳥出樊籠馬脫韉。灑灑陂塘秋水滿。陰陰門巷麥風涼。蔬盤旋采溪毛滑。篷艇新編露茗香。捐盡浮名方自喜。一生枉是伴人忙。

入梅

微雨輕雲已入梅。石榴萱草一時開。碑償宿諾淮僧去。卷錄新詩蜀使回。墨試小螺看斗硯。茶分細乳玩毫杯。客來莫謂兒嬉事。九陌紅塵更可哀。

雨夜

小雨收仍落。孤燈黯復明。衰殘書易忘。憂患夢多驚。熠熠螢矜暗。翻翻雀轉更。閉門行老死。亦足慰平生。

燕

初見梁間牖戶新。銜泥已復哺雛頻。只愁去遠歸來晚。不怕飛低打著人。

午枕

茅簷一杯淡藜粥。有底工夫希鼎餗。書中至味人不知。雋永無窮勝梁肉。老夫享此七十年。每愧天公賦予偏。清泉洗脯煎山茗。滿榻松風清晝眠。

項里觀楊梅

山前五月楊梅市。溪上千年項羽祠。小繖輕輿不辭遠。年年來及貢梅時。鄉俗謂楊梅止日梅。

又

隔歲租園不計錢。楊梅海裏過年年。癡人只競閑名利。那信三山是地仙。

又

溪流曲曲樹陰陰。人語煙中覺塢深。把定山僧同一笑。明年強健更相尋。

又

山中戶戶作梅忙。火齊驪珠入帝鄉。細織筠籠相映發。華清虛說荔枝筐。鄉俗謂選擇楊梅爲作梅。

夜歸

城角傳三弄。桑村喜獨歸。雨多螢滿野。徑狹露沾衣。食儉鹽醃薄。年衰氣力微。青燈對兒女。撫事一歎歎。

五月十一日睡起

病眼慵於世事開。虛堂高臥謝氛埃。簾櫳無影覺雲起。草樹有聲知雨來。茶椀嫩湯初得乳。香篝微火未成灰。翛然自適君知否。一枕清風又過梅。

示客

世間可笑走踈踈。誤認虛空作汝身。已覓餘名潤枯骨。更謀厚積遺何人。風旛畢竟非心境。瓦礫何妨是道真。新藕出泥瓜上市。爲君一醉墮紗巾。

雨中作

兩聲一滴不肯住。客夢欲成還自驚。白水陂邊破茅屋。亂書堆裏老儒生。出行豈復有流輩。未死尙能躬釣耕。十日無魚亦何歎。新菰幸可配吳杭。旬日來溪水泛溢。魚不可得。

舟中遣興

湖海渺雲濤。浮家得養高。方牀展蕪篔。短褐束郿條。酒裏亦何好。人間聊可逃。酣歌榭樓底。萬事一秋豪。

自嘲

少讀詩書陋漢唐。暮年身世寄農桑。騎驢兩脚欲到地。愛酒一樽常在傍。老去形容雖變改。醉來意氣尙軒昂。太行王屋何由動。堪笑愚公不自量。

齋中雜興十首以丈夫貴壯健慘戚非朱顏爲韻

成童入鄉校。諸老席函丈。堂堂韓有功。英概今可想。從父有彥遠。早以直自養。始終臨川學。力守非有黨。紛紛名佗師。有泚在其類。二公生氣存。千載可畏仰。

又

士生學六經。是爲聖人徒。處當師顏原。出當致唐虞。斯文陣堂堂。臨敵獨援枹。異端滿天下。一掃可使無。乃知立事功。先要定規模。彼雖力移山。安能奪匹夫。

又

公議在天下。如人有元氣。平居失護養。一旦可勝諱。神丹卒難求。百疾起如蝟。奄奄息僅屬。熟視吁可畏。大義在春秋。遺跡悲漢魏。君看徐孺子。底物視富貴。

又

昔我自蜀歸。耆舊已凋喪。後來二三公。尙慰天下望。千里一紙書。懇勸問亡恙。嗚呼亦已矣。遺語寄悲愴。我亦迫桑榆。便恐無輩行。夜窗對青燈。力憊心尙壯。

又

餘齡垂八十。雖億猶強飯。正如老病馬。風沙時一噴。玉關眇何許。道里何啻萬。目中埃歷歷。欲進不能寸。矯首望秋空。徒羨霜鶴健。瘦骨亦何悲。吾非麒麟植。

又

琅琅誦詩書。尙記兩髦髻。誰料七十年。沉滯終坎窞。炊突映茅廬。日暮煙慘慘。忍窮端已熟。撫事空自感。狂言悔噬臍。衆訾驚破膽。尙有愛書心。還如嗜菖歎。

又

去國已酉冬。忽見十頽歷。衰殘口兩齒。困阨家四壁。時看溪雲生。飽聽簷雨滴。悠然度寒暑。何處著欣戚。幽人豈知我。月夕聞吹笛。何當五百歲。相與摩銅狄。湖中風月佳時。每聞笛聲。異甚。莫知何人。意其隱君子也。

又

扁舟東下破。日月去若飛。當時筆硯舊。久已晨星稀。俊逸如伯渾。簡詣如知幾。天高鬼神惡。回首萬事非。我欲沂黃牛。買屋居青衣。九原不可作。哀哉誰與歸。

又

荷鉏草堂東。藝花二百株。春風一朝來。白白兼朱朱。南列紅薇屏。北界綠芋區。偃蹇雙松老。森聳萬竹懼。餘地不忍蕪。插援引瓠壺。何當拂東絹。畫作山園圖。

又

閑居寂無客。柴門晝常關。孤舟小於葉。放浪煙水間。樹暗楊梅村。露下白蓮灣。釣魚樵風溼。買酒石帆山。向來支許輩。恐亦無此閑。道逢若耶叟。握手開蒼顏。

夏五月方閱雨忽大風兩三日未止

海風一夕狂拔木。山雨三朝猛穿屋。向來望雲眼欲枯。雨甚還憂敗嘉穀。今年旱勢連吳中。吾州乃獨勞神龍。稽首龍公要斟酌。收雲歸山水歸壑。

又

五月晝晦天欲雨。街中人面不相覩。風聲撼山翻怒濤。雨點飛空射強弩。一兩三日姑可休。龍其玩珠歸故湫。千里連雲慶多稼。性肥酒香作秋社。

遣興

外物元知等一塵。浮生何事最關身。江山好處得新句。風月佳時逢故人。有酒一樽聊自適。藏書萬卷未爲貧。聖賢自古無如命。君看居東與在陳。

又

老向人間怯路歧。感今懷昔不勝悲。詩無傑思知才盡。酒有殘杯覺氣衰。縣郭燈疏尋店夜。津亭雨細待船時。筋骸尙給春耕在。便買烏犍亦未遲。

六月一日曉賦

視夜明星高。蟬聲滿庭樹。殘骸幸差健。散髮穿兩屨。巖扉手自開。曳杖得徐步。碧瓦浮青煙。圓荷瀉殘露。草木無俗姿。雞犬共幽趣。兒來問晨炊。一笑揮使去。

露坐

泠泠野水赴橫塘。坐久松風入髮涼。月淡星疏天欲曉。未妨清嘯倚胡牀。

夜賦

月暈知將雨。風聲報近秋。暗廊行燭燿。深樹嘯鸛鷗。老幸傳家事。狂猶爲國憂。相齊雖已矣。且復飯吾牛。

乙夜納涼

幽人新製葛衣成。二寸藤冠覺髮輕。淨掃中庭延月色。緩拖拄杖聽蟬聲。微涼便欲疏紈扇。小醉何妨倒玉罌。八尺風漪真笑睡。故應高枕到窗明。

五鼓

夢斷華胥夜艾時。遶廊蕭散曳筇枝。長空漸見明河落。短調猶殘畫角吹。世事又隨朝日出。釣船莫負早秋期。南湖五畝新菽熟。此味惟應老子知。

老態

齒如強留客。雖住無久理。目如新募兵。臨敵烏可使。齒廢疏梁肉。目澀屏書史。浮世真幾何。老態遽如此。啜粥習安坐。用短亦自喜。作詩記吾衰。聊用調穉子。

枕上聞風鈴

毒暑今年倍故常。蟲聲四合欲昇牀。老人不辦搖團扇。靜聽風鈴意已涼。

又

流汗沾衣熱不勝。饑蚊乘勢更縱橫。夢回忽覺南風起。時聽鏗然一兩聲。

寄贈湖中隱者

高標絕世不容親。識面無由況卜鄰。萬頃煙波鷗境界。九秋風露鶴精神。子推綿上終身隱。叔度顏回一輩人。無地得申牀下拜。夜聞吹笛度煙津。

觀畫山水

古北安西志未酬。人間隨處送悠悠。騎驢白帝城邊雨。挂席黃陵廟外秋。大網截江魚可膾。高樓臨路酒如油。老來無復當年快。聊對丹青作臥遊。

六月十八日立秋未旦起行山園口占

北斗離離柄漸西。披衣出戶聽晨雞。豈惟蒲柳先搖落。坐覺風雲已慘悽。斷簡不妨重料理。清樽隨處可提攜。穿林莫惜衣霑露。爽徹靈臺勝寶犀。

新秋

衰髮成絲奈若何。更堪日月疾飛梭。梧桐敗葉飄猶少。蟋蟀雕籠賣已多。歲樂喧呼沽酒市。夜涼悽斷采菱歌。老夫亦動秋風興。欲倩鄰翁買釣蓑。

晨起自山園歸書室

世事苦紛紛。村墟寂不聞。穿林拾蟬蛻。隔浦數鷗羣。搖落初飄葉。高春未散雲。歸來書滿眼。猶足肆吾勤。

初秋小雨

雨來一洗肺肝熱。風過遠吹禾黍香。誰識山翁歡喜處。短檠燈火夜初長。

出遊

舉世誰能伴我閑。出遊隨處一開顏。繫船扛鼎將軍廟。秣蹇流觴內史山。小市況經搖落後。高城回望莽蒼間。歸來燈火湖塘晚。指點柴門未上關。

對酒

平生但信緣。作計每不審。春炊官倉粟。一飽輒甘寢。二年棄微祿。溝壑方懷懷。藜羹闕鹽酪。豆飯雜沙塹。偶然跋不死。得酒猶痛飲。捩回灑灑梅。喚省邯鄲枕。

自勉

翼歲讀隱書。妄意慕陶葛。芝房及乳石。日夜躬采掇。飛舉固未能。死籍或可脫。那知事大謬。髮齒將禿豁。神僊豈棄汝。正坐自迂闊。餘年尙努力。勿待燭見跋。

新涼

初卷含風入尺漪。井桐已復不禁吹。蟬聲未用催殘日。最愛新涼滿袖時。

醉中題民家壁

壯歲羈遊厭故棲。暮年却愛草堂低。交情最向貧中見。世事常於醉後齊。松吹颼颼涼短髮。芒屨策策響新泥。吾詩戲用寒山例。小市人家到處題。

秋景

兩泣蘋花老。風搖稗穗長。昏林喧宿鳥。秋院咽啼螿。舊學成迂闊。初心墮渺茫。顏齡尙餘幾。誰與問蒼蒼。

舟中作

會稽城上角鳴鳴。日落煙村暝欲無。千載虛名笑張翰。一官元不直尊鱸。

雜興

足弱僅能行。齒搖常欲墮。扶持賴藥物。苟幸一日過。事來強酬答。其實惟欲臥。平生許文休。歲晚依馬磨。

又

蘭臺遺漆書。汲冢收竹簡。辛勤萬卷讀。不負百年眼。圍座浩縱橫。插架高巉巖。一笑顧吾兒。銀艾何足縮。

又

壽年本偶爾。亦與富貴同。一日復一日。遂作八十翁。几杖稱大耋。貂蟬號三公。信手忽成盧。孰爲拙與工。

又

少年豈知酒。借醉以作狂。中年狂已歇。始覺酒味長。漉漉漉樽綠。酌以紅螺觴。醒醉不可名。兀坐萬事忘。

自詠閑適

殘年鄰曲幸相依。真似遠天老鶴歸。荷浦未疎魚正笑。鄉俗謂夏秋魚爲荷葉下魚。豆畦欲暗雉初肥。款門路近時看竹。送酒人多不典衣。最喜夕陽閑望處。數家垣屋鎖煙霏。

近村暮歸

莫笑山翁雪鬢繁。歸休幸出上恩寬。鬢樽恰受三升醞。龜屋新裁二十冠。鬢樽卽皮囊矣。所云詞陵樽也。予近以龜殼作冠。高二寸許。僧閣鬻茶同淡話。漁舟投釣卜清歡。還家欲作諸孫贈。村路纍纍柿未丹。

秋興

扶衰又見素秋過。未死其如造物何。破屋頽垣那敢議。濁醪麤飯已爲多。佩刀但可償黃犢。作字安能博白鵝。龜紫拜恩如夢寐。殘年其實一漁蓑。

讀史有感

不肯低頭就世事。亦不作牋與天公。惟須痛飲以醉死。亂山深處聽松風。

又

昔人識不過十字。富貴封侯渠自如。龜堂閉門萬卷讀。一字不肯供時須。

又

蘇門長嘯不可親。鹿門采藥更絕塵。老死故山雖自許。掩書未免愧斯人。

卷四十四

讀何斯舉黃州秋居雜詠次其韻

造請非所長。一帶每懶束。揖客雖小殊。亦未勝僕僕。正須駕柴車。歸藝東籬菊。故山甘水泉。羣飲友麋鹿。百年不堪玩。萬事要自燭。小人欺屋漏。吾輩當戒獨。

又
少從長者遊。羸聞聖人道。日食雖一簞。頗覺顏色好。辛勤五十年。猶秉後凋操。風俗日已移。令人惡懷抱。紛紛堪一哂。驕我以旗纛。豈知江湖間。世襲散人號。

又
全家寄舴艋。結茅非始謀。江市得煙蓑。不博千金裘。道散俗日薄。老聃出衰周。治身去健羨。如稼必去蠹。吾身一隙塵。斯世一客郵。君能通其說。生死真浮休。

又
衆星麗長空。惟月最爲傑。峨峨大圓鏡。粲粲白玉玦。穿林散珠璣。入戶凜霜雪。世方喜繁華。我獨慘不悅。清光真可友。肝肺冰欲結。彼哉市朝人。怱怱生內熱。

又
夜靜我欲歌。四座且勿喧。堯舜本得道。富貴何足捐。聖人久不作。學者墮語言。著書各專門。百家散如煙。一身有不知。況察魚與鳶。安得天下士。相與明忘筌。

又
古人處丘園。如彼不嫁女。終身秉大節。敢恨老環堵。嗟予晚乃覺。乞骸歸卒伍。去就講已熟。穴居宜知雨。百尺持汲綆。道長畏天暑。先見雖有慚。愛身亦自許。

又
賦性本剛褊。直欲棲深山。晚乃稍悔悟。自恨不少寬。胡越本一家。禍福環無端。少忍萬事畢。孰爲熱與寒。我友爲我言。冠蓋滿長安。人人不如君。八十猶朱顏。

又
倚牆有鉏耨。當戶有杼軸。雖云生產薄。桑麻亦滿目。況承先人教。藏書令汝讀。求仁固不遠。所要念念熟。喟然語兒子。勿愧藜藿腹。亦勿慕虛名。守此不啻足。

又
人生天壤間。出處本異趣。釋耒入市朝。徒失邯鄲步。昔人亦有言。刻足以適屨。奈何不自反。忽已迫霜露。我躬尙不閱。況爲子孫慮。歲晚故山寒。地爐可煨芋。

又
少年去國時。不忍輕出晝。晚歸補省郎。但覺慚列宿。人豈不自揣。幸矣老雲岫。知止詎敢希。要且避嘲詬。誰將有限身。遺臭古今宙。人誅雖或逃。陰陽將汝寇。

讀蘇叔黨汝州北山雜詩次其韻

暑耘日炙背。寒耕泥沒脚。衆人占膏腴。我獨治磽确。力盡功未見。厥土但如昨。豈惟窘糠粃。直恐轉溝壑。今年雨暘時。天如相耕穫。屋傾未暇扶。且復補籬落。

又
舊絮補破襦。生薪續微火。悍孤有凍死。自視亦已過。鄰翁冒風雪。斗酒持飲我。尖團擘霜蟹。丹漆釘山果。欣然共笑語。何止寬寒餓。布被擦更闌。招魂不須些。

又
三山鏡湖上。出郭無十里。結廬非所擇。但取便薪水。間亦出從宦。安能慕園綺。地主卜林塘。亦復異子美。蓬蔦方丈室。僅足容臥起。吾意本扁舟。陸居聊爾耳。

又
祠官粟一囊。不贍軀七尺。前年蒙寬恩。例許乞骸骨。聯翩三兒子。俱作鸛雀碧。賦祿雖尙遠。亦足慰衰白。幅巾茆簷下。稱病謝來客。從今門前路。永掃車馬迹。

又
舍北有漁磯。下臨清溪流。柳陰出朱橋。蓮浦橫蘭舟。蓴絲二三畝。采掇供晨羞。魚蝦雖瑣細。亦足贍吾州。人生常如此。安用萬戶侯。綠蓑幸可買。金印非所求。

又
寓形百年中。如臂屈伸頃。少壯幾何時。已復隨衰境。老人喜自潔。臨澗漱綠淨。佛龕香事已。僧鉢供養麩。山茶試
芳。野果薦甘冷。不學萬錢廚。長魚取淮頰。

又
巖石著幼興。風月思玄度。老子放浪心。常恐迫遲暮。安得世人。握手相與語。吾宗甫里公。奇辭賦漁具。高風魏
不嗣。徒有吟諷苦。霜風吹短衣。何山不堪住。

又
久病臥江村。髮白面鰲黑。艱難念溫飽。日夜積涓滴。聚壤糞園桑。荷鋤耘壠麥。苟失一日勤。農事深可惜。小兒念
乃翁。卒歲共欣戚。跂望明年春。社雨泥一赤。

又
德孫秀眉宇。慨然修初服。枯腸貯詩書。十飯九不肉。成童將覓舉。想見袍立鵠。先澤儻未衰。豈無五秉粟。汝能記
吾言。併以告阿福。閉門勿雜交。一經萬事足。

又
吾幼從父師。所患經不明。何嘗效侯喜。欲取能詩聲。亦豈劉隋州。五字矜長城。秋雨短檠夜。掉頭費經營。區區宇
宙間。捨重取所輕。此身儻未死。仁義尙力行。

新治火閣
老子今朝喜有餘。房櫳新舉得安居。爐紅氈暖不出戶。木落窗明常讀書。浮蟻撇嘗人散後。蹲鴟煨熟雪飛初。頽
然自適還終日。殊勝隆中臥草廬。

枕上作
無地容錐四壁空。浩然亦未愴途窮。夢回倦枕燈殘後。詩在空階雨滴中。徂歲易成雙鬢禿。故人難復一樽同。唐
安萬里音塵絕。誰爲寒沙問斷鴻。張季長今年尙未通書。

又

蕭蕭白髮臥扁舟。死盡中朝舊輩流。萬里關河孤枕夢。五更風雨四山秋。鄭虔自笑窮耽酒。李廣何妨老不侯。猶有少年風味在。吳牋著句寫清愁。

初睡起有作

喔喔曉雞鳴。迢迢殘漏聲。撥衾幽夢斷。褰幌小窗明。猿婢篝衣暖。山童擁篲行。老夫徐下榻。負火聽鉶笙。

示友

道向虛中得。文從實處工。凌空一鷲上。赴海百川東。氣骨真當勉。規模不必同。人生易衰老。君等勿怱怱。

述懷

宦遊輕用不貲身。斂退今爲省事人。睡俟面乾元不校。羹憂手爛更誰嗔。時分鄰瓮雙瓶綠。見張右史詩。永謝官倉五斗陳。最好暮秋溪上路。柴門月色向人新。

枕上

殘燈熠燿露螢明。落葉蕭蕭寒雨聲。堪笑衰翁睡眠少。小詩常向此時成。

又

斷香猶在夢初回。燈似孤螢闔復開。怪底詩情清徹骨。數聲新雁枕邊來。

病足久敗遊山之興。山中道人多見問。戲作示之。

病侵腰股作蹒跚。九折途生布武間。東姥自無緣見佛。北公那有力移山。買來芒屨真虛費。扶上籃輿亦漸艱。賴有春陵數峯在。虛窗高臥看孱顏。

舟中作

三百里湖新月時。放翁艇子出尋詩。城頭蜃閣煙將合。波面虹橋柳未衰。漁唱蒼茫連禹穴。寒潮蕭瑟過娥祠。祖龍虛負求僊意。身到蓬萊却不知。

追懷胡基仲。基在雲門顯聖寺後。

高潔胡徵士。當時已絕無。門庭謝殘客。薪水斥常奴。遺藁何由見。英魂不可呼。誰憐墓上草。又是一年枯。

十月八日九日連夕雷雨

兩聲聒耳不停點。雲氣冒山殊未開。敢恨終年惟短褐。但驚十月有奔雷。牽蘿且復補茆屋。飯豆何妨羹芋魁。莫笑賦詩無傑句。年來萬事學低摧。

西村

今年四月天初暑。買蓑曾向西村去。桑麻滿野陂水深。遙望人家不知路。再來桑落陂無水。閉門但見炊煙起。疑是羲黃上古民。又恐種桃來避秦。

感事示兒孫

人生讀書本餘事。惟要閉門修孝悌。畜豚種菜養父兄。此風乃可傳百世。我聞長安官道傍。至今人指魏公莊。北方俗厚終可慕。一字不識勤耕桑。長安有魏鄭公舊莊。裔孫皆力耕。無識字者。張芸叟嘗過之。

或遺木瓜有雙實者香甚戲作

宣城繡瓜有奇香。偶得竝蒂置枕傍。六根互用亦何常。我以鼻嗅代舌嘗。

十月

十月霜侵季子裘。吾詩又送一年秋。風回斷續聞樵唱。木落參差見寺樓。久已浮雲看富貴。固應華屋等山丘。江邊海際多幽致。擬跨青驪處處遊。

初晴

袖手東窗初日明。殘編未負老書生。不勝多病畏寒雨。正得一霜方快晴。客戶餉羹提赤鯉。莊月以雞魚之屬來餉。謂之送羹。鄰家借碓擣新秔。柴荆莫怪無車馬。恰要無人識姓名。

梅花

造物作梅花。毫髮無遺恨。楚人稱芳蘭。細看終不近。

又

五年作竹梢。十年作梅枝。九泉子廉子。此語今誰知。廉宣仲自言以五年之功作竹梢。十年之工作梅枝。

又

欲與梅爲友。常憂不稱渠。從今斷火食。飲水讀僊書。

又

春信今年早。江頭昨夜寒。已教清徹骨。更向月中看。

又

江上梅花吐。山頭霜月明。摩挲古藤杖。三友可同盟。

對酒戲詠

淺傾西國葡萄酒。小嚼南州豆蔻花。更拂烏絲寫新句。此翁可惜老天涯。

冬夜

北斗挂屋角。西風驚雁羣。山寒歲云暮。人靜夜中分。酒滴糟牀雨。香生紙帳雲。眼花書課減。舊學失鋤耘。

冬晴稍理舊學有感于懷

天公元不吝光陰。付與書生遂本心。老已爲民猶學問。向雖作吏半山林。百年斷彙傳三世。一日晴窗抵萬金。努力

力更思恢道術。酒杯雖把不須深。

葺小圃及東齋

山翁作園沼。安樂及禽魚。凡草猶當養。芳蘭可得鋤。初非治一室。亦豈愛吾廬。暮境雖云迫。心期故有餘。

讀經示兒子

通經本訓詁。講字極聲形。未盡寸心苦。已銷雙鬢青。懼如臨戰陣。敬若在朝廷。此是吾家事。兒曹要細聽。

出遊不果

天柱峯前水亂流。石碁渡口葉飛秋。青鞋已是前身事。縱有籃輿亦嬾遊。

夢行秦晉間有作

夜店絢衾暖。晨廚粟飯香。驢肩雙酒榼。童背一琴囊。冰坼河聲壯。郊平塔影長。古今均夢境。不用弔興亡。

聞雞鳴自警

爲善孳孳進德新。雞鳴每念舜何人。此身強健直須勉。一日會當無此身。

嘲子聿

講誦多吳語。鉤提學佐書。夜分燈未徹。晨起髮慵梳。餉食園官菜。少留溪友魚。能憐乃翁病。身自舉籃輿。

馬上口占

大耋光陰豈自期。卽今堪喜亦堪悲。關河隔絕初心負。憂患侵尋舊學衰。羸馬涉溪孤店路。栖鴉滿樹曉霜時。憑鞍殘夢悠然覺。又得浮生一首詩。

幽居

莫笑茅茨陋。岡形接臥龍。連娟鏡湖月。縹渺寶林鐘。閑約魚池釣。眠聽碓舍舂。他年好事客。過此訪遺蹤。

感事

陋巷何須歎一瓢。朱門能守亦寥寥。衲衣先世曾調鼎。野褐家聲本珥貂。若悟死生均露電。未應富貴勝漁樵。千年回首俱陳迹。不向杯中何處消。沈義倫丞相裔孫爲僧。劉仁瞻侍中裔孫爲道人。皆孤身死紹興中。二公之後幾絕。

初寒

逐祿天涯半此生。明時寬大許歸耕。山圍魚市寒無色。雨掠蓬窗夜有聲。白髮青燈身潦倒。殘蕪落葉歲崢嶸。爾來有喜君知否。買得烏犍萬事輕。

寄題季長飾菴

近詔還中秘。新文記飾菴。主盟君勿讓。賈勇我何堪。木落山容瘦。雲齊雪意酣。何由共杯酒。把蟹擘黃甘。

對食書媿

連年寬水旱。天若相懸車。麤有芋魁豆。併忘熊掌魚。先生飯不足。賢者食無餘。老我知何幸。晨盤厭美蔬。

戲題酒家壁

漫道江南倚寺樓。豈如煙雨弄扁舟。并刀不剪清愁斷。楚練難磨白日留。湖上采菰甘似蜜。街頭買酒滑如油。金丹九轉何時畢。且對梅花一醉休。

又

送了春歸又送秋。人間隨處寄悠悠。百年此際成遺老。萬里當時賦遠遊。筆力日衰慚蹕馬。江天歲晚狎冥鷗。清狂自笑無時歇。又犯新寒上市樓。

又

朋舊存亡寂不聞。年年江海愴離羣。時平酒價賤如水。病起老身閑似雲。飽食每慚荒舊學。後生誰可付斯文。案頭清鏡塵昏盡。殘髮知添白幾分。予老甚。髮乃有未白者。

十月二十八日夜風雨大作

風怒欲拔木。雨暴欲掀屋。風聲翻海濤。雨點墮車軸。拄門那敢開。吹火不得燭。豈惟漲溝谿。勢已卷平陸。辛勤菽宿麥。所望明年熟。一飽正自艱。五窮故相逐。南鄰更可念。布被冬未贖。明朝甑復空。母子相持哭。

夜寒燃火有感

墮巢拾槁枝。微火吹孤螢。風火一相得。須臾細煙青。暖焰遂騰上。凜冽回玄冥。君看金鼎火。其初亦熒熒。至理存橐籥。奇功挾風霆。笑談縛三彭。指顧役六丁。超然出塵世。豈獨制頽齡。勸君勿虛死。萬過誦黃庭。

農事休小葺東園十韻

歸老心常逸。新寒體亦康。幸當農事隙。稍治舊園荒。翦闢西山出。縈回北徑長。作欄扶弱蔓。換土植孤芳。霜霰貧簷碧。風煙薜荔蒼。蝶來翻小翅。鳥下嚙幽吭。疏剔巖泉集。耘鋤藥草香。溪藤裁酒榼。番錦製詩囊。坐久雲生石。歸遲月滿廊。人間胡不樂。拔宅笑君房。

開東園路北至山腳因治路傍隙地雜植花艸

清溝東畔翦蒹菅。雖設柴門盡日關。遠引寒泉成碧沼。稍通密竹露青山。幽花泣露開仍落。好鳥穿林去復還。更

上橫岡吾所愛。小兒試覓屋三間。

又

魏野林逋久已僊。放翁寄傲鏡湖邊。松根偃蹇支琴石。巖竇潺湲洗藥泉。半祿掃空雖在我。殘年健甚豈非天。遙遙桑芋家風在。重補茶經又一編。

又

憶自南昌返故鄉。移家來就鏡湖涼。鶴雛養得冲霄漢。松樹看成任棟梁。手版永拋貧亦樂。肩輿時上老何妨。平郊東望江城近。隱隱清笳送夕陽。

又

父子追隨一笑傾。東園東畔路初成。夾栽芳草如繩直。前出籬門似砥平。春近野梅香欲動。雨餘溝水細無聲。今朝有恙誰能識。不用人扶亦自行。

又

病眼逢人每懶開。正須此地洗氛埃。數枝梅向林梢出。一脈泉從嶺背來。藤杖有時緣石磴。風爐隨處置茶杯。殘軀自笑如春草。又喜天邊斗柄回。

又

避俗從來恨不深。家園栽種偶成陰。西連幾曲菖蒲澗。東接無窮蒼蘆林。烏桕谷寒迎野步。金沙泉冷洗塵襟。清音可寫吾詩拙。它日君來試抱琴。

連日治圃至山亭又作五字

雜圃課僮奴。爭前不待呼。水泉經雨壯。藜莽得霜枯。高樹鳴雙鶻。清池下兩鳧。暮年惟樂此。餘念一毫無。

又

富貴尋常事。天奚獨汝慳。十分教懶拙。百倍與清閑。放鶴雲千頃。釣魚溪一灣。此詩雖信筆。它日不須刪。

又

好竹千竿翠。新泉一勺冰。殘蕪襯落日。老木上寒藤。細磴欹難過。危欄曲可憑。歸時忽已暮。點點數漁燈。

又

門開度略約。路盡上坡陁。農隙閑耕犢。樵歸起醉歌。青煙舞鸞鳳。白石伏龍鼉。剩有筇枝興。窮冬氣已和。

寒夜

敗屋頽垣對短檠。課書聊自限三更。蕭條草木寒無色。窸窣狐狸出有聲。半榼濁醪求火暖。一篇疑義與兒評。未須遽起窮愁歎。明日尋梅雪正晴。

掩卷有感

少年雖讀書。每恨性疎懶。中年頗自勵。已歎歲月短。學不到聖賢。此意終未滿。甑空不憂飢。衣垢不思浣。區區管晏事。端可付一莞。羸然八十翁。風雪臥空館。

閑遊

出雜半牛牧。歸隨烏雀栖。聊持數匙飯。就乞半盃齋。浩蕩凌原野。崎嶇歷澗溪。閑遊豈不好。客意自凄凄。

野寺

閑行入野寺。僧飯鼓其鐙。慘慘風務面。暉暉日滿廊。去來元自在。賓主兩相忘。却下山坡路。樵歌出隴長。

三江

三江郡東北。古戍鬱嵯峨。漁子船浮葉。更人鼓應鼙。年豐坊酒賤。盜息海商多。老我無豪思。悠然寄醉歌。

讀老子

放翁晨興坐龜堂。古銅匾燒海南香。臨目接手精思牀。身如槁木心如牆。八十一章獨置傍。徐起開讀聲琅琅。恍然親見古伯陽。袂屬關尹肩庚桑。孰能試之出毫芒。末俗可復躋叢黃。陰符僞書實荒唐。稚川金丹空有方。人生忽如瓦上霜。勿恃強健輕年光。

新泉絕句二首

掃石蔭雙松。岸巾穿萬竹。爾來又一奇。巖泉寒可掬。

鱗泉可滄蒼。就泉可洗藥。楚人曾未知。但謂纓可濯。

風雨

七十年來樂太平。白頭父子事春耕。因思世事悲身事。更聽風聲雜雨聲。四海故人強半死。一襟清淚對誰傾。新春要覓燒丹處。不住青城住赤城。

題菴壁

萬疊青山繞鏡湖。數椽自愛野人居。風來松度龍吟曲。雨過庭餘鳥迹書。小疾不妨尋酒去。豐年偶及挂冠初。有金可散還多事。四壁蕭然計未疎。

又

衰髮蕭疎雪滿巾。君恩乞與自由身。身并猿鶴爲三友。家託煙波作四鄰。十日風號未成雪。一年梅發又催春。漁舟底用勤相覓。本避浮名不避人。

讀僊書作

與世已如風馬牛。松風終日聽鸞鷗。一爐丹熟定不死。半瓮酒香安得愁。腰帶鞋前秋萬頃。香爐峯下水交流。人間事事皆須命。惟有神仙可自求。

讀淵明詩

淵明甫六十。遽覺前途迤。作詩頗感慨。自謂當去客。吾年久過此。霜雪紛滿幘。豈惟僕整駕。已迫牛負輓。奈何不少警。玩此白駒隙。傾身事詩酒。廢日弄泉石。梅花何預汝。一笑從渠索。顧以有限身。兒戲作無益。一牀寬有餘。虛室自生白。要當棄百事。言從老聃役。

寒夜枕上

屋老霜寒睡不成。迢迢漏鼓過三更。烏啼林外月初上。犬吠水邊船夜行。市有歌呼知歲樂。亭無枹鼓喜時平。吾詩欲寫還慵起。臥看殘燈黯復明。

新晴出門閑步

一夜風號作快晴。披裘扶杖出門行。青山繞舍雪封盡。丹葉滿街霜染成。廢寺僧寒多晏起。近村農惰闕冬耕。窮人旋畫膨臍計。自買蹲鴟煑糝羹。

聞笛

雪飛數片又成晴。透瓦清霜伴月明。一曲忽聞高士笛。臨窗和以讀書聲。

鳴禽

小徑霜泥結凍時。幽人十日廢筇枝。新晴池館春來早。簾外鳴禽聖得知。

食晚

日高得米喚兒春。苦雨園蔬久闕供。省事家風君看取。半飢半飽過殘冬。

午坐戲詠

貯藥葫蘆二寸黃。煎茶橄欖一甌香。午窗坐穩摩癡腹。始覺龜堂白日長。

戲詠鄉里食物示鄰曲

山陰古稱小蓬萊。青山萬疊環樓臺。不惟人物富名勝。所至地產皆奇環。茗芽落磴壓北苑。藥苗入饌逾天台。明珠百斛載芡實。火齊千擔裝楊梅。湘湖蓴長涎正滑。秦望蕨生拳未開。箭萌蟄藏待時雨。桑蕈菌蠢驚春雷。櫻花蒸煑蘸醃醬。薑茁披剝醃糟醅。細研罌粟具湯液。濕裹山積供炮煨。老饕自覺筆力短。得一忘十真堪咍。從今置之勿復道。一瓢陋巷師顏回。

歲暮貧甚戲作

得米還求澗底薪。始知天地有窮人。年開八秩寧賒死。官及三兒不救貧。藥盡無如醫偃蹇。囊空那辦酒逡巡。柳條萱草添愁思。不似尋常見早春。

汪叔潛教授挽辭

江南有奇士。英譽早飛騰。未見心先契。相從氣倍增。時煩問字酒。屢共讀書燈。下榻延徐孺。同舟得李膺。百年期永好。一旦失良朋。稚子初何取。龍門亦許登。流光疾於鳥。舊社冷如冰。欲作千言誄。衰遲愧未能。

汪給事太夫人程氏挽辭夫人內外二族享壽八九十者至二十餘人

爵色恩榮盛。鄉閭譽望尊。儒科傳累葉。上壽萃高門。阡茂新栽柏。堂餘舊樹萱。故民何以報。沾灑望秋原。
太恭人諭氏挽辭恭人生於紹聖二年。沒於慶元六年。壽九十六。自太孺人至太恭人。皆特恩封。毫齒人誰及。高門世共榮。始終膺備福。穉老遇昇平。綸綵褒嘉事。鄉閭惻愴情。吾詩儻傳世。亦足見平生。

路乾

日曬霜融步步泥。旬餘不到石泉西。連朝和暖得乾路。喚取鄰翁來杖藜。

寒夜

閉戶歲云暮。翻書夜向闌。足僵知火盡。目鈍覺燈殘。躍浦魚驚獺。穿林犬逐獾。三年納微祿。無媿得心安。

乍晴至園中

藥笈漁竿每自隨。枯筇短帽恰相宜。投林但有窮猿喜。伏櫪元無老驥悲。巖溜甘寒通碧沼。野梅清絕隔疎籬。放翁老甚情懷懶。那辨題詩寄所思。

卷四十五

十二月三日夜橋上看月

常時新月有無間。今夕清暉抵半環。柳外橋高最堪望。憑闌目送下西山。

流年

流年及老敢前期。浮世如漚只自知。多貯閑愁持抵酒。剩遊好景擬供詩。海東藥到寬衰疾。幔下書稀愴別離。陳明州鮑人參。張季長久不得書。約束春盤莫草草。又當梅發兩京時。

山家

風月寬閑地。溪山隱遯身。雲邊安井臼。竹裏過比鄰。洗甬分巖瀑。烹芝束澗新。柴門敲不應。疑是避秦人。

又

種藥爲生業。彈琴悅性靈。中宵煑白石。平日誦黃庭。茶熟眠初起。兒扶酒半醒。意行無定處。猿鳥共忘形。

又

長生固非道。得道自長生。書不傳關尹。言誰契廣成。羅浮觀日出。句曲聽松聲。聞說長安好。何妨醉太平。

又

陶葛金丹訣。千年秘不傳。人皆肖天地。世豈乏神仙。擾擾生趨死。悠悠食復眠。微言誰復領。浩歎撫遺編。

又

清絕更誰如。松風小閣虛。籬巾參几杖。鶴毳落琴書。新鑿淘丹井。常攜斲藥鉏。身閑隨處樂。何況是吾廬。

小舟白竹篷。蓋保長所乘也。偶借至近村戲作。

茅簷細雨濕炊煙。江路清寒欲雪天。不愛相公金絡馬。羨他亭長白篷船。

又

雪雲無際暗長空。小市孤村禹廟東。一段荒寒端可畫。白篷籠底白頭翁。

稻飯

買得烏犍遇歲穰。此身永免屬官倉。塘南塘北九千頃。八月村村稻飯香。鏡湖下至海。凡種稻九千頃。

殘臘

殘臘無多寒漸薄。新春已近日微長。棊枰散後軒窗靜。梅塢歸來襟袖香。海霧籠山青淡淡。河堤瀦水白茫茫。鶯

飛前導生遊興。笑岸綸巾上野航。

又

殘臘去春纔十日。衰翁告老已三年。乳糜但喜分香鉢。銀勝那思映綵鞭。萬里當時嗟漫浪。一窗此日困沉綿。清

泉白石無人到。且結梅花淡淡緣。

書志

著書汗馬牛。不如守道力。賣文取卿相。詎是儒者職。孔光豈不學。千載汗簡冊。通塞本細事。于我奚失得。袁安臥

空廬亦度風雪夕。如何慕溫飽。撓節不自惜。我突無炊煙。或至日中晷。小兒抱遺經。衣短兩脛赤。吟誦何琅琅。聲如出金石。掩卷語乃翁。聖有陳蔡厄。

數日不出門偶賦

衰甚身如作繭蠶。經旬不省出茅菴。老僧遣信分茶串。隱士敲門致酒甌。看鶴松陰賞高潔。疏泉石罅得清甘。地偏心遠無車馬。賴有吾兒與劇談。

又

十二年來一日同。飯蔬略似誦經翁。居家不擬依鄰富。報國惟思祝歲豐。冰澗乍通寒溜碧。蘭叢新放露芽紅。閑門萬化俱觀盡。那用瞿曇更說空。

又

湖上蝸廬僅自容。寸懷無奈百憂攻。補衣未竟迫秋露。待飯不來聞午鐘。稚子挾書勤質問。鄰翁釋耒間過從。今朝一笑君知否。滿瓮新醅粥面醜。

寄題嚴居厚仲釣軒

人生有至樂。莫若江湖中。千錢買短艇。青箬織孤篷。潮生鼓棹去。煙波浩無窮。長歌送夕陽。回首萬事空。仲釣君已奇。我乃真釣翁。君出竿裘家。散人亦吾宗。一見即定交。正以氣味同。何時溪莊路。共醉蘆花風。溪莊蓋居厚所居。

寄趙昌甫并簡徐斯遠

我詩非大手。我酒亦小戶。得遊名勝間。獨以用心苦。趙子乃宿士。山立誰敢侮。寓名祝融祠。蓑笠臥煙雨。高吟三千篇。一字無塵土。朱先少許可。書每說昌甫。雖云忍飢瘦。得喪亦相補。嗟君與斯遠。文中真二虎。我老日益衰。想像氣如縷。

南園觀梅

幽徑疎籬洗世塵。眼明見此數枝新。橫斜恰受三更月。璀璨先回萬物春。洛浦凌波矜絕態。嶺山騎鶴想前身。放

翁著句煩君記。畫在生綃却未真。

老身

老身無處著。登望憶閑遊。白浪浮天遠。黃雲出塞秋。百年殊鼎鼎。萬事只悠悠。歲晚長亭路。寒侵季子裘。

獨處

老夫閉門衰疾嬰。小兒適有南山行。一奴入市暮未返。惜惜不聞烏雀鳴。地爐火死凍腳硬。欲作薄粥愁空鎗。平生遺日賴詩句。久矣無復吟哦聲。但餘一點真正念。照了萬象猶精明。欲論此事向何許。衆中倘遇千人英。

醉中歌

文章日益近衰陋。風節久已嗟陵夷。元祐大蘇逝不返。慶曆小范今誰知。閉門學古人共笑。低頭就俗我却疑。脫衣幸可買漁艇。爛醉浩歌隨所之。

排悶

人間歲月莽悠悠。老大悲傷只涕流。民饜糟糠寧細事。俗忘節義更深憂。潦歸宿麥猶難望。雪少同雲未易求。自歎此生真已矣。且偷暇日弄孤舟。

庚申十二月二十一日西和州健步持子布書報已取安康襄陽路將至九江矣悲喜交懷作長句

吳蜀相望萬里程。征鞍忽報近湓城。角巾已入三更夢。老眼先增十倍明。告至徧爲親舊問。勞還深媿里閭情。追思二紀睽離事。意極翻成涕泗橫。

又

萬里東來雙鯉魚。衰翁悲喜得兒書。聞過峴首已冬至。想到匡廬將歲除。辛苦山行穿雪履。淒涼旅飯嚼冰蔬。此行身歷艱難遍。莫厭東臯共荷鋤。

園中作

幽禽啼不去。紅蕊落還開。意適時時醉。身閑日日來。著書增小品。披句覓橙栽。消息吾兒近。扶衰又上臺。子布約二月初到鄉里。

足疾

足疾惟妨拜。登臨故自如。深知造物意。遠遂此心初。東塢閑看竹。西溪獨釣魚。暮歸猶未倦。把卷邊前除。

歲暮書懷

世事從來不可常。把茆猶幸得深藏。牀頭酒瓮寒難熱。瓶裏梅花夜更香。薄命元知等蟬翼。長途何處不羊腸。詩成讀罷仍無用。聊滿山家骨董囊。

又

憶昔初辭鵝鷺行。慨然誓墓老耕桑。蓼汀夜宿夢魂爽。梅塢暮歸襟袖香。窮巷每多閑日月。小兒時誦古文章。吾儕窮死從來事。敢變胸中百鍊剛。

除夜

守歲全家夜不眠。杯槃狼藉向燈前。相看更覺光陰速。笑語逡巡卽隔年。

修路

雨霽道壞困泥塗。木石紛然賴里閭。但使僅堪行便足。我無長戟與高車。

金丹

子有金丹鍊卽成。人人各自具長生。施行要使俗仁壽。收斂猶能心太平。劇飲似鯨身不倦。細書如蠅眼常明。更餘一事君難學。富貴真同涕唾輕。

平昔

平昔飄然林下僧。更堪衰與病相乘。殘年已任身生死。一念猶關道廢興。皎皎初心質天地。兢兢晚節蹈淵冰。子孫勿厭藜羹薄。此是吾家無盡燈。

二月三日春色粲然步至湖上

不媿衰翁雪鬢新。出門也復整烏巾。梅花隔水香撩客。野鳥穿林語喚人。長日難消惟泥酒。災年不死又違春。吾兒已到新安未。想掬清溪洗客塵。子布度將至新安。

計子布歸程已過新安入畿縣界

憶昔初登下峽船。一回望汝一凄然。夢魂南北略萬里。人世短長無百年。強遣老懷終兀兀。忽聞歸騎已翩翩。今朝屈指無窮喜。歷盡江山近日邊。

東園觀梅

出世仙姝下草堂。高標肯學漢宮粧。數苞冷蕊愁渾破。一寸殘枝夢亦香。問訊不嫌泥濺屐。端相每到月侵廊。高樓吹角成何事。只替詩人說斷腸。

喜得建茶

玉食何由到草萊。重奩初喜坼封開。雪霏庾嶺紅絲磴。乳泛閩溪綠地材。舌本常留甘盡日。鼻端無復麝如雷。故應不負朋遊意。手挈風爐竹下來。

春雨

細雨吞平野。餘寒勒早春。未增豪飲興。先著苦吟身。幽徑萱芽短。方橋柳色新。閉門非爲老。半世是閑人。

春雨

擁被聽春雨。殘燈一點青。吾兒歸漸近。何處寄長亭。

又

湖上新春柳。搖搖欲喚人。多情今夜雨。先洗馬蹄塵。

初春感事

馬跡車聲是處忙。經旬無客到龜堂。水初泛溢黏天綠。梅欲飄零特地香。世事紛紛人自老。歲華冉冉日初長。百錢不辦旗亭醉。空愛鵝兒似酒黃。

又

一樹紅梅已半殘。破裘也復敵春寒。忍窮過日却嗟易。負媿終身良獨難。活火靜看茶鼎熟。清泉自注研池寬。人生樂處君知否。萬事當從心所安。

道室書事

五十餘年讀道書。老來所得定何如。目光熠熠夜穿帳。胎髮青青晨映梳。二事皆紀實。甚畏蝮蛇寧斷手。已烹熊掌敢兼魚。春蕪二畝扶犁去。空憶高皇賜對初。

先少師宣和初有贈晁公以道詩云奴愛才如蕭穎士婢知詩似鄭康成晁公大愛賞今逸全篇偶讀晁公文集泣而足之

仕不逢時勇退耕。閉門自號景迂生。遠聞佳士輒心許。老見異書猶眼明。奴愛才如蕭穎士。婢知詩似鄭康成。早孤遇事偏多感。欲續殘章涕已傾。

春日雜題

梅花三十本。圍以疎竹籬。入春甫十日。開遍南北枝。少年輕節物。老大復苦衰。坐見零落盡。一杯初未持。

又

春雨路易乾。雨止即可行。梅花落無餘。蘭芽亦已生。好鳥何山來。向我飛復鳴。行矣東郊路。藉草作清明。

又

野水如棋枰。所至各成村。炊煙出茆屋。碓聲隔柴門。樹陰同戲兒。多已長子孫。安居無暴斂。何以報國恩。

又

春陰不成雨。正作卵色天。花開路無塵。楊柳搖輕煙。佳哉冷淘時。槐芽雜豚肩。長安墮胡虜。況說野狐泉。

又

客路行無窮。漁唱聽不厭。濤江西限吳。雲岫南入剡。蹇驢過小市。高柳擁孤店。去去望前村。鴉歸煙欲斂。

又

蒲柳深復淡。桃李白間紅。東皇一稅駕。萬物酣春風。煙村在何許。小屏團扇中。一笑喚稚子。相扶上短篷。

春日暄甚戲作

桃杏酣酣蜂蝶狂。兒童相喚踏春陽。老人自笑還多事。預恐明朝雨壞牆。

春日

遲日園林嘗美酒。和風庭院暎新絲。已過燕子穿簾後。又見鮒魚上市時。排悶與兒聯小句。破閑留客戰枯棋。殘年自覓安排處。除却歸休總不宜。

書室獨夜

忽忽新春過。惜惜一室幽。銅燈立雁趾。石鼎揭龍頭。老媿人扶拜。貧無食足謀。退居消日月。太半付莊周。

追感往事

太平翁翁十九年。紹興中。禁中謂秦太師爲太平翁翁。父子氣焰可熏天。不如茅舍醉村酒。日與鄰翁相枕眠。

又

世事紛紛過眼新。九衢依舊漲紅塵。桃花夢破劉郎老。燕麥搖風別是春。

又

渡江之初不暇給。諸老文辭今尙傳。六十年間日衰靡。此事安可付之天。

又

文章光焰伏不起。甚者自謂宗晚唐。歐曾不生二蘇死。我欲痛哭天茫茫。

又

諸公可歎善謀身。誤國當時豈一秦。不望夷吾出江左。新亭對泣亦無人。

書意

我本三生世外人。幻軀其實強冠巾。稍能閉戶學種菜。時亦長歌行負薪。一醉却非身外事。百年終是冢中塵。這知夢境無根底。莫信人言想與因。

又

病眼猶堪閱世人。難將雪鬢著烏巾。囊中錢盡罷沽酒。澗底雨寒愁束薪。老子那辭徙牛屋。癡人自喜拜車塵。窮通要是兒嬉事。懶就山僧講宿因。

清都行有序

辛酉二月十四日夜雞初鳴夢與故人查元章竝轡行大道中前望宮闕甚壯麗元章言吾輩當同預大議論予與約勿爲身謀元章拊掌稱善遂覺作清都行一首

積雨初收曉寒重野人忽作清都夢宮牆柳色綠如染仰視修門岌飛動元章久已葬岷山安得翩翩竝馳鞚春光如昔交舊少肺肝欲寫誰堪共頗聞天闈有疑事通明殿下方僉議約君切勿負初心天上人間均一是

春來食不繼戲作

久臥窮閭困負薪何妨掃盡太倉陳瘦如飯顆吟詩面飢似柴桑乞食身犧象未應殊斷木江湖底處有窮鱗大冠長劍人看好不換茅簷一幅巾

紹興辛酉予年十七矣距今已六十年追感舊事作絕句

常憶初年十七時朝朝烏帽出從師與許子威輩同從鮑季和先生晨興必具帽帶而出忽逢寒食停供課正寫磬書作寶碑

獨坐視老奴灌園

東窗日晚獨愁予眼闌年來頗廢書賴有吾家老阿對相從引水灌園蔬

雨晴風日絕佳徙倚門外

一雙芒屨伴筇枝不用兒扶自出嬉貪看南山雲百變舍西溪上立多時

又

茶甌無端廢午眠杖藜信步到門前青裙溪女結蠶卦白髮廟巫催社錢

又

章老三病方死吳翁一夕呼不醒獨有此身頑似鐵倚門常看暮山青章吳皆鄰人以去冬死

春遊

春風堤上草萋萋草軟沙平護馬蹄似蓋微雲纔障日如絲細雨不成泥千秋觀裏逢新燕九里山前聽午雞追

憶舊遊愁滿眼。綵船曾繫畫橋西。

春兩

狼藉殘花滿地紅。擁衾孤夢兩聲中。人生十事九堪歎。春色三分二已空。但有老盆傾濁酒。不辭衰鬢對青銅。長貧博得身強健。久矣無心咎化工。

又

藥爐茶竈淡生涯。聽雨猶能惜物華。蘸岸頓添三尺水。沾泥不貸一城花。閑摩病眼開書卷。時傍危欄弄釣車。稚子孤行八千里。喜聞炊熟可還家。家僮自行在來報。子布寒食前可到。唐人以寒食前一日爲炊熟。

又

自笑平生癩是真。閉門高枕動兼旬。海棠千片已隨水。杜宇一聲無復春。綠酒盈樽足忘老。朱櫻上市正嘗新。今朝雨止通溪路。又向沙頭岸幅巾。

書懷

謝客元無疾。深居似有憂。向空書咄咄。對竹送悠悠。出每思安臥。歸還念遠遊。春衣典已慣。斗酒不難謀。

三月十六日至柯橋迎子布東還

江國常年秋雁飛。吾兒遠客寄書稀。道途一見相持泣。鄰曲聚觀同載歸。草草杯盤更起舞。匆匆刀尺旋裁衣。從今父子茅簷下。回首人間萬事非。

又

我似傷禽帶箭飛。更憐汝作雁行稀。異時恐抱終身恨。此日寧知徒步歸。萬里外應勞遠夢。三年前已挂朝衣。斷編蠶簡相從老。絕念功名亦未非。

題施武子所藏楊補之梅

補之寫生梅。至簡亦半樹。此幅獨不然。豈畫橫斜句。

食野菜

野菽山蔬次第嘗。超然氣壓太官羊。放翁此意君知否。要配吳粳饒餼香。

又
萬里蕭條酒一杯。夢魂猶自度邛邛。可憐龍鶴山中菜。不伴峨眉栢脯來。

予十許歲即往來雲門諸山。今復與諸子來。追念惻然。

經行猶記髡髻初。所至渾如過故墟。橋廢夕陽空鶴表。碑亡春草沒龜趺。荒郊渺渺羊牛下。叢木蕭蕭鳥雀呼。可恨一衰今至此。右攜筇杖左人扶。

雲門道中

度嶺穿林一徑斜。旋篝新火試新茶。箬包粉餌祠寒食。雨溼青鞵上若耶。石罅微泉來滴瀝。溪涯老木臥槎牙。不須苦覓東柯谷。是處雲山可寄家。

龍瑞

多年不躡陽明路。今日重來院院行。好在千秋馮觀主。修廊一見眼偏明。

禹寺

暮春之初光景奇。湖平山遠最宜詩。尙餘一恨無人會。不見蟬聲滿寺時。

寄題張仲欽左司槃澗

劍谿之南有佳處。山靈尸之不輕付。張公鼻祖晉司空。談笑得地開窗戶。谿光如鏡新拂拭。白雲青嶂無朝暮。伏几讀書時舉頭。萬象爭陳陶謝句。公今仙去有嗣子。關塞崎嶇方叱馭。山城何曾歎如斗。皦皦不受世俗汙。君不見區文往者勢如山。朝士幾人無汗顏。尊公遺事不須述。但看當時出處間。

園中晚興

世故誰能必。書生妄自期。年光卷中過。心事鬢邊知。零落花隨水。輪囷筍突籬。晚晴山盡出。徒倚獨移時。

送陳希周赴安福令

補吏鶴嶺邊。尊公方玉立。超遙翳風雲。餘子那可及。天高鬼神惡。聞訃三日泣。晚途見嗣子。握手悲喜集。乘軫掠

鯨波信矣勇可習。巉巉風骨峭。颯不能襲。謂當上臺省。豈復論等級。如何困無津。俛首臨一邑。顧嗟六朝民。龍鍾垂八十。肯來野本濱。半月解書笈。吾杯僅容翁。安得看鯨吸。佇立送歸鞍。霽日滿原隰。

春晚久雨排明

積雨暗村墟。幽居雜鼃矧。泥潦欲升階。几席或生茵。壯年多重趺。況我抱宿疾。下牀躡高屐。顧影輒自哂。客來入我戶。亦復爲歎憫。胡不徙高原。再拜謝不敏。

甲子日晴

澤國春多雨。閱月殊未止。皇天俄悔禍。昇以晴甲子。山川相炳煥。桑柘鬱千里。壠麥行可穫。吳蠶亦三起。牀頭醅瓮香。大杓瀉浮蟻。醉醒日已晡。長歌識吾喜。

三月二十日兒輩出謁孤坐北窗

園林春已空。陂港雨新足。泥深黃犢健。桑老紫椹熟。豐年逋負少。村社饜酒肉。微風吹醉醒。起和飯牛曲。

又

歲月不相貸。布穀忽已鳴。新夏亦自佳。北窗綠陰成。讀書老易倦。披衣繞堦行。摩挲桃柳杖。與汝樂太平。陳希履自海外歸。送桃柳拄杖一枝。

春盡記可喜數事

微雨洗浮埃。蒼顏一笑開。僧招行藥圃。兒報得琴材。病退初嘗酒。春殘已過災。鄰家賽神會。自喜亦能來。卜者謂予今春當病。幸不甚驗。

立夏前二日作

晨起披衣出草堂。軒窗已自喜微涼。餘春只有二三日。爛醉恨無千百場。芳草自隨征路遠。遊絲不及客愁長。殘紅一片無尋處。分付年華與蜜蜂。

老民

乞得不貲身。林間號老民。兒因作詩瘦。家爲買書貧。村僕欺謾少。鄰翁語笑真。今朝鹽酪盡。齋糝更宜人。

又

老民無一事。終日臥柴扉。擊沼觀魚樂。鈎簾待燕歸。架高藤葉密。土潤藥苗肥。休退真吾分。無心學息機。

貧甚自勵

忍病停朝藥。捐書省夜燈。都門下第客。山寺退居僧。天每臨幽隱。人何與廢興。能輕馬千駟。肯慕稷三升。

衡門

小聚風煙外。衡門水竹間。疏溝分北澗。翦木見南山。人笑謀生拙。天教到死閑。猶存拄杖子。遇興即躋攀。

遊法雲
放船三家村。進棹十字港。雲山互吞吐。水草遙莽蒼。沙鷗下拍拍。野鷺浮兩兩。蕭騷菰蒲中。小艇時來往。匡山如香爐。藍水似車輞。夢魂不可到。于此寄遐想。瘦僧迎寺門。爲我掃方丈。指似北窗涼。此味媿專享。我笑謝主人。聊可倚拄杖。吾廬已清絕。敢取魚熊掌。

舟中作

短篷搖櫂暮山昏。老怯年華易斷魂。夾港蒲聲知小雨。隔林續火認孤村。奉祠累歲慙家食。謝事終身負國恩。惟有愚忠窮未替。尙餘一念在元元。

貧居

囊空如客路。屋窄似僧寮。得飯多菰米。烹蔬半藥苗。草生初失徑。簞放欲干霄。不道弓旌誤。虞人自畏招。

初夏野興

得意煙霞不諱窮。一菴聊寄寂寥中。山從樹杪參差見。水繞花陰曲折通。閑倚胡牀遡新月。時停團扇受微風。元知夢境無真實。不待邯鄲覺後空。

又

披衣清曉倚闌干。龜屋裁成二寸冠。盆檜兩餘抽嫩綠。研池風過起微瀾。愛書自笑心常在。去死懸知日尙寬。回視前修似無媿。不教一字入長安。

又

扇墮巾欹午夢回。鳴鳩又喚雨絲來。數行褚帖臨窗學。一卷陶詩傍枕開。糠火就林煨苦筍。密甕沉井漬青梅。艾人行復巍然出。老大難堪節物催。

卷四十六

孟夏方渴雨忽暴熱雨遂大作

蒸溽殊未解。雨來那可涯。鵲驚無穩樹。燈暗不成花。處處躍秧馬。家家閑水車。兒童伴翁喜。聚首話桑麻。

小池

荷鋪庭中破嫩苔。清溝一派引泉來。翦刀草長浮萍合。無數遊魚去復回。

衡門

曲徑衡門短短籬。槐楸陰裏倚筇枝。老來百事不入眼。惟愛青山如舊時。

海上作

厭逐紛紛兒女曹。挂帆江海寄吾豪。鯨吞鼉作渾閑事。要看秋濤天際高。

朝飢示子聿

水雲深處小茅茨。雷動空腸慣忍飢。外物不移方是學。俗人猶愛未爲詩。生逢昭代雖虛過。死見先親幸有辭。八十到頭終強項。欲將衣鉢付吾兒。

養氣

養氣安心不計年。未嘗一念住愁邊。才疎屢掃朝中迹。命薄翻成世外緣。耐老尙能消劫石。放狂聊復醉江天。飽知句曲羅浮路。不訪初平即稚川。

示友

黃卷青燈自幼童。長年頗亦有新功。尙嘲孟顛遲成佛。那計辛毗不作公。學問更當窮廣大。友朋誰與共磨礱。諸

君果未捐衰老。鄙語人當致一通。

早涼熟睡

靈臺虛港氣和平。投枕逡巡夢即成。屋角鳴禽呼不覺。手中書冊墮無聲。百年日月飛雙轂。千古山河戰一枰。賴有蓮峯遺老在。白雲深處主齊盟。謂陳希夷。

初夏

麥秀微寒後。梅黃細雨前。湖灘初集鷺。堤柳未鳴蟬。琴帶輕陰潤。巾因小醉偏。晚來幽興極。又上釣魚船。

夏雨

忽聞疎雨滴林梢。起看油雲滿四郊。行蟻君臣初徙穴。鳴鳩夫婦正爭巢。築陂處處移新稻。乘屋家家補破茆。堪笑此翁惟美睡。孝先便腹任譏嘲。

倚樓

千里江山入倚樓。高吟聊復寫吾憂。詩書幸有先人業。貧賤初非學者羞。數掩槿籬端可老。一杯藜粥尙何求。東陂未插青秧遍。且與鄰翁卜雨鳩。

晚興

偶扶藜杖過傍村。卻倚禪牀坐小軒。日落鴉栖津樹暗。人歸鶴踏釣船翻。挽弓從笑識丁字。刺繡終勝倚市門。羹芋一杯吾自飽。諸兒強爲置盤飧。是日五郎等置食參倚。

又

身如病鶴謝樊籠。白盡衰髯臉尙紅。蒲葦陂塘新漲後。梧桐門巷夕陽中。遺名要耐千年看。快飲方誇百榼空。造物閱憐吾會否。放教折臂老新豐。

晨雨

過雲生谷暗。既雨卻窗明。低燕爭泥語。浮魚逆水行。山川增秀色。草木有奇聲。處處青秧滿。長歌樂太平。
戲作絕句以唐人句終之

兩細穿梅塢。風和上柳橋。山居無曆日。今日是何朝。

又

靜對煎茶竈。閑疏洗藥泉。回頭問童子。今夕是何年。

述懷

情懷猶是昔年人。豈料侵尋八十身。燈下看書方覺老。花前鬪酒始知貧。玉非鼠朴何勞辨。魚與熊躡各自珍。萬事回頭已陳迹。爲君一笑落紗巾。

閑中自詠

鶴髮清癯鵠鵠閑。衡門正在水雲間。無求尙恨時賒酒。有癖應緣酷愛山。細繞坡頭行犖角。別分泉脈聽淙潺。三更不睡看江月。恐有高人夜叩關。

晨興

小雨過郊墟。晨興一事無。殘榴重結蕊。新燕續生雛。書細猶能讀。行遲漸要扶。蔬畦恐蕪沒。且復課僮奴。

自詠

愈老愈知生有涯。此時一念不容差。身如病鶴長停料。心似山僧已棄家。高枕時時聞解籜。卷簾片片數飛花。飯餘解帶摩便腹。自取風爐煮晚茶。

又

行年老及臥蝸廬。山水登臨亦已疎。無可奈何猶食粟。未能免俗學澆蔬。蓬門時接漁樵話。塵几聊存種樹書。強欲入城還自笑。世間那有鶴乘車。

西村

亂山深處小桃源。往歲求漿憶叩門。高柳簇橋初轉馬。數家臨水自成村。茂林風送幽禽語。壞壁苔侵醉墨痕。一首清詩記今夕。細雲新月耿黃昏。

漁父

楚江茫茫新雨霽。殘雲感作魚鱗細。老翁短楫去若飛。我欲從之已天際。從之不可況共語。醉眼知渠輕一世。直鉤去餌五十年。此意寧爲得魚計。

放歌行

少年不知老境惡。意謂長如少年樂。朝歌夜舞狂不休。逢人欲覓長生藥。三二十年底難過。屈指朋儕餘幾個。就令未死身日衰。朱顏已去誰能那。人間萬事如弈棋。我亦曾經少壯時。兒曹紛紛不須校。歲月推遷渠自知。

苦貧

老作清時版籍民。深耕迨及故山春。熟思豈是天貧我。妄計還憂鬼笑人。但使甌中餘麥飯。何妨澗底采荆薪。此窮正坐清狂爾。莫向瞿曇問宿因。

晨起至參倚齋示子聿

似仙猶火食。比古未巢居。老子羸全節。小兒能著書。下簾留乳燕。投飯出潛魚。幸好隆中客。無爲起草廬。

夏夜對月

薄雲歸欲盡。殘雨久猶滴。月入疎林間。庭戶粲珠璧。梅天苦蒸鬱。爽氣始此夕。豈無一舴舨。放浪江天碧。散髮黃鶴樓。醉弄白玉笛。真當舞魚龍。詎止裂金石。

夏夜

酒力初消睡未厭。臥看香縷繞疎簾。月高樓鶻重移樹。風勁流螢自入簷。長夏迢迢秋尚遠。孤愁冉冉病相兼。老人本是山中客。掃迹元非畏楚鉗。

五月十日曉寒甚聞布穀鳴有感

弊袴久當脫。短褐竟未送。吳中諺語曰。未喫端午粽。布襖未可送。俗謂典質日送。老怯五更寒。重衾擁殘夢。羣蟲方得意。飽血藏衣縫。竹簟何時陳。紈扇殆無用。長夏塵塵來。歲月疾飛鞚。安懷歎欷憂。太息欲誰控。

老歎

人生易衰老。萬事海濤翻。但恨芳尊迮。寧悲雪鬢繁。諸儒輕古學。遺虜盜中原。有語誰能聽。毋矜舌尚存。

閉戶

牧身歸死鏡湖傍。閉戶悠悠白日長。巷僻斷非容駟路。腸枯那有蹴蔬羊。書生正可蹈東海。世事漫思移太行。睡起不知天早暮。坐看螢度篆盤香。

長飢

病臥窮閭負聖時。本來吾道合長飢。朝不及夕未妨樂。死何如生行自知。早年羞學仗下馬。末路幸似泥中龜。煙波一葉會當逝。吹笛高人有素期。

山齋書事

山榴子結又重開。巢燕雛飛卻續回。燕有三生雛乃去者。兩足人畦千頃稻。日長風舞一庭槐。浩歌縱酒愁仍在。作意觀書睡已來。常恨流年不相貸。若爲更著暮蟬催。

贈道流

賣藥會稽市。不知今幾年。身常雜庸保。世果有神仙。醉帽簪花舞。漁舟聽雨眠。放翁獨識子。肯向俗人傳。

避暑松竹間

雙松五丈高。萬竹一尺圍。上有林蟬鳴。下有礪鳥飛。正午不見日。我來每忘歸。清詩忽陳前。永與世俗違。直北有異境。煙汀連釣磯。何當霜雪時。散髮櫛葉衣。

連日大雨門外湖水渺然

趁朝把笏著烏鞞。不似歸來買短蓑。尙鄙朱公養魚術。肯爲寧戚飯牛歌。逢時有命求何益。觸事無心得最多。樂處卻嫌兒輩覺。出門十步即煙波。

午睡

槐楸陰裏綠窗開。天與先生作睡媒。流汗未乾衣上雨。大聲已發鼻端雷。枕鐫松石分琴薦。簟織風漪取笛材。卻起岸巾看汲井。人間車馬正氛埃。

窮居

阮窮心自樂。寂寞道常尊。老病頻辭客。嬉遊不出村。淖糜均列鼎。徒步當華軒。不但終吾世。猶堪遺子孫。

梅雨

殘雨收還滴。低雲去復留。護雛憐弱燕。喚婦笑鳴鳩。碓米春初滑。園蔬摘復抽。誰知泥沒蹠。也有客相求。

村居書事

困厄難希飽煖家。未妨隨事作生涯。白鹽赤米已過足。早韭晚菘猶恐奢。鴨放競浮新漲水。牛歸正及暝棲鴉。年逾七十方辭祿。敢望高人挂齒牙。

閑中信筆二首其一追和陳去非韻其一追和王履道韻

我看浮名如脫髮。誓墓收身老巖穴。座延窮鬼心不疑。鑪錘橫財渠自別。樂哉今爲八十翁。神交圍綺商山中。烹葵剝棗及時序。爛醉黍酒歌郇風。

又

小江之上千峯立。潮回艇子爭來集。飄風忽起白浪高。急雨橫吹綠蓑溼。歲豐斗酒纔百錢。茆店無人驚醉眠。醒來徑入亂雲去。異日出看東封年。

題齋壁

鏡水西頭破茅屋。紹興初載舊書生。門無車馬終年靜。身臥雲山萬事輕。三釜昔傷貧藉祿。一廛今幸老爲氓。斷蓬不是無飛處。莫與飄風抵死爭。

夏日雜題

疎疎窗似秋蛩室。疊疊書如春鶯巢。大耋何妨尚絃誦。小詩時亦雜談嘲。

又

耿耿醜石巖當道。矯矯長松龍上天。滿地凌霄花不掃。我來六月聽鳴蟬。

又

情懷萬里長征客。身世連牀旦過僧。熟計書空成咄咄。不如任運去騰騰。

一枝藜峒挑椰杖。二寸羊城蠅蠅冠。萬里來爲老人壽。始知天地不勝寬。

又

天隨手不去朱黃。辟蠹芸編細細香。今夕短檠須暫設。北窗風雨送微涼。

又

身閑欲出無如嬾。酒薄雖傾不敵愁。殘暑從今無一月。剩儲詩思待新秋。

又

憔悴衡門一秃翁。回頭無事不成空。可憐萬里平戎志。盡付蕭蕭暮雨中。

又

衰疾沉綿短鬢疎。淒涼圯上一編書。中原久陷身垂老。付與囊中飽蠹魚。

夏雨歎

蝸舍入門楣觸額。黃泥壁作龜兆坼。雨多潦水欲上堦。臥聽鶩鴨聲拍拍。日高糴米奴未回。坐知薄飯未容索。仕羞捷徑耕不力。自取囊空欲誰責。富貴危機復可畏。世間果無第一策。雖然胸中有事在。片言可壽天下脈。

物外雜題

南壚沽斗酒。獨酌復高歌。一笑語觀者。比君更事多。

又

當年下沔鄂。回首幾秋風。景物渾如昨。千帆落照中。

又

曉入姑蘇市。閭門繫短篷。老人元不食。買餅飼山童。

又

送客停山步。尋僧立寺門。青鞵慣泥潦。卻愛雨昏昏。

又
粉堞臨江渚。朱橋枕市樓。長吟策小蹇。又度一年秋。

又
飼驢留野店。買藥入山城。興盡飄然去。無人識姓名。

又
高城今曠野。比屋昔朱門。道上傳呼過。遙遙幾世孫。

又
過市摩雙眼。驚嗟閱盛衰。朱樓倚霄漢。曾見始成時。

過村舍

確舍臨山路。牛欄隔草煙。問今何歲月。恐是結繩前。

晝臥初起書事

歲華病思兩侵尋。靜看槐楸轉午陰。待睡不來聊小憩。煨詩未就且長吟。還山久洗天涯恨。謝事新諧物外心。忽有故人分祿米。呼兒先議贖雷琴。

夜雨有感

斷虹不隔江郊雨。東方虹見則雨止。俗語謂之隔雨。今歲獨不爾。一釵昏燈夜半時。多感生悲那爲酒。積衰成瘦錯冤詩。空堦點滴何由止。倦枕淒涼只自知。平日故人零落盡。寄書誰與敘睽離。

偶作夜雨詩明日讀而自笑別賦一首

俗情向者未全忘。洗以縈簾一縷香。得失故應常浩浩。是非正可付蒼蒼。殘蟬不斷知秋近。雙燕歸來伴晝長。誰識龜堂新力量。東家卻笑接輿狂。

舍西晚眺示子聿

秋濤常記犯靈胥。季子雙髦尙髡如。薄飯不爲明日計。短檠相對十年餘。嗟予久合墮鬼錄。憐汝猶能讀父書。西

望牛頭渺天際。永懷吾祖起家初。牛頭山在小江西北。有先太傅讀書堂尙存。

自訟

年少寧知道廢興。搏風變化羨鯤鵬。貪求但欲攀分寸。痛定方慙乞斗升。靈府已能澄似水。俗緣更覺薄於僧。挂冠且喜身蕭散。二頃寧須退可憑。

讀唐人樂府戲擬思婦怨

一自門前征馬嘶。此心常與斷雲西。雙飛空羨雉朝雝。獨泣忍聞烏夜啼。遠海晝昏塵漠漠。杜陵春到草萋萋。孤愁可爲鄰姬說。只有臨樽醉似泥。

南堂納涼

環坐列胡牀。兒曹共此涼。風生桐葉墜。露下稻花香。老幸返初服。窮宜歸故鄉。已無纓可濯。清嘯對滄浪。

又

浴罷閑無事。悠然寄一牀。水風涼醉頰。松月上虛廊。岸久烏紗側。熏餘細葛香。今宵一美睡。何止傲羲皇。

中庭納涼

紅映衡門夕照明。翠浮村巷蹊煙生。搖搖楸線風初緊。颭颭荷盤露欲傾。數酌濁醪留客醉。一編疑義與兒評。須臾散去人聲寂。獨數城頭長短更。

又

散髮江天懶出遊。衡門日落鎖梧楸。火雲突兀方蒸暑。銀漢縱橫已報秋。熠熠露螢黏徑草。寥寥漏鼓下譙樓。追涼明日無奇策。聊向林間卜雨鳩。

待旦

東方星磊磊。西舍雞喔喔。萬慮集五更。吾睡無由著。世事如飲酒。不獻自無酢。開窗起危坐。送月西南落。

又

是身如浮煙。久聚要當散。吾年七十七。寒暑凡幾換。夏夜亦自佳。何必厭揮汗。推枕坐南窗。悠然待清旦。

晨興

冬夕宜晚睡。夏日思晨興。磊落明星高。蒼涼朝日昇。正襟坐堂上。有儿不敢憑。陳前聖人書。凜如踏滌冰。平生不
有利。豈獨畏友朋。長飢君勿訕。人各有不能。

又

欲曉不能寐。亟起坐北堂。齋莊對斷簡。左右陳朱黃。懃懃一池墨。裊裊半篆香。老生不自逸。幸此夏日長。奇哉長
頭兒。好勇不可當。安得數年健。與兒講虞唐。

晚涼述懷

未學常憂墮客驕。晚知鵬鷗本逍遙。屏醫卻藥疾良已。破械空囹盜自消。父子終身美藜藿。交遊太半是漁樵。衡
門日落清風起。又著藤冠度野橋。

湖塘晚眺

綠樹暗村墟。青山繞草廬。奉祠神禹舊。馳道暴秦餘。浦色沉煙網。畦聲入雨鉏。清秋又如許。幽憤若爲據。

又

病起閑無事。時來古渡頭。煙中賣魚市。月下采蓮舟。帆鼓城江晚。菱歌姥廟秋。長吟無傑句。聊以散吾愁。

小集

烏柏遮山路。紅蕖滿野塘。病蘇身漸健。秋近夜微涼。杯酌隨宜具。漁歌盡意長。兒曹娛老子。團坐說豐穰。

出門與鄰人笑談久之戲作

少時已歎少驩娛。衰病經旬一笑無。今日出門逢父老。欣然隨衆強盧胡。

又

暮靄昏昏半掩扉。偶逢鄰叟荷鋤歸。且令閑說鄉村事。莫問渠言是與非。

又

菽水欣欣每盡歡。仁賢不必襲衣冠。出門邂逅移時語。未害龜堂取友端。

又

屋角時聞黃犢鳴。相逢但可說春耕。一言誤及城中事。議罰應須便酌觥。

魚池將涸車水注之

清波溜溜入新渠。鄰曲來觀樂有餘。試手便同三日雨。滿陂已活十千魚。喜如雷動風行際。快若天開地闢初。萬物但令俱有託。吾曹安取愛吾廬。

一齒動搖已久然餘皆堅甚戲作

病齒元知不更全。漂浮杌隉已三年。一朝正使終辭去。大嚼猶能盡斃肩。

晚至新塘

青籬隨意出柴荆。聊向南塘曳杖行。歸鳥已從煙際沒。斷虹猶在柳梢明。城頭層塔凌空立。浦口孤舟並岸橫。向道有詩渾不信。爲君擁鼻作吳聲。

夜泛湖中

水鳴鵝鵲拍拍飛。菰蒲深處弄煙霏。喚回二十年前夢。半醉姑溪棹月歸。

立秋後作

宋玉悲秋千載後。詩人例有早秋詩。老夫自笑心如石。三日秋風漫不知。

覽鏡

此頭那可著貂蟬。瘦似騎驢孟浩然。一事比渠差省力。閉門無句與人傳。

早秋南堂夜興

水注橫塘藻荇香。候蟲唧唧滿空廊。風前落葉紛可掃。天際疎星森有芒。夜漏漸長愁少睡。秋衣未製怯新涼。明朝卻有欣然處。寫得黃庭又幾行。

菱歌

海內知心人漸少。眼前敗意事常多。問君底事渾忘卻。月下菱舟一曲歌。

聞角

河白如銀天淡青。角聲中有玉關情。早知送老桑麻野。海失安西萬里行。

湖隄

新月纖纖淡欲無。時聞魚躍隔菰蒲。籃輿小放湖隄上。信有人間白玉壺。

秋旦

將旦溪風急。新秋天宇寬。涼生豎裁褐。爽入縮縫冠。拊翼雞頻唱。爭枝雀正譴。一簞吾已足。芋豆亦加餐。

龜堂晨起

培火鑪爐起寶熏。滴泉整研聚玄雲。屏圍燕几成山字。簟展涼軒作水紋。絕口不談浮世事。洗心聊策退居勳。羣年猶健非無自。一卷丹經受鄭君。

柳橋秋夕

柳疎橋盡見。水落路全通。作杵家家月。漁舟浦浦風。眼明無俗物。步蹇有枯筇。野逸誰能那。悠然西復東。

道室雜題

早訪丹砂上岫螻。晚提河派泝崑崙。陰符後出君無忽。三百奇文要細論。

又

聞說湖中有釣舟。煙波出沒雜輕鷗。一聲清嘯去已遠。我欲從之何處求。

又

山中有草名長生。丹砂可死金可成。服之刀圭齒髮換。要看東封告太平。

又

勘書窗下松明火。采藥溪頭櫛葉衣。只在人間人不識。秋風又見雁南飛。

卷四十七

儒生

儒生安義命。所遇委之天。用可重九鼎。窮寧直一錢。雖云髮種種。未害腹便便。高臥茅簷下。羹藜法不傳。

秋夜

老病睡眠少。如斯秋夜何。長庚未配月。織女已斜河。莎徑蟲吟苦。柴門葉落多。誰知窮甯戚。不作飯牛歌。

寺閣

三壑初得牧牛童。兩扇新成釣舸篷。偶訪野僧過射的。卻衝微雨上樵風。登山未減青鞵興。到手俄驚綠酒空。自笑此身猶健在。試憑重閣送飛鴻。

秋暑夜興

寂寂空廊絡緯鳴。消搖岸幘近南榮。閉眠篔作波紋冷。新浴衣如蟬翼輕。微雨已收雲盡散。衆星俱隱月徐行。呼童持燭開藤紙。一首清詩取次成。

漁父

千錢買一舟。百錢買兩漿。朝看潮水落。暮看潮水長。持魚換鹽酪。縣郭時下上。亦或得濁醪。不復計瓶盎。浩歌忘遠近。醉夢墮莽蒼。玄真不可逢。悠然寄遐想。

省事

車馬聲都絕。比鄰迹麻疎。淺傾豕釀酒。細讀手鈔書。薄飯惟羹芋。閑遊不借驢。有時還自笑。省事更誰如。

新涼書懷

烏帽圓寬帶眼移。閉門憤忍日長飢。文章雖媿聲名誤。志節寧隨血氣衰。天地無私非困我。聖賢可學有餘師。短檠正歎經特別。涼入郊墟喜可知。

又

藥物扶持病少蘇。殘年不恨老菰蘆。潦收溪澗魚爭筍。歲樂村場酒易沽。無日楳林無墜葉。豈不自夏至秋。日有落葉。不可勝掃。有時燕戶有新籬。今年燕廬生雛。七月望。猶未止。秋風剩起扁舟興。安得州家復鏡湖。

又
鄰曲今年又有年。垂髫戴白各欣然。先輸官庾無遺賦。共賽神祠有社錢。退傳寄聲情縝密。連得周丞相書。細字
繡幅。晦翁入夢語蟬聯。昨夕夢朱元晦甚款。燈前細與兒曹說。蠹簡猶堪數世傳。

又

山川遺迹晉唐餘。水竹相望許洛居。朱希真嘗言山陰富水竹。有洛陽許下氣象。一齒屢搖猶決肉。雙眸雖澀尙
耽書。郊原夜夜驅耕犢。村店時時秣蹇驢。客問若爲娛老境。吾兒未與短檠疎。

七月十七晚行湖塘雷雨大作

電火雷車下九關。我行暮出郊原間。鬚髯暗樹類奇鬼。突兀黑雲如壞山。江湖默應鰻岫溢。鐵鑊自脫梅梁還。今
夕虛簷瀉懸瀑。預知高枕聽淙潺。

七月十八夜枕上作

電掣光如晝。雷轟意未平。亂雲俄卷盡。孤月卻徐行。露草蛩相語。風枝鷓自驚。一涼吾事足。笑睡到窗明。

梅市

梅市柯山小繫船。開篷驚起醉中眠。橋橫風柳荒寒外。月墮煙鍾縹緲邊。客思況經孤驛路。詩情又入早秋天。如
今老病知何恨。判斷江山六十年。

秋思

利欲驅人萬火牛。江湖浪迹一沙鷗。日長似歲閑方覺。事大如山醉亦休。衣衾相望深巷月。井桐搖落故園秋。欲
舒老眼無高處。安得元龍百尺樓。

小舟湖中夜歸追和孟浩然夜歸鹿門歌

山光漸淡川氣昏。急雨亂打荷葉喧。小舟橫掠湖邊村。人家收網半閉門。吾廬未見見堤樹。舟人指點孤燈處。蒲
叢姑惡最可哀。衝雨飛鳴背人去。

酒盡

飲酒但飲濕。吾聞之老坡。渠非惜酒錢。無如久窮何。我窮乃過之。空囊倒餘濕。日來彌可笑。濕亦不可得。平生忍飢多。得飯已有餘。父子茅簷下。清坐談詩書。

燒香

寶熏清夜起。氤氳寂寂中。庭伴月痕小。斲海沉非弄水。旋開山麝取當門。蜜房割處春方半。花露收時日未曛。安得故人同晤語。一燈相對看雲屯。

自述

寄懷魚鳥臥煙汀。結友松筠醉草亭。拜賜龜章紆舊紫。予蒙恩錫服。篋中有守郡時故袍。用以拜命。養成鵠鬢掃餘青。遺經在櫝傳家學。大字書牆作座銘。浪迹江湖遂終老。此身何啻一浮萍。

又

意望天公本自廉。甘餐美睡偶容兼。一生憂患如山重。此日安閑抵蜜甜。拙宦雖無齋虜舌。早歸亦免楚人鉗。但餘一味疎慵在。儲藥千斤未易砭。

風雨

風搖北斗柄欲折。雨溢天河浪正生。一盞昏燈北窗下。腐儒未輟讀書聲。

白露前一日已如深秋有感

匹馬曾防玉塞秋。豈知八十老漁舟。非無丈二爰堪請。只恐傍人笑白頭。

又

護塞寧須右北平。拂雲祠是受降城。誰知此志成虛語。白首燈前聽雁聲。

東村晚歸

蜀道還吳鬢已絲。歷年二紀固應衰。寧知秋思沉綿日。又見秋風搖落時。錦雉白魚供野餉。青林紅樹入新詩。東村寂寂風煙晚。酒挂驢肩又一奇。

秋望

快哉一雨洗浮塵。卻喜郊原霽色勻。野火已亡秦相冢。江濤猶託伍胥神。登臨頓覺清秋早。流落空悲白髮新。望思陵鬱忽裏。老民猶及見時巡。游尚能記高皇建炎巡幸。

郭西

鵲下川原黑。船行浦溆空。橋燈搖水影。樓角散天風。野眺飛埃外。漁歌冷翠中。不須嘲病翼。要是脫樊籠。

舍北

支徑秋原上。衡門夕照中。野煙山半失。溪漲浦橫通。鬢禿難藏老。衣穿可諱窮。浩歌終自得。心事寄冥鴻。

夜坐示子聿

久客誠當去。無心偶小留。掃空閑夢想。閱盡舊朋儔。學術非時好。文章幸自由。蘇黃門贈姪孫元老詩有云。從此文章始自由。不嫌秋夜永。問事有長頭。

柳橋晚眺

小浦聞魚躍。橫林待鶴歸。閑雲不成雨。故傍碧山飛。

秋興

秋風吹我夜。植杖溪橋側。木葉雖未凋。慘澹無顏色。

又

功名不垂世。富貴但堪傷。底事杜陵老。時時矜省郎。

又

秋暑勢已窮。風雨縱橫至。白鷺立清灘。與我俱得意。

又

胸中萬卷書。一字用不著。歸休始太息。竟是爲農樂。

又

酌酒桑陰下。邠風入醉歌。何須繩檢外。名教樂還多。

嘉泰辛酉八月四日雨後殊凄冷新雁已至夜復風雨不止是歲八月一日白露殘暑方炎忽痛摧無情風雨亦奇哉但嗟不爲貧人計未動秋砧雁已來

又

仲秋四日雁橫天閉戶垂帷意已便方歎今年時候早夜深風雨更凄然

近村民舍小飲

秋風吹細雨蕭然濯炎熾老夫疾頓平甘食仍熟寐春物財幾何播落已復至昔人喻死生謂若屈伸臂愚公顧不靈白首沒榮利嗟予幸學道了此直差易三拜散人號退志獲早遂絃歌萬二千盡力不能崇瘦臙骨可數渺渺入空翠霜蟹初把螯絲蓴小添鼓平生笑巨君老齧乾肉糝異味幸滿前萬事付一醉

閑適

飲酒不至狂對客不至疲讀書以自娛不強所不知一窗袖手坐往往晝漏移初非能養生簡事頗似之四時俱可喜最好新秋時柴門傍野水鄰叟閑相期

又

陸子居山陰杜門輒經年有時思出遊兩屨凌風煙長纔斲靈苗大瓢挹飛泉眼長不及寸能著萬里天不飲顏常丹不食腹果然金丹亦棄置我是地行仙

夜歸

今年寒到江鄉早未及中秋見雁飛八十老翁頑似鐵三更風雨采菱歸

又

芡浦菱陂夜半時小舟更著疾風吹青熒一炬楓林外鬼火漁燈兩不知

自詠

宦遊疇昔徧天涯萬里東歸歲月賒古道泥塗居土廬荒畦煙雨故侯瓜園公谿父逢皆友野寺山郵到卽家病思漸輕重九近又將烏帽插黃花

老歎

一齒危將墮。雙瞳久已昏。謀生賴蔬圃。養拙閉柴門。多病從來慣。虛名不足論。自憐餘一念。猶欲濟元元。

秋社

兩餘殘日照庭槐。社鼓寥寥賽廟回。又見神盤分肉至。不堪沙雁帶寒來。書因忌作閑終日。酒爲治齏醉一杯。記取鏡湖無限景。蘋花零落蓼花開。

晨起

雞已參差唱。窗纔曉。高林風不止。叢竹露如傾。夢爲多難記。詩緣嬾少成。晨興了無事。散髮遶階行。

中夜睡覺兩目每有光如初日。歷歷照物。晁文元公自謂養生之驗。予則偶然耳感而有作。

人情所願欲。莫若貴與富。是皆有命焉。非力可成就。予昔未有聞。無與發其覆。趨趨強干祿。時命適大謬。方行地當道。未至。黎已噤。適燕乃南轅。之楚顧北首。風波起平地。兩耳厭嘲詬。隴蜀萬里餘。數逼道傍埃。六十歸爲郎。數月草章奏。夫豈或使之。擊去惟恐後。嗟彼亦何心。喜慍出邂逅。還山惟自訟。衡茅屏幽陋。乘除得少健。上下歷巖岫。得飽豈復擇。百口同飯糗。寒龜久猶息。野鶴老益瘦。又如已放馬。寧當夢華廐。造物念途窮。畀以樽櫟壽。雖無熊鳥術。坐空陰陽寇。兩皆若有光。夜視如正晝。物生稟定數。此語聞自舊。置冰鳥覆翼。棄野於菟穀。偶然當後死。鬼錄自遺漏。山陂粟屨收。汝水麻可漚。鄰父相歡娛。席地醉醇酎。

錢道人。不飲酒。食肉囊中。不畜一錢。所須飯及草履。二物皆臨時乞錢買之。非此雖強與不取也。

又

萬里飄如不繫船。空囊短褐過年年。食時無飯芒鞋破。只向街頭旋乞錢。

枕上

誤辱君王賜鏡湖。身隨鷗鷺寄菰蒲。行年八十猶強健。欲伴先生去得無。
呼兒初夜上門關。怕冷貪眠自笑孱。月色橫分窗一半。秋聲正在樹中間。暮年不復樽前樂。浮世無如枕上閑。鍊句未安姑棄置。明朝追記尙班班。

山園書觸目

山近雲生易。人稀鳥下頻。瘦篁穿石竅。古蔓絡松身。熟摘巖邊果。乾收澗底薪。經過不相識。喚作避秦人。

苦貧戲作

五窮作祟不容支。蟬腹龜腸旋過時。客散難求門外轍。衣穿徒有鬢邊絲。兒能解事甘藜藿。婢苦無薪晚屢屣。箕踞浩歌君會否。書癡終覺勝錢癡。

秋曉書感

天公息我半生勞。寄傲江湖亦足豪。淡盡月痕知夜艾。飄殘桐葉喜秋高。讀書時亦挂牛角。對酒正須持蟹螯。縱有故人終自絕。安能從汝望緜袍。

秋夜

抱病齒髮非。闕世城市換。朋儕家壘壘。在者亦雲散。窮居嬾出戶。俯仰秋已半。疎鐘到倦枕。微火耿幽幔。平生疑著處。忽若河冰泮。百年寓逆旅。萬事真既灌。紛紛彼方窺。袖手不須喚。蘿月忽滿窗。悠然付長歎。

村舍

篠屋楓林下。山中人以篠覆舍。厚密過干茅。柴門艾浦旁。先鳴雞臛膊。徐上日蒼涼。服藥貧寧輟。觀書老有常。仍須教童穉。世世力耕桑。

又

生理嗟彌薄。吾居久未完。蝶飛窗紙碎。龜坼壁泥乾。小雨牛欄濕。微霜碓舍寒。晚禾蟲獨少。鄰里共相寬。今年晚禾苦蟲虹。予鄉獨免。

天涼時往來湖山間有作

萬壑千巖自古傳。青鞋布襪更誰先。泛舟菰脆鱸肥地。把酒橙黃橘綠天。秦篆舊碑荒草棘。禹書遺穴慘風煙。誰知陸子登臨日。已近浮生八十年。

雨夜歎

秋雨何曾住一滴。老夫危坐欲三更。開元貞觀事誰問。溫洛榮河塵未清。豐年猶有餓死處。破屋自愛讀書聲。刺經作制豈不笑。無奈人間痛哭生。

病足晝臥夢中譫諄乃誦尙書也既覺口占絕句

唐虞已遠三千歲。每誦遺書涕泗潛。濟濟允官十二牧。我獨不得居其間。

又

人能不食十二日。趙岐柳開皆嘗不食十二日。不死。惟書安可一日無。唐虞雖遠典謨在。病臥蓬窗時嘔喘。

新買啼雞

峨峨赤幘聲甚雄。意氣不與其曹同。我求長鳴久未獲。一見便覺千羣空。主人燒神議已決。知我此意遽見從。秋衣初縫惜不得。急典三百新青銅。憐渠亦復解人意。來宿庭樹不待籠。狐狸熟睨那敢犯。蕭蕭清露和微風。五更引吭震戶牖。橫挺無復須元戎。明星已高啼未已。雲際騰上朝陽紅。老夫抱病氣已索。賴汝豪壯生胸中。明朝春黍得碎粒。第一當冊司晨功。

幽棲

幽棲少人客。積病得衰殘。身納分司祿。兒須遠次官。新寒換衣典。閑日借書觀。更歎秋來瘦。晨興覺帽寬。

又

自卜幽棲地。頻驚歲月移。鄉鄰崇禮讓。子弟習書詩。喔喔雞鳴樹。狺狺犬吠籬。謀生已過足。富貴亦何爲。

秋日雜詠

都門初出若登仙。弄水穿雲喜欲顛。只恐光陰已無幾。不知又過十三年。

又

五百年前賀季真。再來依舊作閑人。一生看盡佳風月。不負湖山不負身。

又

菰蒲風起暮蕭蕭。煙斂林疎見斷橋。白蟹鰾魚初上市。輕舟無數去乘潮。

又
葉底珍禽不受呼。弄風小蝶點殘蕪。舍南舍北秋光好。到處皆成一畫圖。

又
紅萸如丹照眼明。臥開石竹亂縱橫。騷人見處終然別。只說清秋采落英。

又
桐葉吹殘柳亦稀。溪頭倚杖立斜暉。誰知老子無窮喜。待得吾兒小艇歸。

又
久雨初晴喜欲迷。青鞋踏遍舍東西。忽然來到柳橋下。露濕蓼花紅一溪。

又
十里秋風畫角哀。夕陽光景亦佳哉。正疑白鷺歸何晚。一片雪從天際來。

望永阜陵

龍飛回首尙如新。忽閱人間四十春。聖主已嚴天上駕。孤臣歸作道傍民。傾河尙恨難供淚。衛社何由得致身。獨立秋風吹白髮。感恩肝膽漫輪囷。

排悶

悠然不覺歲時遷。楚水楓林繫釣船。貧悴只如行卷日。衰遲忽過挂冠年。閑遊野寺騎驢去。倦擁殘書聽雨眠。賴有一簞差自慰。小兒筆墨日翩翩。

秋日晨起

翻樹鴉知旦。橫空雁戒寒。但欣蘇肺渴。未暇議衣單。粥鼎湯初沸。香篝火半殘。讀書心漸嬾。顧影一長歎。

出遊暮歸戲作

終年兀兀復騰騰。眼看朱門幾廢興。造物偶容窮不死。衆人共養老無能。逢山自有閑遊侶。入寺寧無淡話僧。莫道歸來卻岑寂。小兒同守短檠燈。

自詒

荒圃風煙入荷鉏。孤村巷陌看騎驢。少年曾縱千場醉。老境惟存一束書。作意買山雖已矣。忍慚乞米獨何歟。所欣肺病秋來減。白髮蕭蕭可自梳。

予出蜀日嘗遣僧則華乞籤於射洪陸使君祠使君以老杜詩爲籤予得遺興詩五首中第二首其言教

戒甚至退休暇日因用韻賦五首

我幼入家塾。結髮知苦心。稍長謬聞道。篤守至於今。澹然朱絲絃。三歎有遺音。詎敢負所學。枉尺求直尋。彼哉孔光輩。千載污儒林。

又

童子丹元家。熒然居靈府。世人不少悟。役役徒自苦。江湖豈不廣。魚乃投數罟。是身如璞玉。要經大火聚。萬卷讀丹經。孰能精去取。

又

少壯不是料。慷慨志四方。謝病還故山。始覺白日長。命薄類蟬翼。功名安可望。狐狸不足問。力不當豺狼。惟有臥釣船。仰看白鷺行。

又

孤雲起江郊。萬木酣天風。水鳥何所恨。終夜號菰叢。我與視中庭。北斗挂寒空。誰言秋夜長。明星已生東。丈夫老憂國。百慮蟠胸中。

又

我昔遊青城。萬仞窮躋攀。巢居上官翁。許我分半山。且言牡丹平。可卜茅三間。報國未能忘。承詔遂東還。蹭蹬意何成。看雲徒汗顏。

悲歌行

有口但可讀離騷。有手但可持蟹螯。人生墮地各有命。窮達禍福隨所遭。嗟予一世蹈謗藪。洵如八月秋江濤。尊

拳纜奮肋已碎。曹射箭盡弓未發。形尪骨悴吹可倒。摧拉未足稱雄豪。一身百憂偶得活。殘年幸許歸蓬蒿。時時照水輒自笑。霜顛雪領不可薙。脫身仕路棄衫笏。如病癯疥逢爬搔。見事苦遲已莫悔。監戒尙可貽兒曹。勉騎款段乘下澤。州縣豈必真徒勞。

秋夜讀書

門前客三千。帳下兵十萬。人生可意事。隨手風雨散。不如一編書。相伴過昏旦。豈惟洗貧病。亦足捍患難。老夫垂八十。巖電尙爛爛。孤燈對細字。堅坐常夜半。吾兒幸能繼。書亦未殘斷。安知不遭時。清廟薦玉瓊。不然老空山。亦足化里閭。我死斯言存。觀者有追歎。

對食戲詠

一飽欣逢歲小穰。時憑野餉誑枯腸。橙黃出臼金齏美。菰脆供盤玉片香。客送輪囷霜後蟹。僧分磊落社前薑。秋來幸是身強健。聊爲佳時舉一觴。

懷昔

偶住人間日月長。細思方覺少年狂。衆中論事歸多悔。醉後題詩醒已忘。鼃作黥吞吁莫測。谷堙山塹浩難量。老來境界全非昨。臥看縈簾一縷香。

偶得雙鯽

今朝溪女留鮮鯽。灑掃茅簷旋置樽。養老不須煩祝鯁。從來楚俗慣魚飧。

又

酒興森然不可回。重陽未到菊先開。一雙潑刺明吾眼。催喚廚人斫鱠來。

秋懷十首以竹藥閉深院琴樽開小軒爲韻

我非王子猷。賦性亦愛竹。舍外地十畝。不執凡草木。長吟雜清嘯。觸目皆此族。更招竹林人。枕藉糟與麴。

又

短裘入重雲。長纜求靈藥。人葭四體具。狗杞萃吠惡。采實去條枚。摘花棄跗萼。長嘯忽躡空。天台赴幽約。

又
惟王居法宮。玉帛來四裔。一朝啓戎心。邊城或晝閉。養生能體此。皆可闕千歲。利欲喜乘人。日夜勤自勵。

又
飲酒可不病。自酌隨淺深。處世可無患。惟勿欺此心。此心實通天。一念天所臨。子能守吾言。可度豺虎林。

又
吾道久寂寞。不絕如一線。至人隱市塵。我輩何由見。安得世外士。與之共談醜。僧話亦或佳。聊可過竹院。

又
小人方盛時。瓦礫視黃金。及其大勢去。或不遺一簪。鄖鳩今尙存。遺戒豈不深。所以粟里翁。惟蓄一素琴。

又
世事本何常。賀弔更在門。棄爲溝中斷。亦何羨犧樽。禍福要其終。愚智始可言。君看驪山墓。何若楊王孫。

又
今日天微寒。處處菊花開。永懷杜拾遺。抱病起登臺。古路逢僧過。溼雲聞雁來。我亦秋風客。詩成有餘哀。

又
天鏡環千峯。蒼翠立雲表。漁舟破浪來。泛泛一葉小。雲門若耶間。迨此素秋杪。登覽不可遲。去若孤鴻矯。

又
丈夫素所學。致主齊羲軒。恨無同志人。徒欲起九原。痛哭驚世俗。著書成空言。歲月去袞袞。吾其死空村。

示客

枳縛藩籬荆作門。蕭條何以致諸君。歸休正得求吾志。老病猶能誦所聞。紫蟹迎霜徑盈尺。白魚脫水重兼斤。一杯激灑無辭醉。秋稼登場合策勳。

秋晚村舍雜詠

村巷翳桑麻。蕭然野老家。園丁種冬菜。鄰女賣秋茶。啄木矜奇服。牽牛蔓碧花。一樽雖草草。笑語且喧嘩。

又
秋晚年中熟。湖鄉未寂寥。步頭橫畫舫。柳外出朱橋。潮壯知多蟹。霜遲不損麴。家家新釀美。鄰里遞相邀。

臥病累日羸甚。偶復小健。戲作
病忽逾旬日。衰如增十年。難求秦緩藥。空負宋清錢。微火秋先跨。閑房晝亦眠。偶賒書鬼錄。遇酒又陶然。

又
伏枕瀕九死。下牀如再生。幸回蒿里駕。猶作越吟聲。拂几嗟塵積。開書覺眼明。淖糜方自養。未敢憶南烹。

又
行年當大耋。臥病涉高秋。丸藥作奇驗。儼裝仍小留。輕漚元泛泛。破屋已飕飕。尙有江湖興。沙頭問釣舟。

卷四十八

縱筆

莫笑畸翁迫耄期。從來不許俗人知。繫船慣聽巴東雨。畫策曾從渭北師。袖劍客同樓上醉。爛柯人看洞中棋。如今更欲滄溟去。鯨浪浮天信所之。

又
常笑相如賦上林。肯爲子政鑄黃金。心光自發誰能障。踵息無聲不厭深。搖齒復牢堪決肉。枯顱再茁已勝簪。老松澗底雖終棄。霜雪元知不解侵。

又
拖得烏藤到處行。看山看水眼猶明。但期少健遊潼華。豈必長生似老彭。一綉青鞋吾事了。半甌綠酒萬緣輕。安知不作希夷叟。生長兵間老太平。予生于宣和末。錫虜禍。間關東歸。又避地數年。

又
未說無功爵位叨。昔人所畏在功高。印如斗大寧常保。劍拄頭長祇自勞。酒社極知身可隱。獵場猶得氣差豪。世

間見透渾無事。孤貉安能詫繡袍。

村興

折花持博酒。種菜賣供家。請藥人何壅。爭棋客正譁。漁翁足蹠蹕。牧豎手丫叉。短景匆匆晚。橫林又宿鷗。

賽神

歲熟鄉鄰樂。辰良祭賽多。荒園拋鬼飯。高机置神鵝。村人謂祭神之性。日神猪神鵝。人散叢祠寂。巫歸醉臉酡。飢鴉更堪笑。鳴噪下庭柯。

小立

紅樹園廬晚。碧花籬落秋。荒陂船護鴨。斷岸笛呼牛。酒賤村村醉。山寒寺寺幽。聊須岸烏幘。小立埭西頭。

窮老

窮老寧須歎。吾生得已多。風埃棄朝幘。煙雨弄漁蓑。富屋烏爰止。閑門爵可羅。人生只此是。得酒且高歌。

晚步舍東

籬槿花開柿葉丹。土溝東去過牛欄。草煙漠漠天將暮。布褐蕭蕭客正寒。

述野人語

白米乾薪好井泉。甘餐笑睡若登仙。從來不慣嘗鹽酪。席下何須有一錢。

又

重重大布敵風霜。籬外桑陰五月涼。軟飯一盂千萬足。那知世有郭汾陽。

戲答野人

日飲雲根一脈泉。知君骨相自應仙。曲肱閑臥茅簷下。買斷南山不用錢。

又

木葉凋疎天欲霜。老懷多感易淒涼。得君數語開人意。徑就湖橋醉夕陽。湖橋有村店。酒甚美。

建安陳希周官海南。爲予致兩拄杖。其一促節竹。其一桄榔也。

兩瀆嵐侵薛暈重。石罅楷天正相同。取從萬里鯨波路。來伴三山鶴髮翁。雪一作雲上有時留醉草。花前隨處打殘紅。化龍徑去吾何憾。且與人間作歲豐。

排悶

棄官謂逍遙。勞苦殊未既。荒疇須墾闢。破屋欠塗墍。疾深藥難求。食盡穀暴貴。安能作經營。但覺睡有味。秋高霜露逼。更苦薪炭費。雖云未遽死。飢凍亦可畏。頗思從李廣。小獵聊吐氣。復恐灞亭歸。邂逅逢醉尉。

九月十二日折菊

黃菊芬芳絕世奇。重陽錯把配萸枝。開遲愈見凌霜操。堪笑兒童道過時。

表姪江垌種竹名筠坡來求詩

奉常遺緒冷如秋。閉戶知君頗好修。千里可嗟妨晤語。兩書猶喜免沉浮。但令有竹能醫俗。何患無天可寄愁。一事卻須常自勉。勿容凡子得同遊。

微雨

晡後氣殊濁。黃昏月尚明。忽吹微雨過。便覺小寒生。樹杪雀初定。草根蟲已鳴。呼童取半臂。吾欲傍堦行。

秋晚寓歎

荷葉枯已盡。菊花殘更香。帶醒嘗野橘。和夢聽啼螿。鬢畔流年速。燈前舊話長。寒龜且未死。不必恨搗牀。

又

野處仍多病。經年無與遊。僧庸幾市井。醫傲過公侯。不睡愁逢夜。無衣怯到秋。一端聊自慰。問事有長頭。

又

幽夢雞呼覺。孤愁雨滴成。天高那可問。年往若爲情。孱虜猶遺育。神州未削平。登高西北望。衰涕對誰傾。

又

老歎交朋盡。閑知日月長。著書終覆瓿。得句漫投囊。霜樹昏鴉黑。風簾小蝶黃。村醪如水薄。也復答年光。

十里丹楓岸。三家小麥村。山多妨極目。秋晚易消魂。火舉船過埭。人行犬吠門。窮愁已如許。那更兩昏昏。

行年垂大耋。久矣少朋儔。舊事同誰說。新詩或自酬。廢書眠過日。泥酒醉經秋。遲速皆當死。時來莫預愁。

秋晚湖上

已過西成賽廟期。家家下麥不容遲。夕陽遍野人歸後。秋水生灘鷺集時。靈藥不治懷抱惡。好詩空益鬢毛衰。從來未識蘇司業。愁絕西風滿酒旗。

縱遊歸泊湖橋有作

西蜀東吳到處遊。千巖萬壑獨吾州。短篷載月娥江夜。小蹇尋詩禹寺秋。村酒可賒常痛飲。野人有興卽相求。何由喚得王摩詰。爲畫湖橋一片愁。

九月十八日至山園是日頗有春意

烏藤真好友。伴我出荆扉。落葉紛如積。鳴禽暖不歸。露濃松鬣長。土潤朮苗肥。未盡幽尋興。還家趁夕暉。

明日又來天微陰再賦

烏柏赤於楓。園林九月中。天寒山慘淡。雲薄日曛曛。旋摘分猿果。寬編養鶴籠。身閑足幽事。歸臥莫匆匆。

又

河岸風檣遠。村陂牧笛長。短籬圍鹿眼。幽徑縵羊腸。照水鬢眉見。揜橙指爪香。衣裘又關念。礎杵滿斜陽。

雨後至近村

夜雨曉方止。朝雲猶作陰。山餘一寸碧。溪長半篙深。臥泛白鷗渚。行穿黃葉林。老農能共語。真率會人心。

又

年耄身猶健。秋高疾已平。鄰翁思問訊。蔬圃要巡行。竹杖輕無迹。芒鞋捷有聲。相逢無別語。努力事冬耕。

雨復作自近村歸

夜聽蕭蕭未漲溪。朝行灑灑已成泥。可憐鳩取招麾速。誰似雲知出處齊。野菊枝長半狼藉。江楓葉落正淒迷。行

人也識蠹堂老。小榼村醪手自攜。

兩寒戲作

掃園收檨葉。培地甃墼爐。幸有藜烹粥。何慚紙作襦。

衡門晚眺

幽居端似玉川生。茅屋支撐不更營。青旆荒寒增酒興。錦囊零落負詩情。殘蕪色襯斜陽遠。落葉飛如野鳥輕。徂歲崢嶸忽如許。雁來又過會稽城。

不寐

澠譙聽盡短長更。幽夢無端故不成。寒雨似從心上滴。孤燈偏向枕邊明。讀書有味身忘老。報國無期涕每傾。敢爲衰殘便虛死。誓先鄰曲事春耕。

示子虞

好學承家夙所奇。蠹編殘簡共娛嬉。一婚偷學吾無累。吾今年爲一子自蜀歸者聘婦。無復婚嫁之責。三釜雖微汝有期。子虞明秋當赴句金。事弟元知是難弟。德兒稍長豈常見。要令舟過三山者。弦誦常聞夜艾時。

弊廬

弊廬雖陋甚。鄙性頗所宜。欲傾十許間。草覆實半之。碓聲隔柴門。續火出枳籬。縛木爲堯牢。附垣作雞埒。黃犢放林莽。蒼鵝戲陂池。備耕食於我。客主同爨炊。瓦盎設大杓。殖菑羹園葵。一飽荷鋤出。作勞非所辭。上以奉租賦。下以及我私。有錢卽沽酒。阡陌姿遊嬉。亦有扶持者。婢跣奴髻椎。欲畫恨無人。後世考此詩。

予未冠卽交諸名勝今無復在者感歎有作

早歲鄉閭接勝流。老來零落歎山丘。欲尋共語人難得。卻是封侯印易求。數酌不能成兀兀。一枰且復寄悠悠。世間只有身差重。惆悵今年白盡頭。

夜雨

吾詩滿篋筍。最多夜雨篇。四時雨皆佳。莫若初寒天。紙帳白於氈。紙被輒於綿。枕傍小銅匱。海沉起微煙。是時聞

夜雨如絲竹管弦。恨我未免俗吟諷。勤雕鐫。南朝空增語。妙出建安前。意謂奮造化。百世莫比肩。安知梧桐句。乃復與並傳。夜雨何時無。奇語付後賢。

題嚴州王秀才山水枕屏

我行天下路幾何。三巴小益山最多。翠崖青嶂高嵯峨。紅棧如帶縈巖阿。下有駭浪千盤渦。一跌性命委蛟鼉。日馳三百一烏騾。雪壓披氈泥滿鞵。驛亭沃酒醉臉酡。長笛腰鼓雜巴歌。大散關上方橫戈。豈料世變如翻波。東歸輕舟下江沱。回首歲月悲蹉跎。壯君落筆寫岷嶓。意匠自到非身過。偉哉千仞天相摩。谷裏人家藏綠蘿。使我恍然越關河。熟視粉墨頻摩挲。

小飲示座中

鏡裏蕭蕭兩鬢衰。閑人正與老相宜。誰知翦燭焚香夜。恰是撻橙破橘時。莫道閉門無逸氣。尙能爲客誦新詩。君看江海寬多少。是處皆堪理釣絲。

搖落吟

素秋欲盡風雨惡。千林如掃俱搖落。年運而往秋復冬。念念元知已非昨。癡人顧欲吝此生。放翁憫汝笑絕纓。髮毛爪齒俱外物。天地大化終無情。我貧無以遺兒子。惟有一言持付爾。仕宦要能當百挫。爲農飢死無遊惰。

插花

有花君不插。有酒君不持。時過花枝空。人老酒戶衰。今年病止酒。虛負菊花時。早梅行可採。家醞綠滿卮。君不強一醉。歲月復推移。新詩亦當賦。勿計字傾欹。

兩過行視舍北菜圃因望北村久之

蔬畦躡屐愜幽情。檢校園丁日有程。得雨尙慳須灌溉。我來時聽桔槔聲。

又

吳牛齧草臥斜陽。烏柏青紅未飽霜。急趁路乾來寓目。十分閑事卻成忙。

居三山時方四十餘。今三十六年久已謝事。而連歲小稔喜甚。有作

自問湖邊舍。衰殘俛仰中。謀身悲日拙。造物假年豐。稅足催科靜。禾登債負空。社醅邀里巷。臘肉飫兒童。衣及霜晨贖。爐先雪夜紅。陂塘趨版築。垣屋訖宮功。盜息時雍象。人淳太古風。退夫無一事。鼓缶伴鄰翁。

幽居

百事徒勞無一成。幽居偶得稱幽情。傍籬叢枳寒猶綠。遶舍流泉夜有聲。飢坐炮燔多巨粟。醉歸懷袖有新橙。愛閑自是從來癖。敢竊區區納祿名。予自儼曹羅歸。十年不出戶。乃請挂冠。

曉晴肩輿至湖上

多稼如雲穫併空。牛闌樵擔畫圖中。梧桐已逐晨霜盡。烏柏猶爭夕照紅。脫網險喁奔遠浦。避鷹撲握保深叢。旗亭人語燈初上。一醉何妨野老同。

戲作野興

省事貧猶富。寬懷客勝家。充虛一簞飯。遣睡半甌茶。有興閑垂釣。逢歡醉插花。皋橋亦可死。處處是生涯。

擾擾亭中客。悠悠局上棋。所遭元有命。自苦竟何爲。馮衍深尤婦。陶潛過責兒。奇文雖可貴。寢語豈非癡。

又

久已挂吾冠。江邊歲又殘。心惟無媿怍。身取不飢寒。小酌三杯足。安居一席寬。東岡有泉脈。攜杖試尋看。

又

今年病微減。耕稼樂江村。燈火耿破屋。歌呼圍老盆。常時但葵菟。盛饌有雞豚。客散茅簷寂。踟躕自閉門。

又

出月語鄰叟。與卿同一愚。逢人卽如舊。臨事不勝迂。髮白花猶插。囊空酒亦沽。同漁五十載。何處有榮枯。

又

有酒皆堪醉。無山不可廬。遂初成近賦。孤憤悔前書。湘寺分經帙。廬山寄藥鉏。江頭霜葉滿。詩興屬騎驢。

道室書事

榻上一琴橫。中函太古聲。丹砂燒已死。芝草種初生。道勝魔軍破。方靈疾豎平。明朝有蜀使。細字報青城。

行飯至湖桑堰東小市

飽食無營是處遊。偶然來到棗東頭。芒鞋也似雙覺快。漁艇真如一葉浮。樵擔行歌衝暝色。酒旗遮路賣新鷄。任朱二老今安在。歎息黃茅擁故丘。任朱皆居堰旁。與予同乙巳生。今死矣。

負日戲作

困來兩臂似膠黏。底怪吳人號黑甜。安得他生不識字。朝朝就日臥茅簷。世傳楊大年見老兵負日。不覺曰快活。因問汝識字否。對曰不識。大年曰。如此更快活也。

遊西村

昨夜雨多溪水渾。不妨喚渡到西村。出遊始覺此身健。無食更知吾道尊。藥笈可賒山店酒。筇枝時打野僧門。歸來燈火茅簷夜。且復狂歌鼓盞盆。

初冬

平生詩句領流光。絕愛初冬萬瓦霜。楓葉欲殘看愈好。梅花未動意先香。暮年自適何妨退。短景無營亦自長。況有小兒同此趣。一窗相對弄朱黃。

遣懷

寬袂新裁大布裘。低篷初買小漁舟。舊交只有青山在。壯志皆因白髮休。漫道臥熊吞貉子。安能斲米向矛頭。山園芋栗秋方熟。一飽今知本易謀。

策杖

山翁老病入腰膺。坐覺諸兒行步奔。暫出衡門須策杖。千回上樹更堪論。

汲東山下井

從來耽酒須微祿。絕祿三年酒盞疎。百尺轆轤新浚井。一杯聊慰渴相如。

園中作

誰采桄榔寄一枝。北來萬里爲扶衰。風光最愛初寒候。懷抱殊勝未老時。閑引微泉成曲澗。盡餘枯蔓補疎籬。花前自笑童心在。更伴羣兒竹馬嬉。

又

病侵衰境頻須藥。日漏寒雲旋作晴。幽鳥喚回殘枕夢。蠻童扶下野堂行。書生本自安窮處。豐歲何妨樂太平。新買西村兩黃犢。閑招鄰曲議春耕。

園中

霜凋檉柳枝無葉。風坼安榴子滿房。多日園林元自好。老人懷抱自多傷。

短篷

射的山前繫短篷。快如魚鳥出池籠。試臨清鏡枯顏茁。不待丹砂兩頰紅。逐妄百年真自苦。造微一日有餘功。不須更說岷峨約。已覺蓬壺在眼中。

自適

遠遊思里巷。久困念耕桑。家釀傾醇碧。園蔬摘矮黃。小槽用菘豆麴。矮黃。吳中菜名。利名因醉遠。日月爲閑長。今歲雖中熟。吾徒亦小康。

堂東小室深丈表半之戲作

小室舍東偏。滿窗朝日妍。妍池生細浪。香岫起微煙。欲極圖書樂。少須冰雪天。猶勝禪榻上。僅僅占三椽。禪僧自謂三條椽下。六尺單前。

獨處二首

蓬門終日閉。寂寂少人聲。納祿知身貴。傳家覺責輕。朝餐烹芋糝。夜坐爇松明。刻卻彈棋局。此心如砥平。白氈敷牀穩。烏藤倚壁斜。灰深惟畫字。燈暗不成花。似客猶居里。如僧未出家。孤村夜無月。何事有啼鴉。

探梅至東村

乞得殘骸已累年。柴車破弊不堪懸。閑愁正要供詩思。小疾何妨省酒錢。忍事漸多心混混。貯書雖少腹便便。今

朝偶有尋梅興。春色垂來拄杖前。

讀史

青燈耿耿夜沉沉。掩卷凄然感獨深。恤緯不遑整婦歎。美芹欲獻野人心。孤忠要有天知我。萬事當思後視今。君看宣王何似主。一篇庭燎未忘箴。

漁翁

船入蘆花日暮時。雙瞳炯炯鬢如絲。世間豈少磻溪叟。老向煙波人不知。

又

文叔君房兩故人。可憐俱作白頭新。桐江歸伴鄰翁醉。一笑相看意卻真。

寓言

濟劇人才易。扶顛力量難。爲謀須遠大。守節要堅完。氣與秋天杳。胸吞滄澤寬。方知至危地。自有泰山安。

又

出仕謝招麾。還家笑蕨薇。深居全素志。大路息危機。世變生呼吸。人情忽細微。牀頭周易在。捨此欲安歸。

又

山海三家市。風煙五畝園。藜羹均玉食。茅屋陋朱門。耕釣此身老。乾坤吾道尊。故交淪落盡。至理與誰論。

夜四鼓睡覺起行簷間觀新作南籬

星斗闌干天宇清。起披短褐繞廊行。葉聲颯颯飛霜重。籬影疎疎落月明。沙冷斷鴻投別浦。風高殘漏下孤城。衰遲自笑情猶在。一首新詩取次成。

客去追記坐間所言

征西幘罷幾經春。歎息兒音尙帶秦。每爲後生談舊事。始知老子是陳人。建隆乾德開王業。溫洛榮河厭虜塵。倘得此生重少壯。臨危敢愛不貲身。

曉音

行路悲疇昔。驅車每戴星。數殘雙隻屐。歷盡短長亭。飛盞交迎餞。聽歌半醉醒。至今湖海夜。猶夢隴山青。

飲牛歌

門外一溪清見底。老翁牽牛飲溪水。溪清喜不污牛腹。豈畏踐霜寒墮趾。舍東土瘦多瓦礫。父子勤勞藝黍稷。勿言牛老行苦遲。我今八十耕猶力。牛能生犢我有孫。世世相從老故園。人生得飽萬事足。捨牛相齊何足言。

牧羊歌

牧羊忌太早。太早半輒傷。一半病尚可。舉羣無全羊。日高露晞原草綠。羊散如雲滿川谷。小童但搯竹一枝。豈必習詩知考牧。

生日子聿作五字詩十首爲壽追懷先親怳然有作十月十七日

我生尙及宣和末。頽曆頻驚歲月移。負米養親無復日。蓼莪廢講豈勝悲。渡江百口今誰在。抱恨終身祇自知。文字虛名何足道。樽前媿汝十章詩。

園中書觸目

氣候今年晚。濃霜始此回。殘梧未全槁。晚菊有初開。烏柏先楓赤。寒鴉後雁來。西窗夕陽暖。摘橘薦新醅。烏桕未霜而葉丹。寒鴉必得霜乃至。

養生

武丁命傅說。治國如和羹。天亦命放翁。用此以養生。抑過補不足。輔相其適平。千歲汝自有。不必師廣成。

齋中雜興

八十頽齡安所歸。蕭然終日掩柴扉。清心始信幽棲樂。窮理方知俗學非。山果滿筐猿食足。石泉通甕藥苗肥。衰翁莫道渾無事。掃葉歸來又落暉。

又

倒掩衡門手自關。老身著在亂書間。有詩尙作清宵祟。無事能妨白日閑。薄暮上樓聊試步。經旬止酒自酡顏。兒曹莫笑衰翁嬾。擬遍淮南大小山。

江上

禹會橋頭江渺然。隔江村店起孤煙。冷雲垂野雪方作。斷雁叫羣人未眠。萬里漂流歸故國。一生蹭蹬付蒼天。暮年尙欲師周孔。未遽長齋繡佛前。

追憶征西幙中舊事

大散關頭北望秦。自期談笑掃胡塵。收身死向農桑社。何止明明兩世人。

又

小獵南山雪未消。繡旗斜卷玉驄驕。不如意事常千萬。空想先鋒宿渭橋。

又

憶昨王師戍隴回。遺民日夜望行臺。不論夾道壺漿滿。洛筍河魴次第來。在南鄭時。關中將吏有獻此二物者。

又

關輔遺民意可傷。蠟封三寸絹書黃。亦知虜法如秦酷。列聖恩深不忍忘。關中將校密報事宜。皆以蠟書至宣司。

冬夜

颼颼黃葉欲辭枝。況著霜風抵死吹。投老難逢身健日。讀書偏愛夜長時。孤村月白聞衣杵。破竈煙青煮芋糜。不是用心希陋巷。爲儒自合耐寒飢。

冬日

室中恰受一蒲團。也抵三千世界寬。上策莫如扃戶坐。苦閑猶復取書看。蔬青飯輒枝梧老。窗白爐新準備寒。堪笑此翁幽獨慣。卻嫌兒女話團樂。

冬朝

風入園林徹夜鳴。曉看黃葉與堦平。篝爐火著衣初暖。爨釜薪乾粥已成。潔己工夫先盥頰。正心事業始冠纓。聖賢雖遠詩書在。殊勝鄰翁擊磬聲。釋氏謂銅鉢爲磬。

冬暮

曉角昏鐘爲底忙。豈容老子更禁當。乘除富貴惟身健。補貼光陰有夜長。臨水小軒初見月。滿庭殘葉不禁霜。巴江尺素何時到。剩著新詩寄斷腸。張梓州書久不至。

風月

鏡中日日鬢毛衰。八十還思七十時。風月不知人意緒。酒醒夢斷又催詩。

落葉

萬瓦清霜伴月明。臥聽殘漏若爲情。無端木葉蕭蕭下。更與愁人作雨聲。

郊風

少學詩三百。郊風最力行。春前耕犢健。節近祭豬鳴。簷日桑榆暖。園蔬風露清。金丹不須問。持此畢吾生。

擁爐不出輒終日自嘲

柴門木落葉成堆。十日元無一再開。書坐藏多爲飽祟。詩緣吟苦作窮媒。兒言山圃當收粟。僧約溪橋共探梅。堪笑此翁推不動。地爐無火畫寒灰。

嘲梅未開

梅蕊如紅稻。中藏無盡香。何時來鼻境。更待幾番霜。

卷四十九

自嘲

僻學論交少。貧居卜地偏。不逢方謝事。垂老旋希仙。兀兀醒如醉。昏昏晝亦眠。卻慚農與圃。一飽錢餘年。

解嘲

一壑棲遲久。多生習氣消。行藏無媿怍。夢覺兩逍遙。倩鶴傳山信。疏泉洗藥苗。晚來幽興極。乘月過溪橋。

野興

晨炊畚粟薦園蔬。默計生涯已有餘。舉世方誇稽古力。滿懷空貯活人書。悶呼赤腳行沽酒。出遣蒼頭旋餽鱸。不

爲歸休習疎嬾愛閑元與市朝疎

枕上

送盡小窗月。數殘孤戍更。清詩時自至。幽夢久方成。衣杵斷還續。燈花落復生。細衾牘得暖。紙帳不知明。

遠遊

老子平生喜遠遊。流塵不惜闍貂裘。江亭吹笛三巴夜。關路騎驢二華秋。但使澄心同止水。自知幻境等浮漚。悠然飽聽松風睡。勾漏丹砂底用求。

晚遊

垣屋參差出。溝谿曲折通。亂鴉空際黑。落日竹間紅。軋軋輿竿語。搖搖旛腳風。吾行本無定。隨意入空曠。

夜坐

流落知聞絕。歸休寵辱空。酒狂寧限老。詩思正須窮。活火生新焰。殘燈委碎紅。平生會心處。正在兀然中。

酒熟醉中作短歌

陸子壯已窮。百計不救口。蜀道如上天。十年厭奔走。還鄉因猶昨。負郭無百畝。雖云飢欲死。亦未喪所守。虛名一畫餅。陳迹幾芻狗。但思從壯士。大獵雲夢藪。長戈白如霜。爛漫載牛酒。箭穿乳虎立。車轆蒼兕吼。歸來數禽獲。毛血灑戶牖。人生貴適意。富貴安可苟。

冬夜讀書有感

落葉殘蕪又一冬。老人光景易忽忽。不論病情耕桑業。但恨貧分學問功。馬昔騰驤離冀北。鶴今憔悴返遼東。六經未與秦灰冷。尚付餘年斷簡中。

散步湖上至野人家

湖上霜高水落時。一藤信步出尋詩。妄誇強健真堪笑。喚作清閑亦自欺。西埭又隨牛迹去。東村常望鶴巢知。漁翁留客頻辭謝。雞瘦難烹酒味癯。

對食戲詠

癭榼傾桑落。毫杯點雨前。冰梨頰似頰。霜粟大如拳。洗脯烹蔬甲。攜鉏斫筍鞭。餘年只此是。切勿念腥羶。

昨非

溫飽從來與道違。書生只合臥牛衣。老狐五百生前錯。孤鶴三千歲後歸。舌自生肥勝玉食。腰常忘帶況金圍。一官彭澤曾何有。元亮還家悔昨非。

遂初

貧士善用短。屏居常自如。出尋鄰叟語。歸讀古人書。過店亦沽酒。登山時跨驢。非關傲塵世。聊欲遂吾初。

小兩偶出鄰里小兒競隨吾後不知其意何也

雲生海澨初飛雨。日漏山椒旋作晴。箬笠芒鞋橋下路。兒童爭逐放翁行。

書喜

堪笑龜堂老更頑。天教白髮看青山。家居禹廟蘭亭路。詩在林逋魏野間。略計未嘗三日醒。細推猶得半生閑。今年況展南湖面。朝借樵風暮可還。時方有朝命復鏡湖。

書房雜書

斂版一何久。懸車已後時。狂醒醒始悔。窮獨老方知。世外乾坤大。林間日月遲。猶須采藥去。不媿鹿門期。

又

面槁髮鬢髻。衰殘百不能。夜房侵戶月。晨硯滿池冰。藥債多於酒。蔬餐薄過僧。年深拄杖折。自斫澗邊藤。

寒夕

夜扣銅壺徹旦吟。了無人會此時心。燈殘焰作孤螢小。火冷灰如積雪深。風急江天無過雁。月明庭戶有疎砧。此身畢竟歸何許。但憶藏舟黃蘗林。

讀經

半升粟飯養殘軀。晨起衣冠讀典謨。莫謂此生無用處。一身自是一唐虞。

讀史

民間斗米兩三錢。萬里耕桑罷戍邊。常使屏風寫無逸。應無烽火照甘泉。

讀劉蕡策

志士仁人一作人人。人氣薄雲。唐家惟有一劉蕡。看渠放逐蛇龍手。那肯驅蠅與拍蚊。

雨霰作雪不成大風散雲月色皎然

數間茅屋寄蓬蒿。天遣來歸息我勞。月可一庭陳素練。風酣萬木起驚濤。病侵齒髮才雖盡。酒挾江山氣尚豪。安得人間掣鯨手。共提筆陣法莊騷。韓文公以醫配莊。古人論文所未嘗及也。

中夜苦寒

困窮全素節。羸老愈剛腸。報國永無日。飯蔬那自傷。布衾如鐵冷。冬夜抵年長。推枕歌梁甫。中庭月似霜。

示子孫

爲貧出仕退爲農。二百年來世世同。富貴苟求終近禍。汝曹切勿墜家風。

又

吾家世守農桑業。一挂朝衣卽力耕。汝但從師勤學問。不須念我叱牛聲。

早梅

東塢梅初動。香來託意深。明知在籬外。行到卻難尋。

縱筆

晨炊躬稼米。夜讀世藏書。俯仰無多慚。心知死有餘。

又

破困供飯足。陋屋著身寬。小蹇勤芻秣。時時一跨鞍。

歲暮雜感

衰髮如枯菅。殘齒如敗屐。取米鬻薄糜。便足度晨夕。欲知死遠近。不必訊龜筮。四序忽已過。如數埃雙隻。發裝陌上亭。具食水邊驛。會當一日歸。豈有終作客。

又

天風吹雪片。大者如飛鷗。豈惟平溝坑。直恐羶馬牛。百錢買薪蒸。千錢贖褐裘。雖無狐貉溫。要免溝壑憂。小兒爲我言。幸可具杯甌。園蔬亦復佳。過足翁豈求。

又

歲盡霜雪稠。相望僵萬木。天豈私梅花。獨畀此芬馥。高標我自有。何憾老空谷。人言和羹實。晚或參鼎餼。哀哉世論卑。好我塵外躅。誰能滌袂之。寫真配修竹。

又

我少雖嗜書。賦性實慵惰。初志略未酬。白髮已無那。吾兒猶好勇。世事如棄唾。呻吟編簡中。徹旦或未臥。爾來愈自勵。日讀易一過。勉終大學功。吾道要負荷。

自責

晨起登堂正幅巾。蕭然聊欲養吾神。凡心未免更詩字。習氣猶思議古人。買屨爲登山寺去。徹燈緣愛月窗新。何時一切消除盡。終作無懷上古民。

懷舊用昔人蜀道詩韻

曩自白帝城。一馬獨入蜀。晝行多水涸。夜宿必山麓。時聞木客嘯。常憂射工毒。蜿蜒蛇兩頭。湛蹕夔一足。豈惟耳目駭。直恐性命促。稍歷葭萌西。遂出劍閣北。奴僮不敢訴。馬病猶盡力。我亦困人客。一日帶屨束。最憶蒼溪縣。送客一亭綠。豆枯狐兔肥。霜早柿栗熟。酒酸壓查梨。妓野立土木。主別意益勤。我去疲已極。行行求旅店。借問久乃得。溪聲答歌長。燈焰照影獨。村深寒更甚。薪盡燒簞竹。須臾風雨至。終夕苦漏屋。於時厭道途。自誓棄微祿。猶幾三十年。始謝祝史職。予四竊利祿。乃謝事。君思念篤老。內閣使寓直。亦思秋豪報。力僊藝黍稷。卻尋少時書。開卷有慚色。

出遊

僧院軒窗酒市樓。過門自入不須留。恰來竹下尋棋局。又向沙邊上釣舟。詩放不能諧律呂。書狂猶足走蛟虬。秦

碑禹窆風煙外一弔興亡萬古愁

辛酉冬至

今日日南至。吾門方寂然。家貧輕過節。身老怯增年。鄉俗謂喚冬至飯即添一歲。馮祭皆扶拜。分盤獨早眠。惟應探春夢。已繞鏡湖邊。

冬至後一日書

霜霰新冬後。年齡大耋時。功名久無夢。文字略存詩。丘壟歸何憾。琴書付有兒。癡人癡到底。更欲數期頭。

客至

何處軒車客。能來桑麥村。一奴先入市。此老自應門。野果嘗皆澀。村醪壓尚渾。殘年亦何恨。治世作黎元。

子聿入城

小硯寒生凍。孤燈翳復明。衰翁守微火。稚子隔重城。日落林無影。舟行水有聲。詩家忌草草。得句未須成。

降魔

老闍人間久。曾降百萬魔。悲憂誠害性。喜悅亦傷和。省事常須勉。忘懷得最多。當年未知此。無奈月明何。

冬日

故里躬耕後。頽齡耄及前。開門無客至。得句有僧傳。忽忽身如夢。迢迢日似年。會當乘小雪。夜上剡溪船。

又

客至惟清坐。真貧不是慳。援琴排遣悶。合藥破除閑。引鶴時穿屐。逢梅一破顏。怪來寒徹骨。夜雪冒南山。

客去

相對蒲團睡味長。主人與客兩相忘。須臾客去主人覺。一半西窗無夕陽。

自勉

妄出真成錯。歸耕惜已遲。褐溫貧始覺。飯美淡方知。身外元無易。情中自有詩。窮源那得止。瞑目以爲期。

又

自信直如弦。殘年偶得全。老猶強佞佛。貧亦諱言錢。日暮勤鞭策。塵埃痛洗滌。仍須語兒子。此事要家傳。

又

臂弱傳鈔少。心煩記問衰。讀書猶自力。愛日似兒時。章句分無憾。聲形講不遺。明年幸強健。閉戶有餘師。

又

歸老寧常逸。時時學荷鋤。室雖無長物。圃尙有餘蔬。壯志誠衰矣。貧居亦晏如。爲農當世業。安用築門閭。

午晴至園中

老不禁寒起每遲。出門蕭散午晴時。春回九地梅先覺。霜貫千林竹不知。藥圃采苗芒屨溼。石泉照影角巾欹。歸來未過西簷日。袖手悠然獨詠詩。

七姪歲暮同諸孫來過偶得長句

兩塾林宗一角巾。蕭條村路並煙津。四朝遇主終身困。八世爲儒舉族貧。行摘殘蔬循廢圃。臥聞飢雀噪空囷。封胡羯末皆佳甚。剩喜團樂一笑新。

苦寒

終日頻添季子裘。經旬不上仲宣樓。摩挲酒榼雖堪喜。疎索梅花未免愁。正苦冰生退吟筆。卻思雪作潤耕疇。乘除擾擾殊多事。獨擁青氈覓睡休。

閑中書適

棋廢機心息。書捐美睡多。客來時淡話。酒後亦高歌。甚欲江湖去。無如老病何。平芜半輪月。依舊照漁蓑。

又

乞得殘骸久。天涯一秃翁。瓢分春瓮綠。甌絕太倉紅。短褐便冬暖。長歌樂歲豐。老腰那可折。步步賴枯筇。

復湖

世事相尋敗與成。湖中舂鍤浩縱橫。共知陂壞行當復。敢恨臺高旣已傾。小隱山園在湖中。近聞亭觀皆廢。天鏡忽看孤月墮。樵風長送片帆輕。下臨萬頃如雲稼。從此年年有頌聲。

梅花絕句

體中頗覺不能住。急就梅花一散懷。衝雨涉溪君會否。免教塵土斲青鞋。

又

高韻知難折簡呼。溪頭掃地置芳壺。梅如解語應惆悵。昔日名流一箇無。

又

折得梅花古渡頭。詩凡卻恐作花羞。清樽賴有平生約。爛醉千場死即休。

又

疎枝冷蕊誰能畫。楊叟江西舊擅名。今日東窗閑拂拭。去人一尺眼先明。

跋馮氏蘭亭

堂堂淮陰侯。夫豈噲等伍。放翁評此本。可作蘭亭祖。唐古石刻本。

又

鬪紙藏昭陵。千載不復見。此本得其骨。殊勝蘭亭面。中山舊本。山谷有句云。俗書喜作蘭亭面。

十二月二日夜夢與客並馬行黃河上憩於古驛

並轡徐驅百里中。雲開太華翠摩空。是間合有神靈在。七十餘年墮犬戎。

又

河濱古驛闢重門。雉兔紛紛黍酒渾。吾輩豈應徒醉飽。會傾東海洗中原。

倚樓初二日

暮雲細細鱗千疊。新月纖纖玉一鈎。歎息化工真妙手。衝寒來倚水邊樓。

讀書

先親愛我讀書聲。追慕慈顏涕每傾。萬事到前心盡嬾。一編相向眼偏明。致君正使違初志。爲己猶當畢此生。更祝吾兒思早退。兩蓑煙笠事春耕。

讀史

夜對遺編歎復驚。古來成敗浩縱橫。功名多向窮中立。禍患常從巧處生。萬里關河歸夢想。千年王霸等棋枰。人間只有躬耕是。路過桑村最眼明。

閑遊

已破梅花一兩枝。並溪穿塢每歸遲。老軀健似中年日。鄉俗淳如太古時。上疏清狂非復昔。據鞍矍鑠欲誇誰。一端尙被鄰翁笑。無事長吟費撚髭。

日暮

樸學無關道廢興。更堪衰與病相乘。眼看白日西南去。繩繫膠黏總不能。

省事

老去終年臥草廬。事皆省盡略無餘。塵留鼠跡猶嗔拂。風作瓢聲固不除。興發舊醅何害醉。詩成拙筆亦堪書。投牀睡美悠然覺。作計今知本不疎。

雪中作

鬢毛無奈歲華催。一笑登臨亦樂哉。平地忽成三尺雪。遶湖何啻萬株梅。雲山疊疊朝憑閣。簾幕沉沉夜舉杯。節物鼎來方自此。酥花綵勝待春回。

夢韓无咎王季夷諸公

積雪欲照夜。老雞方唱晨。諸公逝已久。幽夢忽相親。話舊慙慙意。追歡見在身。悠然又驚覺。撫枕一悲辛。

晴窗讀書自勉

今日雪始晴。遶舍烏鳥樂。老來少睡眠。雖病亦早作。豈無案上書。可與共寂寞。弦歌始風雅。次第窺灑盪。高明仰河漢。曲折窮脈絡。唐虞誠未遠。洙泗亦如昨。委佩聞都兪。避席承博約。膏肓幸施砭。幽闕欣納鑰。天全魯壁藏。不墮秦火虐。吾生百世餘。其敢負所託。

冬夜讀史有感

短檠膏涸夜將殘。感事懷人與未闌。酌酒淺深須自度。圍棋成敗有傍觀。斷糲作飯終年飽。大布裁袍稗意寬。世上閑愁千萬斛。不教一點上眉端。

大寒

大寒雪未消。閉戶不能出。可憐切雲冠。局此客膝室。吾車適已懸。吾馭久罷叱。拂塵取一編。相對輒終日。亡羊戒多岐。學道當致一。信能宗闕里。百氏端可黜。爲山儻勿休。會見高峯嶽。頽齡雖已迫。孺子有美質。

自詠

滿梳晨起髮凋零。亭午柴門未徹扃。萬事忘來尙憂國。百家屏盡獨窮經。楠枯倒壑雖無用。龜老搗牀故有靈。夢裏騎驢華山去。破雲巉絕數峯青。十二月十二夜夢實有此。故識之。

晚興

斲芋挑蔬自鬻羹。雪簷收滴暮寒生。不嫌終日無來客。時聽荒園斵木聲。

雪後寒甚

日破重雲出。春從淺步來。未融樓北雪。先綻水南梅。屏護清吟硯。缸鳴乍熟醅。平生羨李愬。入蔡夜銜枚。

雪晴步至舍傍

雪消還似雨。冰釋旋成泥。視菜荒陂北。尋梅小塢西。牆陰新犢臥。庭際午雞啼。幽興殊無極。歸來日已低。

訪隱者

湖曲有隱者。時時容叩門。人如釣渭叟。地似避秦村。笑語羣塵遠。衣冠古製存。山寒歸路晚。相與盡瓢樽。

村野

村野易過日。閉門心自欣。一身猶逆旅。萬事固浮雲。病厭詩爲祟。閑憑酒策勳。灌園雖舊業。隨事不須勤。

初夜

初夜多幽興。危闌偶獨憑。月陞星盡沒。風勁雪重凝。身似遊邊客。心如退院僧。奇寒不可耐。歸對北窗燈。

雙松父老言紹興中所植

東岡天矯兩蒼龍。千尺蟠空黛色濃。六十餘年松若此。誰知我更老於松。

兀兀

兀兀孤村客。悠悠兩世人。夢忘身潦倒。醉覺膽輪囷。故里簪纓換。都門巷陌新。問臨安火後。興替備畢。餘年猶有幾。撫事一傷神。

殘曆

殘曆不盈紙。苦寒侵弊裘。歲猪鳴屋角。儻鼓轉街頭。未死猶當學。長貧肯復憂。雪晴農事起。且復議租牛。

戒言

饒舌憂患始。銘膺勸戒深。談空摩詰默。對酒子光瘡。久已忘齊語。何嘗解越吟。悠然嫌未足。更撫絕絃琴。

聞松風有感

重位每憂身後罵。虛名不救眼前飢。直須采藥名山去。日夜松風無歇時。

遣興

侯印從來非所圖。赤丁子亦不容呼。著低怯對新棋敵。量減愁逢舊酒徒。生世豈能常役役。酣歌且復和嗚嗚。扁舟到處皆吾境。莫問桐江與鏡湖。

又

家住城南剡曲傍。門前山色蘸湖光。三朝執戟悲年往。二頃扶犁樂歲穰。名姓已隨身共隱。文辭終與道相妨。子孫勉守東臯業。小甌吳粳底樣香。

有道流過門留與之語頗異口占贈之

萬里縱橫自在身。偶然來看剡溪春。取將月去閑娛客。攜得雲歸遠寄人。縮地不妨遊汗漫。移山隨處對嶙峋。須君更出囊中劍。一為關河洗虜塵。

閑記老境

謝事久懸車。為農懶荷鋤。破裘寒旋補。殘髮短猶梳。槁木忘榮謝。閑雲任卷舒。心知老當逸。先罷夜觀書。

又
嫌鬪不入市。怕寒稀出門。擁爐愁兀兀。投枕睡昏昏。柳色新如染。梅花香滿村。猶嗟未免俗。薄酒誑空樽。

小飲梅花下作

脫巾莫歎髮成絲。六十年間萬首詩。予自年十七入學作詩。今六十年得萬篇。排日醉過梅落後。通宵吟到雪殘時。偶容後死寧非幸。自乞歸耕已恨遲。青史滿前閑卽讀。幾人爲我作著龜。

門外野望十二月二十五日

野迴浮煙碧。門深反照紅。柳邊雙鷺渚。天際萬鴉風。僧唄家禳疫。神船社送窮。豐年隨處樂。忘卻鬢如蓬。

自題傳神

識字深村叟。加巾下版僧。檐挑雙草屨。壁倚一烏藤。得酒猶能醉。逢山未怯登。莫論明日事。死至亦騰騰。僧頌云。今日騰騰任運。明日任運騰騰。

歲暮貧甚戲書

阿堵元知不受呼。忍貧閉戶亦良圖。曲身得火纔微直。槁面持杯祇暫朱。食案闌干堆首屑。褐衣顛倒著天吳。誰知未減羸豪在。落筆猶能賦兩都。

晚晴閑步鄰曲間有賦

湯沐身輕念出遊。近春原野霽煙浮。樓陰雪在玉三寸。雲罅月生銀一鉤。窮巷客稀常足睡。暮年詩退不禁愁。鄉鄰無事冬耕罷。獨倚籬門數過牛。

誦書示子聿

乃翁誦書舍東偏。吾兒相和山之巔。翁老且衰常早眠。兒聲夜半方泠然。考公著書數百編。少師手校世世傳。我生七十有八年。見汝任此寧非天。

又

易傳三聖至仲尼。炎炎秦火乃見遺。經中獨無一字疑。正須虛心以受之。世衰道散吁可悲。我老欲學無碩師。父

子共讀忘朝飢。此生有盡志不移。

十二月二十九日夜半雨雪作披衣起聽

臘雪瑞豐登。春雨相發生。二者皆可賀。愛此打窗聲。披衣起靜聽。蕭蕭亂疎更。豈惟肺渴蘇。耳目爲一清。孤燈不結花。相對翳復明。明朝遂除夕。歲月驚崢嶸。

辛酉除夕

衰境遇白雞。自分墮幽墟。造物偶見寬。俯仰復歲除。駸駸迫耄期。凜凜無根株。孰知尙堅頑。壯者有不如。銅瓶垂碧井。手自浸屠蘇。松煤染兔穎。秉燭題桃符。登梯挂鍾馗。祭竈分其餘。僮奴歎我健。卻立不敢扶。新春無五日。節物傾里閭。羅旛插紗帽。一醉當百壺。

除夕

六聖涵濡作幸民。明朝七十八年身。門前西走都城道。臥看無窮來往人。

卷五十一

開歲

綠襦新畫衛門扉。賀刺相欺可累欬。賣困不靈仍喜睡。送窮無術又來歸。相尋蠶市人何在。爛醉蟆津事亦非。惟有禹祠春漸好。從今剩判典春衣。蠶市。成都正月初故事。蟆頤津在眉山。亦邦人正月宴遊之所。

箕卜

孟春百草靈。古俗迎紫姑。廚中取竹箕。冒以婦孺襦。豎子夾扶持。插筆祝其書。俄若有物憑。對答不須臾。豈必考中否。一笑聊相娛。詩章亦間作。酒食隨所須。興闌忽辭去。誰能執其祛。持箕畀竈婢。棄筆臥牆隅。几席亦已徹。狼藉果與蔬。紛紛竟何益。人鬼均一愚。

梅花絕句

幾年不到合江園。說著當時已斷魂。只有梅花知此恨。相逢月底卻無言。

又
當年走馬錦城西。曾爲梅花醉似泥。二十里中香不斷。青羊宮到浣花溪。

又
聞道梅花坊曉風。雪堆遍滿四山中。何方可化身千億。一樹梅前一作花一放翁。

又
小亭終日倚闌干。樹樹梅花看到殘。只怪此翁常謝客。元來不是怕春寒。

又
亂簦桐帽花如雪。斜挂驢鞍酒滿壺。安得丹青如顧陸。憑渠畫我夜歸圖。

又
紅梅過後到緗梅。一種春風不並開。造物無心還有意。引教日日放翁來。

立春前一日作壬戌開歲四日立春

開年化日已舒長。漸見風和鳥變吭。冒土萱芽抽嫩綠。拂橋柳色弄輕黃。重溫壽酒屠蘇釀。探借春盤餅餌香。不入城門今幾歲。遙知車馬正匆忙。

立春日

日出風和宿醉醒。山家樂事滿餘齡。年豐臘雪經三白。地暖春郊已遍青。菜細蒺藜花宜薄餅。酒香浮螳瀉長瓶。湖村好景吟難盡。乞與侯家作畫屏。

送子龍赴吉州掾

我老汝遠行。知汝非得已。駕言當送汝。揮涕不能止。人誰樂離別。坐貧至於此。汝行犯胥濤。次第過彭蠡。波橫吞舟魚。林嘯獨腳鬼。野飯何店炊。孤櫂何岸檣。判司比唐時。猶幸免笞箠。庭參亦何辱。負職乃可恥。汝爲吉州吏。但飲吉州水。一錢亦分明。誰能肆譏毀。聚俸嫁阿惜。擇士教元禮。我食可自營。勿用念甘旨。衣穿聽露肘。履破從見指。出門雖被嘲。歸舍卻睡笑。益公名位重。瘦若喬嶽峙。汝以通家故。或許望燕几。得見已足榮。切勿有所啓。又若

楊誠齋。清介世莫比。一聞俗人言。三日歸洗耳。汝但問起居。餘事勿挂齒。希周有世好。敬叔乃鄉里。豈惟能文辭。實亦堅操履。相從勉講學。事業在積累。仁義本何常。蹈之則君子。汝去三年歸。我儻未卽死。江中有鯉魚。頻寄書一紙。

正月五日出遊

久作閑人不慣愁。新春天氣更清柔。未爲遼海千年別。且繼斜川五日遊。細柳拂頭穿野徑。落梅黏袖上漁舟。此身定去神仙近。倚遍江南賣酒樓。

六日雲重有雪意獨酌

遍遊數澤一漁舸。盡歷風霜只緼袍。天爲念貧偏與健。人因見嬾誤稱高。地連海澨濤聲近。雲冒山椒雪意豪。偶得名罇當痛飲。涼州那得真蒲萄。

閑甚戲作

酒盡枵樽腹。書拋委架塵。漸能閑過日。始覺老催人。玉塵王夷甫。金龜賀季真。若論方外事。終媿葛天民。

莫笑

莫笑窮閭叟。人生亦已稀。囊中容後死。險處得先歸。初服還韋布。晨飧笑蕨薇。牀頭周易在。捨此復疇依。

初春雜興

戲續春寒賦。閑廣午醉詩。煎茶小石鼎。酌酒古銅卮。曝日龜浮沼。營巢鵲墮枝。村深無客過。幽興與誰期。

又

水長鷗初泛。山寒茗未芽。深林聞社鼓。落日照漁家。渡遠呼船久。橋傾取路斜。客愁慵遠眺。不是怯風沙。

又

問途來野店。秣蹇憩山郵。何處無詩思。平生慣旅愁。翩翩下鷗鷺。點點散羊牛。傳入王孫畫。千金未易酬。

又

故歲愁聽雨。新春剩得晴。暖催紅蕊鬧。漲入綠池平。遊馬行爭路。華燈賣滿城。江村獨無事。戶戶及時耕。

又

老病倦遊涉。偶尋溪友期。殘冰擁魚筍。新暖入桑枝。山崦巨然畫。煙村摩詰詩。何人爲收拾。媿我不能奇。

春曉

喔喔雞號野。昏昏月挂樓。夢隨殘漏斷。愁伴宿醒留。壯志看清鏡。春寒著弊裘。拂窗新柳色。最憶錦江頭。

書感

投老羈孤久。臨觴感慨頻。關河疎舊友。風雨敗新春。事固少如意。天終能勝人。所悲頭上髮。不與柳條新。

壬戌正月十四日

老子居然健。上元如許晴。湖平波不起。天闊月徐行。散髮漁舟穩。臨風野笛清。安能擁笳鼓。萬里將幽并。

十五日

誰推國境上天東。桂影婆娑滿鏡中。天宇更無雲一點。譙門初報鼓三通。兒童草草杯盤喜。鄰曲紛紛笑語同。逐祿豈能無聚散。明年誰復伴衰翁。

高枕

高枕閑看古篆香。世間萬事本茫茫。偶亡塞馬寧非福。太察淵魚恐不祥。每與諸兒論今古。常將百世業耕桑。危機正在黃金印。笑殺初心繆激昂。

送施武子通判

初入修門鬢未秋。安期千里接英遊。退歸久散前三衆。邁往欣逢第一流。只道升沉方異趣。豈知氣類肯相求。龍鍾不得臨江別。目斷西陵煙雨舟。

老學菴自規

堯德被四表。其本在身修。江河水稽天。發源乃涓流。人忍於搏蝨。習熟且解牛。象箸與玉杯。漆器實其由。斯須失兢畏。惡名溢九州。始乎爲善士。終可蹈軻丘。孰置汝太山。孰擠汝污溝。降福孰汝私。得禍孰汝讎。聖狂在一念。禍福皆自求。易簣汝所知。垂死勿惰偷。

兩夜

斷岸輕煙著柳條。孤村小雨夜蕭蕭。荒雞隔浦聲相續。短燭無風焰自搖。朴學元知糜歲月。殘生竟是老漁樵。最憐鬢畔千莖雪。日日春風吹不消。

子聿以剛日讀易柔日讀春秋常至夜分每聽之輒欣然忘百憂作長句示之

朱顏已去鬢絲稠。知復人間幾歲留。正可牀頭著周易。安能車上說春秋。齋鹽日跌從兒好。弦誦更闌解我憂。時發一言常中理。絕勝問事不能休。

記夢

信命從來不問天。經旬無酒亦陶然。夢爲估客揚州去。水調聲中月滿船。

夜賦

八十衰翁久挂冠。今年無酒敵春寒。亂雲入戶兩方急。斷雁叫羣燈未殘。蠹簡幸存隨意讀。蝸廬雖小著身寬。支離自笑心猶壯。憂國憂家慮萬端。

杜叔高秀才雨雪中相過留一宿而別口誦此詩送之

久客方知行路難。關山無際水漫漫。風吹欲倒孤城遠。雪落如篔野寺寒。暮挈衣囊投土室。晨沽村酒挂驢鞍。文章一字無人識。胸次徒勞萬卷蟠。

曉賦

雞晨非一鳴。鴉旦每三鳴。萬物各有役。吾生何所營。書編猶未掩。窗紙已微明。穉子勇過我。琅琅誦易聲。

雪後龜堂獨坐

丈夫自重如拱璧。安用人看一錢直。簞食豆羹不虛受。富貴那可得人得。讀書萬卷行媿心。幽有鬼神爲君惜。龜堂樂處誰得知。紅日滿窗聽雪滴。

又

兩手龜坼愁出袖。閉戶垂帷坐清晝。朝陽破雲雪漸消。點滴無窮聽簷溜。士生百行誰相補。第一要能安飯糗。詩

書幸可教兒童。勿使後人憐晚謬。

又

牙齒欲落何足惜。爛鬢藜羹自堪食。屋穿不害氣吐虹。客至從驚瘦如脂。天公鑄汝亦已至。春風裂面雪三尺。獨醪傾罷仰屋歌。尙友孫侔與徐積。

又

閉門屋漏不可居。出門雪泥深尺餘。興闌已回剡溪棹。路滑罷借東家驢。竹窗兀兀無與語。澆愁賴有酒一壺。眼花耳熱睡至夜。吹火起讀殘編書。

二月一日作

浪藉梅花委道傍。山櫻已復占年光。簷消積雪時間滴。衣覆殘爐臘得香。老馬已衰寧識路。寒蟲未死且搗牀。柴荆終日無來客。賴有陶詩伴日長。

過東鄰歸小憩

籃輿過鄰曲。綠野喜新晴。暖日生花氣。豐年入碓聲。築陂鄉竭作。買犢戶深耕。歸舍還尋睡。殘書傍枕橫。

寄呂子和南廂

聖代多名德。君家不乏公。還看短袍綠。來躡軟塵紅。小忍便無事。力行方有功。官閑能念我。時寄尺書東。

自述

藜藿安貧陋。柴荆俯莽蒼。露著朝筮易。掃地晝焚香。笑睡天教嬾。長歌客怨狂。歡然送餘日。醉死亦何傷。

呂氏子夔耶求詩

乃祖身兼將相崇。諸孫玉立有家風。此郎已復塵埃外。它日相期氣類中。行己勤勤須自省。讀書臺臺要新功。果能哮吼如獅子。一瓣香應嗣放翁。

新晴

兼旬不雨亦常陰。一日新晴抵萬金。浦面波紋春縠細。橋頭柳色麴塵深。關山滿眼愁千斛。歲月催人雪一簪。猶

有強寬懷抱處。午窗睡起聽鳴禽。

晚步湖堤歸偶作

酒盡知難折簡呼。出門仍苦要人扶。殘梅委地香誰惜。歸雁穿雲遠欲無。日落牛羊猶被野。農閑畚鍤正開湖。還家寂寞西窗晚。旋燎枯枝擁地爐。

春來食不足戲作

飢臥誰能羨屬饜。高懷飽食豈容兼。分司祿在終難取。卿監致仕當得分司祿。須自請乃給。遂置之。東帛恩深獨不露。頃有赦令。賜致仕者粟帛半酒。郡獨格不行。衰謝形容無藥駐。奔馳日月欠膠黏。兒童拍手看翁醉。山杏溪桃簇帽簷。

散步湖隄上時方濬湖水面稍渺瀰矣

老覺人間萬事輕。不妨閑處得閑行。西山鳥沒暮雲合。南浦隄平春水生。孤操不渝無鶴怨。淡交耐久有鷗盟。先民幸處吾能勝。生長兵間老太平。邵堯夫自謂生於太平。老於太平。爲太平之幸民。彼豈知幸哉。若予生於亂離。乃老於太平。真可謂幸矣。

老學菴

老學衡茅底。秋毫敢自欺。開編常默識。閉戶有餘師。大節艱危見。真心夢寐知。唐虞元在眼。生世未爲遲。

春曉

強尋殘夢苦難成。推枕搯藤繞舍行。新漲生波漁艇活。晨曦送暖客衣輕。煙迷芳草蒼茫色。鶻占高枝矍喞聲。老病自憐猶嗜學。誦書家塾羨諸生。新館一客。諸孫晨興入學。誦書頗感。

龜堂雨後作

渾國春多雨。龜堂病少惊。雖名舊朝士。其實老耕農。一點葦間火。數聲煙外鐘。詩材故不乏。處處起衰慵。

書感

我欲哭窮途。所懼世俗驚。出門復入門。掩淚且吞聲。唐虞絕難繼。周孔不復生。承學百世下。我輩實豈輕。楊墨斥

已殫釋老猶縱橫。拔本塞其源。力盡志未平。吾道如皦日。薄食終必明。一木雖獨立。可支大廈傾。夷風方變夏。孰能作長城。卓哉易簣公。垂死猶力行。

後書感

貧賤終身志不移。閉關涵泳賴書詩。唐虞未遠如親見。周孔猶存豈我欺。力學正須忘寢食。少年誤計事文辭。爾來朋友皆雲散。考質從誰盡所疑。

村居書喜

紅橋梅市曉山橫。白塔樊江春水生。花氣襲人知驟暖。鵲聲穿樹喜新晴。坊場酒賤貧猶醉。原野泥深老亦耕。最喜先期官賦足。經年無吏叩柴荆。

中春偶書

鄰曲祈蠶候。陂塘浸種時。春寒薪炭覺。雨霰鼓鐘知。驢瘦衝泥怯。魚驚食釣遲。衰翁一味嬾。耕養媿吾兒。

夜泊

小聚近江干。中春尙爾寒。釣船隨鷺宿。煙月伴鐘殘。冉冉歲時速。茫茫天地寬。推篷一搔首。無處著悲歡。

東岡櫻桃已過殊不知

病著寒侵怕出門。蕭蕭煙雨暗江村。一樽闕與梅花別。過盡櫻桃不足言。

別嚴和之

器之魂逝已難招。尙有和之慰寂寥。今夜月明空歎息。想君孤棹泊溪橋。

又

千里風煙行路難。旅舟應過子陵灘。人間富貴知何物。莫負君家舊釣竿。

齋中雜題

湖水日益長。柳色日益深。好鳥西山來。飛鳴過前林。年華挽不留。陳迹曠難尋。花開少共賞。酒熟惟孤斟。王謝今編氓。曲水空山陰。一樽欲弔古。已矣予何心。

又

屯雲失南山。三日吹細雨。歲月不貸人。鼙聲遽如許。一年復一年。老至不可禦。下瘳病在脾。餘息僅如縷。枯皮裹瘦骨。半屬松下土。屋壞要當顛。安能強撐拄。

又

書生每苦飢。得飯已可賀。黃齋三百瓮。自是天所破。有時尙不繼。得米無暇簸。昨者雪塞門。煙絕但僵臥。雖云迫溝壑。老學不敢惰。夜分喚鄰翁。我歌爾當和。

又

西窗日過中。飢坐生眼花。援筆課小詩。墨燥字傾斜。須臾忽滿紙。翩翩若風鴉。雖無古人法。簡拙自一家。乃知雨漏壁。未媿錐畫沙。俄報豆飯熟。投筆喜莫涯。呼童拾澗薪。試我家山茶。

春晚

萍葉青浮水。蛙聲鬧徹明。川雲時聚散。天氣半陰晴。杏子爭梅結。鳩巢後鵲成。吾儕亦有役。過社更深耕。

社日小飲

人生當惜老年時。醉插山花壓帽欹。世事恰如風過耳。微譚自好不須治。

山茶

雪裏開花到春晚。世間耐久孰如君。憑闌歎息無人會。三十年前宴海雲。成都海雲寺山茶開。故事冥集甚盛。

春夜

寂寂春將暮。迢迢夜未央。膏殘燈焰短。杵急藥塵香。困思棲雙睫。羸軀寄一牀。養慵新有味。初志悔軒昂。

春遊

右軍不復見清真。賞會猶須我輩人。幽夢斷時雞唱曉。短章成處鳥呼春。出山茶筍村墟鬧。上市蓴鱸匕筯新。速覓一壺隨處醉。風吹紅紫半成塵。

北窗睡起

杏梢紅溼畫初長。睡過窗間半篆香。久厭客遊歸自好。本無才術老何傷。依蒲不去羣魚樂。點草還驚小蝶忙。堪笑放翁無一事。強將詩句占年光。

北窗懷友

中年妄意慕軻雄。白首終希尺寸功。落落要居流俗外。兢兢恐墮異端中。仰天俯地猶多愧。飯豆羹藜已過豐。幸有北窗堪講學。故交零落於誰同。

舟中作

娥江西路石帆東。身寄鷗波浩蕩中。疊疊沙痕留浦岸。踈踈日影透漁篷。詩人無復同盟在。酒債何時一洗空。已迫老年宜易感。人生五十卽稱翁。

又

晤語無人與遣愁。出門聊復弄輕舟。山穿煙雨參差出。水赴陂塘散漫流。隔葉雄雌鳴谷鳥。傍林子母過吳牛。數家清絕如圖畫。炊黍何妨得小留。

湖村春興

桑柘相望雨露新。桃源自隱不緣秦。稻陂正滿初投種。蠶子方生未忌人。酒借鵝兒成淺色。魚憑雲母作脩鱗。賽神歸晚比鄰醉。一笑猶關老子身。

鄰餉

結隊同秋穫。連牆聽夜春。薄持聊共飽。熱啜却煩供。炊玉吳粳美。浮蛆社酒醲。時平多樂事。莫厭數從容。

久雨

風雨連旬日。屢空猶晏如。敢言苔及榻。僅免釜生魚。薺糝朝供鉢。松肪夜照書。百年如此過。作計未全疎。

登山

困厄身垂老。登臨意未平。暮煙迷草色。宿雨壯溪聲。往古飛鴻沒。浮名脫髮輕。平生五字律。自笑尙關情。

讀易

大易中含造化機。王何元未造精微。乾坤要自吾身看。臥聽雞鳴起索衣。

村居書事

四十餘年食太倉。賜骸恩許返耕桑。長絲出繡尊羹美。白雪翻匙稻飯香。酒戶知貧焚舊券。醫翁憐病獻新方。春殘睡足東窗下。聞道長安依舊忙。

又

藥物枝梧病漸蘇。門前野老笑相呼。春深水暖多魚婢。雨足年豐少麥奴。小飲杯盤隨事具。閑行巷陌倩人扶。題詩非復羌村句。誰與丹青作畫圖。李伯時有羌月圖傳於世。

春晚書村落間事

千古會稽城。閭閻樂太平。豐年觀米價。霽色聽禽聲。俗儉憎浮侈。民淳力釣耕。幽詩有七月。字字要躬行。

雜興

秦漢區區了目前。周家風化遂無傳。君看八百年基業。盡在東山七月篇。

又

羲和分職授人時。斷自唐虞意可知。獸舞鳳來餘事耳。西成東作要熙熙。

又

老無添處仍逢病。春欲殘時未減寒。架上漢書渾忘盡。牀頭周易卻常看。

又

一身逋負愁賒酒。滿眼關山悔上樓。子細推來惟合睡。五更風雨已如秋。

又

面顏日瘦口眼大。氣血頓衰鬚髮擗。不用凌煙寫冠劍。一蓑煙雨事春耕。

又

故交零落形弔影。陳迹淒涼口語心。辛苦一生成底事。新招空解誦惜情。

南堂獨坐

晨坐南堂雙眼明。南山山色滿柴荆。片雲忽過失簾影。急雨初來聞竹聲。鸚鵡螺深生酒興。蟾蜍滴古助詩情。野人頻約天台去。幾納青鞋了此行。

春雨示鄰曲

春來天氣苦蕭森。如縷雲升便作霖。寒溜何曾住一滴。綠陰忽已遍千林。蓴絲箭茁垂垂老。蓼浦菱塘灩灩深。聞道南山花尚在。約君攜酒試同尋。

讀書

堯庭君相都俞盛。闕里師生博約深。我讀殘編食忘味。朱絃三歎有遺音。

新晴賞牡丹

杜門睡榻長蒼苔。滿眼新晴亦樂哉。小市忽逢蓴菜出。曲欄初見牡丹開。不嫌雨後泥三尺。且趁春殘醉幾回。自揣明年猶健在。東箱更覓茜金栽。茜金。近出牡丹名。

對酒

神仙豈易學。富貴不容求。百歲儻未盡。一樽差可謀。鐘鳴上方晚。桂發小山秋。處處多幽趣。攢眉勿浪愁。

病起遇晴有作

十日春雨灑。百疾投間作。呻吟雖甚苦。飲啗尙自若。筋骸則已疲。正氣亦消鑠。行年垂八十。所恃豈在藥。魔軍累百萬。指顧可盡縛。君看仁義師。何至用韜略。川雲忽破散。平地見日腳。無人畫此翁。縹緲立孤鶴。

定命

定命元知不可移。更兼狂疾固難治。履穿衣弊窮居日。齒豁頭童大耋時。耕釣詩多悲境熟。功名夢少感年衰。今朝雨歇春泥散。剩伴兒童鬪草嬉。

假山小池

鑿池容斛水。壘石效遙岑。鳥喜如相命。魚驚忽自沉。風來生細籟。雲度作微陰。便恐桃源近。無人與共尋。

又

蓮嶽三峯峙。桃源一路分。池偷鏡湖月。石帶沃洲雲。魚隊深猶見。禽聲靜更聞。巖幽林管密。疑可下湘君。

春欲盡天氣始佳作詩自娛

浮雲飛盡見青天。拄杖閑拈瘦倚肩。漸喜綠秧分穰稷。又看畫柱坼鞦韆。雞豚雜遝祈蠶社。鼓笛喧譁競渡船。惟有此翁無一事。閉門贏得日高眠。

自詠

生草覆蝸廬。長鬚駕鹿車。貧猶思施藥。老不廢觀書。登覽攜童稚。歌呼和里閭。躬耕亦何得。聊以遂吾初。

西村勞農

川雲散盡十分晴。繚出溪頭信意行。片片飛花隨步遠。離離芳草上牆生。村深日暖單衣爽。路轉沙平兩屨輕。腦肉芬香坊酒釀。因來聊得餉春耕。

題廬陵蕭彥毓秀才詩卷後

詩句雄豪易取名。爾來閑澹獨蕭卿。蘇州死後風流絕。幾許工夫學得成。

又

法不孤生自古同。癡人乃欲鏤虛空。君詩妙處吾能識。正在山程水驛中。

舍北溪上垂釣

大耋還家萬事非。垂竿好在綠苔磯。風和山雉挾雌過。村晚吳牛將犢歸。春漲新添塘滌滌。夕雲仍帶雨霏霏。此生自笑狂顛足。依舊人間一布衣。

三月二十二日作

雨過草爭出。溪湍魚逆行。輕舟摘蓴菜。小市聽鸞聲。萬事已無夢。一樽猶有情。吾兒能講學。不必說無生。

書感

頭顱已可知。牙齒今復落。十步或再休。啜粥不及勺。身依一蒲團。壁挂兩芒屨。對客輒坐睡。有問莫能酢。念昔少壯時。心慕宦遊樂。初登平津館。晚入征西幙。雨暗駱谷烽。霜清散關柝。登高望中原。氣已吞雍雒。寧知事大謬。憔悴理征橐。單車去梁益。健席下沔鄂。還朝見故人。大馬黃金絡。後來固多士。鷓鴣照臺閣。婆娑郎吏間。祇自取嘲噓。歷思從來事。無鐵可打錯。幸得還故園。快若解束縛。閩里通有無。情厚不爲薄。泥行事春耕。日曝畢秋穫。隔牆喚鄰翁。濁酒聊共酌。

寒食

小市禁煙餘。東郊展墓初。桐陰覆碧井。泉脈入清渠。貧悴停遊舫。龍鍾廢荷鋤。西窗斜日在。且復勘殘書。鄉人貧甚者。每自謂不能下糊。則其貧可知。

西村暮歸

天氣清和修禊後。上風淳古結繩前。村村陂足分秋水。戶戶門通入郭船。亭障盜消常息鼓。坊場酒賤不論錢。行人爭看山翁醉。頭枕槐根臥道邊。

舍外彌望皆青秧白水喜而有賦

此地天教著放翁。舍傍煙樹晚空濛。一無可恨得歸老。寸有所長能忍窮。東作已趨堯舊俗。南薰方詠舜遺風。謝安勲業能多少。枉是忽忽起剡中。

寄題太和陳誠之秀才遠明樓

宦遊再有江西役。南望廬陵每慨然。未見高樓出雲雨。但驚妙語雜風煙。諸公何止元和盛。獨我初非正始賢。筆力深知太遼絕。此詩它日勿同編。樓有榜。廷秀大蓬所作記。及周丞相以下諸公題詠。

蝸舍

蝸舍茨生草。龜腸飽淖糜。麥因多雨損。蠶遇閏年遲。徒義憂無勇。求仁戒自欺。此生雖欲盡。吾志未應衰。

東岡

東岡竹千竿。大者圍過尺。微風生其間。蕭蕭戛寒碧。我閑適一到。散髮坐磐石。萬事不累心。清獻遂至夕。此君本傲世。獨我有夙昔。老情恐作疎。時來寓琴奕。

首夏

亂山深處著柴荆。岸幘披衣露氣清。宴坐有書聊作伴。出遊無客獨題名。陰陰密樹花初盡。灩灩方池水已平。幾許人間堪笑事。今朝百舌頓無聲。

贈曾溫伯邢德允

髮似秋蕪不受耘。茶山曾許與斯文。回思歲月一甲子。游獲從文清公時。距今六十年。尙記門牆三沐熏。卷裏聖賢能覲面。人間富貴實浮雲。二君才氣俱超絕。豈待衰翁誦所聞。

自述

古井無由浪。浮雲一掃空。詩書修孔業。場圃嗣幽風。懼在飢寒外。憂形寤寐中。吾年雖日逝。猶冀有新功。

又

舊業還耕釣。殘年迫耄期。筋骸衰後覺。力量夢中知。客約溪亭飲。僧招竹院基。未爲全省事。終勝宦遊時。

又

屏迹歸休後。頤生寂寞中。忍貧辭半俸。學古得全功。西埭村醅釀。東陂小釣通。經行有佳趣。稚子也能同。

示客

一點昏燈兩部蛙。客來相對半甌茶。典衣未贖身饒蝨。治米無工飯有沙。每爲采菱浮野艇。時因賣藥宿山家。青鞋到處堪乘興。不獨雲門與若耶。

對食戲作

香粳炊熟泰州紅。苜甲蓴絲放箸空。不爲休官須惜費。從來簡儉作家風。

又

米如玉粒喜新春。菜出煙畦旋摘供。但使胸中無媿怍。一餐美敵紫駟峯。

對酒戲作

杖頭高挂百青銅。小立旗亭滿袖風。莫笑村醪薄無力。衰顏也得暫時紅。

又

亂插醪醑壓帽偏。鶻黃酒色映鰾船。醺然一枕虛堂睡。頓覺情懷似少年。

夏初湖村雜題

市遠村深客到稀。草堂終日掩柴扉。釀成新蜜蜂兒靜。分盡殘泥燕子歸。

又

嫩日輕風夏未深。曲廊倚杖得閑吟。地偏草茂無人迹。一對芟雞下綠陰。

又

寒泉自換菖蒲水。活火閒煎橄欖茶。自是閑人足閑趣。本無心學野僧家。

又

日落溪南生暮煙。幅巾蕭散立橋邊。聽殘賽廟鼗鼓。數盡歸村隻隻船。

又

胎髮茸茸漆不如。夏初安健勝春初。雙瞳嬾看公卿面。卻解燈前讀細書。

又

從來抵死愛湖山。敢料天教半世閑。杜曲桑麻雖苦薄。灞橋風雪如相關。

又

幽禽兩兩已成巢。新竹森森漸放梢。稻壠作陂先蓄水。野堂防漏卻添茅。

又

門巷蕭條長綠苔。經旬清坐罷傳杯。麪生風味那忘得。少待吾家芍藥開。吾鄉有陸家芍藥。其品甚高。

溪上露坐

水際風生爽拂裾。比鄰自築不勞呼。昏鴉杳杳飛初定。遠樹離離望欲無。新竹出林時解籜。小荷翻露已成珠。橋東一徑蒼苔滑。歸舍還須稚子扶。

北齋書志示兒輩

初夏佳風日。頽然坐北齋。百年從落魄。萬事忌安排。徐仲車聞安定先生莫安排之說。所學益進。鄉俗能尊老。君思許賜骸。飢寒雖未免。何足擊吾懷。

作盆池養科斗數十戲作

小小盆池不畜魚。題詩聊記破苔初。未聽兩部鼓吹樂。且看一編科斗書。

枕上

風竹無時靜。月窗終夜明。時時聽鶯鶯。一一數殘更。吳楚民猶困。燕齊虜未平。功名天所命。吾志固難成。

晨起

終夜厭姑惡。經春無秭歸。今歲不聞杜宇。溪雲生慘慘。林日澹暉暉。物外孤懷勝。人間百慮非。鄰翁剗中去。爲我買漁衣。

喜晴

葛衣初著喜新晴。寂寂虛堂一榻橫。乍坼孤花藏葉罅。晚歸雙燕拂簾旌。舞空不斷游絲直。掠地還飛落絮輕。剩欲倚闌尋好句。清笳已復動高城。

讀夏書

巨浸稽天日沸騰。九州人死若丘陵。一朝財得居平土。峻宇雕牆已遠興。

幽栖

何處是幽栖。城南路少西。楊花穿戶入。燕子避簾低。碁局聊相對。茶爐亦自攜。溪頭雲易合。晚雨又成泥。

閑詠園中草木

剪刀葉畔戲魚回。披子花頭舞蝶來。領略年光屬閑客。一樽自勸不須推。

又
麝香萱草移東郭。錦子葵花買上原。兒喚乃翁閑一看。欣然曳杖出籬門。

又
一樹山櫻鳥啄殘。懸鈎半舍亦甘酸。兒童采得爭來餉。應念衰翁舌本乾。

又
綠侵小徑葦衣草。青絡疎籬鬼帶藤。未暇開編尋本草。且將名品問山僧。

又
日高未辦續晨炊。一椀村醅且療飢。槃箸索然君勿笑。桑間紫椹正纍纍。

又
仲夏園中百草靈。風吹露坼各青青。勸君辦取金鴉嘴。不問昌陽與豨苓。

夜雨
初夏雨淋浪。簷聲繞四廊。感深頭易白。睡少漏偏長。紅捲簾旌溼。潤生衣焙香。清吟欲排悶。三歎不成章。

晨起
海燕翻將乳。戎葵粲已繁。魚船初入市。尊擔未過門。年耄停朝課。家貧省小飧。近以病後晨廢讀書。又以廩粟不

繼。遂罷食粥。所欣行樂處。秧稻遍村村。

放翁
拜賜頭銜號放翁。家傳不墜散人風。問年已過從心後。遇境但行無事中。馬老豈堪空冀北。鶴飛猶得返遼東。道傍跌宕煩君看。閱盡時人臉尚紅。

過鄰家
老病在臂踝。終日不喜動。溪雲忽過前。袖手以目送。今晨光景佳。霽色入鳥哢。駕言出柴荆。暫作湖山夢。東村望

鶴巢。西阜過籬峒。父老意欣然。爲我撥春瓮。豈惟澆舌燥。亦用輒脚痛。形骸去繩檢。談笑得少縱。吳蠶初上簇。陂

稻亦已種。端五數日間。更約同解糶。

東園

晨起東園去。消磨夏日長。隨鋤泉眼出。上爪藥苗香。琴挂山齋壁。龜搯道室牀。始知彭澤令。真足傲羲皇。

曉出至湖桑埭

殘年孤寂不堪言。時喚平頭駕短轆。老氣猶能作羸臥。壯懷誰復記鴻軒。權歌縹渺城西路。煙樹參差埭北村。堪笑怪奇消未盡。夜來還夢屬麤鞦。

兩夜觀史

讀書兩夜一燈昏。歎息何由起九原。邪正古來觀大節。是非死後有公言。未能劇論希捫蝨。且復長歌學叩轆。它日安知無志士。經過指點放翁門。

雨後作

今日雲歸恰喜晴。小池忽見水紋生。窗昏又輟讎書課。臥聽蕭蕭打葉聲。

園中

稚竹侵簷綠。新桐覆井涼。閑身少羈束。隨處得徜徉。山鵲惺惚語。藤花掩冉香。吾詩有餘思。小復立西廂。

湖上遇道翁乃峽中舊所識也

大罵長歌儘放顛。時時一語卻超然。掃空百局無碁敵。倒盡千鍾是酒仙。巴峽相逢如昨日。山陰重見亦前緣。細思合辱先生友。五十年來不負天。

老學菴北作假山既成卽雨彌月不止

古者封禪歲。乾封輒枯旱。不言絕民食。徒欲曬日觀。我今作小山。纔及仞有半。下瀝數斗水。草木稍葱蒨。蕞爾何足言。造物亦幽贊。冥冥一月雨。陰翳迷昏旦。芳草爭抽萌。珍木亦擢榦。龜魚出復沒。鳥雀聚仍散。彼天初何私。遺我耳目玩。遂令閭巷間。日厭鶉鴝喚。淖深樵蘇絕。有米不能爨。爲小乃害大。未可以理斷。憂懼塞胸中。當食屢興歎。培塿固易平。荷鍤媿吾懦。

苦雨

儘道迎梅雨。能無一日晴。窗昏愁細字。簷滴亂疎更。未怪蛙爭席。真憂水冒城。何由收積潦。簫鼓賽西成。

又

煙水茫無際。空階滴不休。一窗閑隱几。四月澹如秋。箔冷蠶遲績。泥深麥未收。家貧村酒薄。曷解老農憂。

五月初作

鄰舍春新麥。家人拾晚蠶。推移逢夏五。賦與歎朝三。遣日須棋局。忘憂賴酒甌。幽居有高致。多取未爲貪。

遊西村贈隱者

水清沙淨見遊魚。槐柳陰陰五月初。人似登仙惟火食。俗如太古欠巢居。熟聞高臥常扃戶。剩欲頻來共荷鋤。從此夢遊端有地。淵明不獨愛吾廬。

徜徉

家世由來出楚狂。湖山垂老得徜徉。讀書坐嬾常中廢。得句因衰已旋忘。萬化隨緣寓蟲臂。百年何處異羊腸。忍飢到死知無恨。免使人嘲作飯囊。

碌碌

碌碌初何取。悠悠信所之。安貧無鬼笑。守道有天知。暑服黃縑製。晨飧赤米炊。今朝潦水退。村路得遨嬉。

讀陳蕃傳

莫笑書生一卷書。唐虞事業正關渠。漢廷若有真王佐。天下何須費掃除。

夏日晨起

華胥歸路萬山青。拈得烏藤繞舍行。兩背尙餘殘睡笑。一襟初受曉涼生。陰陰院落新桐影。寂寂房櫳乳燕聲。已罷小殮停卯酒。龜腸蟬腹不勝清。

醉舞

短帽簷花舞道傍。年垂八十尙清狂。茸茸胎髮朝盈櫛。炯炯神光夕照梁。令尹闕人三仕已。太山在我一豪芒。藥

苗麥飯初何欠。全取愚儒百鍊剛。

北窗微陰

露滴林梢花送香。風吹池面雨輪涼。蠹書一卷作老伴。麥飯半盂支日長。學道莫如心自肯。杜門真與世相忘。君恩不報雖知媿。稊米安能益太倉。

夏夜

乞骸安晚節。養疾臥空村。月暗鼻鳴樹。船歸犬吠門。藜羹加糝美。黍酒帶醅渾。稚子能勤學。燈前與細論。

村居

鶉鴉穿林語。鴨鵝並水鳴。餽漿憐道暍。裹飯助鄰耕。零落橋危斷。欹斜屋半傾。君毋笑偷惰。猶足盡吾生。

晚興

羸病時時劇。歡悰日日疎。睡憑書紹介。愁賴酒驅除。小蹇追涼處。輕衫出浴初。無人堪晤語。且復狎樵漁。

溪上

散髮倚胡牀。風生水面涼。單衣縫白紵。雙屨織青芒。道家有青芒屨。荷葉猶微赤。藤花已半黃。歸來村路晚。漁火耿蒼茫。

貧甚戲作長句示鄰曲

百屋堆錢四壁空。人生志願孰能同。蕭條齒髮難藏老。冷落杯盤可諱窮。斷筍不思鄣夏日。典衣那計禦霜風。知心幸有鄰翁在。一笑相從草莽中。

縱筆

冉冉殘年迫耄期。肱雖三折未成醫。北山愚公世方笑。東郭順子吾所師。萬里元非破賊手。一生無奈造物兒。梅雨初晴湖水滿。未妨把酒細哦詩。

入都

葵莧登盤酒可賒。豈知扶病又離家。朝行打岸濤頭惡。夜宿垂天斗柄斜。不怕山林淹歲月。但悲道路困風沙。鄰

翁好爲看耕隴行矣東歸一笑譁。

開局

八十年光敢自期。鏡中久已髮成絲。誰令歸躅京塵路。又見新開史局時。予二作史官。皆初開局。舊吏僅存多不識。殘編重對只成悲。免朝愈覺君恩厚。閑看中庭木影移。

感舊

四十三年夢。今朝又喚回。平橋穿小市。細雨壓輕埃。老喜詩情在。慵愁史課催。時時還自笑。白首接鄒枚。

贈陸伯政

夜窗燈火老徒勤。自憫何時可策勳。未喪斯文天壽我。豈無餘子我思君。約通殘譜言猶在。細讀新詩筆欲焚。早晚皇恩許歸去。相呼同臥石帆雲。

兩夜

暮雨濯殘熱。史官非坐曹。忍慙靡粟帛。偷暇近詩騷。屋老孤燈闇。風顛萬木號。明朝有奇事。江閣看秋濤。

自局中歸馬上口占

幼輿只合著山巖。誤被恩光不蓋慙。人怪衰翁煩尺一。心知造物賦朝三。飛騰豈少摩雲鶴。蹙縮方同作繭蠶。安得公朝閱枯朽。早教歸臥舊茆菴。

秋雨

久占煙波弄釣舟。業風吹作鳳城遊。不知苑外芙蓉老。但見牆陰苜蓿秋。黃把裏書俄復至。朱顏辭鏡不容留。晚窗又聽蕭蕭雨。一點昏燈相對愁。

秋夜

庭院蕭條夜氣清。臥聽宮漏下宮城。旅懷生怕還鄉夢。留取殘燈伴雨聲。

求月桂

重重汗簡擁衰翁。百里家山夢不通。病眼可令常寂寞。煩君爲致數枝紅。

秋思

烏帽翩翩九陌塵。杖藜誰記岸綸巾。遺簪見取終安用。弊帚雖微亦自珍。廊廟似聞憐老病。雲山漸欲屬閑身。牆隅首藉秋風晚。獨倚門扉感慨頻。

又

霜露初侵季子裘。山川空賦仲宣樓。夢回最怯聞衣杵。病起常憂負酒籌。日月往來雙轉轂。乾坤成壞一浮漚。書生事業無多許。二寸毛錐老未休。

史院書懷

後死與斯文。猶能讀典墳。雖慙千載事。要是一生勤。石磴霏霏雪。銅爐裊裊雲。扶衰又秋晚。何以報吾君。

楚辭所謂桂數見於唐人詩句及圖畫間今不復見矣作二絕句屬山僧野人試求之

小山桂枝今所無。一生到處問樵夫。細思不獨人間少。月裏何曾有兩株。

又

丹葩綠葉鬱團團。消得姮娥種廣寒。行盡天涯年八十。至今未遇一枝看。

雨夜

細雨催扃戶。昏燈照擁衾。倦知秋漏永。瘦怯曉寒深。林鶻依簷宿。莎蟲入戶吟。此時搔短髮。誰會欲歸心。

九月初作

菊佩鮮粲節物催。老懷撫事一悠哉。年光半付殘編去。詩句時從倦枕來。零落朋儔今孰在。寂寥事業世方咍。兩叢月桂門前買。自下中庭破綠苔。

又

九月都門凜欲霜。羸軀恩免立鵷行。細書付吏贍初囊。和藥呼兒對古方。陋巷閉門常謝客。高齋掃地獨焚香。此生自計終何取。似有山林一日長。寶錄有初稿二稿。

又

碧海仙蓬感舊遊。暮年心事轉悠悠。登高此去無多日。扶病重來又過秋。十里樓臺迷巷陌。萬家砧杵戒衣裘。平生剩欠觀書債。四庫留人未許休。

又

富貴功名未足云。平生一飯不忘君。哦詩高韻淒金石。把釣幽情渺水雲。落葉打窗秋已暮。歸鴉泊樹日將曛。欲知老病常多感。革帶今年減幾分。

暮秋

十日都門雨。風煙已暮秋。甌香新菽粟。篝煖故衣裘。意氣臨書健。形骸顧影愁。何時剡中路。秣蹇憩山郵。

重九不出遣懷

人生各自適飛潛。魚腹熊蹯豈得兼。並舍晚風傳藥杵。小窗殘日射書籤。昏瞳但怪花爭墜。衰鬢應無白可添。采菊泛觴終覺嬾。不妨閑臥下疎簾。

暇日

身健官閑荷主恩。蕭然不異在家園。一池新墨生吟思。半篆殘香入夢魂。舊友無書知獨冷。小兒有命會孤鶩。藜羹蠹足餘何事。鍾動三茅又斂昏。

憶三山

柳橋南北弄煙霏。門不常關客自稀。遣僕遠馱黃檗出。呼兒閑取白鷗歸。片雲忽起迷丹竈。潦水初生沒釣磯。一出可憐時屢變。又看刀尺製秋衣。

示子聿

故山誰伴隱茅茨。幸有吾家大耳兒。兩暗小窗分夜課。雪迷長鏡共朝飢。名場未捷寧妨學。史限雖嚴不廢詩。我死汝應傳鉢袋。勉持愚直報明時。

車中作

秋天近霜霰。吳地少風塵。時駕小車出。始知閑客真。新交孰傾蓋。往事漫霑巾。處處皆堪隱。桃源莫問津。

初寒偶出

霜氣凋關樹。晴光入市樓。閑人無造請。佳日亦遨遊。湖白方新出。淮蟻亦易求。秋來幸無病。作意試新裘。

史院晚出

已乞殘骸老故丘。誤恩重作道山遊。龍津兩過橋如拭。鳳闕煙消瓦欲流。直舍小眠鐘報午。歸途微冷葉飛秋。心知伏櫪無千里。縱有王良也合休。

贈洞微山人

我年六十四。獲譴輸鬼薪。束書出東門。揮手謝國人。笑指身上衣。不復染京塵。時有一老翁。祝我當自珍。卻後十五年。迎君浙江濱。我笑語是翁。豈說他生身。事果不可知。邂逅如隔辰。鶴髮無餘鬢。鶉衣仍苦貧。秋風旱河頭。握手一笑新。買酒烹雞豚。往事得具陳。試數同朝舊。零落增悲辛。與翁雖俱老。肝膽猶輪囷。千里亦命駕。何況託近鄰。秋高佳風月。相過莫厭頻。

九月十四日夜雞初鳴夢一故人相語曰我爲蓮華博士蓋鏡湖新置官也我且去矣君能暫爲之乎月得酒千壺亦不惡也既覺惘然作絕句記之

白首歸修汗簡書。每因囊粟戲侏儒。不知月給千壺酒。得似蓮華博士無。

初寒對酒

晨起常教置一壺。色如鵝氈滑如酥。侍郎取榼不須笑。司業與錢還復酤。霜路預愁騎款段。雪舟每憶釣菰蒲。寒花滿帽君無笑。醉倒偏宜稚子扶。

午晴試筆

葉脫園林夜夜霜。風和巷陌日猶長。軒車但怪容孤鶴。稊米安能益太倉。此去得非窮李廣。向來元是老馮唐。明窗攬筆聊揮灑。颯颯驚蛇又數行。

夜吟

似睡不睡客欹枕。欲落未落月挂檐。詩到此時當得句。羈愁病思恰相兼。

又
六十餘年妄學詩。工夫深處獨心知。夜來一笑寒燈下。始是金丹換骨時。

卷五十二

閑詠

身似地行仙。心非欲界天。輿竿聲軋軋。巾角影翩翩。買菊穿苔種。懷茶就井煎。歸來書邊坐。隨處一欣然。

又

久入春農社。新腰老衲包。紙裁微放矮。硯斲正須顛。髻簿能爲祟。方兄任絕交。吾詩無傑句。聊復當談嘲。

遊張園

冷局歸差早。名園得緩行。穿林山驟出。度峽路微平。霜近柳無色。風生蒲有聲。出門還愴怳。滿路夕陽明。

客至

官閑身自得。客至眼殊明。靜算棋生死。閑分酒濁清。悠然劇談罷。偶爾小詩成。但恨桑麻事。無人與共評。

客去

客來拈麈尾。客去拂牀眠。孤夢歸湖上。殘書墮枕邊。幽禽窺戶語。落日傍窗妍。暫爾名朝士。終然是地仙。

無客

今日了無客。偷然麈柄閑。硯涵鴈鵠眼。香斲鷓鴣斑。木落風初勁。雲低雨尙慳。西湖未暇到。臥看曲屏山。

次韻黃宮教見贈景說

士固未易料。世乃有若人。高標與曠懷。豈復容疎親。邂逅京塵中。握手一笑新。我雖讀古書。妙處媿斲輪。敢學狂
接輿。歌鳳笑泣麟。空持鼻端堊。庶幾遇郢斤。獨立臨洪流。欲濟茫無津。君其幸教之。勿棄老病身。

書直舍壁

三黜媿公議。再來仍冷官。志無重奮發。身有轉衰殘。加飯支餘息。添衣禦早寒。歸休應漸近。不是強心寬。

又

道山西下路。杳杳歷重廊。地寂聞傳漏。簾疎有斷香。渠清水馬健。屋老瓦松長。欲出重欹枕。無何見故鄉。

韓太傅生日

珥貂中使傳天語。一片驚塵飛輦路。清霜粲瓦初作寒。天爲明時生帝傅。黃金飾奩雕玉觴。上尊卻食傳恩光。紫駟之峯玄熊掌。不數沙苑千羣羊。通天寶帶連城價。受賜雍容看拜下。神皇外孫風骨殊。凜凜英姿不容畫。問今何人致太平。縣地萬里皆春耕。身際風雲手扶日。異姓真王功第一。

懷故山

老怯京塵化素衣。無端拋擲釣魚磯。碧雲又見日將暮。芳草不知人念歸。萬事莫論羈枕夢。一身方墮亂書圍。岷山學士無消息。空想燈前語入微。張季長祕閣久不得書。

西齋遣興

桐葉秋先蠶。菊花寒更香。酒邊聊兀兀。身外本茫茫。小憩元非睡。長吟偶似狂。忽然思把卷。一笑就窗光。

兩夜作

十月多蚊蚋。昏昏氣未平。正須三日雨。卻用一霜晴。閑館蕭條意。空階點滴聲。鐘殘撫枕歎。歸夢幾時成。

掩戶

蔗漿那解破餘醒。一讀南華眼自明。香縷映窗凝不散。墨丸入硯細無聲。太山蟻垤初何有。佛國魔宮本亦平。此段光明誰障得。曠懷還與老書生。

臥疾

舊疾乘衰作。長貧與嬾宜。羈愁惟付酒。史課未妨詩。雨入殘更滴。霜逢閏歲遲。新春真老及。不用卜歸期。

晚歸

無事經秋別鏡湖。詩囊隨處累奚奴。樓頭寒日低將盡。陌上殘泥踏欲無。軒冕豈容關喜愠。簞瓢亦未費枝梧。畫橋綠浦歸來晚。一盞昏燈得自娛。

寂寂

接客厭紛紛。客去喜寂寂。今朝下簾坐。疎雨時一滴。地爐擁破褐。自笑嬾無敵。新春儻得歸。更面九年壁。

獨坐有懷杜伯高

畫橋通小市。深院欲黃昏。愛月先移燭。留香每閉門。李侯有佳句。樂令善清言。老病貪搢枕。何由共一樽。

李允蹈判院送酒四斗予答書乃誤以爲二斗作小詩識媿

冷官誰顧雀羅門。一紙惟君肯見存。堪笑放翁昏至此。乘壺誤寫作朋樽。

感舊贈超師

一聲清蹕出行宮。百尺黃旗繡戲龍。我赴文場君受戒。道邊曾共望高宗。

雜書

世味漸闌如嚼蠟。惟詩直恐死方休。四時風月元無盡。萬里江山更擬遊。

又

一身頂踵無非病。兩飯齋鹽亦闕供。正可清言學夷甫。不須豪氣似元龍。

又

枳籬莎徑入荆扉。中有村翁百結衣。誰識新年歡喜事。一雞一犬伴東歸。雞犬皆實事。

又

身似匡廬老病僧。閉門一衲坐騰騰。兩聲驚斷長安夢。惆悵西窗夜半燈。

送子虞赴金壇丞

與汝爲父子。忽逾五十年。平生知幾別。此別益酸然。念汝髮亦白。執手河橋邊。西行過臨平。想汝小繫船。悠悠陽羨路。渺渺雲陽川。京江昔所遊。想像在目前。今茲兩使君。幸有宿昔緣。汝雖登門晚。世好亦牽聯。顧於賞罰間。其肯爲汝偏。夙夜佐而長。努力忘食眠。醇如新豐酒。清若鶴林泉。棠宜使可愛。蒲正不須鞭。

今日史課偶少暇戲作五字

仲夏入都門。堂瓦忽已霜。史館方掄才。我亦廁其傍。三日敗一筆。手抵視茫茫。吏來督日程。炙冷不及嘗。今辰偶少靜。掃地欲焚香。市聲塞我門。騶呼過我牆。鄙性不耐喧。愴怳意欲狂。天生兩窮耳。只堪聽啼鴛。

入局

殘年困簡牘。靜坐憶漁樵。鄙意慙輕出。殊恩免早朝。微霜凋綠樹。寒日滿朱橋。悵望滄波友。弓旌豈易招。鏡湖西南有隱士。人不可得而見。

縱筆

胸中略無一點事。眼底常展數行書。半飢半飽便可爾。衣食何須求有餘。

又

小兒讀書耕且養。老夫入朝仕易農。明春史成許歸去。父子相逐歌年豐。

又

晝倦夜常成美睡。病多老卻未全衰。歸從冊府猶披卷。了卻官書更賦詩。

又

坊遠不聞宮漏聲。三茅鐘殘窗欲明。山童睡熟呼不應。添水拂書翁自行。

送襄陽鄭帥唐老

鄭侯骨相非復常。伏犀貫額面正方。聲名赫奕動天子。家世富貴連椒房。武能防秋北平道。文合落筆中書堂。畿西謀帥國大事。當守久弄黃金章。一朝丹詔自天下。兩班仰首看騰驤。鄭侯此行端可羨。繡旗皂纛戈如霜。三更傳令出玉帳。平旦按陣來毬場。宿兵萬竈盡貔虎。牧馬千羣皆驪驪。酒酣賦詩幕府和。縱橫健筆誰能當。雖然鄭侯志意遠。虎視直欲吞北荒。榆林雁門塞垣紫。孟津砥柱河流黃。出師有路吾能說。直自襄陽向洛陽。

掩門

身瘦不勝笏。官閒常掩門。漢廷雖好老。楚澤未招魂。硯潤蟾疎滴。香殘鴨尙溫。箇中殊會意。恨欠阿戎言。

又

簌簌落高槐。陰陰長綠苔。只言門晝掩。不道客誰來。足痺思尋壑。愁生欠撥醅。吾兒能問事。梨栗且炮煨。

又

舉手可及屋。積書高拄頤。忽聞疎雨滴。恍記故山時。點染聊成字。呻吟僅似詩。不關才思盡。碌碌本亡奇。

又

寡求忘市遠。易足任囊空。院吏催呈史。家僮笑認窮。鬢毛驚盡白。倉粟餒陳紅。賴有三莪夢。時時到枕中。

自嘲

野老家風子未知。天教甫里出孫枝。遍遊竹院尋僧語。時拂楸枰約客棋。是處登臨有風月。平生敷衍半宮祠。卽今箇事渾如昨。喚作朝官卻自疑。予仕宦幾五十年矣。歷崇道玉局武吏。今又忝佑神之命。

乍晴出遊

八上山翁病不支。出門也賦喜晴詩。小樓酒旆闌街處。深巷人家曬練時。本借微風歛帽影。卻乘新暖弄鞭絲。歸來幸有流香在。剩伴兒童一笑嬉。流香蓋賜酒名。

送客至湖州市

偶駕雞栖送客行。迢迢十里出關城。誰知小市蕭條處。剩有豐年笑語聲。聊借野風吹醉頰。更憑陂水濯塵纒。故廬相見春回近。鄰曲家家已遍耕。

題史院壁

命薄謀常拙。年衰力轉微。鷁飛元合退。羝乳偶成歸。汗簡顛靡日。流塵怯染衣。無端霜夜月。應照舊苔磯。

又

槁木忘榮謝。閑雲任卷舒。慵爲繞枝鶻。寧作蠹書魚。羈旅心常折。親朋夢亦疎。溪頭釣船在。恐負此心初。

又

白髮無餘鬢。蒼顏失故丹。旅遊多敗意。大屋每饒寒。出畏霜侵褐。歸乘日暖鞍。若非時得句。何以慰衰殘。

又

苔磬平分路。銅環半掩扉。殘蕪寒不死。敗葉落還飛。責重何由塞。愁生但念歸。非無茅一把。世事苦相違。

寄二子

大兒新作鶴林遊。仲子經年戍吉州。日日望書常至暮。時時入夢卻添愁。得官本自輕齊虜。對景寧當似楚囚。識取乃翁行履處。一生任運笑人謀。

訪客至北門抵暮乃歸

北郭那辭十里遙。上車且用慰無聊。九衢浩浩市聲合。四野酣酣雪意驕。清鏡新磨臨綠浦。長虹橫絕度朱橋。歸來熟睡明方起。臥聽鄰牆趁早朝。

恩除秘書監

羣仙鶴駕去難追。白首重來不自知。才藝荒唐癡獨絕。功名蹭蹬老如期。海邊鄭叟窮耽酒。吳下韋郎晚學詩。扶上木天君莫笑。衰殘不似壯遊時。

寄題儒榮堂朝散大夫徐夢莘著北盟錄上之除直秘閣訓辭有儒榮之語因以名堂來求賦詩

軍容基禍廟謀疎。尚記文登遣使初。只道大功隨指顧。至今遺種費銖鋤。還朝不遣參麟筆。寓直空聞上石渠。剩辦殺青君記取。龍庭焚盡始成書。

夙興

鐘已樓頭動。燈猶帳外殘。霜濃愁枕冷。病起覺衣寬。鶴怨憑誰解。鷗盟恐已寒。君恩等天地。應許納微官。

館中書懷

流落逢明主。恩光集晚途。題名驚手戰。拜閣藉人扶。枉辱三華組。國史實錄及策府。凡忝三職。終歸一腐儒。庫書時取讀。猶足補東隅。

雜興十首以貧堅志士節病長高人情爲韻

仕宦徧四方。每出歸愈貧。寒暑更質衣。笑倒鄰里人。今年作史官。坐糜太倉陳。無如思歸何。日夜望絕麟。區區牛馬走。齷齪蠱臣。恩深老不報。肝膽空輪囷。

又
孟子闢楊墨。吾道方粲然。韓愈排佛老。不失聖所傳。伐木當伐根。攻敵當攻堅。坐視日月食。孰探天地全。一木信難恃。要憂大廈顛。安得孟韓輩。出爲吾黨先。

又
聖人固多能。藝乃以不試。嗟予少貧賤。日月成坐棄。矧今耄已及。甘食而笑睡。道衰朋友散。斯文凜將墜。閉戶輒竟日。孰與講仁智。厭厭生意盡。何暇議李志。

又
少年喜結交。患難謂可倚。寧知事大謬。親友化虎兕。出仕五十年。危不以讒死。始畏囊中錐。寧取道傍李。老來多新知。英彥終可喜。豈以二三君。遂疑天下士。

又
昔我遊廬山。夜遇東林雪。灰深火正熱。膏滅燈半滅。童驚林虎過。僧惜澗松折。至今每追想。可解肺肝熱。那知蓬山夢。忽繼此清絕。殊勝蘇子卿。餐氈持漢節。

又
觀人如觀玉。拙眼喜譏評。得失願在人。玉固非所病。慶曆嘉祐間。人才於斯盛。王回僅一招。石介棄不聘。乃知天下士。成敗各有命。願君姑安之。天定豈不勝。

又
兩山如蛾眉。一水若車輞。吾昔廬其間。百里臨莽蒼。少年手藝木。條榦日夜長。咿啞駕獨轅。迢遞搖兩槳。平生會心地。今乃寄夢想。何時喚鄰翁。煙水行布網。

又
貨財不可居。祿位不可鬻。我爾本一家。何至臯蘭鑿。小夫謀人國。紛紛日煎熬。或謂性本惡。或謂經無褒。誤人方自此。孰如飲醇醪。清言亦自佳。遺事非徒高。

又

魯山粹而博。韶美曠且真。石渠東觀中。久矣無若人。飛仙驂鳳鸞。豈久混世塵。空餘文章在。常與日月新。我雖不足數。曠昔忝交親。尙想秋燈下。對影歛幅巾。陳山魯山劉儀鳳韶美。

又

君子尙大節。又甚惡不情。魯連故可人。用意終近名。千載高夷齊。采薇忘其生。周公述易象。所以貴幽貞。去聖雖已遠。江左見淵明。我讀飲酒詩。朱弦有遺聲。

送任夷仲大監元受之子

往者江淮未徹兵。丹陽邂逅識耆英。叩門偶綴諸公後。倒屣曾蒙一笑迎。敢意癡頑成後死。相從髣髴若平生。小詩話別初何有。一段清愁伴牖聲。游昔在京口。與陳應求馮國仲查元章張欽夫諸人。從先提刑遊。今三十九年矣。

謝韓實之直閣送燈

玉作華星綴絳繩。樓臺交映暮天澄。東都父老今誰在。腸斷當時諫浙燈。

又

舊友年來不作疎。華燈乃肯寄蝸廬。寧知此老蕭條甚。二尺檠前正讀書。

道山直舍

身世從來一蠹魚。討論猶記入朝初。自憐報國無他技。又領蘭臺四庫書。

館中營繕方一新而右文殿生芝草甚異

丹碧參差盛一時。殿楹三秀見金芝。漢庭漫道多才傑。天馬何勞作頌詩。

戲述淵明鵝漸遺事

桑苧柴桑一世豪。區區玩物亦徒勞。品茶未及毀茶妙。飲酒何如止酒高。

雪夜

雪屋透窗明。風簾撮夜聲。披衣擁爐坐。忘卻在都城。

直舍獨坐思成都

錦城花絮送吳船。屈指東歸又幾年。羣玉峯頭身老矣。百花潭上夢依然。青衫尙記稱狂客。白髮寧知作老仙。所恨酒腸非復昔。閑遊空負杖頭錢。

歎老

鏡裏蕭蕭白髮新。默思舊事似前身。齒殘對客豁可恥。臂弱學書肥失真。漸覺文辭乖律呂。豈惟議論少精神。平生師友凋零盡。鼻堊揮斤未有人。

冬曉

恩免宵興趁曉班。養慵終覺媿吾顏。浮名半世虛催老。高臥何時復得閑。兩岸夕陽漁浦市。數峯寒靄沃洲山。扁舟來往無窮樂。此事天公豈所慳。

有懷梁益舊遊

土埃壘壘復雙雙。悠然殘夢對寒缸。亂山落日葭萌驛。古渡悲風桔柏江。虎印雪泥餘過跡。樹經野火有空腔。四方行役男兒事。常笑韓公賦下隴。

孤坐無聊每思江湖之適

世上元無第一簫。此身只合臥滄洲。鱗搖漁浦蒼茫月。帆帶松江浩蕩秋。有酒人家皆可醉。無僧山寺亦閑遊。老來閱盡榮枯事。萬變惟應一笑酬。

夢韓无咎如在京口時既覺枕上作短歌

隆興之初客江臯。連檣結駟皆賢豪。坐中无咎我所畏。日夜酬倡兼詩騷。有時贈我玉具劍。間亦報之金錯刀。舊遊忽墮五更夢。舉首但覺鐵甌高。樽前美人亦黄土。吾輩鬼錄將安逃。死生一訣信已矣。所恨膏火常煎熬。平生不愛葱嶺話。方術亦陋葛與陶。但當東歸棄百事。爛醉海上觀雲濤。

出東城並江而歸

上車容假寐。出郭當閑遊。遠笛臨風起。高帆到岸收。人歸花市路。客醉酒家樓。徑就東窗臥。孤燈欲話愁。

子聿欲暫歸山陰。見乃翁作惡。遂不行。贈以此詩。
鐘鳴豈復夜行時。文字相娛賴此兒。欲去復留知汝孝。未言先泣歎吾衰。兩篇易象能忘老。百畝山畬可免飢。但報家僮多釀酒。一欄紅藥是歸期。明年春晚。史院奏書必得歸矣。

題趙生畫趙生名廉宣和未得幸廉宣仲爲予言

東都畫手排浮萍。天子獨賞一趙生。幅縑尺紙皆厚賜。衆史妬媚都人驚。爾來一筆不復見。好事往往空聞名。奇哉此獨出劫火。論價直恐千金輕。老廉博士最別識。一見自謂雙眼明。老夫寓居旱河上。矮軸正向幽窗橫。飯餘捫腹看不厭。林外重閣高崢嶸。憑誰喚住兩禪客。水邊共聽煙鐘聲。

題宣律師畫像

秀目大頭顱。英姿舉世無。平生一瓦鉢。何處有天廚。

暇日弄筆戲書

天地爲我廬。江山爲我客。北斗以酌酒。恨我飲量窄。人生但閉戶。烏用分菽麥。贈君玉函方。憤憤無皂白。

又

草書學張顛。行書學楊風。平生江湖心。聊寄華硯中。龍蛇入我腕。疋素忽已窮。餘勢尙隱鱗。此興嗟誰同。

又

胸懷幾雲夢。形骸一槁木。雖客長安城。未始忘退縮。古來豪傑士。強半死空谷。耐事勿動心。貧賤豈汝獨。

立春前後連日風雨

河岸春生綠。齋扉雨送昏。手鈔書半淡。巾漉酒微渾。餅餌連春日。歌呼近上元。所嗟今夕夢。不在石帆村。

武林

皇輿久駐武林宮。汴雒當時未易同。廣陌有風塵不起。長河無凍水常通。樓臺飛舞祥煙外。鼓笛喧呼明月中。六十年間幾來往。都人誰解記衰翁。紹興癸亥。予年十九。以試南省。來臨安。今六十年矣。

立春後十二日命駕至郊外戲書觸目

身兼老病常歸臥。天半陰晴偶出遊。鸚鵡碧籠當戶外。鞦韆畫柱出牆頭。年華冉冉飛雙翼。夢境悠悠寄一漚。旅食都門那可久。少留應爲賦春愁。

又

宮雲縹渺漏聲遲。夢裏華胥卻自疑。春淺風光先盎盎。時平節物共熙熙。畫簾不捲聞人語。玉勒徐行避酒旗。閱盡輩流身獨健。恍如隨計入都時。

又

丹成不服怕升天。豈料乘風到日邊。九陌樓臺生細霧。萬家絃管送流年。香車寶馬沿湖路。繡幕金疊出郭船。折簡亦思招客醉。不堪春困又成眠。

春夜

客向燈前老。愁從枕上生。雨聲添好睡。花氣散餘醒。舊事談誰聽。新詩鍊不成。惟當速歸老。鄰父待同耕。

訪客至近郊

訪客西郊路。停車小苑門。閑雲寧有雨。淡日不成暄。鷺下青蘋浦。鴉啼綠樹村。還家未索寞。隨分具魚飧。

車中作

雨過未生塵。寒輕不著人。斷雲飛苑路。高柳暗天津。憔悴非平日。呻吟又一春。絲毫寧有補。空負耦耕身。

倦飛

倦飛何意閉樊籠。冉冉年光過眼空。酒盡不妨沽巷口。詩成多是在車中。曾腰白羽心猶壯。不養丹砂頰自紅。所歎暮年交舊盡。燈前情話與誰同。

遣興

馬跡車塵不到門。暮年萬事付乾坤。讀書浪苦只取笑。識字雖多誰與論。骨相元非金馬客。夢魂空繞石帆村。濁醪幸有鄰翁共。莫厭從來老瓦盆。

癸亥正月十日夜夢三山竹林中筍出甚盛欣然有作
新春身不到家園東嶼西村役夢魂一夜四山雷雨起滿林無數長龍孫

卷五十二

謝徐志父帳幹惠詩編

平生聞若人筆墨極奇峭相望二千里安得接談笑一朝獲其詩驚喜踰素料夜窗取吟諷寒燈耿相照春容清廟歌縹緲蘇門嘯蹴天浙江濤照野楚山燒每篇十過讀玩味頭屢掉正如啜名酒雖愛不忍釀看君亦華髮氣壓萬年少予昔從茶山辱賞三語妙文章老不進顧頴今可弔誰知牛車鐸黃鐘乃同調願君時來過勿恤俗子諂

河橋晚歸

曲巷連新市層樓近小橋青帘猶滴雨綠浦恰通潮簾影晴方見笙聲冷未調斜陽覓歸路偏愛玉驄驕

謝王子林判院惠詩編王從揚廷秀甚久

文章有定價議論有至公我不如誠齋此評天下同王子江西秀詩有誠齋風今年入修門軒軒若飛鴻人言誠齋詩浩然與俱東字字若長城梯衝何由攻我望已畏之謹避不欲逢一日來叩門錦囊出幾空我欲與馳逐未交力已窮太息謂王子諸人無此功騎驢上灞橋買酒醉新豐知子定有人詎必老鈍翁

紹興癸亥余以進士來臨安年十九明年上元從舅光州通守唐公仲俊招觀燈後六十年嘉泰壬戌被命起造朝明年癸亥復見燈夕遊人之盛感歎有作

隨計當時入帝城笙歌燈火夜連明寧知六十餘年後老眼重來看太平

出謁晚歸

萬卷縱橫眼欲盲偶隨尺一起柴荆淵魚脫水知難悔野鶴乘車只自驚苑路落梅輕有態御溝流水細無聲紅塵朝暮何時了促駕歸來洗破觥

思歸示子聿

平生愛山水。遊陟老不厭。此外惟讀書。垂死尙關念。方昔少壯時。萬里攜一劍。自從還故山。日夜就收斂。蒙恩置三館。寒灰忽光焰。龍鍾氣纔屬。筆力安得贍。同舍多賢豪。揣分無乃玷。春來百疾作。沉痾困鍼砭。思歸入夢寐。歷歷數過店。問津始胥濟。繫纜望禹窆。小江齋餅美。梅市將酒釀。雲破山嶙峋。雨足湖潏潏。二月柳勝槎。三月花如染。拄杖幸可扶。吾生尙何欠。更當與稚子。晨暮事鉛槧。天爵古所尊。榮名勿多占。

上元後連數日小雨作寒戲作

呼兒取酒敵春寒。病起飈裘剩覺寬。萬事不妨高枕臥。始知老子耐悲歡。

又

春風催暖入園林。一片雲生又作陰。留得梅花三日住。誰云造物本無心。

又

煙籠天闕青鶯溼。水漲官河畫鷁浮。解賦春陰三十首。不應惟有宋鄜州。

又

擬接殘書出郭行。浮雲忽已敗春晴。窮閭今雨無車馬。臥聽深泥濺屐聲。

出湧金門

出湧金門一黯然。初來猶是紹興前。都人百萬今誰在。惟有西湖似昔年。

書志示子聿

誤上蓬山亦已叨。所悲故里隔胥濤。還家未失屠羊業。報國元無汗馬勞。載筆敢言宗史漢。閉門猶得讀莊騷。小兒願與翁偕隱。正恐聲名未易逃。

入春念歸尤切有作

大朝覆育忝遺民。扶億歸來雪鬢新。對酒無歡翻作病。愛詩何得但窮人。腰錢自昔妨騎鶴。絕筆何時到獲麟。鄉俗嬉遊重端五。剩烹糲糗喚比鄰。筮者言予五月可還故山。

書房雜詠

賦性無他嗜。傳家但古書。堯咨洪水際。羲畫結繩餘。異學方攘斥。浮文亦掃除。挑燈北窗下。聊得遂吾初。

又

久客思鄉井。殘軀怯歲年。家能常食粥。口固不言錢。鐵補曾穿硯。韋聯屢絕編。臥聞兒講學。起坐失沉懸。

獨立思故山

谿水初生與岸平。橋頭新柳已藏鶯。詩緣遇興玲瓏和。酒爲逢知爛熳傾。青箬買來衝雨釣。烏犍租得及時耕。今朝獨立東風裏。歎息無人會此情。

寓歎

俗心浪自作禁絲。世事元知似弈棋。舊業蕭然歸亦樂。餘年至此死何悲。古人可作將誰慕。造物無心豈汝私。已決殘春故溪去。短蓑垂釣月明時。

後寓歎

貂蟬未必出兜鍪。要是蒼鷹憶下鞲。彭澤往歸端爲酒。輕車已老豈須侯。千年精衛心平海。三日於菟氣食牛。會與高人期物外。摩挲銅狄灞城秋。

新歲頗健寄青城故人

驕氣年來痛自鋤。似能略契度關書。神光出背夜穿帳。胎髮滿頭晨映梳。吾道元知非土苴。此身那可付丘墟。岷山幸有丹爐在。青壁何時共結廬。

新年七十有九

中歲抱沉絲。詎敢望七十。造物偶脫遺。俯仰毫已及。寧知辱弓旌。扶僊去鄉邑。受恩不知報。懷抱空怏悒。天門覩難窺。地芥亦癩拾。隨身一詩囊。副以兩藥笈。何當復得謝。皓蕩脫維繫。擘浪畫楫飛。穿雲青鞵溼。餘年尙有幾。登覽當汲汲。狂吟題寺廊。大筆蘸墨汁。

春日訪客於逆旅及郊寺感而有賦

底事經年客帝鄉。風光淡沱日初長。野歌作氣老猶壯。花氣撩人醒亦狂。店壁拂塵尋舊字。寺樓極目送斜陽。告歸不過殘春事。杜曲桑麻亦未荒。

二月二日夢中作

零落薔薇委道傍。更堪微雨續殘香。象牀玉尺人何在。腸斷新裁錦一方。

對酒作

羨門安期何在哉。河流上泝崑崙開。白雲不與隱居老。孤鶴自下遼天來。春江風物正閑美。綠浦潮平柁初起。暮吹長笛發巴陵。曉挂高帆渡湘水。世間萬變更故新。會當太息摩銅人。脫裘取酒藉芳草。與子共醉壺中春。

西湖春遊

靈隱前。天竺後。鬼削神剜作巖岫。冷泉亭中一尊酒。一日可敵千年壽。清明後。上巳前。千紅百紫爭妖妍。鞞鞞鼓聲鞠場邊。鞦韆一蹴如登仙。人生得意須年少。白髮龍鍾空自笑。君不見灞亭耐事故將軍。醉尉怒訶如不聞。

春晚用對酒韻

吾今歸哉復歸哉。草堂正對湖山開。座銘漆園養生主。屏列柴桑歸去來。一閑可敵八珍美。驪駒在門端可起。不緣老病日日增。世味從來淡如水。故人誰非白頭新。況復眼中無故人。但餘一恨未免歎。掩關睡過今年春。

題館中直舍壁

幾年顛顛去清班。敢辱君恩誤賜環。但厭軟塵隨倦馬。不愁弱水隔神山。下帷寢飯羣書裏。退食雍容衆雋間。行矣東歸竟何補。低回未免媿吾顏。

春晚懷故山

吾廬煙樹間。正占湖一曲。遠山何所似。髮鬢千髻綠。近山更可人。連娟兩眉蹙。澗蟠偃蓋松。路暗圍尺竹。海棠雖妍華。態度終不俗。最奇女郎花。宛有世外躡。雖云嬾出遊。閉戶樂事足。年來殊失計。久耗太倉粟。淖糜不救口。斷簡欲滿屋。兀兀不知春。青燈伴幽獨。

春社日效宛陵先生體

社雨

開歲纔幾時。春社忽已及。茫茫草色深。蕭蕭雨聲急。扶犁行白水。不惜芒屨溼。村童更可憐。赤脚牛背立。

社鼓

酒旗三家市。煙草十里陂。林間鼓鼙鼙。迨此春社時。飲福父老醉。嵬峩相扶持。君勿輕此聲。可配豐年詩。

社酒

農家耕作苦。雨暘每關念。種黍躡麩麩。終歲勤收斂。社瓮雖草草。酒味亦醇醱。長歌南陌頭。百年應不厭。

社肉

社日取社豬。燔炙香滿村。肌鴉集街樹。老巫立廟門。雖無牲牢盛。古禮亦略存。醉歸懷餘肉。露遺徧諸孫。

局中春興

天知病眼困風沙。借與蓬山閣物華。微暖已迎新到燕。輕陰猶護欲殘花。幽窗寂寂書圍坐。倦枕時時夢過家。立馬庭前還小駐。不妨閑試半甌茶。

久客

顛顛閑坊底。蕭條久客心。燕歸知社過。葉密覺春深。燈火愁殘史。塵埃歎素琴。餘生猶有幾。去日苦駸駸。

幽居

花過鶯初懶。泥新燕正忙。病餘猶止酒。睡起獨焚香。拄杖嫌園窄。棋枰喜日長。北窗元可樂。不是傲羲皇。

春日絕句

吏來屢敗哦詩興。雨作常妨載酒行。忽見家家插楊柳。始知今日是清明。

又

二十四番花有信。一百七日食猶寒。眼中不是無春色。歎息衰翁自鮮歡。

又

門前喚擔買芳菲。白髮猶堪插一枝。舊厭蛙聲今喜聽。牆陰特地作盆池。

又
故園蛺蝶最多種。百草長時花亂開。窮巷春風元不到。一雙誰遣過牆來。

又
桃李吹成九陌塵。客中又過一年春。餘寒漠漠城南路。只見鞦韆不見人。

又
便恐東皇促駕回。小軒無事且啣盃。不知何處桃花落。一片飛從屋角來。

又
介亭南畔排衙石。剝蘚剜苔覓舊題。讀罷南豐數行字。滿山煙雨共淒迷。

又
楊家園裏醉殘春。醉倩傍人拾墮巾。紅紫飄零不須歎。東君渠自是行人。

歎老

晨起梳頭滿鏡霜。豈堪著脚少年場。酒徒分散情疎索。某敵憑陵意頡頏。寓世極知均醉夢。餘生只合老耕桑。石帆山下葦絲長。待我還東泊野航。

春雨中偶賦

老子年來百事慵。不妨詩課尙能供。殘花已覺胭脂淡。衰酒初嘗琥珀濃。羸病不堪連日雨。孤愁偏怯五更鐘。蒼交只有烏藤在。且伴禪牀莫化龍。

戲詠落花

終年栽接待新春。一日隨風委路塵。愁殺主翁渠不管。爭如只作看花人。

思歸示兒輩

睡味甜如蜜。人情冷似漿。流年垂及耄。客子固多傷。興發雞豚社。心闌翰墨場。吾兒姑力穡。莫羨笏堆牀。
東軒花時將過感懷

小軒風月得婆娑。盡付流年與嘯歌。細數一春今過半。正令百歲亦無多。還家常恐難全璧。閱世深疑已爛柯。只欲閉門搢倦枕。晚風無奈落花何。

又

社雨晴時燕子飛。園林何許覓芳菲。江山良是人誰在。天地無私春又歸。殘史有期成汗簡。修門即日挂朝衣。人生念念皆堪悔。敢效淵明歎昨非。

江亭

千載滄江上。書生誦所聞。鑄形尊越蠡。扶眼悼荆員。高鳥衝煙沒。輕舟壓浪分。何由從此逝。揮手謝諸君。

對食

天賦元無滿谷牟。不煩梁肉汗龜腸。忽逢客釜莼羹美。遙憶山廚麥飯香。正有一簞元自足。縱嘲三韭亦何傷。江邊煙岫參差路。便喚漁舟莫治裝。

飽食

飽食無功媿汗青。燈前顧影歎伶俜。馬衰猶養疑知路。龜久當捐爲不靈。腰下徒誇綬若若。鏡中何止髮星星。石帆回首初非遠。要及清秋斲茯苓。

記夢

旅夢遊何地。分明禹廟傍。不嫌村餉薄。但愛野蔬香。筍市連山塢。菱歌起夕陽。一蓑元所樂。枉道嬾衣裳。

初夜暫就枕

街鼓寥寥欲斷時。官閑惟與睡相宜。褰帷臥看初升月。轉枕重思未穩詩。偃仰少安真得策。欠伸徐起頓忘疲。悠然已在羲皇上。莫遣兒曹取次知。

次林伯玉侍郎韻賦西湖春遊

西湖一別不知年。陳迹重尋麥嶺邊。山遠往來雙白鷺。波平俯仰兩青天。殘骸自覺難支久。一笑相從亦宿緣。旅食京華詩思盡。羨公落筆思如泉。

湖中微雨戲作

槎罷青梅指不香。一盃聊復答年光。莫言老子無人顧。猶得西施作淡粧。

與兒輩泛舟遊西湖一日間晴陰屢易

逢著園林卽款扉。酌泉鬻筍欲忘歸。楊花正與人爭路。鳩語還催雨點衣。古寺題名那復在。後生識面自應稀。傷心六十餘年事。雙塔依然在翠微。

贈呂次翁杖

君得金丹雖未仙。放翁邂逅與忘年。空能處處誇詩句。不解時時贈酒錢。馬駿極知生冀土。鶴飛會見上遼天。爾來筆硯塵埃滿。剩欲相從乞一聯。

得子聿到家山後書

日日春陰愁出戶。汝今恰遇十分晴。桑林紫甚纍纍熟。稻壠青秧漫漫平。夢好定知行路健。書來深慰倚門情。柯橋道上山如畫。早晚歸舟聽鷓聲。

題齋壁

小居閑坊旋卜居。老人也看作吾廬。客知貪睡多留刺。兒未來歸自檢書。草賦萬言那直水。屬文三紙尙無鱸。京塵日念家山樂。況值腰鎌割麥初。

又

殘髮蕭蕭不滿簪。衰年亦自惜光陰。作碑諛墓已絕筆。紬史藏山猶苦心。穿破綠錢多穉筍。驚飛紅雨有幽禽。北窗睡起摩挲眼。更覺清風直萬金。

又

一櫂秋風去已遲。釣竿恐失野人期。朝回補睡尋幽夢。客去偷閑練近詩。浮世本知緣苦薄。頽齡已與志俱衰。平生所慕孤山老。剩欲懷茶奠舊祠。

小飲

門生嘲喜眠。官長罵耽酒。人生自適爾。嘲罵亦何有。蒸我乳下豚。翦我雨中韭。盃盤雖不豐。吾兒起爲壽。車馬滿長安。誰肯顧衰朽。作詩付汝藏。千金珍幣帶。

贈傅神水鑑

寫照今誰下筆親。喜君分得臥雲身。口中無齒難藏老。頰上加毛自有神。誤遣汗青成國史。未妨著白號山人。它時更欲求奇迹。畫我溪頭把釣緝。

春晚

新綠成陰小雨時。幅巾蕭散與閑宜。燕歸赴訴經年別。鶯晚分疏出谷遲。曉枕呼兒投宿酒。暮窗留客算殘棋。脩然此意風塵表。正恐羲皇未必知。

天竺曉行

三茆聽徹五更鐘。二竺穿窮九里松。無復官樓沽酒笑。但煩湖水照衰容。

又

筍輿咿軋水雲間。慙愧忙身得暫閑。堪笑風中一黃葉。知看天外幾青山。

初見石榴花

吳中四月尙餘寒。細雨霏霏怯倚闌。老子真成興不淺。榴花折得一枝看。

夢遊

太華峯頭秋氣新。醉臨絕壁岸綸巾。世間萬事惟堪笑。禹跡茫茫九片塵。

又

九秋風露洗頭盆。萬里雲煙腰帶鞵。小瓮松醪知已熟。與君爛醉不須醒。

又

客途幽夢苦淒淒。滿眼山川意卻迷。條華朝驅雲外騎。河潼夜聽月中雞。

江亭晚思

本自無閑況有忙。遠坊兀兀送年光。太空不礙雲舒卷。高枕寧論夢短長。山破霽煙千萬疊。鳥橫潮浦兩三行。年來自笑詩情減。愁絕奚奴古錦囊。

上章納祿恩畀外祠遂以五月初東歸

身似霜松老不枯。乞骸猶得侍清都。百錢濁酒渾家醉。六月飛蟲徹曉無。笑睡不愁閑客攬。出遊自有小兒扶。買山尙恐巢由笑。敢問君王覓鏡湖。

又

黃紙淋漓字似鴉。卽今真箇是還家。園廬漸近湖山好。鄰曲來迎鼓笛譁。籩實傍籬收豆莢。盤蔬臨水采芹芽。皇家養老非忘汝。不必青門學種瓜。

又

羣玉峯頭孤夢斷。五雲溪上野舟回。傍人鷗鳥自然熟。到處藕花無數開。麥飯不饜常面槁。柴門閑掩自心灰。雨來正作盆山地。不怕冥冥半月梅。

又

身是風前一斷蓬。經年竊食竟何功。倚天青嶂迎船出。撲馬紅塵轉眼空。網戶鮑魚勝丙穴。旗亭送酒等郛筒。死前幸作扶犁叟。免使淮南笑發蒙。

又

此身惟有一躬耕。乞得餘年樂太平。東觀並遊收昨夢。西湖重到付來生。一堤草露明晨照。半浦荷風颭晚晴。歷歷歸途皆勝事。江亭先聽櫓歌聲。

江亭

旅食京華興已闌。喜扶衰憊出重關。江波蘼岸綠堪染。山色迎人秀可餐。壕上觀魚非至樂。管中窺豹豈全斑。此行便問天台路。剩采靈芝換病顏。

題三茆邵道士雲隱

興盡當年句曲秋。卻歸罨畫弄扁舟。有時信脚來沙際。拾得殘雲補破裘。

又

尙嫌勾漏養丹砂。況種劉郎去後花。罨畫溪頭雲萬頃。不知何處是君家。

受外祠敕

放浪江湖迹已陳。今朝剩喜結銜新。讀騷未敢稱名士。拜賜猶應號散人。歸去還騎款段馬。醉顛重岸接離巾。行漸近雲門寺。愈信人生有宿因。

感寓

人生難控搏。古謂七十稀。壽夭雖小異。要亦同所歸。君看銜山日。耿耿有餘暉。投牀方息偃。晨起復求衣。萬家同一役。負水關門扉。知叟與愚公。畢竟孰是非。

又

老氏有至言。所貴知我稀。鄙夫急自銜。豈復擇所歸。君看珠在淵。草木借光輝。所以古達人。懷玉被褐衣。吾廬大澤中。歲苦水半扉。朱門固自好。我亦未必非。

肉食

平生愛枯淡。老病未免肉。殺戒苦難持。貪境則易熟。鄙夫五鼎少。達士一瓢足。紛紛刀机間。斷者豈復續。習聞謂當然。乍見可痛哭。長安多貴人。得此試一讀。

贈成封州籍

綠髮臨邊固已奇。不應顛顛客京師。極知自有封侯骨。但要無忘耕壟時。意氣覆甌書捷布。風流橫槊賦新詩。平生每恨相從少。滿眼關山又語離。

予以壬戌六月十四日入都門癸亥五月十四日去國而中有閏月蓋相距正一年矣慨然有賦

又

三百六十日。扶衰得出都。略無新伎倆。仍是舊形模。世事鬻攻觸。人情越事吳。勿言尊菜老。樣權醉湘湖。

一百七十里。我行誰謂賒。期年初去國。度宿卽還家。事似談春夢。身如寄客槎。石帆村好在。重理舊桑麻。

雨中別同朝諸公

今日別交舊。街泥盈尺深。極知當作惡。追恨闕相尋。笑語關幽夢。江山入苦吟。新秋纔一月。留句待清砧。

又

兩點萬珠落。水聲羣馬奔。纔能脫危歸。未遽定驚魂。一掃枕中夢。卽歸江上村。村醪莫嫌薄。隨事有雞豚。

出城

羈枕不成寐。羸驂曉出城。驛門深閉草。苑樹密藏鶯。老病安閑散。疎慵負聖明。津亭凝望久。惟是待潮平。

宿北錢清

晡時理舟楫。甲夜泊錢清。蓋餅依然笑。店家齋麵有名。已六十年矣。漁燈特地明。酒旗闌道出。風浪拍船鳴。未說鄉閭喜。江山亦有情。

老伶

老伶頭已白。相識不論年。時出隨童稚。猶能習管絃。煙林梅市路。風幔放翁船。餘酒堪同醉。君無惜醉眠。

舟行錢清柯橋之間

逾年夢想會稽城。喜挂高帆浩蕩行。未見東西雙白塔。先經南北兩錢清。兒童鼓笛迎歸艦。父老壺觴敘別情。想到吾廬猶未夜。竹間正看夕陽明。

寓蓬萊館

道山方夢斷。稅駕復蓬萊。海上紙應乳。遼東鶴已回。客驚添鬢雪。自笑久心灰。底事妨人睡。樓頭暮角哀。

乍自京塵中得歸故山作五字識喜

門巷如秋爽。軒窗抵海寬。初還綬若若。已覺面團團。引睡拈書卷。偷閑把釣竿。人生快意事。五月出長安。

初歸雜詠

雪滿漁蓑雨墊巾。超然無處不清真。胸中那可有一事。天下故應無兩人。騎馬每行秋棧路。喚船還渡暮江津。酒

樓僧壁留詩徧。八十年來自在身。

又

齒豁頭童儘耐嘲。卽今爛飯用匙抄。朱門漫設千盃酒。青壁寧無一把茅。偶爾作官羞問馬。頽然對客但稱貓。此身定向山中死。不用磨錢擲卦爻。磨錢擲卦爻。蜀龍昌期語也。

又

八十可憐心尙孩。看山看水不知回。輒炊香甑桃花飯。淺酌清尊竹葉醅。平地本知多陷阱。羣兒隨處覓梯媒。曠懷只待秋風起。十丈蒲帆海上開。

又

換盡朱顏兩鬢皤。流年如此奈君何。早從學問求開益。晚悟文章要詆訶。每憶壯遊成獨笑。間逢老伴亦高歌。更餘一恨君知否。千載涪溪石未磨。

又

窗下初收剝啄基。疎簾窳地晝陰移。下巖石潤揮毫後。正焙茶香落磴時。癡老入朝元是錯。期年決去已爲遲。天公賦予誰能測。只吝功名不吝詩。

又

小園五畝翦蓬蒿。便覺人間迹可逃。盡疏珍禽添爾雅。更書香草續離騷。藥苗可斲攜長鏡。黍酒新成壓小槽。老入鷓行方徹悟。一官何處不徒勞。

又

乞得身歸且浩歌。蕭然生世寄漁蓑。茶甘半日如新啜。墨妙移時不再磨。山寺躡雲頻獨往。鄰家穿竹自相過。甚杼勝負能多少。堪笑傍人說爛柯。

湖上急雨

谿煙一縷起前灘。急雨俄吞四面山。造化等閑成壯觀。月明卻送釣船還。

夏日獨居

平生本清淨。垂老更蕭然。已罷客載酒。亦無僧說禪。空庭朝下鷓。密樹晚鳴蟬。長日君無厭。新秋近眼邊。

溪上夜釣

少時妄意學金丹。八十谿頭把釣竿。露溼茱萸姑惡哭。煙深沙渚鷺驚寒。登臨每歎乾坤大。強健猶應歲月寬。作意清吟未須厭。如山殘藁後人看。

幽事

曳杖驚林鶻。投竿冒澗花。若非詩滿卷。只道夢還家。開士分朝飯。鄰翁喚午茶。悠然吾事足。歸路竝山斜。

夙興

幽夢回千里。高城轉五更。窗虛送月落。竹動喜風生。自笑行安往。猶思坐待明。郊居少僮僕。手自闢柴荆。

文章

文章在眼每森然。力弱才疎挽不前。前輩不生吾輩老。恐留遺恨又千年。

閑遊

觸熱辭行在。扶衰返故丘。亂蟬催落日。病葉報新秋。秣蹇投山驛。尋詩倚寺樓。不因行萬里。那信此生浮。

又

剡縣有佳處。吾行無定期。橫塘供晚釣。孤店具晨炊。約客同看竹。留僧與對棋。人生得自在。更老未爲遲。

又

我出亦何急。輟行還悵然。輕裝幸已具。老健更誰先。野飯聊支日。山蔬不直錢。此生終樂死。何以報皇天。

又

已破京塵屐。還尋剡曲遊。戴星離古戍。衝雨憩山郵。壁認曾題字。門橫昔渡舟。經行固多感。隨處寄悠悠。

夏日

赫赫炎威日正中。冰紈笛簟欲無功。一心願伴沙頭鷺。百計難呼木杪風。纖手削瓜刀似水。小鬟分酒盞如空。洗心幸有高樓月。少待寒光出海東。

蜻蜓浦夜泊

風雨忽如秋已深。短篷今夜繫楓林。溪翁那問市朝事。蔬食不生盃炙心。橫截煙波飛健鶻。遠投沙渚落羈禽。斯遊誰道傷幽獨。猶有殘鐘伴苦吟。

幽興

微官那得繫疎慵。幽興渾如社酒濃。掃盡塵埃無一點。洗空幻翳有千重。百年到處俱羈客。萬里從來付短筇。身在有餘真妙語。盃羹何地欠秋菘。

避暑近村偶題

乞得身歸荷聖時。登臨筋力未全衰。楚祠草合三叉路。項羽廟在項里。隋寺苔侵半折碑。安隱院也。孤店不妨乘月宿。扁舟頻爲看山移。紅塵冠蓋真堪怕。還我平生白接羅。

南堂夜坐

老來日月駛。秋令俄更端。蟬號晚愈壯。螢火流空園。西風吹衣裳。蕭然謝炎官。飽食一事無。散髮坐前軒。河漢西南流。北斗何闌干。坐久光彩變。缺月涌金盆。欲睡復躊躇。草棘露已團。徂歲何足道。死生付乾坤。

立秋前一夕作

螢度梧楸徑。鳥鳴蒲葦洲。寧知八十老。又見一年秋。賀監稱狂客。劉伶贈醉侯。吾身會兼此。已矣尙何求。

憶昔

憶昔西遊兩鬢青。卽今鏡裏雪千莖。蛾眉風月猶關念。濯錦鶯花已隔生。避暑有時移枕簟。畏人終日閉柴荆。此懷恨欠詩千首。且寄秋泉一再行。

自嘲

外澤。裏常粗。元知似瓠壺。仕因無援困。學爲背時孤。軒蓋愁城市。風煙落道途。它年遊萬里。不必念歸吳。

夜坐庭中
大澤秋初到。荒庭夜自明。風雲生有候。河漢落無聲。病得新涼減。詩因少睡成。高枝有烏鵲。栖穩若爲驚。

養生

稟賦本不強。四十已遽衰。藥裹不離手。對酒盤無梨。豈料今八十。白間猶黑絲。咀嚼雖小艱。幸未如牛呶。昔雖學養生。所遇少碩師。金丹既茫昧。鸞鶴安可期。惟有庖丁篇。可信端不疑。愛身過拱璧。奉以無缺虧。譬不患天作。咸惟憂自貽。攀覽豈不苦。害猶在四支。二豎伏膏肓。良醫所不治。衣巾視寒燠。飲食節飽飢。虎兕雖在傍。牙爪何由施。老人不妄語。聊賦養生詩。

飲酒近村

放翁睡多少。行立人扶往。赴鄰里集。痛飲山花插鬢紅。醉歸棘露露衣溼。紗巾一幅何翩翩。庭中弄影不肯眠。莫欺此老今衰甚。曾見高皇狩越年。

遊山

蕭散湖山路。天教脫屣羈。蟬聲入古寺。馬影度荒陂。樵唱時傾耳。僧談亦解頤。偏門燈火關。不敢恨歸遲。偏門會稽城西南門名。

又

久客喜歸舍。況逢秋氣新。聊乘行膝子。閑覓住菴人。道士青芒屨。高僧白氎巾。更須苔井水。一爲濯京塵。

又

病退行猶倦。山坡每少休。高枝聞鶯語。淺瀨見魚游。偶有堪乘興。元無可遣愁。悠然又終日。爭路有歸牛。

又

古寺不來久。入門空歎嗟。僧亡猶見塔。樹老已無花。世事雖難料。吾生固有涯。慙慙一梳月。十里伴還家。

聞蛩

蟬聲未斷已蛩鳴。徂歲嶮崢得我驚。八十光陰猶幾許。勉思忠敬盡餘生。

又

稽首周公萬世師。小儒命薄不同時。秋蟲卻是生無憾。名在幽人七月詩。

入秋遊山賦詩略無闕日戲作五字七首識之以野店山橋送馬蹄爲韻

東髮初學詩。妄意薄風雅。中年困憂患。聊欲希屈賈。寧知竟鹵莽。所得纔土苴。入海殊未深。珠璣不盈把。老來似少進。遇興頗傾瀉。猶能起後生。黃河吞鉅野。

又

我昔西遊邊。萬里持一劍。風殄不自恤。露宿未嘗厭。棧危餘漢燒。山斷有秦塹。敢誇胡羊笑。但懷巴酒釀。回首四十年。遠遊每關念。秋風跨蹇驢。尙喜道傍店。

又

周南太史公。道家蓬萊山。塵凡不可料。亦復居其間。屢奏乞骸骨。寬恩許投閑。羽衣碧玉簡。尙綴仙官班。黃精掃白髮。面有孺子顏。簡寂吾家舊。飄然時往還。

又

我行剡中路。茆店連谿橋。驢弱我亦飢。解鞍兩蕭蕭。投牀得小憩。炊黍烹藥苗。舉手謝主人。去路盤山腰。沃洲在何許。秋葉紅未凋。遊僧不可逢。聊須問歸樵。

又

怕事真鴛鴦。老作入都夢。頭顱今何似。尙復堪自送。聯裾預登瀛。策馬從上雍。年衰當亟去。恩大容力控。雖言解朝藉。尙予侍祠俸。明年卽八十月。難把弄。著書則已矣。努力謀社瓮。

又

吾才如蹇人。何計逐奔馬。吾文如醜女。惟藉粉黛假。向來已歸休。畢志向林下。塊然一愚公。初不繫用捨。國恩定難報。衰涕時一灑。人本不勝天。豈復論衆寡。

又
鹽病比已損。秋風輕四蹄。朝遊支遁寺。莫涉千吉谿。青嶂環孤村。綠波溢橫隄。吾行本無定。所至窮攀躋。細推亦何樂。正類好鍛碣。自今當務本。春蕪飽鉏犂。

村居

白首歸來亦灌畦。任教鄰里笑栖栖。道心寧感兩雌雉。生計惟存五母雞。不恨閑門可羅爵。本知窮巷自多泥。暮聞鼓角猶人境。更欲移家入剡溪。

又

游子從來念故鄉。我歸仍得值豐穰。粗繪裁製襜褕暖。肥斧烹調鱠飴香。對客不妨依几杖。呼兒時與話耕桑。卻慙未解真齋物。猶揀山村靜處藏。

又

青藜杖出氛埃外。白版扉開水竹邊。造物與閑仍與健。鄉人知老不知年。齋居每袖持螯手。妄想寧流見麴涎。昨夜小庭風露冷。菊花消息已先傳。

又

石帆山下樂誰如。八尺輕舸萬頃湖。能釀人家分小榼。愛基道士寄新圖。條枚積地樹雞柵。溝港接筒澆芋區。父子還家更何事。斷編燈下講唐虞。

六藝示子韋

六藝江河萬古流。吾徒鑽仰死方休。沛然要似禹行水。卓爾孰如丁解牛。老儻簡編猶自力。夜涼膏火漸當謀。大門舊業微如綫。賴有吾兒共此憂。

七月十七夜五更起坐至旦

秋容淡如水。昨暮到江城。世事違高枕。年華入短檠。書中固多味。身外盡浮名。倚壁方清嘯。蓬窗已送明。

書懷

不飢不寒萬事足。有山有水一生閑。朱門莫管渠癡絕。自愛茅茨三兩間。

又

老人舉動須扶掖。跣婢椎奴少得閑。從此漸須都畫斷。正如避難在空山。

又

蝸廬自稱野人居。三尺明窗已有餘。從此要當常省事。時時小葺欲何須。

又

首宿堆盤莫笑貧。家園瓜瓠漸輪囷。但令爛熟如蒸鴨。不著鹽醯也自珍。

湖上秋夜

湖上山銜落月明。釣筒收罷葉舟橫。不知身世在何許。一夜蕭蕭蘆荻聲。

書感

俗學方譁世。遺經寢已微。斯文未云喪。吾道豈其非。拔本寧餘力。迷途幸識歸。新涼起衰疾。燈火耿郊扉。

示兒

得道如良賈。深藏要若無。冶金寧輒躍。韞玉忌輕沽。儒術今方裂。吾家學本孤。汝曹能念此。努力共枝梧。

書適

北嶼千梢竹。東軒八尺牀。徧行欣老健。熟睡領新涼。海石陳書几。陶詩貯藥囊。時時一到眼。亦足傲羲皇。海石英

石也。東坡詩云。海石來珠浦。

又

心清絕慾早。才薄去官多。月下時閑釣。雲邊每浩歌。野堂青草覆。山市白驢過。也有成功處。新降百萬魔。

放慵

往者耕仍養。中間仕易農。屢辭身老病。每荷上矜從。進媿門三戟。歸無畝一鍾。扶持得良藥。更放幾年慵。

登臨

儘道羈懷惡。登臨亦解顏。健嫌山路淺。狂恨酒尊慳。親友多疎索。漁樵自往還。有詩仍嬾記。零落水雲間。

寓歎

有位方憂失。無家豈念歸。賢愚竟誰得。今昨兩皆非。世事無長算。人情忽駭機。細思如意處。惟有釣魚磯。

居家

爲吏心雖嬾。居家力尙餘。刈茅支屋漏。栽棘補籬疎。就井磨樵斧。持錢鍛藥鉏。毋勞歎徒步。野鶴豈堪車。

舟中作

野老元無事。乘閑偶一來。微風市樓笛。落日寺街槐。梨大圍三寸。鱸肥疊四腮。鄰船不識面。呼與共銜盃。

築舍

築舍水雲鄉。蕭然似淨坊。粥鐺菰米滑。羹釜藥苗香。素壁圖嵩華。明窗讀老莊。與人元淡淡。不是故相忘。

雜感

孔欲居九夷。老亦適流沙。忠信之所覃。豈間夷與華。況我州閭間。相視等一家。老稚各自力。勉蹈思無邪。

又

十月可釀酒。六月可作醬。兒曹念乃翁。左右日供養。比鄰有老疾。亦復致一餉。老老以及人。此義古所尙。

又

肉食養老人。古雖有是說。修身以待終。何至陷饜饕。晨烹山蔬美。午漱石泉潔。豈役七尺軀。事此膚寸舌。

又

一氣不遽變。雨霽皆有符。死非一旦至。小疾爲前驅。人能謹察之。豈有倉卒虞。哀哉不知此。雖悔良難圖。

養生孰爲本。元氣不可虧。秋毫失固守。金丹亦奚爲。所以古達人。一意堅自持。魔鬼雖百萬。敢犯堂堂師。

送陳懷叔赴上臯酒官卻還都下
奇才初試發劊刀。疋馬秋風到上臯。地近雖同三輔重。時平無復五陵豪。極知穩步煙霄路。卻要微知郡縣勞。歸

去平津開首燕。吐茵應復忤西曹。

歸三山入秋益涼欣然有賦

藥物扶持笑食眠。鏡湖仍遇素秋天。一年強起歸猶健。百口相看喜欲顛。碧瓦朱甍無傑屋。烏篷畫楫有新船。道山頂上雖清絕。萬頃煙波始是仙。

子華至湖上待其歸

舍北犬吠迎歸航。老翁待兒據胡牀。碧雲忽起欲吞日。黃葉自凋非實霜。十風五雨歲則熟。左殮右粥身其康。豈無深谷結茅屋。文字讀易消年光。

晚行舍後

略約東邊一徑深。杖藜行飯當登臨。稷山竝海出遙碧。禹穴生雲成暮陰。殘歲自興遊子感。少年誰解老人心。歸來燈火參差夜。倦倚胡牀續短吟。

秋夜讀書有感

妄意斯文力弗勝。苦心猶欲付雲仍。數編魯壁家傳學。一盞吳僧夜講燈。南犬固應多吠雪。夏蟲那得解知冰。但令吾道常無墜。飲水何妨枕曲肱。

又

齒髮凋殘志有餘。一編聊復遂吾初。老來每恨無同學。夢裏猶曾得異書。家世偏憎慕青紫。兒童切莫話龍豬。正令世世皆農圃。廉讓何妨化里閭。

治圃

小圃漫經營。栽培抵力耕。土鬆宜雨點。根稚怯鉏聲。紅蕖方當熟。清陰亦漸成。每來常竟日。聊得暢幽情。

村醉

髮已凋零齒已疎。飽諳成敗更誰如。貴人豈得常金屋。丞相那知起草廬。久泛江湖知釣術。晚歸壠畝授農書。一尊徑就村翁醉。未肯英雄許本初。

病臥

蕭條風雨又經旬。病臥真成不覲鄰。跨馬難酬四方志。就書空盡百年身。碧花引蔓緣疎竹。黃雀呼羣啄破囷。君見此時風味否。肯辭人笑囊裝貧。

書悔

衣食須耕稼。無端浪出遊。客途南北雁。世事雨晴鳩。蓬轉何時已。灰寒善自謀。江湖千萬里。何處欠漁舟。

杭海

我老臥丘園。百事習慵惰。惟有汗漫遊。未語意先可。或挂風半帆。或貯雲一舸。趁潮亂鳴鷗。過磧細扶柁。近輒凌煙海。自笑一何果。邂逅得奇觀。造物豈付我。古湫石蜿蜒。孤島松磊砢。雁蕩大龍湫。石如騰龍。東海縣境有巨松。傳爲堯舜時物。湘竹閩娥祠。淮怪深禹鑿。鬼神駭犀炬。天地赫龍火。瑰奇窮萬變。鯤鵬尙么麼。紛紜旋或忘。追記今亦頗。作詩配齊諧。發子笑齒瓊。

黃犢

賣刀買黃犢。用以事耕稼。淒風山北秋。缺月溪西夜。小童搥竹枝。相呼聊一跨。秋來作欄成。參差出林罅。青煙起草積。微火近茅舍。未言東作功。此景已可畫。

秋夜

老覺人間歲月適。惜惜窗戶一燈幽。讀書已廢虛長夜。護塞無期負盛秋。病齒何堪食梁肉。殘軀惟念製衣裳。重陽臥看登高侶。滿把茱萸只自愁。

目昏頗廢觀書以詩記其始時年七十九矣

少時業詩書。慕古不自量。晨暮聞弦誦。左右紛朱黃。積書山崇崇。探義海茫茫。同志三四人。辯論略相當。落筆輒千言。氣欲吞名場。忽焉六十年。綠鬢久已霜。食必觀本草。不療病在牀。今秋又病目。始覺閑味長。車馬旣不至。亦無書在傍。一坐漏十刻。甚倦則倚牆。蝴蝶吾前身。華胥吾故鄉。童子亦聽睡。不復呼燒香。

假山擬宛陵先生體

疊石作小山。埋瓮成小潭。旁爲負薪徑。中開釣魚菴。谷聲應鐘鼓。波影倒松楠。借問此何許。恐是廬山南。

秋興

拒霜慘淡數枝紅。石竹凋零不滿叢。小蝶一雙來又去。與人都在寂寥中。

又

足力蹒跚少迎客。目視昏短常廢書。賴是門前秋水長。沙鷗未遽與人疎。

湖上夜歸

滿鏡新霜奈老何。扁舟日日醉顏酡。樂如逐兔牽黃犬。快似麾兵卷白波。霜近菊花猶未見。雨餘橙子已堪撻。湖桑小市人無數。爭看山翁擊楫歌。

晨起

戒婢箠衣徹屐屨。呼兒滌硯作喻麩。須臾開卷東窗下。卽是先生無病時。

飯飽晝臥戲作短歌

爲農得飯常半菽。出仕固應甘脫粟。藜羹自美何待糝。況復畏人嘲首瘡。今年還東已八十。視聽雖存鬢先禿。安能賣藥謀助道。道流賣藥自給名。日助道。但有知分堪養福。水車轉轉鄰餽魚。社鼓戢戢衆分肉。可憐老子暫膨脝。午睡窗邊自捫腹。里中車蕩取魚。舊例以所得分遺。

孤學

孤學雖違俗。猶爲一腐儒。家貧占力量。夜夢驗工夫。正復安三徑。寧忘奏六符。殘年知有幾。自怪尙區區。

自嘲

儒生窮事業。老去轉荒唐。長日中分睡。殘年有底忙。書常嬾終卷。詩亦少成章。忽棄蓬窗去。花前又一觴。

試筆

清談數語猶疑過。平地徐行亦慮危。酌酒淺深須在我。更衣單複要隨時。

秋思

烏柏微丹菊漸開。天高風送雁聲哀。詩情也似并刀快。翦得秋光入卷來。

又
水際柴門一扇開。白頭羸病亦堪哀。阿誰得似桄榔杖。肯爲閑人萬里來。

又
蒼顏莫怪少曾開。觸目人情但可哀。死去肯爲浮世戀。此身元自不應來。

晨起偶得五字戲題臺後

推枕悠然起。吾詩忽欲成。雖云無義語。猶異不平鳴。有得忌輕出。微瑕須細評。平生五字句。垂老媿長城。

野步

場圃農功畢。村鄰醉叟多。野風吹慘澹。海氣起嵯峨。婦女窺籬看。兒童拾穗歌。身閑不自樂。如此暮年何。

喜晴

一夜霜風掃積陰。檐間喚起有鳴禽。滿窗零亂梧桐影。鄰巷蕭條雞犬音。文史漸宜精討閱。湖山仍得飽登臨。園丁也解娛翁意。莢果移花已滿林。

自箴

帶寬非復昔年腰。頰上餘丹日日消。切勿更爲兒戲事。解猿放鶴各消搖。

自喜

身閑仙不遠。食足富何加。庭臥長生犢。園開手種花。狂歌聲跌宕。醉草筆橫斜。八十明年是。衰殘豈復嗟。

自詒

病中看周易。醉後讀離騷。不解書驢券。安能問馬曹。身隨遊宦困。氣爲屏居豪。清旦南堂坐。稽山秋更高。

又

莊語畏如伴。端居要若齋。清虛集心腑。枯槁見形骸。自計愚無用。何傷老不諧。人生須廣大。勿作井中蛙。

對酒示坐中

綠橙丹柿鬪時新。一笑聊誇老健身。大度乾坤容縱酒。多情風月伴垂綸。初生京洛逢時泰。幼度江淮避虜塵。八十年間窮不死。猶能澗底束荊薪。

秋晚衰疾稍平聊識喜懷

世事紛紛博局中。豈知造物貸衰翁。短筇倚壁知身健。小甑炊粳喜歲豐。霜近平郊多雁落。雨頻斷港有船通。更餘一事生詩興。烏柏新添數葉紅。

偶出至近村

神爽無酣寢。身閑有劇棋。說詩橫柳栗。賒酒挈鴟夷。寺古殘香冷。溪深獨木危。往來元信步。不是赴幽期。

書宛陵集後

突過元和作。巍然獨主盟。諸家義皆隨。此老話方行。趙璧連城價。墮珠照乘明。粗能窺梗槩。亦足慰平生。

鄉居

客問鄉居事。久居君自知。度橋徵士悔。過社旅人悲。社散家分肉。農閑衆築陂。牆東新洗竹。我亦補藩籬。

重九無菊有感

重陽未見一枝菊。它日菊開生我愁。高興亭中香滿把。令人北望憶梁州。高興亭在南鄉子城西。正對南山。

卷五十五

記東村父老言

原上一縷雲。水面數點雨。夾衣已覺冷。秋令遽如許。行行適東村。父老可共語。披衣出迎客。芋栗旋烹煮。自言家近郊。生不識官府。甚愛問孝書。請學公勿拒。我亦爲欣然。開卷發端緒。講說雖淺近。於子或有補。耕荒兩黃犢。庇身一茅宇。勉讀庶人章。淳風可還古。

試筆

用筆如用人。利鈍烏可常。必欲責其全。無乃廢所長。宣城與晉陵。聲價略相當。不知今何年。森然集龜堂。和墨若

鑿黑。搗紙如銀光。心手適調一。運此紫毫銳。前卻俱稱意。六驥馳康莊。聊復取一快。詎必師鍾張。

贖懷

曠懷何啻等沙鷗。外物相挺劇火牛。若信本心無一事。始知平地起閑愁。每逢達士惟長歎。欲棄浮生尙小留。今日微霜好風日。短筇且領鏡湖秋。

夢行小益道中

棧雲零亂默鈴聲。驛樹輪囷樺燭明。清夢不知身萬里。只言今夜宿葭萌。

又

樺柳林邊候吏迎。血塗草棘虎縱橫。分明身在朝天驛。惟欠嘉陵江水聲。

秋樹

秋風一夜吹橋樹。明日來看已非故。吳中九月霜尙薄。落葉半隨飛鳥去。老人心事感凋零。只欲逢秋醉不醒。范寬用意真難解。偏寫丹楓作畫屏。

雜感

鶴乘軒車已堪歎。狐載觸髅何可親。勸君一笑掃除盡。來作人間百歲人。

又

讒口安能作禍基。吾曹興廢豈無時。向來何事令公怒。問著渠儂自不知。

又

艱危寧度瘦驢嶺。奔走莫隨肥馬塵。困阨終身元自好。可憐癡子恨無津。瘦驢嶺在施黔間。前豈或有作驢瘦嶺。蓋誤也。

又

一尊易致蒲萄酒。萬里難逢鸚鵡樓。何日羣胡遺種盡。關河形勝得重遊。

又

老境睡多行立少。浮生會少別離多。安得此身重壯健。一盃朋舊共高歌。

又

苦熱惟憂不復涼。轉頭忽已見清霜。道人若悟無寒暑。墮指流金總道場。

柳橋秋夜

帝青萬里月輪孤。掃盡浮雲一點無。正是吾廬秋好夜。上橋渾不要人扶。

訪隱者不遇

秋高山色青如染。寒雨霏微時數點。蘭亭在眼久不到。每對湖山輒懷歎。雅聞其下有隱士。漠漠孤煙起松嶠。獨攜拄杖行造之。枳籬數曲柴門掩。笛聲尙近人已遯。日啖薄糜終不貶。何如小住共一尊。山藜野芋分猿噉。

蒼檜

北風捲野天晝晦。雨如弩鏃穿屋背。老夫下牀行躡屐。稚子抱書坐持盞。豈無長楸與巨竹。幹折枝摧共顛沛。孰能不動安如山。屹立庭前獨蒼檜。

農家歌

村東買牛犢。舍北作牛屋。飯牛三更起。夜寐不敢熟。茫茫陂水白。纖纖稻秧綠。二月鳴搏黍。三月號布穀。爲農但力作。瘠鹵變衍沃。腰鎌卷黃雲。踏碓春白玉。八月租稅畢。社瓮釀如粥。老稚相扶攜。閭里迭追逐。坐令百世後。復覩可封俗。君不見朱門玉食烹萬羊。不如農家小甑吳粳香。

君子非好異

君子非好異。本意亦從衆。居然迫所媿。難復趨一閭。孟軻遇齊王。夫豈不欲用。萬鍾養弟子。乃似以利動。惟其有辭受。百世尊道統。豈惟聖賢哉。學者固所共。

獨登東巖

早慕功名已絕癡。晚耽筆墨愈無奇。牧羝未乳身先老。化鶴重歸語更悲。朋舊在亡成斷夢。山河興廢入孤吹。悠然獨倚闌干笑。又過簪萸泛菊時。

灌園

八十身猶健。生涯學灌園。溪風吹短褐。村雨暗衡門。眼正魔軍怖。心安疾豎奔。午窗無一事。梨棗弄諸孫。

晨起

老尚貪書課。黎明卽下牀。不驚天乍冷。更覺意差強。蟾滴初添水。螭爐旋炷香。浮生又一日。開卷就窗光。

龜堂

莫笑龜堂老。殘年所得多。賦詩傳海岱。說法度天魔。天矯竹如意。鱗皴松養和。拈來示諸子。無事數相過。

蜀漢

蜀漢崎嶇外。江湖莽蒼中。冷官家世事。獨立古人風。已老學猶力。久窮詩未功。悠悠千載後。此意與誰同。

客有言太山者因思青城舊遊有作

我登青城山。雲雨顧在下。月色縞巖谷。欲睡不忍捨。明朝下半嶺。頗怪哀湍瀉。山麓雲未歸。平地泥沒踝。乃知宿處高。所恨到者寡。有客談泰山。昔嘗宿石室。夜分林采變。陽谷看浴日。九州皆片塵。盛夏猶慘栗。我聞思一往。安得飛仙術。但願齊魯平。東封扈清蹕。

遊近村

度塹穿林脚愈輕。憑高望遠眼猶明。霜凋老樹寒無色。風掠枯荷颯有聲。泥淺不侵雙草屨。身閑常對一茶枰。茆檐蔬飯歸來晚。已發城頭長短更。

疎雨

檐間秋雨時一滴。絕似漢嘉方響泉。不聽此聲三十載。夢回搔首一凄然。

秋曉

菅席多年敗見經。布衾木枕伴殘更。嚙嚙天際雁初度。喔喔舍傍雞亂鳴。貸米未回愁竈冷。讀書有課待窗明。一秋最恨空階雨。滴破羈懷是此聲。

癸亥初冬作

開歲忽八十。古來應更稀。我存人盡死。今是昨皆非。愛酒陶元亮。還鄉丁令威。目前尋故物。惟有釣魚磯。

兀坐久散步野舍

頌洞風號木。蕭條雨滴堦。忽思穿兩屐。聊用散孤懷。赤脚舂畚粟。平頭拾澗柴。先師有遺訓。萬事忌安排。胡翼之先生教徐節孝曰。莫安排。

法雲寺

不到法雲久。秋高初一來。廚供菰白美。池蘸水紅開。橋畔逢遊衲。雲邊數過桅。同遊恨歸早。珍重約尋梅。

小徑登東山繚行自西北至溪上是夕子聿置酒

行穿犖确度谿。小立風中客袖斜。衰草雙雙點飛蝶。長空一一送栖鴉。荻洲薄暮收魚網。茆舍初寒響緯車。誰道老人多感慨。未妨尊酒樂年華。

笑睡

老來胸次掃崢嶸。投枕神安氣亦平。漫道布衾如鐵冷。未妨鼻息自雷鳴。天高斗柄闌千曉。露下雞埕膈膊聲。俗念絕知無起處。夢爲孤鶴過青城。

逆旅

秋晚南山行。小蹇就店秣。我亦念少休。無奈市兒聒。嗟爾亦坐飢。錯銖苦爭奪。其心計亦厭。陷溺無自脫。我欲救其本。汝勿謂迂闊。要傾江海大。一洗錐刀末。人生願須幾。卒歲惟一褐。有地即可耕。何山不堪活。

東園

今日天霽霜。又見一日晴。晴寒病良已。扶杖東園行。瓦鼓息我倦。靜聽幽鳥鳴。花菓四十株。手自培養成。疎密無行列。東園蓋強名。人看不滿笑。聊用適我情。

雜感

買薪貸粟不曾知。一事無營盡日嬉。耄老卻如童稚日。早眠晏起食無時。

又

古言忍字似而非。獨有癡頑二字奇。此是龜室安樂法。大書銘座更何疑。

又

平生所聞宋華子。病忘乃與知道鄰。老夫歷盡世間事。始覺此公真可人。

羲皇一晝開百聖。學者卽今誰造微。文詞害道第一事。子能去之其庶幾。

渡頭

蒼檜丹楓古渡頭。小橋橫處繫孤舟。范寬只恐今猶在。寫出山陰一片秋。

小飯賞菊

菊得霜乃榮。性與凡草殊。我病得霜健。每卻稚子扶。豈與菊同性。故能老不枯。今朝喚父老。采菊陳酒壺。舉喪舞翩僂。擊缶歌烏烏。秋晚遇佳日。一愁詎可無。

與兒輩小集

老子秋來樂事稠。吳杭新擣酒新篘。矮黃不待園官送。小白每煩溪女留。頓飽可憐頻夢與。半酣自喜有兒酬。不如意事何窮已。且放團欒一笑休。

舍北晚眺

平野沉寒日。遠村生暮煙。離離立紅樹。點點散烏犍。暫出不逾歲。告歸仍一廛。江湖初見雁。著眼送雲邊。

書室獨處欣然有詠

鑿空學道本無師。歇盡狂心頗自奇。閑坐始知冬日永。高談未覺老年衰。治棺準備膏肓日。釀酒枝梧雨雪時。常笑祖龍癡到底。一生辛苦覓安期。

冬初至法雲

曉日曛曛露未乾。東中十月始微寒。牛閑處處農功畢。米賤家家酒盞寬。煙浦白鷗迎鼓柁。漁村紅樹入憑闌。歸舟莫恨無人語。手把陶詩側臥看。

感憤

形勝峭嶺在。英豪趙魏多。精兵連六郡。要地控三河。慷慨鴻門會。悲傷易水歌。幾人懷此志。送老一漁蓑。

記老農語

霜清楓葉照溪赤。風起寒鴉半天黑。魚陂車水人竭作。麥壠翻泥牛盡力。碓舂玉粒恰輪租。籃挈黃雞還作貸。歸來糠粃常不饜。終歲辛勤亦何得。雖然君恩烏可忘。爲農力耕自其職。百錢布被可過冬。但願時清無盜賊。

村舍

剝啄敲村舍。丫又揖主人。新牆圻龜兆。疎瓦斷魚鱗。紅粒炊畚粟。青煙鬱澗薪。得牀思熟睡。寒犬苦狺狺。

自述

偶策青驢出。還將白鶴隨。鍊丹留日觀。采藥上天池。送客清秋棹。留僧靜夜棋。從來閑姓字。不遣世人知。

泊舟湖橋酒樓下

縹緲雲邊罨畫樓。空濛雨外木蘭舟。誰知老子清狂甚。獨占城南十里秋。

菴中雜書

蒲龕坐久暖如春。紙被無聲白似雲。除卻放生并施藥。更無一事累天君。

又

謀生安用苦區區。豆飯藜羹未遽無。若使天年猶合活。不妨自有穀於菟。

又

萬物竝作吾觀復。衆人皆醉我獨醒。走徧世間無著處。閉門鋤菜伴園丁。

又

茅茨一室有餘樂。鞦環四海誰知心。較耕壠上鴻鵠志。長嘯山中鸞鳳音。

連日暴下。藹然不支。戲作

老子心如行脚僧。秋風久已辦行藤。紙衾夜夜江湖夢。小復遲留待判懲。

大風

風大連三夕。衰翁不出門。兒言卷茅屋。奴報徹蘆藩。狼籍鴉擠壑。縱橫葉滿園。乘除有今日。紅日上東軒。

野興

掃盡紅塵閉是非。舍傍好在舊苔磯。壺中春色松肪酒。江上秋風柵葉衣。一片共知雲偶出。千年誰識鶴重歸。勿言野外無供給。雪後連山藥草肥。

又

樓蘭勛業竟悠悠。聊作人間汗漫遊。半谷雲霞丹竈熟。一天雷雨劍池秋。徜徉藥市經旬醉。問訊巢仙數夕留。卻過故廬應一歎。岸邊猶繫采菱舟。

若耶村老人

昔聞若耶村。意象乃物外。皤然阡陌間。來往幾鮒背。無論百歲翁。甲子數至再。我來親見之。殊未輟耕耒。曩事一言。多聞雜諄誨。回頭指丁壯。此是曾玄輩。有翁又過我。家有孫五代。指呼取斗酒。山果雜細碎。顧我使之年。慙縮不能對。恭惟大父行。不覺投杖拜。養生惟一齋。此在吾術內。翁能信踐之。成就乃爾大。我今纔毫及。耳目已憤憤。長庚雖餘輝。敢與明月配。

霜曉

霜有連薔白。林無一葉青。紙衾圍栗烈。風響送東丁。酒盡尊餘滴。灰深火撥星。蓬窗了無事。默坐養黃庭。

山澤

我本山澤人。散誕傲簪裳。宦遊五十年。天遣還農桑。東阡南陌間。吾亦愛吾鄉。楚祠坐秋社。隋寺觀夜場。醉迷采蒼耳。旅飯炊黃粱。自疑太古民。百年樂未央。有時閑暇時。頗復誦老莊。亦嘗遊岷峨。略聞度世方。氣爲東道主。安客自長。卻後五百年。見我瀾城旁。

遠遊

姓字不須通。從來號放翁。月明登暑雪。木落過秋風。成都武擔山。暑雪堂。歸州巴東縣。江上秋風亭。皆絕景。處處

題僧壁。時時臥釣篷。始知侯萬里。未必是英雄。

北窗

破屋頽垣嘯且歌。一窗隨處寄婆娑。閨人每歎同儕少。遇事方知去日多。雲溼沙洲秋下雁。雨來荻浦夜鳴鼃。何時更續扁舟興。剩載郇筒醉綠蘿。綠蘿溪在夷陵。

醉題

目光炯炯射車牛。何至隨人作浪愁。身處江湖如富貴。心親魚鳥等朋儔。孤帆滅沒三湘曉。野店荒寒二華秋。醉墨不容塵土汗。憑君試訪寺家樓。

幽居

練褐藤冠物外裝。下簾留住欲殘香。瀟湘客過誇漁具。鸞峴僧來說藥方。詩未遽衰猶跌宕。書雖小退亦軒昂。不緣厭靜尋幽事。老去無如白日長。

連陰欲雪排悶

先生經旬甑坐塵。藜羹不污白氎巾。魯連敢謂天下士。摩詰要是山中人。王維自稱山中人。溪從灘瘦愈刻厲。山自木落增嶙峋。雲重惟愁雪欲作。梅花忽報一枝春。

示子聿

古學尊皇極。淫辭斥異端。人才如爾少。老健及吾難。身退桑榆暖。家貧菽水歡。人生粗足耳。衣食不須寬。

項里溪上見珍禽。曰溪鵲相隨數十步不去。涉溪來過東溪老。斷枝槁葉紛如掃。忽逢溪鵲昔未識。言語惺惺羽毛好。異哉馴狎若可呼。迹雖甚疎情有餘。上穿蒼煙立高樹。下踏白石窺遊魚。老夫日日溪頭行。見此不妨雙眼明。定交物外從今始。豈獨沙鷗可與盟。

冬夜對書卷有感

人生如夢終當覺。世事非天孰可憑。萬卷雖多當具眼。一言惟恕可銘膺。所聞要足敵憂患。吾道豈其無廢興。白髮蕭蕭年八十。依然父子短檠燈。

項王祠

項里溪水聲潺湲。溪上青山峨鬢鬢。煙村人語墟市合。石橋日落漁樵還。堂上君王凜八尺。大冠如箕熊豹顏。築祠不知始何代。典祀千載誰敢刪。肅清亭障息剽奪。掃蕩螟蟊囚神奸。范增玉斗久已碎。虞姬粧面留餘潸。小人平生仰遺烈。近廟欲結茅三間。時時長歌拔山曲。醉倒聊慰窮途艱。

入城

宿凍迷車轍。晨霜縞瓦溝。路長休小驛。風勁透重裘。貿貿殘軀健。芒芒去日遒。親交喜握手。隨處小遲留。

出城

病鶴寒彌瘦。孤松老不枯。非關畏軒冕。本自樂江湖。古錦添詩句。羸驂入畫圖。兒孫候門久。喚取倒殘壺。

不入城半年矣作短歌遣興

我居城西南。渺渺水雲鄉。舟車皆十里。來往道豈長。今夏我來時。天風吹荷香。再來已孟冬。慘然天鬣霜。市南兩株柳。葉盡萌已黃。乃知多事人。歲晚虛悲傷。名藍墮劫火。鞠爲瓦礫場。河橋比一新。華表照康莊。成壞莽相尋。推理海茫茫。疾豎造物兒。吾手扼其吭。砥柱天下險。一葦乃可杭。養氣倘能全。斯言豈荒唐。

先大父以元祐乙亥寓居妙明僧舍後百餘年當嘉泰癸亥游復假榻一夕感歎成詠

楚公仙去幾秋風。巷陌蕭條舊隱空。遺老卽今無處覓。斷香殘照淚痕中。

志學

聖門志學豈容差。山立方當斥百家。早忝授經聞博約。晚羞同俗陷浮華。風勢槁面寒無褐。雷轉飢腸飯有沙。漫道衰慵貪睡笑。五更和夢聽城笳。

晚行舍北

逆旅將歸客。扶衰取次行。霜濃木葉盡。水落岸痕生。鳧雁浮寒浦。牛羊滿晚晴。東村隔煙寺。杳杳送鐘聲。

幽居述事

曾會蘭亭醉墮簪。後身依舊住山陰。琴傳數世漆文斷。鶴養多年丹頂深。滌硯灘頭無漬墨。吹簫月下有遺音。小

詩戲述幽居事。後有高人識此心。

又

頽然掩戶不妨奇。又賦幽居第二詩。大藥鼎成令虎守。精思牀穩用龜擗。壺中自喜乾坤別。局上元知日月遲。更就羣童閑鬪草。人間何處不兒嬉。

又

落葉平溝日滿廊。幽居又賦第三章。喜無俗事干靈府。恨不終年住醉鄉。上樹榜船雖老健。疏泉移竹亦窮忙。山僧欲去還留話。更盡西齋一炷香。

又

舴艋東歸喜遂初。頻拈枯筆賦幽居。細燒栢子供清坐。明點松肪讀道書。蒼爪嫩芽開露茗。紅根小把瀹煙蔬。年來自許機心盡。頗怪飛鷗自作疎。

十一月五夜風雪寒甚燃薪取煖戲作五字

束薪從澗底。及此不時求。力比鵝黃酒。功如狐白裘。分才具糜粥。餘事煖衾綈。復恐成驕惰。三更起飯牛。

魯墟先太傅舊宅

魯墟無復壞垣存。偶榜舟來入亂雲。杜曲桑麻猶鬱鬱。桃源雞犬亦欣欣。青圍舊豎千峯立。綠引官河一脈分。我卜數椽差不遠。得歸何以報吾君。

曉雪

邊湖誰琢玉爲屏。換卻南堂萬疊青。老子醉狂還自笑。持竿畫字滿中庭。

又

觀雪剡溪天下勝。題詩常恨不能奇。未應便許凝之語。此興何曾有盡時。

養生

西遊曾受養生書。晚愛煙波結草廬。兩背神光穿夜戶。一頭胎髮入晨梳。邀雲作伴遠忘返。與鶴分窠寬有餘。占

盡世間閑事業。任渠千載笑迂疎。

夜讀鞏仲至閩中詩有懷其人

詩思尋常有。偏於客路新。能追無盡景。始見不凡人。細讀公奇作。都忘我病身。蘭亭盡名士。逸少獨清真。

獨意

酒似交情薄。愁隨夜漏長。常貧且撐拄。多病不禁當。偶讀書終卷。閑臨帖數行。翻憐市朝客。擾擾爲誰忙。

十一月十三日夜作

風雪正相乘。蕭然一點燈。擁爐蒙衲被。就壁倚枯藤。火降神方王。河潮腦自凝。鄰雞太多事。三唱請晨興。

故人趙昌甫久不相聞寄三詩皆傑作也輒以長句奉酬

海內文章有阿昌。數能著句寄龜堂。就令覲面成三倒。未若冥心付兩忘。道義極知當負荷。風波那得易禁當。相
思命駕應無日。且約陶然寓醉鄉。

夢中賦早行

夜分秉炬治裝。千里霜風入馬蹄。擁褐卻尋孤驛夢。垂鞭時聽近村雞。荒煙漫漫沉殘月。宿莽離離上古隄。天
色漸分寒更力。道傍沽酒坼官泥。

兀兀

兀兀初何有。僂僂不自知。偶然登毫及。便欲數期頤。把釣秋風夕。騎驢晚雪時。江湖遊已徧。更作灞城期。

哺猿

有書常嬾讀。有酒常嬾醉。惟有默坐佳。又以睡爲祟。不如捨之起。扶杖來東園。摘此幽澗菓。哺我高枝猿。食菓飲
清泉。猿計亦何闕。但恐夜霜時。腸斷巴山月。

與子坦子聿元敏犯寒至東園尋梅

北風吹人身欲僵。老翁畏冷晝閉房。梅花忽報消息動。意氣山立非復常。二兒一孫奉此老。瘦藤天矯凌風霜。幽
禽白頰忽滿樹。似與我輩爭翱翔。溝絕無聲凍地裂。耿耿寒日青無光。歸來相視不得語。小榼一寫鵝兒黃。

示諸孫

蝸舍鶉衣老可哀。衰顏時爲汝曹開。朱門莫羨煮羊脚。糲食且安羹芋魁。家塾讀書須十紙。山園上樹莫千回。但令學業無中絕。秀出安知有後來。

題齋壁

皞皞太平民。堂堂大耋身。乾坤一旅舍。日月兩車輪。養貴超三品。蔬甘敵八珍。明年真耄矣。爛醉海山春。

又

力穡輸公上。藏書教子孫。追遊屏裘馬。宴集止雞豚。寒士邀同學。單門與讖婚。定知千載後。猶以陸名村。

雜言示子聿

福莫大於不材之木。禍莫慘於自躍之金。鶴生於野兮。何有於軒。桐爨則已兮。豈慕爲琴。古今共戒玉自獻。卷舒要似雲無心。廬室但取蔽風雨。衣食過足豈所欽。我今餘年忽八十。歸耕幸得安山林。逢人雖歎種種髮。入塾尙憶青青衿。吾兒殆可守孤學。相與竭力窮幽深。

夜坐聞大風

天曠穹廬覆。風豪野戰酣。詩成飛醉墨。棋罷縱高談。奇怪空堪笑。低摧亦未甘。東浮雲海去。會載酒千甔。

歸老

歸老何妨駕鹿車。平生風雪慣騎驢。鬢毛白盡猶耽酒。目力衰來轉愛書。止足極知于道近。癡頑更喜與人疎。著身莫怪無閑處。地肺天台儘有餘。

懷舊

扇子峽中有隱士。清江一曲照柴荆。當時船急失一見。至今空憶暮猿聲。

又

青城之西谿谷深。道翁巢居獨鼓琴。一盃松麩留我宿。夜半虎嘯風生林。

又

剡溪百里徹底清。石闌干裏真人行。大丹一粒擲溪水。禽魚草木皆長生。

卷五十六

道室雜詠

烏化雙鳧杖化龍。雲山回首不知重。藥園夜嘯丹臺月。酒市秋聽紫閣鐘。豈但煙霄隨步武。故應冰雪換形容。小童開戶驚奇事。野鶴來巢砌下松。

又

莫怪先生閱事多。人間何處不經過。天山八月霜枯草。場谷三更日浴波。酒熟春風歸掌握。丹成神物共誰何。散人本帶江湖號。四百年來一釣蓑。

又

身是秋風一斷蓬。何曾住處限西東。棋枰窗下時聞電。丹竈巖間夜吐虹。采藥不辭千里去。釣魚曾破十年功。白頭始悟頭生妙。盡在黃庭兩卷中。

偶與客飲客去戲作

多泥窮巷破茆屋。人不堪憂心自足。有時負日向門前。手把南華日中讀。若教開門與客游。擾擾依前懷百憂。平生自計亦已熟。惟有釣魚湖水頭。舊聞仲長子光可與友。瘖不能言但耽酒。安得此友常過門。一語不交傾數斗。

故里

故里淳風比結繩。歸耕況遇歲豐登。已侵鐘漏行安往。略有園廬退可憑。萬事寧容媿天地。一心常若蹈淵冰。區區僻見君無怪。人固終身有不能。

齟齬

人生天地間。本非金石堅。沉復歷歲久。蠹壞無復全。齟齬雖小疾。頗解妨食眠。昨暮作尤劇。頰輔相鉤聯。欲起嬾衣裳。欲睡目瞭然。恨不棄殘骸。蛻去如蛇蟬。或嘗學金丹。揮手凌雲煙。逢師定悠悠。丹成在何年。

冬夜

悠悠孤夢伴餘醒。窗下寒燈黠闇明。雪意欲成風正惡。漁舟忽過雁羣鳴。志衰但有徂年感。身沒應無後世名。猶幸耄期身粗健。天公元不負書生。

枕上

鐘鼎初何有。山林亦足雄。行思絕大幕。歸但醉新豐。雁過荒寒外。燈殘寂寞中。蒼顏無鏡對。那覺是衰翁。

寒暑

寒暑侵陵日夜衰。坐令齒髮不支持。愛憎徇物去忘反。神氣養形誰復知。布帔九條晨入靜。柏牀五尺夜精思。舊交勿恨江湖別。雲海神山會有期。

長溪東山容老索月谷幽賞詩

人間底處無明月。只要青山爲發揮。林裏枝寒無鶻立。水邊路白有僧歸。

右月谷

清泉白石君家物。美竹名花可旋移。幽賞定知隨處勝。更須時展放翁詩。

右幽賞

梅

若耶溪頭春意慳。梅花獨秀愁空山。逢時決非桃李輩。得道自保冰雪顏。僊去要令天下惜。折來聊伴放翁閑。人中商略誰堪比。千載夷齊伯仲間。

歲晚幽興

梅出疎籬柳拂池。流年已迫早春時。壯心卓犖猶欺酒。老業呻吟未廢詩。眼暗觀書如棘澀。齒疎嚼飯似牛呵。風爐欲試蒼鷹爪。自向林間拾墮枝。

又

殘年欲遂迫期頤。追數朋儔死已遲。卜塚治棺輸我快。染鬚種齒笑人癡。近聞有醫以補種整齒爲業者。野梅墮

地草生後。街柳拂鞍冰泮時。滿眼雲山不須買。剩傾新釀賦新詩。

又

萬里風波行路難。君恩尙許綴祠官。中庭鬱鬱藥苗長。絕壁颼颼松吹寒。泥巷有人尋杜甫。雪廬無吏問袁安。清晨對鏡增幽致。龜屋新裁二寸冠。

又

短鬢元知不久青。況開九帙數餘齡。全家共保一忍字。累世相傳三住銘。時泛孤舟過梅市。卻穿雙屨上蘭亭。擁爐莫恨無僧在。滿院松風要細聽。先太傅親受三住銘于施肩吾先生。授辦曰。俾其累世相傳。毋忽。因卽以傳事虞諸子。

寄題胡基仲故居

憶昔公來一束書。蕭然不復畜僮奴。浮雲每歎成蒼狗。空谷誰能繫白駒。才氣沙塵埋巨闕。文章林壑吼於菟。旅墳三尺雲門寺。又見離離長綠蕪。

雪夜

雪聲如飛沙。風聲如翻濤。三更天地闇。雪急風愈豪。頗疑虛空中。鬼神戰方鏖。勝負要一決。利兵未肯囊。我如墮重圍。百計無由逃。僵縮不能寐。起坐擁故袍。自歎老益貧。庭草常不薶。惟酒不憚費。貨券如山高。園蔬甘且柔。味不減豚羔。醉此風雪夕。聊慰抱瓮勞。

聽雪爲客置茶果

病齒已兩旬。日夜事醫藥。對食不能舉。況復議盃酌。平生外形骸。常恐墮貪著。時時鄰曲來。尙不廢笑謔。青燈耿窗戶。設茗聽雪落。不釘粟與梨。猶能烹鴨脚。

獨夜

燈花寒自結。雪片夜方深。瘦影參危坐。清愁入苦吟。江湖身汗漫。藥石病侵尋。朋舊凋零盡。何人識此心。

寄題王才臣山居

王子自少無他娛。求佳山林結草廬。頭童齒豁已衰矣。衣弊屨空常晏如。出遊恥懷襦衡刺。歸臥盡讀倚相書。他日叩門傾白墮。要看著句到黃初。

夜賦

練色亭臯月。江聲木杪風。開書燈煜煜。傳漏鼓鼕鼕。流落諸生老。呻吟四壁空。生涯君勿笑。談話有兒同。

雪後

雪後晴初快。春前日漸長。菊根萌已動。梅藟意先香。禽語驚幽枕。冰消漲野塘。衰殘難出戶。不是懶衣裳。

又

冰開地沮洳。雲破日曛曛。鴻入青冥際。草生殘燒中。方欣畢公稅。已復始農功。稻壠牛行處。泥翻夕照紅。

寒夜讀書

老去無他嗜。書中獨有欣。月窗雞喔喔。霜野犬狺狺。雖歎吾何適。猶尊昔所聞。從今倘未死。一日亦當勤。

對食戲作

霜餘蔬甲滂中甜。春近靈苗嫩不莖。采掇歸來便堪煮。半銖鹽酪不須添。

又

白鹽赤米了朝餽。拗項何妨煮瓠壺。一種是貧吾尙可。鄰家稗飯亦常無。

又

春前臘後物華催。時伴兒曹把酒盃。蒸餅猶能十字裂。餛飩那得五般來。

又

枱欄子嫩供香飯。卓筴芽新簇冷淘。常使先生飽捫腹。其餘萬事一秋毫。

又

冰壺欲著先生傳。髯鬚卑凡豈得書。常恨當年定交晚。枉教渴死老相如。

又

黃昏來扣野人扉。笑語欣欣意不遲。葑火正紅煨芋笑。不妨秉炬雪中歸。

甲子立春前二日作

頭風初愈喜身輕。書卷時開覺眼明。養熟犬雞隨地起。性靈烏鵲報陰晴。韭菘釘鉅春盤好。芝朮和臘藥成。自笑衰殘殺風景。燈時不擬入重城。

家居自戒

囊得京口俸。始卜湖邊居。屋財十許間。歲久亦倍初。莢花過百本。嘯詠已有餘。猶媿先楚公。終身無屋廬。

又

平居少愧怍。動以直自遂。雖墮虎兕羣。我已無死地。神仙果可學。道藏有神仙可學論。吾輩恐差易。勿言聞道晚。努力補黥劓。

又

世人無奈愁。沃以盃中酒。未能平磊塊。已復生堆阜。治水不治源。九載亦何有。不如讀周易。一卷常在手。

又

疾病當治本。神醫古難遭。哀哉有限身。日與利慾盛。大嚼徒爲貪。劇飲豈足豪。淡薄以養壽。亦非慕名高。

又

饑寒陷侵暴。其實可憐傷。一事百自反。忍心冷如霜。恕物學者心。省事處亦長。吾過固多矣。責彼何暇詳。

又

霜嚴雞報晨。月落犬警盜。遺粒與棄糠。每媿不足報。椎奴事樵汲。跣婢勤爨竈。有過姑教之。箠楚置勿道。

感貧

經歲無兼味。窮冬止破裘。翁將貧博健。兒以學忘憂。士固安天命。吾寧爲食謀。八荒如可望。時亦上高樓。

鄰曲

濁酒聚鄰曲。偶來非宿期。拭盤堆連展。催人以名麥餌。洗脯煮黎祁。蜀人以名豆腐。烏牯將新犢。青桑長嫩枝。豐

年多樂事。相勸且伸眉。

送客

有客相與飲。酒盡惟清言。坐久饑腸鳴。殷如車輪翻。烹粟煨芋魁。味美敵熊蹯。一飽失百憂。抵掌談羲軒。意倦客辭去。秉炬送柴門。林間鳥驚起。落月傾金盆。

夜寒起坐待旦

凜凜不成寐。攬衣寒夜中。青熒煨芋火。鞞鞞鼓簾風。巷犬聲如豹。見王維與裴迪書。山童首似蓬。悠然束書坐。徐待日生東。

信手翻古人詩隨所得次韻

病起瘦可驚。峻嶒夜窗影。八十遂當至。何止踐衰境。食簞幸能盡。藥裹亦已屏。汲泉煮日鑄。舌本味方永。士苦不自晦。常若錐見穎。叔度獨何人。長陂渺千頃。

右夜坐

孔門春服成。弟子從沂浴。老氏坐中庭。莊生記新沐。古聖自潔清。如日浴場谷。豈比流俗人。蟻蝨生桎梏。老人喜時節。良夕當爆竹。未濯三生垢。湯沐意亦足。豈惟寓蕭散。亦以洗榮辱。悠然獨酌罷。投枕睡已熟。

右除夜沐浴

甲子歲元日

飲罷屠蘇酒。真爲八十翁。本憂緣直死。卻喜坐詩窮。米賤知無盜。雲霞又主豐。一簞那復慮。嬉笑伴兒童。開歲微陰不用。法嘗有年。

初春書懷

六十餘年慕古人。卽今方近葛天民。見人各是元非恕。遇事皆安豈怨貧。小圃鉏耰聊過日。扁舟煙雨尙關身。出門未覺龍鍾在。禹廟蘭亭又見春。

又

毫及光陰古更稀。自今惟有數期頤。食觀本草雖多事，醉讀離騷自一奇。物外有人閑始見，山中可樂老方知。武陵好在桃千樹，短檝相尋亦未遲。

又

數掩蘆藩並水居。一家全似業樵漁。春寒例謝常來客，老病猶貪未見書。馴雀正緣拋食慣，芳蘭肯爲礙門鋤。藥苗滿鉢無人共，賴有溪僧爲破除。

又

甫及初春日已長。偶同鄰曲集山房。囊盛古墨靴紋皺，箸護新茶帶胯方。老境不嫌來冉冉，流年直怨去堂堂。清泉冷浸疎梅蕊，共領人間第一香。

又

底處人間無駭機。迢遙且喜謝招麾。千年澗底孤松秀，萬里天邊獨雁歸。服氣昔常憎火食，遊山近已製荷衣。青城況有幽人約，會守丹爐隱翠微。

又

納祿貧如筮仕初。歸來依舊臥蝸廬。半池墨澗臨章草，一盃松肪讀隱書。長鏡僅供饑子笑，清江不療渴相如。耄期自許詩情在，雪裏猶能跨蹇驢。

又

愚公不解計安危。行盡人間惡路岐。難似車登蛇退嶺，險如舟過馬當祠。平生憂患常難測，送老安閑敢自期。一事不成應有命，惟將知止報明時。

初春紀事

窗櫺無日影。庭樹無風聲。微雲淡天宇，非陰亦非晴。美哉豐年祥，入我屠蘇觥。父老亦共喜，驩言叩柴荆。一飽已有期，惟當力春耕。遺兒牧雞豚，作社賽西成。

又

經冬少雨雪。所至苦水涸。園蔬葉多蠹。山步船半閣。入春一再雨。喜氣滿墟落。又聞湖邊路。已破小桃萼。一尊儻可攜。父子自鬻酢。

送子虞吳門之行

相送何由插羽翰。淡煙微雨暗江干。孤懷最怯新春別。病骨難禁昨夜寒。尊酒汝寧嫌魯薄。釜羹翁自絮吳酸。此詩字字俱愁絕。忍淚成篇卻怕看。

法雲僧房

八十衰翁有底忙。水邊山際亦佺佺。清溪橋斷舟橫岸。小塢梅殘雨漬香。數點青燈經野市。一爐軟火宿僧房。自嫌尙有人間念。卻爲春寒怯夜長。

陌上

陌上長歌任笑狂。此生得喪略相當。天將毫齒償貧悴。身坐虛名撥謗傷。溪水漸生朱舫活。野梅半落綠苔香。新晴快上蘭亭路。莫待春殘始一觴。

獨立

白髯蕭颯一愚公。獨立濛濛細雨中。竿踏寒蔬新少夢。魚生空釜久諳窮。殘編幸有聖賢對。閑話豈無鄰曲同。銜鬻才名非老事。小詩信筆不能工。

春陰

數間茅屋傍楓林。常負平生萬里心。老去逐年增老病。春來無日不春陰。麴塵蘸岸波初漲。猩血團枝色已深。欲到東園還嬾起。卻和殘睡聽鳴禽。

閑味

身似枯禪謝世塵。豈容收斂強冠巾。庾郎三韭不妨飽。晏子一裘何恨貧。栖冷每憐雞唱早。雲開初見月痕新。閑中有味君知否。熊掌馳峯未足珍。

聞虜亂代華山隱者作

滿谷松風枕石眠。中原戰血又成川。但思秦鑄銅人日。不記齊成柏棧年。大藥一爐燉晚日。孤桐三尺寫秋泉。何妨狂舞旗亭下。乞與人間畫醉仙。

春日

車馬閑中絕。衣襦病後寬。政詩消畫永。賒酒敵春寒。柳細搖難似。花新染未乾。歸鴻與來燕。各自管悲歡。

寄子虞

十里城南路。蕭然一秃翁。舊書衰易忘。新句嬾難工。山色春寒淡。溪流宿雨通。街頭有良醞。思汝一尊同。

送子坦

老境寧容別。諸兒任爲貧。一春多臥病。幾度送行人。五斗方須祿。千金且愛身。長安雖可樂。憐汝正思親。

送子適初欲赴春銓以兄弟皆出故轍行

隔一灤江路豈遙。躊躇不覺欲魂銷。寄書勿遣過三日。發渡何曾無兩潮。睡少不關茶作祟。愁多卻賴酒時澆。柯橋西畔斜陽岸。誰爲離人惜柳條。

醉眠初起書事

身世元知似斷蓬。流年分付酒盃中。饑寒未解士先老。風雨欲收花已空。泥補舊窠梁燕喜。水生支港釣船通。睡魔正費驅除力。隔竹敲茶賴小童。

見蜂采檜花偶作

來禽海棠相續開。輕狂蚊蝶去還來。山蜂卻是有風味。偏采檜花供蜜材。

對酒戲詠

不管詩人太瘦生。但念酒徒稀醉眠。憑誰爲畫畢吏部。縛著鄰家春瓮邊。

又

長安市中多美酒。一斗財當三百錢。堪笑書生消幾許。有錢十萬醉經年。

夜興

鼻呼作人聲。月出如野燒。推枕中夜起。殘燈尙餘照。難從公榮飲。獨效孫登嘯。八十推不僵。平昔豈所料。空廊病馬臥。枯草老牛噓。明朝語俗人。與汝不同調。

老甚自詠

殘年真欲數期頤。一事無營飽卽嬉。身入兒童鬪草社。心如太古結繩時。騰騰不許諸人會。兀兀從嘲老子癡。亦莫城中買鹽酪。菜羹有味淡方知。

又

叟生常笑古人癡。俛仰那知迫耄期。鏡裏鬢無添白處。尊前顏有暫丹時。客嗔終歲常稱疾。兒訝經旬嬾賦詩。枉卻愁過強健日。身閑何往不熙熙。

夜過魯墟

晡時發柯橋。申夜過魯墟。燈出籬落間。七世有故廬。門低不容駟。壁壞亡遺書。高樹宿羈鳥。廢沼跳驚魚。移船過古埭。水面涵星疎。安得病良已。畢世澆春蔬。

園中小飲

造物佚我老。畀以江湖寬。俯仰六年間。得請兩挂冠。鬢毛雖蕭颯。脚力未蹶跚。記書過十張。噉飯空一簞。開歲忽兩月。感此春事殘。杏靨笑牆頭。鶯聲入雲端。掃地設菅席。相與勸加餐。村酒瀉濁清。野果嘗甘酸。鄰里語蟬聯。兒孫話團欒。雖無萬錢筓。浩歌有餘歡。

幽居春晚

雲歸禹穴賞新晴。酒買蘭亭散宿醒。竹帶鞭移俄盛出。鶴全窠買已長鳴。故山雖媿收身晚。外物元如脫髮輕。只恐村鄰成閭閻。杖藜隨處叩柴荆。

又

老廢讎書病廢詩。晝閑惟與睡相宜。未尋內史流觴地。又近龐公上塚時。花發遊蜂喧院落。筍長馴鹿入藩籬。石帆山下春如許。野老來招不用辭。

梅花過後遊西山諸菴

乞得身歸喜滿顏。柴門雖設不曾關。無如梅作經年別。且就僧分半日閑。樵斧曉穿雲外去。釣船夜向月中還。君看老子無窮樂。一笑知非造物慳。

梅僊塢花溼觀桃李

妖妍天遣占年華。歎息人間有許花。十里織成無罅錦。半天留得未殘霞。欲題直恐無才稱。不見何由信客誇。醉後又驚春事晚。湖隄煙柳已藏鴉。

家園賞花

白首扁舟返舊邦。逢春直欲倒千缸。紅雲夾路薔薇障。翠羽成層薜荔幢。鶯語枝頭常盡日。蝶迷葉底不成雙。閑人爛醉尋常事。中聖先判臥北窗。

聞金谿陸伯政下世

久矣望來使。潸然開計書。兩家通絕譜。千里泣靈車。亦悟古皆死。所悲天祝余。泉扃生氣在。故不羨曹蜍。

一春風雨太半有感

忽忽春將老。寒暄尙未齊。雨昏雞唱晚。風惡鵲巢低。寫物才殊退。尋芳思欲迷。餘年不須較。只是死秦稽。

山行贈野叟

垂白衰翁住道邊。突間猶喜續炊煙。壁如龜筮難占卜。瓦似魚鱗不接連。幼學及時兒識字。官租先衆吏無權。與君俱長宜和日。握手相看一悵然。

又

莫笑孤村生理微。茅茨煙火自相依。客來旋掃青苔榻。日在先關白版扉。婦女憂蠶租葉去。兒童耘麥荷鉏歸。散人世襲江湖號。剩欲溪頭借釣磯。

雲門道中

川鷲林霏翠欲浮。散人心事寄沙鷗。暮投野店孤煙起。曉涉清溪小艇愁。嶺路窮時縈細棧。山形缺處起重樓。釣

游陳迹。渾如昨。一念悽然不自由。

讀書有感

洙泗諸生尊所聞。豈容兀者亦中分。從經競欲愚黔首。亡史誰能及闕文。吾道固應千古在。幾人虛用一生勤。世間倚相何曾乏。會與明時誦典墳。

六言雜興

世界菴摩勒果。聖賢優鉢曇華。但解折衷六藝。何須和會三家。

又

夢裏明明周孔。胸中歷歷唐虞。欲盡致君事業。先求養氣工夫。

又

語道無如孔孟。佛莊雖似非同。倘有一人領會。何須客滿坐中。

又

失馬詎知非福。亡羊不妨補牢。病裏正須周易。醉中卻要離騷。

又

舉足加劉公腹。引手捋孫郎鬚。士氣日趨委靡。賴有二君掃除。

又

廣平作梅花賦。少陵無海棠詩。正自一時偶爾。俗人平地生疑。

又

瘦馬羸僮道路。清泉白石山林。常得有衣換酒。不愁無法燒金。

又

一夜雨來可怖。五更雲散無餘。傳舍僧窗雖異。不妨隨處觀書。

又

熟讀大小止觀精思內外黃庭。直使超然有得。豈若淵源六經。

春晚出遊

風急名花紛絳雪。土鬆香草出瑤簪。且呼野艇西村去。未必微雲便作陰。

又

王孫草生與階齊。女郎花發乳鸞啼。街頭賣酒處處賤。信脚覓醉無東西。

又

柳暗人家水滿陂。放翁隨處曳筇枝。村深麥秀蠶眠後。日暖鳩鳴鵲乳時。

又

禹吾無間聖所歎。治水殆與天同功。三千年事一炊頃。窈石嵯峨煙靄中。

又

岌岌高丘近道邊。寂寥翁仲臥荒煙。生前意氣今何在。寒食無人挂紙錢。

又

鳴機裂素製春衣。煮酒香清雁鶩肥。倒社相呼共行樂。三搗鼓近是船歸。

卷五十七

北窗

老人日夜衰。臥起常在背。窗間一編書。終日聖賢對。東臯客輸米。粲粲珠出碓。南山僧餉茶。細細雪落磴。吾兒亦解事。稀甲自鉏菜。一饑既退舍。百念皆卷旆。閑身去俗遠。澄念與道會。宿痾走二豎。美睡造三昧。挂冠反布韋。上印謝銀艾。庭中石蒼然。此客真度外。

幽居雜題

開歲頻風雨。清明氣始和。遊山書半廢。耽酒睡常多。客去孫登獻。牛疲甯戚歌。餘生猶有幾。盡底付漁蓑。

又
雅意元知止。遄歸喜遂初。久閑棋格長。多病釣徒疎。續藥三升酒。支頭一束書。兒曹看翁嬾。切勿厭蝸廬。

又
忽忽年光逝。悠悠世事非。曉猶明續火。晝永啓漁扉。施食禽魚熟。疏溝杞菊肥。寂寥何所歎。父子自相依。

又
獨往成初志。安居謝世紛。名書硬黃紙。古硯膩焦紋。兩作占琴薦。風來散露羣。豈無朝市事。塞耳未曾聞。

題旅舍壁

泥淖停牛屋。風埃坐簀牀。絳人難諱老。楚客自嫌狂。浪迹江湖大。回頭日月長。村村有餅餌。正可不賣糧。

又
地曠風號木。天高日脫雲。村名步頭換。縣界驛前分。蒿艾春侵路。雞豚暮識羣。敲門就炊爨。一飯敢忘君。

出行湖山間雜賦

老入新年健。春逢小雨晴。偶因尋酒去。又作繞村行。塘水蒼鵝戲。郊原黃犢鳴。閑身有樂事。倚杖看農耕。

又
新釀學鵝黃。幽花作蜜香。客邀閑卽去。病起醉何傷。野寺無晨粥。村伶有夜場。吾心靜如水。隨事答年光。

又
徑繞茶岡北。橋連茭浦東。蟲銼烏柏葉。露溼蕨蕨叢。燒地春蕪綠。漁扉夕照紅。君恩那可報。惟是祝年豐。

又
魚市樵風口。樵風溪港名。茶村穀雨前。柳邊煙掩苒。堤上草芊眠。墓掃鴉銜肉。人歸露導船。東風吹短髮。得句爲誰妍。

上巳

殘年登八十。佳日遇重三。簾幙低新燕。房櫳起晚蠶。名花紅滿舫。美酒綠盈甌。春事還如昨。衰懷自不堪。

筇絕句

列仙闕世獨清癯。雪谷冰谿老不枯。輪與錦棚孩子輩。千金一束入天廚。

贈蘇召叟

蘇子出儔輩。翩如天際鴻。才華刮眼膜。文字愈頭風。豈止千人見。真當四海空。老夫雖耄矣。此論不妨公。

贈趙去華

趙子毫端萬斛珠。眼前百輩不枝梧。盛名豈待他年見。公論何曾一日無。我老杜門惟足睡。君豪折簡固難呼。此詩強欲相題目。堪笑衰翁膽滿軀。

道室述懷

養心功用在還嬰。肯使秋毫有妄情。二寸藤冠狂道士。一編蠹簡老書生。狐妖從汝作人立。金價在吾如土輕。地肺終嫌近朝市。明年沂峽上青城。

春晚雨中作

冉冉流年不貸人。東園青杏又嘗新。方書無藥醫治老。風雨何心斷送春。樂事久歸孤枕夢。酒痕空伴素衣塵。畏途回首濼瀾惡。賴有雲山著此身。

晚行湖上

飽來捫腹繞村嬉。北陌東阡信所之。女手采餘桑鬱鬱。煙蕪生遍冢纍纍。高林日暮無鶯語。深巷人歸有犬隨。東走郡城逾十里。好風勞送角聲悲。

欲卜菴居未有勝地作詩識之

破裘百結鬢垂蓬。旋過流年旋已空。魔眷屬如雲盡散。性光明似日方中。極知萬事不勞問。欲住一菴誰與同。會向巢居明月夜。五絃橫膝寫松風。

東窗遣興

東窗徙倚當閑遊。水長池魚自滿溝。花氣襲人渾欲醉。鳥聲喚客又成愁。百年光景輸欹枕。萬里風煙入倚樓。欲

寫烏絲還嬾去。詩名老去判悠悠。

獨酌

一榼芳醪手自斟。從來戶小怯杯深。已於醉醒知狂聖。又向淳漓見古今。濡首固非吾輩事。達生猶得昔人心。餘
醖欲過香釜減。且據胡牀坐綠陰。

舟中作

誤長僂蓬不滿年。恩容歸老白雲邊。草枯病馬停朝秣。予已納祿。水冷鰈魚廢夜眠。混俗豈須名赫赫。耐嘲唯可
腹便便。柯橋梅市花俱好。且典春衣醉放顛。

衰疾

衰疾憐新鬼。狂豪尙故吾。某常先客著。行不許兒扶。硯潤閑蟾滴。香殘冷鴨爐。自憐風味在。尙欲泛江湖。

示兒

聞義貴能徙。見賢思與齊。食嘗甘脫粟。起不待鳴雞。蕭索園官菜。酸寒太學齋。時時語兒子。未用厭鉏犁。

野興

溪漲侵菴路。山光壓釣磯。荒畦荷鋤去。小艇載犁歸。世態那堪看。吾言可自違。從今謝人事。終日掩荆扉。

閑遊

遊徧名山日月長。結廬獨占水雲鄉。醉中卽是逃名地。閑外應無度世方。檜蜜滿脾餘小苦。木苗浥露有奇香。肺
腸自與人間別。堪笑醅缸與飯囊。

又

高會揮金媿二疎。食貧只似布衣初。終年老健緣儲藥。隨分窮忙爲著書。弔古何時過梁宋。題詩且欲徧衡廬。不
須更擬乘風去。水有煙帆陸筍輿。

又

過盡僧家到店家。山形四合路三叉。清明糝笑村村賣。穀雨茶香院院誇。困臥幽窗身化蝶。醉題素壁字棲鴉。夕

陽不盡青鞋與。小立風前鬢脚斜。

又

夙興蓐食戒山行。策蹇迢迢過故城。露葉未乾明曉日。風蒲初勁借秋聲。綠陰渡口孤鶯語。白水陂頭兩犢耕。遙望炊煙疑可憩。試從行路問村名。

炊米不繼戲作

敢羨晨興費萬錢。口邊縱理信前緣。高年雖獲殿諸老。一飽常如登九天。架上有書吾已矣。甌中無飯亦陶然。蓬門一閉還旬日。實怕閑人攪晝眠。

暮行

志士能輕萬戶封。野人自愛一枝筇。行窮綠岸呼船渡。糴得黃梁就碓舂。林外人家明遠火。月邊僧閣下疎鐘。江村不用愁孤絕。小店茅簷儘見容。

小雨

小雨過巖扃。殘雲傍野亭。花光相映發。鶯語苦叮嚀。舉酒和神氣。彈琴悅性靈。索居朋友絕。得句遣誰聽。

又

急雨方侵幔。斜暉忽滿廊。塵清添草色。衣潤省簞香。婦織將收繭。農功已下秧。諸孫入家塾。親爲授三蒼。

送辛幼安殿撰造朝

稼軒落筆凌鮑謝。退避聲名稱學稼。十年高臥不出門。參透南宗牧牛話。功名固是券內事。且葺園廬了婚嫁。千篇昌谷詩滿囊。萬卷鄴侯書插架。忽然起冠東諸侯。黃旗皂纛從天下。聖朝仄席意未快。尺一東來煩促駕。大材小用古所歎。管仲蕭何實流亞。天仙挂旆或少須。先挽銀河洗蒿華。中原麟鳳爭自奮。殘虜犬羊何足嚇。但令小試出緒餘。青史英豪可雄跨。古來立事戒輕發。往往讒夫出乘罅。深仇積憤在逆胡。不用追思灞亭夜。

初夏

白白養筒美。青青米果新。蜀人名糝爲養筒。吳中名粒糝爲米果。衰遲重時節。薄少遍鄉鄰。梅市花成幄。蘭亭草

作箇極知歡意盡。強起伴遊人。

自警

放翁原憤憤。徂歲復駸駸。社櫟終無用。秋蟲漫苦吟。拍蚊違殺戒。引水動機心。老耄誰規我。忠言抵萬金。

枕上

病叟少安枕。驚禽無穩棲。慵占賈誼鵲。空感祖生雞。野勢風號北。窗痕月過西。元非破賊手。只合架牛犂。山中惟鼻鳴。終夜雞三鳴。後聞架犂則且矣。

野步至近村

耳目康寧手足輕。村墟草市徧經行。孝經章裏觀初學。麥飯香中喜太平。婦女相呼同夜績。比鄰竭作事春耕。勿言野盃無鹽酪。筍蕨何妨淡煮羹。

書懷示子適

平生山林幾綉屐。何意隨人戴朝幘。口言報國直妄耳。斷簡圍坐晨至夕。道山堂東直廡冷。手種疎篁半窗碧。但虞風波起平地。豈有毫髮能補益。成書朝奏暮請老。入耳幸免煩言噴。東望故山百餘里。父老歡忻來接跡。白傘綠酒爭下擔。長笛腰鼓紛如織。迢迢梅市過魯墟。觀者所至空巷陌。爾來呻吟又春盡。周視室中惟四壁。但令糲飯羸撐拄。猶勝朱門常蹶踏。小兒助我理孤學。終歲伏几心如石。問看飲酒詠離騷。何似焚香對周易。

三月三十夜聞杜宇

斗轉春歸不自由。韶華已逐水東流。子規獨抱區區意。血淚交零曉未休。

夜大雨連明晨起乃知之

黃綉被穉枕慵移。夜雨淋浪了不知。水長壞陂初復後。鳩鳴去婦卻還時。芳蹊入夏多青子。白髮今年有黑絲。剩欲披衣湖上去。滿村芳草正離離。

聞虜亂次前輩韻

中原昔喪亂。豺虎厭人肉。輦金輸虜庭。耳目久習熟。不知貪殘性。搏噬何日足。至今磊落人。淚盡以血續。後生志

撫薄誰辨新亭哭。藝祖有聖謨。嗚呼寧忍讀。藝祖嘗爲大宋一統四字賜大臣。今藏祕閣。

壯士吟次唐人韻

士厭貧賤思起家。富貴何在髮已華。不如爲國戍萬里。大寒破肉風卷沙。誓捐一死報天子。兜鍪如箕鏃如水。男兒墮地射四方。安能山棲效園綺。塞雲漠漠黃河深。涼州新城高十尋。風殄露宿寧非苦。且試平生鐵石心。

衰疾

衰疾猶能飯一簞。蓴絲菰首亦加餐。舊刻印俄銷印。老媿彈冠亟挂冠。自怪嵇康如許癩。人憐范叔不勝寒。得錢剩買青芒屨。采藥名山興未闌。

書日用事

左右數書冊。朝夕一草堂。家貧自能儉。病愈不求方。盛饌豚肩美。常庖筍茁香。園丁報花坼。亦復命壺移。

又

一裘良已暖。半菽可無飢。養氣戒多語。端居如有思。私心須自勝。己過遣誰知。毫齒尤當勉。常憂寸晷移。

初夏出遊

去去衝朝霧。行行弄夕霏。稜秧晴竭作。坐社醉扶歸。細草迷行徑。殘花點釣磯。犍牛將犢過。雄雉挾雌飛。野寺煙鐘遠。村墟續火微。諸孫殊可念。相喚候柴扉。

初夏晝眠

好景逢初夏。閑身得晝眠。書橫竹架上。冠墮素屏前。葱蒨小山桂。潺湲幽竇泉。危巢出乳燕。高樹集新蟬。強健關天命。逍遙近地仙。晚窗思茗飲。自取雪芽煎。

農事稍閒有作

架犁架犁喚春農。布穀布穀督歲功。黃雲壓檐風日美。綠針插水霧雨濛。年豐遠近笑語樂。浦漲縱橫舟楫通。東家築室窗戶綠。西舍迎婦花扇紅。我方祭竈徹豚酒。盤箸亦復呼鄰翁。客歸我起何所作。孝經論語教兒童。教兒童。莫忽忽。顧汝日夜勤磨礱。烏巾白紵待至公。

夜雨

暮雨蕭蕭集瓦溝。空階點滴送清愁。何由乞得須臾睡。直到窗明滴未休。

朝晴

宿雨初收雲四歸。小山草木麗朝暉。翩然雙鶻從簷下。言語分明訴濕衣。

北窗

簾影參差午漏前。盆山綠潤雨餘天。詩無傑句真衰矣。酒借朱顏卻悵然。海燕理巢知再乳。吳蠶放食過三眠。名泉不負吾兒意。一掬丁坑手自煎。子虛寄惠山泉丁坑。蓋日鑄流亞也。

遊山戲作

晚境頻辭祿。窮居旋學耕。量衰添酒敵。才盡減詩名。風月成交友。溪山管送迎。登車雨先止。天豈相吾行。

遣興

聒聒鳴鳩莫笑渠。百年我亦旋枝梧。病知藥物難爲驗。老覺人間不足娛。茆屋何妨度寒暑。蔬餐且可遣朝晡。釣船一出無尋處。千頃江邊雪色蘆。

又

老荷君恩許醉眠。散人名號媿妨賢。久叨物外清閑福。屢識詩中造化權。風月四時隨指顧。乾坤一氣入陶甄。新秋更欲浮滄海。臥看雲帆萬里天。

細雨

細雨重雲漸入梅。陰陰門巷長新槐。壯心已與年俱逝。脫髮應無術可栽。美睡常嫌鶯喚起。清愁卻要酒闌回。年來百事非平昔。信手題詩嬾剪裁。

初暑

槐陰清潤麥風涼。一枕閑眠晝漏長。山鵲喜晴當戶語。海桐帶露入簾香。酒緣久病常辭酌。茶爲前銜偶得嘗。雲北雲南動遊興。速呼小豎治輕裝。

夙興

夙興短蓬髮。幽步豁煩襟。翠碧停闌角。鸞黃語柳陰。書殘頻補緝。琴廢細追尋。未是全無事。猶堪養道心。

新堂

湖上新堂氣疎豁。三面嵐光翠如潑。都門歸來病相屬。鄰里怪我問何闊。葦絲作羹飯雕胡。廚人斫鱸藝絕殊。何由喚得左元放。銀盤釣出松江鱸。

卽席

穉荷出水榴花開。長笛圓聲送舉杯。村鄰相樂君勿笑。要是安健無凶災。

又

醉中起舞遞相屬。座上戴花常作先。要知吾輩不凡處。一吸已乾雙玉船。

又

長魚腹腴羊臂臠。饒想久矣無秋毫。今朝林下煨苦筍。更覺此君風味高。

又

小山榴花照眼明。青梅自墮時有聲。柳橋東岸倚筇立。聊借水風吹宿醒。

生涯

久矣冥行墮嶮巖。樂哉偶得謝招麾。放懷身世相忘地。夙駕山林獨往時。縱老豈容妨痛飲。更慵亦未廢新詩。超然自喜生涯別。始歎龜堂見事遲。

落花

桃李擅春事。餘曠爲之殿。豈不欲周旋。過日如掣電。大風連三月。吹盡無餘片。留之豈有策。佇立情眷眷。空令腸九回。竟欠語一轉。流年付芳草。樽酒孤勝踐。鶯聲入碧雲。簾影滿深院。消搖綠陰間。風流屬團扇。

四月二十二日微雨中次前輩韻

語訛覺齒疏。冠倒感髮稀。屢爲曼容免。遂賦淵明歸。今日天氣佳。雨絲弄斜暉。起居惟所適。單複時易衣。出遊叩

僧廬歸臥掩漁扉。一笑顧兒子。正爾良未非。

夜雨

點滴茅檐雨。長宵不肯晴。殘缸待雞唱。倦枕厭鼻鳴。已踐衰殘境。況兼羈旅情。晨興亦何事。椎髻繞廊行。

夏日

入戶桐陰漸覆牀。乍敷篔簹北窗涼。筇枝倚壁知身健。衣焙殘香覺日長。雨霽斷雲時聚散。風來纖草久低昂。蝶衣粉濕猶飛嬾。小駐闌干就夕陽。

久雨

梅子青青苦未黃。經旬積雨欲頽牆。蠹生書帙時須火。潤入衣篝剩得香。鄰舍相逢驚間闊。通宵不寐聽淋浪。定知又發韓公笑。有底鳴蛙兩股長。

又

梅天一日幾陰晴。對酒無聊醉不成。巧曆莫能知雨點。孤桐那解寫溪聲。林深鳥爵來無數。草茂鋤耰去卽生。明日雲開天萬里。御風吾欲過青城。

舟中

青楓湖上村。綠蓑舟中客。雲與山疊見。海近地勢坼。悠然滄洲趣。宛與塵世隔。雖云食不足。麤免婚嫁責。渥丹未辭鏡。衰白幸滿幘。明當鼓柁行。放浪窮七澤。

繫船

高樹猶殘雨。叢蘆生夕風。情遊貧有自。老鈍學無功。歲月詩編裏。江湖旅色中。煙村繫船處。邂逅得漁翁。

復雨

催喚兒童掃綠苔。長歌清嘯興悠哉。林間子墮知梅熟。水面痕生驗雨來。往事已成孤枕夢。故人誰共一樽開。自憐未負年華在。素扇團團月樣裁。

書適

清和巷陌單衣後。綠潤軒窗午餉餘。曲曲素屏圍倦枕。斜斜筠架閣殘書。松陰坐石閑看鶴。山寺尋僧晚跨驢。此段家風君試看。京塵撲帽獨何歟。

村社禱晴有應

叢祠牲酒走村村。賴是龍歸爲解紛。爽氣收回騎月雨。俗謂二十四五間有用。往往輒成霞縑。謂之騎月雨。快風散盡滿天雲。數峯縹緲如屏面。一浦漣漪作簟紋。猶勝楚人簫鼓裏。九歌哀怨下湘君。

題北窗

東擔還山讀舊書。斷編終日見唐虞。千莖白髮年華速。一點青燈夜漏徂。厚價異時空市骨。大呼從昔不成盧。細思天賦原非薄。跬步門前萬頃湖。

又

不嗔人作腐儒看。斷簡堆中興未闌。更事愈懷憂國切。苦心始覺著書難。流泉激激人聲遠。修竹蕭蕭暑令寒。四海諸公常共處。北窗何地著身寬。

晝坐聞牆外人聲殊敗幽思戲作

老人氣衰凋髮齒。歲月翩翩來有幾。晨興食米不一溢。日課讀書猶十紙。雖云喧寂無二觀。終嫌蝸蝻喧吾耳。亟起振衣欲出門。赤日當空汗如洗。撥灰未炷瓦爐香。汲井先換銅匱水。也勝太史落南時。短檠夜對屠牛机。黃魯直自言遷宜州時。夜寓市中。直屠牛之机。用雞毛筆作字。

晨起行園中

老病厭蠶煩。晨興步小園。草深移舊路。竹茂失頽垣。未暇從魚樂。惟思與石言。人家尋每得。拄杖印苔痕。

葺舍

蟻知將雨先移穴。燕護新雛迭守窠。補漏支傾吾可笑。呼奴乘屋更添茅。

次韻林伯玉登臥龍

一紙臨門喜欲顛。詞源滾滾瀉長川。旗旄外闔新元帥。風月名山古洞天。自笑屏居依近郭。每煩登望指孤煙。雄

篇三復空與歎。窮乃工詩似不然。

道室雜詠

精神有限惟富貴。造化無心不汝移。此事安須知決擇。雞鳴勿後老人期。

又

黃褐長條七尺身。袖中一劍隱紅塵。城門萬屢日來往。衆裏安知無此人。

又

冰霜難與夏蟲語。晦朔豈容朝菌知。忿忿至前能小忍。人人券內有期頤。

又

萬法元須一理通。長生極治本同功。廣成千歲無它術。祇在唐虞二典中。

又

莫緣侯印學陰謀。生世惟須一釣舟。輕用鑊錐終折缺。善刀何止解千牛。

又

放翁菴齒猶朱顏。一物不留方寸間。已吞八九雲夢澤。更著百億須彌山。

湖塘夜歸

漁翁江上佩笠簪。一卷新傳范蠡經。鬱鬱林間桑椹紫。芒芒水面稻苗青。雲邊築舍分南北。陌上逢人半醉醒。莫

恨西村歸路遠。行前點點有飛螢。

東軒

僻巷地無喧。閑人慮不煩。刺舟回北渚。岸幘倚東軒。乳鵲行苔徑。馴鸞觸筍藩。作勞憐野老。喚取倒清樽。

夏日

例謝門前客。深藏篋裏書。衣穿但重補。飯足不求餘。山溜鳴庭際。藤陰接屋除。何勞厭三伏。俯仰即秋初。

斫脍

玉盤行膾篋青紅。輸與山家淡煮菘。要識坐堂哀穀鯨。試來臨水看嶮嶒。

野飯

六十日白可續飯。三千年清何與人。堪笑此翁頑似鐵。還山又食一番新。

村酒

亂山落日漁歌長。平曠遠風粳稻香。酒旗搖搖截官道。歸家未邊君試嘗。

避雨

雲如壞山欲塞海。樹似奇鬼將搏人。急投民家雨隨至。燎衣不覺雞唱晨。

雨中短歌

昨夕雨大如車軸。今日雨細如牛毛。人言愈細愈澤物。天公爲此非徒勞。泥深入市路欲絕。壞簷敗壁風蕭騷。豈惟鼃黽矜得意。坐覺藜莠無由薶。剝牀供爨嗟婢子。持傘上學憐兒曹。村場酒貴賒不得。且解布囊尋弊袍。

散懷

少年已遂遜山林。況何霜毛兩鬢侵。習氣尙存詩入夢。病根未去藥關心。猿知秋近啼先苦。鶴閱年多頂漸深。不忍頓疏風月在。羸能扶杖卽登臨。

南堂

空堂寂寂暑氣清。祇有燕雀無人聲。雲頭忽移簾影失。雨點亂集荷盤傾。溝坑水溢魚驚喜。庭戶風送蛟龍腥。衣巾汗垢爲一洗。呼奴舉榻臨前楹。取泉石井試日鑄。吾詩邂逅亦已成。何由探借中秋月。與子同遊白玉京。

門屋納涼

機裂齊紈如素月。牀敷蕪篔起微瀾。行人遠不分眉目。過鳥高猶響羽翰。新長庭槐夾門綠。無窮陂稻際天寬。今年項里楊梅熟。火齊驪珠已滿盤。

幽居

孤村野徑不曾鋤。惡草從來一寸無。每爲遊魚疏港瀆。更緣啼鳥植楸梧。閑門猶有僧時到。殘產渾無賦未輸。浪

走人間真謾計。暮年猶足補東隅。

露坐

殘月久方上。幽花時自零。風枝驚宿鳥。露草濕流螢。浩氣吞雲夢。危途塞井陘。菱歌何處起。及我醉初醒。

暑中久不把酒盆池千葉白蓮忽開一枝欣然小酌因賦絕句

千葉芙蓉白玉膚。一樽沆瀣碧琳腴。極知俱出氛埃外。我亦秋風山澤臞。

又

我讀淵明止酒篇。知渠未識玉池僊。誰言見面無多子。高壓天魔萬二千。

卷五十八

老馬

貧家畜老馬。枯萁風雨噓。本非百金產。安用三品料。馬固忘華廐。士亦安蓬藿。兩窮適相遭。萬事付一笑。少游御款段。作計無此妙。可憐杜陵翁。妄想追風驃。

大熱

五月頗閔雨。炎風吹旱塵。氣羸不給喘。流汗沾衣巾。呼婢使具浴。報以未買薪。汝事雖不恪。亦坐乃翁貧。汲井掬寒泉。自足忘我嗔。譬如寓逆旅。百事聽主人。

大雨

今年景氣佳。有禱神必答。時時雖閔雨。願盼卽霽洽。綿地千里間。四月秧盡插。季夏雨三日。淒爽欲忘筭。潄水如塞河。決水如放閘。几席亂鼃鼃。庭除泳鵝鴨。舍邊魚受釣。戶外鷗可狎。飛螢最得意。終夕自開闔。蕭蕭菰蒲聲。恍若船入夾。嗟予亦耐事。堅坐書滿榻。懸知穰種收。已足供伏臘。會約張志和。清風泛茗鬻。

午睡

梅黃雨足喜初晴。投枕華胥夢已成。帳底香雲凝未散。手中書卷墮無聲。簾紋似水飛蠅避。鼻息如雷稚子驚。凝

腹便便竟何有。已將嘲弄付諸生。

書意

踈慵久已臥郊扉。暫出人間輒免歸。梵志放花常恨晚。士師分鹿又成非。平生舊學寧當負。同志良箴亦重違。說與吾兒勤念此。負禾勿恨露沾衣。

卜居三山已四十年矣暇日有感聊賦五字

薄宦非初志。幽居不計年。稚松成偃蓋。小豎亦夔顛。生理憑耕稼。光陰付醉眠。從來慕園綺。一著要爭先。

又

泥古衰猶學。開荒夜亦耕。屋芟生草蓋。釜擷野蔬烹。白稻雨中熟。黃鸝桑下鳴。殘雲忽吐日。喜對小窗明。

北窗

北窗無俗物。三伏有餘涼。玉麈消長日。風漪可一牀。盞分新作茗。爐撥欲殘香。卻岸紗巾去。翛然野水旁。

睡起已亭午終日涼甚有賦

飯罷頽然付一牀。曠懷真足傲羲皇。松棚盡日常如暮。荷沼無風亦自香。倚杖月生人影瘦。岸巾露透髮根涼。頗聞王旅徂征近。數水條山興已狂。

殘雨

五更殘雨滴檐頭。探借天公一月秋。只道風吹雲散盡。數聲桑下又鳴鳩。

溪上避暑

暮年事業轉悠悠。盡日投竿杜若洲。世上漫言天愛酒。古來寧有地埋憂。全家只合雲山老。萬事空驚歲月遒。襖帶脫冠猶病渴。正平頗憶著岑牟。

又

短髮颺颺徹頂涼。悠悠隨處據胡牀。但憐鵲影翻殘月。不恨蟬聲送夕陽。門巷陰陰桐葉暗。汀洲漠漠藕花香。寫形宇內終煩促。安得騎鯨下大荒。

龜堂避暑

縹緲紗幮覆象牀。蠻童擎粥進黃梁。硯池湛湛一泓墨。衣焙霏霏半篆香。團扇題詩無帶思。清泉灑地有餘涼。更須風伯開雲陣。準擬今宵月滿廊。

旅舍偶題

野店山橋策蹇驢。浩然聊喜遂吾初。童顏幾歲已辭鏡。胎髮今朝還入梳。小瓮謾營秋社酒。斷編閑理小年書。白雲可笑猶多事。常向人間耐卷舒。

溪月

天風吹髮冷颼颼。獨向沙邊上釣舟。愁絕平羌江上月。向人依舊半輪秋。

砭愚

儲藥如丘壘。人愚未易醫。信書安用盡。見事可憐遲。錯自彈冠日。憂從識字時。今朝北窗臥。句句味陶詩。

雜興

早遇齊侯遊柏寢。晚從漢帝祀甘泉。不須苦學飛騰術。更看泥金檢玉年。

又

南山手自斲蒼苔。竹閣柴扉次第開。二十里間雲不斷。豈容一點市塵來。

又

靈府寧容一物侵。此身只合老山林。何由挽得銀河水。淨洗羣生忿慾心。

又

赤米熟炊元自軟。黃蘗頻倒不多酸。縱令酒負尋常債。也勝人求本分官。

又

冰壺冷浸玉芙蓉。三伏炎蒸一點無。淨洗硯池儲墨醬。乘涼要答故人書。

又

硯傳百歲蠶鬪角。筆擅一時錐出護。予所用硯百年前物。一角微闕。筆姑蘇能實作。頗佳。紙欲窮時瘦蛟舉。已看雷兩跨蒼茫。

又

扁舟夜載石帆月。雙屨曉穿天柱雲。八十老翁能辦此。不須身將渡遼軍。謂李勣。

又

犀象本安山海遠。榱桷豈願棟梁材。伏波病困壺頭日。應有嚴光入夢來。

又

粟無人餽方差快。門有僧敲未絕幽。豈是毫荒深絕物。從來不慣惹閑愁。

又

瞿聃楊墨寧非學。治獄行兵亦有師。惟有儒生知擇術。百年窮達守書詩。

病瘧兩作而愈

久出天魔境。胡爲瘧鬼來。亦知無妄疾。畢竟不爲災。引睡須書卷。支羸賴粥杯。微風起秋色。樽酒亦時開。

露坐

略約方塘北。貧簷小墅東。荷盤傾夕露。芡觜坼秋風。磔磔禽移樹。芒芒月墮空。詩材隨處足。盡付苦吟中。

戲詠

歲曆還逾半。人生但可悲。此身猶老健。隨處且兒嬉。累瓦初成塔。埋盆又作池。惟應上庭樹。不及髭髯時。

初秋書感

流年冉冉不容追。餘息厭厭只自知。馬革裹尸違壯志。鹿門采藥卜幽期。林蟬委蛻仙何遠。巢燕成雛去已遲。觸

事爾來多感慨。北窗閑賦早秋詩。

湖上

石帆山下舊苔磯。回首平生念念非。秋早明河低接地。夜深白露冷侵衣。風生古戍笳爭發。月過橫塘鷓獨飛。卻

看宦途傾奪地。恍然敗將脫重圍。

枕上

紗幮竹簟不勝清。臥看殘缸鷺復明。兩樹梧桐鳴急雨。一林鸚鵡噪疎更。靜無狂蝶妨幽夢。嬾有羣鷗責舊盟。待旦欲尋梅市路。小舟先向步頭橫。

書懷

無事自能心太平。有爲終蔽性光明。史牘臆盡見真理。梁肉掃空甘菜羹。處處浮家成野宿。時時策蹇作山行。平生常笑羊裘老。史冊猶存後世名。

游昭牛園

游昭木石師李唐。畫牛乃自其所長。出欄初聽一聲笛。意氣已無千頃荒。客居京口老益困。衣不揜脛鬢眉蒼。時時弄筆眼力健。蹠角毛骨分毫芒。我無沙隄金絡馬。拂拭此幅喜欲狂。乞骸幸蒙優詔許。置身忽在煙林旁。日落飲牛水滿塘。夜半飯牛天兩霜。但醫瀝藥笑水草。老巫訶禁被不祥。願我孫子勤農桑。願汝生犢筋脈強。確聲驚破五更夢。歲負玉粒輸官倉。

唐希雅雪鵲

烈風大雪吞江湖。巨木摧折竹葦枯。烏鳥瑟縮墮地死。豈復能顧卵與雛。棘枝拔出亂石罅。凜凜生氣獨有餘。耐寒兩鵲亦異稟。羽族有此山澤癯。神凝氣勁中自足。不待晴日相嗚呼。深知畫手亦怪偉。用意直刮造化爐。毳毛雖細不翻健。落筆豈獨今所無。我評此畫如奇書。顏筋柳骨追歐虞。

葛蒲

雁山葛蒲崑山石。陳叟持來慰幽寂。寸根蹙密九節瘦。一拳突兀千金直。清泉碧岳相發揮。高僧野人動顏色。盆山蒼然日在眼。此物一來俱掃迹。根蟠葉茂看愈好。向來恨不相從早。所嗟我亦飽風霜。養氣無功日衰槁。

吾廬東北皆修竹。茂木羽族來栖者不可數計。感而有作。

蓬舍皆茂林。萬數栖鳥雀。詰旦輒爭鳴。未暝紛已泊。清陰交欲暗。丹實熟可啄。吾廬少人迹。媿爾肯見託。雖無惠

養德亦免彈射虐。結巢俯可窺。淳風今豈薄。

秋夜聞蘭亭天章寺鐘

絕湖上蘭亭。不過一炊頃。湖廢綠隄行。往返常舉景。猶有古寺鐘。迢迢下重嶺。煙雲含莽蒼。風露共凄冷。蕭然草堂臥。度此清夜永。百念一洗空。於焉發深省。

閱雨

歲秋固多雨。每恨不及時。黃塵蔽赤日。苗槁已不遑。踏車聲如雷。力盡真何爲。天豈不念民。雲族風散之。窮民守稼泣。便恐化棘茨。妻子不望活。所懼尊老飢。我願上天仁。顧哀民語悲。鞭龍起風霧。尙繼豐年詩。

徒行短歌次前輩韻

風吹短衣雙鬢白。老人徒步歸鄉國。數樹丹楓野店西。一川紅蓼溪橋北。芒屨有賣百無憂。過盡青山到渡頭。更求款段真多事。堪笑當年馬少游。

江樓次前輩韻

一日千回上庭樹。城南尙記嬉遊處。俯仰人間八十年。鏡中未許朱顏去。甲第侵雲多貴人。朝回撲帽軟紅塵。江樓月夜吹長笛。誰似儂家不負身。

七月四日夜賦

樓角西南月一鉤。晚瓜落刃酒新篘。仙家又愴銀河別。太史新班玉曆秋。衰病歲時良冉冉。窮愁身世轉悠悠。莫因乞巧嘲兒女。我亦飄然水上浮。

出近村歸偶作

朝騎小蹇涉煙村。擁路爭看八十身。似我猶爲一好漢。問君曾見幾閑人。楊梅線紫開園晚。蓴菜絲長入市新。莫笑堅頑推不倒。天教日日享常珍。

送子修入閩

士生萬里合鵬搏。憔悴青衫且自寬。薄祿及親雖共喜。遠途將父亦誠難。關山可厭風塵惡。菴華應思菽水歡。只

道老年心似鐵。詩成也作鼻辛酸。

書志

飲水蕭然臥曲肱。桑村麥野醉騰騰。老身長子知無憾。泛宅浮家苦未能。南畝服勞勝乞食。腐儒垂死恥依僧。柴荆常閉斜陽裏。剝啄雖聞亦懶膺。

秋雨

兩聲疎復密。窗影暗還明。赤米香炊飯。青蔬淡鬻羹。閑中長棋格。病後減詩情。惟有桑麻事。鄰翁與細評。

雨後涼甚

並海寬閑野。清秋搖落天。微涼供笑睡。穩字入新聯。陋屋蕭蕭雨。修筒細細泉。晚窗生酒興。洗酌一陶然。

屏迹

屏迹亂山中。觀身槁木同。桑麻安舊業。薪水付村童。不散嬰兒機。常存太古風。一錢無用處。那復計囊空。

又

飯熟起開鉢。困來徐倒牀。無狂安取聖。有短始知長。養道褐懷玉。露才錐出囊。聊須喚兒稚。細細話耕桑。

書事

聞道輿圖次第還。黃河依舊抱潼關。會當小駐平戎帳。饒益南亭看華山。饒益寺南亭。盡得太華之勝。

又

關中父老望王師。想見壺漿滿路時。寂寞西溪衰草裏。斷碑猶有少陵詩。華州西溪。卽老杜所謂鄭縣亭子者。

又

鴨綠桑乾盡漢天。傳烽自合過祁連。功名在子何殊我。惟恨無人快著鞭。

又

九天清蹕響春雷。百萬貔貅扈駕回。不獨兩師先灑道。汴流滾滾入淮來。

雨後

雨後涼生病體輕。閑拖拄杖山門行。槐花落盡桐陰薄。時有殘蟬一兩聲。

幽居

早歲猶奇怪。中年痛掃除。華堂基陸廢。名馬宴遊疎。散軼身忘倦。畦蔬手自鉏。寥寥千載後。誰此訪幽居。

書事

北征談笑取關河。盟府何人策戰多。掃盡煙塵歸鐵馬。剪空荆棘出銅駝。史臣歷紀平戎策。壯士遙傳入塞歌。自笑書生無寸效。十年枉是枕琯戈。

秋夜感遇十首以孤村一犬吠殘月幾人行爲韻

月生東山口。宿鳥驚相呼。我起立蒼茫。况在白玉壺。飢鶻掠危巢。大魚躍平湖。作意賦新詩。佳夕不可孤。

今日天氣佳。駕言適山村。種枳作短籬。疊石成高垣。牲酒賽秋社。簫鼓迎新婚。所願在仕者。努力蘇元元。

又

長康有三絕。吾獨得其一。寓世八十年。一癡萬事畢。世間所謂黠。正類禪中蝨。燂湯會有時。爲計誰得失。

又

我夢遊異境。烏帽跨小蹇。桑麻夾阡陌。山川曠何遠。俗有太古風。蕭散到雞犬。鐘鳴忽驚覺。所造恨猶淺。

又

竭作朝築陂。獨勞暮鉏菜。草煙欄犢臥。船響籬犬吠。殘年迫耄及。農事不敢廢。兒曹強學餘。努力事春耜。

又

頽曆如昨日。俯仰芳歲殘。蝓蚘方鳴秋。礎杵已戒寒。書生賦予薄。何適不艱難。梁肉固所笑。食淡心始安。

又

前年蒙趣召。渡江當六月。顧慚衰病軀。觸熱朝行闕。君恩雖屢下。恐懼乞骸骨。飄然返柴荆。所愧已黔突。

又

畏首復畏尾。吾身其餘幾。雖云食不足。健決豈不偉。蓬窗對親舊。情話來塵塵。何以永今朝。沽酒刺圈豨。

又

昔遇高皇帝。同朝多偉人。哀哉逝不留。燕蒿返蒼旻。存者纔一二。相望不得親。秋風聞雁過。老淚霑衣巾。

又

唐虞治巍巍。洙泗道益明。豈知秦漢後。佛老起縱橫。詩書雖僅存。韶護無遺聲。書生幸有聞。未死猶力行。

草書歌

吾廬宛在水中沚。車馬喧囂那到耳。一堂翛然臥虛曠。蟬聲未斷蟲聲起。有時寓意筆硯間。跌宕犇騰作詼詭。徂徠松盡玉池墨。雲夢澤乾蟾滴水。心空萬象提寸毫。睥睨醉僧窺長史。聯翩昏鴉斜著壁。鬱屈瘦蛟蟠入紙。神馳意造起雷雨。坐覺乾坤真一洗。小兒勸我當自珍。勿爲門生書柴几。

自微

牛解謹藏刀。牟亡密補牢。達人憂祿厚。奇禍出名高。所製懷全璧。寧當恥繻袍。世間俱癩疥。何事苦爬搔。

新秋

遠浦平郊弄夕霏。曲籬幽徑鎖秋暉。馴罍巧占蒼苔臥。驚鵲斜穿密篠飛。浴罷小軒成美睡。雨餘老火斂餘威。言風月供詩思。汗幘屢衣且解圍。

又

蟬聲滿院送流年。又見秋風到海邊。舊友死來頻入夢。新詩愁絕少成篇。步頭野水雙飛鷺。林外人家一點煙。顧影自驚如許瘦。囊空無藥起沉綿。

憫俗

蚩蚩之氓不自覺。顧笑吾曹安淡薄。攜女數千行問法。腰錢鉅萬仍騎鶴。豈知此事不兩得。蜀豪何可參毒藥。野狐出林作百態。擊下髑髏渠自作。老氏五千本清靜。揚雄太玄惟寂寞。但能於此尊所聞。萬卷丹經盡糟粕。

塊坐齋中有感

敗席凝塵。嬾拂除。況能作意去庭蕪。讀書眼力衰難強。對酒心情薄。欲無野寺鍾魚。思下檐山。掛靴。刷帽。登茲秀。然坐睡。誰驚覺。寂寞西窗日。又晡。

新涼示子適時子適將有臨安之行

竹簟紗幮事已非。秋清初換熟練衣。鵲驚山月栖還起。螢避溪風墮又飛。老眼漸昏書嬾讀。壯心雖在事多違。夜窗剩欲挑燈語。日倚柴門望汝歸。

秋雨

毒熱秋未衰。吾廬況淺迫。雖云日一浴。流汗沾衣幘。蕭蕭三日雨。出此炮烙厄。瀟湘應更佳。恨我無六翮。

又

吾廬多美蔭。最茂楸與梧。百鳥集其間。下上更嗚呼。秋風忽動地。搖落日日疏。何如澗底松。終歲無榮枯。

講學

遷善以美身。講學以盡性。能爲可行爾。用舍固有命。天方斲斯文。魯叟虛歷聘。黎元則可哀。窮死吾何病。

野興

來日無多去日適。朱顏那肯爲人留。簷聲點滴無時雨。野氣蒼茫極目秋。朝出釣魚來北渚。夜耕驅犢上西疇。此心所要常無媿。寂寞衡門死即休。

又

江湖蕭散葛天民。敕放還山一幅巾。老去飢羸惟恃粥。病來舉動每須人。道窮舉世知心少。學進吾兒著語親。更有一端差自慰。短檠不作白頭新。

又

早見高皇宇宙新。老年猶作太平人。虛名僅可欺橫目。臆論曾經犯逆鱗。原野暮雲低欲雨。陂湖秋水浩無津。蕭條生計君無笑。一鉢藜羹敵八珍。

又

飽見人間行路難。暫陪鷓鴣意先闌。集仙院裏三題石。神武門前兩挂冠。飢臥了無千里志。倦飛元怯九霄寒。客來莫笑蓬窗陋。若比巢居已太寬。

示元敏

學問參千古。工夫始一經。寧論綬若若。且喜佩青青。汝業方當進。吾言要細聽。仍須知稼穡。勉爲國添丁。

八月四日夜夢中作

太華巉巖敷水長。白驢依舊繫斜陽。山深乳洞藥爐冷。花發雲房醅瓮香。鄰叟一樽迎谷口。蠻童三髻拜溪旁。中原俯仰成今古。物外自閑人自忙。

明日復理夢中意作

白盡鬢鬢兩頰紅。頽然自以放名翁。客從謝事歸時散。詩到無人愛處工。高挂蒲帆上黃鶴。獨吹銅笛過垂虹。閑人浪迹由來事。那計猿驚蕙帳空。

又明日復作長句自規

大學淵源不易窮。古人立志自童蒙。醉猶溫克方成德。夢亦齋莊始見功。痛哭孰能悲陷溺。力行猶足變雕蟲。太空雲翳終當散。吾道常如日正中。

示子孫

累葉爲儒業不墮。定知賢傑有生時。學須造次常於是。道豈須臾或可離。我老已無明日計。心存猶惜寸陰移。魏夫子雖天縱。禮樂官名盡有師。

秋夕

承學雖云淺。初心敢自輕。飄零爲祿仕。蹭蹬得詩名。撫事悲長劍。懷人感短檠。不堪秋雨夕。鼓角下高城。

徂歲

徂歲風煙慘。幽居市井遙。甌香炊薏米。泉潔煮芎苗。野廟迎神晚。村船過棗窰。西窗一樽酒。亦足慰無聊。

村居遣興

追數交朋略散亡。臂屣足蹇固其常。一年又見秋風至。孤夢潛隨夜漏長。不辦誦書如倚相。頗能噉飯勝張蒼。回看薄宦成何味。只借朝衫作戲場。

又

萬里征途興已闌。三間破屋住猶寬。山薑著雨房重斂。南燭先霜實半丹。野市秋陰更蕭瑟。書生老瘦轉酸寒。掩關也有消愁處。一卷騷經醉後看。

又

野堂疎豁近江臯。喜見南山秋氣高。野外漸寒羣木脫。草根薄暮百蟲號。築陂濬畝更相勉。伐荻剝桑敢愛勞。亦念耄荒當自佚。欲將世業付兒曹。

又

甲子秋八月偶思出遊往往累日不能歸或遠至旁縣凡得絕句十有二首雜錄入稿中亦不復詮次也
留雪猶能活窖中。偷牛亦可隱牆東。來歸里社當知幸。萬卷書邊一老翁。

又

小兒緣天摘列宿。老子含飴弄穉孫。郊居得此豈不樂。無奈催租人打門。

又

早攜書劍三隨計。晚辱弓旌四造朝。心媿石帆山下叟。一生不識浙江潮。

又

筋骸未廢寧爲老。煙火猶通豈是貧。時跨一驢山縣去。園丁野老盡相親。

又

著囊藥笈每隨身。問病求占日日新。向道不能渠豈信。隨宜酬答免違人。

又

藥麤野老偏稱效。詩淺山僧妄謂工。懷餅裹茶來問訊。不妨一笑寂寥中。

又

家居愈老厭拘纏。旅舍僧房意自便。乞菜作羹殊有味。借牀小憩即成眠。

又

鄉閭敬老意常勤。一味甘鮮必見分。大馘在前無箸食。始知富貴本浮雲。

又

市樓嘈囂知豐歲。驛樹輪囷傲早霜。六十年間凡幾到。剩沽新酒對斜陽。

又

燂湯具浴僧窗暖。春黍供炊旅甌香。自笑平生爲客熟。關山千里一衣囊。

又

胡麻刈罷下麪初。引水家家灌晚蔬。但有茅簷隨處好。淵明可獨愛吾廬。

又

秋風敗葉委蒼苔。小窻閑遊始此回。溪上風煙爭晚渡。縣前燈火賣新醅。

卷五十九

遊山

四序雖悉佳。莫若新秋時。已脫烹煮厄。未興搖落悲。鷺集水落渚。鵲爭風墮枝。煙村烏桕丹。晚日望最奇。豈無一舴艋。往赴幽人期。婆娑下堂迎。壞衲顛倒披。丹果垂中庭。碧花蔓疎籬。秋高才一來。怪我今年衰。

對酒

天上何曾許寄愁。酒中正自可忘憂。不能上樹作巢飲。尙辦滿船供拍浮。神仙可學君豈信。衣食裁足吾何求。但憶人如王粲輩。相攜一笑賦登樓。

遣舟迎子適因寄古風十四韻

今日拆汝書。一讀眼爲明。知汝即日歸。明當遣舟迎。想汝片帆東。翩若飛鴻征。薄暮過梅市。呶謳雙檣聲。到家亦

尙早。城樓初發更。草草一尊酒。爲汝手自傾。夜分不能寐。頓忘衰特嬰。豈惟病良已。白頭黑絲生。暫別亦不惡。益重父子情。自今日相守。北窗同短檠。六經炤久伏。百氏方縱橫。世俗擯孤學。未易口舌爭。此實在學者。草萊勿自輕。汝壯父未死。相勉在力行。

重寄子適

秋風日日望歸裝。忽報來期喜欲狂。衰病無因楫迎汝。夢隨殘月過浮梁。

飯後偶題

環堵蕭然百慮忘。天教得飯飫枯腸。長橋鮓美桃花嫩。北苑茶新帶胯方。漠漠寒花欲晚照。翩翩孤蝶弄秋光。解衣捫腹西窗下。賴有新詩破日長。

秋興

流光冉冉迫崦嵫。常抱秋風宋玉悲。才盡已無楓落句。身存又見雁來時。自憐閉戶龐眉叟。初對還家大耳兒。子適方自行在歸。一盞青燈照寒影。不妨細舉別來詩。

又

世事元看等一毫。紛紛寵辱陋兒曹。雁行橫野月初上。桐葉滿庭霜未高。細考蟲魚箋爾雅。廣收草木續離騷。更餘一事君知否。臥聽牀頭滴小槽。

舍北行飯

飯飽逍遙信所之。茨塘蔬圃遍遊嬉。梧楸凋落風高後。瓜瓠輪囷雨足時。犬喜人歸迎野路。鶻營巢穩占低枝。晚來嬾復呼童子。自掩柴門上屐屨。

舍南野步

枯蔓絡荆籬。幽花映荻扉。馴鸞驚不起。歸鶴倦猶飛。野色連收網。邊愁人搗衣。壯圖空自笑。事事與心違。

感昔

行年三十憶南遊。穩駕滄溟萬斛舟。常記早秋雷雨霽。柁師指點說流求。

又
馬瘦行遲自一奇。溪山佳處看無遺。酒壚強挽人同醉。散去何曾識是誰。

又
負琴腰劍成三友。出蜀歸吳歷百城。最是客途愁絕處。巫山廟下聽猿聲。

又
岳陽三伏正炎蒸。爽氣淒風見未曾。白浪蹴天樓欲動。當時恨不到黃陵。

又
行遍天涯只漫勞。歸來登覽興方豪。雲生神禹千年穴。雪捲靈胥八月濤。

病齒

似病多病臂已癭。當墮未墮齒難留。一杯藜粥吾所美。幸可自辦不待求。既無齧骨犯曲禮。亦免祝饁煩成周。形骸外物付悠悠。那將老境供閑愁。

揮手

揮手羣玉府。說駕石帆山。偶與片雲出。卻隨孤鶴還。松風暮蕭瑟。石溜夜淙潺。阿敏讀書處。更添茆一間。

過鄰家

初寒偏著苦吟身。情話時時過近鄰。嘉穉連雲無水旱。齊民轉壑自酸辛。室廬封鏽多墟戶。市邑蕭條少醉人。甌未生塵羹有糝。吾曹切勿怨常貧。

甲子秋八月丙辰雞初鳴時夢劉韶美示詩八篇高古可愛明日作此詩志之

韶美仙去三十年。一念及之常悵然。秋窗忽夢接顏色。萬里老鶴歸遼天。贈詩溫其似玉瓊。我亦蠹識關雎亂。建安黃初不足言。筆端直覺無秦漢。

山居

客至何曾共劇談。行藏獨有老農諳。覓官肯信山居樂。食淡方知飯味甘。一脈泉通澆藥圃。萬重雲鎖釣魚菴。好

奇自笑心無厭。行遍江南憶劍南。

歸老

兩脚走萬里。歸老樵風溪。雖遠京雒塵。窮巷還多泥。纍纍喪家狗。喔喔失旦雞。幸非徒比景。何恨棲會稽。今年更可笑。偃僂自灌畦。榮雖不滿眼。悔亦免噬臍。萬事付一尊。師友阮與嵇。

送子坦赴鹽官縣市征

父子團樂笑語諱。豈知雲散各天涯。長亭結束秋將晚。別酒淒涼日易斜。我坐耄年艱就養。汝非仰祿肯離家。遊山尙有平生意。試爲閑尋一鹿車。臘中欲作一小肩輿。輕駛堅實。兩夫可舉者。以備山行。

寄子坦

目斷西陵細霧中。津亭想汝繫孤篷。頗憂昨暮雲吞日。俗以黑雲接落日爲風雨之候。猶幸今朝雨壓風。就食亦知難戀戀。挂帆終恨太匆匆。寒沙不是無來雁。頻寄書歸問老翁。

書感

老荷寬恩許退耕。絲毫無報亦何情。民貧樂歲尙艱食。道喪異端方肆行。黨禍本從名輩出。弊端常向盛時生。古人骨冷青松下。誰起英魂與細評。

自扁門歸

橘柚纍纍未著霜。陂塘渺渺度秋光。長橋虹臥當官道。重閣鸞飛出女牆。煙際遠舟俄已隱。天邊驚雁不成行。歸來有底誇兒輩。笑指奚奴古錦囊。

遣興

兔徑遊觀足。蝸廬臥起寬。垂名千古易。無愧寸心難。燈火娛清夜。風霜變早寒。一經家世事。吾與未應闌。

詩酒

詩酒平生樂。無如老病侵。才衰愁韻險。量退怯杯深。宿露滋金蕋。微霜點纈林。呼鷹五陵路。惆悵少年心。

晚秋野興

病骨支離不耐秋。今年九月即輕裘。細書燈下幸能讀。舊友夢中時與遊。連夕夢紹興間同朝諸公。官賦舉輸無吠犬。農功已息有閑牛。不知冠蓋朝天客。也得心安似我不。

又

徹底無能徹骨貧。自憐虛作六朝民。學因病廢捐長日。志與年衰媿古人。露濕亂螢飛暗廡。霜清飢雀噪空囷。一生眼境常如此。草賦憑誰問大鈞。

舟中口占

養生妙理本平平。未可常談笑老生。業力頓消知學進。人情愈薄喜身輕。鶴雛日長丹砂頂。巖溜時聞玉珮聲。最是扁舟暮歸處。一川風月遠相迎。

閉門

閉門何所樂。聊息此生勞。霜薄殘蕪綠。風酣萬木號。研朱點周易。飲酒讀離騷。斷盡功名念。非關快剪刀。

暮秋

多雨今秋水渺然。溝溪無處不通船。山回忽得煙村路。始信桃源是地仙。

又

閑傾清聖濁賢酒。穩泛朝南暮北風。射的山前雲幾片。一秋不散伴漁翁。

又

百年大耋龍鍾日。九月初寒慘淡天。嶺谷高低明野火。村墟遠近起炊煙。

又

舍前舍後養魚塘。溪北溪南打稻場。喜事一雙黃蝶蝶。隨人來往弄秋光。

又

九月山村已驟寒。看雲殊怯倚闌干。一杯濁酒栽培睡。不覺春雷起鼻端。

又

清秋又是一年新。滿眼丹楓映白蘋。海內故人書斷絕。汀洲鷗鷺卻心親。

農舍

三農雖隙亦匆忙。穡事何曾一夕忘。欲曬胡麻愁屢雨。未收蕎麥怯新霜。

又

神農之學未為非。日夜勤勞備歲饑。兩畏禾頭蒸耳出。潤憂麥粒化蛾飛。

又

萬錢近縣買黃犢。襪襖行當東作時。堪笑江東王謝輩。唾壺塵尾事兒嬉。

又

杜門雖與世相逢。未許人嘲作計非。長綆雲邊牽犢過。小舟月下載犁歸。

九月十日夜獨坐

蓬窗燈火耿疎籬。正是寒紗雁到時。頭少二毛真篤老。口無縱理亦長飢。朝聞夕死固當勉。幼學壯行嗟已遲。小豎夜闌私怪我。儼然危坐若深思。

述意

憂患無窮生有涯。惟須百事屏紛華。人誰敢侮修身士。天不能窮力穡家。頻喚老僧同夜粥。閒從鄰叟試秋茶。結茅林下從來事。瓦屋三間已太奢。陸士衡兄弟共居瓦屋三間。

小疾自警

老來士弗強。舉箸輒作病。造物蓋警之。何啻三下令。而我不自珍。若與疾豎競。豈惟昧攝養。實亦闕忠敬。顛陪乃自詒。何用死不瞑。自今師古訓。念念貴清靜。羔豚昔所笑。放斥如遠佞。淖糜煮石泉。香飯炊瓦甌。采蔬擷藥。冪相照映。膨脝亦宜戒。僅飽勿憚刺。隱書有至理。要使氣常勝。因之戒友朋。苦語君試聽。

白龍

九月癸酉暮。白龍見西方。是時久晴明。日落天正蒼。玉宇無纖雲。凌空獨高翔。蜿蜒久乃隱。父老歎未嘗。清臺占

白龍

劍南詩藁 卷五十九

五行。此事實殊常。我非劉子政。聊記以短章。

學易

卒歲勿多求。壺飧與褐裘。心安由自足。身貴爲無求。易化千年鶴。難馴萬里鷗。閉門方學易。未暇揖浮丘。

又

學古忘衰疾。齋心洗昨非。拳拳奉天理。坦坦息心機。改過先幽隱。收功何細微。耄期猶自警。俯仰惜餘暉。

閑中作

呼童按摩罷。倚壁欠伸餘。棋局可忘老。鳥聲能起予。掃簷憐胃蝶。投餌出潛魚。向晚明窗下。還來讀舊書。

枕上

噦噦初聽雁。南征。嚶嚶俄聞雞。一鳴。夢境往來雙隻埃。官途與廢短長檠。何由生計裁能足。不願人間過取名。飯
輒茶甘吾事了。但愁無酒酌公榮。家貧不能釀酒。而官壺多醖。

出遊

一樽隨處可開顏。此事深疑造物慳。地可登臨多恨遠。身常強健又須閑。山圍小市煙初斂。霜著橫林葉半殷。徙
倚闌干君勿厭。日斜猶及棹舟還。

又

漁村酒市本無期。小蹇扁舟信所之。丹葉滿林霜落後。紫萍黏塊水枯時。山林閑寂歸雖早。齒髮衰殘病已遲。努
力及時謀自適。錦囊多貯暮秋詩。

又

山有籃輿步有舟。放翁身健得閑遊。半牛點點日將夕。蒲柳蕭蕭天正秋。細徑僧歸雲外寺。疎燈人語酒家樓。歸
途更愛湖橋月。獨倚闌干爲小留。

又

霜氣蕭條木葉黃。佳時病起意差強。雲煙古寺聞僧梵。燈火長橋見戲場。一枕清風幽夢斷。數匙旅飯野蔬香。道

邊莫笑衰殘甚。獨往山林與未央。

又

禹窆胥濤中路分。畫橋衝破一川雲。柯橋僧閣凌空起。梅市漁歌帶月聞。蟹束寒蒲大盈尺。鱸穿細柳重兼斤。酒家報我新醅熟。且撥閑愁寄一欣。

家居

清世念遺民。常情重老人。饋漿煩郡府。分胙媿鄉鄰。穫稻黃雲卷。舂粳玉粒新。膨脝自摩腹。一笑欲忘貧。

又

老眊詩名滅。登臨笑口開。釀泉爲酒熟。倩鶴附書回。紗帽方簪菊。筇枝又探梅。清狂君勿笑。曾是薄蓬萊。

又

蒲葦村深地。風霜歲晚天。溪柴勝熾炭。小束柴自若耶溪出。名條柴。黎布敵純綿。客有遺黎布者。甚輕暖。有客問奇字。無人嘲晝眠。誰言此翁老。懷抱尙超然。

贈隱者

嚙昔從君處。玄都太古壇。月高旛影直。霜重珮聲寒。鶴駕三山近。壺天萬里寬。相逢初未省。但認切雲冠。

又

力量超終古。光明破積昏。獨行寧有待。妙用本忘言。神定嬰兒戲。丹靈豎子奔。緒餘應不靳。小出濟元元。

貧中自戲

種枳爲籬草。結廬。人間知足更誰如。澗深松老忘榮謝。天闊雲閑任卷舒。門冷併無殘客跡。家貧常讀絕編書。有金可散還關念。多事從來笑漢疎。

風雨夜坐

寒風淒緊雨空濛。舍北新丹數樹楓。欹枕舊遊來眼底。掩書餘味在胸中。松明對影談玄客。篠火圍爐采藥翁。君看龜堂新境界。固應難與俗人同。

示村醫

玉函肘後了無功。每寓奇方嘯傲中。衫袖翫橙清鼻觀。枕囊貯菊愈頭風。新詩吟罷愁如洗。好景逢來病欲空。卻羨龍鍾布裘客。垓西賣藥到村東。

秋雨

一秋風雨蔽白日。積水鬼神愁太陰。寒蠶悲鳴草根溼。水鳥暝哭菰叢深。殘年不覺日月逝。病骨惟愁霜露侵。常有淖糜支旦暮。一毫寧復少年心。

雜興

散步持書卷。閑眠枕藥囊。馴聲隨几杖。癡蝶入衣裳。病起年光速。身閑日景長。爲憐紅樹好。久立向西廂。

又

客問維摩疾。人哀范叔寒。詩囊負童背。藥笈挂驢鞍。野果攢眉澀。村醪捩齒酸。老雞殊可念。旦旦報平安。

又

愛物停垂釣。劬身自荷鋤。時從鄰父飲。日授稚孫書。尙棄登山屐。寧須下澤車。平生雙不借。投老伴歸歟。

又

平生獨何幸。命若與人謀。疲懦逃深責。空疎得早休。位卑輕得喪。迹遠少恩讎。莫怪歸耕樂。文園久倦遊。

又

倒囊得千錢。從人買釣船。秋風宿村步。暮雪醉江天。得意鷗波外。忘歸雁浦邊。平生笑嚴子。猶有姓名傳。

又

澤居憂下溼。老病覺中乾。違俗恐不免。倚天聊自寬。受規如獲藥。喜退甚彈冠。不是憎勳業。心知骨相寒。

江亭

野市逢虛日。江亭候暮潮。蟲號霜後草。人立雨中橋。病骨羸將折。殘魂黯欲消。無心作村醉。酒旆苦相招。

晚歸

梅市橋邊弄夕霏。菱歌聲裏棹船歸。白鷗去盡還堪恨。不爲幽人暖釣磯。

懷昔

奮迹窮閭本甚微。刺天何敢慕羣飛。業文僅與贖書券。學射纔因鼠發機。罟獲縱橫真脫命。風波瀕洞尙餘威。朝冠挂了方無事。卻愛山僧百衲衣。

初寒示鄰曲

村北村南數十家。陂池重複谷谿斜。荻叢缺處見漁火。蓬戶閉時聞紡車。淺瀨水清雙立鷺。橫林葉盡萬棲鴉。是中佳興無窮極。嬾著青鞵上若耶。

夢中作并序

甲子十月二日夜雞初鳴。夢宴客大樓上。山河奇麗。東南隅有古關。尤壯。酒半樂闕。索筆賦詩終篇而覺。不遺一字。遂錄之。亦不復加竄定也。

富貴誇人死卽休。每輕庸子覓封侯。讀書歷見古人面。好義常先天下憂。獨往何妨刀買犢。大烹卻要鼎函牛。坐皆豪傑真成快。不負凌雲百尺樓。

初寒

老遇初寒候。貧當絕祿時。衣裘俱在笥。薪炭不愆期。鶉滿羣童網。魚浮百石陂。比鄰每分餉。捫腹可無飢。

又

重簾禦晚吹。密瓦護晨霜。小室今年冬初增。瓦三百箇。三面窗皆設紙簾。炤炤甄爐火。霏霏石鼎香。行邊依木杖。坐久穴藜牀。晝亦無聊甚。胡爲厭夜長。

鉏菜

江湖霜雪薄。終歲富嘉蔬。菘非常相續。萹蔓亦有餘。家貧闕梁肉。身病忌鱸魚。幸有荒畦在。何妨日荷鋤。

對酒

賦性雖耽酒。其如老病身。氣衰成小戶。醅濁號賢人。疏廣矜君賜。劉伶畏婦嗔。蘭亭獨超絕。千載擅清真。

夜臥久不得寐。復披衣起。呼燈作草書數紙。乃復酣枕。明日作此詩記之。
才下多厄窮。地偏罕人客。半生走四海。竟無第一策。暮年忽大悟。惟有緊閉門。朝作一池墨。弄筆招羈魂。初若奔驥。忽如掣蛟鯨。鬼神森出沒。雷雨更晦明。飛揚與已極。投筆徑就牀。酣酣一枕睡。不覺幽夢長。手攜避秦人。行上腰帶鞬。下視河流黃。仰看天宇青。大呼自驚覺。夜半燈欲死。茆簷雨點滴。身乃在萬里。挑燈影突兀。顧問汝是誰。留侯雖強食。輕舉亦何疑。

孤雲

四十年來住此山。入朝無補又東還。倚闌莫怪多時立。爲愛孤雲盡日閑。

自閔

破帽羸驂厭垢氛。挂冠歸伴故溪雲。年光疾病占強半。日景睡眠居七分。廬冢蕭條頻買涕。交朋零落久離羣。殘年豈復行孤學。自閔猶尊昔所聞。

贈雞

青銅三百買烏雞。闢地牆東爲擇棲。更聘一雌全物性。莫辭風雨五更啼。

子適爲其長兄置酒予亦與焉作五字示之

烏衣兄弟集。我亦據胡牀。晚菊數枝在。小園幽興長。霜清桑落熟。湯嫩雨前香。草草雖堪笑。他年未易忘。

太息

太息貧家似破船。不容一夕得安眠。春憂水潦秋防旱。左右枝梧且過年。

又

禱廟祈神望歲穰。今年中熟更堪傷。百錢斗米無人要。黃朽何時發積藏。

又

北陌東阡有故墟。辛勤見汝昔營居。豪吞暗蝕皆逃去。闕戶無人草滿廬。

代鄰家子作

社日淋漓酒滿衣。黃雞正嫩白鶩肥。弟兄相顧無涯喜。扶得吾翁爛醉歸。

山行

山光秀可餐。溪水清可啜。白雲映空碧。突起若積雪。我行溪山間。靈府爲澄澈。峻嶒崖角立。蟠屈路九折。黃楊與冬青。鬱鬱自成列。其根貫石罅。橫逸相糾結。上捫鸚鵡巢。下歷豺虎穴。流泉不可見。鏘然響環玦。出山日已暮。林火遠明滅。小憩得樵家。題詩記幽絕。

行過西山至柳姑廟晚歸

倚杖西山麓。褰衣古廟壩。斷雲依釣浦。細雨壓炊煙。廢學慙詩退。安貧覺氣全。霜天日易晚。鐘鼓隔城傳。

月夕幽居有感

五嶽名山采藥身。可憐騎馬踏京塵。浮名本是捩災物。謝事寧非得道因。出岫每招雲結伴。巢松仍與鶴爲鄰。劍南舊隱雖乖隔。依舊柴門月色新。

寒夜將旦作

白髮垂肩無二毛。胸中消盡少年豪。河傾月沒夜將旦。木落草枯秋已高。窗下燈殘候蟲語。牆隅樓冷老雞號。曲肱不復更成寐。起視寒空如斷鰲。

舍北獨步

霜露霏衣迫歲徂。天公欲爲老人娛。斷雲新月供詩句。蒼檜丹楓列畫圖。風葉蕭蕭歸獨鶴。煙波渺渺漾雙鳧。孤村薄暮誰從我。惟是詩囊與酒壺。

山村道中思蜀

當年萬里客西南。藥市題詩倚半酣。偶爲三遊羣玉府。遂妨重到百花潭。剡溪謾說思安道。函谷誰能識老聃。空乞丹青作橫幅。半堤寒日策羸驂。

不如茅屋底

鑄印大如斗。佩劍長挂頤。不如茅屋底。睡到日高時。

又
南伐踰銅柱。西征出玉關。不如茅屋底。高枕看青山。

又
火齊堆盤起。珊瑚列庫藏。不如茅屋底。父子事耕桑。

又
列鼎竇筵盛。籠坊從騎都。不如茅屋底。醉倒喚兒扶。

菜羹

青菘綠韭古嘉蔬。蓴絲菰白名三吳。臺心短黃奉天廚。熊蹯駝峯美不如。老農手自闢幽圃。土如膏腴水如乳。供家賴此不外取。襜褕寧辭走煙雨。雞豚下箸不可常。況復妄想太官羊。地爐篝火煑菜香。舌端未享鼻先嘗。

十月暄甚人多疾十六日風雨作寒氣候方少正作短歌以記之

昔我從行臺。宿師南山旁。仲秋已戒寒。九月常鬻霜。入冬即大雪。人馬有仆僵。土牀熾薪炭。旃毳如胡羌。果蔬悉已冰。熟視不得嘗。獵騎荷戈歸。爭獻狐與狼。是時意氣快。豈復思江鄉。邇來四十載。餘景迫耄荒。結茅鏡湖曲。氣候歲靡常。殘暑排不去。單衣作重陽。霜晚木未丹。地煖草不黃。玄冥失號令。瘴鬼意頓顛。忽焉風雨惡。縱擊勢莫當。頗疑地撼軸。又恐河決防。和泥補竅穴。乞火燎衣裳。霰雪雖未作。疾疢幸退藏。風爐薺糝美。瓦甑粳飯香。比鄰共安健。相與歌虞唐。

冬夜題齋壁

髮不能勝二寸冠。天教送老向江干。倚牆筇杖伴人瘦。綺瓦清霜爭月寒。壯志追思良可悔。危途遍歷始知難。一身著了餘何事。茅屋三間已太寬。

自遣

蔬食任無魚。山行可借驢。指攀猶把釣。眼澀未捐書。客少勝紛若。家貧亦晏如。時時顧影歎。頑似十年初。

蕩蕩

蕩蕩唐虞去日遙。孔林千載亦荒丘。六經殘缺幸可考。百氏縱橫誰復憂。釋書恐非易論語王迹其在詩春秋。君臣父子未嘗泯。吾道尙傳君但求。

晨起

曉枕初興白髮翁。弊裘百納葑爐紅。獨居漫受書狐媚。帶思難矜筆陣雄。舊學蟲魚箋爾雅。晚知稼穡講幽風。一身自喜無餘事。且度殘年風雪中。

卷六十一

述感

斷簡承孤學。窮閭負壯心。方憂一齒落。時一齒方搖動。何止二毛侵。買地開幽圃。招僧理廢琴。浮生祇如此。感慨不須深。

甲子歲十月二十四日夜半夢遇故人於山水間飲酒賦詩既覺僅能記一二乃追補之

拂衣金馬門。稅駕石帆村。喚起華山夢。招回湘水魂。心親頻握手。目擊欲忘言。最喜藤陰下。翛然共一樽。

又

小山緣曲澗。路斷得藤陰。忽遇平生友。重論一片心。與闌棋局散。意豁酒杯深。雞唱俄驚覺。悽然淚滿襟。

舟中夜賦

千里風塵季子裘。五湖煙浪志和舟。燈殘復吐惱孤夢。雨落還收生旅愁。城上霜笳入霄漢。煙中漁火耿汀洲。牧之未極詩人趣。但謂能輕萬戶侯。

舟中曉賦

木落霜清水鳥呼。扁舟夜泊古城隅。吹殘畫角鐘初動。低盡寒空斗欲無。浪迹已同鷗境界。遠遊方羨雁程途。高檣健席從今始。遍歷三湘與五湖。

漁家

江上漁家水蘸扉。閑雲片片傍苔磯。釣收鷺下虛舟立。橋斷僧尋別徑歸。海近岡巒多迤邐。天寒霧雨正霏微。半裘老作桐江叟。點檢初心幸未違。

遠遊

少年遊宦口。骯髒恥沉浮。見虎猶攘臂。逢狐肯叩頭。力行雖自許。早退豈人謀。予年六十餘。卽退閑故山。小艇煙波上。飄然得遠遊。

與兒孫小飲

歲暮寒多雨。村深早閉門。荒園摘葵芥。近市買雞豚。短褐聯三世。幽窗共一樽。吾曹常得此。餘事不須論。

遂初

狂本類三閭。歸仍慕二疎。何由滿人笑。但可遂吾初。奕奕沙堤馬。栖栖下澤車。細看俱外物。俛首老犁鋤。

與村鄰聚飲

冬日鄉閭集。珍烹得徧嘗。蟹供牢九美。聞人懋德言。麩賦中所謂牢九。今包子是。魚羹膾殘香。雞跖宜菰白。豚肩雜韭黃。一歡君勿惜。豐歉歲何常。

又

交好貧尤篤。鄉情老更親。釐香紅糝熟。餉美綠椒新。俗似山川古。人如酒醴醇。一杯相屬罷。吾亦愛吾鄰。

夜坐示子虞

裘薄知霜重。燈殘覺夜闌。爲農宜廢學。謝事等無官。踈懶貧難醒。沉綿死有端。大兒千里至。聊復爲加餐。

行飯暮歸

甃置觀書不耐閑。飄然梅塢竹籬間。霜風盡脫千林葉。雲氣平沉一面山。笑喚筇杖扶蹇步。聊憑村酒借朱顏。廟墻下歸來晚。宿鳥紛紛已漸還。

寒雨中夜坐

江村風雨晚冥冥。閉戶添衣愴客情。爐熱松肪如蠟爨。鼎煎茶浪起灘聲。團樂賴有兒同話。剝啄應無客可迎。聊

舉一杯生耳熱。頽然酣枕到窗明。

枕上

世間命薄有誰如。僵臥空山夢亦孤。三尺窗前燈半死。萬重雲外雁相呼。久貧僅守殘書笈。未死猶須幾酒壺。趣辦一棺那得緩。古人四十揣頭顱。

卽事

心與巖泉靜。形如野鶴臞。朝餐美藜藿。夜學講唐虞。婢老無釵澤。僮寒闕袴襦。所欣惟一事。無吏督殘租。

又

糲飯流匙滑。葵羹出脯香。有時留野客。亦復餉鄰牆。老圃傳占法。行僧遺藥方。未爲全絕物。終勝利名場。

雜感

買馬當可乘。築舍當可居。快馬多覆敗。傑屋鬼所狙。徒行與露坐。安穩無後虞。所以古達人。秋風憶葦臚。

又

士生誦二典。恍若生唐虞。陞降奉玉帛。可否聞吁俞。闕里得其傳。功與造化俱。孰知千載後。乃尊重譯書。

又

擁裘南窗下。堅坐試定力。爐香亦不散。伴我到曠黑。絕交近爲我。遊世易顛踣。默默何所爲。且復自休息。

又

上峽聞竹枝。入秦聞烏烏。奏曲未及終。涕淚淒已濡。還山風月夕。菱唱起鏡湖。雖無遠遊感。白首亦窮途。

又

吾聞之古方。有病當鮮食。如其不能爾。金丹亦無益。我老更事多。此語知造極。子房從赤松。千載推達識。

又

夢育小兒女。便有無窮愛。謁醫問疾恚。對客誇警蹇。晨雞忽喚覺。此愛復安在。人生困糾纏。一笑脫囚械。

閑中自嘲

鏡湖西畔有漁扉。竊比玄英似庶幾。風月定交殊耐久。煙波得意可忘歸。曾行萬里求微祿。亦伴諸公踐駭機。試問卽今成底事。晨飧依舊北山薇。

暇日坐山麓松石間作

偶曳枯筇出槿籬。松間盤石坐移時。飢蟿齧草無餘綠。乳鵲營巢有隨枝。幽事類分皆可譜。高情辭達自成詩。莫嗟寂寂終吾世。正是他年一段奇。

得子虞臨安舟中書因寄

口水悠悠雙鯉魚。眼明初拆入關書。殘年已覺口如客。一念還成淚滅裾。春近預憂歸夢短。潮回莫遣寄聲疎。何時可棄微官縛。五畝荒畦共荷鋤。

書喜

寵辱元知不足驚。退居兀兀餞餘生。水魚可釣羹材足。霜稻方登糴價平。鄰媪已安諸子養。閔氏糧以貧甚棄諸子而去。今始得復歸。園丁初葺數椽成。韓氏得屋湖上。以種蔬爲業。鄉閭喜事吾曹共。一醉寧辭洗破觥。

又

十月東吳草未枯。村村耕牧可成圖。歲收儉薄雖中熟。民得蠲除已小蘇。家塾競延師教子。里門罕見吏徵租。老昏不記唐年事。試問元和有此無。

老學菴夜興

冷臥空齋枕曲肱。飢鷹驚起髮鬢髭。煙霞華嶽逃名客。風雪廬山入定僧。櫛葉蔽身勝衣帛。金丹照室不燃燈。禿翁自笑無名字。聊向江湖襲舊稱。取江湖散人之意。

感昔

百丈庚寅上峽時。至今猶健豈前期。家人暗換吾何歎。鏡裏衰翁復是誰。上峽骨肉在者四子爾。今皆出仕。

又

神女祠前猿夜鳴。相公溪上草初生。重遊惟有西窗夢。一點燈青夢不成。

又
白帝城邊鶯亂啼。憶騎瘦馬踏春泥。老來感舊多悽愴。孤夢時時到瀼西。

又
小益晨裝雨作泥。南沮涉水馬長嘶。山腰細棧移新路。驛壁流塵闌舊題。

又
曾從征西十萬師。白頭回顧只成悲。雲深駱谷傳烽處。雪密嵒山校獵時。

又
老君洞外小朱扉。雲壓寒空雪欲飛。結陣弓刀邊壘去。挂鞍狐兔獵場歸。

又
少時失腳利名間。寸步何曾不險艱。造物恐人渾忘卻。夢中憂患尙如山。

孤村

少年誤計落人間。晚臥孤村日掩關。小室易溫爐火省。幽窗常暗架書閑。梅橫籬落春初動。雲隔川原雪尙慳。欲喚一藤同勝踐。恨無傑句壓溪山。

村舍書事

紙窗百衲地爐紅。圍坐牛醫卜肆翁。時節杯盤來往熟。朝晡鹽酪有無通。男丁共結春耕稠。婦女相呼夜績同。老子頽然最無事。客歸自策讀書功。

小葺居舍

野水楓林下。殘年亦自存。刈茅支漏屋。插棘補頽垣。把釣襟靈爽。爭棋笑語喧。晚窗幽興極。共酌黍醅渾。

冬至

老遇陽生海上村。川雲漠漠雨昏昏。鄰家祭徹初分胙。賓客泥深不到門。萬卷縱橫忘歲月。百年行止付乾坤。明朝晴霽猶堪出。南陌東阡共一樽。

夜坐示子適兼示元敏

微霰不成雪。大風俄散雲。孤燈騎還吐。斷雁遠猶聞。冉冉新春動。遙遙清夜分。兒孫未須睡。吾與汝論文。

客懷

客懷病思兩悽悽。瘦馬長韉濺雪泥。道左忽逢曾宿驛。壁間閑看舊留題。村醅酸薄陳山果。旅飯蕭條嚼凍齏。何處人間非夢境。恍然重到劍關西。

雜書幽居事

抱瓮窮園叟。還山老布衣。死邊常得活。鬧處偶容歸。釣恐魚吞餌。棋憂客墮機。此心君會否。洗盡百年非。

又

淡薄齊榮辱。恢疎略怨恩。爐常養丹母。手自斲桐孫。炎火下照海。黃河高泝源。道翁來不速。一笑倒吾樽。

又

庭曠多延月。齋空半貯雲。松聲行路共。泉脈近鄰分。采藥九蒸曝。朝真三沐熏。林間有叢杞。繞屋夜猿嗔。

又

貧困雖終老。胸中尚浩然。直今頭搶地。未害鼻撩天。種菜慳三畝。苦茅僅數椽。布衾常不暖。夜夜亦安眠。

又

卜築南湖上。梅花幾度春。身緣作詩瘦。家爲買山貧。野步維漁艇。江樓岸醉巾。誰知會稽叟。不媿葛天民。

題齋壁

門前枯葉滿荒街。堂下殘蕪擁土階。蓬蓽蕭條如旅店。豆蔬淡薄學僧齋。畫存真火溫枵腹。夜挽黃流灌病骸。喚取鄰翁同結社。他年仙去與君偕。

探梅

歲月相尋豈有窮。早梅喚醒醉眠翁。坐中酒量人人別。花底春風處處同。白帝城邊微雪過。青衣江上夕陽紅。錦囊空復殘詩在。分付悲歡一夢中。

新移竹栽喜於得雨而池中鷓鴣乃以水溢而去戲以長句記之

霖雨三日天沉陰。西溪水長二尺深。土濡新竹有生意。池滿文禽無住心。竹根蘇活賴此雨。禽亦歸飛戲煙浦。去留雖異各欣然。抽萌哺子全其天。

讀宛陵先生詩

李杜不復作。梅公真壯哉。豈惟凡骨換。要是頂門開。鍛鍊無遺力。淵源有自來。平生解牛手。餘刃獨恢恢。

勉學

學力艱危見。精誠夢寐知。衆人雖莫察。吾道豈容欺。雷雨含元氣。著龜決大疑。爲儒能體此。端不負先師。

道室試筆

浮雲萬事不到眼。千歲人間心尙孩。屏風疊下看花落。扇子峽中聞雪來。

又

兜羅絲雲常滿谷。勃落葉衣無四時。中原百戰血塗野。此老醉眠初不知。

又

事來得失若山重。放下始知前日狂。一枝藜杖一壺酒。何處人間無醉鄉。

又

吾家學道今四世。世佩施真三住銘。一窗蘿月照孤詠。萬壑松風吹半醒。

又

死來尙戀遊金谷。病廢猶難放柳枝。等是胸中不浩浩。樂天莫笑季倫癡。

又

明明行路有神仙。世上求仙卻不然。貪冒苦多廉讓少。恐君未得盡天年。

治心

治心無他法。要使百念空。秋毫作其間。有若海颺風。颺風孰能止。三日力自窮。我徐躡其後。杲杲日出東。向來一

噫者。畢竟誰爲雄。萬里靜海氛。一望開天容。會從安期生。高會蓬萊宮。

夜夢遇老人於松石間。若舊嘗從其遊者。再拜。絃間闕。老人亦酬接。甚至云。

遼海曾從化鶴丁。百年塵土汚巾瓶。萬山深處遇行李。再拜起時如醉醒。綠樹巖前開藥笈。白驢背上指丹經。雲霄平步尋常事。不用求方更解形。

過鄰家

病去詩情動。寒深酒戒開。兒孫扶每出。鄰里喚還來。雲重時飛雪。春遲未見梅。山園多芋栗。夜話且燔煨。

村飲

舊隱青山在。衰顏白髮新。推移忝前輩。踈嬾似高人。擊鼓驅殤鬼。吹簫樂社神。家家皆有酒。莫吐相君茵。

市飲

學道無多事。消陰服衆魔。春雷驚蟄戶。海日浴鯨波。大勇收全勝。靈襟襲太和。何妨會稽市。取酒獨酣歌。

社飲

東作初占嗣歲宜。蠶官又近乞靈時。傾家釀酒無遺力。倒社迎神盡及期。先醉後醒驚老億。路長足蹇歎歸遲。西村漸過新塘近。宿鳥歸飛已滿枝。

舟中作

一葉輕舟一破裘。飄然江海送悠悠。閑知睡味甜如蜜。老覺羈懷淡似秋。失侶雲間孤雁下。耐寒波面兩鸕浮。年逾八十真當去。似爲雲山尙小留。

風雲晝晦夜遂大雪

大風從北來。洶洶十萬軍。草木盡偃仆。道路暝不分。山澤氣上騰。天受之爲雲。山雲如馬牛。水雲如魚龍。朝聞鬪白日。暮重壓厚坤。高城炭欲動。我屋何足掀。兒怖牀下伏。婢恐堅閉門。老翁兩耳聾。無地著戚欣。夜艾不知雪。但覺手足皸。布衾冷似鐵。燒灑作微溫。豈不思一飲。流塵暗空樽。已矣可奈何。凍死向孤村。

大雪

海天黯黯萬重雲。欲到前村路不分。烈風吹雪深一丈。大布縫衫重七斤。

雪夜

病久湖邊五畝園。雪風一夜坼蘆藩。燎爐薪炭衣篝暖。圍坐兒孫笑語溫。菜乞鄰家作菹笑。酒賒近市帶醅渾。平居自是無來客。明日衝泥誰叩門。

雪霽

米盡囊空莫問渠。天公自解養迂疎。雪泥蹙路斷來客。朝日滿窗宜讀書。漸暖橫林聞語鳥。乍晴幽圃富嘉蔬。東家小蹇那須借。早晚吾兒送鹿車。子坦欲作一小轎子來。

雪後

兩解平簷雪。風收際海雲。根蘇萱出土。冰斷水生紋。遊舫家家葺。行歌巷巷聞。太平元有象。端爲謝東君。

夜寒與客燒乾柴取暖戲作

槁竹乾薪隔歲求。正虞雪夜客相投。如傾激激蒲萄酒。似擁重重貂鼠裘。一睡策勳殊可喜。千金論價恐難酬。他時鐵馬榆關外。憶此猶當笑不休。

排悶

殘雪融成雨。寒燈結作花。睡稀聽鬻鼠。坐久送棲鴉。食似開僧鉢。居如寓店家。餘年不須問。卽此是生涯。

席上有舉呂居仁詩者因次其韻示坐客

是身如鼠穴太倉。七十始辦求深藏。扶衰復拜求舊詔。入對講殿瞻顛昂。期年蒙恩許謝病。家居更辱鄉黨敬。今夕不醉無庸歸。此老餘年君所知。

予使江南時以詩投政府丐湖湘一麾會召還不果偶讀舊稿有感文字塵埃我自知。向來諸老誤相期。揮毫當得江山助。不到瀟湘豈有詩。

柳橋

村路初晴雪作泥。經旬不到小橋西。出門頓覺春來早。柳染輕黃已蘸溪。

海上輕鷗何處尋。煙波萬里信浮沉。今朝忽向船頭見。消盡平生得喪心。

鷺

雪鬢春回亦樂哉。棋軒正對小灘開。翩翩飛鷺真吾友。肯爲幽人一再來。

感物

日落烏將數子歸。風和雉挾兩雌飛。不如村舍安孤寂。父子飄然兩褐衣。予齋居已久。又諸子皆出仕。獨與子遠相對。如世外人。

甲子歲暮

世間巧拙亦何施。萬事難禁歲月移。遲死幾時天有意。要令自悟不須師。

出遊至僧舍及逆旅戲贈絕句

山僧邂逅卽情親。野叟留連語更真。淡淡論交端有味。一彈指頃百年身。

又

飯炊適熟如延客。犬喜來迎似到家。雨滴茅簷草煙溼。不妨笑語暫諠譁。

歲暮出遊

殘曆消磨無半紙。一年光景又成非。瓦溝雪水滴欲盡。江路梅花開尙稀。竹院篝燈留度宿。旗亭誇酒勸無歸。此身自笑知何似。萬里遼天一鶴飛。

出遊所至皆欣然相迎口占示之

寓館兼山澤。行裝半兩晴。隨宜分藥物。投老惜人情。邂逅成新識。慇懃講舊盟。農家尤可念。迎勞輟春耕。

題旅舍壁

老子殘年未易量。出門隨處得徜徉。窗櫺日淡僧房暖。竈突煙青旅甌香。濁酒可求敲野店。舊題猶在拂頽牆。閑來又取丹經讀。夜就松明解布囊。

野人舍小飲

梅市波光遠。柯橋柳色新。百年情分熟。數酌笑言親。沙上人爭渡。街頭婦賣薪。寥寥隔林鼓。歲暮賽江神。

自近村歸

雪晴村路尙殘泥。茅屋清寒正要低。野渡船虛飛鳥集。煙村路近蹇驢嘶。堅頑那復愁空囊。老健猶能伴架犁。蹴榻不僵君會否。更須百瓮享黃齏。

夢華山

古松偃蹇谷谿衍。太華峯前野老家。久客未歸丹竈冷。碧桃八十一番花。

歲暮與鄰曲飲酒用前輩獨酌韻

出會稽南門。九里有聚落。雖非衣冠區。農圃可共酌。野實雜甘酸。草具無厚薄。小童能擊筑。一笑相與樂。徒手出叢花。空中取丸藥。王禮雖可笑。衆客亦起酢。聊持綴宿好。未用嘲淡泊。窮達則不同。亦踐真率約。予年過八十。故物但城郭。避御名從省文。作詩記清歡。未媿華表鶴。

山中飲酒

百屋堆金錢。萬戶封公侯。富貴人所羨。熟計終繆悠。有酒君但飲。有山君但遊。雖云亦夢事。要是勝一籌。獨醉新豐市。遺魂招馬周。清獻蘇門山。曠度交公休。爛爛目如電。凜凜氣愈遒。騎鯨歸東海。已矣吾何求。

客亭

荻浦煙汀並海涯。一枝柔艣語咿啞。久從野老非生客。慣寓僧廬勝在家。乘興村村俱有酒。逢春處處可尋花。朝來雪霽梅初動。又向郵亭閱歲華。

除夜

野水楓林屋數椽。寒爐無火坐無氈。殘燈耿耿愁孤影。小雪霏霏送舊年。椒酒辟瘟傾潑灑。藍袍侷鬼舞蹁躑。從今供養惟春齋。莫羨愚公日萬錢。

卷六十一

乙丑元日

好在屠蘇酒。扶衰把一卮。家貧爲壽略。曆閏換年遲。薦廟須扶拜。題門強綴詩。惟思買春困。熟睡過花時。俗有賣春困者。予老體思睡。故欲買之。

元日讀易

伏幾三十餘萬歲。傳者太山一毫芒。春秋雖自魯麟絕。禮樂蓋先秦火亡。孟軻財能道封建。孔子已不言鴻荒。於庠易學幸未泯。安得名山處處藏。

自開歲陰雨連日未止

江雲漠漠雨昏昏。歸老山陰學灌園。十里羊腸僅通路。三家鐙腳自成村。應時罇飢聊從俗。耐久鍾馗儼在門。近縣傳聞頗多盜。呼兒插棘補頽垣。俗有年罇飢之語。予貧甚。今歲遂不能易鍾馗。

枯菊

翠羽金錢夢已闌。空餘殘藥抱枝乾。紛紛輕薄隨流水。黃與姚花一樣看。

又

積雪嚴霜轉眼空。春回無處不春風。欲知造物無窮妙。但看萱根與菊叢。

村舍雜興

冉冉年華速。昏昏睡思濃。廢書心自愧。謝病客能容。雨急鐘微度。溪湍碓自舂。可憐燈下影。隨處伴衰慵。

又

堅臥非由病。端居不是齋。世情元自薄。人事固多乖。晨飯炊稊米。宵行點豆糜。昔人言可用。第一忌安排。徐仲車有請問于安定先生。先生曰莫安排。

又

白首返吾鄉。功名罷激昂。掃除魔眷屬。砭熨病膏肓。老圃勤供菜。饜童解炷香。黃昏那用問。且喜日舒長。

又

粥罷重投枕。晨起。瞞後再睡。最佳。燈殘起讀書。閉門常自得。作計更誰如。箭茁白於玉。櫻花長比魚。盤殮有此味。勿怪食無餘。

又

遊宦風波惡。還家日月長。厭煩思病忘。避俗欲陽狂。絕意功名會。收身翰墨場。著書吾豈敢。尚可述農桑。

夜興

窮巷行人絕。高城漏鼓稀。劇談頻翦燭。久坐旋更衣。飢鼠衝人過。啼鴉冒夜飛。客歸吾未睡。孤影自相依。

示鄰曲

北陌東阡好弟兄。老年幸復主齊盟。同嘗春韭秋菘味。共聽朝猿夜鶴聲。百世不忘耕稼業。一壺時敘里閭情。諸孫識字吾真足。安用鵬搏九萬程。

夢中作

華山敷水本閑人。一念無端墮世塵。八十餘年多少事。藥爐丹竈尙如新。

春雨

倚闌正爾受斜陽。細雨霏霏渡野塘。本爲柳枝留淺色。卻教梅蘂洗幽香。小露蝶粉初何惜。暫灑鶯聲亦未妨。造物無心寧徧物。憑誰閑與問東皇。

草堂

幸有湖邊舊草堂。敢煩地主築林塘。辛幼安每欲爲築舍。予辭之遂止。漉殘醅瓮葛巾漉。插遍野梅紗帽香。風緊春寒那可敵。身閑晝漏不勝長。浩歌陌上吾無怪。世譜推原自楚狂。陸氏舊譜云。本出接輿後。

道室

筮遇風山第六爻。翛然盡謝俗間交。謀生舊買雲三頃。託宿新分鶴半巢。露下丹芽生藥壠。月明金粉落松梢。眉

間喜動君知否。借得丹經手自抄。

旅次有贈

黃鶴樓前逢劍客。青衣江口見詩人。天涯莫起漂零感。物外終爲自在身。賣馬求船雖少日。阻風中酒動兼旬。中原早晚胡塵靜。緜月嵩雲要卜鄰。

雜感五首以不愛入州府爲韻

莘渭二老人。耕釣俱白首。功烈在人間。如天有北斗。方其未遇時。自處固不苟。夫豈邀虛名。欲眩千載後。降及秦漢王。望古猶培塿。猶能守所聞。外物不得誘。君看魯二生。亦豈聖人偶。凜然諸儒間。人可我獨不。

又

山棲天與癖。酒復甚所愛。雖云慙黃綺。亦慕嵇阮輩。失脚落人間。二事略皆廢。晚歸臥雲壑。謂此在券內。如何疾屢作。大與初意背。好山雖在眼。動步輒有礙。酒戒復堅持。如隄憂蟻潰。何以遣餘年。閉戶淡蕘菜。

又

鸞鳩搶榆枋。枯魚過河汙。鵬鯤九萬里。此豈汝所及。丈夫志古人。絕世而獨立。遠遊馬蹏穿。高臥劍鋒齧。其初所抱負。固自高巖岌。安能與兒曹。俛首就維繫。君看折腰趨。孰若舉手揖。芝老尙可餐。修門戒輕入。

又

洛水初平時。草木充九州。禽獸孳育繁。與人爲敵讎。于時聖人作。日夜爲民憂。思有以勝之。食肉而服裘。然後人奠居。禾黍歲有秋。豈知千載後。戕殺無時休。一食刀几赤。百味供膳羞。豪侈方相誇。哀哉非始謀。

又

我年甫三十。出身事明主。狂愚斥不用。晚辟征西府。蹭蹬過錦城。邂逅客嚴武。十年醉郾筒。陽狂頗自許。青城訪隱翁。西市買幽圃。如何復不遂。歸聽鏡湖雨。結廬三閭茅。泛宅一枝艖。天真儻可全。吾其老煙浦。

自詠絕句

雙鬢蕭條失故青。躬耕猶得養餘齡。明時恩大無由報。欲爲鄉鄰講孝經。

又
深村人有結繩風。晚歲身爲帶索翁。啜粥茹蔬茅屋底。誰知也過百年中。

又
不淪鬼錄不登仙。遊戲杯觴近百年。小市跨驢寒日裏。任教人作畫圖傳。

又
逆旅門前撥不開。先生醉策蹇驢來。未言乞得囊中藥。一見童顏且壓災。

又
遠遊索手不贖糧。新米臨時取道傍。今日清明行亦好。經旬風雨住何妨。

又
一條紙被平生足。半盃藜羹百味全。放下元來總無事。雞鳴犬吠送殘年。

又
平生寧獨愛吾廬。何處茅簷不可居。晝闕僮奴停接客。夜無膏火罷觀書。

又
睡著何曾厭夜長。老人少睡坐何傷。無燈無火春寒惡。破絮羸氈卽道場。

風月吟

去日如馳衰有驗。萬事惟當就收斂。可憐未與酒相忘。風月婆娑猶不厭。有時清夜行中庭。幅巾藜杖影玲峴。松風十里吹殘夢。蘿月三更照半醒。河傾雞唱吟未已。爽透髮根清入齒。晨光底事不貸人。轆轤汲水啼鷓起。

年光

無賴年光逐水流。人間隨處送悠悠。千帆落浦湘天晚。孤笛吟風鄆縣秋。小市鶯花時痛飲。故宮禾黍亦閑愁。久留只恐驚凡目。又向西涼上酒樓。

龜堂

莫笑龜堂陋。生涯實有餘。春寒擁重褐。晨飯富藏蔬。薄技雕蟲爾。虛名畫餅如。兄時論語在。敢負此心初。

春晴

春如人易老。愁與漏俱長。酒著多思睡。花熏直欲狂。新晴乾蝶翅。微暖滑鶯吭。誰見龜堂叟。搗藤送夕陽。

閉門

殘髮凋零不滿巾。閉門聊得養天真。恐傷藥草停除地。為惜松槎禁伐薪。獨木架成新略約。一峯買得小嶙峋。蕭

然便覺渾無事。談笑時時過近鄰。

又

衰疾厭厭不易醫。閉門惟與睡相宜。狂曾忤物慵迎客。瘦不勝衣悔作詩。數簡隱書忘世味。半甌春茗過花時。寂

寥終歲君無誚。正是幽居一段奇。

有所感

世事真成風馬牛。細思愈覺此生浮。舊交散後知心少。行路難來出戶愁。氣節陵夷誰獨立。文章衰壞正橫流。魯

中狂士今安有。淚盡朱雲草滿丘。

八十一吟

八十古云毫。吾今不啻過。山程兩芒屨。水宿一漁蓑。雞唱劉琨舞。牛疲寧戚歌。春寒欺短褐。將奈此翁何。

高吟

食少支撐惟恃粥。力衰舉動輒須人。誰知造物猶遺漏。擁鼻高吟又一春。

湖上作

耳目聰明手足輕。應酬幽事未忘情。百年日向漁樵過。千里雲從几席生。樽酒每招鄰父共。圖書時與小兒評。但

餘煙水無儔侶。堪笑沙鷗欲抗衡。

賞花

湖上花光何處尋。朱朱白白自成林。衰翁何預傷春事。閑客猶懷愛物心。欲隨每愁風驟起。正開卻要日微陰。蘭

亭禹廟平事一榼芳醪莫厭深

園廬

天假殘年使荷鉏。白頭父子守園廬。四朝曾遇千齡會。七世相傳一束書。物理從來多倚伏。人情莫遣得親疎。功名自有英雄了。吾輩惟當憶遂初。

乍晴行西村

堤樹叢祠北。煙村古埭南。買魚論木盎。挑薺滿荆籃。積潦經旬月。晴光見二三。農功殊可念。保麥復祈蠶。

書歎

塵甑炊畚粟。羸僮策蹇驢。自從行卷日。直至挂冠餘。揣分元知止。求官實抱虛。園蔬幸無恙。父子日攬鋤。

新製小冠

淺醉微吟獨倚闌。輕雲淡月不多寒。悠然顧影成清歎。新製柝欄二寸冠。

又

柝欄冠子輕宜髮。練布單衣爽辟塵。縱不能詩亦堪畫。年餘八十水雲身。

書逆旅壁

市遠過三里。店孤無四鄰。窄纔容一客。久或住經旬。病嫗求風藥。樵兒餽爨薪。人情愈諳熟。來往不辭頻。

倚樓

曲曲闌干縹緲間。哦詩本欲破除閑。無端又起天涯感。淡墨生綉數點山。

又

樓上憑闌小立時。淡煙漠漠雨絲絲。年光日日有佳處。不解春寒偏入詩。

小雨

小雨明復闇。餘寒去又來。新苔綠砌上。殘杏過籬開。垂老身餘幾。逢春心尙孩。江天近寒食。林外過輕雷。

書歎

無能自號癡頑老。尙健人驚矍鑠翁。未向松根藏病骨。尙尋花底醉春風。翩翩孤影如歸鶴。冉冉流年付斷蓬。曾謁高皇識隆準。傷心無復一人同。紹興朝士自周丞相下世。獨予尙在爾。

遷雞柵歌

烏雞買來逾歲年。庭中赤幘何昂然。吾孫初生長晨唱。家人共議欲汝捐。烏窮必啄奴豈憚。雞賣將烹吾所憐。貴人賤畜雖古訓。物理寧不思兩全。舊棲沉亦苦沮如。新柵幸可圖完堅。東園稍去房奧遠。挾雌將雞從此遷。竹簞朝暮有餘粒。瓦缶亦自盛清泉。啣啣風雨守汝職。膈膊勿恤驚吾眠。

春興

暖鶯催桑眼。晴光長草心。沙平看臥犢。密葉聽鳴禽。買酒貧爲祟。登山病不禁。終年惟一褐。捫蝨又春深。

小園

蕭散遺塵事。栽培得小園。土鬆花意活。林暖鳥言繁。殮酪供晨鉢。菹芹薦晚樽。餘年君莫問。送老向孤村。

二月晦日夜夢欲卜居近邑道遇老父告以不利欣然從之

夢中行卜居。道遇白髯叟。一面出苦言。戒我棄勿取。人之生實難。失腳墮虎口。我深感其言。解衣奉杯酒。豈知立談間。得此直諒友。起坐心茫然。天闕樓挂斗。

新晴

苦雨幾終月。新晴喜夕陽。扶行呼稚子。隨意下茅堂。草茂知聲健。巢新覺燕忙。興闌歸亦好。袖手獨焚香。

病中作

苦雨侵衰骨。餘寒著弊裘。病多辭社飲。貧甚輟春遊。日日親蔬圃。時時弄釣舟。回頭語造物。與子兩無求。

示子適

敢恨吾生後聖賢。六經雖缺尙成編。本來堯舜身親見。孰謂丘軻道不傳。妙理豈求逢腋外。淳風寧在結繩前。此身未死還堪勉。更伴吾兒學數年。

窮居

羸病無時已。窮居只自悲。巾偏非雨墊。衣弊豈塵縑。米盡時炊稗。樽空慣啜癘。逐貧雖有賦。乞食未成詩。

春晚自近村歸

山陰道上柳如絲。策蹇悠悠信所之。曲水已過修禊集。餘寒不減試燈時。貧猶自力常謀醉。病不能閑日賦詩。誰道茅簷苦幽獨。一鉤新月是相知。

開孫滿月

夜夢奇童拜且言。今乃幸得生高門。夢後一日得開孫。虎兒墮地百獸奔。未論頭角與眉宇。但聽啼聲誰敢侮。就令長大未必奇。亦作人間孔文舉。

小築

西郊小築臨煙汀。南山秀色入窗櫺。朝鐘暮鼓在何許。乃是會稽山陰之蘭亭。堂中老人白鬚鬢。手扶藤杖垂九齡。客來不語坐至夕。往者絕物今忘形。牆隅老雞新樹柵。長號催上東方星。老人亦起穿兩屨。巖泉漱齒讀黃庭。

春晚歎

一風已快晴。微雲復成雨。盛麗女郎花。坐看委泥土。蜂房蜜已熟。科斗生兩股。堂堂一年春。結束聽杜宇。老夫久臥疾。乃復健如許。便當裹米糲。醉爛作端午。

鷓鴣

翩然一鴉升。倏爾一鴉下。非惟飽殘餘。亦可免彈射。巡簷攫脯脩。入舍掠膾炙。嗟汝無盈厭。坐是取驅嚇。物情貴能改。一嘗亦可黃。併語黃雀羣。勿輕敗吾稼。

舍東四詠

疎籬

數掩圍柴荆。王維畫不成。尤憐月中影。特地起詩情。

松棚

松棚尋丈地。客至共開顏。堪笑杜陵老。坐思千萬間。

盆池

寒溜初通後。新荷未長時。誰持大圓鏡。爲我照鬢眉。

小徑

環繞無十步。捷行財半之。安西九千里。自有著鞭時。

示元敬

學貴身行道。儒當世守經。心心慕繩檢。字字講聲形。吾已鬢眉白。汝方矜佩青。良時不可失。苦語直須聽。

暮春

掠面微風吹宿醒。送春空有不勝情。風煙老盡王孫草。時聽桑間小婦聲。

又

辛夷海棠俱作塵。紫魚蕓菜亦嘗新。一聲布穀便無說。紅藥雖開不屬春。

又

市橋岸下泛湖舟。雕檻疎簾半上鈎。春事幾何君惜醉。明朝赤幟插譙樓。遊欄至立夏止。

又

袂除已過暮春初。綵舫相銜十里餘。浮蠟喜嘗新店酒。流塵閑拂壞垣書。

書感

楚些難招去。幹魂正令舌在向誰論。中分白日歸欹枕。全付青春與杜門。瘦瘵啞人愁履虎。區區染指畏嘗鼉。殘年誓報嗟何有。虛負明時養老恩。

晨起出南堂

曉枕華胥誰喚回。下堂拽杖一悠哉。啼鴉已逐晨光起。飛鷲初衝宿霧來。石路少行生蔓草。柴扉多閉長莓苔。身閑亦未全無事。檢校幽花幾樹開。

春晚小飲

病臥虛齋一味慵。今年春事又成空。籀龍奮迅風雷際。木筆凋零霧雨
中。平野草深黃犢健。斷溪水長蠶船通。小兒偶得官樓酒。煮醢餽乾一醉同。

殘春

江鶯堆盤炬炷香。山家節物亦窮忙。桑間甚紫蠶齋老。水面秧青麥半黃。語燕似催春事去。遊絲不似客愁長。鄉村年少那知此。處處喧呼蹴鞠場。

又

過了清明日愈遲。年華不復在辛夷。誰知綠葉陰成處。正是青天露坐時。茂草滿庭喧鼓吹。嫩湯出鼎試槍旗。衰翁敢作明年計。剩與東君惜語離。

聞山步有虎

茅屋穿漏雨送春。村路斷絕虎啞人。采桑鋤麥皆結伴。兒童出門翁媪嗔。

久雨初霽

兩月涔涔雨不休。今年春盡尙重裘。水深草茂羣龍怒。日出風和宿麥秋。陂壞隄防誰與築。市遙鹽酪絕難求。農家辛苦尋常事。賣劍方當更買牛。

初夏幽居雜賦

雨霽逢初夏。胡牀蔭綠槐。半酣方嵬峨。假寐忽咍臺。小穗閑簪麥。微酸細嚼梅。衰翁不禁老。更著物華催。

又

過盡一春雨。園林氣少和。偶然扶柳栗。復爾坐盤陀。小草數行字。殘花一曲歌。公卿非傲汝。無奈愛閑何。

又

水際閑將鶴。林間獨擁琴。披叢采香草。映樹看珍禽。正使居無屋。猶勝突不黔。過春差覺健。處處得幽尋。

又

籬落魚池北。房櫺道院東。水紋藤坐榻。山字素屏風。采藥松岡近。投竿荻浦通。悠然搔短髮。心事寄冥鴻。

又

曲曲羊腸徑。疎疎麝眼籬。渴蜂窺硯水。狂蝶入書帷。一枕輕安夢。數聯蕭散詩。餘生已過足。不必到期頤。

又

闢地翦蓬蒿。何曾歎作勞。藥名尋本草。蘭族驗離騷。北澗穿籬過。南山出屋高。回頭看富貴。何啻一秋毫。

又

修名寧復冀。餘日苦無多。已歎堂堂去。將如寂寂何。編籬護香草。埋盎貯清波。兒戲君無笑。相從且浩歌。

兩

家近蓬萊白玉京。草堂登望不勝清。初驚野色昏昏至。已見波紋細細生。殘醉頓消迎亂點。微吟漸苦入寒聲。只

愁今夕虛簷滴。又對清燈夢不成。

自閔

主人元是客。儒士卻成僧。垂老貧如昔。經春醉未曾。褰衣身傴僂。顧影髮鬢鬢。忽憶東岡路。捫蘿試一登。

蔬食

牆陰春蕨老。筍蕨正登盤。野饑元無婦。村醪不屬官。何由取熊掌。幸免買豬肝。猶勝煩秦相。綈袍閱一寒。

讀阮籍傳

天生父子立君臣。萬世寧容亂大倫。籍輩可誅無復議。禮非爲我爲何人。

杜宇行 鄉中以杜宇早鳴爲蠶麥不登之候

去年杜宇號阡陌。家家聚首憂蠶麥。豈惟比屋衣食憂。縣家亦負催科責。今年略不聞杜宇。蠶收麥熟人歌舞。豈

惟糯新湯餅寬。隣里相約先輸官。

捕虎行 自故歲有三虎出上臯天衣山谷近者尤爲人害捕之未獲

山村牧童遭虎噬。血肉俱盡餘雙髻。家人行哭覓遺骨。道路聞之俱掩涕。州家督尉宿山中。已淬藥箭攬長弓。明

朝得虎徹檻筭。縑絲擣麩歌年豐。

遺興

前歲峩冠領石渠。卽今山市醉騎驢。目衰書卷研求嬾。心弱詩章鍛鍊疎。風雨吾廬嗟獨破。齋鹽每食歎無餘。燈前卻有欣然處。稚子談經屢起予。

三齒墮歌

一葉落知天下秋。三齒墮矣吾生休。詩人未脫紈袴態。尙樂華屋悲山丘。蓼花荻葉可以解我憂。鷓鴣白鷺可以從我遊。君看貂蟬與兜鍪。等爲岑岑壓我頭。豈知石闌干下買籜笠。一棹飄然煙雨舟。不須強預家國憂。亦莫妄陳帷幄籌。功名富貴兩悠悠。惟有杜宇可與謀。

龜堂初暑

淪漪一曲遶茅堂。葛屐紗巾喜日長。多事林鳩管晴雨。依人海燕度炎涼。深枝著子纍纍熟。幽草開花冉冉香。安得此時江海上。與君袖手看人忙。

衰歎

十年三墮齒。久矣歎吾衰。塵塵循天理。兢兢到死時。窮空顏子巷。勤苦董生帷。道遠餘生趣。常憂日影移。

初夏閑步村落間

薄雲靄日不成晴。野水通池漸欲平。綠葉忽低知鳥立。青萍微動覺魚行。醉遊放蕩初何適。睡起逍遙未易名。忽遇湖邊隱君子。相攜一笑慰餘生。

夜興

鬢毛飽受雪霜侵。一褐蕭條寄故林。簷雨滴回羈枕夢。城笳喚起塞垣心。平生恥露囊中穎。垂老甘同爨下琴。燈燼欲殘看瘦影。不妨袖手坐愔愔。

卷六十二

寄十二姪

庚寅吾入蜀。西過齊安城。雪堂拜老仙。眉宇寒崢嶸。微泉尙如昔。激激琴筑聲。龍蛇入筆力。斷石臥縱橫。戊戌奉詔追。觸熱萬里程。歸途抵齊安。歲月浩可驚。三日乃東下。鼓角遙送迎。安國有老僧。元祐初載生。蟬聯說舊事。耳目猶聰明。徒行就船別。耿耿惻愴情。豈知二紀後。汝乃爲此行。追懷昔遊地。未語涕已傾。念汝雖並塞。殘虜方守盟。職雖在警盜。枹鼓寂不鳴。惟當奉法令。日夜撫孤惻。官卑俸入薄。切勿厭藜藿。勇如赤壁戰。節若江水平。人誰不汝知。況事賢公卿。二山與七家。相望兩柴荆。歸來講學暇。襪襖同春耕。

出塞四首借用秦少游韻

北伐下遼碣。西征取伊涼。壯士凱歌歸。豈復賦國殤。連頸俘女真。貸死遣牧羊。犬豕何足讎。汝自承餘殃。

又

煌煌藝祖業。土宇盡九州。當時王會圖。豈數汝黃頭。所謂黃頭女真。今茲縛纛下。狀若穀鯨牛。萬里獻太社。裨將皆通侯。

又

符離既班師。北討意頗闌。志士雖有懷。開說常苦難。諸將初北首。易水秋風寒。黃旗馳捷奏。雪夜奪榆關。

又

小醜盜中原。異事古未有。爾來閭左起。似是天假手。頭顱滿沙場。餘骸飼豬狗。天網本不疎。貸汝亦已久。

命駕

命駕清晨出射堂。筠枝羽扇受微涼。鷗將數子窺苔井。桐引新枝出粉牆。岸幘影邊茶正熟。投壺聲裏日初長。興闌卻躡湖隄去。十里山花滿袖香。

遊山遇雨

千秋觀前雨濕衣。石帆山下叩漁扉。鷓鴣苦道行不得。杜鵑更勸不如歸。

東籬雜題

終日在東籬。清和適此時。鶯聲如妬夢。花氣欲撩詩。愛客茶新碾。留僧飯別炊。流年隨手過。不覺近期頤。

又
深居遠悔吝。簡事養精神。曳杖一蕭散。待茶時欠伸。風生叢竹嘯。露坼野花新。自作東籬後。經旬不過鄰。

又
昨日一花坼。今朝一草生。深林鳩婦聒。高棟燕巢成。熟果檐間墮。殘書枕畔橫。菴居澹無事。作意領新晴。

又
南陌歸雖久。東籬興又新。無求覺身貴。好儉失家貧。引水常終日。栽花又過春。桃源不須覓。已是葛天民。

又
溝聲流激激。籬影立疎疎。平旦來澆藥。臨昏尙看魚。比鄰怪疎索。風月伴躊躇。安得王摩詰。憑渠畫草廬。

書事

本來只道千鈞重。看破元無一羽輕。日月光明天廣大。不妨歡傲過平生。

又

燕雛學母飛初熟。梅子團枝亦半黃。塵尾唾壺俱屏去。尙存餘習炷爐香。

乙丑重五

盤中共解青菰粽。衰甚猶簪艾一枝。寂寞廢詩仍止酒。今年真負此佳時。

又

飛棹中流救屈平。但歌寧復楚遺聲。危冠更在門楣上。但覺蕭敷與艾榮。

夏夜枕上

臥聽殘更下麗譙。雖非遙夜亦迢迢。正令展轉無安枕。猶勝龍鍾趨早朝。

石帆夏日

石帆山下雨冥冥。閉岸紗巾憩草亭。單複篝衣時脫著。甜酸園果半黃青。鰕魚無隊依蒲藻。病鶴長鳴鍛翅翎。自笑若爲消永日。異書新錄相牛經。

又
短棹飄然信所之。茶園漁市到無時。風從蘋末蕭蕭起。月過花陰故故遲。蓴菜羹羹吳舊俗。竹枝度曲楚遺辭。頗聞項里楊梅熟。鄰曲相招莫後期。

仲夏風雨不已

南陌東阡自在身。一年節物幾番新。鱗魚出後鶯花鬧。梅子熟時風雨頻。冠蓋敢同修禊客。桑麻不減遊秦人。夕陽更有蕭然處。照影清溪整葛巾。

幽居

旌節庭下葵。鼓吹池中蛙。坐令灌園公。忽作富貴家。浮生均一閱。事過但興嗟。蚿蚿彼何人。欲摘空中花。牆隅蔬可挽。巷口酒可賒。疎懶遂吾性。不買東陵瓜。

齒落

昔聞少陵翁。皓首惜墮齒。退之更可憐。至謂豁可恥。放翁獨不然。頑頓世無比。齒搖忽脫去。取視乃大喜。譬如大木拔。豈有再安理。咀嚼浩無妨。更覺龕肩美。

雨中排悶

殷殷雷繞村。浙浙雨鳴砌。禽魚各自適。草木亦得意。顧此菴中人。老病獨顛顛。飯遲每懶索。兀兀方坐睡。平生飽憂患。性命已屢試。但得過今朝。明日可徐議。

逆境

步步常由逆境行。極知造物欲其成。磨礱久又盡芒角。烹煑豈容重發生。死到面前猶覺小。事於身外孰非輕。出門不必名山去。但見風煙已眼明。

夜興

脫冠殘髮冷颼颼。北斗闌干河漢秋。木末有風栖鶻起。亭臯無月亂螢流。酒慳僅得時時醉。詩退難禁夜夜愁。欲睡不妨還小立。一聲菱唱起滄洲。

寄題李季章侍郎石林堂

林慮靈壁名宇宙。震澤春陵稍居後。翟公黃鶴得數峯。對客掀髯詫奇秀。我行新灘見益奇。千巖萬竇雷雨垂。古來豈無好事者。根株盤踞不可移。侍郎築堂聚衆石。坐臥對之旰忘食。千金博取直易爾。要是尤物歸精識。君不見牛奇章與李衛公。一生冰炭不相容。門前冠蓋各分黨。惟有愛石心則同。崎嶇宦路多危機。凜然石友人間稀。它時棹棹華亭岸。更看全窠買鶴歸。

流年

冉冉流年迫耄期。心情漸減舊兒嬉。唾壺塵尾已從省。茶竈筆牀猶自隨。昨日客招東浦釣。今朝僧約北軒棋。敢將輕健誇鄰里。一笑元和要及時。

雨中鋤藥

庭中正苦日卓午。水面忽看雲過西。老子不辭衝急雨。小鋤香帶藥畦泥。

自嘲

壯歲耽書廢夜眠。窗明猶在短檠前。如今自笑摧頽甚。臥看兒曹理斷編。

世事

世事如今盡伏輸。面能乾唾況其餘。詩才退後愁強韻。眼力衰來怯細書。斂迹已思焚筆硯。作勞敢避把犁鉏。晴空萬里寬多少。一片閑雲足卷舒。

悲齒落自解

年運而往君自寬。此生畢竟有衰殘。語訛嚼廢尋常事。只作兒童碯齒看。

送十五郎適臨安

求祿亦常事。出門寧自由。苦留雖惜別。細話卻生愁。雨急投村市。鐘殘過寺樓。祇應今夕夢。先汝到江頭。

幽居夏日

茅舍參差煙靄中。超然高興與誰同。形骸已與流年老。詩句猶爭造物功。子母瓜新間尊俎。公孫竹長映簾櫳。日

長愈覺閑無事。隱具成書又一通。

又

內史蘭亭晚卜鄰。永和風月凜如新。功名不入閑人夢。詩酒猶關老子身。簷棧時時聞賈籜。池清一一見潛鱗。正令未逐飛仙去。要是巢居太古民。

大雨

北窗欲化莊生蝶。睡思濛濛栖倦睫。川雲忽帶急雨來。萬點縱橫打荷葉。坐收爽氣入詩律。更借涼颼吹醉頰。壞簷腐瓦凜欲墮。積潦中庭深可涉。兒愁漏濕廢夜課。婦畏泥塗停早盥。老翁自笑獨爾頑。更喜煙波搖短楫。

思雲門

一身膏脂略瘦盡。萬卷簡編如隔生。祇欲移家若耶去。亂雲深處聽灘聲。

夏夜

散髮荒池上。秋聲滿綠蒲。燐飛乘月暗。鼻語似人呼。學問無新得。功名負壯圖。拾薪炊麥飯。隨事且枝梧。

觀身

欲去浮華累。先觀老病身。濁醪何負汝。淡飯最宜人。意氣隨年往。工夫媿日新。祇將閑送老。虛作太平民。

養氣

學道先養氣。吾聞三任章。屏除金鼎藥。糠粃玉函方。凜凜春冰履。兢兢拱壁藏。高談忘力守。此病最膏肓。

日用

日用無淵奧。其中妙理存。但能明物性。不必學玄門。盡力扶元氣。精思去病根。昔人由此道。推己及元元。

村市醉歸

伏櫪元知免駭機。翽翎豈復慕羣飛。坐中客滿知心少。囊裏詩多得意稀。小市雨餘尋酒去。野橋日落策驢歸。不辭十里行空翠。終勝京塵化客衣。

夏日感舊

北窗枕簟臥陶翁。樹樹鳴蟬葉葉風。睡覺殘書棲嬾架。浴回細葛覆熏籠。一藤未遂名山去。半卷還驚舊歷空。安想金丹君莫笑。清班曾是長仙蓬。

又

五侍仙祠兩挂冠。此生略有半生閑。嘯歌雨笠煙蓑底。來往山村縣郭間。一粒何當換凡骨。數盃且復駐顏顏。胡塵掃盡知何日。不隱箕山卽華山。予仕宦屢歷宮祠。崇道玉局武夷佑神太平。凡五任。

又

吳人那慣粟漿酸。茶盃聊霑舌本乾。身病不堪閑客攪。日長惟憶異書看。流年冉冉誰能駐。長夏迢迢亦已殘。步有新船君賀我。西風先夢上嚴灘。近修小舟訖事。村鄰多來賀。

又

獨居無復客嘲邊。終日頽然飽卽眠。護硯小屏山縹緲。搖風團扇月嬋娟。桐陰忽見翻雙鵲。石罅時聞落細泉。避暑不須河朔飲。轉頭卽見早秋天。

雨後

甘樹慰羣望。浮雲還故墟。新涼生枕簟。餘潤入犁鋤。簾上翩翩燕。蒲新鱖鱖魚。素秋猶半月。團扇意先疎。

東軒

榴花零落滿蒼苔。詹匄忘憂亦已開。湖海片帆先已具。少安無躁待秋來。

寄子虞子適

大兒再度吳門秋。小兒錢塘逾月留。恨身不能插兩翅。與汝相守寬百憂。聞鐘時宿雲外寺。待月亦上湖邊樓。但常保此豈不樂。路難悠悠非善謀。

寄張季長

髮不勝簪短褐寬。每因臨鏡歎衰殘。未嘗三日不服藥。雖滿百年終闔棺。舊友豈知常阻關。一尊那得敘悲歡。錦官花重應如昔。直欲凌風借羽翰。

夏夜

鳴蜩斷復續。宿鳥久始安。觸熱汗沾衣。暮夜猶未乾。梧桐獨知秋。一葉墮井闌。行矣戒礎杵。四序環無端。

又

落月不滿窗。驚鷗屢移樹。沉憂少睡眠。亦以衰疾故。五更忽作夢。立馬青衣渡。白首厭山村。郵亭憶征步。

讀趙昌甫詩卷

蝸廬溽暑不可過。把卷一讀趙子詩。如遊麻源第三谷。忽見梅花開一枝。寄書問訊不可得。握臂晤語應無期。惟當飲水絕火食。海山忽有相逢時。

海氣

浴罷來水滸。適有漁舟橫。浩然縱棹去。漫漫菰蒲聲。海侵乃爾奇。萬象空際生。驂驪牧龍馬。天矯騰蛟鯨。或如舉大旗。或如執長兵。我欲記其變。忽已天宇清。成壞須臾間。使我歎且驚。世事正如此。何者非強名。

村居

舍後盤高岡。舍前面平野。防盜枳作藩。蔽雨篠代瓦。村人以篠覆屋如茅。數家相依倚。百事容乞假。薄暮耕樵歸。共話衡門下。

戒殺

郊居去市遠。豬羊稀入饌。既畜雞鶩羣。復利魚蟹賤。暴殄非所安。擊鮮况親見。那得屠殺業。爲客美殺膳。餘年尙有幾。過日如露電。豈無園中蔬。敬奉君子宴。

庭中夜賦

流汗沾衣不自支。庭中散髮立多時。烏烏晝角凌風起。淡淡銀河拂地垂。浮玉閑遊元自樂。浣花小築亦何疑。東歸萬里君知否。要了滄洲一段奇。

秋近

石榴萱草併成空。又見牆陰莧葉紅。茶醖頗妨千里夢。簟涼初怯五更風。新瓜落刃冰盤裏。晚燕添巢畫閣中。身

健流年俱可樂。故人自欠一尊同。

歎老

齒墮因廢談。髮短不入把。餘年似殘尊。欲盡不禁瀉。出門見鄉曲。每恨識面寡。往昔同戲兒。纍纍塚盈野。

殘暑得小雨頗涼

午暑不可觸。忽驚如許涼。軒窗雲作暝。草木雨生香。蒲葉先秋竄。蟬聲入夜長。自欣無一事。岸幘倚胡牀。

乙丑夏秋之交小舟早夜往來湖中戲成絕句

橫林渺渺夜生煙。野水茫茫遠拍天。菱唱一聲驚夢斷。始知身在釣魚船。

又

河漢橫斜斗柄低。啼鴉掠水未成栖。怪生淒爽侵肌骨。船繫秦皇酒瓮西。

又

譙門鼓角寺樓鐘。一一風傳到短篷。喚得放翁殘酒醒。錦囊詩草不教空。

又

小市易散無人行。茫茫湖橋惟月明。老夫解醒不用酒。自有千頃菰蒲聲。

又

雞頭纍纍如大珠。紅草綠荷風味殊。天與楊梅成二絕。吾鄉獨有異鄉無。

又

城南天鏡三百里。繚以重重翡翠屏。最好長橋明月夜。寄船策蹇上蘭亭。

又

酒旆搖搖出竹籬。扁舟遠赴野人期。一天風雨晚來惡。落盡白蓮渾不知。

又

七月湖中風露新。臨流閑照白綸巾。荷花折盡渾閑事。老卻蓴絲最惱人。

又 恰聽殘蟬禹寺門。又看新月石帆村。後來復有龜堂老。千載猶應此意存。

又 娥江道上欲三更。垣屋參差閉月明。倚柁賦詩無傑思。斷腸分付棹歌聲。

又 秋來湖闊渺無津。旋結漁舟作四鄰。滿眼是詩渠不領。可憐虛作水雲身。

又 夢筆橋東夜繫船。殘燈耿耿不成眠。千年未息靈胥怒。卷地潮聲到枕邊。

初秋

又 生世元浮脆。人言七十稀。毫期今已及。氣力固應微。食冷常憂過。追涼每念歸。入秋纔幾日。卷簾換綠衣。

又

又 藉草沾衣露。沿溪掠面風。桐凋無茂綠。蓮老有疎紅。小彳欻危度。鄰園曲折通。新秋得強健。一笑莫匆匆。

又

又 初夜月猶淡。入秋風已清。螢孤無遠照。蟬斷有遺聲。命薄慚勳業。才疎負聖明。青鞵若耶路。亦足慰平生。

又

又 兀兀終年醉。空空四壁窮。那知雙雪鬢。又度幾秋風。高枕三峯老。深衣獨樂翁。騎驢向何許。搢筆有蠻童。

秋陰出遊

又 遮日雲生忽復收。黃鸝鳴喚伴林鳩。也知雨意逢秋作。未害山翁竟日遊。陌上驛亭雙隻堠。煙中漁釣兩三舟。歸遲不是尋詩料。秣蹇民家偶小留。

杜宇

又 杜宇雖微禽。用意舉世稀。念昔春盛時。天地皆芳菲。杜宇默無聲。不畏百鳥譏。東君將促駕。乃獨號嗚悲。日夜不

青休。流血沾其衣。念言身尙存。乃使春獨歸。飲啄雖如昔。此身當曠依。月明抱樹枝。敢忘此獻歎。雖無精衛勞。區區亦庶幾。寄言天壤間。勿謂斯禽微。

養生

衰病猶弱國。地與齊楚鄰。朝憂羽書來。暮畏戎車塵。奔命不敢辭。所懼殘吾民。羸老正類此。日夜憂其身。起居飲食間。恐懼自貴珍。一念少放逸。禍敗生逡巡。所以古達者。訓戒常諄諄。不死正爾得。成真非有神。

初秋夜賦

北斗垂欲盡。明河淡不流。低回半枕夢。蕭瑟一窗秋。老益尊儒術。閑仍爲國憂。孰云生死大。卻已付悠悠。

又

炎熇猶未伏。清絕忽新秋。露氣房櫳冷。砧聲歲月遒。悲蛩草根語。孤燐竹間流。聞道河南北。飛蝗暗百州。

殘年

殘年垂八十。高臥豈逃名。泥巷多牛迹。茅簷有碓聲。炊菰觴父老。裘裘哺雛嬰。遣戍雖傳說。何時復兩京。

記夢

環立江頭千萬峯。夢中於此倚枯筇。青冥誰見斂巾角。碧瀼閑將洗筆鋒。一卷素書雲笈貯。數升松麩水機春。正呼鶴駕凌風去。驚覺西山煙外鐘。

村飲

白稻登場喜食新。太倉月廩厭陳陳。叢祠懷肉有歸遺。官道橫眠多醉人。小市孤村真送老。浩歌起舞最關身。鹽醢乞貸尋常事。惱亂比鄰莫媿頻。

老鰥

水際山前有老鰥。終年無事亦非閑。淵源師友簡編上。土木形骸魚鳥間。零落斷雲依釣瀨。連娟新月照柴關。葵羹稗飯悠然過。一飽元非造物慳。

對食作

賤士窮愁殆萬端。幸隨所遇即能安。乞漿得酒豈嫌薄。賣馬僦船常覺寬。少壯已辜三釜養。飄零敢道一袍單。飯餘捫腹吾真足。首肯何妨日滿槃。

七月十九日大風雨雷電

雷車動地電火明。急雨遂作益盎傾。強弩夾射馬陵道。屋瓦大震昆陽城。豈獨魚蝦空際落。真成蓋屐舍中行。明朝雨止尋幽夢。尙聽飛濤滅瀑聲。

湖上

三伏無多暑漸微。登臨清曉試縑衣。風高病木初凋葉。潦退流萍尙半扉。白首重來空感昔。清尊相屬欲忘歸。猶憐不負湖山處。好在平生舊釣磯。

欲雨

正苦中天赫日流。房櫳忽復變颼颼。雲生江浦初成暝。葉下亭皋剩作秋。移穴族行憐埴蟻。爭巢婦去歎林鳩。人間寒暑何窮已。破杵行聞浣褐裘。

秋懷

少年萬里度關河。老遇秋風感慨多。草聖詩情元未減。若無明鏡奈君何。

又

園丁傍架摘黃瓜。村女沿籬采碧花。城市尙餘三伏熱。秋光先到野人家。

又

迢迢枕上望明河。帳薄簾疎奈冷何。不惜衣篝重換火。卻緣微潤得香多。

又

詩如水淡功筮進。身似雲孤累轉輕。落葉擁籬門巷晚。一枝藤杖且閑行。

食新

龍鍾好在夢中身。剩喜今年又食新。不用更煩人祝餽。輪囷瓜瓠是常珍。

予初仕爲寧德縣主簿而朱孝聞景參作尉情好甚篤後十餘年景參下世今又幾四十年忽夢見之若平生覺而感歎不已

白鶴峯前試吏時。尉曹詩酒樂新知。傷心忽入西窗夢。同在哺村折荔支。哺音備。

讀書

憶昔年少時。把卷惟引睡。情遊過日月。自咎輒滯泗。老來百事廢。卻覺書多味。豈惟時有得。聖域可坐致。譬如入武庫。儻恍不暇視。淺陋安能名。出門但驚喟。天球及河圖。千古所共秘。幸今發其藏。雖老敢自棄。

論鄰人

鄰曲有米當共春。何至一旦不相容。爲善何嘗分士農。堯民皆當變時雍。

又

相攻本出忿與疑。能不終訟固已奇。訟端可望君試思。歲時鄰里相諧嬉。

又

世通婚姻對門扉。禍福飢飽常相依。忿爭得直義愈非。不如一醉懷牒歸。

示小廝

偷閑打睡汝何尤。罵詈榜笞我所羞。但撻一鞭隨小蹇。不妨村路共閑遊。

又

晨興略整案頭書。十日庭中始掃除。未免下簾惟一事。臨池莫釣放生魚。

卷六十三

秋雨

老火阻餘威。賴此一兩洗。一雨豈遽涼。涼亦自此始。陂湖菱芡熟。小市新酒美。行歌多醉人。驩意溢閭里。懸知婁豐年。絲穀賤如水。呼兒具筆牘。作詩識吾喜。

江村

江村一雨喜塵清。隱隱雷車意未平。莽蒼郊原來暮色。颼颼林壑起秋聲。書希簡古終難近。詩慕雄渾苦未成。白首愈悲知我少。從今一技不須名。

又

誤著儒冠不更論。白頭且喜臥江村。林深棲鳥逐更噪。埭近過舟終夜喧。病起日惟翻斷簡。愁來時亦倒清尊。自嫌未絕知聞處。尙有僧敲月下門。

山行

南出柴門即是山。青鞋踏破白雲間。旋償酒券何時足。罷諾僧碑盡日閑。三尺古琴餘爨迹。一枝禪杖帶湘斑。吾廬北望雲煙裏。又伴紛紛宿鳥還。

天王寺迪上人房五十年前友人王仲信同題名尙在

綠遶青圍古會稽。城東河上古招提。已公茅屋曾遊處。渭北山人半醉題。暫憩不妨停畫楫。幽尋還得杖青藜。舊人死盡惟殘屋。竹密雲深步步迷。

東窗偶書

東窗終日靜悄悄。消盡平生幻妄心。秋氣未催羣木脫。老懷先感百蟲吟。屏風疊篆思廬阜。冠子峯高憶少林。安得吾身且強健。一藤隨處更幽尋。

又

萬事何曾有速淹。熊蹯魚腹自難兼。山川置掌猶能取。日月無膠可得黏。稚子幸堪持几杖。老生元自慣齋鹽。清晨臨鏡還三歎。雪領今年無處添。

乙丑七月二十九日夜分夢一士友風度甚高一見如宿昔出詩文數紙語皆簡淡可愛讀未終而覺作

長句記之

客中得友絕清真。蓋未傾時意已親。枕冷不知清夜夢。眼明喜見老成人。河傾斗落三傳漏。霧散雲歸兩幻身。心

亦了然知是妄。覺來未免一酸辛。

示子適

翁老兒窮不自支。此心幸與古人期。勞兼薪水奴初去。典到琴書事可知。藥杵無聲工忍病。米囤可掃恥言飢。餘年有幾須相守。萬里煙霄付異時。

小雨

赤日炎熇勢未回。川雲忽起亦佳哉。鴨衝細雨橋陰出。蝶弄微風草際來。榉柳不禁朝暮久。芙蓉猶有二三開。一年光景煩君看。何怪昆池有劫灰。

舟中作

蘧蔭作帆三版船。漁燈夜泊闔門邊。煙波四萬八千頃。造物推排作水仙。

又

山蔬藥苗滿箸香。超然下視太官羊。更憑語與劉文叔。豆粥從來味最長。

漁父

食簞雖薄尚羹藜。且喜今朝酒價低。一櫂每隨潮上下。數家相望埭東西。團團箬笠偏宜雨。策策芒鞋不怕泥。應笑漆園多事在。本來無物更誰齊。

又

數十年來一短蓑。死期未到且婆娑。敲門賒酒常酣醉。舉網無魚亦浩歌。片月又生紅蓼岸。孤舟常占白鷗波。人間各自生涯別。文叔君房媿汝多。

讀書示子適時子適方啟舉

我生無它營。半世隨宦牒。諛波方稽天。憂與愁相接。中間稍自覺。萬事付馬曹。告歸幸見聽。泊與淡相遭。日晏突無煙。垢面有爪痕。讀書則未置。可笑習氣存。造物哀其窮。昇之大耳兒。兒亦好古學。乃不售有司。謂當齋瑟縮。乃如鶴昂藏。父子共薄飯。忍飢講虞唐。豐凶有常數。襦裘當自力。古言不吾欺。歲晚於汝食。

秋夕

西山樵路隔重雲。溪水微風起縠紋。晷退忽驚秋慚晚。夜長已與晝中分。菰蔣入饌渾家喜。礎杵催寒並舍聞。新作篝燈學僧樣。與兒同策讀書勳。

醉中錄近詩因題卷後

鴉兒色淺酒醺人。雞距鋒圓筆絕倫。滿引一盃書數紙。要知林下有閑身。

貧甚戲作絕句

俸祿無餘退即耕。市人指笑太清生。從今惜取青鞋底。祇向雲邊水際行。

又

處窮上策更誰如。日晏猶眠爲腹虛。飢則臥不起。貧者之常也。尙闕鄰僧分供米。敢煩地主送園蔬。

又

貸米東村待不回。鉢盂過午未曾開。飢腸雷動尋常事。但誤生臺兩鵲來。

又

北齋孤坐破三更。庭戶無人有月明。數種袴襦秋未贖。羨他鄰巷搗衣聲。

又

竈突無煙甑有塵。頽垣破屋越溪濱。老鰥狂怪誰嗔責。日日行歌獨賣薪。

又

行徧天涯等斷蓬。作詩博得一生窮。可憐老境蕭蕭夢。常在荒山破驛中。

又

讀書但覺慚輪扁。補吏非能去箭張。白髮歸爲林下叟。固應飢不饜糟糠。

又

糲米歸遲午未炊。家人竊閤乃翁飢。不知弄筆東窗下。正和淵明乞食詩。

自傲

出仕每辭榮。歸休但力耕。儉勤貧亦足。戒懼禍終輕。學自不欺始。智由無事行。書紳及銘座。勉勉盡吾生。

又

經術吾家事。躬行更不疑。仁常爲己任。清每畏人知。古訓必三復。危途仍十思。兢兢死方已。寧論迫期頤。

雨後極涼

金微未壯長。火老尙餘燼。可憐茅舍翁。瞑目困藉躡。蕭蕭得一雨。天氣頗清潤。豈惟爽襟靈。亦足祛疾疢。浮生日月駛。老死纔一瞬。聖賢貌不嗣。利欲以身徇。孰能痛澡雪。此道庶少進。閉門君但學。妙理天豈吝。

醉題

來往人間今幾時。悠悠日月獨心知。尋僧共理清宵話。掃壁閑尋往歲詩。疋馬秋風入條華。孤舟暮雪釣湘瀾。只愁又踏關河路。荆棘銅駝使我悲。

秋感

畏塗歷盡百年中。老臥窮閭一秃翁。衣杵淒涼常帶月。井桐零落不禁風。空文久悔雕蟲技。大學方施習射功。佛書云。如人習射。久久方中。萬一死前能少進。九原猶可見先公。

鼠敗書

雲歸雨亦止。鴉起窗旣白。秋宵未爲永。不寐如歲隔。平明亟下榻。亦未暇冠幘。檢校案上書。狼籍鼠齧迹。食簞與果籩。攘取初不責。倏然敢四出。乃至暴方冊。坐令漢篋亡。不減秦火厄。向能畜一貓。狡穴詎弗獲。緘藤又蕩然。追咎亦何益。情偷當自戒。鼠輩安足磔。

秋望

千里郊原俯莽蒼。三江煙水接微茫。橫林蟲鏤無全葉。新雁風驚有斷行。神禹祠庭遺劍珮。先秦金石古文章。一尊莫恨盤餐薄。終勝登樓憶故鄉。

秋夕

浴罷紗巾出草堂。一枝瘦杖倚桃榔。蟬吟古柳聲相續。月入幽扉影正方。頻約僧某秋漸健。稍增書課夜初長。亦知桑落宜簍酒。太息何時辦一觴。

出遊

八月石帆秋。聊爲汗漫遊。本因尋友去。卻爲看山留。小草題僧壁。長吟上驛樓。月能從劇飲。天可寄閑愁。高下評泉品。縱橫記酒籌。花開遇門入。水長信船流。骯髒人雖棄。脂韋我自羞。此心君不信。試往問沙鷗。

病中戲詠

八十行加二。清秋住故山。新涼足眠睡。農疾害躋攀。雪白紛殘鬢。梔黃染病顏。疲牛臥斜日。羸馬噉枯菅。貧廢兒孫學。慈生僕妾頑。贖衣時已迫。貸米歲方艱。齋鉢僧嘲薄。盤飧客笑慳。從今謝還往。惟有掩柴關。

喜書

欹斜古屋枕江干。恩賜殘骸許挂冠。杵臼有聲聊足食。羊牛識路自歸闌。不求客恕陶潛醉。肯受人憐范叔寒。兒輩漸還家暖熟。預知燈火語團圓。子龍初自江西歸。子虛亦今冬當罷官矣。

春耕

去蜀歸吳會。真成萬里行。窮通竟安在。恩怨兩皆平。文字妨求道。盃觴害養生。餘年猶有幾。買犢事春耕。

秋思絕句

煙草茫茫楚澤秋。牧童吹笛喚歸牛。九衢不是風塵少。一點能來此地不。

又

榮悴元知豈有常。紛紛草木占年光。霜風一掃知何在。楚客從來枉斷腸。

又

一片雲生便作陰。東軒草樹共蕭森。秋風豈必關人事。自是衰翁感慨深。

又

枳棘編籬畫掩門。桑麻遮路不知村。平生詩句傳天下。白首還家自灌園。

又
胸次本來容具區。自私益盍一何懸。片帆忽逐秋風起。聊試人間萬里途。

又

黃蛺蝶輕停曲檻。紅蜻蜓小過橫塘。老人未肯殺風景。睡起熏籠重炷香。

秋興

節物喜更新。清秋最可人。徐行曳藤杖。小立岸紗巾。煙雨迷衰草。汀洲老白蘋。鶴巢時託宿。猿果每分珍。羽客期燒藥。毛人約卜鄰。蘭亭故不遠。千載見清真。

寓歎

五畝煙蕪過半生。還山自笑又躬耕。春炊不繼兒啼飯。烹飪無方客絮羹。遊宦人間身愈困。讀書燈下目幾盲。退之已老當更事。猶向時人說善鳴。

北窗

垂老乞骸骨。飄然辭聖朝。竹頭那足用。桐尾不禁焦。短褐縫練布。晨飧采藥苗。風霜征雁路。燈火衲僧寮。隴客詢安否。狸奴伴寂寥。北窗鳴落葉。愁絕夜迢迢。

閑思

睡美精神足。心空忿欲輕。讀書無定課。飲酒不成醒。日日東軒坐。時時北渚行。最奇烏柏下。側帽聽秋鶯。

秋光

小圃秋光潑眼來。老人隱几與悠哉。翩翩蝴蝶成雙過。兩兩蜀葵相背開。兩足踈籬引荒蔓。人稀幽徑長新苔。貧家竈冷炊煙晚。待得鄰翁賣藥回。

秋夜思南鄭軍中

五丈原頭刁斗聲。秋風又到亞夫營。昔如埋劍常思出。今作閑雲不計程。盛事何由觀北伐。後人誰可繼西平。眼昏不奈陳編得。挑盡殘燈不肯明。

湖上

飄然世外更何求。終日橋邊弄釣舟。回視老身猶長物。縱無炊米莫閑愁。煙生壚落垂垂晚。雁下陂湖處處秋。欲覓高人竟安在。又聞長笛起滄洲。湖中有隱士。月夜必吹笛。人莫有見者。

讀王摩詰詩愛其散髮晚未簪道書行尙把之句因用爲韻賦古風十首亦皆物外事也

我生本江湖。歲月不可算。采藥遊名山。所歷頗蕭散。一逢巢居翁。見謂於我館。酌泉啖松柏。每得造膝款。行道不自力。殘髮日已短。海山故不遠。謫限何時滿。

又

仕宦五十年。所至不黔突。取魚固捨熊。挾兔那恨鵠。退歸息厭厭。誰敢書咄咄。屋穿每苴草。驢瘦可數骨。秋風忽已厲。落葉飄殘月。脫巾坐中庭。清冷入毛髮。

又

我愛古竹枝。每歌必三反。孤舟上荆巫。天末未覺遠。最奇扇子峽。恨不遂高遜。荆棘蜀故宮。煙水楚廢苑。至今清夜夢。百丈困牽挽。人生如寄爾。勿歎流年晚。

又

往歲著朝衫。晨起事如彙。告歸臥孤村。枯淡有餘味。閉門絕外慕。自謂真富貴。蕭然畢吾生。地下亦增氣。里翁戀兒女。小疾輒憂畏。惟窮可賒死。我在君亦未。

又

萬金築華堂。千金教新音。不知憂患場。著脚日愈深。今人喜議古。後亦將議今。使汝有子孫。聞之亦何心。鄧通擅銅山。死日無一簪。未死汝勿喜。五溪多毒淫。

又

往者遊青城。猶及二三老。稽首出世師。數語窮至道。妻子真弊屣。棄去恨不早。俯仰纔幾時。殘骸日衰槁。吾兒有奇骨。亦復至幽討。金丹儻可成。白髮何足掃。

又
稚川師鄭君。纔及一卷書。書大僅如箸。度世蓋有餘。想其所論說。妙極軒昊初。內篇今雖存。亦復飽蠹魚。我欲探其原。蹇步空趑趄。安得插兩翅。從公遊太虛。

又
隱書有三景。字字當力行。寸地與尺宅。可以久汝生。泝流歸崑虛。堅守臨長城。一旦告成功。河塞黃金成。笙鶴適緱山。貂蟬朝玉京。即今修行地。千古名還嬰。予道室以還嬰名之。

又
行年過八十。形悴神則旺。往來江湖間。垂老猶疎放。滄波浩無津。天遣遂微尙。剡溪挂風帆。漁浦理煙榜。奇雲出深谷。新月生疊嶂。興懷晉諸賢。誰能續遺唱。

又
二十遊名場。最號才智下。蹭蹬六十年。亦有茆一把。典衣租黃犢。乘雨耕綠野。西成得一飽。敢計泥沒踝。住久鄰好深。百事通乞假。秋高小瓮香。相喚注老瓦。

夢行益昌道中有賦

朱棧青林小益西。早行遙聽隔村雞。龍門閣畔千尋壁。江月亭前十里堤。酒舍胡姬歌折柳。江津洮馬惜障泥。倦遊重到曾來處。自拂流塵覓舊題。

自規

忿慾俱生一念中。聖賢本亦與人同。此心少忍便無事。吾道力行方有功。碎首寧聞怨飄瓦。關弓固不慕冥鴻。老翁已落江湖久。分付餘年一短篷。

幽興

闌渚前頭湖水清。了無俗事敗幽情。雨淋茅屋隨時補。日射油窗特地明。庭樹晚鶯窺戶語。鄰園秋筍過籬生。芥菘漸美鹽醃足。誰共貧家一釜羹。

記前輩語

疇昔見諸老。從容聞至言。馬非求路寢。木豈願犧尊。臥起數椽屋。嘯歌三畝園。人生正應爾。雲夢不須吞。

貧居卽事

筮易常逢坎。推星但值箕。老雖齊渭叟。窮不減湘纍。巷月鳴衣杵。庖煙爨豆萁。秋深病良已。且復強伸眉。

又

地偏人罕到。秋晚日猶長。病去筇枝贅。家貧菜粥香。流泉通藥壠。積雨潤書囊。欲譜幽居事。疎慵久未遑。

又

月黑鼻鳴樹。燈殘鼠穴牆。牀空圍紙被。室靜爇楓香。不恨言傷直。惟憂慾敗剛。回頭顧名利。百世永相忘。

又

米竭炊煙靜。村深客屨稀。庭除荒宿莽。籬落帶斜暉。風惡披書卷。鷗馴傍釣磯。鄰家殊耐久。相伴荷鋤歸。

又

意緒喪家狗。形骸槁木枝。曲肱雖自適。縱理固當飢。買絮初寒後。畦蔬小雨時。窮途何用卜。吾道卽著龜。

又

守道常違俗。存心不媿天。終年飢過半。動步謗居前。力倦少行立。氣昏多睡眠。今宵風月好。扶杖到溪邊。

自詠

素慕巢居穴處民。久爲釣月臥雲身。經行山市求靈藥。物色旗亭訪異人。高枕靜聽棋剝啄。幽窗閑對石嶙峋。吾廬已是桃源境。不爲秦人更問津。

枕上作

一室幽幽夢不成。高城傳漏過三更。孤燈無焰穴鼠出。枯葉有聲鄰犬行。壯日自期如孟博。殘年但欲慕初平。不然短榻棄家去。萬頃松江看月明。

秋曉聞禽聲五韻

秋曉風露佳。天宇曠以清。鳥雀當此時。意樂有和聲。人獨不自喜。乃欲鳴不平。世事雖萬端。但可笑絕纓。君看郊與島。徒自殘其生。

對酒

素月度銀漢。紅螺斟玉醪。染丹梨半頰。斫雪蟹雙螯。詩就吟逾苦。盃殘興尙豪。閑愁翦不斷。剩欲借并刀。

又

密篠持苫屋。寒釐用織簾。甌肩柴熟罨。東坡煮豬肉訣云。淨洗鍋。少著水。柴頭罨煙焙不起。蓴菜豉初添。黃甲如盤大。紅丁似蜜甜。街頭桑葉落。相喚指青帘。

示鄰里

古學陵夷失本原。讀書萬卷誤元元。從今相勉躬行處。士庶人章數十言。

重示

篤學仁何遠。窮居道亦行。能充氣剛大。誰蔽性光明。家世艱難業。鄉閭宿昔情。歲殘相勞苦。惟是語春耕。

兩夜起行室中

老疾逢秋體自輕。披衣暫起繞牀行。隙風不斷燈將滅。簷雨如傾階欲平。鰥叟何嘗愁枕冷。病夫未免待窗明。拂書洗硯龜堂上。幽事誰知日有程。

閏月辛酉壬戌連日風雨癸亥早晴

殘雨在簷猶點滴。斷雲銜日正蒼涼。清愁偏向暮年覺。少睡不禁秋夜長。簾影漸生禽語樂。杵聲初動藥塵香。諸兒作吏俱安否。那得乘風至汝傍。予諸子伯叔季皆出仕。

秋思

少日猖狂不自謀。卽今垂死更何求。簡編不隔聖賢面。夢寐時爲河嶽遊。濁酒未傾心已醉。長歌欲發涕先流。石帆射的煙嵐晚。過雁聲中又一秋。

又

十日秋陰滿徑苔。蓬門那有客敲推。水邊丹葉已如許。籬下黃花猶未開。空見遊僧衡嶽去。難逢新雁杜陵來。溪雲一片閑舒卷。戀著漁磯不肯回。

閑遊

江邊小市舊經過。歲月真如東逝波。茶竈酒壚多識面。少留賣藥買漁蓑。

又

溪橋偶與僧遊話。草市來尋逆旅炊。自笑一生爲客慣。捉驢小豎訴朝飢。

又

袂除情累煙波上。放蕩胸懷詩酒中。禹會橋邊潮落處。夕陽幾度繫孤篷。

對鏡

面大如盤七尺身。珥貂自合上麒麟。詩家事業君休問。不獨窮人亦瘦人。

幽居書事

老人初起厭囂喧。塵几從教鼠迹存。赤脚平頭俱遣去。倚牆危坐嚙朝暄。

又

買魚賒酒皆高興。野店溪橋圖畫中。從此衰翁自行耳。不須多事喚蠻童。

偶與客話峽中舊遊

我昔旅遊秋雨細。建平城東門欲閉。主人迎勞語蟬聯。小婦春炊綺衣袂。長年三老半醉醒。蜀估峽商工算計。須臾燈闇人欲眠。泊船卸馱猶相繼。山深水峻近蠻獠。往往居民雜椎髻。卽今屈指四十年。懷抱淒涼真隔世。

讀老子次前韻

平生好大忽瑣細。焚香讀書戶常閉。少年曾預老聃役。晚歲欲挹浮丘袂。力探玄門窮衆妙。肯學陰謀畫奇計。言狂不獨人共排。志大仍憂後難繼。君看淡掃出顰眉。豈比一尺春風髻。著書勿恤飽蠹魚。會有子雲生後世。

作籬

生世八十餘。日夜迫衰老。中年所築舍。傾壞當官道。每逢風雨夕。性命凜莫保。況此蘆竹藩。何恃不摧倒。今朝手自葺。不暇避塗潦。難豚有限隔。門巷得鋤掃。豈惟禦盜竊。亦足慰懷抱。陰雲忽四垂。見事幸差早。

寓歎

老生讀書百絕編。日晏忘食夜廢眠。孝經一生行不盡。況有大籍陳吾前。華軒玉食非素願。廣廈高墉實郵傳。經營歸計笑時人。我老但須書數卷。

衡門感舊

蒼煙屯不散。疋素橫郊原。雨細不濕衣。著水始見痕。躊躇意自佳。未遽掩衡門。一一送歸鴉。楓林猶未昏。念昔壽州歸。紹興初紀元。闔門過百口。一身今獨存。不死實有命。送老三家村。躬耕幸得食。萬事不足論。

客中作

江天雨霽秋光老。野氣川雲淨如掃。投空飛鳥雜落葉。極目斜陽襯衰草。平沙爭渡人鵝立。長亭下馬障泥濕。纍纍紅果絡青篾。未霜先摘猶酸澀。客中雖云貪路程。買薪糴米常留行。茆檐獨坐待僮僕。不聞人聲聞碓聲。

讀書示子適

我性苦愛讀。未始去几案。生雖後三代。意尙卑兩漢。世衰道術裂。年往朋友散。澤居貧民骨。霜冷衣露氈。獨能樂其樂。肯發窮苦歎。爾來更可笑。身糴兒炊爨。一飽輒欣然。弦誦等離泮。望古雖天淵。視俗亦冰炭。阿適可憐生。相守忘夜旦。狐學當世傳。歲月不可翫。

老懷

老懷常易感。秋雨苦難晴。羈枕悲歡夢。高城長短更。榮枯一螻蟻。成壞幾棋枰。抱疾茅檐下。行人肯寄聲。昨日得李孟達書。

沉縣

沉縣久未平。寂寞閉柴荆。危葉先霜墜。殘螢冒雨明。記書由默誦。得食出躬耕。此事吾親驗。方當告後生。

遊近村

行歷茶岡到藥園。却從釣瀨入樵村。半衰半健意蕭散。不雨不晴天晏溫。薯蕷傍籬寒引蔓。菖蒲絡石瘦生根。參差燈火茆檐晚。童稚相呼正候門。

又

被髮行歌雪滿膺。夕陽顧影亂鬢鬢。乞漿得酒人情好。賣劍買牛農事興。社鼓賽秋聞坎坎。塔燈照夜望層層。歸來閉指烏藤說。個是人間耐久朋。

小亭

除地編茅作小亭。一川風露對青冥。殘螢欲盡猶穿戶。落葉初飛已滿庭。樸老無心求匠石。鬼靈有說拒奴星。餘年默數能多少。盡付黃庭兩卷經。

記夢

少日飛揚翰墨場。憶曾上疏動高皇。寧知老作功名夢。十萬全裝入晉陽。

又

老來百事不關身。北陌東阡一幅巾。忽夢行軍太行路。不惟無想亦無因。

卷六十四

養疾

齒毫學新疾。才衰減舊名。短筇扶蹇步。小院愜幽情。卜叟言災退。醫翁賀脈平。飯香炊穉。羹美醅燕菁。菊穎寒猶小。楓林曉漸頰。清詩披客贄。佳著指僧枰。家塾燈前課。村陂雨外耕。從今尙何事。賴此遣浮生。

客從城中來

客從城中來。相視慘不悅。引盃撫長劍。慨歎胡未滅。我亦爲悲憤。共論到明發。向來酣鬪時。人情願少歇。及今數十秋。復謂須歲月。諸將爾何心。安坐望旄節。

暮秋中夜起坐次前韻

東吳秋令遲。得雨亦良悅。中庭有流螢。烈風吹不滅。披衣起坐久。鼓角參差發。西成雖作勞。農事亦漸歇。老怯歲律殘。俛仰忽九月。蟋蟀鳴壁間。媿汝知時節。

閑遊

白石牀平偶小留。青芒屨穩復閑遊。微丹點破一林綠。淡墨寫成千嶂秋。竹院頻分齋鉢飯。苔磯時把釣魚鉤。要知此老神通否。二十年來不識愁。

自規

老疾今俱至。艱難亦備更。個中無障礙。何處欠光明。一日能用力。三年亦有成。脩身在我爾。勉勉盡餘生。所謂三年有成者。豈獨爲國哉。

自笑

學道功賒歲月馳。平居自笑著鞭遲。安心未竟夜繞夢。與世雖疎秋尙悲。藥圃幽尋芒屨濕。棋枰憨戰角巾欹。只愁今夕西窗夢。又買長筒到古鄆。

泛舟至鏡湖旁小市

久著朝衫負此湖。扁舟剩喜補東隅。市樓合樂醅新熟。寺壁殘詩字欲無。常日不堪愁宛轉。此行猶得笑須臾。夕陽鷗鷺皆相識。更覺人間是畏塗。

懷舊

身是人間一斷蓬。半生南北任秋風。琴書昔作天涯客。蓑笠今成澤畔翁。夢破江亭山驛外。詩成燈影雨聲中。不須強覓前人比。道似香山實不同。

道院述懷

學道已非生死流。極知心外更何求。理窮性盡命亦至。氣住神全形自留。大藥一爐真度世。孤桐三尺可忘憂。故人怪我歸來晚。太華峯頭又素秋。

又

八十年前一炷香。依然餘習未全忘。舊緣入靜多扃戶。近爲精思別置牀。篝火古鐺煎檜蜜。汲泉小甕釀松肪。老翁正似遼天鶴。更覺人間歲月長。

秋雨

兩滴何由止。人眠不復成。雲深無雁影。村近有砧聲。草草殘年夢。寥寥後世名。太山并螻垤。俱向酒中平。

又

秋晚兼旬雨。雨晴當有霜。頗思遊近縣。亦已戒輕裝。珍薰披縣美。寒醅撥雪香。菊花常歲有。所喜及重陽。

聽雨

髮已成絲齒半搖。燈殘香燼夜迢迢。天河不洗胸中恨。却賴檐頭兩滴消。

畏事

畏事偷安百不能。飯蔬聊得曲吾肱。舊交夢裏時時見。宿疾秋來日日增。遣悶自鉏幽圃藥。扶衰猶賴故溪藤。不因顧見鬚髻影。全是深山退院僧。

刈穫後書事

鄰里西成例少蘇。貧家生業得徐圖。雖非五鼎豈無食。未辦複禪猶著襦。牢斃漸肥堪奉祭。耕牛已買不求租。卻思流落天涯日。要是家居勝道途。

又

暮歲誰知困不蘇。每虞黠鬼笑狂圖。陶公老去但濁酒。管老歸來惟白襦。不逐兒童覓兼味。且隨鄰曲了殘租。細思自有欣然處。高謝人間九折途。

秋夜五鼓初起坐堂上至旦

蒸鬱不可過。開門星滿天。身還倚藤杖。手自酌巖泉。雞唱猶相續。鴉飛忽已翩。事隨朝日出。佳思復茫然。

習懶自咎

習懶多遺事。時能害睡眠。穉驕殘竹筍。鼠橫齧牀氈。獮子巡籬落。狸奴護簡編。人間有俊物。求買敢論錢。

雨夜枕上作

兩點滴我心。兩氣傷我魂。但憂草廬破。敢思布被溫。市墟酒如山。不濕老瓦盆。天其遂吾心。窮死三家村。

晚飯後步至門外並溪而歸

徐行摩腹出荆扉。掠面風尖酒力微。市步空船迎荻去。湖隄輕擔賣魚歸。潺潺沙竇鳴殘水。莽莽平蕪襯落暉。商略最關詩思處。滿村砧杵搗秋衣。

文章

文章如弈棋。分量固有極。學不盡其才。識者爲太息。古來名世士。亦或墮此域。至今讀其文。曷嘗不追惜。士生千載後。夙慕當自力。如其不能然。歸哉事耕織。

枕上口占

白首區區道未明。故山悔不蚤歸耕。勇如搏虎但堪笑。學似累棋那易成。殘雨墮簷時一滴。老雞棲樹已三鳴。村居孤寂知何憾。兩耳猶勝聽市聲。

乙丑九月三日晚久雨驟晴西南新月如玉鉤重陽以八月置閏菊花粲然滿園喜甚作一絕記之

初三新月見如期。重九黃花又及時。俱是人間稱心事。典衣一醉更何疑。

寓歎

蕭疎殘髮數莖絲。勝負渾如未算棋。萬里旌旗無昨夢。一蓑煙雨有新詩。潛消暗換人誰在。小醉閑眠我自奇。二一十四年能幾許。汾陽回首亦成癡。

村興

結宇楓林下。久窮吾所安。村深事自簡。累少食差寬。雨闌牛眠屋。泥深鴨滿闌。呼兒擣粉餌。準擬賽鄱官。

夜聞埭東賣酒鼓聲甚壯

烏桕森疎照溪赤。寒鴉翩翻蔽天黑。鮮鱸出網重兼斤。新蟹登盤大盈尺。年年此際清霜夜。飯罷讀書聲滿舍。豈惟父子講家學。亦有朋儕結經社。誰令屠沽聚里中。鼓聲終夜聒老翁。嗚呼安得寐無聰。不但杜老左耳聾。

燈下晚飧示子遯

家貧短衣不掩骭。空庖凜凜竈不爇。老翁八十忍饑熟。兀坐空堂日常晡。今年閏餘九月寒。那敢遽議南山炭。艱難幸復致一殮。鋪歎燈前百憂散。適子挾冊于子來。時與乃翁相論難。但令歆向竟同歸。門前籍湜何憂畔。

秋晚書懷

七澤三巴日月長。卽今萬事付茫茫。結廬窮僻新知少。屬疾沈緜舊學荒。中夜飯牛初上阪。千年化鶴復還鄉。自憐尙覺身爲累。剩蓄荆薪待雪霜。

又

頽然兀兀復騰騰。萬事惟除死未曾。無奈喜歡閑弄水。不勝頑健遠尋僧。喚船野岸橫斜渡。問路雲山曲折登。卻笑吾兒多事在。夜分未滅讀書燈。

初寒

久雨重陽後。清寒小雪前。拾薪椎髻僕。賣菜掘頭船。薄米全家粥。空牀故物氈。身猶付一敵。名字更須傳。搨頭船。見張志和詩。

黃昏小雨中。豐翹蒼頭在。傍云初未嘗得。瞑予乃甚適。若熟寐者作五字記之。

人看初無寐。形勞幸少休。夢魂雖栩栩。鼻息未齣齣。輕若風中絮。淨如水上漚。死生君了否。試向此中求。

乾道之初卜居三山。今四十年。八十有一感事抒懷。

乾道之初結草廬。三朝六見紀元初。年光拋擲難加倍。生計蕭條愈不如。目暗欲盲停夜課。髮殘無幾怯晨梳。市聲風便猶關耳。未死終當更徙居。

視東皋歸小酌

築陂下麥晚歸來。圍火烘衣始此回。但得諸孫傳素業。真無一事挂靈臺。井桐葉落垂垂盡。雜菊花殘續續開。不負初寒蟹螯手。牀頭小瓮撥新醅。

又

少年誤計慕浮名。更事方知外物輕。身誓生生辭祿食。家當世世守農耕。授時堯典先精讀。陳業豳詩更力行。最好水村風雪夜。地爐煙暖歲豬鳴。

梅市道中

去去浮官浦。悠悠數客檣。蓼花低蘸水。楓樹老經霜。蕭鼓迎神鬧。鉏耰小麥忙。城西小市散。歸艇滿斜陽。

又

兩暗山陂路。人喧古渡頭。廟垣新畫馬。村笛遠呼牛。買飯諳爭席。迎潮競解舟。平生苦吟處。又送一年秋。

古寺

秋草荒無路。來遊感廢興。殘僧僅粥飯。古像冷香燈。扶病驚重到。題名記昔曾。自量難笑汝。一歎倚枯藤。

夢中作

繫馬朱橋上酒樓。樓前敷水拍堤流。春風又作無情計。滿路楊花靦雪毬。

又

大慶橋頭春雨晴。行人馬上聽鶯聲。祥符西祀曾迎駕。惆悵無人說太平。

舟行魯墟梅市之間偶賦

短髮蕭蕭久挂冠。江湖到處著身寬。蓼花不逐蘋花老。桐葉常先槲葉殘。未卜柴荆臨峭絕。且謀蓑笠釣荒寒。閑人尙媿沙鷗在。始信煙波得意難。

衰疾

衰疾支離負聖時。猶能采菊傍東籬。捉衿見肘貧無敵。聳膊成山瘦可知。百歲光陰半歸酒。一生事業略存詩。不妨舉世無同志。會有方來可與期。

惜昔偶見張安國周子充劉韶美王景文陳德召任元受遺集爲之感愴作長句舒悲不知涕泗之集也。憶昔高皇紉柄臣。招徠賢雋聚朝紳。寧知遺恨忽千載。追數同時無一人。狸骨九原應已朽。殘書數帙尙如新。此身露電那堪說。也復燈前默愴神。

兩後寒甚

陂澤連山脚。風煙接海濱。孤鴻悲遠客。殘菊伴陳人。酒盡瓶枵腹。爐寒客曲身。老翁殊耐事。一笑自回春。

入冬病體差健而貧彌甚戲作

乞骸自喜脫風塵。北陌東阡負未身。夢裏相逢無豎子。面間時出有真人。閑憑曲几還終日。不出衡門動過旬。送老齋鹽君勿笑。天教成就一生貧。

蜀漢

憶昔遨遊蜀漢間。駸駸五十尙朱顏。呼鷹雪闇天回路。采藥雲迷御愛山。舊事已無人共說。征途猶與夢相關。夕陽不覺憑闌久。待得林鴉接翅還。

新開小室

並檐開小室。僅可容一几。東爲讀書窗。初日滿窗紙。衰眸頓清澈。不長字如蠅。琅然絃誦聲。和答有稚子。餘年猶幾何。此事殊可喜。山童報炊熟。東卷可以起。

初冬絕句

鱸肥菰脆調羹美。麴熟油新作餅香。自古達人輕富貴。例緣鄉味憶還鄉。

又

道途冬暖衣裘省。村落年豐鼓吹喧。下麥種穊無曠土。壓桑接果有新園。

卽事

一云起山容改。潮生浦面寬。寒鴉先雁到。烏柏後楓丹。年邁狐裝帽。時新豆搗糲。非關嗜溫飽。更事耐悲歡。

又

遜居無外事。白日不勝長。詩爲窮差進。琴雖老未忘。映窗精試墨。閉閣苦留香。年少無相諂。功名事更狂。

又

日上小窗東。禽鳴高樹中。樂哉容膝地。著此曲肱翁。香迳常遲散。兒來亦旋通。所慚貪坐睡。鉛槧少新功。

又
紙潔晴窗暖。粳新午飯香。嗜眠爲至樂。省事是奇方。孤蝶弄秋色。亂鴉啼夕陽。詩情隨處有。信筆自成章。

又
井稅無餘負。川原已飽犂。樵歌歸市步。帆影過河堤。野實丹兼漆。村醪蜜與齏。雖云有豐約。不廢醉如泥。

又
還鄉吳語熟。伏枕越吟悲。接客寒溫簡。過鄰几杖隨。獨嗟親舊少。不覺歲時移。陌上人爭看。風欹白接羅。

閑吟

閑吟可是治愁藥。一展吳牋萬事忘。不惜暮年酬倡絕。猶能作意答秋光。

自遣

衣冠尙作閑身祟。梁肉終非退士宜。惟有褐裘并豆飯。尙能相伴到期頤。

記乙丑十月一日夜夢

夢裏江淮道上行。解裝掃榻喜新晴。店門邂逅緜袍客。共把茶甌說養生。

又

旋糴街頭米數升。黃昏看上店身燈。明朝山路聞饒石。買得烏驪喜不勝。

縱遊

人事元知不可諧。名山踏破幾青鞋。百錢拄杖無時醉。一錫隨身到處埋。驛壁讀詩摩病眼。僧窗看竹散幽懷。亦

知詩料無窮盡。燈火蕭疎過縣街。

村居書事

過門車馬誰曾入。塞路蓬蒿不復鋤。兩漏日惟支敗屋。風餘時自緝殘書。

又

矮餅煮粥猶難繼。小甌蒸餠豈解常。偶得鹽醃便豪侈。晨飧滿舍野蔬香。

又 架橋築路村翁事。裂網伸鉤老嫗心。自笑年來足衰態。軒昂故步嬾重尋。

又 書收鼠齧猶堪讀。柿拾鴉殘亦自甜。動念不如姑省事。智謀老健恐難兼。

又 修身世世詩書業。營利明明市井人。安得後生俱自好。百年門戶本來貧。

又 文辭苦思徒妨睡。官職虛名不療飢。垂老始知安樂法。紙鳶竹馬伴兒嬉。

湖堤暮歸

出郭並湖無十里。我歸蟹舍過魚梁。川雲蒼白不成雨。汀樹青紅初著霜。俗孝家家供菽水。農勤處處築陂塘。樂哉追逐鄉三老。半醉行歌詠歲穰。

題搨本姜楚公騰

又 憶昔呼鷹塞草枯。妖狐狡兔笑談無。明窗見畫空三歎。恍若霜郊遇獵徒。

又 弓面霜寒斗力增。坐思鐵馬蹴河冰。海東俊鶴何由得。空看緜州舊畫鷹。

書巢五詠

又 銅之在人間。細大各有境。散爲五銖貨。聚作九牧鼎。天祿與辟邪。乃復參泓穎。致用孰相須。寒泉出金井。

右硯滴

又 古者貝爲貨。庶物賴以通。後世貴銅臭。退處書几中。楮生借光輝。文字傳亡窮。言利古所羞。孰謂汝不逢。

右研蠹

又 時來偶見收。過時自當退。豈惟裁紙尾。亦或用牘背。人情有貴賤。志士感興廢。庫中九萬張。視我猶前輩。

右故紙

鸞膠搗松煙。成此金石姿。雖以剛故折。挺特終不移。微功在簡冊。敢惜身蹈危。雖非破硯文。永世亦有辭。

右折墨

銅壺受五升。中貯太古醇。相從亦已久。一朝委流塵。我豈少恩哉。白頭刀如新。誰知矮道士。亦作斥仙人。

右空酒壺

感遇

仕宦五十年。終不慕熱官。年齡過八十。久已辦一棺。結廬十餘間。著身如海寬。此外皆長物。簡去心始安。稱意多怒嗔。易可出艱難。我無狐白裘。短褐亦禦寒。

又

士方貧賤時。藜藿苦不足。一朝得富貴。奴僕饜梁肉。大噉食亞夫。空器餽荀彧。何如茆檐下。父子共饘粥。我生有至願。世世謝寸祿。有子復有孫。無榮亦無辱。

又

人之所甚患。饑渴與寒暑。粗免則已矣。過計安用許。自奉非其分。三彭將嫉汝。寓形天壤間。大抵皆逆旅。但能飽菜根。何地不可處。堂堂七尺軀。切勿效兒女。

又

我以善勉汝。汝謂出訾毀。置之不復言。意又不能已。爲善如築臺。成功由積纍。中休猶不可。況本無基址。未言破萬卷。日且讀十紙。學雖在力行。要是從此始。

又

我初居三山。同里數十人。尊酒相勞苦。言辭亦諄諄。去來四十年。皆成塚中塵。子孫雖或存。敗屋賣作薪。此亦何罪哉。不過坐一貧。我幸未至此。亦復拙謀身。無飯可哺汝。觸目成悲辛。

又

人與人爲徒。事我蓋有緣。司晨與警夜。異類亦可憐。舐糠啄遺粒。要使全其天。人則當教誨。見善或能遷。盛怒姑小忍。雖蒲豈非鞭。事過我亦喜。陶然送流年。

幽興

老向浮生意漸闌。飄然俟死水雲間。龜支牀穩新寒夜。鶴附書歸舊隱山。無意詩方近平淡。絕交夢亦覺清閑。一端更出淵明上。寂寂柴門本不關。

題詹仲信所藏米元暉雲山小幅

俗韻凡情一點無。開元以上立規模。鏡湖老監空揮淚。想見楚江清曉圖。徽宗見元暉楚江清曉圖。大加賞歎。

又

一棹朝南暮北風。奇峯倒影綠波中。定知漸近三山路。認得漁翁是放翁。

詹仲信以山水二軸爲壽固辭不可乃各作一絕句謝之

策蹇渡橋春雨餘。亂山缺處草亭孤。不知何許丹青手。畫我當年入蜀圖。

右春山

雪嶠梅村一徑斜。茆檐煙火兩三家。眼明見此幽栖地。卻恨吾廬已太奢。

右雪山

有所懷

鏡裏形模日夜衰。三峯師友久睽離。芝房又失耘鋤候。丹劑常思沐浴時。雷雨未成龍起晚。海天無際鶴歸遲。午窗一鉢青精飯。揀得香薪手自炊。

自嘲老態

世念秋毫盡。渾如學語兒。得牀眠易熱。有飯食無時。紗帽簪花舞。盆池弄水嬉。從今轉無事。靜坐不吟詩。

十月十四夜夢與客分題得早行

摩食寒燈下。脂車小市傍。驛門猶淡月。街樹正清霜。觸目關河異。興懷道路長。丈夫當自力。雙鬢易蒼蒼。

紹興中予初仕爲寧德主簿與同官飲酒食蠟房甚樂後五十年有餉此味者感歎有賦酒海者大勸盃
容一升當時所尙也

昔仕閩江日民淳簿領閑同寮飛酒海小吏壁蠔山夢境悠然逝羸軀獨爾頑所嗟晨鏡裏非復舊朱顏
病中兩夜

踏躋今如此沈縣不復支心隨形共頓年與智俱衰兩急孤燈暗雲深斷雁悲舊書空滿架惆悵負明時
讀呂舍人詩追次其韻

士生始從學取友實先務吾聞諸古人傾蓋有如故漢宮長生藥至取雲表露治身當何如而受一塵汚

有過當相規有善當相告豈惟定新交亦以篤舊好勢利古所羞置之勿復道霜鬢萬木凋孰秉歲寒操

少壯如昨日忽已及耄期舊友散莫收亦復少新知言歸鏡湖上日日醉東籬自笑如寒蝶裴回殘菊枝東籬予
小園名

又
道士成金丹青雲可接翼小夫豈知此危坐學數息如持一畚土自謂河可塞生不遇碩師幾何不自賊

又
三沐復三熏佩玉懷明珠何至不自珍欲效豕負塗傳呼雖甚寵正可誇羣奴君看魏徵孫世世爲農夫

庵中晚思
小庵歷腹獨彷徨俗事紛紛有底忙雲影忽生鴉蔽日雨聲不斷葉飛霜經綸正復慚伊傅雜駁猶能陋漢唐卷

盡殘書窗已晚笑呼童子換爐香

枕上

熒熒地爐火煮藥土牀前高帝老朝士長安舊少年松高露時滴城遠鼓猶傳拋擲百年事且安殘夜眠

冬夜

杞菊家風有自來。充饑藜糝不盈盃。雲迷野渡一聲雁。雪暗山村千樹梅。宴坐何妨面菴壁。長吟且復畫爐灰。歲殘尙恨新春遠。欲挽天邊斗柄回。

雜興

陋巷無心長草萊。柴門偶自不曾開。餘齡漸迫諸孫長。徂歲將窮積雪來。且欲燎衣無宿燼。暮思頽頽但空壘。孰知自有忘憂處。遶坐新書山作堆。

又

此身漂蕩等流槎。又向江村送歲華。急雨遇寒凝作雪。明燈無炮結成花。座懸鏡古森毛髮。甌聚茶香爽齒牙。況是貧家多樂事。阿開漸學手吒叉。

卷六十五

稽山行

稽山何巍巍。浙江水湯湯。千里巨大野。勾踐之所荒。春雨桑柘綠。秋風秔稻香。村村作蟹椴。處處起魚梁。陂放萬頭鴨。園覆千畦薑。春碓聲如雷。私債逾官倉。禹廟爭奉牲。蘭亭共流觴。空巷看競渡。倒社觀戲場。項里楊梅熟。采摘日夜忙。翠籃滿山路。不數荔枝筐。星馳入侯家。那惜黃金償。湘湖蓴菜出。賣者環三鄉。何以共烹煮。鱸魚三尺長。芳鮮初上市。羊酪何足當。鏡湖瀉衆水。自漢無旱蝗。重樓與曲檻。激灑浮湖光。舟行以當車。小繖遮新粧。淺坊小陌間。深夜理絲簧。我老述此詩。妄繼古樂章。恨無季札聽。大國風泱泱。

贈論命周雲秀才

周郎頹然市中隱。精神卓犖秋天隼。忽來過我論五行。袖出詩卷如束筍。人生一息不自保。況我耄期真待盡。君今盛爲談未來。我亦聽之俱可駭。雖然此心猶未泯。何至死去同蠢蠢。地下不作修文郎。天上亦爲京兆尹。

自嘲

受福元無一羽輕。豈知造物假餘生。抱病不死躋高壽。遇亂能全見太平。投箸斷鴻常自閔。營巢倦鷁固難成。乘除亦有堪慚處。記誦文辭誤得名。

自寬

兀兀空齋靜掩扉。篝爐香細著秋衣。簷頭殘雨晴猶滴。欄角羈雲晚未歸。支枕口和心共語。挑燈形與影相依。卷書未覺唐虞遠。知我何妨舉世稀。

唐虞

唐虞雖遠愈巍巍。孔氏如天孰得違。大道豈容私學裂。專門常怪世儒非。少林尙忌隨人轉。老氏亦尊知我稀。能盡此心方有得。勿持糟粕議精微。

幽事絕句

死生歸有命。榮悴出無心。苔井閑磨劍。松窗自斲琴。

又

矮紙來吳下。長毫出宛陵。自書霜夜句。持寄剡中僧。

又

昨夕風掀屋。今朝雨壞牆。雖知炊米盡。不廢野歌長。

又

煙畦朝斲藥。雪澗夜淘丹。仄徑何曾峻。單袍不覺寒。

又

新傳服氣訣。舊喜步虛吟。兒女不難棄。雲山何處深。

又

客生聞吠犬。草茂有鳴蛙。日昃方炊飯。秋深始采茶。

寄題廬陵王晉輔先輩桂堂

楚人記草木。桂在椒蘭中。我懷小山句。妙絕窮化工。唐人作山水。亦以桂配松。丹葩間綠葉。錦繡相疊重。不知始何時。巖桂開秋風。楚人所稱者。委棄等蒿蓬。嗚呼各有時。士豈怨不逢。我作桂堂詩。廣子雲夢胸。

寄題王晉輔專春堂堂前皆種牡丹

三月風光不貸人。千紅百紫已成塵。牡丹底事開偏晚。本自無心獨占春。

鼠屢敗吾書偶得狸奴捕殺無虛日羣鼠幾空爲賦此詩

服役無人自炷香。狸奴乃肯伴禪房。晝眠共藉牀敷暖。夜坐同聞漏鼓長。賈勇遂能空鼠穴。策勛何止履胡腸。魚殮雖薄真無媿。不向花間捕蝶忙。道士李勝之畫捕蝶獅貓。以訊當世。

讀唐書忠義傳

志士慕古人。忠臣挺奇節。就死有處所。天日爲無色。大義孰不知。臨雖欠健決。我思杲脚髮。可配嵇紹血。

病後作

骨相坐一寒。仕宦經百謫。晚入文昌省。又坐煩言噴。詔書復收召。付以大典冊。期年甫奏篇。皇恐亟自劾。歸來稽山下。三食新穫麥。草屨布裙襦。徒步老阡陌。今年疾屢作。恍若將歸客。道士言犯土。拜章安舍宅。巫言神去幹。翦紙招魂魄。把臂忽自悟。此豈屋漏脈。盡去囊中藥。默觀鼻端白。正氣徐自還。鬼子何足磔。

山中

草閣留雲宿。溪橋引鶴行。身閑詩曠逸。心靜夢和平。石乳無時滴。松肪徹夜明。山中足幽趣。不是傲公卿。

夜思

風掃浮雲作快晴。窗聲終夜雜簾聲。月明滿院鶻驚起。霜冷壓栖雞嬾鳴。名字虛稱舊朝士。門庭元是老書生。尙餘一事猶堪喜。北陌東阡醉太平。

晨起

晨起梳頭雪滿膺。可憐衰與病相乘。浮名何足欺橫目。真樂聊須付曲肱。仕有俸錢渠亦好。退無耕壟我何憑。具牛力盡殊堪閔。買犢東村恨未能。

老態

破榼愁春近。空困畏日長。頭風便菊枕。足痺倚藜牀。冉冉殘年逼。悠悠萬事忘。有兒堪晤語。無客亦何妨。

又

寡欲貧何損。無才老更宜。挂牆多漢刻。插架半唐詩。飯已頻摩腹。兒來暫解頤。尙悲吳蜀遠。未免故人思。謂張季長。

枕上

夜雨一再作。燈前獨詠詩。影看孤鶴瘦。吟答斷蛩悲。幽夢悠然覺。清笳何足吹。殘年猶幾日。已矣媿明時。

贈過門道人

朝行市塵中。奔馬不可及。暮涉清溪流。芒屨了不濕。巖扉一丹竈。山路兩書笈。白驢可置掌。童子亦絕粒。邂逅安期生。電逝不暇揖。太華獨巖然。萬仞道傍立。

道院雜興

江上霜風吹角巾。東歸不獨爲吳葦。掃除長劍華纓夢。收拾孤颿短棹身。勾漏丹砂開竈晚。商顏芝草滿山春。東封敢擬迎鑾仗。且作行歌陌上人。

又

征途暗盡舊貂裘。歸臥林間喜自由。體倦尙憑書引睡。心安不假酒攻愁。丹爐弄火經年熟。竹院聽琴竟日留。今旦理髯還一笑。白間時有黑絲抽。

又

早歲知聞久已空。巋然猶有灞城翁。東樓誰記傾春碧。傲州蓋古戒州也。有東樓閣。本名重碧。范至能易爲春碧。北嶺空思擘晚紅。北嶺在福州。予少時與友人朱景參會嶺下僧舍。時秋晚。荔子獨晚紅在。冉冉流年霜鬢外。纍纍荒塚綠蕪中。琳房何日金丹熟。老鶴猶堪萬里風。

又

龜堂有叟富神通。白髮何妨兩頰紅。先取山川來掌上。卻移天地入壺中。鶯花不老非塵世。風月常新奪化工。近作東籬君未見。一尊少住莫悤悤。

山村經行因施藥

閑行偶復到山村。父老遮留共一尊。曩日見公孫未晬。如今已解牧雞豚。

又

耕傭蠶婦共欣然。得見先生定有年。掃灑門庭拂牀几。瓦盆盛酒薦豚肩。

又

兄扶一老候溪邊。來告頭風久未痊。不用更求芎芷輩。吾詩讀罷自醒然。

又

驢肩每帶藥囊行。村巷歡欣夾道迎。共說向來曾活我。生兒多以陸爲名。

又

逆旅人家近野橋。偶因秣蹇暫消搖。村翁不解讀本草。爭就先生辨藥苗。

歎老

身歷還回事萬端。天教林下養衰殘。文編似是他人作。書卷如曾隔世觀。久已悠悠置恩怨。況能一一記悲歡。牀頭周易真良藥。不是書生強自寬。

卽事

流尾驢嘶小市門。側蓬帆過古城村。此生感慨知何限。斗酒新豐不足論。

又

草衣木食更何求。穴處巢居過卽休。尙恨未能全省事。一竿風月釣滄洲。

自賀

胎髮茸茸綠映巾。歸耕猶是太平民。流觴內史拒同社。扛鼎將軍與卜鄰。弊屋去蘭亭項里。皆甚。曾冠六鰲非

俗吏已開九秩是陳人。一盃剩約梅花醉。又見開禧第二春。

天氣作雪戲作

八十又過二。與人風馬牛。深知老當逸。孰謂死方休。細衲兜羅襪。奇溫吉貝裘。閉門薪炭足。雪夜可無憂。

家風

春耕秋釣舊家風。門巷荒寒屋壁空。四海交情殘夢裏。一生心事斷編中。買魚日待攜籃女。裹藥時從挾籬翁。俗謂買藥爲裹藥。便廢閑吟亦未可。吾徒豈獨坐詩窮。

十二月二日夜夢遊沈氏園亭

路近城南已怕行。沈家園裏更傷情。香穿客袖梅花在。綠蘸寺橋春水生。

又

城南小陌又逢春。只見梅花不見人。玉骨久成泉下土。墨痕猶鎖壁間塵。

江干

霜晴忽念到江干。小蹇羸童路已乾。骨相豈能當富貴。鬢毛聊喜耐悲歡。客途冬暖衣裳薄。村市年豐酒醖寬。殘臘即今無十日。剩求芹蓼助春盤。

獨行過柳橋而歸

塞雲覆江干。慘慘雪欲作。草枯狐兔見。鷹隼方縱搏。老翁臥蓬戶。疾痛在腰脚。忽覺意稍佳。快若解束縛。呼童扶下堂。西北度略約。浮波見鳧雁。決起驚烏鵲。籬根迎犬吠。碓下雞俛啄。霜餘桑葉積。春近柳枝弱。徐行過傍舍。醉笑盛酬酢。歲暮農事休。羨爾羣飲樂。

戲遣老懷

平生碌碌本無奇。況是年垂九十時。阿囷略如郎罷老。穉孫能伴太翁嬉。花前騎竹強名馬。階下埋盆便作池。一笑不妨閑過日。歎衰憂死卻成癡。

又

清羸正怯倚闌干。紗帽還驚半指寬。日漏雲端纔欲暖。風催梅信已成寒。尋僧竹院逢茶熟。引鶴溪橋及雪殘。只道捐書差似達。庖丁數紙尙須看。

又

兒時萬死避胡兵。敢料時清畢此生。已迫九齡身愈健。熟觀萬卷眼猶明。深深小塢梅初動。漱漱清溪水欲平。安得飄然從此逝。緱山風月聽吹笙。

又

舊龔家風號散人。晚承恩詔賜閑身。放狂泥酒都忘老。厚價收書不似貧。霜曉方驚羣木脫。春晴又喜一花新。先生偶出人難遇。陌上爭先看角巾。

又

本意歸來老故丘。閉門飯足尙何求。閑雲一片自舒卷。幽鳥數聲相應酬。但得有書時到眼。正令無酒亦忘憂。東籬偃仄纔尋丈。已敵征西萬戶侯。

對鏡

歲月雖過邁。形容未苦癯。髮如新沐潤。顏似半酣朱。書讀常終卷。山行亦却扶。悠悠隨日過。不復歎頭顱。

晨起

客枕長霜氣。曉窗收月痕。芸芸萬物作。皎皎一心存。老已忘開卷。貧猶力灌園。兒孫能繼此。亦足報君恩。

吾年過八十。久已棄朝簪。化蝶有殘夢。焦桐無賞音。溪聲喧夜旦。野色變晴陰。欲講平生學。茫然不可尋。

又

八十又過二。自言名放翁。斧斤遺壽櫟。雲海寄冥鴻。酒挂驢鞍側。詩投藥笈中。灞城逢薊叟。共語莫匆匆。

述志

椎牛釀酒千人帳。破浪凌風萬斛船。常恨書生無此快。一生低首短檠前。

又

新豐買酒慰無聊。衝雪騎驢上灞橋。羆老尙堪吞緡子。松風何至羨山苗。

排悶

吹盡梅花了不知。化工也誤老人期。離離新草隨愁出。漠漠餘寒與睡宜。古錦一聯吟舊句。文楸數著理殘棋。波生澄澗君何怪。禪榻從來映鬢絲。

舟中作

林麓重重霧雨昏。扁舟晚過郡南門。鑄金越相遺祠古。執玉塗山王氣存。官道蒼茫多水驛。客遊飄泊厭風飈。剡中此去無多地。會約支公聽斷猿。

丙寅元日

縹緲初聞寺閣鐘。霏微零雨兆年豐。家家椒酒歡聲裏。戶戶桃符霽色中。春枕方濃從賣困。社醅雖美倦治饔。從今萬事俱拋擲。且作人間百歲翁。

新晴

夜雨空階滴到明。山雲忽斂作新晴。門前月淡有檐影。牆外泥乾無屐聲。與世日疎愁易遣。入春得暖疾差平。便當剩作滄洲趣。寄語沙鷗勿致盟。

新歲

改歲鍾馗在。依然舊綠襦。老庖供鱸飪。跣婢暖屠蘇。載糗送窮鬼。扶箕迎紫姑。兒童欺老瞶。明燭聚呼盧。

簡邢德允

邢子襟靈舊絕塵。爾來句法更清新。淡交喜得山栖友。傑作疑非火食人。豈但僕奴看屈子。直須塗改到生民。與君兩世交情厚。剩欲燈前對角巾。

簡蘇邵叟

君家文獻歷十朝。魏公莪篁加金貂。孫支得君愈雋發。貴名突兀凌煙霄。居吳入蜀三十載。諸公孰能折簡招。澗

松意氣極磊砢。天馬毛骨何超遙。鼎來行卷十九首。緱山明月聞吹簫。沉香亭畔未須說。想見風雪上灞橋。老夫誦之羣玉府。學士如堵不敢驕。爾來一編愈妙絕。粲若新霽瞻斗杓。出爲龍首子何有。老穿豹尾我亦聊。湖邊酒樓無十步。胸次懣懣思同燒。

東村

信脚村墟路。歸來日未西。波清魚隊密。風小鵲巢低。白水初平岸。青蕪亦徧犁。市墟多美酒。飲具不須齋。

新曆數

新曆在手心怕開。日月聯翩相續來。黃金散盡自一快。白髮不貸真可哀。無爲健羨廣成子。千二百年終有死。膠不可黏西去日。刀何由翦東流水。酒無醇醜但痛飲。市醜上尊俱醉耳。堂堂七尺死卽休。不飽烏鳶飽螻螻。

雪中

忽忽悲窮處。悠悠感歲華。暮雲如潑墨。春雪不成花。眼籬燈生暈。詩成字半斜。殘尊已傾盡。試起問東家。

又

春晝雪如筴。清羸病起時。跡深驚虎過。煙絕閔僧飢。地凍萱芽短。林寒鳥哢遲。西窗斜日晚。呵手斂殘棋。

早春出遊

微雲薄霧新晴後。小蓋輕輿古道遙。林杪幽禽初學囀。牆陰凍雪未全消。酒罇日暮收青旆。市步人歸擁畫橈。欵帽捫髻常半醉。逢人誰與話無慆。

又

人生何適不艱難。賴是胸中萬斛寬。尺宅常朱那待酒。上池頻飲自成丹。楚祠花發呼舟去。禹穴雲生倚杖看。更有新春堪喜事。一村簫鼓祭蠶官。

東籬

東籬深僻嬾衣裳。書卷縱橫雜藥囊。無吏徵租終日睡。得錢沽酒一春狂。新營茅舍軒窗靜。旋煮山蔬匕筯香。戲集句圖書素壁。本來無事却成忙。

又
漫道深居晝掩關。東籬栽接不曾閑。每因清夢遊敷水。自覺前身隱華山。花發時時攜綠酒。客來往往爇朱顏。藥爐安著猶無地。擬展茅茨一兩間。

又
東偏隙地作疎籬。遇興無非一笑時。陪客投壺新罰酒。與兒鬪草又輸詩。山桃溪杏栽俱活。藥鑿漁竿動自隨。家事猶令罷關白。固應黜陟不曾知。

村市醉歸

明時乞得水雲身。白首扶衰又見春。橫木門幽謝來客。獨轆車小避行人。湘湖水長莼絲滑。蘭渚泥融箭茁新。處處酒壚皆可醉。不辭微雨墊吾巾。

村夜

入春雨雪無休日。雨止猶陰未快晴。萬竅怒號風不定。半輪斜照月微明。百年辛苦農桑業。五處暌離父子情。但得平安已爲幸。孤燈殘火過三更。時子虞調官行在。子龍阻風西陵。子修在閩。子坦在梅昌。子與子布子鑄守舍。

旅思

百病集殘骸。閑遊且散懷。旅裝如遠役。蔬食似長齋。買藥停山步。求醫過縣街。春寒殊未已。閉戶夜燃爇。

對酒作

憑閣風吹帽。穿林雨墊巾。相呼十日飲。不負百年身。陌上金羈馬。墳前石琢麟。於吾竟何有。笑殺武陵人。

遊東村

露草衡門曉。風松一塢幽。新春有佳日。老子得閑遊。鷗爲忘機下。魚緣得計浮。歸途無遠近。一葉亂漁舟。

晨起

老境真無事。深居每畏人。喔咿雞失旦。姪姘鳥鳴春。過擔銀鯉白。擎盤粬糗新。出門還可喜。一笑語比鄰。

夢中作

世事何由可控搏。故山歸臥有餘歡。澗泉見底藥根瘦。石室生雲丹竈寒。人遠忽聞清獻起。山開頻得異書看。一朝出赴安期約。萬里煙霄駕紫鸞。

春雨

片片紅梅落。纖纖綠草生。無端夜來雨。又礙出門行。

又

春陰易成雨。客病不禁寒。又與梅花別。無因一倚欄。

又

胸懷阮步兵。詩句謝宣城。今夕俱參透。焚香聽雨聲。

又

疎點空階雨。長明古殿燈。廬山岑寂夜。我是定中僧。

村店

水汎輕搖櫂。山行穩跨驢。朝晡半晴雨。閭里雜樵漁。野鷺浮寒浦。飢鴉集老樗。店家看壞壁。忽見昔年書。

久雨薪炭食飲俱不繼戲作

澤國春饒雨。書生老益貧。固難誇練炭。亦豈擇勞薪。鹽盡纔供暮。醃微尙惱鄰。人嗤信書誤。癡絕望常珍。

溪上

偶就澄溪照幅巾。蘭亭遺韻想清真。功名不入山林夢。詩酒猶關兒病身。萬事只增思魯歎。百年常媿避秦人。超然聊喜高情在。手挈長條貫細鱗。

謝君寄一犁春雨圖求詩爲作絕句

說著功名我自羞。喜君解劍換吳牛。莫將江上一犁雨。輕博人間萬戶侯。

又

老農雖瘠喜牛肥。回首紅塵萬事非。耕罷春蕪天欲暮。小舟衝雨載犁歸。

二月一日夜夢

夢裏遇奇士。高樓酣且歌。霸圖輕管樂。王道探丘軻。大指如符券。微瑕互琢磨。相知殊恨晚。所得不勝多。勝算觀天定。精忠壓虜和。真當起莘渭。何止復關河。陣法參奇正。戎旃相蕩摩。覺來空兩泣。壯志已蹉跎。

新晴

寂寂房櫳鳥雀聲。熏籠茶竈正施行。繁花滿樹春纔半。斜日穿雲雨乍晴。引睡書橫猶在架。圍棋客散但空枰。病懷莫道傷幽獨。小榼芳醪手自傾。

又

挂冠湖上遂吾初。捫腹消搖適有餘。羹糞野蔬元足味。屋茨生草亦安居。市墟分熟通賒酒。鄰舍情深許借驢。更喜新晴滿窗日。籤題重整一牀書。

望永思陵

高帝中興萬物春。青衫曾忝綴廷紳。仕爲將相却常事。年及耄期能幾人。早幸執爨觀北伐。晚叨秉筆記東巡。歸耕况復蒼梧近。鬱鬱葱葱佳氣新。紹興末駕幸金陵。游適在朝列。淳熙末。上命羣臣齊集文華閣。修高宗實錄。游首被選。

燈下小酌

江湖雙鬢禿。宇宙一身窮。酒浪搖輕碧。燈花落碎紅。交情元易見。春事半成空。尙覲身強健。煙畦擷芥菘。

春遊

杏花天氣喜新晴。白首書生樂太平。小陌鞦韆雖隔世。名園袂袂尙關情。山林自古流觴地。絃管誰家送酒聲。莢菜鱸魚初滿市。莫將半酪敵南烹。

又

窮愁終日竟胡爲。老健人間自一奇。每駕柴車遊古寺。閒騎竹馬伴羣兒。登臨蘭渚流觴地。蘭亭本名蘭渚。蕭散狐泉冷澗時。練布單衣白羽扇。路傍人總道相宜。

春日雜賦

羈懷病思正厭厭。詩卷漁竿信手拈。老境何嘗忘一笑。春風也解到窮閭。殘花滿地無餘萼。新筍掀泥已露尖。轉老轉窮君勿笑。熊躡魚腹豈容兼。

又

鬢毛八九已成霜。此際逢春只自傷。苦雨不容花抵敵。餘寒猶賴酒禁當。退紅衣焙熏香冷。古錦詩囊覓句忙。堪笑散人閑事業。西窗容易又斜陽。唐樂府云。床上小熏籠。韶州新退紅。

又

江湖放浪水雲人。藥物枝梧夢幻身。移竹南窗初試筍。掃花北陌旋成塵。窮忙自笑常終日。老健猶能不負春。未遂初心惟一事。乞薪賒米惱吾鄰。

又

乞得身歸剡曲邊。衡門茅舍共蕭然。向來誤計守書冊。此日遺愁無酒錢。俗客妬閑來袞袞。流年欺老去翩翩。梨花楊柳清明過。且向江村剩放顛。

又

人生覓飯元多術。最下方爲祿代耕。脫却朝衫猶老健。快如苦雨得春晴。鳥聲頻喚五更夢。花氣頓醒三日醒。最喜晨興聞剝啄。吾兒書札到柴荆。

悲歌行

讀書不能遂吾志。屬文不能盡吾才。遠遊方樂歸太早。大業未就老已催。結廬城南十里近。柴門正對湖山開。有時野行桑下宿。亦或慟哭中途回。檀公畫計三十六。不如一篇歸去來。紫駟之峰玄熊掌。不如飲豆羹芋魁。腰間纍纍六相印。不如高臥鼻息轟春雷。安得寶瑟五十弦。爲我寫盡無窮哀。

梅市暮歸三山

日日蠻童佩一壺。壺乾時亦復村醺。橫林露塔遠猶見。暮靄籠山淡欲無。綠浦例憑菰竹界。畫橋常遣鷺前驅。此

身元是滄浪客。敢學高人乞鏡湖。

龜堂偶題

文章何物求渠力。詩亦安能使汝窮。春水一池花百本。此生未易報天公。

又

細肋臥沙來左輔。巨螯斫雪出東吳。不知一飽摩便腹。得似茅檐薺糝無。

泛湖

白鷺雙飛導我前。自疑身是水中仙。放舟漢客樵風裏。擲釣秦皇酒瓮邊。山寺雲間傳講鼓。漁家浦口起炊煙。個中得意君知否。買盡煙波不用錢。

卷七十六

園中作

疎籬圍中庭。野水赴方塘。春雨路易乾。徐步躡夕陽。藍藍紅杏梢。忽已占年光。我老來日短。乃復不自量。接花待其成。鄰里共笑狂。萬事孰能料。社櫟老不僵。磊磊盤中果。安知不獲嘗。作詩遣閑愁。一笑無留觴。

寄題求志堂

古人不輕出。出則堯舜其君民。古人不輕隱。隱則坐使風俗淳。孰知後世乃不然。唐虞日遠如飛煙。異端欲出六籍上。裔夷直居中夏先。窮居求志達行道。儻不塞責真負天。士固不可苟富貴。願亦豈可徒貧賤。如其一念有愧心。寧不終身戴慚面。老夫少年鐵鑄硯。欲窺聖門終未見。祝君勿恃來日長。八九十年如掣電。

贈過門道人

賣藥人間兩屨輕。飄然雲水不論程。晴經浦口亂流渡。夜宿山家乘月行。

春晚

門巷蕭條老病侵。春晴方快又春陰。啄吞自笑如孤鶴。導引何妨効五禽。雨洗杏花紅欲盡。日烘楊柳綠初深。籬

鸞寧有平生舊也。傍茆檐送好音。

又

村巷泥深畫掩門。倚欄搔首一消魂。花經風雨人方惜。士在江湖道更尊。壁浪忽看魚對躍。入雲時見鶴孤鶩。向來莘渭今安在。歎息誰能起九原。

梨花

開向春殘不恨遲。綠楊窳地最相宜。征西幕府煎茶地。一幅邊鸞畫折枝。宣司靜鎮堂。屏上有邊鸞梨花。

又

粉淡香清自一家。未容桃李占年華。常思南鄭清明路。醉裏迎風雪一杈。

又

嘉陵江色嫩如藍。鳳集山光照馬銜。楊柳梨花迎客處。至今時夢到城南。

農桑

農事初興未苦忙。且支漏屋補頽牆。山歌高下皆成調。野水縱橫自入塘。

又

水長人家浸稻秧。蠶生女手摘桑黃。差科未起身無事。鄰曲相過日正長。

又

采桑蠶婦念蠶飢。陌上忽忽負籠歸。却羨鄰家下湖早。畫船青繖去如飛。

又

蠶如黑螿稻青鍼。夫婦耕桑各苦心。但得老親供養足。不羞布袂與蒿簪。

自嘲

野叟身常雜傭保。莠圃荒庭自鋤掃。小兒耕養董董足。大兒游宦垂垂老。朝餐未破百瓮蠶。晚餉猶存兩困棗。春糲但備翁作糜。儲帛纒堪孫裂裋。賢愚元自一王尊。癡鈍寧論萬馮道。可憐對客猶自矜。談道能令君絕倒。

春晚

寂寞又過桃李時。東園微雨草離離。破園食外有餘粟。殘髮白中生黑絲。小疾已能忘藥石。餘年寧復問蒼龜。飾巾待盡從來事。閉戶燒香更不疑。

又

正見山陂草木芽。狂風忽掃萬枝花。病懷久已忘春事。老眼猶能惜物華。枕上有詩頻自改。尊中無酒不妨賒。昔人漫道傷幽獨。野鶴分巢即是家。

閉戶

乞身林下養衰殘。閉戶寧容外物干。正使有爲終淡泊。未能無疾已輕安。寸陰息念如年永。丈室端居抵海寬。老子爾來深達此。却嫌兒女話團圓。

晨起

初聽高枝鸚鵡鳴。旋聞深井轆轤聲。煙籠小閣猶疑雨。日射東窗頓作晴。古洗注湯供頽濯。春畦摘菜助烹烹。老人頽情雖堪笑。終勝胸中懷不平。

出遊

九日陰霾一日晴。此有處處是丹青。斷雲零落江郊路。壽木輪囷古驛亭。盍婦微行望耕壟。漁歌相和起煙汀。拔山意氣今何在。猶有遺祠可乞靈。路過項羽廟。

又

近過父老遠尋僧。病起經行力漸增。織室躡機鳴軋軋。稻陂瀦水築登登。淺深村落時分徑。高下川原自作層。薄暮到家還熟睡。隔林鐘鼓報晨興。

又

吳地清明未減寒。梨花初動杏花殘。平沙漫漫人爭渡。微雨蕭蕭客跨鞍。野寺吹螺作春會。山郵糴米具朝餐。已聞九帙吾何覲。時說金丹強自寬。

又
東阡南陌適逢晴。小蹇輕裝短作程。白水滿陂秧馬躍。綠陰遶舍緯車鳴。過村小婦憑牆看。入寺高人攬袂迎。剩倩東風吹柳絮。放翁詩到此時成。

曳杖

曳杖寄徜徉。徐行轉曲廊。病知貪酒害。老悔愛花狂。庭樹雲收影。簾旌雨浥香。悠然有佳處。物我兩相忘。

自詠

曾著杞菊賦。自名桑苧翁。常開羅爵網。不下釣魚筒。租稅先期畢。陂塘與衆同。土章八十字。世世寫屏風。予真幸經土章八十四字爲屏風。

雜興

謀生在衣食。不仕當作農。識字讀農書。豈不賢雕蟲。婦當娶農家。養蠶事炊春。晨耕候春扈。夜織驚秋蛩。畦蔬勝肉羹。社酒如粥醲。毋爲慕朝幘。諂笑求見容。

又

家世本臞儒。自奉至儉薄。肉食固難期。間亦闕鹽酪。賓朋飯芋豆。時節羹藜藿。偶然設鷄豚。變色相與作。家居常守此。自計豈不樂。蔬園長蹴躡。切勿思大嚼。

又

家本徙壽春。遭亂建炎初。南來避狂寇。乃復遇強胡。于時髡兩髦。幾不保頭顱。亂定不敢歸。三載東陽居。人事固難料。今乃八九餘。努力未死間。讀我先人書。

又

讀詩讀七月。治書治無逸。王業與農功。事異理則一。此外復何爲。齊民有遺術。一飽不啻足。切勿爲利誡。大屋起道傍。百鬼闖其室。曷不觀陸翁。食菜開九帙。

又

三吳氣候異。開歲固多雨。今年已暮春。霽日僅可數。寒氣薄腠理。沉痛結心膂。遣奴買藥物。日夜事炮煮。端居情懷惡。欲出泥淖阻。安得平生歡。駕言問良苦。

雜感

病臥踐衰境。躬耕歸故園。怒蛙號廢沼。妖鷗嘯荒村。里巷魚飡薄。坊場黍酒渾。相逢欲話舊。意極轉忘言。

又

道進身垂老。方靈病已侵。知難逃死籍。猶得遂歸心。星斗開孤劍。塵埃拂素琴。妄庸常袞袞。誰與論幽深。

又

兩鬢花無幾。愁多酒不支。淒涼數聲笛。零亂一枰棋。蹈海言猶在。移山志未衰。何人知壯士。擊筑有餘悲。

又

草徑纔容步。茅廬僅庇牀。原貧道尊顯。回天死芬芳。弦誦喧清曉。鉏耰滿夕陽。此風能不墜。韋布亦何傷。

又

早仕讒銷骨。遲歸悔噬臍。短衣猶掩脛。窮巷固多泥。婢喜蠶三幼。鄉中謂蠶眠爲幼。奴貪兩一犁。衡茅明我眼。刮

膜謝金篦。

又

春晚晴還雨。村深醉復醒。溪添半篙綠。山可一窗青。藥品隨長鏡。花名記小屏。閑身幸無事。吟嘯送餘齡。

兩感

吾園畜兩鵝。善驚未易馴。及今纔幾時。弭耳常依人。飢食園中草。渴飲溝澗濱。時時輟餘糧。亦未耗吾困。吏或無佳政。盜賊起齊民。孰能撫以德。坐還三代醇。

書感

疋馬曾爲塞上遊。東歸幾見剡川秋。故城廢市古今歎。斷角殘鐘朝暮愁。尺寸無功真碌碌。毫期未死轉悠悠。阿奴尙喜強人意。三日於菟氣食牛。開孫以二月二十日擊碎盤。

書意

萬事馬牛風。蕭然破屋中。忍貧增力量。耐辱見神通。道進天魔散。心安客疾空。微言施魚鳥。一一脫池籠。

讀唐書

力行可使金如土。篤好能徠馬若龍。斗米三錢本常事。風雲千載自難逢。

貧中得味如飧蔗。語下明心似到鄉。對客欲談渾忘却。笑呼童子替燒香。

又

半飽半飢窮境界。知晴知雨病形骸。軒昂似鶴那求料。枯槁如僧不赴齋。

又

傳家只要存書種。學道當知養聖胎。寧使終身遷比景。莫令一物汙靈臺。

又

大兒都門久栖栖。小兒調官今復西。鄰家父子我所羨。泥水沒膝扶耕犁。

栽丹牡

攜鋤庭下闢蒼苔。墨紫鞋紅手自栽。老子龍鍾逾八十。死前猶見幾回開。

夜聞姑惡

學道當於萬事輕。可憐力淺未忘情。孤愁忽起不可耐。風雨溪頭姑惡聲。

哭開孫

學步漸扶牀。乘車已駕羊。虛稱砌臺使。不遇玉函方。杳杳天難問。茫茫夜正長。寂寥誰伴汝。蕭寺閉空房。

晚春東園作

雨餘木葉綠成陰。一日身閑直萬金。習氣自嫌除未盡。鳥啼花落尙關心。

又

女郎花開春事闌。王孫草長思婦歎。蜂釀蜜脾猶未熟。雨催梅頰已微丹。

禽聲

布穀布穀天未明。架犂架犂人起耕。官途不似農家樂。東作西成過此生。

秦皇酒瓮下垂釣偶賦

酒瓮山邊古釣磯。沙鷗與我共斜暉。目前雖有小得喪。天下豈無公是非。滄海橫流何日定。古人復起欲誰歸。道邊醉倒君奚憾。豈失風塵一布衣。

出遊歸鞍上口占

渺渺煙波飛槳去。迢迢桑野策驢還。寄懷楚水吳山外。得意唐詩晉帖間。每惜好春如我老。誰能長日伴人閑。世間自是無兼得。勛業元非造物慳。

閑詠

本志常思退。前緣剩得閑。聽猿來剡縣。采藥上稽山。超絕風塵表。瑩然冰雪顏。向來香火地。五綴羽衣班。

兩

曉望橫斜映水亭。暮看飄灑濕簾旌。不嫌平野蒼茫色。實厭空堦點滴聲。上策莫如常熟睡。少安毋躁會當晴。且將穡事傳童稚。未插秧時正好耕。

立夏

赤幟插城扉。東君整駕歸。泥新巢燕鬧。花盡蜜蜂稀。槐柳陰初密。簾櫳暑尙微。日斜湯沐罷。熟練試單衣。

孤寂

晚境諸兒少在傍。書堂孤寂似僧房。家居不減旅懷惡。夏夜尙如寒漏長。數筯筍蠶甘淡薄。半盃麥飯喜豐穰。愚儒幸自元無事。日課朱黃自作忙。

明日觀孤寂詩不覺大笑作長句自解

獨處將如長夜何。直將寂寞養天和。愛身不情如懷璧。守氣無虧似塞河。塵篋空存獲麟筆。煙陂嬾和夜牛歌。年

來勦業君知否。纔下新降百萬虜。

初夏出遊

早緣疎拙遂歸耕。晚爲沉縣得養生。藥鏡釣竿緣已熟。海村山市眼偏明。安西萬里人何在。廣武千年恨未平。但使蓮峯歸路穩。亦無閑手揖公卿。

又

平生與世曠周旋。惟有清遊意獨便。小竈炊菰山市口。東芻秣蹇海雲邊。春融恨欠舒長日。秋爽已悲搖落天。首夏清和真妙語。爲君誦此一欣然。

又

泥蹀躞鞋雨墊巾。閑遊又送一年春。長歌聊對聖賢酒。羸病極知朝暮人。廢堞荒郊閑吊古。朱櫻青杏正嘗新。桃源自愛山川笑。未必當時是避秦。

自詠

龜屋裁小冠。鹿皮製短裘。陸駕少游車。水泛淵明舟。山澤與城市。有路即可遊。或時一飯去。間亦旬日留。方見草木萌。忽已天地秋。淘丹雲澗冷。采藥乳穴幽。逢人亦欣然。有問乃不酬。摩挲金銅人。千載寄悠悠。

五更聞雨思季長

幽叢鳴姑惡。高樹號杜宇。驚回千里夢。聽此五更雨。展轉窗未明。更覺心獨苦。天涯懷故人。安得插兩羽。

醉中作

小市鐘聲斷。高樓月色新。醉眠當大路。狂舞屬行人。有客要元亮。無妻諫伯倫。山花信手插。不復惜烏巾。

溪園

跌宕欲忘形。溪園半醉醒。靜看猿哺果。閑愛鶴梳翎。矮榻水紋簾。虛齋山字屏。更須新月夜。風露對青冥。

初夏閑居

雪液初銷小盞香。風漪乍展北窗涼。巢乾燕乳蟲供哺。花過蜂閑蜜滿房。閉戶不知春已去。鈔書但覺日方長。新

嗟詩思年來減。虛負奚奴古錦囊。

又

川雲漠漠兩冥冥。濁酒閑傾不滿瓶。蠶簇尙寒憂繭薄。稻陂初滿喜秧青。王師護塞方屯甲。親詔憂民已放丁。病起自憐猶健在。不須求應少微星。

又

松棚黯黯接虛堂。掃地燒香旋置牀。密葉留花供淺酌。斷雲障日作微涼。高城薄暮聞吹角。小市豐年有戲場。白首史官閑盡歲。祇將搜句答流光。

又

城上朱旗夏令初。溪頭綠水蘸菰蒲。花貪結子無遺萼。燕接飛蟲正哺雛。簫鼓賽蠶人盡醉。陂塘移稻客相呼。鄉中謂備耕者爲客。長安青蓋金羈馬。也有農家此樂無。

又

啜茗清風兩腋生。西齋雅具愜幽情。熏衣過後篝爐冷。展卷終時嬾架橫。巢燕何曾擇貧富。鳴鳩元不爲陰晴。但能與物俱無著。小草新詩取次成。

又

野水楓林久寄家。慣將枯淡作生涯。小樓有月聽吹笛。深院無風看禮茶。靜岸葛巾穿薈蔚。閑拖筇杖入谿谿。平生每與兒孫說。切勿人前一語誇。

又

水邊茆屋兩三間。野叟幽人日往還。兩卷硬黃書老子。數峯破墨畫廬山。功名會上元須福。生死津頭正要頑。試說龜堂得力處。向來何啻半生閑。

又

煮酒青梅次第嘗。啼鶯乳燕占年光。蠶收戶戶繅絲白。麥熟村村搗麩香。民有袴襦知歲樂。亭無桴鼓喜時康。未

嘗一事橫胸次。但曲吾肱夢自長。

子坦今秋鹽官市。征當滿作絕句寄之。

八十老翁頭似雪。柯橋送汝淚頻揮。殘年豈料猶強健。却向柯橋接汝歸。

子適調官得永平錢監待次甚遠。寄詩寬其意。蓋將與之偕行也。

黃紙起家陞仕籍。青衫遡闕拜恩光。署銜汝勿憎銅臭。就養吾方喜飯香。世事極知多倚伏。人生正要小回翔。但令父子常相守。斂版扶犁味總長。

送韓立道守池州

千里江山控上流。省郎懷綬去爲州。才華故在諸公右。談笑遙分聖主憂。月隨駟譙喧鼓角。雨餘綠野徧鋤耰。萬家歌舞春風裏。秋浦如今不似秋。

野興

寓館無常地。輕裝不宿謀。迷途問耕叟。過渡上漁舟。野飯香炊玉。村醪滑瀉油。還家亦無事。隨處送悠悠。

又

小雨迎藜杖。微風入葛巾。寧甘結襪系。不作拜車塵。施藥鄉鄰喜。忘機鳥雀馴。家山又初夏。好在不貲身。

又

山谿逢孤寺。林窮渡小溝。松聲亂僧梵。雨點雜魚遊。卓纛三軍帥。金章萬戶侯。人生各有願。未肯換扁舟。

又

去去歷山村。行行並廟垣。湍流鱸魚小。反徑鮓花繁。白鷺飛如導。青蘿險可捫。歸途不寂寞。迎笑有諸孫。

東齋雜書

吾廬雖甚陋。窗扉亦疎明。開卷冬日暖。曲肱暑風清。昨日一鳥鳴。今日一木榮。欣然與之接。悲慨何由生。

又

吾貧無時醒。日月忽遄邁。空林春采甚。荒壠秋種稗。孤學有自來。飢死奚足怪。著書充棟宇。一字不肯賣。

負負無可言。上上不須說。天壤大如許。我獨身子子。苟合不可爲。萬事聽瓦裂。年登麥飯足。得酒且勤飲。

又
有客可劇談。有酒可盡醉。老夫老更窮。終日惟坐睡。既無客款門。酒亦未易致。頽然北窗下。兀兀有餘味。

又
下帷聽雨聲。開戶延月色。霏霏半篆香。湛湛一池墨。徐行舒血脈。危坐學踵息。吾聞諸先賢。養生莫如齋。

又
門低不通車。室隘劣容膝。掩脛無全衣。作字用挫筆。親朋孰可望。門內自相恤。一笑語吾兒。汝馭未須叱。

又
區芋常願雨。秧菜常願晴。吾兒行渡江。晨起愁風生。人生各徇私。夫豈造物情。孰能均此意。萬里皆春耕。

又
吾居魚鱉鄉。戒食兼鮮鱉。雞鷺以御客。乃者亦一掃。區區仁愛心。殆可質蒼昊。物情豈遠哉。我亦吝肝腦。

又
蓺花恨不茂。雜草欲其盡。心常隨貪愛。否則近殘忍。蝶網猶翩翩。蚓斷更菌蠢。君其等觀之。何者非可閔。

又
藥與疾相當。何急不能已。良醫善用藥。疾去藥亦止。晨晡節飲食。勞佚時臥起。藉白米長生。毫期直易爾。

又
養生有妙理。省事與寡言。於此能力守。衆說皆其藩。擾擾斲汝本。饒饒傷汝魂。要當俱置之。息深踵自溫。

又
學者學聖人。斯須不容苟。百年樂簞瓢。千載仰山斗。家庭盛弦誦。父子相師友。但令書種存。勿愧耕壟畝。

梅市

沙際人家半掩扉。借炊小住不相違。水生燧面大魚躍。風定草頭雙蝶飛。竹院遊僧聞鼓集。煙畦老圃荷鋤歸。浩然物外真堪樂。回首浮生萬事非。

初夏幽居

日長巷陌曬絲香。雨霽郊原割麥忙。小擔過門嘗冷粉。微風解籜看新篁。傍籬鄰婦收魚筍。叩戶村醫送藥方。欲到湖邊還嬾動。悠然扶杖立斜陽。

又

虛堂一幅接羅巾。竹樹森疎夏令新。瓶竭重招麴道士。牀空新聘竹夫人。寒龜不食猶能壽。弊帚何施亦自珍。枕簟北窗寧有厭。小山終日對嶙峋。

又

野草幽花無歇時。一窗終日對東籬。病猶獨醉雖堪笑。老未全衰亦自奇。古紙硬黃臨晉帖。矮牋勻碧錄唐詩。個中疑是忘憂處。問著山翁却不知。

又

東園梅熟杏初丹。老子披襟每不冠。古硯坡陀麝煤綠。小山蔥蒨石盆寒。移牀剩欲眠松塢。鼓枻還思泊蓼灘。未用絲毫辨差等。黃塵終勝客長安。

泛舟至近村茅徐兩舍勞以尊酒

小舸悠颺亦樂哉。迢迢故取北村回。山從樹外參差出。水自城陰曲折來。樂歲共忘東作苦。殘租不待急符催。舊鄰父老睽離久。喚取開顏把一杯。

再次前韻

少壯卽今安在哉。輕舟訪舊莫輕回。兒童擁岸迎舟入。婦女窺籬喜客來。多難只成雙鬢改。流年更著暮笳催。放懷魚鳥平生事。少住茅檐盡此杯。

題陳伯予主簿所藏秦少游像

晚生常恨不從公。忽拜英姿繪畫中。妄欲步趨端有意。我名公字正相同。

入梅弁序

吳俗以芒種後得壬日爲入梅。今年正以此日重雲蔽天。比夜乃雨。父老以爲有年之候。賦詩以識之。今年入梅日。雲脚垂到地。芬香小麥麩。展轉北窗睡。甲夜聞雨聲。起拜造物賜。三登於此卜。一飽可坐致。語兒高爾困。戒婦豐爾饋。擊壤歌太平。門無督租吏。

北窗雨中作

鬱蒸作不解。風雨來有信。豈惟窗戶清。更喜草木潤。簡編旣陳前。燈火亦可近。跂予望聖賢。傾河洗驕吝。扶衰幸未死。吾道其少進。安得平生歡。懷抱爲君盡。

戲書觸目

狸奴閑占熏籠臥。燕子橫穿翠徑飛。我亦人間好事者。憑欄小立試單衣。

四月二十八日作

四月欲盡五月初。九十未及八十餘。開口何曾談世事。收身且復愛吾廬。

又

行徧人間病不禁。鬢毛飽受雪霜侵。茅檐一夜蕭蕭雨。洗盡平生幻妄心。

卷六十七

倚筇

老翁愈老欲安歸。歸臥稽山飽蕨薇。未免解牛逢肯綮。豈能相馬造精微。靈山有土拈花笑。闕里何人鼓瑟希。我亦倚筇桑竹下。白髯蕭颯滿斜暉。

薄暑

冲夏暑尙薄。孤村日尤長。僧坊初施浴。行路亦饑漿。老我絕人事。終日坐虛堂。南北兩松棚。綉細吹清香。堂中無

長物。獨置湘竹牀。我睡僕亦休。睡覺誰在傍。起坐拭兩背。小山鬱蒼蒼。安得烏有生。俱老無何鄉。

晝寢

倦腕擎書忽墮前。心清無夢腹便便。丹成未要排雲去。且住人間作睡仙。

又

困睫芒羊一欠伸。頽然忽已墮紗巾。鼻端雷動君無怪。路熟華胥不問津。

睡起

睡起偃扇嬾搖。枕痕著面未全消。山丹石竹俱零落。孤蝶飛來伴寂寥。

又

蒲萄換葉欲成陰。歲月催人感慨深。安得門前無俗客。岸巾臨水聽蟬吟。

林間書意

三三兩兩市船回。水際柴門尙未開。垂綠筍梢風正惡。弄黃梅子雨初來。紅螺盃小傾花露。紫玉池深貯麝煤。領取林間閑富貴。向來謾計伴鄒枚。

又

小山草木一窗秋。團扇江山萬里愁。不讀狐書真僻學。未登鬼錄且閑遊。少隨官牒嗟無策。晚脫朝衫喜自由。半嶺嘯聲驚阮籍。要知天下有高流。

示子適

吾家太傅後。矜佩盛青青。我忝殿諸老。汝能通一經。學先嚴詰訓。書要講聲形。夙夜常相勉。諸孫待典刑。

追涼小酌

綠樹暗魚梁。臨流追晚涼。持盃屬江月。散髮據胡牀。苦蕒醃齏美。菖蒲漬蜜香。醉來呼稚子。扶我上南塘。

暑夜泛舟

暑氣方然一鼎湯。聊呼艇子夜追涼。微風忽起髮根冷。闕月初升林影長。漸近場中聞笑語。卻從隄外看帆檣。超

然自適君知否。身世從來付兩忘。

又

烈暑元知不可逃。天將清夜付吾曹。小舟行處浦風急。健鶻歸時山月高。愚智極知均腐骨。利名何啻一秋毫。等閑分得吳松水。安用并州快剪刀。

短歌行

冠一免。不可以復冠。門一杜。不可以復開。山林兀兀但俟死。臺省袞袞吁可哀。巨材倒壑亦已矣。萬牛欲挽真難哉。阿房銅人其重各千石。回首變化爲風埃。吾曹浮脆不自悟。乃欲冠劍常崔嵬。勸君飲勿用盃酌。但當手提北斗魁。挹乾東海見蓬萊。安用俛首爲低摧。

小江

細霧斜陽一片秋。數家茅屋小江頭。鱗盤遠入菰蘆夾。鳥陣斜飛蘭杜洲。暫住便成閑嘯詠。欲歸更復小遲留。老翁脚力猶能健。明日重來倚寺樓。

歸興

輕雷輕輓斷梅初。殘籜縱橫過筍餘。鄉語謂梅用有雷爲斷梅。又謂筍出林爲過筍。飽有期程新買犢。睡無厭足久捐書。白蘋滿渚閑揮榜。綠樹連村獨跨驢。夏日儘長歸亦暮。水邊燈火已疎疎。

又

古道迢迢人跡稀。羸驂欹帽遠村歸。正看日暮羊牛下。又見月明烏鵲飛。僧院疎鐘出林岫。漁家微火耿窗扉。閑遊要是幽人事。草露從教溼短衣。

自春來數夢至闌中蒼溪驛五月十四日又夢作兩絕句記之

騎驢夜到蒼溪驛。正是猿啼月落時。三十五年如電掣。敗牆誰護舊題詩。

又

亭臯敗葉先秋蠶。城上驚烏半夜啼。自笑遠遊心未已。年年頻夢到蒼溪。

自嘲

長日淡無事。虛堂來遠風。愛眠從病寢。厭事嬾治蠶。猫健翻憐鼠。庭荒不責童。爾來添目暗。又免送歸鴻。

又

身臥孤村日。年當大耋時。貧憂償酒券。嬾悔許僧碑。輸稅質耕犢。飯醫烹伏雌。勞生不須歎。隨事且支持。

雨霽

一雨洗炎蒸。危闌偶獨憑。涼颼生苾蔡。爽氣入巒髻。庭下宵遊燐。盤中晝掃蠅。絕勝塵土裏。馬上嚼寒冰。

大雨

萬壑風聲遠。千林雨腳長。溝盈懸霹靂。屋漏徒衣囊。未說豐年喜。先便永夜涼。清秋病小愈。起柁上瀟湘。

社飲

世上升沉一轉驢。古來成敗幾樗蒲。試看大醉稱賢相。始信常醒是鄙夫。淵明詩云。一士常獨醉。一夫終年醒。起舞非無垂白伴。暮歸仍有髡髦扶。即今不乏丹青手。誰畫三山社飲圖。

采藥有感

藜藿記霜露。蟋蟀謹歲月。古人于物理。瑣細不敢忽。我少讀蒼雅。衰眊今白髮。中間嬰疾。過日常卒卒。潤毛春可求。山藥秋可掘。雖云力探討。疑義未免闕。屏居朋友散。奧妙誰敢發。窮理已矣夫。置醜當自罰。

觀邸報感懷

六聖涵濡壽域民。老年肝膽尚輪囷。難求壯士白羽箭。且岸先生烏角巾。幽谷主盟猿鶴社。扁舟自適水雲身。卻看長劍空三歎。上蔡臨淮奏捷頻。

送子適至梅市而歸

梅市長隄愴別情。魯墟歸路當關行。日沉菱浦看魚躍。煙合菰叢聞獺鳴。蘸水門扉初半掩。擁橋炬火已先迎。停橈不奈清愁得。獨倚闌干待月明。

述悶

披衣按塵罷。據榻欠伸餘。香爇翻心字。茶凝出草書。客稀門每閉。意悶髮重梳。賴有盆山樹。幽情得少摠。

幽居

謝病言歸一鹿車。短籬數掩護幽居。樹枝南畔有飛鵲。蓮葉東邊多戲魚。倦枕續成驚斷夢。斜風吹落讀殘書。興來偶曳枯筇出。父老逢迎卻未疎。

午暑

笛材織簟涼如水。霧縠縫幮薄若空。更著高安竹根枕。不妨專享北窗風。

舟過道士莊

江籬芳杜滿沙汀。道士莊前酒半醒。上下風煙還竟日。往來魚鳥各忘形。歸人薄晚常爭渡。病葉先秋亦自零。興欲盡時猶小住。北村漁火看青燈。

晨興

晨興未櫛盥。扶杖並檐立。斷雲方東行。庭草露猶溼。朝飢神益爽。清虛自來入。可憐數雞雛。隨母啄遺粒。蝶殘虬蟬喜。鼠腐鴟鴞彙。吾當一洗之。漱泉開玉笈。

對酒

斷簡殘編不策勦。東臯猶得肆微勤。榮枯一枕春來夢。聚散千山雨後雲。煙水幸堪供眼界。世緣何得累心君。牀頭小甕今朝熟。撥置閑愁且一欣。

泛舟

水長芳洲沒。風生釣艇橫。偶尋東埭去。卻作北村行。宿鳥昏方定。流螢雨更明。歸來未覺晚。傳漏下重城。

地僻

地僻臨湍瀨。門幽長綠苔。客書疑誤達。僧刺媿虛來。清露蘋花坼。斜陽燕子回。自憐猶有恨。佳日對空盃。

東軒

終日在東廂。閑消百刻香。一枰分黑白。雙硯列朱黃。荷氣侵簾馥。桐陰覆井涼。前知今夕夢。孤榜上瀟湘。

季夏雜興

蟻鬪知將雨。蟲鳴覺近秋。衰翁非愛酒。無計奈孤愁。

又

巉巉瘦驢嶺。莽莽老牛陂。嶺在施黔間。陂在汝州。四海均羈旅。何人感此詩。

又

熟睡一炊頃。清談數刻間。未言能近道。要得暫身閑。

又

疏泉澆藥壠。枕石聽松風。此樂慚專享。無因與客同。

夏夜暑毒不少解。起坐庭中。

窗間有螢過。枕上見星流。欲睡不堪熱。長歌起飯牛。

又

風從高樹下。蟲抱短莎鳴。小據胡牀坐。還扶拄杖行。

素飯

放翁年來不肉食。盤箸未免猶豪華。松桂輒炊玉粒飯。醃醬自調銀色茄。時招林下二三子。氣壓城中千百家。緩步橫摩五經笥。風爐更試茶山茶。會樂道近餽茶山茶。

老態自遣

似見不見目愈衰。欲墮不墮齒更危。誰令汝年八九十。常欲強健寧非癡。目昏大字亦可讀。齒搖猶能決滯肉。若知用短百無憂。此理正如夔一足。矇矓艱脆俱有味。笑侮莫聽傍人喙。但令孫曾能力耕。一飽不妨還美睡。

耒陽令曾君寄禾譜農器譜二書求詩

歐陽公譜西都花。蔡公亦記北苑茶。農功最大置不錄。如棄六藝崇百家。曾侯奮筆譜多稼。儋州讀罷深咨嗟。一篇秧馬傳海內。農器名數方萌芽。令君繼之筆何健。古今一一辨等差。我今八十歸抱耒。兩編入手喜莫涯。神農

之學未可廢坐使末俗漸淨華

兩夜

羸軀對影愴餘齡。追念平時只自驚。夏木正濃桐葉墜。秋風未起草蟲鳴。蠶魚似是三生業。汗馬難希百世名。時
王師方出塞。小雨迎涼何所作。北窗還對短燈檠。

柴門

寂莫柴門不徹扃。槐花細細糝空庭。晚梅摘得鹽供飮。濁酒沽來草塞瓶。病已廢耕拋襪襪。閑猶持釣愛笭箠。經
旬莫恨無來客。交舊疎如欲日星。

賽神

落日林間簫鼓聲。村村倒社祝西成。扶翁兒大兩髦髡。溉水渠成千耦耕。家受一廛修本業。鄉推三老主齊盟。日
聞淮潁歸王化。要使新民識太平。

菖蒲

古礪生菖蒲。根瘦節蹙密。仙人教我服。刀匕蠲百疾。陽狂華陰市。顏朱髮如漆。歲久功當成。壽與天地畢。

又

菖蒲古上藥。結根已千年。聞之安期生。采服可以仙。斯人非世人。兩耳長垂肩。松下語未終。竦身上青天。

迂拙

迂拙宜歸早。乘除得死遲。老稀朝市夢。窮足道途詩。譁世無它技。忘懷自一奇。故溪幽絕處。惟許白鷗知。

夏夜

六尺筇枝膝上橫。中庭岸幘聽鷓更。露零金掌漢宮曉。月度銀河秦塞明。菡萏晚花香未減。梧桐病葉墮無聲。關
河又見新秋近。屈指流年一歎驚。

夏末野興

半世天涯倦遠遊。還鄉不減旅人愁。數聲相應鳩呼雨。一片初飛葉報秋。山塢風煙僧院路。河梁燈火酒家樓。絕

知雪鬢宜衰笠。分付貂蟬與黑頭。

又

漠漠川雲闔復開。天公試手挽秋回。參差小市林邊出。縹緲疎鐘雨外來。土塼飯香供晚餉。布帘字大賣新醅。歸舟自逐輕鷗去。不用城笳抵死催。

示子孫

茆屋惟須補漏穿。家人衣食亦隨緣。豈容一事相關白。已過傳家十二年。

夜雨

藩籬處處蔓牽牛。蕙苾叢深稗穗抽。只道物生常茂遂。一宵風雨又成秋。

劇暑

六月暑方劇。喘汗不支持。逃之顧無術。惟望樹影移。或謂當讀書。或勸把酒卮。或誇作字好。蕭然卻炎曦。或欲溪上釣。或思竹間碁。亦有出下策。買簟傾家貲。赤脚踏增冰。此計又絕癡。我獨謂不然。願子少置思。方今詔書下。淮汴方出師。黃旗立轅門。羽檄晝夜馳。大將先擐甲。三軍隨指揮。行伍未盡食。大將不言飢。渴不先飲水。驟不先告疲。吾儕獨安居。茂林蔭茅茨。脫巾濯寒泉。臥起從其私。于此尙畏熱。鬼神其可欺。坐客皆謂然。索紙遂成詩。便覺窗几間。颯颯清風吹。

六月十夜風月佳甚起坐中庭有作

曼膚汗雨不勝揮。夜景泠然暫解圍。漱罷寒泉甘齒頰。夢回斜月入窗扉。荷翻小浦孤螢度。露溼危巢倦鶴歸。我亦馭風思遠適。岳陽樓上酌湘妃。

古井

道傍有古井。久廢無與汲。鄰里共浚之。寒泉稍來集。駕言欲漱濯。冀遠塵土襲。躊躇復棄去。綆短安能及。

菴中紀事用前輩韻

掃灑一卷躬瑣細。蓬戶朝昏手開閉。荒山斲藥須長鑿。小竈煎茶便短袂。空中咄咄安用書。身外悠悠固難計。山

僧野叟到即留。麥飯葵羹貴能繼。久貧奴婢多散去。豈有跣足并椎髻。負薪長歌過此生。直疑身在鳩荒世。

急雨

觸熱支離老病增。忽看東北片雲興。疾雷載雨輪膏澤。茂樹生風洗鬱蒸。采藥喜逢畷下客。說詩曾對剡中僧。坐令身在羲皇上。繞坐何煩更設冰。

舍東追涼

驕陽收火傘。清露貯冰壺。海湧四更月。風生千頃蒲。歌狂忘老境。意豁失窮途。所恨朋儕盡。無人爲攬鬚。

酒藥

愁憑酒破除。病藉藥枝梧。焦革死已久。宋清今亦無。幽情寄魚鳥。小艇雜菰蒲。海上秋風早。懸知肺渴蘇。

六月十七日大暑殆不可過然去伏盡秋初皆不過數日作此自遣

赫日炎威豈易摧。火雲壓屋正崔嵬。嗜眠但喜斲州箴。畏酒不禁河朔盃。人望息肩亭午過。天方悔禍素秋來。細思殘暑能多少。夜夜常占斗柄回。

急雨遽涼

急雨消殘暑。曠然天地秋。露螢矜熠熠。風葉送颼颼。涼簟惟添睡。明河不洗愁。流年又如此。隨處怯登樓。

縱遊深山隨所遇記之

行穿犖确度谿笱。路跨清溪一木斜。歷盡艱危到平地。壞垣欹屋兩三家。

又

山徑欹危細棧通。孤村小店夕陽紅。竹郎有廟臨江際。木客無家住箬中。

又

道逢山客束荆薪。口眼睢盱略似人。試問村名瞠不語。剗然長嘯上嶙峋。

又

古寺蕭蕭不見僧。飛甍滿屋老臬鳴。空房終夜無燈火。斷木支門睡到明。

感中原舊事戲作

蜂兒圍裏香塵細。燕子樓中寶瑟斜。惟有天知太平事。乞傾東海洗胡沙。

小涼

麻糲一夏困沉綿。不在林間卽水邊。高臥已忘浮世事。小涼漸近早秋天。桔槔輒輒鳴幽圃。游艇遙遙入暮煙。餘日無多那諱得。逢人自笑說明年。

村居

人笑無才自笑狂。槿籬竹塢得深藏。自從病後辜風月。未免愁中讀老莊。行圃數畦秋菜長。泛溪十里晚荷香。叢書坐嬾無由續。且補忠州手錄方。

城東

出郭溶溶細縠波。平生此地幾經過。祭餘野廟啼烏樂。酒賤村壚醉叟多。亭午疎鐘離石佛。斂疎微雨泊曹娥。采蓮艇子愁衣溼。不爲人家惜綠荷。

初秋露坐作短歌

房星縱。心星橫。斗牛闌干河漢明。青天露坐性所樂。不覺庭樹秋風生。秋風搖落君勿悲。明年花開還滿枝。人生哀謝則已矣。寧復鬢髮童顏時。

池上

旋移吟榻並池橫。欲出柴門復懶行。樹罅忽明知月上。竹梢微動覺風生。貧無醉日惟堅忍。疾遇涼秋亦漸平。二尺燈檠元好在。便思相伴聽蛩聲。

秋稼漸登識喜

門外新場滑似油。早禾已慶十分收。虹霓不隔郊原雨。蠶吐爭催巷陌秋。人樂風傳迎社鼓。路長水濺采蓮舟。老翁自笑無它事。欲隱牆東學儉牛。

野渡用前韻

十里平沙到渡頭。溪山合向畫圖收。老僧赴供袈裟古。醉叟行歌櫂檣秋。斷岸煙迷耕處草。孤村雨送釣時舟。龍泉不闢元無恨。莫放神光上斗牛。

秋後一日風雨

炎歊數日劇。蕩滌及秋初。病葉風吹盡。鳴蟬雨打疎。趁涼謀社酒。乘潤理園蔬。分喜寧無處。蒲中鱖鱖魚。

感事

曾事高皇接雋遊。君恩天地若爲酬。濟時已負終身媿。謀己常從一笑休。在昔風塵馳廐置。卽今煙雨暗耕疇。孤愁欲豁寧無地。野店逢僧每小留。

久無客至戲作

溛影支離雪鬢繁。頻年老病臥孤村。雍容那有客聯騎。剝啄尙無僧叩門。濁酒香浮新社瓮。晚瓜味敵故侯園。茅檐蓬戶風煙晚。小酌欣然對子孫。

乍涼

涼風蘇病骨。搖落起詩情。一病輒數日。幾時終此生。招呼丹竈客。結束玉霄行。預想溪橋路。三更待月明。

閑趣

絕迹市朝外。結廬雲水間。心平詩淡泊。身退夢安閑。有酒旋尋伴。無門那說關。桐江故不遠。日暮趁潮還。

溪上

溪上秋來風露清。蕭然浴罷葛衣輕。看雲舒卷了窮達。見月虧盈知死生。老去關心惟藥裏。閑中消日付棋枰。故人書札頻相問。何日芒屨上赤城。

秋詞

東吳七月暑未艾。川雲忽與天雲晦。蔽空雨點弩發機。平地成渠屋穿背。早禾玉粒自天瀉。村北村南喧地碓。大牲如阜酒如江。相喚龍祠作秋賽。

又

八月暑退涼風生。家家場中打稻聲。穗多粒飽三倍熟。車軸壓折人肩頰。常年縣符鬧如雨。道上卽今無吏行。鄉閭老稚迭歌舞。竈釜日饜豬羊烹。

又

暮收功成將整駕。萬頃黃雲收晚稼。公私逋負一洗空。懷抱喜看兒姪姪。從來婚聘不出鄉。長自東家適西舍。年豐人樂我作詩。朝耕夜織誰能畫。

秋思

詩人本自易悲傷。何況身更憂患場。烏鵲成橋秋又到。梧桐滴雨夜初涼。江南江北埃雙隻。燈暗燈明更短長。安得平生會心侶。一尊相屬送年光。

老學菴北窗雜書

本慕修真謝俗塵。中年蹭蹬作詩人。卽今恨養金丹晚。且向江湖把釣緝。

又

偶住人間遂許時。殘骸自笑尙支持。直須消破黃齏盡。始是浮生結局時。

又

茅齋遙夜養心君。靜處工夫自策勩。正喜殘香伴幽獨。鴉鳴窗白又紛紛。

又

小龍團與長鷹爪。桑苧玉川俱未知。自置風爐北窗下。勒回睡思賦新詩。

又

定交魚鳥欲忘形。獨岸綸巾坐草亭。不恨囊中無赤仄。且欣案上有黃庭。

又

松棚接屋得陰多。石徑生苔奈滑何。盡道疎籬宜細雨。晴時最好晒漁蓑。

又

龜常曳尾豈非樂。鶴已鍛翎徒自傷。造物今知不負汝。北窗夜雨默焚香。

親舊見過多見賀強健戲作此篇

偶向人間脫駭機。玉池中夜自生肥。據鞍馬援雖堪笑。強飯廉頗亦未非。道貌安能希粹盎。世緣但可付猗違。它年不死君須記。會在天津看落暉。元微之贈老人詩云。天津橋上無人識。獨倚闌干看落暉。

小病兩日而愈

病骨羸然山澤臞。故應行路笑形模。記書身大似椰子。忍事癩生如瓠壺。美酒得錢猶可致。高人折簡孰能呼。不如淨掃茅齋地。臥看微香起瓦爐。

秋興

脩蔓叢筍步步迷。山村東下近魚陂。釣歸恰值秋風起。棋罷常驚日景移。病葉辭枝應有恨。候蟲吟壁故知時。殘年我亦悲搖落。薄暮空囊又有詩。

又

八十仍當過二時。加餐安寢豈前知。晨梳脫髮雖無數。社瓮新醅已有期。偶爲買花經廢圃。時因蹋藕下清池。尙餘一事終關念。安得兒孫少別離。

日用

舊好疎毛穎。新知得麴生。幽居無一事。枕臂聽松聲。

又

春穀灌園蔬。日長閑有餘。何妨忍揮汗。合藥施鄉閭。

又

貧知藜糝笑。渴愛粟漿酸。食少從奴去。人稀苦屋寬。

卷六十八

七月十一日見落葉

葉彫非一日。盛夏則已然。一葉復一葉。及此搖落天。晨起坐堂上。散若飛鳥翩。昔時可藏鴉。今欲不庇蟬。顧視庭中草。亦復非阡眠。百穀秋皆成。是謂造化權。豈爲草木計。而欲求兩全。物理貴見微。勇退差爲賢。

龜堂一隅開窗設榻爲小憩之地

柈欄簷蔔障斜陽。旋置臨階八尺牀。小展窗扉無大費。略加苫蓋有餘涼。老來愈覺歲時速。夢裏不知途路長。試問神遊向何處。月明揮榜上瀟湘。

南門晚眺

奚奴前負一胡牀。門巷楸梧已漸黃。不歷塵埃三伏熱。孰知風露九秋涼。蕭蕭浦溆漁歌晚。漠漠陂塘稻穗香。勿恨行雲吞素月。夢回正愛雨淋浪。

進德

進德工夫在日新。正如更歷自知津。迷時誤認毒爲藥。定後始知天勝人。四壁不妨身落魄。萬夫誰敵膽輪囷。遺經在匱君毋厭。燈火青熒漸可親。

次韻邗德允見贈

人間榮瘁固難窮。歲月推遷卽老翁。馬駭初非凡眼識。源深終與大川通。細思渭北希高價。終勝淮南銷發蒙。莫學三山頑鈍叟。一生空耗太倉紅。

秋懷

居在三家聚。門纔一木橫。用寬緣歲樂。斂薄爲時平。疎樹葉遲落。遠村燈更明。題詩雖草草。亦足寫幽情。

又

村晚歸牛下。林昏宿鳥喧。微升天際月。半掩水邊門。衣杵悲邊信。漁歌斷客魂。老人交舊盡。此意與誰論。

又
客思殘荷外。農功晚稻前。祭多巫得職。稅足吏無權。浦溆家家釣。村墟點點煙。歸舟葛衣薄。始覺是秋天。

又
典琴沽市釀。賣劍買吳牛。雞黍隨時具。江山到處留。隨僧日一浴。笑吏月三休。安得沅湘客。相從賦遠遊。

又
心常凝不動。形要小勞之。活火閑煎茗。殘枰靜拾棋。曬書朝日出。丸藥晝陰移。意適還休去。悠然到睡時。

又
囊得治中俸。湖山偶卜居。身嘗著禾譜。兒解讀農書。遇事絕欣厭。接人均戚疎。乾坤雖浩浩。等於一蘧廬。

又
秋暑雖猶在。晨興氣已清。蠻童掃荒徑。猿婢滌空甕。病樹有凋葉。殘蟬無壯聲。書生守故態。已復理燈檠。

又
種樹清陰滿。鈔書蠹字穿。老身猶在世。屈指不如年。棄紙儲詩稿。長筒聚藥錢。一生如一日。正可付之天。

又
望遠目猶明。登高腳更輕。每思遊赤壁。時夢上青城。燈下書如蟻。花前飲似鯨。古仙曾歷考。強半出儒生。

又
昨者風雨過。浩然天地秋。年光雙雪鬢。生計一漁舟。賣藥來查浦。聽猿到沃洲。平生畏暑毒。八月記初遊。

出遊

來往人間不計年。一枝筇竹雪垂肩。掃除身外閑名利。師友書中古聖賢。支遁山前饒石水。葛洪井畔慘風煙。小癡大黠君無笑。買斷秋光不用錢。

又

行路迢迢入谷斜。繫驢來憩野人家。山童負擔賣紅果。村女緣籬采碧花。篝火就炊朝餽飯。汲泉自煮午甌茶。閑

遊本自無程數。邂逅何妨一笑譁。

東窗獨坐書懷

秋豪外物不關心。竹塢梅村惜未深。蓬戶夜涼燈煜燼。盆山雨潤木蕭森。潔齋入靜三熏沐。宴坐降魔七縱擒。但恨圖書闕調護。不勝鼠鬮與蟲侵。

書歎

齊民困衣食。如疲馬思秣。我欲達其情。疎遠畏強聒。有司或苛取。兼并亦豪奪。正如橫江網。一舉孰能脫。政本在養民。此論豈迂闊。我今雖退休。嘗綴廷議末。明恩殊未報。敢自同衣褐。吾君不可負。願治甚飢渴。

荷鋤

五畝畦蔬地。秋來日荷鋤。何曾笑爾輩。但覺愛吾廬。膽怯沽官釀。瞳昏讀監書。區區尙多事。未解雜樵漁。

病臥

老境偏饒臥。秋天不肯晴。愁憑書解散。病仗藥支撐。果熟烏烏樂。村深雞犬聲。邊頭定何似。頗說募新兵。

秋夜獨坐闔里中鼓吹聲

收盡浮雲見素娥。青天脈脈映明河。時平里巷吹彈鬧。歲熟人家嫁娶多。高會不知清夜永。散歸想見醉顏酡。小窗燈火晶熒處。也有人廣七月歌。

老歎

老翁終日飽還嬉。常拾兒童竹馬騎。食爲齒搖艱咀嚼。冠因髮少易傾欹。烏烏歌罷人誰問。咄咄書成自不知。堪笑殘生似蒲柳。秋風未到已先衰。

草堂

南出湖塘有廢堤。草堂只在鷓鴣西。清風滿榻眠初起。落葉平溝路欲迷。新酒已知迎社熟。秋鶯猶作傍簷啼。翁相遇饒言笑。共喜年豐米價低。

齋中讀書罷有感

少年學問苦匆匆。絃誦光陰轉手空。聖域淵源雖自力。故交零落與誰同。荒村莫恨身垂老。後世元知論自公。但掩齋扉憑曲几。忘憂正在寂寥中。

雨欲作步至浦口

兩作千山暗。風來萬木號。放懷忘世事。徐步出亭臯。野處惟知遜。心期不復豪。宋清捐善藥。須買遺綈袍。寧乞陶翁食。難銷楚客糟。精心窮易老。餘力及莊騷。杖屨時行樂。鋤耰慣作勞。正令朝夕死。猶足遂吾高。

鏡湖有鳥名水鳧鳴於春夏間若曰打麥作飯偶有所感而作

人生天地中。賦予各有限。所享過所賦。鮮不貽後患。玉食害而家。此語禹所難。麥飯勿謂薄。耕時泥及盩。土墾竹爲挾。鹽酪調藜莧。吾媿人豈知。尙以陋見訕。恨亦見事遲。失腳墮名宦。千載梁伯鸞。巍然言無間。

自述

早畏危機避巧丸。長安未到意先闌。心如老馬雖知路。身似鳴蛙不屬官。閑駕柴車無遠近。旋沽村酒半甜酸。羣兒何足勞情怒。胸次從初抵海寬。

秋興

晨興秋色已淒淒。咿喔猶聞隔浦雞。說與應門謝來客。要乘微雨理蔬畦。

又

村酒甜酸市酒渾。猶勝終日對空樽。茅齋不奈秋蕭瑟。蹋雨來敲野店門。

又

困儲赤米枝梧飯。篋有青氈準擬寒。政使堆金無處用。不須常貯一錢看。

又

病起殘骸不自支。旋烹藜粥解飢羸。一編蠹簡青燈下。恰似吳僧夜講時。

又

莫笑門庭草棘荒。也能隨事答年光。半瓶野店沽醇碧。一畚鄰園餉矮黃。

白頭韭美醃。藟熟。鱖尾魚鮮斫。鱸成。卻對盤殮三太息。老年一飽費經營。

又

淹速從來但信緣。襟懷無日不超然。喚船渡口因閑立。待飯僧牀得蹔眠。

又

懲羹吹壘豈其非。亡羊補牢理所宜。白頭始訪金丹術。莫笑龜堂見事遲。

又

赫赫能令京兆死。沾沾正坐魏其愚。何如陸子山行樂。臚膊常懸酒一壺。

又

放翁老矣欲何之。采藥名山更不疑。但入剡中行百里。姓名顏狀有誰知。

又

樵客高僧兩斷蓬。偶同煙榜泛秋風。栖賢雪夜匆匆別。豈意相逢在剡中。

又

鼙鼓華鯨響寺廊。殘蕪落葉弄秋光。蹇驢繫著門前柳。閑覓題名拂敗牆。

秋夕書事

秋夕初多露。漁家半掩扉。鵲飛山月出。犬吠市船歸。影瘦悲形瘁。冠偏感髮稀。眼中無宿士。老我欲曠依。

又

寂寂青楓岸。蕭蕭白版扉。端居常懶動。偶出卻忘歸。時泰徵科簡。師還驛置稀。江村日無事。煙火自相依。

薄粥

薄粥枝梧未死身。飢腸且免轉車輪。從來不解周家意。養老常須祝顛人。

拄杖

吾嘗評拄杖。妙處在輕堅。何日提攬汝。同登入峽船。

小築

小築清溪尾。蕭森萬竹蟠。菴廬雖偃仄。庭戶亦平寬。摘果觀猿哺。開龍放鶴盤。澹然還過日。無處著悲歡。

又

小築隨高下。園池皆自然。鋤山得靈藥。斲坎遇寒泉。幽檻花房斂。深林果蒂駢。鄰翁亦好事。相伴送流年。

一編

一編垂首北窗前。皎皎寧當逐物遷。道有廢興何與我。心無媿怍始知天。昔嘗西戍八千里。今復東歸三十年。死去雖無勳業事。九原猶可見先賢。

埭北

煙村湖埭北。魚市廟墻東。急雨時時作。輕舟浦浦通。薪芻聚津口。簫鼓鬧林中。烏柏禁愁得。來朝數葉紅。

風雨

殘暑時嘗盡。清風勢自回。重雲韞日月。大雨挾風雷。老樹不自保。毀葉吁可哀。卻愁新雁到。暮境更禁催。

解嘲

心如頑石忘榮辱。身似孤雲任去留。酒瓮飯囊君勿謂。也勝滿腹貯閑愁。

識喜

本自怕沾京洛塵。固應不吐相君茵。偶逃置作鯨吞地。幸保詩狂酒病身。傲世曾歌楚人鳳。著書久絕魯郊麟。山村且試筇枝興。風月秋來正一新。

寓興

窮巷無來客。秋風獨浩歌。壯年閑處老。佳日病中過。甚欲攜長鏡。仍思擁短蓑。逢山皆可隱。不必上三峨。

老馬行

老馬虺隤依晚照。自計豈堪三品料。玉鞭金絡付夢想。瘦稗枯莖空咀嚼。中原蝗旱胡運衰。王師北伐方傳詔。一

聞戰鼓意氣生。猶能爲國平燕趙。

農家

吳農耕澤澤。吳牛耳溼溼。農功何崇崇。農事常汲汲。冬休築陂防。丁壯皆雲集。春耕人在野。農具已山立。房櫓鳴機杼。煙雨暗囊笠。尺薪仰有取。斷屨俛有拾。洪水昔滔天。得禹民乃粒。食不知所從。汝悔將何及。孩提同一初。勤惰在所習。周公遺訓。請視七月什。

對酒作

齒落不廢嚼。足跛尙能履。書生之所遭。僥倖有如此。自知窮事業。元不直杯水。徒行若車安。蔬食如肉美。或時得斗酒。亦復招鄰里。不肯歌烏烏。行矣呼起起。

秋分後頓凄冷有感

今年秋氣早。木落不待黃。蟋蟀當在宇。遽已近我牀。況我老當逝。且復小彷徨。豈無一樽酒。亦有書在傍。飲酒讀古書。慨然想黃唐。老矣狂未除。誰能藥膏肓。

卽事示子邁

四十已悲非少年。耄期何事每歡然。遊山夜雨眠僧院。沽酒秋風上釣船。諸友詩章來麈麈。小兒筆勢亦翩翩。眼邊不是常蕭索。終憶巢居訪老仙。青城上官道人。結巢古松杪。數十年。

醉中絕句

有山有水登臨地。無病無愁歡傲身。世念秋毫除未盡。麴生應恨白頭新。

又

左殮右粥年年飽。南陌東阡處處閑。幸免催租敗幽興。豈容對酒惜酡顏。

種麥

墾地播宿麥。飯牛臨野池。未能貪佛日。正恐失農時。矻矻鋤耨力。勤勤祝史辭。嘉平得三白。吾飽豈無期。

秋晚

梧桐落叶吟。蟋蟀在書堂。徂歲聿云暮。攬衣慨以慷。一生常蹭蹬。萬事略更嘗。賴有銘心語。南華論坐忘。

又
身世呻吟裏。園廬寂寞中。家貧憂酒券。才盡畏詩筒。陂水瀦猶滿。山苗穫欲空。兒孫更力作。勿媿禹遺風。

秋穫後卽事

多稼如雲接百城。村村鼓樂賽西成。頓寬公賦私逋責。一洗兒啼婦歎聲。社酒粥醲供晚酌。秋菰玉潔筆晨烹。放翁醉飽摩便腹。自炙毫甌試雪坑。

又

秋穫春耕力尙餘。雨中襍種種寒蔬。築居正可茂生草。出市何妨借蹇驢。老境朝晡數匙飯。腐儒生死一編書。敲門忽有岷山使。慚愧交情未作疎。是日得張季長書。

行飯至湖上

行飯消搖日有常。青鞋又到古祠傍。殘蕪滿路無多綠。落葉投空不待黃。只道詩書能發冢。豈知博塞亦亡羊。此身只合都無事。時向湖橋看戲場。

晨出

味爽睡饜足。起扶藜杖行。關山開曉色。草木度秋聲。市晚船初發。奴勤地已耕。道邊多野菜。小摘助晨烹。

老境

一生幸免踐危機。老境還山飽蕨薇。智士固知窮有命。達人元謂死爲歸。臨窗蜀紙謄詩草。出戶鄜條繫褐衣。堪笑街頭小兒女。問予君是伯休非。

憶昔

憶昔梁州夜枕戈。東歸如此壯心何。蹉跎已失邯鄲步。悲壯空傳勅勒歌。今日扁舟釣煙水。當時重鎧渡冰河。自憐一覺寒窗夢。尙想涪溪石可磨。

自嘲

清心不醉猩猩酒。省事那營燕燕菜。惟有著書殊未厭。暮年鐵硯亦成四。

解嘲

我生學語即耽書。萬卷縱橫眼欲枯。莫道終身作魚蠹。爾來書外有工夫。

新寒

小雨戒新寒。衡茆已怯寬。甌香炊紫角。門靜挂黃團。扶杖穿茶塢。移舟傍釣灘。欲知秋有信。霜鬢不勝繁。

夜歸

野店晡炊飯。溪橋夜據鞍。天回河絡角。海闊斗闌干。牧舍牛生犢。蔬園犬逐獾。今年時序早。九月已清寒。

夢中作

萬里行求藥。三生誓棄官。鶴巢投暮宿。松麩續朝餐。進火金丹熟。凌風玉宇寒。人間日月速。歲歷又將殘。

自勵

中年已懼小人歸。況是駸駸老及時。氣情欲歸思友助。學衰不進賴兒規。無功追媿清時祿。有命何憂晚節飢。羸

病今年能未死。潛心更下董生帷。

九月一日未明起坐

病骨清羸八十餘。空齋凄冷五更初。忽聞雲表新來雁。起讀燈前未竟書。坐久屢傳雞喔喔。夢殘猶化蝶蘧蘧。農

功漸畢身無事。約束家童種晚蔬。

小疾偶書

書生本願致時康。自怪秋來疾在牀。胸次豈無醫國策。囊中幸有活人方。但知元氣爲根本。正使長生亦糝糠。豎

子何勞一除掃。區區猶欲恃膏肓。

初寒晨起

推枕悠然起。寒燈誰與同。曉窗俄已白。宿火尙能紅。老境呻吟外。年華寂寞中。長飢亦何恨。聊復固吾窮。

霜降前四日頗寒

草木初黃落。風雲屢闕開。兒童鋤麥罷。鄰里賽神回。鷺擊喜相近。鸛鳴知雨來。盛衰君勿歎。已有復然灰。

題驛壁

輪囷古柳驛門前。糴米歸遲突未煙。隨計入都今四紀。驢寒僕瘦只依然。

閑遊

大冠長劍已焉哉。短褐禿巾歸去來。五世業儒書有種。一生任運仕無媒。麥經小雨家家下。菊著新霜處處開。自笑閑遊心未歇。青鞋躡碎白雲堆。

貧舍寫興

深山木食猶堪飽。上古巢居亦自安。麥飯草廬吾已過。故應高臥有餘歡。

又

粲粲新霜縞瓦溝。離離寒菜入盤羞。贅童擁篲掃枯葉。曠婢挑燈縫破裘。贅曠皆紀實。

秋晚雨中作

新雁南來歲又殘。蕭蕭風雨暗江干。客疎似悉爾來病。酒薄不禁如許寒。草絡籬頭花尚碧。樹當浦口葉初丹。醉來且擁黃綉睡。莫問何時后土乾。

待旦

晨光殘淡月。急點殺寒更。歷歷記孤夢。悠悠帶宿醒。攬衣推枕起。亂髮遶牀行。歎息人間事。還隨初日生。

夜意

浮雲掃盡天如水。十里疎鐘到野堂。窗紙月明人不睡。屋茅霜冷夜初長。歸休固已師沮溺。承學猶能陋漢唐。安得子孫常念此。不妨世世業耕桑。

湖村

四十來居湖上村。翩翩七見改初元。風梢解籜竹過母。露葉成陰桐有孫。渴鹿出林窺藥井。馴鷗掠水傍棋軒。老人不用誇頑健。時看孫曾浴盥盆。

連夕熟睡戲書

投幘塵機息。捐書困味長。早眠猶有日。晚起已無霜。蝶入三更枕。龜搗八尺牀。昏昏君莫笑。羞勝醉爲鄉。

小軒

礎杵聲中去日適。小軒風露一簾秋。人間走徧心如石。分付寒螿替說愁。

曉寒

悠悠殘夢伴殘更。萬木風號曉氣清。雞唱欲闌聞井汲。月痕漸淺覺窗明。突煙騰碧炊初動。衣焙堆紅火已生。小閣翻書裘褐暖。早朝霜滑媿公卿。

次韻朝陵葉院察時見寄

憶昨翩然別衆仙。秋風吹鬢感凋年。虛齋無復客滿座。敗蘖空餘詩百篇。高誼未忘林下約。清吟重結社中緣。不教落在塵埃地。萬頃煙波一釣船。

書意

巢山遠下溼。止酒謝中乾。羸得養生妙。孰能非意干。挂冠身始貴。屏藥疾方安。自笑猶多事。時時把釣竿。

九月下旬卽事

霜晚知麴熟。山寒喜酒醲。黃絲聽夜織。赤米看晨舂。儲藥扶持老。收薪準備冬。兒扶還客拜。顧影歎龍鍾。

城南

城南亭榭鎖閑坊。孤鶴歸來只自傷。塵蹟苦侵數行墨。爾來誰爲拂頽牆。

舟中記夢

石帆山下一漁翁。風雨蕭蕭臥短篷。幽夢覺時還自笑。閬州城北看蠶叢。

送周郎

我居山陰古大澤。四顧茫茫煙水白。平時轍跡所不到。玉樹郎君肯來客。衡門僅可俛首過。陋室真成容膝迫。木盤設食菜數箸。共飽知君不予賣。期年相從無夜旦。一日復有千里隔。送君津頭淚如綆。老身恨不生羽翮。江湖

道嶮非一二。觸處兢畏真良策。從今日望平安書。我欲燈前手親拆。

村舍得近報有感

莫謂山村僻。時聞詔令傳。寬民除宿負。募士戍新邊。霜重瓦欲裂。月明人少眠。殘年抱遺恨。終媿祖生鞭。

貧歎

老叟年年病。書生世世貧。盜寧窺破囊。雀亦棄空園。屋壞須撐拄。衣穿厭補紉。今朝風日美。且復過比鄰。

明日復作一首自解

霜寒衣絮薄。日暮爨煙微。冀北馬空老。遼東鶴幸歸。飄零舊交少。衰疾壯心違。每顧兒童笑。吾貧未解圍。

子虞調官行在寓齋團巷初冬遽寒甚作兩絕句寄之

歲晚江湖行路難。一樽何日共開顏。汝方僵臥齋團巷。我亦飢吟飯穎山。

又

知汝彈冠意易闌。苦貧未免覓微官。齋團巷口殘燈火。愁絕霜風十月寒。

卷六十九

初冬步至東村

八月風吹粳稻香。九月蕎熟天始霜。男耕女鋤常滿野。宿麥覆塊皆蒼蒼。豐年比屋喜迎客。花底何曾酒杯迮。家人但覓浩歌聲。不在東阡在南陌。

南門散策

結宇溪一曲。兩山左右之。橫木以爲門。斷竹作短籬。本無剝啄客。門牡固不施。甃路壞莫補。石罅生棘茨。野蔓不知名。丹竇何纒纒。村童摘不訶。吾亦愛吾兒。

又

槐楸陰最茂。秋晚惟空枝。今日晴無風。散步適其宜。右扶青溪杖。左挾斜川詩。石琢四腰鼓。可以休我疲。清言出

正始不雜世論卑。野僧何處來。成此一段奇。

思北鄰韓三翁西鄰因菴主南鄰章老秀才

韓翁生不識官府。半醉長歌老煙浦。因師老乃學長齋。白飯青蔬自炊煮。二君要是可喜人。未嘗一語欺其鄰。有過無過姑置之。後生孰能如此真。

又

鄉閭耆宿非復前。老章病死今三年。朝來出門爲太息。不見此翁催社錢。我比翁雖差識字。向來推擇嘗爲吏。事功自計無一毫。尙不如翁終日醉。

二毀

茶杯得之久。石硯日在前。一朝忽墜地。質毀不復全。附著以膠漆。入用更可憐。杯猶奉飲歡。硯不廢磨研。向使遂破碎。亦當歸之天。動心則不可。此物何足捐。

大風不能出戶

昨日欲出病見留。今日可出風復作。室虛窗白爐火暖。閉戶幸有圖書樂。一杯淡粥飽則已。下箸豈復思藜藿。山禽念我太寂寞。故作叩門聲剝啄。

晚菊

蒲柳如懦夫。望秋已凋黃。菊花如志士。過時有餘香。眷言東籬下。數株弄秋光。粲粲滋夕露。英英傲晨霜。高人寄幽情。采以泛酒觴。投分真耐久。歲晚歸枕囊。

舍南雜興

淅淅暮風生。暉暉殘月明。開門喜閑望。扶杖得徐行。霜薄樹多綠。泉流溝有聲。兒童殊可念。蠶地作棋枰。

又

莎徑依山曲。柴扉並水開。不因行藥出。卽爲覓詩來。戒婢挑蔬甲。催兒斲芋魁。隨宜也能飽。嫫母未須哀。

又

麻菽連枝熟。柴荆盡日關。臨池驚鷺起。倚柱待雲還。倦憩石腰鼓。行攜銅博山。老人無定意。所到即開顏。石工琢石作杖鼓。樓以坐。

自註

足蹇須人慣。顏衰著屨多。飯遲惟靜臥。酒至亦高歌。蝗死繁蔬甲。霜清長樂窠。經旬鄰父病。且喜復來過。

又

莫笑幽棲僻。謀生亦未疎。殘園具薄粥。半俸補殘書。均節貧無患。安恬疾可除。雖云苦寒近。隨手蓄薪樗。

風霜

天上風霜慘。人間日月遒。江湖南北雁。原野兩晴鳩。莽蒼新阡陌。凋零舊輩流。惟應赤藤杖。伴我送悠悠。

十月

紅樹平沙十月天。放翁今作水中仙。擎擎林外迎神鼓。隻隻溪頭下釣船。世事極知吾有命。俗人終與汝無緣。菊花枯盡香猶在。又付東籬一醉眠。

記夢

久住人間豈自期。斷砧殘角助淒悲。征行忽入夜來夢。意氣尙如年少時。絕塞但驚天似水。流年不記鬢成絲。此身死去詩猶在。未必無人羸見知。

幽興

池水車初滿。荆籬補已成。身閑詩簡淡。心靜夢和平。雁後寒鴉至。楓先白葉積。居然足幽興。未歎歲崢嶸。

夜聞雨聲

我似騎驢孟浩然。帽邊隨意領山川。忽聞風雨掠窗外。便覺江湖在眼前。路過郵亭知幾處。身如估客不論年。未妨牘擁寒衾臥。羸取孤吟入斷編。

訪山家

捨舟步上若耶溪。晝櫟修藤路欲迷。僧院倚山馴栗鼠。野塘漲水下芡雞。草侵古路迢迢遠。雲傍行人故故低。薄

暮但尋遺竊去。山家正在鶴巢西。

自法雲回過魯墟故居

枳籬數掩閉柴扉。臼碓聲中煙火微。雪暗杜陵無雁下。雲迷遼海有人歸。耕疇且復償初願。官路那知脫駭機。更有冬來歡喜事。芋魁豆兩不勝肥。

旅舍

寺鐘吹動四山昏。繫纜來投江上村。木落不妨生意足。水歸猶有漲痕存。爐紅手暖書差健。鼎沸湯深酒易溫。勿爲無年憂寇竊。猜猜小犬護籬門。

書几試筆

鬢毛蕭颯齒牙疎。九十侵尋八十餘。屋小苦寒猶省火。窗明新霽倍添書。解梁已報偏師入。上谷方看大盜除。藝笈著囊幸無念。蓮峯吾亦葺吾廬。偶見報西師復關中郡縣。昔予常有卜居條華意。因及之。

道室偶書

置心常在結繩前。縱未登仙亦永年。秦不及期周過曆。灼然由我不由天。

觀渡江諸人詩

中朝文有漢唐風。南渡詩人尙數公。正使詞源有深淺。病懷羈思亦相同。

村居閑甚戲作

人厭塵囂欲學仙。上天官府更紛然。不如嘯傲東籬下。且作人間過數年。

又

題詩本是閑中趣。卻爲吟哦占卻閑。我欲從今焚筆硯。興來隨分看青山。

夜投山家

暮溝上阪到山家。牧豎應門兩髻丫。詩火正紅煨芋熟。豈知新貴築堤沙。

又

夜行山步鼓鞞鞞。小市優場炬火紅。喚起少年巴蜀夢。宕渠山寺看蠶叢。

又
生草茂廬荆作扉。數家煙火自相依。大兒飼犢舍邊去。小兒捕魚溪口歸。

又
房櫳深深續火明。垣屋蕭蕭響穀聲。作官覓飽最繆算。羨爾爲農過一生。

聞西師復華州

西師驛上破番書。鄠杜真成可卜居。細肋臥沙非望及。且炊黍飯食河魚。

又

青銅三百飲旗亭。關路騎驢半醉醒。雙鷺斜飛數水綠。孤雲橫度華山青。

舟中

捩柁柯橋北。維舟草市西。月添霜氣峭。天帶斗杓低。浦凍無魚躍。林深有鶴棲。不嫌村酒惡。也復醉如泥。

得趙昌甫寄予及子適詩

去國雙蓬鬢。還山一鹿車。壯慙稽古淺。老悔養生疎。俗態慵開眼。高吟獨起予。青燈對余子。併爲問何如。

飯後登東山

飯已茶未成。褰裳步山徑。雖云筋力衰。持杖猶濟勝。天高樓塔麗。霜落溝港淨。豈惟野實丹。已覺林筍迸。井桐亦強項。葉脫枝愈勁。啼鳥久不去。將無助幽興。盤紆穿翠谷。欹仄下危磴。所嗟無客來。誰與持麈柄。

東村

今日風日和。衰病亦少平。出門無所之。攜幼東村行。吳地冬未冰。澌澌溝水聲。山卉與野蔓。結實丹漆并。雞犬亦蕭散。如有世外情。舉手叩柴扉。病叟喜出迎。從我語蟬聯。未寒疇昔盟。解囊付之藥。與爾偕長生。

石堰村

木落山不蔽。水縮洲自獻。寒日晚更明。村巷曲折見。小婦鳴機杼。童子陳筆硯。農家雖苦貧。終勝異鄉縣。君看宦

遊子。豈無墳墓戀。生死在故鄉。切勿慕乘傳。

袖手

袖手地爐傍。身閑日自長。窗明蠹簡字。簾約篆盤香。道士傳琴譜。山僧送藥方。自然塵事遠。不用濯滄浪。

幽居遣懷

大患元因有此身。正須枵腹對空囷。扶持接客寧嗟老。質貸迎醫未厭貧。碓下罕遺雞啄粒。席間不掃鼠行塵。時時笑顧兒曹說。縱有煙霄莫問津。

又

斜陽孤影歎伶仃。橫案烏藤坐草亭。閑久更知貧有味。病多那責藥無靈。農書甚欲從師授。忍字常須作座銘。更喜友生能餉酒。欣然一醉倒長瓶。東陽郭希呂餉石洞酒。

又

習氣深知要掃除。時時褊忿獨何歎。呼童不應自生火。待飯未來還讀書。世態詎堪閑處看。俗人自與我曹疎。作詩未必能傳後。要是幽懷得小據。

湖上晚歸

蓬山再別四經秋。來日翩翩去日遒。無酒可傾殊省事。有詩渾忘亦良籌。梅花遮路如撩客。樹葉飄風已滿溝。湖上榜舟歸薄暮。斜陽紅入寺家樓。

宿村舍

臞瘦童僮小作程。村翁也復解逢迎。霜林已熟橙相餽。雪窖初開芋可羹。土榻圍爐豆楷暖。荻簾當戶布機鳴。解囊自取殘編讀。何處人間無短檠。

村飲

雪前雪後梅初動。街北街南酒易賒。身健不妨隨處醉。有家未必勝無家。

又

醉插江梅老更宜。猶能卜樹揀繁枝。假令住世十小劫。應愛此花無厭時。

食野味包子戲作

珍餉貧居少。寒雲萬里寬。疊雙初中鵠。牢九已登盤。放箸摩便腹。呼童破小團。猶勝瀆西老。菜把仰園官。

醉中作

名醞羔兒坵密封。香粳玉粒出新春。披綿珍饈經旬熟。研雪雙螯洗手供。吟罷欲沉江渚月。夢回初動寺樓鐘。爐煙裊裊衣篝暖。未覺家風是老農。

感老

人生六十已爲衰。況我頽齡及耄期。對酒尙如年少日。愛書不減布衣時。遠遊每動辭家興。大藥方從出世師。但向青編觀曩事。英雄何代不兒嬉。

寺壁偶題

斷山支徑得行吟。度澗穿林不厭深。雉挾兩雌飛谷口。烏將數子下牆陰。前三喜接高人語。方寸寧容俗慮侵。少待新春好風日。不妨攜客更相尋。

贈道流

羽人邈迤飲旗亭。自說經年醉不醒。曾伴翰林遊赤壁。仍邀內史寫黃庭。古琴蛇蚶評無價。寶劍魚腸託有靈。太華何時尋此約。九霄風露宿青冥。

冬夕閑詠

柳眼梅鬚漏泄春。江南又見物華新。終年幽興遺身世。半夜孤吟愴鬼神。客有疎親俱握手。酒無賢聖總濡脣。放翁自命君無笑。家世從來是散人。

飯後自嘲

歲熟家彌困。天寒酒闕傾。僅能炊稻飯。敢望糝藜羹。一榻解腰臥。四廊摩腹行。詩人要疎瘦。此日媿膨脱。

感舊

憶昔初乘上峽船。雪灘雲岫過聯翩。忽忽不暇尋高隱。遺恨于今四十年。扇子峽有隱士。

又

雕鞍送客雙流驛。銀燭看花萬里橋。三十三年真一夢。茆簷寒雨夜蕭蕭。

村老留飲

乘興出遊眺。初不言所之。家人固難求。我亦不自知。投杖卻人扶。疾步莫能追。荒寒野廟墺。枯涸漚管池。過門爭邀留。具食不容辭。濁醪小瓮釀。香飯別甑炊。瓦盆進豚肩。石臼擣花糝。新冬不易見。醉倒理亦宜。舉手謝主人。外強中實衰。一觴可以起。它日更爲期。

醉歌

草書大叫寫成圖。博塞隨聲喝作盧。何似卽今雲海上。千鈞強弩射天吳。

又

百騎河灘獵盛秋。至今血漬短貂裘。誰知老臥江湖上。猶枕當年虎鬪髀。

力耕

力耕歲有一困米。殘俸月無三萬錢。莫怪窮空心不動。正緣愚拙氣差全。學經塵塵懸車後。秉禮拳拳易簣前。猶恨未能忘筆硯。小兒收拾又成編。子適編予詩續稿。成四十八卷。卷有百篇。

春近

開禧忽見第三春。身寄楓林野水濱。吾道幸逢天道在。物華又與歲華新。郊原處處堪行樂。道路人人可問津。剩辦青鞵并布襪。若耶已報綠生鱗。

夜坐聞鼓聲

村居樂飲鼓鞳鞳。亭障無虞歲屢豐。誰道喧呼妨熟睡。老人自愛地爐紅。

小室

地福焚香室。窗昏釀雪天。爛炊二餠飯。側枕一肱眠。身似嬰兒日。家如太古年。狸奴不執鼠。同我愛青氈。

老景

老死知無日。天公偶見寬。疾行逾百步。健啖每三餐。身瘦短裁褐。髮稀低作冠。年來更小黠。不據伏波鞍。

夜坐

地僻少行跡。屋低便老人。爐紅得清坐。酒綠慰孤斟。吠犬驚飄葉。栖禽換暗林。人間固多難。感慨不須深。

晨起

小疾蠲除盡。閑愁墜闕空。時光雞唱裏。生計碓聲中。戒婢儲猿果。看奴織鶴籠。老人新得道。處處見神通。

貧述

寒生肌粟苦衣單。瘦減頭圍覺帽寬。荒寂在家猶逆旅。窮空養老亦蔬餐。柴青竈突騰煙細。膏盡燈缸照字難。猶喜新醅三斗熟。半窗梅影助清歡。

自述

勃落爲衣隱薜蘿。掃空塵抱養天和。過期未死更強健。與世不諧猶嘯歌。野市蕭條殘葉滿。酒家零落廢壚多。石帆山下孤舟雨。借問君如此老何。

十一月廿七日夜分披衣起坐神光自兩眚出若初日室中皆明作詩志之

靈府無思踵息微。神光出眚射窗扉。大冠長劍竟何有。尺宅寸園今始歸。憂患過前皆夢事。功名自古與心違。三峯二室煙塵靜。要試霜天槲葉衣。

歲暮遣興

昔慕騷人賦遠遊。放懷蜀棧楚山秋。橘中尙可著四老。海外誰云無九州。薄酒時須澆舌本。閑愁莫遣上眉頭。幅巾短褐吾差便。實厭衣冠裏沐猴。

又

病著愁侵併不支。孤村況遇歲殘時。水軒客散成舒嘯。山寺僧來得劇棋。銅鴨香生風嫋嫋。竹雞聲斷雨絲絲。新詩煨煉功何似。問著衰翁自不知。

道室卽事

看盡吳山看蜀山。歸來不減舊朱顏。宜和遺老凋零盡。况說祥符景德間。

又

松根茯苓味絕珍。甑中枸杞香動人。勸君下筯不領略。終作邛山一窖塵。

又

徧遊海嶽卻歸秦。除卻南山萬事新。長劍高車何足道。金人十二已成塵。

又

黃金堆屋無處用。甲第連雲誰與居。莫笑先生無僕馬。風雷萬里跨鯨魚。

泛舟過金家堰贈賣薪王翁

水生浦溆多浮鴨。風急汀洲有斷鴻。渺渺江天無限景。一時分付與樵翁。

又

老人不復事農桑。點數雞豚亦未忘。洗脚上牀真一快。稚孫漸長解燒湯。

又

賣薪自可了鹽酪。治地何妨栽果蔬。我老鈍頑請平半俸。比渠只有不能如。

又

輒炊豆飯可支日。厚絮布襦聊過冬。閭巷家家歌聖澤。子孫世世業春農。

冬晴

歲暮常年雪正豪。今年暄暖減綈袍。春回山圃梅爭發。睡足茆簷日已高。倉庾家家儲舊穀。笙歌店店賣新醪。太平氣象方如許。寄語殘胡早遁逃。

寄隱士

乳竇寒猶滴。巖扉夜不扃。奇書窺鳥跡。靈藥得人形。浩浩天風積。冥冥海氣清。儻逢王內史。更爲乞黃庭。

幽事

老大常愁節物催。東皇又挽斗杓回。江天慘慘不成雪。山驛蕭蕭初見梅。隱士寄雲從地肺。遊僧問路上天台。戲書幽事無時闕。古錦詩囊暮暮開。

去新春纔旬餘霽色可愛

宦遊強半侍僊祠。況是懸車耆及時。厚薄人情窮易見。陰晴天氣病先知。綠樽一醉真當勉。白髮千莖莫自疑。野渡山村梅柳動。身閑何處不熙熙。

作雪遇大風遂晴

雪作風散之。雪止風亦定。霽日上窗扉。明暖起我病。去春財十日。共喜時序正。晨興盥頰罷。白髮滿清鏡。門前無客至。默臥弄壺柄。叢竹如有情。代我發孤詠。

冬夜

我生何多艱。塌地皆九折。君恩許歸休。幸與世俗絕。幽居鄰不覲。奚止掃車轍。地爐清夜中。危坐燈欲滅。開門月滿庭。皓皓如積雪。隔溪聞鶴鳴。靈府爲澄澈。

書意

飲酒以散愁。服藥以去病。區區賴外物。豈足語性命。清晨坐堂上。萬事一袖手。愁病初無根。孰謂藥與酒。掀髯笑嵇阮。舉袂謝和緩。氣住則神住。時至骨自換。

又

解牛悟養生。牧羊知治民。通一萬事畢。我每思古人。小園財三畝。手自藝嘉木。先當培其根。又戒無欲速。老松臥澗底。千歲陵冰霜。我豈樗櫟哉。但取無伐傷。

又

唐堯授人時。妙用均造化。我讀七月詩。周室亦其亞。彼用治四海。我斂之一身。至理之所在。大山等微塵。鍊氣以成真。豈復有它術。譬如尊大經。百氏當盡黜。

山房

擾擾人間歲月移。山房幾度換茅茨。身遊與世相忘地。詩到令人不愛時。老鶴初來未丹頂。穉松親種已虬枝。東塗西抹非無意。皴面朱鉛太不宜。

卽事

老來百事似嬰兒。笑睡甘餐只自知。陋屋略如營窟世。淳風不減結繩時。

又

鴻冥固自辭增繳。樗散猶能謝斧斤。況是溪山幽絕地。有人高臥百重雲。

又

閑行靜坐樂誰知。紅飯青蔬美有餘。常笑癡人不更事。時時愁歎欲何須。

又

有人叩戶皆吾友。得屋施牀卽我家。緩步東西行飯耳。元非看竹探梅花。

又

了事如何省事奇。無心始覺有心癡。三更急雨紙窗破。正是擁爐危坐時。

又

高人鬻路放柳枝。豪士駿馬換蛾眉。人間解事誰如我。小蹇山童自謂宜。

戍兵有新婚之明日遂行者予聞而悲之爲作絕句

送女忽忽不擇日。綵繞羊身花照席。暮婚晨別已可悲。猶勝空房未相識。俗有夫出未返而納婦。謂之空婦房。

又

夜靜孤村聞笛聲。溪頭月落欲三更。不須吹徹陽關曲。中有征人萬里情。

夢中作

野鶴翩僂啄粒微。碧桃縹緲著花稀。海山又見春風到。丹竈苔封人未歸。

啜茶示兒輩

圍坐團欒且勿譁。飯餘共舉此甌茶。麤知道義死無憾。已迫耄期生有涯。小圃花光還滿眼。高城漏鼓不停撾。閑人一一笑真當勉。小榭何妨問酒家。

雨中示鄰里

寒風吹細雨。白晝見日罕。經旬廢讀書。天豈成我嬾。比鄰各無聊。會面苦不款。未嘗燒茶鐺。而況把酒盃。高談極奇趣。散去意亦滿。凝結未易名。要是工用短。

記出遊所見

我行初無折簡招。出門十里未覺遙。憩裝蕭蕭北嶠寺。策蹇渺渺西村橋。眉頭那可遺愁到。舌本正要著酒澆。寒風朝作入裘褐。荒祠暮過奠桂椒。平郊煙斂見聚落。細路日落逢漁樵。安得丹青王右轄。爲寫此段傳生綃。

立春前七日聞有預作春盤邀客者戲作

蓼芽蔬甲簇青紅。盤筋紛紛笑語中。一餅不分空恨望。暮年知有幾春風。

春前六日作

夜枕夢回春雨聲。曉窗日出春鳥鳴。典衣沽酒莫辭醉。自有梅花爲解醒。

卷七十

立春後作

春不遺窮僻。天如念寂寥。鳥鳴知節換。池溜覺冰消。冷甃供新葺。輕裘換故貂。豐年無疾苦。鄰曲遞相招。

舟中

江天雲斷漏斜暉。靡迤羣山翠作圍。帆影似經吳赤壁。艣聲如下蜀青衣。臥聞裂水長魚出。起看凌風健鶻飛。禹會橋邊最清絕。憶曾深夜叩漁扉。

小園春思

小軒愁入丁香結。幽徑春生荳蔻梢。若論此時吟思苦。縱磨鐵硯也成凹。

又

重臺緩草初離土。百葉緗梅已滿枝。莫道山家殺風景。也能醉倒向東籬。東籬予小圃名。

禹祠

祠宇嵯峨接寶坊。扁舟又繫畫橋傍。致添滿筍蓴絲紫。蜜漬堆盤粉餌香。團扇賣時春漸晚。夾衣換後日初長。故人零落今何在。空弔頽垣墨數行。

今年開歲三日上元三夕立春人日皆大晴

今歲晴和歷歲無。江城歌舞溢通衢。天心只向人心卜。不用慇懃問紫姑。

題野人壁

身如魚鳥出池籠。常在陂湖草莽中。簫鼓相聞村社密。桑麻無際歲時豐。市墟買酒何人識。僧閣煎茶欠客同。久欲瀟湘寄清嘯。它年一棹莫匆匆。

小市

春風小市畫橋橫。橋北橋南次第行。絕景惟詩號勍敵。閑愁賴酒作長城。樓臺到處帶和柳。簾幙誰家子晉笙。薄暮歸來漁火鬧。放翁自笑欲忘情。

柳

春來無處不春風。偏在湖橋柳色中。看得淺黃成嫩綠。始知造物有全功。

見事

流光莫恨去聯翩。見事還疑勝昔年。細改新詩須枕上。少留劇飲待花前。陰陰竹塢安茶竈。淺淺蘋汀著釣船。物外家風吾豈敢。散人名號亦充真。

夜雨

江邊依舊釣舟橫。萬事何曾有一成。空憶廬山風雨夜。自吹小竈煮蔓菁。

自詠

一廬東近會稽城。鑿破煙蕪侶侶耕。上藥養神非近效。善言銘座要躬行。論書尙欲心先正。學道寧容氣不平。天付吾儕元自足。滿園春薺又堪烹。

初春幽居

滿榼芳醪手自攜。陂湖南北埭東西。茂林處處見松鼠。幽圃時時聞竹雞。零落斷雲斜日。霏微過雨未成泥。老民不預人間事。但喜農疇漸可犁。

又

小築園林淺鑿池。身閑隨事得遊嬉。幽花折得露猶溼。嘉木移來根不知。小蝶弄晴飛不去。珍禽喜靜語多時。風光未忍輕拋擲。聊付詩囊與酒卮。

自勉

學詩當學陶。學書當學顏。正復不能到。趣鄉已可觀。養氣要使完。處身要使端。勿謂在屋漏。人見汝肺肝。節義實大閑。忠孝後代看。汝雖老將死。更勉未死間。

春遊

梅市移舟過古城。此行亦未闕逢迎。負薪野老無妻子。施藥山人隱姓名。風雨偏宜宿茅店。鹽醃不遣到藜羹。宣和版籍今誰在。似是天教樂太平。

寶坐

早春風雨暗江干。羔酒狐裘不敵寒。輪與蒲龕深袖手。一爐真火養金丹。

正月十六日送子虞至梅市歸舟示子適

策府還山白盡頭。一廬隨分葺菟裘。看燈雖幸新春健。無食猶懷卒歲憂。稚子與翁俱襪襪。大兒出塞習兜鍪。它時別作謀生計。賣藥惟當學伯休。

聞百舌

春鳥雖儻言。春盡能齟舌。秋蚓與寒蟄。亦各知時節。微物顧能此。人乃獨不然。君看甘陵黨。作孽非由天。

畜一雞。報曉聲清圓。而鳴每晚戲書絕句

雞鳴平旦未爲遲。恰是山房睡覺時。著屐起尋溪上路。野梅猶有未殘枝。

書村落間事

東巷南巷新月明。南村北村戲鼓聲。家家輸賦及時足。耕有讓畔桑無爭。一村婚聘皆鄰里。婦姑孝慈均母子。兒從城中懷肉歸。婦滌鑊釜供刀匕。再拜進酒壽老人。慈顏一笑溫如春。太平無象今有象。窮虜何地生煙塵。

行歌

孤村小市負耕歌。造物其如此老何。靈藥已能驅疾豎。醇醪不用戰悲魔。

開歲頗思江湖遊適

健筆當年賦遠遊。卽今局促但堪羞。雖爲月下孤舟客。未醉天涯七澤秋。丹熟竟當金換骨。客來從笑雪蒙頭。龍泉本約同歸隱。肯爲春耕欲換牛。

憶昨

入蜀還吳迹已陳。蘭亭道上又逢春。諸君試取吾詩看。何異前身與後身。

又

當年落魄錦江邊。物外常多宿世緣。先主廟中逢市隱。丈人觀裏識巢僊。靈道人賣藥成都市中。巢僊謂上官先生。

又

萬里曾爲汗漫遊。豈知白首弄漁舟。會騎一鶴凌風去。何處人間無酒樓。

排悶

抱末返東臯。初非憚作勞。飢寒瘼未免。老病適相遭。開卷無如嬾。飛觥豈復豪。不辭窮到死。猶足竊名高。

識喜

齒搖徐自定。髮脫卻重生。意適簪花舞。身輕捨杖行。僧招決棋戰。客讓主詩盟。尚欲瀟湘去。煙帆不計程。

枕上作

謝事還家一老農。悠然高臥聽晨春。雖無客共樽中酒。何至僧鳴飯後鐘。采若未能浮楚澤。思鱸猶欲釣吳松。自餘萬事慵開眼。知結宗門案幾重。

近村

去去柴車十里中。竹林密處路纒通。漸聞水磴知村近。遙望禾田喜歲豐。漁艇往來春浪碧。人家高下夕陽紅。百錢又向旗亭醉。自笑吾生亦未窮。

讀史

人間著脚盡危機。睡覺方知夢境非。莫怪富春江上客。一生不厭釣魚磯。

又

榮悴紛紛醉夢中。轉頭何事不成空。全家采藥鹿門去。我憶襄陽龐德公。

羸臥

羸臥將如老景何。小園風月且婆娑。茶因春困論交密。酒爲家貧作態多。馬上元無聽雞句。原頭那有飯牛歌。自憊遠屏猶多事。賣藥歸來買釣蓑。

春感

老厭紛紛嬾入城。長亭小市近清明。隴頭下漏初芸草。陌上吹簫正賣錫。多病更知生是贅。九原那恨死無名。但餘一事猶關念。萬里唐安鬪寄聲。張季長久不通書。或傳其臥病。甚耿耿也。

八十三吟

石帆山下白頭人。八十三回見草春。自愛安閑忘寂寞。天將強健報清貧。枯桐已爨寧求識。弊帚當捐卻自珍。桑苧家風君勿笑。它年猶得作茶神。

小園花盛開

厭住愁城徒醉鄉。春風也肯到山房。鴨頭綠漲池平岸。猩血紅深杏出牆。淡薄相遭心已嬾。修行無力夢猶狂。更嗟著句多塵思。慙愧溪藤似截肪。

出遊歸臥得雜詩

江天缺月西南落。村路寒雞一再鳴。自笑此身羈旅慣。野橋孤店每關情。

又

江村何處小茅茨。紅杏青蒲雨過時。半幅生綃大年畫。一聯新句少游詩。

又

眼明未了觀山債。力在猶能涉水行。莫笑軒然誇老健。身存終勝得浮名。

又

壯歲經春在醉鄉。老來數酌不禁當。正須獨倚蒲團坐。領略明窗半篆香。

又

兒扶行飯出柴扉。偃僂方嗟氣力微。道側偶逢耘麥叟。倚鋤閑話兩忘歸。

又

久讀仙經學養形。未容便應少微星。一枝新鍛金雅髻。更向名山斲茯苓。

又

薺花如雪滿中庭。乍出芭蕉一寸青。老子掩關常謝客。短蓑鋤菜伴園丁。

又

晚交數子多才傑。誰肯頻來寂寞鄉。但寄好詩三四幅。絕勝共笑億千場。

感舊

自蜀還吳會。先憑劍換牛。掃除狂習氣。謝絕醉朋俦。去死時猶遠。餘生已覺浮。即今真儻矣。閉戶尙何求。

寄冀立道

龔子英中第一流。老農何幸接英遊。難逢正似玉梓白。易散便成風馬牛。清夜話端思滾滾。暮年心事恐悠悠。何由喚得闔門權。一醉千巖高壑秋。

寓歎

五福惟無富。嗟予得已多。禪房時託宿。酒市每酣歌。詩瘦慵看鏡。棋盛恐爛柯。殘年猶有幾。切莫負漁蓑。

春晚

客夢初回夜漏殘。東村想見杏花繁。未能便逐啼鴉起。自掩屏風護曉寒。

又

湖上春寒雁已歸。宿醒殘夢兩依依。也知晨起元無事。窗白爐紅且攬衣。

幽事

跌宕人間歲月遷。賞心幽事故依然。潮通支浦漁舟活。露溼繁花醉帽偏。才盡賦詩愁壓倒。氣衰對弈怯饒先。光陰風月空如昨。悵望蘭亭祓禊年。

又

塵抱年來盡掃空。柴門幽事與誰同。水生初漲一溪綠。花落已浮千點紅。愁賴囊泉存舊法。予家釀用岐下臺泉。麴法。因憑顧渚策新功。故人岷下無消息。尺素憑誰寄斷鴻。謂張季長。

讀李杜詩

濯錦滄浪客。青蓮澹蕩人。才名塞天地。身世老風塵。士固難推挽。人誰不賤貧。明窗數編在。長與物華新。

煙波即事

短髮垂肩不裹巾。世人誰識此翁真。阻風江浦詩成束。賣藥山城醉過春。

又

煙波深處臥孤篷。宿酒醒時聞斷鴻。最是平生會心事。蘆花千頃月明中。

又

家浮野艇無常處。身是閑人不屬官。但有濁醪吾事足。浮名不作一錢看。

又

落雁沙邊艇子斜。分明清夢上三巴。眼明一點炊煙起。不是漁家卽酒家。

又

雕胡炊飯芰荷衣。水退浮萍尙半扉。莫爲風波羨平地。人間處處是危機。

又

夢筆橋邊聽午鐘。無窮煙水似吳松。前年送客曾來此。惟有山僧認得儂。

又

浪迹人間數十年。紹興間自剡中入天台。始有放浪山水之興。年年散髮醉江天。岳陽樓上留三日。聊與瀟湘結後緣。

又

煙水蒼茫絕四鄰。幽棲無地著纖塵。蕭條雞犬楓林下。似是無懷太古民。

又

歸老何須乞鏡湖。秋來日日飽葦鱸。正令霖雨稱賢佐。未及煙波號釣徒。

又

父子團樂到死時。漁家可樂更何疑。高文大策人皆有。且聽煙波十絕詩。

茅舍

茅舍晨雞復暝鴉。暮年別自是生涯。貪眠久已遺人事。對酒猶能惜物華。出有兒孫持几杖。歸從鄰曲話桑麻。日長亦莫憎春困。小竈何妨自煮茶。

子適入城三宿而歸獨坐悽然示以此篇

吾兒早自立。所懼非飢寒。我歸自仙蓬。再疏請挂冠。明恩華其行。汝亟忝一官。得祿寧甚逶。懼違菽水歡。我年且

九十亦覺去汝難。生死要相守。豈憚聯征鞍。但恐老益衰。千里愁關山。官期猶累歲。言之已辛酸。村醪瀉盎盎。山果亦滿盤。春風吹桃李。一笑且團樂。

暮春新路至湖上示元敏

時雨作未成。蒸燠思出門。湖塘直東西。行人各歸村。翻翻鳥投林。杳杳鐘鳴昏。半牛爭迳路。煙火出短垣。吾兒望未到。誰與共盤飧。幽獨多惻愴。且復攜斯孫。歸來蓬窗下。聊可與晤言。

閔雨

臘雪不濡土。春風吹早塵。東吳貴粳稻。布種當及晨。千里方囂囂。坐視膏澤屯。民孽實自作。所賴天公仁。何時見秋穫。如山築高囷。

春和初遷坐堂中

九月天始霜。澤中多烈風。東廂尋丈地。聊以安我躬。薪炭南山來。地爐晨暮紅。二月春始和。如蟲思舊蟄。草堂雖褊小。門戶隨事葺。闢窗對小山。峯嶂爭業茂。筆硯陳橫几。圖書羅矮牀。頤頤燕雀聲。左右蘭茝芳。有時苦頑痺。杖藜寄相羊。折花與弄水。自適亦何常。

春晴暄甚花開略無餘矣賦以寓感

常年看花時。輒苦風雨厄。今年獨異此。遊人滿阡陌。翩翩出聯騎。往往醉墮幘。轉盼桃杏空。遂見辛夷坼。海棠尤可念。不耐暖日炙。胭脂成白雪。其意亦自惜。曾未淹旬時。春事欲掃迹。安得愛花心。堅頑如鐵石。

春晚

南陌東阡自在身。黃塵不污接羅巾。無方可染星星鬢。有酒能留盎盎春。下歧已涿蓴菜美。啣泥又見燕巢新。作公何益辛毗事。且是人間九十人。

春陰溪上小軒作

午醉初醒倚釣軒。悠然無與共清言。風微僅足吹花片。雨細纔能見水痕。杳杳暝鐘浮遠浦。離離煙樹識孤村。故人萬里岷山下。安得書來慰斷魂。比遺書問張季長消息於都下。未報。

散策至湖上民家

曳杖翩然入莽蒼。人間有此白雲鄉。風傳高樹珍禽語。露溼幽叢藥草香。農事正看春水白。客途漸愛午陰涼。餘年且就無羈束。社鼓萼萼樂未央。

枕上聞雨聲

小雨濂纖不濡土。忽聞簷溜喜無窮。斷知不作西山餓。多稼如雲在眼中。

聞里中有鬪者作此示之

老翁無所長。惟是更事多。生世與人處。烏可傷至和。秋毫不能忍。平地尋干戈。唾面聽自乾。彼忿自消磨。鄉鄰皆世舊。何至誓弗過。勗哉養子壽。它年住雞窠。

春寒

漁艇水流去。柴門風自開。餘寒爲醉地。多病作慵媒。莎草鋤還出。鷗羣去復來。流年殊袞袞。殘鬢不禁催。

石帆山下

久矣移家住鹿門。偶然信腳到桃源。尙嫌名挂東林社。那問塵生北海樽。才盡極知詩草草。睡多常覺氣昏昏。舊聞福地多靈藥。安得高人與細論。

餘寒

漠漠餘寒透客衣。江村倍覺失春期。顏頰燕比常年晚。開落花爭數日遲。

自九里平水至雲門陶山歷龍瑞禹祠而歸凡四日

桐帽絕裘擁半酣。肩輿咿軋轉城南。牛過野水將新犢。女采柔桑起稚蠶。遺老年光重九十。故鄉春事及重三。種花築室知難辦。借地猶能結草菴。

又

細雨如絲映晚暉。店家小憩換征衣。春農耕罷負犁去。村社祭餘懷肉歸。黃犢自依殘照臥。白鷗爭傍小灘飛。道邊舊識凋零盡。誰記遼天老令威。

又
老子無心老尙狂。山程隨處寄優偃。雲歸岫穴初收雨。水入陂塘正下秧。野客就林煨燕筍。蠶家負籠采雞桑。遠遊萬里知何樂。卻喜東歸住故鄉。

又
老子山行肯遽回。直穿犖确上崔嵬。未誇腳力如平昔。且喜眉頭得暫開。廟後故梁龍化去。山前遺箭鶴銜來。囊錢已盡君無笑。草草猶能把一杯。

又
我來恰值暮春初。晝漏微長小雨餘。苔蝕秦碑亡舊刻。龍歸禹穴護遺書。燕巢已壘泥猶溼。花片雖殘葉尙疎。到處不妨俱可樂。詩人爲底愛吾廬。

又
興似雞栖寄兩竿。山程三月尙春寒。麥苗吐穗初成實。梅子生仁已帶酸。買飯猶勝乞播客。看耕僭學勸農官。還家莫道虛懷袖。筍蕨隨宜亦滿槃。

又
點點桃花糝綠苔。入門倚杖意悠悠。數聲茶飯齋初散。一片溪雲雨欲交。老宿龍鍾嗟獨在。高松磊砢憶新栽。世間萬事俱難料。未死重遊更幾回。

又
我行隨處叩巖扉。覓得生薪旋燎衣。道士已驂鸞鶴去。山僧初自水雲歸。瓮頭酒壓松肪熟。盤裏蔬供藥汞肥。老覺論心須世外。溪陰回首尙依依。龍瑞獨道士。二月中逝去。餘巖澤菴主自天童歸。亦二月也。

春早得雨

又
春早得甘澍。村鄰喜欲狂。天公終老手。處處出新秧。

稻陂方渴雨。蠶箔卻憂寒。更有難知處。朱門惜牡丹。

春晚

窗戶迎新燕。階除集乳鷗。欲知春已暮。地上亦無花。

又

思與春爲別。怱怱置一樽。明年尙強健。扶杖候柴門。

春晚南堂晨起

秋風樹瘦勁。春露葉扶疎。夙興立堂上。短髮未暇梳。高謝世俗撻。遊於物之初。青黃災斷木。三四調羣狙。長生豈有巧。要令方寸虛。今年幸差健。小雨聊荷鋤。

又

春陽染柳條。春風落花片。化工本無心。誰與催漏箭。俯仰財幾時。梁間有雛燕。人亦隨物遷。蒼然鏡中面。要當心鐵石。先登酣百戰。我豈兒女哉。秋風感團扇。

見鶉補巢戲作

臥看銜枝鶉補巢。方知此老癩堪嘲。山村四十餘年住。未省曾添一把茅。

予素不工書。故硯筆墨皆取具而已。作詩自嘲。

我昔生兵間。淮洛靡安宅。統毫入小學。童丕聚十百。先生依靈肘。教以兔園冊。僅能記姓名。筆硯固不擇。竈煤磨斷瓦。荻管隨手畫。稍長遊名場。纍若分菽麥。偶窺文房譜。雖慕無由獲。筆惟可把握。墨取黑非白。硯得石即已。殆可供擣帛。從渠膏梁子。竊視笑啞啞。

春晚即事

桑麻夾道蔽行人。桃李隨風旋作塵。煜煜紅燈迎婦擔。萋萋畫鼓祭蠶神。

又

小時抵死願春留。老大逢春去即休。今歲禹祠纔一到。安能分日作遨遊。分日作遨遊。王麀詰詩也。

又
漁村樵市過殘春。八十二年老病身。殘虜遊魂苗渴雨。杜門憂國復憂民。

又
龍骨車鳴水入塘。兩來猶可望豐穰。老農愛犢行泥緩。幼婦憂蠶采葉忙。

懷昔

高皇市網收鳳麟。我得定交猶數人。陳山清真王逸少。李石風流賀季真。

書感

一是端能服萬人。施行自足掃胡塵。南州不可無高士。東國何妨有逐臣。

夜中獨步庭下

山月明如畫。江風冷似秋。衰遲亦可歎。幽獨自成愁。斗柄垂江渚。笳聲下戍樓。我惟詩思在。從此亦宜休。

卷七十一

憶昔

憶昔紹興中。束帶陪衆彥。沐浴雨露私。草木盡葱蒨。一朝窮達異。相遇忘慶唁。遠官楚蜀間。寂寞返鄉縣。於時同舍郎。貴者至鼎鉉。數奇益自屏。短褐失貧賤。俯仰五十載。未媿金百鍊。忍飢菰蘆間。生理僅如綫。窮交誰耐久。晨暮一破硯。歡歌楓林下。萬事付露電。惟有孤舟興。所至多勝踐。衡茅無定止。何處非郵傳。炊煙起沙際。跳魚裂波面。嘔啞緯車鳴。隱騎漁火見。簫鼓樂水神。鐘梵鬧竹院。我詩雖日衰。得句尙悲健。巍巍闕里門。未嘗棄狂狷。放浪終餘年。造物不汝諱。

雜詠

仕困風波歸可樂。生如疣贅死何悲。極知此手終無巧。那得隨人儘作癡。

又

鏡中顏狀年年改。海內交朋日日疎。一慟寢門生意盡。從今無復季長書。近聞燕臺長物故。

又

女郎花樹新稜種。官長梅園亦探租。作盡人間兒戲事。誰知空橐一錢無。鄉人謂揚梅止日梅官。長其高品也。

又

一日日窮窮不醒。一年年老老如期。黃河卻有逢清日。白髮應無返黑時。

又

世間萬事本悠悠。自古詩人易白頭。莫羨老夫垂九十。一年添得一年愁。

又

夸士騎牛著鐵冠。往來城市擁途觀。爭如老子無奇怪。惟是蓑衣伴釣竿。

又

家園菜肥忘肉食。村場酒美勝官壺。終年醉飽無憂責。莫怪愚公老不枯。

又

官途所至尙偷閑。何況湖邊晝掩關。未愛好風吹醉袖。且貪微雨養盆山。

又

斜風吹雨晚空濛。獨立溪邊兩鬢蓬。便過此生何所恨。百年強半水雲中。

又

病起清臞不自持。紗巾一幅倚筇枝。水沉香冷紅蕉晚。恰似道山羣玉時。

曉思

暮年多感愴。孤夢久不成。殘燈暗無焰。宿雨滴有聲。食少夜常飢。展轉空腸鳴。老雞雖三號。山窗終未明。默誦舊
記書。更覺負平生。披衣搔短髮。壯志浩縱橫。

幽居

策府還家又五年。心常無事氣常全。平生本不營三窟。此日何須直一錢。雨霽桑麻皆沃若。地偏雞犬亦翛然。閉門便造桃源境。不必秦人始是仙。

又

橫草無功負主恩。一生強半臥衡門。蠹書身世元無憾。伏櫪光陰不更論。春雨負薪蘭渚市。秋風采藥石帆村。更思旋轡場中麥。暖熱塵埃老瓦盆。

幽居卽事

采藥鹿門山。釣魚富春渚。君看此氣象。何止輩伊呂。直令終不偶。後人會知汝。亦不妨著書。世世祕囊褚。

又

野寺促晨裝。古驛休破甕。雖云行役苦。客子心獨樂。家山幸歸來。未免歎拘縛。安得萬里天。翩然下孤鶴。

又

暮年乞殘骸。窮巷事幽屏。晨興食一簞。有味敵五鼎。終日無再炊。奈此夏晝永。枯腸不禁攪。戒婢罷裘茗。

又

小磴落雪花。修綆汲牛乳。幽人作茶供。爽氣生眉宇。年來不把酒。杯榼委塵土。臥石聽松風。蕭然老桑苧。

又

日鑄歲幾何。苞苴遍權門。野人求其類。金壤實弟暈。超然高世韻。何獨驅睡昏。安得如吾宗。坐致願渚園。

又

酒能忘事物。不過在醉時。麴蘖力既盡。萬緒如盡絲。阿堵雅見疎。歡伯難與期。自憐善用短。時誦止酒詩。

又

薰艾割蜜房。荷鋤掘吳朮。誰烹彌明鼎。來薦維摩室。厚味不腊毒。上藥能愈疾。今夕風月佳。良會不可失。

又

古人在山林。躬自事樵汲。我雖迫耄期。勤慎亦在習。掃地拂几硯。何遽力弗給。卻笑杜陵翁。多臥少行立。

又
屏居江海涯。杳杳菰蒲深。俛仰夏令中。澤國正多陰。桑椹熟以紫。水鳥時遺音。偶得一瓢酒。鄰里聊相尋。

醉歸

夜分飲散酒家壚。歸路迢迢月滿湖。小豎竊言翁未醉。入門猶記露菖蒲。

又

烏柏陰中把酒杯。山園處處熟楊梅。醉行蹉跎人爭看。蹋盡斜陽躡月來。

書南堂壁

數間破屋住郊野。暑雨時須自補茅。多病篇章無傑思。長閑樵牧有新交。荒唐但向先師媿。骯髒寧辭薄俗嘲。偶有會心成獨笑。一林春筍放煙梢。

又

心涵元知面合團。愚公骨相卻酸寒。雲山萬疊猶嫌淺。茆屋三間已覺寬。菜長何妨供小摘。花開聊得助幽歡。今朝忽有西村興。著起芒鞋不作難。

五月雨

空濛五月雨。景氣一番新。換盡園林葉。洗空衢路塵。山郵惱行客。野渡滯歸人。獨有龜堂叟。涼風吹角巾。

蠶麥

村村桑暗少桑姑。戶戶麥豐無麥奴。又是一年春事了。繅絲擣麩笑相呼。

早至園中

湖上空濛雨熟梅。清晨岸幘一悠哉。幽花不恨草埋沒。密樹豈知禽去來。舊爲愛茶分水器。近緣炊爨得琴材。小丘僅見山如髻。尙媿韓公八尺臺。

憶雲門諸寺

三百六十日。安可日日愁。四百八十寺。要須寺寺遊。雲門若耶間。到處可淹留。金像闕古殿。霜鐘發重樓。臨澗見

魚躍穿林聞鹿呦。亦有疎豁處。白鷺下綠疇。僧固非盡佳。終勝從公侯。夜闌煎蜜湯。豈不賢孟甌。澤居厭溽暑。慨思風露秋。晴雨俱可人。亦莫占鳴鳩。

贛士曾與宗字光祖以其居貧簷谷圖來求詩

高人心虛萬物宗。家世常以仕易農。買山本愛坡上竹。手種已偃巖前松。瀑泉三伏凜冰雪。谷聲十里酣笙鏞。了知自是一丘壑。不與金精爲附庸。地與金精山青牛峽爲隣。

以菜茹飲酒自嘲

山澤有臞儒。殘年病滿軀。拙疎難救藥。貧困不枝梧。海客留苦脯。山僧餉筍枯。筍枯出仗錫山。衰顏得村酒。猶解甞時朱。

五月二十一日風雨大作

風雨縱橫夜徹明。須臾更覺勢如傾。出門已絕近村路。對面不聞高語聲。銜舳江關多蜀估。宿師淮浦飽吳粳。老民願忍須臾死。傳檄方聞下百城。蜀盜已平。淮壖胡賊亦遽去。

寄題栝蒼陳伯予主簿平楚亭

琵琶洲上暮山奇。五十餘年役夢思。與子定交雖可樂。念身垂老亦成悲。遠遊倦似風枝鵲。愁思多於鬪盜絲。安得往尋平楚約。一樽相屬醉題詩。

卽事

歸臥已如狐首丘。不妨解劍換吳牛。掃空身外閑榮辱。閱盡樽前舊輩流。學道漫希僧坐夏。憂時常媿士防秋。一年曆日開強半。歎息人間歲月遒。

梅雨初霽

梅雨忽已過。松風來颯然。吟多錦囊富。影瘦角巾偏。客祝加餐飯。兒憂少睡眠。衰骸累人久。撫事感餘年。

夏日雜題

東吳五月黃梅雨。南浦孤舟白髮翁。紹插朝冠金絡馬。多年不入夢魂中。

又 午夢初回理舊琴。竹爐重炷海南沉。茅簷三日蕭蕭雨。又展芭蕉數尺陰。

又 新縫細葛作蟲稠。簾展風漪凜欲秋。啼鳥一聲呼夢斷。依然書卷在牀頭。

又 簷前桐影偏宜夏。葉底蟬聲漸報秋。莫道衰翁怯風露。也能覓醉水邊樓。

又 渚蒲經雨送微馨。野鶴凌風有墮翎。歸入衡門天薄暮。清溝淺浸兩三星。

又 一葉兩葉病木實。一點兩點疎螢流。水底星河秋脈脈。髮根風露夜飈飈。

晚興

地荒蓬藋與人齊。局促何曾厭屋低。村市船歸聞犬吠。寺樓鐘暝送鴉栖。山童新斫朱藤杖。僮婢能醅白苣齏。政欲出門尋酒伴。霏霏小雨又成泥。

急雨

蝸廬四壁僅容身。赫赫炎曦不貸人。正喜風清三伏暑。已看雨壓九衢塵。寒泉不減中滯味。真茗初嘗正焙新。安得凌空雙健羽。徑隨猿鶴上嶙峋。

聽雨

老態龍鍾疾未平。更堪俗事敗幽情。紗幮笛簟差堪樂。且聽蕭蕭暮雨聲。

窮居戲詠

賦分雖云薄。謀生亦自疎。但令書有種。敢恨食無餘。身病慵行立。庭荒廢掃除。寒溫雖泛禮。猶辱問何如。旬日直得二三故人書。

讀窮居五字慨然有感復作一首自解

布褐營身足。茅茨置榻寬。食非依漂母。菜不仰園官。小蹇鞍韉黑。羸僮骨相酸。丹青能寫此。千載尙傳觀。

蒙恩封渭南縣伯因刻渭南伯印

題門壁

旋著朝衫拜九天。榮光夜半屬星躔。渭南且作詩人伴。敢望移封向酒泉。唐詩人趙嘏爲渭南尉時。謂之趙渭南。四十年來住此村。勝衣拜起有曾孫。市壚分熟容賒酒。鄰舍情親每饋殮。居似窮邊荒馬蹏。身如深谷老桑門。幸知歲惡緣陂廢。安得農官與細論。負郭及近縣。頗有患水處。

雨霽

雨霽禽魚樂。風生草木香。老鷲時易失。閑鷺日偏長。閣閣龜何怒。翩翩蝶許忙。閉門真得計。切勿變軒昂。

西村晚歸

小塢花垂盡。平隄草次迷。日長鶯語久。風定絮飛低。子響聞基院。舟橫傍釣溪。歸途不知處。依約埭東西。

連日雲興氣濁雨意欲成西南風輒大作比夜月明如晝

塢自呼鳴蚓自歌。二者鄉人以爲用候。何時甘樹一滂沱。封姨漫妒陽臺夢。卻付長空與素娥。

考古

考古無長晝。憂時少熟眠。偷生迫鍾漏。戰死媿兜鞬。莫報乾坤施。空驚歲月遷。藜藿安用糝。吾事本蕭然。

殘春無幾述意

試筆書盈紙。烹茶睡解圍。新蔬供冷麵。熟練製單衣。雛燕飛初穩。殘花見漸稀。年衰學不進。默默訟吾非。

又

衰疾來無已。流年過若馳。家貧食易笑。身老夢常悲。草長增蛙怒。花空失蝶期。不堪多難日。更賦送春詩。

南堂晨坐

鏡湖清絕似瀟湘。晨起焚香坐草堂。日暖遊絲垂百尺。花殘新蜜釀千房。綠桑糝箔開蠶食。白水翻車浸稻秧。莫

道村翁殺風景。也能沽酒答年光。

記悔

我悔不學農。力耕泥水中。二月始穡事。十月畢農功。我悔不學醫。早讀黃帝書。名方手自緝。上藥如山儲。不然去從戎。白首捍塞壩。最下作巫祝。爲國祈豐年。猶勝業文辭。志在斗升祿。一朝陪衆雋。所望亦已足。豈知賦命薄。平地成怨仇。生爲馬伏櫪。死爲狐首丘。已矣何所悲。但悔始謀錯。賦詩置座傍。聊以志吾忤。

東園晚興

宿業自脫新葉生。東園忽已清陰成。老夫東行復西行。烏藤瘦勁青鞋輕。竹雞羣號似知雨。鶉鴉相喚還疑晴。萋萋幽草上牆緣。灑灑細水循階鳴。蕭然濯手坐盤石。心地平安體舒適。青山缺處紅日沉。杳杳長空送歸翮。

晨起行園中

晨日未出林。庭戶有爽氣。僮奴課薪水。老子自擁篲。稻陂方閔雨。草木亦顛顛。羣蛙汝何心。尙復作鼓吹。

雷雨

雲昏失南山。雷過撼北戶。天其哀此民。畀以三日雨。未言高下足。十已得四五。雨勢殊未已。喜色徧農圃。稽首謁龍公。願言終有秋。民飢不敢辭。懼貽明主憂。

戲書燕几

平生萬事付天公。白首山林不厭窮。一枕烏聲殘夢裏。半窗花影獨吟中。柴荆日晚猶深閉。煙火年來只僅通。水品茶經常在手。前身疑是竟陵翁。

又

飽知此手合鋤犁。刺喜東歸老故栖。僧乞新詩題院壁。人扶半醉下樓梯。少通朝籍讒銷骨。晚畏京塵悔噬臍。尙有遠遊心未死。夢攜猿鶴渡數溪。

喜雨

一雨洗旱塵。吾廬氣踈豁。土潤竹萌出。水長漁舟活。桑麻鬱千里。夾道光如潑。憑高望歸雲。更覺原野闊。沉憂寬

旅食分喜到僧鉢。但仰皇天慈。不必尤旱魃。

閑適

閉門萬事不相關。飽受人間一味閑。琴薦潤生諧雨至。衣篝香冷歎春殘。早曾寄傲風煙表。晚尙鍾情水石間。小市酒旗能喚客。試尋鄰曲共開顏。

早晴

老病常貪睡。蕭蕭厭雨聲。翩然兩鳥鵲。爲我報新晴。

翦牡丹感懷

雨聲點滴漏聲殘。短褐猶如二月寒。閉戶自憐今伏老。聯鞍誰記舊追歡。欲持藤榼沽春碧。自傍朱欄翦牡丹。不爲挂冠方寂寞。宦遊強半是祠官。

偶觀舊詩書歎

吾道運無積。何至隨畦畛。醜雞舞甕天。乃復自拘窘。外物豈移人。子顧不少忍。鶴井與狐妖。正可付一哂。繁華夢境鬧。零亂空花鬢。可憐愁書生。尙學居易稊。我昔亦未免。吟哦啄肝腎。落筆過白雨。聚稿森束筍。幸能悟差早。念常自憫。安得從碩儒。稽首謝不敏。

聞蜀盜已平獻馘廟社喜而有述

北伐西征盡聖謨。天聲萬里慰來蘇。橫戈已見吞封豕。徒手何難取短狐。學士誰陳平蔡雅。將軍方上取燕圖。老生自憫歸耕久。無地能捐六尺軀。

晚雨

萬里雙芒屨。終年一布裘。病侵消壯志。醉著失閑愁。琴料憑僧問。巢居與鶴謀。晚來疎雨過。探借北窗秋。

雨晴

早曠常思雨。沉陰卻喜晴。放船蓮蕩遠。岸幘竹風清。淮浦戎初遁。興州道甫平。爲邦要持重。恐復議消兵。

起晚自嘲

辛苦一生何所獲。老向東阡與南陌。頭眩眼暗牙齒疎。能作人間幾時客。爾來偷惰更可笑。臥聽場中打新麥。老雞失旦也似儂。引頸一呼窗已白。

閑中偶詠

斷編殘稿本徒勞。橫得虛名亦已叨。不識狐書那是博。尙分鶴料敢言高。槩山且欲營丹竈。跨海何當看雪虯。與世不諧終自許。笑人苦勸學鋪糟。

又

舉世紛紛名利間。天公偏賦此身閑。塵衣濯罷滄浪水。茅舍歸來會稽山。鄰舍擎盤分麥飯。野人曳杖叩柴關。酒甞詩債何時了。未死何妨且旋還。

晚步湖塘少休民家

瓜蔓緣籬竹。蘆芽刺岸沙。橫陂浮雁鷺。古道暗桑麻。適遇扶犁叟。同休織屨家。村童亦可念。喚客手吒叉。

獨酌罷夜坐

不見麴生久。惠然相與娛。安能論斗石。僅可具盤盂。聽雨蒙僧衲。挑燈擁地爐。勿生孤寂念。道伴有狸奴。

雨中出門閑望有作

急雨初來已瀉簷。清香欲散更穿簾。年開九秩尙不死。坐對一編殊未饜。人笑黠癡俱得半。自憐貧病每相兼。說梅古謂能蠲渴。戲出街頭望酒帘。

示二子

豈不懷榮畏友朋。一生凜凜踏春冰。任真雖笑拘邊幅。達節寧容出準繩。自喜殘年如白傅。更憐諸子慕崔丞。毫期尙有江湖興。頑健人言見未曾。時子罷調官東陽。丞子堪調彭澤丞。

道室秋夜

江上窮秋日。菴中獨夜時。丹靈敲豎子。神戶出嬰兒。梁熟猶餘夢。柯摧未畢棋。神仙元可學。往矣不須疑。

又

道室生虛白。仙經寫硬黃。晨杯擊石髓。夜几照松肪。眼力新生慣。心源百鍊鋼。何當登日觀。萬里看扶桑。

醉題

雲棲澗飲未爲高。起舞行歌亦足豪。試問食時觀本草。何如酒後讀離騷。遊山不待飛雙鳥。翫水無因得快刀。熟睡市墟君勿笑。年來隨事學鋪糟。

自詠

忽忽殘年及耄期。清晨對鏡不須悲。遠行久立雖差倦。未到人扶見客時。

又

食飲從來戒失時。衣裘亦復要隨宜。老人最索調停處。正在初寒與半飢。

秋晴

身健心閑百慮輕。秋晴未必減春晴。晨窗暖日烘花氣。午枕微風送鳥聲。韞玉硯凹宜墨色。冷金牋滑助詩情。少年風味嗟猶在。虛道歸休學力耕。

門外獨望

離離遠樹傍煙津。又見清秋一歲新。老眼厭看南北路。流年暗換往來人。鑄金遺像誰能記。執玉來朝適已陳。況我風中斷蓬耳。夕陽空復一傷神。

貧歌

壽居福之首。貧爲士之常。造物賦我貧。乃以壽見償。處常而受福。每恐不得當。掬澗以沃渴。屑柏以爲糧。雖云未免飢。何至死道傍。猶勝遼東丁。化鶴還故鄉。

秋晚雜興

汀樹猶青未著霜。壠間稗穗已先黃。放翁皓首歸民籍。爛醉狂歌坐簞牀。

又

昔遇高皇起衆材。姓名曾得廁鄒枚。年踰八十猶賒死。卻伴鄰翁斲芋魁。

老病侵凌不可當。時時攬鏡自悲傷。西風吹散朝來酒。依舊衰顏似葉黃。

冷落秋風把酒杯。半酣直欲挽春回。今年菰菜嘗新晚。正與鱸魚一併來。

置酒何由辦咄嗟。清言深媿淡生涯。聊將橫浦紅絲磴。自作蒙山紫筍茶。鄉老舊謂碾磨茶爲作茶。

洗耳高人恥見堯。看渠應不受弓招。精神徇物那能久。刀礪君看日日銷。

石帆山下醉清秋。常伴漁翁弄小舟。箬笠照溪吾自喜。貂蟬誰管出兜鍪。

煙波萬頃鏡湖秋。清嘯雖聞不可求。自是世間知者少。山林何代乏巢由。隱者。

再巡吾國三千歲。陳迹銷沉渺莽中。豈獨江山無定主。苔磯知換幾漁翁。禹廟。

江東誰復識重瞳。遺廟欹斜草棘中。若比咿嚶念如意。烏江戰死尙英雄。項羽廟。

漠漠漁村煙雨中。參差蒼檜映丹楓。古來畫手知多少。除卻范寬無此工。

渺渺風煙接小江。卽錢清江別名。牛頭山色滿蓬窗。門前西走錢塘路。也有閑人似老龐。

霜風

霜風近海夜颼颼。敢效庸人念褐裘。關吏雖通西域貢。王師猶護北平秋。黃旗馳奏有三捷。金印酬功多列侯。屣補顏行身已老。區區耿耿亦私憂。

贈丐士

志士寧聞畢世窮。此間從古混蛇龍。尙能忍恥墻間祭。安用追慚飯後鐘。

贈目眇者

達人所遇有生涯。高臥窮閭自一家。閱世正嫌巖下電。開樽且看霧中花。

卷七十一

閑遊所至少留得長句

畫橈艇子短驢鞞。野店山郵每小留。瓜蔓水生初抹岸。梅黃雨細欲遮樓。遼東邂逅從歸鶴。海上逢迎得狎鷗。豈是人間偏好異。暮年難復作沉浮。

又

垣屋參差桑竹繁。意行漫漫不知村。眼明可數遠山疊。足健直窮流水源。鷺引釣船經荻浦。牛隨牧笛入柴門。試尋高處休行李。清絕應須入夢魂。

又

太平人物自諧嬉。及我青鞋布襪時。丁壯趁晴收早粟。比鄰結伴絡新絲。圓鞦坎坎迎神社。大字翩翩賣酒旗。晤語豈無黃叔度。欲尋幽徑過牛醫。

又

已過樵塢到漁村。逢著人家卽叩門。僧釜藜羹加糝美。市壚黍酒帶醅渾。顏齡更媿才能薄。故里方知輩行尊。身迫九原兒亦老。一經猶欲教諸孫。

又

高僧宴坐雪蒙頭。閑牧從來水牯牛。深院陰陰四簷雨。高堂寂寂一簾秋。光明本自無餘欠。夢幻何曾有去留。我亦翛然五湖客。不妨相與試茶甌。

晚雨

春旱久闕雨。夏潦復望晴。米盡薪亦絕。漲水與堦平。山信得新粟。欣然聽春聲。書生易滿足。筆硯還施行。南風柱礎乾。西照窗戶明。雨其遂已乎。努力趣秋成。

翌日早晴

澤居傍海壩。暑雨困積潦。四顧路俱絕。所至泥浩浩。坐臥敗屋中。兀若在孤島。得米無束薪。端憂令人老。今朝復何朝。浮雲散如掃。一蟬鳴高槐。兩蝶點平草。欣然受涼颺。便欲事幽討。呼童羈我駒。東走天台道。

一雨二十日

一雨二十日。雨意殊未闌。我廬大澤中。四顧煙水寬。東家有小舟。借我不作難。鸕鷀與鷓鴣。自是平生歡。更作十日期。水淺生小灘。相與極幽賞。勿待江月殘。

入夏多雨雖止復作六月甲寅始大晴

兼旬大雨無晝夜。積潦深虞敗吾稼。豈惟一飽墮縲茫。直恐下溼侵腰胯。南風忽從木末來。新月徘徊出雲罅。州家出符縣家喜。泄水漸空梁可架。放翁亦復扶病起。旋築頽牆補茆舍。便合觀身作老禪。安心穩坐今年夏。

題尊信齋并序

吾友陳希真求序名其書齋。予告子曰。韓文公言讀孟軻書。然後知孔子之道尊。晚得揚雄書。益尊信孟氏。因雄書而孟氏益尊。予謂孔子豈待人而尊。孟子亦豈待人而信。韓之言則過矣。然尊信孔孟者。實學者之本務也。請以名君齋。且爲詩以終吾意。

於庠孔孟何其卓。如天日月地海嶽。正令舉世皆楊墨。邪正豈復勞商推。雖然此道久橫流。執熱其誰不思濯。魯鄒遺書世皆讀。要以尊信爲善學。吾友希真蓋其人。不肯俛首爲齷齪。羹藜飯豆欲老矣。功雖未竟志則慤。我居山陰子在閩。闕然不見千里邈。澤中久雨道路絕。叩戶忽聞聲剝啄。尊信二字子所知。妙質豈復須斤斲。伏生九

十語已訛。失旦自慚猶噓噓。

夏日雜詠

閑居自無客。況復暑如焚。百折赴溪水。數峯當戶雲。幽尋窮鹿徑。靜釣雜鷗羣。舊愛南華語。今方踐所聞。

又

兀兀從誰語。瞞瞞寄一牀。不嗟頭似葆。但苦汗如漿。欹枕風生竹。鈎簾日轉廊。非由靜勝熱。本體自清涼。

又

蒲葦蕭蕭晚。楸梧蕭蕭陰。山童驚大鼾。林鳥伴微吟。蠻硯深瀦墨。吳牋熟擣砧。新詩與醉帖。自笑尙童心。

又

省事心君靜。忘情眼界平。食便醞酪美。浴試葛衣輕。鶴整千年駕。鷗尋萬里盟。秋風卽在眼。作意上青城。

夏日

颼颼風露髮根涼。月落菱歌盡意長。分得鏡湖纔一曲。喫虧堪笑賀知章。

又

新闢虛堂痛掃除。蕭然終日屏僮奴。此間恐是維摩室。除卻藜牀一物無。

又

平明一浴汗無餘。坐覺胸中合太虛。春玉作糜天所賜。不妨數筯進山蔬。

又

草芝方出峨眉老。力比金丹似更多。秦不及期周過曆。始知養壽在中和。伏中方製艸芝丹。此方出史載之學士家。

苦熱

炎歊行中天。曼膚汗翻水。織絺薄如霧。不異鎧被體。散髮垂兩肩。萬事棄不理。寸陰若度歲。日暮何可俟。頗聞交廣間。暑又烈於此。此如不可耐。彼豈皆喝死。聊當扶短策。北澗弄清泚。豈必拜賜冰。恩光動閭里。

予頃遊青城數從上官道翁遊暑中忽思其人

往年屢遊丈人祠。上官八十如嬰兒。自言少年聾不治。芝房松鬣可無飢。叩之不答但解頤。德人之容端可師。我聞學道當精思。畢世不可須臾離。公雖泯默意可知。亡羊要是緣多歧。逝從公遊亦未遲。聯杖跨海尋安期。

龜堂

障日松棚正策功。幅巾聊得受微風。蟬聲不斷草堂靜。潦水已歸村路通。拄杖閑行穿犖确。孤雲時見起龍嵒。東陽醇酎無由到。知負今年幾碧筒。郭希呂。呂子益兩友。歲饒酒。今以故不至。

夢中作

試說山翁事。諸君且勿譁。百年看似夢。萬里不思家。夜艾猶添酒。春殘更覓花。卻嗤勾漏令。辛苦學丹砂。

又

平羌江上月。伴我故山來。幽興依然在。浮雲正爾開。清秋纔幾日。黃葉已成堆。未醉江樓酒。扁舟可得回。

秋近頗有涼意

平旦麵數箸。晡時飯一杯。枝梧長日過。悵望早秋來。團扇尋詩寫。緡巾借樣裁。惟應水邊坐。待得市船回。

夜坐中庭涼甚

銀漢迢迢夜氣澄。都忘朝暮困蚊蠅。月從東浦行空闊。風自南來洗鬱蒸。渴解似嘗仙掌露。魂清如近玉壺冰。誰知此際超然處。不減廬山入定僧。

東偏小室去日最遠每爲消暑之地戲作五字

蕭蕭簷陰轉。泠泠菟水鳴。高塘日氣遠。方簟午風清。渴愛殘漿美。慵便葛屨輕。新秋忽在眼。結束問山程。

野寺

僧壁題名半闕訛。重來歎息屢摩挲。林蟬欲斷暮復急。竹露如傾秋更多。半俸漸償賒酒券。故衫已換釣魚蓑。西窗一看枯棋罷。歸去還憂爛斧柯。

南堂雜興

車馬無聲晝漏長。野人與世已相忘。屏除長物軒袍爽。洗濯塵襟肺腑涼。秋近平郊鳴鶴鶴。日斜荒徑下牛羊。與來欲喚筇枝去。更盡銅爐一炷香。

又

新涼一夜入郊墟。晨起衣巾爽有餘。燕欲委巢雛盡去。燕有三生雛者。及秋。雛方去盡。扇猶在手。意先疎。題詩又滿牛腰束。采藥常攜螞蛄鋤。湖上從今風月好。不妨隨處命籃輿。

又

蛩聲每續蟬聲起。桐葉仍兼柳葉凋。懶惰心情疎筆硯。久長生計屬漁樵。鬻茅旋補東廂屋。伐石新成北港橋。物外高人來往熟。等閑折簡也能招。

又

菴窗東歸息故廬。聊持頑健託鄉閭。未忘麈尾清淡興。常讀蠅頭細字書。貧甚尙能耕有憤。步輕那歎出無驢。南堂又見秋風起。臥看溪雲自捲舒。

又

犇走當年一念差。歸休別覺是生涯。茆簷喚客家常飯。竹院隨僧自在茶。紹興初。僧喚客茶。各隨意多少。謂之自在茶。今遂成俗。禪欠遍參寧得髓。詩緣獨學不名家。如今百事無能解。只擬清秋上釣槎。

又

十里城南禾黍村。白頭心事與誰論。情偷已墜先人訓。迂拙仍辜聖主恩。病退時時親蠶簡。興來往往出柴門。斜陽倚杖君知否。收點雞豚及未昏。村老人不能耕者。以收雞豚爲事。村隣皆然。

又

年過八十更應稀。又向清秋聽擣衣。一片雨來書幔黑。數聲鐘斷釣船歸。酒墟好事能焚券。蠶繭無情未解圍。剩欲出門尋一笑。故人零落歎疇依。

又

北連大澤驚秋早。東限連林覺曉遲。數筋藥苗留客話。一爐松火約僧棋。人間掃跡雖堪笑。物外論心頗自奇。有恨未償猶絕歎。青城交舊待多時。

新秋往來湖山間

車似雞栖舟似葉。百里何曾勞步履。朝遊樵風弄清泚。暮泊石帆登岌嶮。旅飯雖春纔脫粟。僧羹無菜寧用挾。歸來村落未上燈。除卻御風無此捷。

又

會稽山下樵風溪。翠屏倒影影青玻璃。尤奇峭壁立千仞。行子欲上無階梯。商山坐看紫芝老。武陵無奈桃花迷。人間得意妄自喜。一閨憐汝真醜雞。

又

禹祠巍巍闕千代。廣殿修廊半傾壞。屹然遺望每摩挲。石長苔侵字猶在。去年已媿曳杖來。今者更用兒扶拜。聊持一酌薦丹衷。衰疾龍鍾神所貸。

又

健席高檣梅市路。朱橋綠樹蘭亭步。兒時釣遊略可記。不料老年猶此處。漁歌相和葦間起。菱船遠入煙中去。世間萬事等浮雲。耐久誰如兩芒屨。

北嶠

毒熱憚輕出。新涼尋舊盟。西郊猶近市。北嶠漸謀耕。松菊有佳色。山林無俗情。行行望續火。一點隔林明。

小室避暑

千頃菰蒲萬里風。漁翁散髮臥孤篷。何如此室纔尋丈。常在冰壺雪窖中。

秋雨中作

燈前劇論與誰同。中歲朋儕亦已空。行道敢希千載上。會心聊付一編中。雨侵壞甃新苔綠。秋入橫林數葉紅。莫怪又生湖海興。此身元自是孤蓬。

目昏有感

兩眸眩昏八十餘。爾來觸事覺空疎。何由四目如蒼頡。讀盡當年倚相書。

幽居

一曲清溪帶淺山。幽居終日臥林間。丹經在昔曾親授。死籍從今或可刪。人笑拙疎安淡泊。天教強健享清閑。秋來漸有佳風月。擬與飛仙日往還。

初秋卽事

簾櫳雨過不勝清。秋氣依依似有情。高棟尙餘雙燕宿。短莎先放百蟲鳴。挑燈剩欲開書帙。擘蟹時須近酒罍。卻媿隣家常作苦。探租黃犢待寒耕。

又

老來閱世苦匆匆。又見流年入鬢蓬。山徑溼螢黏露艸。井牀病葉竄秋風。隣翁每共藜羹味。穉子能終汗簡功。造物於人元不薄。未須抵掌歎囊空。

山庖

新春穉穉滑如珠。旋壓犁祁軟勝酥。更翦藥苗挑野菜。山家不必遠庖廚。

題道傍壁

晚境那禁歲月催。幽花又見澗邊開。莫辭贖買旗亭酒。恐有騎驢李白來。

又

湖廢財存十二三。拍隄漲水尙如藍。吾廬隱翳初非意。頗欲臨流結艸菴。

訪野老

農事元知要細評。野人有舊得尋盟。林深未見果蔬地。舍近先聞雞犬聲。春水築塘謀竭作。陽坡臥犢約同耕。老來常歎人情薄。深媿今朝倒屣迎。

書適

架竹苦茅屋數椽。推開窗戶卽江天。微飢未遽愁長日。小疾何妨度厄年。孤鶴入秋偏警露。斷山欲雨自生煙。囊中妙法君知否。買斷清閑不用錢。

憶蜀

憶昔西遊日。蝮蛾勝事繁。題詩古柏廟。載酒海棠園。世故紛難料。年光浩莫論。所欣身尙健。短褐醉江村。

生涯

生涯數畦菜。心事一溪雲。樵擔斜陽下。漁歌靜夜聞。門無俗駕到。廚有遠泉分。但了麴蘖事。功名烏足云。

又

身世茫如夢。門庭冷似冰。逢迎賣藥叟。辭謝乞錢僧。羸疾時時劇。衰顏日日增。人扶亦可出。要是藉烏藤。

又

舊業桑麻在。頽齡耄耋過。虞卿著書晚。伏叟授經訛。井上磨樵斫。村東買釣蓑。傾身營一飽。自笑又蹉跎。

又

殘年端有幾。寂寞寄滄洲。鳥宿千林暮。蟲鳴四壁秋。風廊動磁杵。月壠把鉏耰。衣食隨宜具。何心復浪求。

對食作

潦餘多稼猶中熟。種晚嘉蔬亦半收。黃耳蕈生殊自喜。白頭韭長復何求。比量傍舍慚溫飽。誦詠農書傲墮偷。偶

有一樽難獨啜。過門誰肯小遲留。

曉思

昏昏斷夢帶餘醒。散髮披衣坐待明。城角吹殘河漸隱。海氛消盡日初生。老農自得當年樂。癡子方爭後世名。莫

怪閉門常嬾出。卽今車蓋爲誰傾。

戲書

柳下人家枳作籬。小姑不畫入時眉。緯車聲出窗扉裏。正是新涼夜永時。

梅市舟中作

漕渠北向小橋通。漸入蒼茫大澤中。造物將無知我醉。故吹急雨打船篷。

孤店與兒孫。送五郎爲淮西之行。小飲民家是日雲興頗憂雨。

孤店門前千萬峯。酒濃不抵別愁濃。明朝晴雨吾能卜。但聽蘭亭古寺鐘。

過魯墟先太傅舊隱

桑竹蕭條帶夕陽。故居依約古河傍。頽垣壞甃無尋處。父老猶言學士莊。

步月

鷗鷺論交有舊盟。越山勝處著柴荆。只思小閣焚香臥。偶作長堤躡月行。湖閣煙鐘來縹渺。林疎漁火見分明。店家已賣新篘酒。一醉今宵似可成。

拄杖示子適

拄杖相從四十年。交情耐久獨依然。西窮巫峽岷江路。北抵岐山渭水邊。早已歸休弄泉石。老猶緩步歷風煙。會同鉢袋并禪版。付與兒孫世世傳。

讀道書

一境有神龍。歲不畏枯旱。爲國常得賢。百世不可亂。吾讀黃老書。掩卷每三歎。正使未長生。去死亦差緩。如何不自力。白首猶漫漶。友朋死略盡。日月難把翫。豈無獨往願。兒孫苦羈絆。安得葛與陶。相從明此段。

秋日睡起

白露已過天益涼。練衣初覆篝爐香。天其閔我老且憊。付以美睡聲撼牆。離騷古文傍倦枕。砥柱巨刻懸高堂。睡餘一讀搔短髮。萬壑松風秋興長。

書意

屋漏徙我牀。窗破補其罅。衣穿傲狐貉。食淡忘膾炙。人生老可哀。百事就衰謝。我喜在得歸。味美如啖蔗。雖云茅茨陋。豈不賢傳舍。兒能牧雞豚。身自種桑柘。市墟酒易賒。鄰廡鹽可借。睡任門生嘲。醉無官長罵。見書眼先開。情嬾亦自赦。卻後五百年。林間作佳話。

寄題龔立道崑山樓閑堂

我居山陰古大澤。出門尙恨風煙迮。欲求曠快舒眼力。夢中去作樓閑客。樓閑主人計不疎。萬卷讀盡家藏書。平時不喜入城府。况肯自屈承明廬。聽雞東帶誰不爾。明時可仕君獨止。不妨借地作園林。買山豈是巢由事。園廬皆借地營之。

秋雨書感

新春赤米摘青蔬。一飽從來不願餘。門外久無溫卷客。架中寧有熟官書。濁醪未廢時時飲。短髮猶須日日梳。自笑少年風味在。滿川煙雨正愁予。

又

晨起開門雪滿簷。東崗一徑得幽尋。斷雲殘雨歲華晚。丹竇碧花秋意深。林下已悲身老病。人間猶與俗浮沉。牀頭小甕今朝熟。又喚隣翁共淺斟。

弄筆

少學文章竟不成。暮年腕弱字欹傾。抽毫欲下還休去。槩几空憐似砥平。

睡覺作

世言黃帝華胥境。千古秦荒孰再遊。但解消搖化蝴蝶。不須富貴慕蚍蜉。

又

邯鄲夢事豈關身。未熟黃粱迹已陳。輸與烏衣老鈴下。日中睡覺一顰伸。

秋思

露濃壓架葡萄熟。日嫩登場穉稻香。商略人生如意事。及身強健得還鄉。

又

三三兩兩戲魚行。香餌纔投去若驚。寄與扁舟五湖客。只當遠引過平生。

又

一篇舊艸天台賦。六幅新傳太華圖。占盡人間清絕事。紫藤香起竹根爐。藤香近出廬山。

又

村南村北鷓鴣鳴。小雨霏霏又作晴。拂枕欲眠不成夢。卻拖藤杖出門行。

又

出門東行復西行。處處人家打稻聲。小甕秫醅雖未熟。後園楮蕈已堪烹。

又

看雲廬阜屏風疊。采藥嵩山冠子峯。行盡四方心未快。不如一榼醉吳松。

又

桑竹成陰不見門。牛羊分路各歸村。前山雨過雲無迹。別浦潮回岸有痕。

又

隣砧落日數聲殘。汀樹秋風幾葉丹。冉冉清愁來不斷。無方能使酒腸寬。

又

老子齋居罷擊鮮。木盤竹筍每隨緣。隣僧不用分香鉢。蓮芡猶堪過半年。

又

存神止慮自長年。黃老遺書漢尚傳。妙語雖傳人不省。卻從丹竈覓神仙。漢武帝賜平津侯詔曰。君其存精神。正念慮。輔助醫藥以自持。祁侯與揚王孫書曰。願存精神。省思慮。進近醫藥。厚自持。其語悉同。疑出於黃老遺書。至漢尚傳也。

秋來苦貧戲作

閉門高臥養吾真。說著生涯笑倒人。奴閔囊空辭屣直。婢愁爨冷拾炊薪。羹能有糝猶爲黍。地到無錐始是貧。一飯不妨支一日。讀書常媿聒比隣。

晚晴

兩餘殘日入疎籬。變化相乘乃爾奇。千嶂暮雲收盡後。一年秋暑洗空時。如山酒券不相貸。隔巷衣砧如許悲。剩欲出門紆滯思。交親零落與誰期。

對月

遠客厭征路。流年逢素秋。不知今夜月。還照幾人愁。

又

艸艸洽杯盤。三更月露寒。茆簷雖隱翳。終勝客中看。

出近村晚歸

松枝代如意。練布製單衣。出每沾晨露。歸當送夕暉。野花當路發。沙鳥背人飛。到舍燈初上。茅簷聞踏機。

又

苦雨秋將晚。羈愁酒易醺。百年終腐骨。萬事盡浮雲。果熟多猿噉。林疎過鹿羣。亦思書觸目。老嬾不成文。

秋晚

雞聲喔喔頻催曉。木葉颼颼已變秋。憂患縱多終強項。飢寒未至且優游。老熊尙欲身當道。乳虎何疑氣食牛。時黑孫方生半年。但有一愁消未得。大兒白髮戍邊頭。

犬雞

小犬一何警。日夜吠籬落。老雞則不然。平旦方喔喔。勤惰各其性。於我何厚薄。糠粃一施之。且復慰寂寞。

賣藥翁

老翁如我老。賣藥以代耕。得錢付酒家。一毫不自營。浩歌和隣叟。苦語誨後生。我欲爲作傳。無人知姓名。

書里中事

事近接耳目。誕信良易知。頗疑有定數。一惑不可移。坐視非所安。忠告反取疑。雖抱愚直意。妄發悔曷追。

書室雜興

秋水淺出灘。秋葉落成陣。方喜風露清。已歎霜霰近。衰疾雖向平。不死亦董董。燈青地爐冷。吾學其少進。

又
衣多藏之笥。食餘積之困。我享既有限。富亦豈勝貧。布褐本自温。筍蕨固已珍。君看梁伯鸞。寄食終其身。

又

老眼觀細書。紛然黑花墜。不如袖手坐。嘿誦舊所記。但恨志弗強。編簡頗失次。後身作書生。努力究此事。

又

學書五十年。其進不及寸。未能踐繩墨。況敢說豪健。雖然亦有用。尙足博麤飯。開學教牛經。坐市寫驢券。

秋感

瘦盡腰圍白盡頭。悲蛩聲裏落梧桐。短檠且慰經年別。豎褐猶懷卒歲憂。天地無私嗟獨困。風霜有信又殘秋。頑軀安得常強健。更倚東吳寺寺樓。

秋夜

秋色滿江干。江楓已半丹。身閑詩簡淡。道勝夢輕安。偃蹇憐腰折。清癯鄙面團。何妨杵衣夜。又見歲將殘。

又

落葉鳴遙夜。啼螿送暮秋。不知何許笛。故作此時愁。青海三年戍。黃旗萬里侯。何如石帆下。煙雨釣滄洲。

卷七十三

秋日村舍

會稽城南古大澤。霜晴水落煙波迤。寒風蕭蕭凋檉柳。暖日暉暉秀薺麥。傳聞新詔募新軍。復道公車納羣策。忠誠所感金石開。勉建功名垂竹帛。

又

川雲慘慘欲成雨。宿麥蒼蒼初覆土。芋肥一本可專車。蟹壯兩螯能敵虎。村村婚嫁花簇檐。廟廟禱祠神降語。兒孫力稼供賦租。千年萬年報明主。

村遊

開戶苦無繆。行行不覺遙。人稀廢古井。水退築新橋。野店聽山雨。僧廚餽藥苗。湖中有高士。拆簡恐難招。

吳歌

勝負兩蝸角。榮枯一蟻窠。人情苦翻覆。吾意欠蹉跎。困睫憑茶醒。衰顏賴酒酡。坐人能聽否。試爲若吳歌。

秋感

扶杖龍鍾迫耄期。江湖木落更堪悲。醉中光景似得志。夢裏朋儕如少時。落筆龍蛇仲蒙帖。茵園器一字仲蒙。滿懷風月季長詩。前朝名勝凋零盡。百歲關心只自知。

又

聖世優容許乞身。歸來猶幸齒齊民。漁家那有懸車地。蔬食何施祝鯁人。獠婢臨溪漂衣絮。蠻童掃葉續炊薪。生涯如此仍秋暮。賴是從來慣處貧。

紹興辛未至丙子六年間。予年方壯。每遇重九。多與一時名士登高於戴山。宇泰閣。距開禧丁卯六十年。憂患契闊。何所不有。追數同遊諸公。乃無一人在者。予猶強健。慘愴不能已。賦詩識之。

故里登高接雋遊。卽今不計幾番秋。一樽尙與菊花醉。萬事不禁江水流。薄命雖多死閭巷。逢時亦有至公侯。若論耄歲朱顏在。窮達皆當輸一籌。

結茅

結茆湖曲兩三間。客少柴荆盡日關。插架圖書娛晚暮。滿灘鷗鷺伴清閑。壁龕吳晉千年字。斷地得吳永安晉太康中古甌。窗納蒹葭萬疊山。自怪堅頑推不倒。時來臨水照蒼顏。

老健

年垂九十身猶健。竹屋荆扉不厭低。挈榼自沽深巷酒。擁衾遙聽別村雞。家添豚栅還堪賦。路認牛欄每不迷。惟恨窮秋開霽少。晚來小雨又成泥。

幽居卽事

壯歲本亡奇。頽齡又及斯。極知身有幾。惟是醉相宜。燒艸溫新牘。編籬護伏雌。謀生未忘念。笑語路傍兒。

又
秋晚書感

晚日照茅茨。西風吹接羅。貧思止酒易。老悔養丹遲。斷地秋畦藥。焚香夜撲蓂。呼兒具舟楫。吾欲上湘瀉。犧象初心豈願才。溝中雖斷不須哀。吾生自信雲舒卷。客態誰論燕去來。夕露正看沾艸棘。晨霜已見落楸槐。老年閉戶真無憾。詩火更闌熟芋魁。

小市暮歸

愛酒行行訪市酤。醉中亦有穉孫扶。林梢殘葉吹都盡。煙際孤舟遠欲無。野餉每思羹首宿。旅炊猶得飯雕胡。青山在眼何時到。堪歎年來病滿軀。

寓歎

日夕羊牛下。月明烏鵲飛。林林皆有託。貿貿獨安歸。疾痼方求藥。秋高未製衣。岷峨不遂隱。更恨昔謀非。

又

交世非初志。謀生又絕疎。家貧思辟穀。人忌悔知書。門異回軒巷。乘無禿尾驢。老頑君勿怪。萬事有乘除。

題僧菴

短髮不禁搔。紆悲賴濁醪。潦收溪瀨急。木落寺樓高。善飯餘何欠。看雲亦足豪。今朝有奇事。江浦得霜螯。

哭季長

細路穿雲塢。危橋渡野塘。人稀土花碧。屋老瓦松長。憂患雙蓬鬢。裝資一布囊。燒薪藉餘暖。今夜有新霜。巖山剡曲各天涯。死籍前時偶脫遺。三徑就荒俱已老。一樽相屬永無期。寢門哀慟今何及。泉壤從遊後不疑。邈迨子孫能記此。交情應似兩翁時。

又

我荷鋤時君賜環。君歸我復造清班。無由促席暫握手。每得寄聲聊解顏。造物不令成老伴。著書猶喜在名山。季長晚著書數百卷。半年僅得陳蓴鱖。白首臨風涕自潛。

魔境作頗思遠適賦此自遣

夜夜燃燈旦旦香。修竹老尙隨微茫。齋居自許塵心盡。遇事方知業力強。兩履生雲入巒峴。孤舟載月上瀟湘。道人行李君毋笑。惟是著筒與藥囊。

枕上

窗紙蕭蕭印月痕。數聲新雁過江村。孤愁不與夢俱斷。羸老豈知身尙存。世事萬端歸蠹簡。秋風百感集清樽。荷鋤家圃知何憾。猶勝生求入玉門。

讀幽詩

我讀幽風七月篇。聖賢事事在陳編。豈惟王業方興日。要是淳風未散前。屈宋遺音心尙絕。咸韶古奏更誰傳。吾曹所學非章句。白髮青燈一炫然。

北窗

半世蟬嘶坐北窗。老年依舊守殘缸。買書安得黃金百。覓句如求白璧雙。老氣尙思吞夢澤。壯遊曾是釣巴江。寒生事業秋毫盡。筆力終慚鼎可扛。

小圃醉中作

搖落園林探借春。耄期詩酒肯輸人。狂時湖海猶嫌在。達處羲農亦未淳。木葉蔽身如盛服。藜羹加糝卽常珍。巢由尙隱唐虞代。漫道桃源可避秦。

秋冬之交雜賦

蓬戶終年閉。靈臺一事無。貧猶能自活。衰未藉人扶。兒學無敢異。孫啼有啓呱。東隣麴道士。折簡也能呼。

又

霽日收殘靄。微霜作早寒。桐凋無宿葉。水退出新灘。室小纔容膝。門低每觸冠。平生只此是。何物動憂端。

又 避俗嫌林淺。安貧覺屋寬。地爐燒葑火。土榻藉蒲團。稚子誇藜糝。高僧斲芋殘。霜寒固難出。不怕笑蹒跚。

又 嶺下晨炊黍。津頭暮繫船。寒潮吞別浦。老木慘蒼煙。市徙新山步。耕侵古廟墀。閑人不蓄憤。散髮醉江天。

又 霧雨林塘晚。風霜聚落寒。衣冠存簡朴。農圃備艱難。春籩麪供餌。蒸炊豆作團。此心如古井。無地起漣瀾。

又 確舍臨寒水。漁舟弄夕霏。烏將九子過。雉挾兩雌飛。浮世萍無蒂。流年弩發機。常思南鄭日。縣驛跨驪歸。漢中西縣村落。下臨灊水。景物頗似吾鄉。

海山

補落迦山訪舊游。菴摩勒果隘中州。秋濤無際明人眼。更作津亭半日留。

飲村酒

湘浦騷人詠啜漓。黃州飲濕又增奇。紛紛坐客評清濁。我已昏然睡不知。

觀諸將除書

百鍊剛非繞指柔。貂蟬要是出兜鍪。得官若使皆齊虜。對泣何疑效楚囚。

捫腹

身如椰子腹瓠壺。三畝荒園常荷鋤。著萬卷書雖不足。容數百人還有餘。

醉歌

卻日莫揮戈。君當聽我歌。花殘狂有限。酒熟悶無多。生理憑長鑱。幽情寄短蓑。江湖秋萬里。未死且婆娑。

自歎

惡殺常根食。安貧但縵袍。消極敢言達。簡默本非高。入剡逢飛雪。遊吳看怒濤。平生笑漁父。苦語勸餚糟。

村翁

不入城門三歲餘。亦無車馬過吾廬。食常羹芋已忘肉。年迫蓋棺猶愛書。處處叩門尋醉叟。時時臨水看遊魚。半生名宦終何得。作箇村翁計未疎。

不寐

一竿江渚寄沉冥。衰疾侵凌失鬢青。困睫日中常欲閉。夜闌枕上卻惺惺。

書志

平生不喜作鵬搏。常伴寒蟄語夜闌。一椀淖糜支日過。數椽破屋著身寬。衰殘雖已歎垂白。憂患未容侵渥丹。後五百年吾話在。笑君虛坐幾蒲團。

東偏紙閣初成

蚍蜉占兩解移穴。蟋蟀畏寒先近牀。我亦聯屏爲煖室。一冬省火又宜香。

小豎醉

漫道樽中酒不空。歌呼誰解和衰翁。可憐小豎如猱獍。卻有平陽吏舍風。

雜興

寸陰可惜子所知。尺宅治生今未遲。虛費年光作閑事。人間信有白頭癡。

又

堯舜桀紂皆腐骨。王侯螻螻同丘墟。麥苗覆塊鳩喚雨。常恨無人同荷鋤。

又

一春妍暖無多日。八十康強有幾人。學不名家空自苦。路邊醉倒卻關身。

又

詩人肝肺困雕鐫。往往壽非金石堅。我獨適情無傑句。化工不忌遺長年。

示兒孫輩

雜賦

咎忝諸生後。初非一世豪。但希卿有秩。敢望郡功曹。斂版寧爲辱。扶犁亦足高。兒孫勿妄想。底處不徒勞。

養疾清溪曲。風林幾著霜。細書如助嬾。薄酒不成狂。老歎朋儕盡。閑知歲月長。柴門偶一出。倚杖立斜陽。

又

孤學違流俗。危機歷畏途。逢人增懍懼。看鏡失膚腠。閉戶書圍坐。移燈影向隅。空懷四方志。泯默死東吳。

又

家業貧原憲。年齡老伏生。但悲鸞獨舞。那羨雁能鳴。釀酒秋常醉。驅牛夜亦耕。此身當自貴。勿用作投瓊。

又

貴固不如賤。狂應未勝癡。閉門真已矣。命駕欲何之。碧纓生香袖。清漪漲硯池。是中有佳處。不覺晝陰移。

又

海上漁鹽聚。煙中雞犬聲。耕農叱牛去。醉叟策驢行。劍薄民差樂。烽消盜略平。悠然憩松下。我亦有幽情。

又

櫛髮晨興後。寬腰午餉餘。講明窮理學。讐校養生書。倚杖聽啼鳥。臨池看戲魚。怡然又終日。底事解愁予。

幽居

人間歲月苦駸駸。白首幽居不厭深。嬾愛舉杯成美睡。靜嫌對弈動機心。山村野渡雙芒屨。夜雪晨霜一布衾。不到匡廬三十載。夢攜中鉢上東林。

連日作陰頗有雨雪意

十分曆日過八九。徂歲迫人殊可驚。霜木蕭蕭臨古道。雪雲慘慘冒高城。山頭噪雀無生意。水面飢鶩有墮聲。剩壓新醅供旨蓄。從今次第問春耕。

山房

四紀移家剡曲傍。自茨生艸作山房。寒侵夜艾知霜重。行遍天涯覺夢長。戒婢無勞事釵澤。課奴相率補陂塘。無

衣已免幽人歎。數箔春蠶歲有常。

梅市暮歸

老境惟閉門。不與事物接。時逢佳山水。尙復快登涉。山程策小蹇。水泛罨短楫。今茲稅駕地。佳事喜稠疊。雲生濕行隄。風細掠醉頰。旅糞芼玉糝。僧飯敷白甑。葑火煨羊魁。瓦甑炊豆莢。經行出幽圃。懷抱頗自愜。枯籬絡丹竇。深澗堆黃葉。白雲橫谷口。綠篠穿山脇。還家寧迫暮。取路羞徑捷。何當倚蒲龕。一坐十小劫。

法雲寺

法雲古蘭若。西走錢塘路。帆影梅市橋。人語柯山聚。吾家昔爲隣。來往無晨暮。十世三百年。散徙非復故。修廊與廣殿。亦已化煙霧。經營久不倦。大體始略具。鐘魚以時鳴。軒檻有幽趣。中庭掃蕪穢。斷碣起顛仆。老我絕世緣。隨身惟兩屨。願言治北窗。寂寞同子住。

郊居

郊居本宴如。觸事自多感。況當搖落時。雲重天慘慘。路窮非通途。地偏無遠覽。殘蕪連古道。槁葉滿幽坎。老來厭了了。萬事付黜闇。地爐熾生柴。喚客烹薺糝。

作雪不成獨詠

淡日朝穿霧。濃雲夜護霜。風聲空浩蕩。雪意愈微茫。棐几閑臨帖。銅爐靜炷香。悠然踐殘歲。不是傲羲皇。

聞雁

蜻蜒浦中聞雁聲。寒侵短褐客愁生。忽思大散關頭路。雪壓蒙氈夜下程。

泛舟至蜻蜒浦小泊漁村

醉泛蜻蜒浦。咿啞一鷓聲。陂塘秋水瘦。墟落暮煙生。野店曾留醉。樵翁不記名。相逢雖惘惘。懷抱已先傾。

散策門外隣叟怪其瘦

八十衰翁力旣愆。強扶藤杖出門前。朝晡特粥何勞歎。齒脫牙搖已數年。

書警

束帶接一客。伸紙報一書。未爲甚疲勞。已覺不枝梧。惟有袖手坐。儼然如齋居。尙懼精神衰。斲石以自扶。

又

情慾雖害人。要是自惑溺。吾觀日用事。飲食真勍敵。乃知匕箸間。其禍甚衽席。堂堂六尺軀。勿爲口腹役。

園中

殘菊無復花。遊鱗抱枯叢。我老復多疾。寄迹窮巷中。開門無客至。安取樽不空。夕陽掛高樹。此日還怱怱。

冬晴行園中

冬溫光景如春妍。暮年強健勝壯年。手推園門拂石坐。豈暇爲客思無旣。殘蕪未死更鬱鬱。晚菊欲槁猶鮮鮮。閑愁正得酒彈壓。此夕預知當熟眠。

又

桔槔灌蔬固已非。竹筧澆花宜見譏。杏繁梅瘦種性別。一氣生殺均天機。細推物理孰不爾。搏風未可嘲卑飛。君其置之且共酌。白酒方熟黃雞肥。

懷青城舊遊

宦途到處不黔突。惟有劍南糜歲月。屢遊老澤蒼玉嶂。疑是虛皇白銀闕。松肪擣麩具晨餐。榭葉作衣勝短褐。泥飲不容繁杏落。浩歌常送寒蟬沒。水邊洞口適有遇。握手一言換凡骨。少陵老子未識真。欲倚黃精除白髮。

晚立

倦憑小簷立柴門。殘角疎鐘欲斷魂。傷雁養翎依荻浦。渡牛浮鼻望煙村。壯心已覺隨年往。孤學何由與俗論。數點雨聲催返舍。小窗燈火對壺殮。

志喜

雪鬢蕭蕭九十翁。短檠猶喜策新功。斲輪自得不傳處。治水本行無事中。山市兒童隨小蹇。江村煙雨宿孤蓬。更知衰疾從今減。萬里塵清蜀藥通。

仕宦初何得。窮居半土農。清宵叔夜鍛。平旦伯鸞春。馬磨猶支日。牛衣亦過冬。湖中有嘯父。何計得相從。湖中隱士。月夜棹舟。其疾如飛。竝燭有聞其嘯歌者。

冬暖園中萱艸蒼然。海棠亦著花。可愛作路浚井。皆近事也。

暖景變嚴冬。誰知造化功。少留萱艸綠。探借海棠紅。築路橫塘北。疎泉小嶺東。欣然得佳處。忘卻歲將窮。

卽事示兒輩

今歲霜遲殊未寒。籬東烏柏葉纔丹。病輕漸喜免求藥。老甚難誇能據鞍。隣舍僧貧分米少。酒坊人熟督錢寬。晚來笑向兒孫說。且得無生一話團。

小雨頗寒

冬溫初喜一寒新。紙閣墀爐養病身。殘雨已收猶點滴。斷雲欲散更輪囷。衣裳可典寧留筍。口腹雖饑肯累人。一事明朝差似樂。探梅閑岸接羅巾。

題舍壁

身寄瓜牛廬。手持科斗書。尙憎鴛鴦棧。肯羨鶴乘車。富貴何加我。山林亦寔如。年來常去殺。不歎食無魚。

又

艸沒孔明廬。塵流倚相書。家居四立壁。出駕獨轅車。窮達本無擇。死生良自如。鏡湖三百里。處處侶禽魚。

仲冬書事

邊頭無警少鈴聲。病得新霜亦已平。赤脚聽蛩勤夜績。蒼頭租犢待冬耕。發奩雙兔駢頭臥。溢榼芳醪徹底清。里巷紛紛誇節物。春盤儺鼓漸關情。

醉舞

渭城朝雨不須歌。爛醉江頭舞短蓑。自是先生眼根鈍。天狐伎倆本無多。

思蜀

白帝城邊八陣磧。青城山下丈人祠。英雄不生僊又去。零落艸間多折碑。

又
蜀莊鳴飛隘九區。超然豈止山澤癯。荒臺古井無處所。行子但覓房公湖。
次韻李季章參政哭其夫人

又
飛蓋傳呼入省門。依然殘夢浣花村。遙知最是傷心處。衫袂猶霑掃黛痕。

又
焚香黃閣退朝歸。道話時時正要提。九十老翁緣底健。一生強半是單栖。

又
萬里氈車入鳳城。豈知遽已迫斜曛。似聞後院思遺愛。掩淚人人說小君。

又
佛供齋僧冀萬分。幽明路絕竟難論。若爲可慰重泉念。觸事平心無怨恩。

又
煮蒿一去杳難知。數紙遺書手自披。切勿輕爲歸蜀夢。竹枝忍復聽吾伊。

又
害道無如狗愛嗔。養生尤要奮精神。祝公少置空閨憶。天下安危在此身。

又
富貴思歸豈坐迂。峴山種芋已成區。獨歸它日公無憾。天際煙帆與石俱。
李公買石甚富。將載以歸。

試筆

人間元無第一手。萬事端如屈伸肘。但能看破卽超然。何代商山無四叟。老民自視中何有。傾身經營一杯酒。此外管城差可人。相從且作明窗友。

屠希筆

屠希一筆價必千。紹興初載海內傳。高皇愛賞登玉几。求書蚤暮常差肩。一朝希死子孫弱。歲久僅可售百錢。宣

城晉陵競聲價。外雖甚飾中杌然。嗚呼世事每如此。使我太息中夕眠。

寒夜吟

仕宦孰不願美官。無如兩膊聳聳寒。可憐誤信紙上語。至死功名心未闌。骯髒得倚門。矍鑠猶據鞍。何如百年中。盡付一魚竿。布襦可以度雪夕。麥飯可以支朝餐。但知禪龕著身穩。莫和詩人行路難。

記夢

衣紳飄舉髮颯颯。一鶴聊爲太華遊。每過名山思小憩。天風浩浩不容留。

霜夜

月淡霜清夜漏遲。疎鐘杳杳度南陂。燈殘有恨欲誰語。雞老無聲如我衰。使入蜀川方在道。書傳淮浦定何時。若爲可遣閑愁得。獨擁寒爐爇豆萁。時方附蜀中便舟寄書張季長家。又未得古書書。每關懷。

又

土牀紙帳臥幽寂。枕上細聽城上更。榭榭燒殘地爐冷。啞啞聲斷天窗明。風霜欲透茅茨屋。鹽酪不下薺糝羹。猶恨扶犁老無力。向來枉是請躬耕。

歲暮

歲暮風霜慘。村深艸棘稠。力衰行每蹇。衣薄鼻多鼽。久矣當長往。悠然尙小留。兒童報炊熟。得飽且忘憂。

與野人散策門外

春意侵寒律。川雲結夕陰。閑人了無事。隣叟偶相尋。廢沼萍黏塊。孤村雀滿林。世間真夢耳。何物可關心。

十一月十一日夜聞雨聲

入冬殊未寒。塵土冒原野。溝溪但枯萍。不聞清湍瀉。今夕復何夕。急雨鳴屋瓦。豈惟宿麥長。分喜到菜把。明朝開衡門。想見泥濺蹠。豐年儻可期。擊壤歌幽雅。

自述

怡然氣貌漸澗澗。淡飯羸裘過此生。儘道無方能縮地。夢中夜夜上青城。

又

齒脆復牢能咀嚼。足孿漸愈可跏趺。短檠非復衰翁事。且與兒孫共地爐。

歲暮老懷

粥美忘流歎。燈孤伴獨吟。衾寒知夜艾。身痛卜天陰。薪炭常憂絕。杯觴不厭深。故人今已矣。三歎有遺音。謂季長也。

書況

垂白渭南叟。深居湖上村。貧知蔬食美。閑覺布衣尊。琴譜從僧借。茶經與客論。探梅來直步。沽酒到偏門。細織籠安鶴。頻求果飼猿。舊書編未絕。猶足教諸孫。

卷七十四

書道室壁

餘生天地一飛蓬。學道年來似有功。習氣掃除空劫外。精神澡雪隱書中。種瓜谿父時時見。賣藥壺公處處同。莫謂與人緣苦薄。相隨拍手有兒童。

書志

蓬矢桑弧射四方。豈知垂老臥江鄉。讀書雖復具隻眼。貯酒其如無別腸。疋馬揚鞭遊鄆杜。扁舟換棹上瀟湘。自悲此志俱難豁。且復狂歌破夜長。

雪夕

目視眈眈左耳聾。吾衰略與昔人同。移登自看鈴蟬影。取酒時澆礪魄胸。東郭稍能師順子。北山未取笑愚公。空村雪虐風饜夜。袖手悠然政策功。

書枕屏

西域兜羅被。南番篤耨香。慣眠三丈日。不識五更霜。

又
心若冰將釋。貌如兒未孩。青城上官叟。時入夢中來。

又
甘菊縫爲枕。疎梅畫作屏。政詩眠未穩。聞雪醉初醒。

又
星斗闌干曉。窗扉曠瞭明。金門與茅店。一種是雞聲。

二友

剩儲名酒待梅開。淨埽虛窗候月來。老子幽居得二友。人間萬事信悠哉。

寄五郎兼示十五郎

八十九十老可驚。白髮森然憎鏡明。身當遊岱尙少駐。書欲藏山殊未成。大兒爲國戍絕塞。季子伴翁親短檠。古人已矣不可作。夜闌撫几歎平生。

鄰曲相過

鄰曲集山家。相看一笑諱。扶行足蹇蹕。半落齒槎牙。農圃乖生理。風霜感歲華。老來情話少。更盡此甌茶。

東窗

臘近寒何薄。秋衣著尙宜。年光祈雪見。節物賣燈知。川日初沈後。樓鐘欲動時。東窗對兒子。更與細論詩。

曉寒

落月銜山口。濃霜倒菊叢。青氈壓衾暖。輦火滿爐紅。起晚書虧課。愁多酒策功。杜陵如昔否。誰與問征鴻。

小雪

簷飛數片雪。瓶插一枝梅。童子敲清磬。先生入定回。

書感

夢裏逢無咎。天涯哭季長。吾生亦有幾。且復釣滄浪。

家釀頗勁戲作

千古英雄骨作塵。不如一醉卻關身。鼎來雖恨王陵慧。熟味方知孟子醇。試問浩歌遺世事。可如酣枕養天真。竹林嵇阮雖名勝。要是淵明最可人。

食齋糝甚美蓋蜀人所謂東坡羹也

齋糝芳甘妙絕倫。啜來恍若在峨岷。尊羹下豉知難敵。牛乳抨酥亦未珍。異味頗思修淨供。秘方常惜授廚人。午窗自撫膨脹腹。好住煙村莫厭貧。

雜興

鋤草春愈茂。養草秋亦衰。不如兩置之。榮悴渠有時。

又

栖雞未旦鳴。粒食固宜報。林鳥何預人。曉曉欲誰告。

又

碩果墜池響。魚隊散無迹。空弦可落雁。此事蓋自昔。

又

條硯欲其潔。磨鏡欲其明。願君試思之。與己孰重輕。

幽情

免歸又破六年閑。每寄幽情煙水間。清鏡不藏新白髮。芳樽猶惜舊朱顏。一編蠹簡心空在。百瓮寒齏債未還。莫爲岷峨勞夢想。故鄉隨分有名山。

醉歌

不癡不聾不作翁。平生與世馬牛風。無材無德癡頑老。爾來對客惟稱好。相風使帆第一籌。隨風倒柂更何憂。亦不求作佛。亦不願封侯。亦不須脫裘去換酒。亦不須賣劍來買牛。甲第從渠鑿梁肉。貂蟬本自出兜鍪。變理陰陽豈不好。纔得閑管晴雨如鶉鳩。辛苦築壘拂雲祠。不如吟獻風月登高樓。爾作楚舞吾齊謳。身安意適死即休。

霜冷

梅花消息動江邊。漸見新春換故年。莫道孤翁心似鐵。夜來霜冷透青氈。

讀書雜言

書亦何用於世哉。聖人之言如造化。巍巍地闢而天開。淵源虞唐至周孔。黃河萬里崑崙來。天不使諸儒爲戰國血。又不使六藝爲亡秦灰。豁如盲瞽見皦日。快若鸞驥聞春雷。插空泰華起突兀。垂天雲漢森昭回。奈何後世獨不省。顧捨夷路趨邛郲。不知開眼蹈覆轍。乃欲歸罪車輪摧。福有基。禍有胎。一朝產禍吁可哀。

東嶺

雲罇漏斜日。駕言東嶺行。鴉翻半天黑。驚起一川明。小立照溝水。欲歸聞角聲。君看浮世事。何處異棋枰。

書戒

我幼事父師。熟聞忠厚言。治身接物間。要使如春溫。鞭朴不可弛。此語實少恩。但能交相愛。餘亦何足論。家貧賴奴婢。炊汲與應門。餘力具茗藥。夕飯或至昏。有過尙當冀。況可使煩冤。出仕推此心。所樂在平反。寧坐輒弱廢。促歸駕丘園。吾老死無日。作詩遺子孫。

書齋壁

煙水雲山千萬重。散人名號繼吾宗。買雞養就冲霄鶴。拾子栽成偃蓋松。父老年年同社酒。兒孫世世作春農。晚窗睡覺添幽事。臥聽蘭亭古時鐘。

雪意

風吼江郊雪意濃。雲如兩陣決雌雄。山寒酒過平時量。窗黑書虧半日功。閑話更端茶竈熟。清詩分韻地爐紅。不須遽覓華胥路。更俟天花落坐中。

山房

何處合題詩。山房病起時。晨光鳥先覺。春信柳偏知。陋學勤何益。虛名悔可追。布衾新絮暖。惟與睡相宜。

晨起

勩業文章謝不能。生涯分付一枝藤。身同湘浦孤舟客。心羨廬山下版僧。倦枕厭聞窗外雨。殘膏猶在壁間燈。草芝要及清晨服。深媿蠻童爲扣冰。草芝丹眉山史載之學士方。

兩雁

兩雁東西來。合羣以南翔。鏡湖接天台。海闊天茫茫。冥飛遠增弋。長路諳冰霜。君看此氣象。豈復謀稻梁。正爾下杜陵。已復掠瀟湘。超遙萬里程。燕雀安能量。

書文稿後

上蔡牽黃犬。丹徒作布衣。苦言誰解聽。臨禍始知非。

題唐執中書樓

吾州唐子他州無。閉戶徧讀家藏書。志氣頗聞已山立。神仙固自多樓居。終日坐忘對燕几。有時出遊騎蹇驢。人生如此自可爾。勿羨新貴高門閭。

歲晚

雲暗郊原雪意稠。天公似欲富來辭。布衾歲久真如鐵。詎敢私懷一己憂。

又

不學空門不學仙。端居胸次自超然。絳人甲子君休問。新歲吾兒本命年。

又

戒殺家庖罷饋魚。病脾亦復禁寒蔬。莫慚鄰里嘲枯淡。出甌香粳玉不如。

又

小岫嶙峋炷寶熏。卷書閑對一窗雲。雁聲忽向天邊過。起立中庭看斷羣。

又

小塢梅開十二三。曲塘冰綻水如藍。兒童鬪采春盤料。蓼茁芹芽欲滿籃。

又

久矣功名不上心。亦無心要老山林。鹿門采藥悠然去。千載龐公是賞音。

雀啄粟

坡頭車敗雀啄粟。桑下餉來烏攫肉。乘時投隙自謂才。苟得未必爲汝福。忍飢蓬蒿固亦難。要是少遠彈射辱。老農輟耒爲汝悲。豈信江湖有鴝鵒。

老翁

老翁睡少知遙夜。貧士衾單怯苦寒。悶裏不嫌村酒薄。瘦來偏覺舊衣寬。籬門遇健時能出。書卷乘閑亦取看。深愧野人憐寂寞。放鋤相喚共朝餐。

寄子虞

人生恨無年。我老已爛熟。退耕鏡湖上。風雨有茅屋。事君闕補報。得此不啻足。餘年尙幾何。嫋嫋風中燭。大兒戍塞垣。馳馬佩矢箠。去家千餘里。辛苦就微祿。書來續三紙。語悲不忍讀。適弟在我傍。亦復淚盈目。門戶嗟日衰。持守賴家督。雲雲暗淮天。念汝方露宿。

雜詠

少日狂疎觸怒嗔。每緣憂患喪吾真。晚收咄咄書空手。卻作騰騰任運人。

又

得過一日且一日。安知今吾非故吾。喪手明窗讀周易。不辜香鉢一齋盂。

又

松昉燎火滿爐紅。覺粟煎湯到手空。試問齋居守丹竈。何如醉臥聽松風。

又

舊聞五岳多靈藥。晚遇高人得祕文。夢境此身常是客。幾時歸臥華山雲。

曉起折梅

織女斜河漏已殘。長庚配月夜將闌。小橋幽徑無人見。折得梅花伴曉寒。

累日濃雲作雪不成遂有春意

釀雪經旬竟不成。一霜卻作十分晴。雲歸岫穴千峯立。暖入郊原萬耦耕。萑葉離離豐歲候。梅花眷眷故人情。道傍孤店新醅熟。已有幽禽一兩聲。

晚晴出行近村閑詠景物

雪雲吹盡木陰移。正是先生曳杖時。老特行將新長犢。空桑臥出寄生枝。醫翁暮過囊探藥。筮叟晨占手布蓍。誰謂人間足憂患。未妨古俗自熙熙。

道室戲詠

道身隱太華。壯歲客青城。采藥何辭遠。燒丹久未成。傳生已醉死。韓子得狂名。猶有殘詩在。他年遺後生。

書感

人生百憂坐一官。况與羣飛接羽翰。兩具吳牛給耕足。三間茅屋看身寬。煮蒿悽愴會不免。簡儉寂默差可安。康莊坦坦不整駕。可憐平地生漚瀾。

又

舞非得譜拍拍錯。行未知津步步危。劫石消磨會當盡。太行突兀乃可移。清晨瓦釜煮藜粥。遙夜地爐燒豆萁。此中正自有佳處。區區外慕寧非癡。

又

茅檐住穩勝華屋。芋糝味甘如大烹。靜觀萬事付一默。掃空白髮非黃精。丈人祠西鶴傳信。小姑山前鼉報更。興闕卻揮短棹去。曉渡清伊聽玉笙。

臘月

今冬少霜雪。臘月壓重裘。漸動園林興。頓寬薪炭憂。山陂泉脈活。村市柳枝柔。春甦吾何患。嘉蔬日可求。

雪作

今年冬暖異常時。造物收功乃爾奇。平野忽看吹雪片。清池俄復結冰澌。飛蝗掃地無遺種。瑞麥連雲有兩歧。想

見市樓增酒價。深居袖手歎吾衰。

卽事

雲本無心木不材。平生得喪信悠悠。釣魚每過桐江宿。賣藥新從剡縣回。山圃萋萋晨灌漑。地爐辛栗夜燔煨。人情萬變吾何預。笑口何妨處處開。

或遺以兩大瓢因寓物外興

檨葉爲衣草結廬。生涯正付兩葫蘆。名山歷徧家何有。塵念空來夢欲無。野鶴巢雲元自瘦。澗松埋雪定非枯。悠然但覓高樓醉。何處人間無酒徒。

歲未盡前數日偶題長句

老向人間迹轉孤。參差煙火出菰蒲。數畦綠菜寒猶茁。一勺清泉手自斟。穀賤窺籬無狗盜。夜長暖足有狸奴。歲闌更喜人強健。小草書成鬱壘符。

又

短褐蕭蕭一幅巾。明時乞與水雲身。平生不售屠龍技。投老真爲種菜人。釜粥芬香餉鄰父。闌豬豐腴祭家神。聯翩節物驚人眼。儺鼓停撾又見春。臘月八日。以粥相餽。北俗也。蜀人豢豬供祭。謂之歲豬。

又

枿櫚小弁野人裝。八十三年舊話長。真笑形骸無藉在。本知生世不牢強。茅檐啼鳥初相命。煙渚歸鴻漸著行。想得城中盛冠蓋。家家來往薦椒觴。

又

風號四野雲如墨。徂歲消磨不滿旬。瑞雪便應平地尺。野梅又報一年春。長河斷渡冰將合。古寺題詩手爲皴。僵臥閉門行路絕。安知今代獨無人。

又

漸近新年日愈長。不辭扶病舉椒觴。了無一事千靈府。只合終身住醉鄉。鬪釘春盤兒女喜。擣蕪臘藥婢奴忙。蜀

州白首猶癡絕。更爲梅花賦斷腸。

余得蘆竹拄杖於舍傍民家似蘆非蘆堅勁輕滑色如栗玉入手錯然微有聲它杖莫及作五字唐律記之

輕堅蘆竹杖。入用自蠹堂。挺節冰霜後。論交歲月長。心空無寵辱。時異有行藏。老病登臨少。何妨日倚牀。

八十四吟

新歲八十四。自宜形影孤。睡憑書檝相。愁賴酒枝梧。兒問離騷字。僧傳本草圖。孰言生計薄。種芋已成區。

又

七十人稀到。吾過十四年。交遊無輩行。懷抱有曾玄。飲敵騎鯨客。行追縮地仙。城南春事動。小蹇又翩翩。

歲暮

書房偷得蝸廬樣。僅僅能容老病身。紙被蒙頭方坐穩。卻愁轉眼又新春。

又

淺色染成官柳絲。水沈熏透野梅枝。客來莫怪逢迎嬾。正伴曾孫竹馬嬉。

又

挹泉石鼎煎崖蜜。候火銅爐炷海沈。一坐便應論十劫。不知歲月去駸駸。

又

久衰豈是見人時。健忘偏于養性宜。噉飯著衣常苦嬾。爲誰欲理一團絲。

又

燕脂斑出古銅鼎。彈子窩深湖石山。老去柴門誰復過。天教二友伴清閑。

又

少慕浮名百種癡。老知世事盡兒嬉。從今春困不須賣。睡到日高三丈時。

書感

襁負客淮穎。髣髴逢亂離。中原遂乖隔。北望每傷悲。泛渭題新賦。遊嵩續舊詩。死生雖異世。此意未應移。泛渭賦。遊嵩詩。見白歐二集。

書適

細讀養生主。長歌歸去來。山僧借水品。溪父送琴材。病退稀求藥。身閑日探梅。今宵喜無寐。燬下有書回。

學道

學道知專氣。尊生得養形。精神生尺宅。虛白集中肩。出岫孤雲靜。凌霜老柏青。晨興取澗水。漱齒讀黃庭。

舟中作

東浦菰蒲合。南莊桑柘繁。皆村落名。潮生無斷港。寺廢有頽垣。糴米尋山步。移舟泊水村。野人多舊識。相對兩無言。

得蜀信

齒髮凋零志氣衰。強臨尊酒祇成悲。少年半是投閑日。春事常當臥病時。憂患頗疑書作祟。功名不似老如期。青城舊友頻相約。歸養金丹尙未遲。

送蘇趙叟赴省試

關路誰非觀國賓。此君肝膽獨輪囷。故家遺俗欲墜地。博士議郎方要人。久矣扁舟弄江月。往哉駸馬踏京塵。勅中墨色如鴉溼。日待東歸一笑新。

新春感事八首終篇因以自解

九陌風和不起塵。平湖冰解欲生鱗。往來朝暮紛如蟻。得見新春有幾人。

又

興來遊衍不辭遙。吹帽風輕過畫橋。猩血未看開露蕊。麴塵先已上煙條。

又

一年最好早春天。風日初和未脫綿。坎坎圓鞮賽神社。翻翻小繖下湖船。

又
憶到夔門正月初。竹枝歌舞擁肩輿。當時光景應如昨。綠鬢治中八十餘。夔府。

又
錦城舊事不堪論。回首繁華欲斷魂。繡轂金羈三十里。至今猶夢小東門。

又
玻璃江上柳如絲。行樂家家要及時。只怪今朝空巷出。使君人日宴驀頭。眉州。

又
梁州陌上女成羣。銅綠春衫罨畫裙。相喚遊家園裏去。鞦韆高挂欲侵雲。與元。

又
烏藤卽是碧油幢。百萬天魔指顧降。酣枕不知霜縞瓦。下牀已見日烘窗。

自歎
晨興袖手觀空寂。飯罷寬腰習按摩。堪歎一生閑日月。爲身時少爲人多。

初春
春入陂湖已折冰。流年誰解繫長繩。土膏動後麥苗長。桑眼綻來蠶事興。稅足了無徵欠吏。飯香時有乞齋僧。開

又
正父老頻占候。已決今年百稼登。

又
漠漠春寒罷對某。霏霏春雨卻催詩。梅花一樹映疎竹。茅屋三間圍短籬。醉倒幸無官長罵。出遊自有老人期。年
光滿眼吾何憾。又近吳蠶浴種時。

簡傅十八官漢種

別舊凋零盡。新交得雋人。文章諧律呂。議論足精神。甚欲邀聯騎。無如困負薪。蘭亭修禊近。爲記永和春。

開歲愈貧戲詠

謝事貧過筮仕初。歸裝僅有一柴車。笥衣盡典仍耽酒。困米無炊尙買書。涸底飽觀苗鬱鬱。夢中聊喜蝶蘧蘧。商山幾許功名事。老子如今卻笑渠。

戊辰立春日

昨夜風搖斗柄回。典衣也復一傳盃。故人久作天涯別。新句空從枕上來。清鏡豈堪看鬢色。小園剩欲覓桃栽。頽然卻恨貪春睡。不盡城頭畫角哀。

又

臥聽城門出土牛。羅旛應笑雪蒙頭。但須晨起一卮酒。聊洗人間千種愁。處處樓臺多俠客。家家船舫待春遊。梅花未徧枝南北。定爲餘寒得小留。

早春出遊

地爐久厭撥寒灰。一笑真成病眼開。不恨城笳催日落。且欣巷柳報春回。蹇驢破帽人人看。南陌東阡處處來。聞道禹祠遊漸盛。也謀隨例一持盃。

春寒

故歲無多雪。新春乃爾寒。柴車歸里社。茅舍老江干。客熟沽醪啜。孫凝索飯搏。更憐菘芥長。殊勝仰園官。

園居

欲出還中止。微陰卻快晴。檻花栽盡活。籠鳥教初成。身寄江湖久。心知富貴輕。還學吾所證。手自寫菴名。近名小室曰還學。

郊行

山色埽石黛。江流漲麴塵。春晴不終日。老病動經旬。竹密有啼鳥。村深多醉人。東阡與南陌。處處寄閑身。

野望

偶攜一小豎。徙倚望南山。船笛爲誰怨。溪雲如我閑。洲長歸雁下。天迴暮鴉還。安得一竿去。終年煙水間。

日高霜漸釋。睡起髮猶蓬。小圃經行外。新蔬檢校中。水開聞躍鯉。天遠看飛鴻。粥熟還歸舍。吾生亦未窮。
午坐

茶盃凝細乳。香岫起微雲。樹影窗間見。禽聲屋角聞。流年易拋擲。舊學失鋤耘。師友今零落。何人爲運斤。

卷七十五

自警

生世如夢境。淹速無定時。少壯不可恃。况汝迫耄期。五官及百骸。自揣日益衰。客來能送迎。要是強支持。百口皆新人。所至無舊知。紹興同朝者。掃地靡復遺。雖云窮耐久。造物豈汝私。餘日真幾何。得酒且伸眉。

春雨

春陰不肯晴。春雨斷人行。慘澹柴荆色。蕭條雞犬聲。香分豆子粥。美啜芋魁羹。猶勝梁州路。蒙氈夜下程。

春寒

冉冉年華過上元。梅花如雪照江村。雲歸翠竇初收雨。人怕清寒嬾出門。香爐已殘。爐未冷。客談方劇。酒重溫。尙嫌塵境妨幽致。過球船聲暮正喧。糊桑棗去。弊廬里許。

自喜

了了復惺惺。蒼龜未是靈。閑中有富貴。壽外更康寧。身備鄉三老。家傳子一經。春回元不記。出戶四山青。

又

身寄人間世。心常古鏡如。喚醒狂蝶夢。埽盡老狐書。年出鄉閭右。貧過仕宦初。村村是桃李。豈獨愛吾廬。

簡湖中隱者

夫子終年醉不醒。若爲問我故丁寧。書因遣僕馱黃蘗。詩許登山斲茯苓。疇昔但知悲驥老。卽今誰不羨鴻冥。清宵定許敲門否。擬問黃庭兩卷經。

短歌示諸稚

流年去不還。老狀來無那。雖甚顏原貧。尙勝夷齊餓。再歸又六年。疲馬欣解馱。姑幸箠轡空。敢復希豆莖。好山嬾出遊。敗屋得偃臥。飢能儲粟盎。病亦有藥裏。酒蟻盜皤鬢。茗雪落小甌。香火失情偷。編簡謹程課。豈惟洗幻妄。亦以起衰懦。向來名宦事。回首如棄唾。義理開諸孫。閔閔待其大。賢愚未易知。尙冀得一個。如其盡爲農。亦未可弔賀。歸耕豈不佳。努力求寡過。

王子猷謂竹爲此君白樂天謂酒爲此君余野處無客每對竹獨酌得小詩

新種疎篁對小軒。旋沽薄酒實空尊。門無車轍亦何恨。有此兩君堪與言。

會稽行

我欲遊蓬壺。安得身插羽。我欲隱蒿華。歎息非吾土。會稽多名山。開跡自往古。豈惟頌刻秦。乃有廟祀禹。山形舞鸞鳳。泉脈流鍾乳。家家富水竹。處處生蘭杜。方舟泛曹娥。健席拂天姥。朱樓入煙霄。白塔臨雲雨。修梁看龍化。遺箭遣鶴取。茶薺可作經。楊梅亦著譜。湖蓴山蕨輩。一一難遽數。終年遊不厭。冰玉生肺腑。誦詩有樵童。乞字到俚嫗。况復青青衿。盛不減鄒魯。古詩三千篇。安知闕吳楚。土風聊補亡。吾言豈夸誕。

野飲

春雨行路難。春寒客衣薄。客衣薄尙可。泥深畏驢弱。溪橋有孤店。村酒亦可酌。鳧茈小甌炊。丹柿青篾絡。人生憂患窟。駭機日夜作。野飲君勿輕。名宦無此樂。

作野飲詩後一日復作此篇反之

世事如海沙。巧曆不能數。身居憂患中。殆若墮奔虎。又如住敗屋。岌岌日撐拄。中夜風雨至。摧壓固其所。孰能知其然。徒義以爲主。要于一念間。不敢欺仰俯。兢兢日三省。寧可自莽鹵。君看昔先師。乃媿不若禹。

春晴

兩斷雲歸兩作晴。夕陽鼓角動高城。客愁正得酒排去。草色直疑煙染成。鶯爲風和初命友。鷓綠水長欲尋盟。不須苦問春深淺。陌上吹簫已賣餽。

常年春日少春晴。拂面今朝暖吹輕。水閣家家橫小舫。園亭處處聽新鶯。桃花不管詩人老。苜蓿空催野叟耕。自笑此生餘幾許。銅甌荆棘尙關情。

遣興

莫笑龜堂矚魄胸。此中元可貯虛空。尙饒靈運先成佛。那計辛毗不作公。采藥偶逢丹井客。買蓑因過玉霄翁。不須更問歸何許。散髮飄然萬里風。

又

我是仙蓬舊主人。一生常得自由身。退歸自合稱山長。變化猶應侍帝晨。得酒不妨開口笑。學人難作捧心顰。塵中且復隨緣住。又見湖邊草木新。

開歲屢作雨不成正月二十六日夜乃得雨明日行家圃有賦

東風催雨破天慳。行圃歸來剩解顏。百草吹香蝴蝶鬧。一溪漲綠鷺鷥閑。老來每歎論心少。貧甚方知覓醉艱。猶賴籃輿無恙在。呼兒結束入南山。

書屋壁

築室鏡湖濱。于今四十春。放生魚自樂。施食鳥常馴。土潤觀鋤藥。燈清論養真。桃源處處有。不獨武陵人。

又

鳥道經行穩。巢居臥起寬。鹿衣裁短褐。龜屋製危冠。舊幕楹中散。今師靖長官。蛟龍雲雨上。未必勝泥蟠。

與兒孫同舟泛湖至西山旁憩酒家遂遊任氏茅菴而歸

過埭維舟古柳根。卻扶拄杖入煙村。印泥接迹牛牟過。投宿爭林鳥雀喧。酒保殷勤邀滷菘。道翁偃僂出迎門。郊居不與人間事。惟有耕桑得細論。

日暮自大滙村歸

筍輿伊軋暮山昏。水敗陂塘路僅存。出谷鐘聲知過寺。隔林人語喜逢村。廟壩荒寂新犁地。堤草淒迷舊燒痕。兒子念翁霜露冷。遙持炬火出柴門。

八十四吟

八十仍逾四。遲留未告行。筮言災退散。醬賀脈和平。耕牧猶能力。癡頑每自驚。所嗟經學廢。心媿濟南生。

晚步至湖上

柴車無與駕。篷艇亦須人。賴有拄杖子。能扶羸病身。雲山翠屏合。煙月玉鉤新。蕭散湖塘路。微風吹葛巾。

春陰

窗昏不見字。今日罷觀書。迹寄浮生內。心遊曠劫初。太山均蟻垤。聖域亦蓬廬。兀坐還成倦。荒畦去荷鋤。

題野店壁

斷橐投衣囊。殘壺挂馬鞍。寺荒尋店久。橋敗涉溪寒。道里逢人問。題名拂壁看。平生慣行役。隨處得加餐。

題寺壁

菴居渾似罷參僧。除卻癡愁百不能。意倦有時憑曲几。興來隨處曳枯藤。雲山直去寧須伴。薜磴高攀不計層。聞

道鼙鳴天欲雨。松門小住看雲興。

題幽居壁

青山四抱路盤紆。天與先生卜草廬。雲冷數聲聞斷雁。溪清百尺見遊魚。新醪薄薄閑尋醉。殘髮蕭蕭悶憶梳。莫

謂躬耕便無事。百年京洛尙丘墟。

又

聲利場中偶解圍。悠然高枕謝招揮。山前曳杖尋僧去。林下收棊送客歸。城市氛埃那許到。比鄰煙火自相依。纓

冠束帶前身事。散髮今惟勃落衣。

思夔州

老來百念盡消磨。無奈雲安入夢何。壯憶公孫劍器舞。愁思賓客竹枝歌。

又

武侯八陣孫吳法。工部十詩韶護音。遺蹟故祠春草合。略無人解兩公心。

梅開絕晚有感

年年踏雪探梅開。二月今年始見梅。從此逢春心轉嬾。小詩不擬覓花栽。

又

尋梅不負雪中期。醉倒猶須插一枝。莫諱衰遲殺風景。卷中今歲欠梅詩。

園中晚飯示兒子

一飽何心慕萬鍾。小園父子自相從。蚍蜉布陣雨將作。蚊蝶成團春已濃。澗底束薪供晚爨。街頭糴米續晨舂。盤餐莫恨無兼味。自繞荒畦摘芥菘。

自詰

修行力量淺。觸事常寡悰。端居本無事。奈此百憂攻。今晨默自詰。世豈不汝容。漱濯臨清流。歡歌蔭長松。緩步有夷途。遠眺多奇峯。野叟時相尋。村酒亦自釀。于道忽少進。一掃芥蒂胸。轅釜本常情。寧說飯後鐘。

野飲

農事未與思一笑。春薺可采魚可釣。霏霏小雨忽已晴。堤上相攜踏殘照。村場酒薄亦有力。把釀相娛不辭醜。眼花耳熱言語多。霍然已醒如過燒。人生百年會有盡。世事萬變誰能料。酒空人散寂無聲。爲君試作蘇門嘯。

茆亭

讀罷楞伽四卷經。其餘終日坐茆亭。靜聽溪碓春雲母。細斲松根采茯苓。大道粗嘗聞海若。高情未至媿山靈。寒泉新瀌甘于乳。晨起何妨挈半瓶。

身世

身世飄然似斷雲。時人誤許與斯文。旋償碑債動千里。強理詩情無一分。子美舊悲殘酒炙。幼安今老白襦裙。餘生自喜渾無事。清夜銅爐炷寶熏。

家有兩瓢分貯酒。藥出則使一童子負之戲賦五字句

長物消磨盡。猶存兩大瓢。藥能扶困憊。酒可沃枯焦。童負來山店。人看度野橋。畫工殊好事。傳寫入生綃。

禹寺

禹寺荒殘鐘鼓在。我來又見物華新。紹興年上曾題壁。觀者多疑是古人。

旅遊

壯志蹉跎雪滿頭。久將餘日付滄洲。閑雲不入老人夢。鄰笛似知孤客愁。小築聊須傍蘭渚。片帆那復到樟樓。生涯草草真堪笑。三十年來一破裘。

又

本自無心落市朝。不妨隨處狎漁樵。螺青點出暮山色。石綠染成春浦潮。縣驛下時人語鬧。寺樓倚處客魂消。流年不貸君知否。素扇團團又可搖。

貧歎

貧到今年極。蕭然四壁家。弊袍生蟻蝨。粗飯雜泥沙。浩浩乾坤大。茫茫歲月賒。故鄉煙水窟。別擬卜生涯。

東窗

九折危途寸步艱。至今回首尙心寒。元來自有安身處。茆屋三間似海寬。

又

才薄常爲世俗輕。還山力不給躬耕。卽今贏得都無事。袖手東窗聽雨聲。

又

俗事紛紛意不據。兀如頭垢念爬梳。東窗且復焚香坐。閑看微雲自卷舒。

又

寂寂東窗午夢殘。更堪春雨作春寒。蠻童未報煎茶熟。一卷南華枕上看。

近村

家居每思出。出亦無與遊。江山豈不佳。乃復生我愁。不如適近村。家家業農疇。深巷鳴雞犬。長陂下犂牛。棗熟稻當穫。桑落酒可漉。寧無賓祭須。柿栗良易求。醫翁日過門。得藥疾自瘳。婚嫁不出村。百世加綢繆。我來每絕歎。恨

不終歲留。人生正應爾。底事須王侯。

石帆山下作

石帆山下古苔磯。回首人間萬事非。能飲上池何患死。不營尺宅欲安歸。寒龜瑟縮搢牀老。倦鶴翩遷帶箭飛。堪笑年來殊省事。就憑樵女綻春衣。

且起

殘燈冷火待窗明。稍覺今朝病體輕。已賴林鳩知宿雨。更煩簷鵲報新晴。

又

地爐晨起撥寒灰。困睫濛濛尙懶開。正倚蒲團覓殘夢。一聲啼鳥又驚回。

書况

自從請老鏡湖濱。萬事不關林下人。鴉去鴉歸還過日。花開花落又經春。官微也過千重浪。身在依然一幅巾。晨突有煙吾事了。濁醪不復惱比鄰。

閑中戲賦村落景物

遊宦才能薄。還山日月長。買牛捐寶劍。取酒解金章。泉脈疏供啜。松肪煉按方。北窗貪兀傲。南陌喜徜徉。僧過傳著法。醫來寄藥囊。泛舟輕姥廟。策蹇上僉塘。嬾似嵇中散。癡如顧長康。人間須掃迹。隨處是羊腸。姥廟僉塘。皆闕上地名。

又

覆篠初成屋。編荆旋作門。孤雲生釣瀨。微雨過棊軒。柳種來傍縣。族子爲取柳本于餘姚茅氏。花栽乞近村。石欹聊可坐。地褊不成園。酒榼剗楓癭。香爐斷竹根。海鷗呼可下。隴鳥教能言。搏飯迎雙鶴。聯滔繫小猿。山家雖寂寞。隨事有盤飧。

予好把酒常以小戶爲苦戲述

我非惡旨酒。好飲而不能。方其臨觴時。直欲舉斗升。若有物制之。合會已不勝。豈獨觀者笑。心亦甚自憎。正如疾

逆虜。憤切常橫膺。蹭蹬忽衰老。何由效先登。上天無長梯。繫日無長繩。可歎固非一。壯志空飛騰。

春日對花有感

天天枝頭花。鬱鬱地上草。方春萬物遂。我乃獨衰槁。少時喜方藥。晚亦學黃老。又非愛名宦。壯歲迹已掃。如何過八十。尙復未聞道。偃行阡陌間。齒搖而髮縞。名山可巢居。決去恨不早。冥坐精思牀。猶能養梨棗。

出遊遇雨而返

柴門方出雨霏霏。未到湖邊促駕歸。深炷爐香掩屏臥。誰知不爲溼春衣。

又

荒山前頭野水邊。東行西行不自憐。天公豈亦哀老子。風雨留教終日眠。

記閑

白雲堆裏看青山。猿鳥爲鄰日往還。黃綺後身應我是。再來依舊一生閑。

二感

狸奴睡被中。鼠橫若不聞。殘我架上書。禍乃及斯文。乾鵠下屋簷。鳴噪不待晨。但爲得食計。何曾問行人。情得暖而安。飢得飽而刷。汝計則善矣。我憂難具陳。

題柴言山水

陰陰山木合。幽處著柴荆。喧中有靜意。水車終日鳴。春

又

懸水三十仞。疾雷聞數里。正暑凜生秋。倚杖者誰子。夏

又

高秋風雨天。幽居詩酒地。君看此氣象。其可折簡致。秋

又

草亭臨峭絕。霜嶂起嶙峋。危磴儻可上。老夫思卜鄰。冬

草亭獨坐

掃地垂簾坐草亭。東風吹頰醉初醒。睡蛇死後魔無力。疾豎降來藥有靈。在手殘梅香淡泊。傍檐幽鳥語丁寧。老人不是神通妙。世事元來要飽經。

修居室賦詩自警

荒園二三畝。敗屋八九間。初至如逆旅。忽逾四十年。屋日已朽蠹。我老不自還。茅可刈之野。木可伐之山。尙復不能具。日夜憂其顛。况我虛幻身。念念隨化遷。齒墮髮亦縞。鏡中失朱顏。其危甚于屋。何恃能牢堅。豐汝梨與棗。養汝汞與鉛。防疾如待敵。愛氣如守關。謀于履霜初。懼在橫流前。書紳銘席端。雖老尙可全。

遜迹

遜迹荒村慣。忍貧秋毫不使喪。其真家居亦以古爲鑑。事過始知天勝人。臨食致思方下箸。讀書有得每書紳。放翁耄矣當知幸。布褐藜羹畢此身。

春晴登小臺

不管筇枝破綠苔。閑穿萬竹上荒臺。幽花經雨自開落。啼鳥喜晴時去來。河岸家家裝彩舫。兒曹處處唱青梅。誰知老子癡頑甚。看改新元十一回。

魯墟舟中作

春浦南來元不到。畫橈偶復入鷗羣。人家遠火林間見。船底微波枕上聞。山口正衝初出月。渡頭未散欲歸雲。錦囊詩草新寥落。得句猶堪寄一欣。

貧病戲書

得米還憂無束薪。今年真欲甑生塵。椎奴跣婢皆辭去。始覺盧仝未苦貧。

又

頭痛涔涔齒動搖。醫驕折簡不能招。亦知客疾無根柢。少健還能起負樵。

又作二首自解

盡日溪邊艇子斜。治生不種邵平瓜。已分鄰舍紅蓮米。更啜僧房紫筍茶。

又

靈府安平四體和。經時止酒頰常酡。老生要是常談爾。吐納餘閑卽按摩。

挾書一卷至湖上戲作

買地孤村結草廬。蕭然身世落樵漁。一編在手君無怪。曾典蓬山四庫書。

謝客相過

我力日愈衰。人事不敢倡。窮巷春多泥。何以稅客鞅。諸君顧何取。勤懇問亡恙。賦詩代尺書。跂望徒悵悵。

書幸

土盜常餘菜。山庖不絕煙。罷醫翻少疾。無術自長年。小舫煙波宅。閑身陸地仙。東窗最佳處。日對坐忘編。

書歎

髣髴承學紹興前。歷看人間七十年。撲滿終歸棄道側。鴟夷猶得載車邊。釣船夜泛吳江月。醉眼秋看楚澤天。造物未容書鬼錄。殘春又藉落花眠。

古興二首各五韻

草衰何預人。每起徂年悲。日月纔幾何。又見青青時。青青雖滿眼。行矣當復衰。盛衰還無端。其理可前知。人生死則已。千載無還期。

又

月出橫林上。宿鳥無定枝。物生各畏禍。所託輒蹈危。老人倚壁坐。大鼯驚羣兒。雖云差自適。見事亦太遲。猶有一可喜。永謝世俗羈。

病中有述二首各五韻

萬事有常理。中智皆能知。禍福如白黑。不待諏著龜。疾患初萌芽。未有旦夕危。每能自省察。百鬼安能窺。一息生百疾。速死乃自貽。

又
爲國恃久安。變起最莫測。釋楚爲外懼。此實計之得。吾儕學養生。事事當自克。老無聲色娛。戒懼在飲食。要須銘盤盂。下箸如對敵。

黃鴉吟

嗟哉黃鴉一何陋。性喜隱翳藏荒囿。煙深翅重飛不起。鳴聲穀穀知雨候。夜與妖鵲羣。又似惡白晝。羽毛不足辱彈射。滋味不足登俎豆。捕之既無用。鬻之又不售。譬之人以支離而全。木以擁腫而壽。若予者智不能知農圃。學不能舉孝秀。名不諱世。動得嘲詬。是亦天下不材之尤。尙何議乎汝後。

恩封渭南伯唐詩人趙嘏爲渭南尉當時謂之趙渭南後來將以予爲陸渭南平戲作長句

老向人間久倦遊。君恩乞與渭川秋。虛名定作陳驚坐。好句真慚趙倚樓。棧豆十年露病馬。煙波萬里著浮鷗。就封他日輕裘去。應過三峯處處留。

幽居

宿志在人外。清心遊物初。猶輕天上福。那習世間書。薺菜挑供甗。槐芽采作菹。朝晡兩摩腹。未可笑幽居。

肩輿至湖桑埭

籃輿隨意出衡門。日已沉山野未昏。小市叢祠湖上路。短垣高柳埭西村。麥苗極目無閑土。塘水平堤失舊痕。明詔裕民聞屢下。老農何以報君恩。

半俸自戊辰二月置不復言作絕句

力請還山又幾年。何功月費水衡錢。君恩深厚猶慚懼。敢向他人更乞憐。

又

俸券新同廢紙收。迎賓僅有一絕裘。日鋤幽圃君無笑。猶勝牆東學儉牛。

頭風戲作

出門處處皆桃李。我獨呻吟一室中。只道有詩敲瘧鬼。誰知無檄愈頭風。

茅齋

茆齋雖絕小。老子策新勛。墮落霏霏雪。爐生裊裊雲。心將鷗共遠。巢與鶴中分。幾許人間事。吾廬寂不聞。

耕桑

老病雖俱至。耕桑亦未遲。兒童誇犢健。婦女閔蠶飢。月落鼻鳴夜。燈殘鼠齧時。但當尋熟睡。萬事不須思。

春遊

方舟衝破湖波綠。聯騎躡殘花徑紅。七十年間人換盡。放翁依舊醉春風。予年十四。始到禹祠龍瑞。今七十一年矣。

又

熟食從來少天色。東吳況是足春寒。城南藉草可痛飲。安得酒腸如海寬。

又

蘭亭路上換春衣。梅市橋邊送夕暉。聞有水仙翁是否。輕舟如葉槩如飛。

又

沈家園裏花如錦。半是當年識放翁。也信笑人終作土。不堪幽夢大匆匆。

蔬飯

春事已闌珊。山村未褪寒。荀生初入饌。薺老尙登槃。僧飯時分鉢。園蔬不仰官。枯腸更禁攪。姑置密雲團。

海棠歌

我初入蜀鬢未霜。南充樊亭看海棠。當時已謂目未覩。豈知更有碧雞坊。碧雞海棠天下絕。枝枝似染猩猩血。蜀姬豔粧肯讓人。花前頓覺無顏色。扁舟東下八千里。桃李真成僕奴爾。若使海棠根可移。揚州芍藥應羞死。風雨春殘杜鵑哭。夜夜寒衾夢還蜀。何從乞得不死方。更看千年未爲足。

園中作

湖曲舊誅茆。松陰近結巢。安閑多熟睡。衰退少新交。雨漬丁香結。春生豆蔻梢。良辰不把酒。新燕解相嘲。

書意

整書拂几當閑嬉。時取曾孫竹馬騎。故故小勞君會否。戶樞流水卽吾師。

又

人生祇要常無事。忿欲紛紛喜見侵。贈子祕傳安樂法。秋毫莫遣動吾心。

又

籬角緋桃落漸稀。晚風吹去點苔磯。揮金豈必如陳傅。二畝春秧也是歸。

晚春

世事紛紛不足論。流年去似海濤翻。莫因齒髮悲殘景。且喜柴荆是故園。千里桑麻無曠土。數家雞犬自成村。鄰翁過我誇秧信。雨後春泥一尺渾。

又

莫笑花前醉墮巾。放翁又看一年春。尋巢燕熟頻穿戶。釀蜜蜂喧不避人。楚廟羔豚初散社。稽山筍蕨正嘗新。要知不負年光處。南陌東阡自在身。

卷七十六

湖上

綸巾羽扇影翩翩。湖上徜徉莫計年。桃李已忘疇昔分。禽魚猶結後來緣。山前墟市初多筍。江外人家不禁煙。莫恨幽情無與共。一雙白鷺導吾前。

卽事

成敗歸青史。悲離付浩歌。病從今歲減。詩比去年多。高枕觀浮世。持盃養太和。功名亦易爾。難負此漁蓑。

東籬雜書

芳草初侵路。青梅已破枝。雨來鳩逐婦。日出雉求雌。莽莽江湖遠。悠悠歲月移。老人觀物化。隱几獨多時。

又

桃李成塵土。來禽始著花。病夫猶枕上。春事又天涯。巷陌鞦韆夢。簾櫳燕子家。野僧來問訊。強把半甌茶。

又

老厭人間事。閑知造物功。草生三徑綠。花發一窗紅。幽境蠶塵外。流年嘯傲中。所嗟儕輩盡。論舊只春風。

又

身與春俱老。愁隨日漸長。簾櫳聽語燕。澗谷擷幽芳。酒榼常從後。詩囊亦在傍。閑行無定處。隨意據胡牀。

山行

山鳥啼孤戍。煙蕪入廢亭。隄成陂水白。雨細稻秧青。草市少行旅。叢祠多乞靈。最憐投宿處。微火暮晶熒。

稻陂

白水滿稻陂。投種未三宿。新秧出水面。已作纖纖綠。年來殘俸絕。所望在一熟。見之喜欲舞。不復憂半菽。想當西

成時。載重壓車軸。病齒幸已牢。往矣分社肉。

兩夜思子虞

兀兀過遙夜。悠悠擁破衾。峭寒侵病骨。殘雨滴愁心。人別易千里。書來真萬金。醉眠差似可。誰與伴孤斟。

醉中示客

四座無誰聽我歌。百年生計一煙蓑。清尊激激猶狂在。白髮蕭蕭奈老何。遠適安能縮地脈。高眠聊足養天和。吾

徒看盡人間事。莫愛車前印幾窠。

散髮

散髮垂肩嬾更簪。一窗竹水對蕭森。從來恥作資身策。老去終懷報國心。雷起鼻端秋枕石。泉鳴指下夜橫琴。不

緣羸病愁迎客。經歲何人肯見臨。

病中觀辛夷花

餘生垂九十。一病理一衰。旬月不自保。敢作期歲期。粲粲女郎花。忽滿庭前枝。繁華雖少減。高雅亦足奇。持盃酌

花前事亦未可知。明年儻未死。一笑當解頤。

小艇

放翁小艇輕如葉。只載蓑衣不載家。清曉長歌何處去。武陵溪上看桃花。

雜題

賀公在朝雅吳語。莊鳥仕楚猶越吟。我幸歸休在閭巷。燈前感慨不須深。

又

茆屋三間已太奢。柴乾米白喜無涯。非賢敢竊優賢祿。願折蓴絲與蕨芽。牛俸自春初不復敢請。

又

野花紅碧自爭春。村酒酸甜也醉人。解放船頭便千里。不愁無處著閑身。

又

湖隄疎瘦水楊柳。村舍殷紅山石榴。推戶本來隨意入。乞漿因得片時留。

閑遊

柴車去去度橫陂。正是春殘入夏時。果熟多藏新密葉。鶯啼偏占最高枝。迷途每就傭耕問。薄飯時從逆旅炊。隨

意題詩無傑思。還家猶足詫吾兒。

病起初夏

頭風間作已全輕。山雨雖頻卻快晴。窗外時時度花片。林梢處處送鶯聲。地偏無客談閑事。麥熟逢人樂太平。不

爲衰遲辜節物。一甌半酪薦朱櫻。

衡門獨立

春歸堪笑又忽忽。水白秧青細雨濛。溪鳥低飛畫橋外。路人相值綠陰中。宋清藥券貧來積。李賀詩囊病後空。惟

有劇談能一洗。芳尊那得故人同。

兩夜

吳中地多雨。海角客常愁。羸疾須醫藥。殘年憶輩流。解裝孤驛晚。捩柁小江秋。莫起瀟湘興。無才賦遠遊。

山麓

草合路如線。偶隨樵子行。林間遇磐石。小憩看春耕。

北齋

質衣葺北齋。欹壞略撐拄。窗扉則虛名。聊足度寒暑。獨學無與論。推覈實勞苦。審觀古人意。十亦得四五。無功與子光。相可豈待語。一床寬有餘。高臥聽簷雨。

禽言

架犁架犁。南村北村。雨凄凄。夜起飯牛雞未啼。日暮矻矻行千畦。沒足勿恨一尺泥。西成收薄汝噬臍。架犁。

又

拔筍拔筍。入簞不辭風雨窘。養成會見高拂雲。取供口腹初不忍。獨持兩把慰倚門。慈顏一笑如春溫。拔筍。

又

老翁老尚健。打麥持作飯。終歲隴畝間。勞苦孰敢怨。人生爲農最可願。得飽正如持左券。碓舂樵爨小甌香。豈不勝汝耗太倉。打麥作飯。

又

堂前捉續子。力作忘朝餐。鵝黃雪白相照耀。插茅作簇高如山。蠶女採桑至煮繭。何暇膏沐梳髻鬢。繅成蜀錦與楚縠。舞妹纏頭不論束。堂前捉續子。

道院偶述

景德祥符草野臣。登封曾望屬車塵。已經成住壞空劫。猶是東西南北人。

又

憶在青城煉大丹。丹成垂欲上仙班。飄零未忍塵中老。猶待時平隱華山。

初夏書感

春與人俱老。花隨夢已空。遊蜂黏落蕊。輕燕接飛蟲。恁知蠶起性。肥賽麥豐爲。農當自力相戒勿。忽忽

贈邢芻甫

割愁何處有井刀。傾座誰能奪錦袍。堪笑陸翁鄰鬼錄。尙推邢友擅人豪。杜門雖少客載酒。落筆已能奴命騷。安得相從北窗下。巧君牘馥與殘膏。

昔從戎南鄭日。范西叔爲予書小臥屏。今三十有八年矣。悵然有懷。

梁州風月今何在。每憶朋儔淚滅裾。戎幙已如它世事。素屏猶對故人書。

小雨

川雲疊疊密如鱗。山雨霏霏細似塵。未必便爲耕隴喜。天公分付與詩人。

遣懷

出澤荒寒外。門庭寂寞中。厭聞鳩喚雨。常羨鳴知風。逆境嗟行徧。閑愁幸埽空。今晨有奇事。簫鼓賽年豐。

又

風月竄吟嘯。漁樵約往還。貧猶能釀酒。病不廢遊山。亂石臥牛馬。流泉鳴珮環。豁除羈旅日。猶有半生閑。

初夏喜事

箕穎元非爭奪場。瀟湘自古水雲鄉。采茶歌裏春光老。煮繭香中夏景長。斂版早知遊宦惡。罽門晚悟世情常。茹芝卻粒雖無術。散髮猶當效楚狂。

夢蜀

自計前生定蜀人。錦官來往九經春。堆盤丙穴魚腴美。下箸峨眉枳脯珍。聯騎雋遊非復昔。數編殘藁尙如新。最憐栩栩西窗夢。路入青衣不問津。

閑遊

一見溪山病眼開。青鞵處處躡蒼苔。平生長物埽除盡。猶帶筆牀茶竈來。

又

好事湖邊賣酒家。杖頭錢盡慣曾賒。壚邊爛醉眠經日。開過紅薇一架花。

初夏

牀有蒲團坐負牆。室無童子自燒香。人圖作佛雖堪笑。我愛逃禪亦太狂。櫻筍久忘晨入省。蓴鱸猶喜老還鄉。汗青未絕茶經筆。那暇投文弔戰場。

又

梅子生仁已帶酸。棟花墮地尙微寒。室無長物惟空榻。頭不加巾但小冠。蠶簇倚牆絲盡起。稻秧經雨水陂寬。郊原清潤身差健。剩欲閑遊一跨鞍。

野興

東望城闌十里遙。野人生計日蕭條。棋枰棄置機心息。肉食蠲除業境消。送藥時時過鄰父。放魚日日度溪橋。自憐愛物還成癖。門巷春來草沒腰。

又

涉澗穿林信意行。翠崖朱棧愜幽情。關關幽鳥將雜語。簌簌幽篁解籟聲。藉草一壺消永日。出門幾屐了平生。川雲正作遮山計。浩蕩南風又快晴。

自笑

宦途昔日伏轅駒。退處今如縱壑魚。手自埽除松菊徑。身常枕藉老莊書。郊居本自依農圃。社飲何妨逐里閭。白髮蕭然還自笑。風流猶見過江初。

喜晴

正厭鳩呼雨。俄聞鵲噪晴。路開知潦退。書展喜窗明。日透疎簾影。風傳暮角聲。兒童競相報。門有賣朱櫻。

過鄰曲

黃雲卷盡綠針齊。夏木陰陰滿古隄。耆老往來無負戴。比鄰問道有提攜。暑天漸近便餐酪。吳俗相傳尙繪蠶。共喜豐年多樂事。扶歸先判醉如泥。

題蘇處叟巖壑隱居

蘇子飄然古勝流。平生高興在滄洲。千巖萬壑舊卜築。一馬二僮時出遊。香斷鐘殘僧閣晚。鯨吞鼉作海山秋。極知處處多奇語。肯草吳牋寄我不。

縱筆

騎鶴翩翩過月傍。浩然風露九秋涼。忽聞捲地潮聲起。始覺江山近故鄉。

又

百尺松根結茯苓。千年長養似人形。誰知金鼎烹初熟。恰值山翁醉欲醒。

北窗卽事

衡茅隨力葺幽居。埽地焚香樂有餘。分食時能下檐鵲。作州常悔誑池魚。遊歸又失相尋客。睡起重開未了書。袖手悠然便終日。不辭世俗笑迂疎。

又

北窗最與嬾相宜。世上紛紛了不知。露井甘寒初浚後。小山葱蒨乍晴時。粗餐豈復須鮭菜。蓬戶何曾設屐屨。幸有牀頭藤杖在。登臨未遽歎吾衰。

感物

提壺勸客飲。架犂課農耕。鳩方喜婦還。蟻又以族行。大化職兩場。我窗更晦明。芸芸觀萬物。一笑了此生。

園中把酒示鄰曲

畏途半世困風波。老返家山得已多。野餉雖無食指動。村醪也解醉顏酡。夢殘正欲還君枕。棋罷那知爛客柯。松菊未荒風月在。應容老子且婆娑。

又

煮豆烹蔬當果殺。固應盃酌盡陶匏。池塘嫩嫩荷浮葉。門巷陰陰筍放梢。三畝荒園存故業。一編蠹簡得深交。弊廬經雨穿將徧。欲向村東自割茅。

書憂

時人應怪我何求。白盡從來未白頭。磅礴崑崙三萬里。不知何地可埋憂。

門外獨立

朝看出市暮看歸。數盡行人尙倚扉。要見先生無盡興。少須高樹挂殘暉。

感事六言

老去轉無飽計。醉來暫豁憂端。雙鬢多年作雪。寸心至死如丹。

又

黑犢養來純白。睡蛇死後安眠。但有燒籬可賣。不妨到處隨緣。

又

五尺童知大義。三家市有公言。但使一眠得熟。自餘萬事寧論。

又

麥熟與人同喜。虜驕爲國私憂。身似五更春夢。家如一宿山郵。

又

早歲已歸南陌。暮年常在東籬。短衣幸能掩脛。長劍何須拄頤。

又

高岸眼看爲谷。寸根手種成陰。一卷楚騷細讀。數行晉帖閑臨。

又

李白嶽崎歷落。嵇康潦倒粗疎。生世當行所樂。巢山喜遂吾初。

又

有飯那思肉味。安居敢厭茅茨。未論顏淵陋巷。老農自是吾師。

幽居記今昔事十首以詩書從宿好林園無俗情爲韻

總角入家塾。學經至幽詩。治道本耕桑。此理在不疑。今茲垂九十。謝事居海涯。戴星理農業。未歎筋力衰。四月築麥場。五月漙稻陂。秉火去螟蝗。磨刀剪棘茨。西成大作社。歌鼓樂聖時。

又

上世本爲農。輟耕業詩書。我少學不成。固應返其初。冥冥不自揣。鄉校參羣居。中歲偶拔擢。清班久趨趨。典奏入南宮。細書長石渠。及其乞身歸。舊業已丘墟。衰疾或小間。力尙給荷鋤。寄聲謝故人。毋爲笑迂踈。

又

我昔揮短楫。終年釣吳松。亦嘗攜長鑱。采藥玉霄峯。爲計晚大繆。朝路偶見容。晨趨大明班。夜聽長樂鐘。白髮迫歸休。居然鮮歡悰。上恩許乞骸。一日收孤蹤。蓬茅略補葺。甑碓勤炊春。故交零落盡。歲晚當誰從。

又

還鄉老未死。舉目少耆宿。邑屋亦或非。所餘但喬木。曩時列鼎家。今不飽半菽。盛衰迭變遷。何者非陵谷。羸然九十翁。世故見已熟。偶能達一理。萬事等破竹。布縫一稱衣。藜煮半釜粥。餘年更何爲。枕藉糟與麴。

又

癸亥辭脩門。拜賜散人號。一出非本心。歡喜歸祭竈。故鄉多名山。幸得遂所好。舟輿雖難具。信步亦可到。清溪無塵滓。奇峯有雲冒。雨墊林宗巾。風落孟嘉帽。豈惟狂故在。望遠亦未耗。一醉儻可謀。敢愛將軍告。

又

入蜀過匡廬。秋風宿東林。月出斷山口。滿窗松竹陰。裊裊一枝燭。道人語夜深。亦設甃果供。慰此羈旅心。猶恨非遠公。無酒遣我斟。明日下山去。歎息難重尋。回首四十年。駒隙何駸駸。舊遊不可到。悵望空長吟。

又

昔戍西陲時。憑高望中原。願欲乘天風。往弔綺與園。有志莫能遂。悵望商山魂。遙想山中人。歲時奠芳蓀。夕陽蕭鼓散。高柳擁廟門。老來更事多。考古見本根。乃知當時事。禍福未易言。千載信悠悠。浩歎掩綠尊。

又

客舟挂煙帆。千里過楚都。七澤渺無際。大不數具區。浪翻出長蛟。雲拆浮天吳。峩峩來如山。碎船不須臾。江行幸已盡。三峽尤畏途。槎牙人鯨鯨。小失卽見屠。叩頭禱鬼神。已脫猶號呼。願君勤自勵。憂患何時無。

又

昔自京口歸。卜居得剡曲。地偏無市人。民淳有古俗。陋屋僅結茆。粗飯財脫粟。典衣以沽酒。九月未能贖。寧負翁子薪。恥售卞和玉。老身已如此。兒子亦碌碌。藏書幸無恙。自計不啻足。拾穗且浩歌。行矣墮鬼錄。

又

少小喜讀書。終夜守短檠。其實無甚解。不幸誤有聲。勞苦亦何得。空失東臯耕。暮年乃小黠。告歸學養生。采藥作遠遊。把釣適幽情。高樓笛數曲。小軒棋一枰。餘年置勿憂。不卿何由烹。

喜雨

入夏久不雨。旱勢已岌岌。蛙蛤徒自喧。蛟龍臥如蟄。何由白水滿。但守青秧粒。上天忽悔禍。川雲起呼吸。虛簷雨競瀉。平野苗盡立。兒停躡轉車。婦免憂谷汲。人言雨非雨。乃是傾玉粒。移牀亦細事。敢歎屋漏溼。

初夏雜興

老子今朝不用扶。雨涼百病一時蘇。扇題杜牧故園賦。屏對王維初雪圖。把釣溪頭躡湍瀨。煎茶林下置風爐。箇中莫謂無同賞。逋客能從折簡呼。

又

巾脫冠欹入尺牀。竹陰槐影有餘涼。隨風花墮殘棋上。引睡書拋捲枕傍。水長沙鷗向人熟。雨餘巢燕哺雛忙。尙嫌未愜幽情在。又喚漁舟渡野塘。

又

自斷殘年莫問天。吾儕何處不隨緣。家貧卻得身差健。夜短何妨晝熟眠。未歷名山采靈藥。且從同社樂豐年。賣絲糶麥償逋負。猶有餘錢買釣船。

又

繆算狂言悔莫追。杜門省事不妨奇。欵傾淡墨詩成後。縹緲烏巾浴出時。筇杖閑行穿密篠。繩牀移坐照清漪。眼邊好景真須惜。漸近浮生結局時。

又

趁雨東園去。荷鉏歸巷。卻展讀殘書。幸能胸著雲夢澤。何恨家無擔石儲。水泛時須借篷艇。山行亦或命巾車。嬾心惟怕遊城市。非向交親故作疎。

又

終日頽然蠹簡中。門前煙水浩無窮。百年等是一枯塚。四海應無兩放翁。粟玉長枝挑苦筍。胭脂小把翳防風。地偏日永閑無事。擬著珍蔬譜一通。

對酒作

飲酒豪如卷白波。遣愁難似塞黃河。多聞只解爲身累。後死空令見事多。未試神仙餐玉法。且賡壯士入關歌。此心不道無人識。雪鬢蕭蕭奈老何。

獨坐閑詠

書生亦有功名願。與世無緣每背馳。一寸丹心空許國。滿頭白髮卻緣詩。

又

深掩柴荆謝世紛。南山時看起孤雲。殘年所幸身猶健。閑事惟求耳不聞。

水亭

水亭不受俗塵侵。葛帳筠牀弄素琴。一片風光誰畫得。紅蜻蜓點綠荷心。

又

莫道山翁老病侵。靜中理得舊傳琴。朝來有喜君知否。兩展芭蕉二尺心。

書興

占得溪山卜數椽。飽經世故氣猶全。入門明月真堪友。滿榻清風不用錢。便死也勝千百輩。少留更過二三年。懶

橋酒笑能來醉。一棹何妨作水仙。

書感

翟公冷落客散去。蕭尹譴死人所憐。輸與桐君山下叟。一生散髮醉江天。

又

驅山不障東逝波。一尊莫惜醉顏酡。斜風細雨茗溪路。我是後身張志和。

暑雨

欲雨未雨雷車奔。欲睡不睡人思昏。蠻童正報煮茶熟。忽有野僧來叩門。

又

草茂水長蛙羣鳴。涯深路壞人斷行。故侯老退守瓜壟。翠蔓黃花偏眼明。

池亭夏晝

造物寧非念老生。池亭幽事悉施行。羣魚聚散忽無迹。孤蝶去來如有情。小磴落茶紛雪片。寒泉得火作松聲。曲肱假寐脩然寤。不爲敲門夢不成。

又

茅舍蘆藩枕小灘。蕭森那復畏炎官。醉牀酒解香初過。嬾架書橫夢未殘。簾愛流匙菰米滑。渴便滿杓粟漿酸。兒孫幸有團樂樂。未覺浮生一笑難。

頃歲從南鄭屢往來與鳳間暇日追懷舊遊有賦

昔戍蠶叢北。頻行鳳集南。烽傳戎壘密。驛遠客程貪。春盡花猶坼。雲低雨半含。種畬多菽粟。藝木雜松栝。婦汲惟陶器。民居半草菴。風煙迷棧閣。雷霆起湫潭。城郭秦風近。村墟蜀語參。快心逢曠野。刮目望浮嵐。考古時興感。無詩日每慙。嘉陵最堪憶。迎馬柳摻摻。

埽除小園未竟歸臥

竹葉埽仍落。莎根鋤更生。陰陽常代謝。今昔各施行。勛業須時至。衰榮忌力爭。徑歸差省事。高枕聽蟬聲。

暑中北窗畫臥有作

禦疾如治河。但當導之東。下流既有歸。自然行地中。養生如藝木。培植要得宜。常使無天傷。我自千雲時。我少本多疾。屢亦頻危殆。皇天實相之。警告意有在。中年棄嗜慾。晚歲節飲食。中堅却外慕。魔盛有定力。死生雖天命。人事常相參。茫茫九衢中。百禍起一貪。郊虛暑雨餘。巾墮脚不襪。高臥北窗涼。超然寄疎豁。

羈懷

羈懷不復耐悲歡。清鏡朝朝雪鬢繁。謝傅長逢親友別。龐公思遺子孫安。殘骸累歲歸民伍。半俸今春上縣官。閉戶惟須學堅坐。不知更敗幾蒲團。

自貽

寒暑衣一稱。朝晡飯數匙。錢能稱撲滿。酒不負鴟夷。

又

家風本韋布。生事但漁樵。慣就下鄉食。莫煩東閣招。

又

癡孫護雀雛。饑僕放池魚。懷藥問鄰疾。典衣收舊書。

又

退士憤驕虜。閑人憂旱年。耄期身未病。貧困氣猶全。

卷七十七

得雨露足遂有豐年意欣然口占

人事銷沉渺茫中。此身元合付天公。儒生可逐惟求忘。社酒常辭不怕釁。鬱鬱稻苗欣出穗。汪汪陂水告成功。老民莫道渾無用。能爲明時祝歲豐。

浴罷閑步門外而歸

兩扇荆扉數掩籬。幽人浴罷得娛嬉。南臨大澤風來遠。東限連山月出遲。沙上無泥藤屨健。水邊弄影葛巾欹。徑歸卻就東窗臥。要及蟬聲未歇時。

初晴

暑雨初收體爲輕。遠山盡出眼偏明。詩憑寫興忘工拙。酒取澆愁任濁清。綠樹有陰休倦步。澄溪無滓濯塵纓。老人本少凋年感。不奈江城暮角聲。

枕上

青絲玉井甕轆聲。露葉風枝鶉鴉鳴。造物未容閑到死。又從枕上得詩情。

又

冥冥梅雨暗江天。汗浹衣裳失夜眠。商略明朝當少霽。南簷風珮已鏘然。都下新作藥玉。風響如古玉珮。珮瑯悉備。

讀史

馬周浪迹新豐市。阮籍與懷廣武城。用捨雖殊才氣似。不妨也是一書生。

今歲六月望後一日立秋故比常年涼意差早

九衢車馬困炎曦。正是山中散髮時。秋近梧桐已搖落。陰生蟋蟀最先知。稻陂水白寧憂旱。竈突煙青幸續炊。誰謂吾廬太岑寂。茶瓜亦有野人期。

異夢

山中有異夢。重鎧奮雕戈。敷水西通渭。潼關北控河。淒涼鳴趙瑟。慷慨和燕歌。此事終當在。無如老死何。

貧病

貧至今年劇。真無地置錐。判愁停黃酒。忍病罷迎醫。性懶非關老。天窮豈坐詩。秋風還欲到。便可數期頤。

涉溪

揮汗欲成雨。聚蟲真若雷。山翁在何許。赤脚步溪來。

卽事

身向人閒闕事多。杜門聊得養天和。盛衰莫問蕭京兆。壯老空悲馬伏波。日暮城樓傳戍角。風生嶺路下樵歌。君知此段神通否。豎拂能降百萬魔。

又

唐虞千載仰巍巍。太息儒生每背馳。經未盡亡君更考。古無不死我何悲。釣耕本是求賢地。宵旰今逢願治時。寄謝公卿各努力。爲吾君築太平基。

又

我愛湖山清絕地。抱琴攜鶴住茆堂。藥苗自采盤蔬美。菰米新春鉢飯香。南浦風煙無限好。北軒雷雨不勝涼。舊交散落無消息。借問黃塵有底忙。

又

放翁老去未忘情。鏡裏森然白髮生。一片常秋見花落。三聲最怕聽猿鳴。年年雙隻路傍堦。夜夜短長城上更。晚悟一條差似可。孤舟漁火看潮平。

野性

野性從來與世疎。俗塵自不到吾廬。醉中往往得新句。夢裏時時見異書。稚子那偷服藥酒。家僮尙護放生魚。今朝更有欣然處。引得清泉灌晚蔬。

閑行

出戶莽悠悠。東西本不謀。阻溪因小涉。逢店得中休。鳥沒千山暝。蟬吟一院秋。詩成還自笑。信筆媿冥搜。

伏中熱不可過中夜起坐作詩寄五郎

衆星若銀礫。老桂臥海底。中夜熱不解。病叟推枕起。悲蟲號草根。孤螢照野水。樹頭風急生。喘汗真一洗。追憶纔角初。學古頗自喜。祝身願耆老。常恐抱志死。豈知才術疎。空自凋髮齒。功名永無期。祿不飽妻子。歸耕力又憊。得粟半糠粃。詩書不可賴。如倚折足几。大兒逾六十。逐食走千里。路途况艱梗。累月書一紙。豈不念歸省。屢請輒見

柅。幸吾未極衰。汝行姑少止。

暑中自遣

名山處處得幽尋。破硯時時出苦吟。上藥和平無近效。古詩簡淡有遺音。蘇門隱去聞孤嘯。栗里歸來弄素琴。尙恐俗塵除未盡。每思雪夜宿東林。

夜坐中庭

蕭散坐中庭。三更月未生。朔風涼醉頰。汲井濯塵纓。草露沾衣冷。天河隔樹明。裴回不能睡。鼓角下高城。

夜坐門外示子遯

秋意遽如許。體中殊未佳。灘深無宿鷺。草茂有鳴蛙。棲遯從吾好。吟哦與汝偕。雲門漸可到。剩判幾青鞋。

夜坐小飲

零落槐花已滿溝。江湖又見一番秋。冰輪有轍凌空上。銀漢無聲接地流。丹荔甘寒勞遠致。玉醅醇冽喜新篘。移牀坐對西南電。好雨心知不待求。

閑思

畢世爲農不復疑。還東大見歲陰移。閉門旋了和詩債。賣藥不償沽酒資。意倦投牀效龜息。齒疎嚼飯類牛呎。兀然過日君無怪。一念功名恐過悲。

書村店壁

裹茶來就店家煎。手解驢鞍古柳邊。寺閣重重出山崦。漁舟兩兩破溪煙。近秋漸動尋幽興。絕俸難營覓醉錢。到處不妨閑著句。他年好事或能傳。

幽居

毒暑流金石。吾廬乃爾幽。松棚香帶露。竹簟冷生秋。盪漿蘋花浦。垂竿杜若洲。非關遺世事。聊以解吾愁。

立秋前九日大雨涼甚

天暑正三伏。雨來俄九秋。寒聲入簷戶。爽氣襲巾褸。山色凝深黛。溪流戰怒虬。身輕更何苦。處處可閑遊。

又
兩暗初疑暮。雲開已變秋。有風生枕簟。無汗漬衣襟。漉酒嘗浮蠹。題詩走黑虬。呼兒治書笈。吾欲剡中遊。

寄太湖隱者

青松伐作薪。白玉碎作塵。雖云質已毀。見者猶悲辛。磊砢任棟梁。溫潤中琮璧。豈以捐空山。遂比凡木石。鄴生吏高陽。馬周客新豐。從來豪傑士。大指亦略同。具區古大澤。煙水渺千里。可望不可到。中有隱君子。圖書兼河雒。成毀窮乾坤。有時跨蛟鯨。指撝雷雨奔。嗟我獨何人。乃許望顏色。逝將從之遊。變化那得測。

讀史

又
緇帙牙籤滿架書。流泉泱泱竹疎疎。人生得志寧無命。一室何妨且埽除。

又
王侯到底是虛名。何物能爲我重輕。徒步出關胡不可。向來常笑棄繻生。

又
男子胸中正要奇。立談能立大平基。君王玉鉞無窮恨。千載茫茫誰復知。

又
自古功名亦偶諧。胸中要使浩無涯。可憐赫赫丹陽尹。數顆檳榔尙繫懷。

病戒

憂身如憂國。畏病如畏亂。此身雖幸健。敢作無事看。禍福在呼吸。恐懼兼寢飯。人所忽不省。我思嘗熟爛。夜臥不安席。晨起寧待旦。雖云親藥石。得失每參半。人情喜一快。往往觸剽悍。收功寧使遲。覆敗不可玩。

夏夜納涼

河漢微茫月漸低。風聲正在草堂西。莎根唧唧蟲相弔。木末翻翻鵲未栖。屯甲近聞如積水。聞淮壩近募雄淮軍。數萬守關不假用丸泥。孤臣報國嗟無地。只有東臯更飽犂。

銘座

身退仍懷退。心平更欲平。直嫌繩尙曲。重覺鼎猶輕。力學能除翳。深居可息黥。聖門初豈遠。妙處在躬行。

獨坐絕句二首

蛙鳴乃是怒。鵬嘯固非妖。獨宿空山夜。何妨伴寂寥。
輕雷不成雨。闕月卻穿雲。獨倚南齋柱。長吟到夜分。

初秋驟涼

我比嚴光勝一籌。不教俗眼識羊裘。滄波萬頃江湖晚。漁唱一聲天地秋。飲酒何嘗能作病。登樓是處可消憂。名山海內知何限。準擬從今更爛遊。

新涼

家住山陰剡曲傍。一番風雨送新涼。亦知病得清秋健。無奈愁隨獨夜長。日落川原橫慘淡。月明洲渚遠蒼茫。老民無復憂時意。齒豁頭童只自傷。

書幸

才薄無能役。窮途不意全。得書娛晚暮。遇藥起沉綿。漂母能分食。偷兒肯恕甄。不知從此去。更度幾流年。

獨遊

地僻少人迹。身閑思獨遊。荒村更阻雨。衰鬢不禁秋。斷續呼牛笛。橫斜放鴨舟。殘年澹無事。隨處送悠悠。

記夢

夢遊異境不可識。翠壁蒼崖立千尺。樓臺縹渺出其上。揮手直登無羽翼。門楣扁榜作八分。奇勁非復人間迹。主人鹿弁紫綺裘。相見歡如有疇昔。探懷示我數紙書。妙句玄言皆造極。我即鈔之雜行草。主人灑恍如甚惜。夢中亦復知是夢。意恐覺時無處覓。自量強記可不忘。雞唱夢回空歎息。

初秋自述

平生偶有愛山僻。垂老常無沽酒資。破屋頽垣吾已矣。大冠長劍汝爲誰。郵亭歷歷關河遠。鬢髮蕭蕭歲月移。殘暑不禁隨手過。東籬又近菊花時。

秋暑夜起追涼

漱罷寒泉弄月明。浩然風露欲三更。曲闌干畔踟躕久。靜聽空廊絡緯聲。

又

道士磯邊浪蹴天。耶官湖上月侵船。暮年自度無因到。且與沙鷗作後緣。

小築

小築並湖隄。茅茨不厭低。引泉澆藥圃。斫竹樹雞棲。夕靄山常淡。秋蕪路欲迷。平生草玄手。老去學鉅犂。

喜雨

黑雲橫絕天漢津。父老僉言候當雨。未論秋稼縣千里。且喜滂沱洗殘暑。我起呼兒扶再拜。汗垢得涼真一快。桔槔抱甕兩置之。日日齋盂飽菘芥。

又

雨聲蕭蕭集庭樹。雨氣森森入窗戶。玉川茆屋久不葺。破漏無復施牀處。我於萬事本悠悠。危坐讀書忘百憂。明朝秋水增三尺。且復沙邊弄釣舟。

秋夜

大枕空牀夢不成。草堂悄悄四無聲。月明漸見天窗白。風起忽聞簷珮鳴。客子未忘悲故里。老人無念到浮名。江村歲歲先涼冷。且復尋盟向短檠。

白鷗

平生崖異每自笑。一接俗人三袂除。惟有白鷗真我客。爾來底事向人疎。

靜室

靜室牀橫一素琴。爾來殊覺道根深。喚回倦枕功名夢。洗盡浮生幻妄心。兩屨雲煙遊少室。一窗風雪宿東林。細思卻是關身事。無奈殘年老病侵。

秋興

秋眠怯簟冷。晨飯喜蔬香。寧使衣百結。肯儲錢一囊。杜門雖局促。負氣尚軒昂。死去真無憾。曾孫似我長。

欲兩

徒穴中庭蟻。爭窠後圃鳩。物情猶慮患。人事得忘憂。

又

荷鍤決新渠。芟茅補舊廬。共知秋必雨。有備即安居。

雜感十首以野曠沙岸淨天高秋月明爲韻

呂釣渭水濱。說築傅巖野。雖曰古盛時。得士蓋亦寡。天將啓治亂。人才有用舍。向非萬牛力。孰與成大廈。

又

洙泗日已遠。儒術日已喪。學者稱孔墨。爲國雜伯王。書生幸有聞。力薄不能倡。默默世俗間。汝職無乃曠。

又

我昔下三峽。百丈堆兩車。初發公安城。已過長風沙。早知世路惡。恨不常浮家。至今清夜夢。雙鬢聞謳啞。

又

斗杓運四序。寒暑忽已換。人生知幾何。去日難把玩。憑高望煙海。青山忽中斷。秋風肺病蘇。爲子巾一岸。

又

磨鏡要使明。拭几要使淨。奈何視吾心。不若几與鏡。垢汙倘未除。秋毫卽爲病。吾曹亦聖徒。可卽學顏孟。

又

天人本一理。禍福常昭然。人衆何足恃。妄謂能勝天。適燕當北轅。調瑟當解絃。五行未可忽。洪範禹所傳。

又

鏡湖一何清。稽山一何高。浙江百里遠。夜枕聞驚濤。子胥死吳下。千載無人豪。遺魂招不來。我欲續楚騷。

又

歸耕無襪襪。出戰無兜鍪。已失西疇春。空懷北平秋。提攜一束書。蹭蹬至白頭。舖中有轅飯。一飽吾何求。吳人謂

飯不炊者爲韓飯。韓音勞。

又
我昔遊劍南。爛醉平羌月。一盃玻璃春。萬里望吳越。豈知有天幸。故山得歸骨。扁舟小江上。夜半看月沒。

又
入東多名山。天台連四明。路窮寺門出。林闕溪橋橫。豈無一月間。結束與子行。會揀最幽處。煨芋聽雪聲。

秋思

秋雲易簇日常陰。西望山村每欲尋。屏掩數峯臨峭絕。地蟠一徑入幽深。

又

山步溪橋入早秋。飄然無處不堪遊。僧廊偶爲題詩入。魚市常因施藥留。

又

臨海銅燈喜夜長。蕪春笛簟怨秋涼。世間生滅無窮境。盡付山房一炷香。台州白銅燈檠絕妙。

又

才不才間未必全。胸中元自要超然。黃金不博身強健。且醉江湖萬里天。

又

牙齒漂浮欲半空。此生已付有無中。一盃藜粥楓林下。時與鄰翁說歲豐。

又

疏泉洗石誇身健。試墨燒香破日長。若得三山安樂法。不須更覓玉函方。

又

傍縣人來涕泗翻。蝗災曝虎不堪言。天心似爲衰翁地。飽食安眠獨北村。

又

閑愁正可資詩酒。小疾安能減食眠。一畝旋租畦菜地。千錢新買釣魚船。

眼明尙見蠅頭字。暑退初親雁足燈。歷歷胸中千載事。莫將輕比住菴僧。

又

虛極靜篤道乃見。仁至義盡餘何憂。名山采藥恐未免。策蹇孰能從我遊。

雞犬

鄉村年久競農務。秋斂春耕恐失時。我老元無夙興事。嬾雞啼曉恰相宜。

又

貧家也復謹朝昏。小犬今年乞近村。糠粃無多深媿汝。信信終夜護籬門。

秋來瘦甚而益健戲作

莫笑形羸不自支。清虛正與老人宜。矛頭斲米誰能食。甌裏生塵卻自奇。獨釣又逢秋晚後。安眠常到日高時。邇來久雨牆垣壞。斫竹東岡自作籬。

秋夜

岸幘蕭然病體輕。雨餘郊館已涼生。微風掠面酒無力。明月滿窗眠不成。葉底涓涓秋露滴。草根咽咽暗蛩鳴。屏居未免傷孤寂。賴有鄰翁約耦耕。

秋興

巢燕無情不更回。門庭日日落楸槐。新涼漸喜償碑債。多病還憂欠藥材。社近家方菊濁酒。客來身自埽蒼苔。道心已熟機心盡。寄語鸛鷺莫苦猜。

閑詠

莫笑結廬魚稻鄉。風流殊未減華堂。茶分正焙新開箬。水挹中澗自候湯。小几研朱晨點易。重簾埽地晝焚香。個中富貴君知否。不必金貂侍紫皇。青城丈人祠。畫仙官。有服紹蟬者。

人壽至耄期

人壽至耄期。如位至王公。非以德將之。往往不克終。非必皆大惡。過取固多凶。吾今垂九十。追逐羣衆中。筋骸勝拜起。耳目未盲聾。強健天所借。正與富貴同。一念媿屋漏。一言誑孩童。老無朋友規。日夜勤自攻。

訪野人

我行城西南。適茲素秋時。風露雖已高。草木鬱未衰。敲門尋野人。一笑萬事非。拂榻意何勤。酒釀雁鷺肥。新涼天所賜。盡醉不足辭。擊壤歌堯年。瞑目以爲期。

熏蟲效宛陵先生體

澤國故多蠹。乘夜吁可怪。舉扇不能卻。燔艾取一快。不如小忍之。驅逐吾已隘。寧聞大度士。變色爲蜂蠹。

吹笛

吳江楚澤閑遊徧。未豁平生萬里心。醉裏獨攜蒼玉筍。岳陽樓上作龍吟。

書幸

破屋頽垣鬼笑窮。暗中調護賴天公。頻年得疾身猶健。百種無營飯不空。

感事

已醉猩猩猶愛屐。入秋燕燕尙爭巢。老夫看盡人間事。欲向山僧學打包。

晚晴

兩如塵點送新涼。雲作魚鱗襯夕陽。蓬戶清閑貧亦好。筍輿安穩病何傷。

農家

寂寂江村數掩籬。吾廬又及素秋時。橫林未脫色已盡。孤鳥欲棲鳴更悲。小釜尊羹初下歧。矮瓶豆粉正燃萁。爲農幸有家風在。百世相傳更勿疑。

寓歎

白首還鄉厭蕨薇。偃偃自歎欲疇依。門庭不埽稀迎客。礎杵無聲未贖衣。達士共知生是贅。古人嘗謂死爲歸。耕疇幸可期中熟。又報殘蝗接翅飛。

又

憶昔建炎南渡時。兵間脫死命如絲。奉親百口一身在。許國寸心孤劍知。坐有容瘖堪共醉。身今病忘莫求醫。出門但畏從人事。臨水登山卻未衰。

雨夜

病多漸減燈前課。老甚都忘枕上愁。一段高情誰會得。臥聽簷雨瀉清秋。

秋懷

火食非初志。衣塵每自哀。危途觸灑瀨。歸興薄蓬萊。逋客傳琴調。高僧乞藥栽。人間豈不好。病眼自慵開。

又

苦雨無時止。幽人空復情。少眠知夜永。入病喜秋清。螢傍疎簾度。蛩依壞甃鳴。流年那可挽。又見曉窗明。

又

獨立離人境。幽居察物情。蟻知軍陣法。蟲作緯車聲。身老唯貪睡。兒癡亦惰耕。騰騰復兀兀。何以報時平。

又

寓世久成贅。忘家生若浮。安能三太息。惟有四宜休。屋壞無全堵。船輕每信流。鴟夷幸無急。賴爾可消憂。

小室

窗几窮幽致。圖書發古香。古香見米元章書畫史。尺池魚鱗鱗。拳石樹蒼蒼。老去身猶健。秋來日自長。養生吾豈解。嬾或似嵇康。

贈道侶

蕊笈人多有。惟君獨造微。丹成河自塞。吟罷劍俱飛。酒市尋差易。雲山覓更非。何時醉攜手。爲我發玄機。

舟中醉題

風吹蘆荻聲颼颼。晚潮入港浮孤舟。老民已掃市朝迹。造物全付江湖秋。項里廟前是魚市。禹會橋邊多酒樓。醉來且復過此日。莫爲槿杵悲無裘。

又
鮑郎山前煙雨昏。疎燈小市愁偏門。上船初發十字港。鼓棹忽過三家村。孤鷺對鏡空自感。老龜搗牀何足論。但願諸公各戮力。上助明主憂元元。偏門十字港三家村皆地名。

出遊暮歸

東行西行日暮歸。川雲漠漠雨霏霏。蝗餘場上禾收薄。酒貴街頭客醉稀。買犢躬耕空自力。灼龜占歲又成非。稚孫索飯殊關抱。憐汝何時得瓠肥。

園中作

紗巾一幅立斜陽。本尙無閑況有忙。雞犬往來空自得。禽魚翔泳各相忘。欲衰莎草無多綠。未落梧桐已半黃。徂歲匆匆成絕嘆。瓦溝行復見新霜。

卷七十八

感舊

莫笑山翁老欲僵。壯年曾及事高皇。雕戈北出戍窮塞。華表東歸悲故鄉。萬事固難輕忖度。百年猶有未更嘗。紛紛謗譽何勞問。但覺邯鄲一夢長。齊民要術曰。智如禹湯。不如更嘗。

東園

車馬無聲客到稀。荷鋤終日在園扉。斷殘地脈疏泉過。穿透天心得句歸。對鏡每悲鸞獨舞。繞枝誰見鵲南飛。悠然自遣君無怪。文史如山暫解圍。

秋夜

局促人間每鮮歡。秋來病骨愈酸寒。夾衣尙典雁聲過。斷簡未收雞唱殘。退士鬢毛紛似雪。老臣心事炳如丹。燈前握臂無交舊。聊喚清尊少自寬。

驛壁偶題

纍纍驛門埃。杳杳寺樓鐘。葉落樹陰薄。雲生山崦重。交親窮未棄。父子老相從。惟待新粳熟。高眠聽夜春。

又
去去投山驛。悠悠解橐裝。斜陽穿破廡。落葉滿空廊。舞簡村巫醉。塗朱野女粧。近行吾亦倦。假寢據胡牀。

過市未十里。入山知幾重。幽林聞格磔。淺瀨見陰鳴。小瓮家家酒。衡門世世農。班生定癡絕。辛苦算侯封。

夜起思子虞
我久依耕壟。兒方弔戰場。臥聞風浩蕩。起視月蒼茫。老境綈袍暖。貧家菜粥香。惟愁殺風景。無酒作重陽。

又
孤生雖永棄。要亦是黎元。渺渺煙中路。冥冥海上村。小灘看鷺立。平野送鴉翻。即欲掩關臥。南山猶未昏。

又
舊交多雋傑。離散各何之。騏驥志千里。鷓鴣巢一枝。青雲迷故步。白首負明時。幸有殘書卷。猶堪付小兒。

又
老人常獨處。一笑比河清。終日無來客。三年不入城。高眠聽酒滴。危坐對雲生。矯首羲皇世。吾其享大羹。

又
浮家久居蜀。下峽晚還東。天際孤帆遠。花前百榼空。旅遊渾似夢。年運遂成翁。欲話衰眉月。無人可與同。

仲秋書事
殘年垂九十。雪鬢不勝繁。賣屨糴炊米。典衣租廢園。山深雲滿屋。夜靜月當門。鄰曲時相過。扶行賴稚孫。

秋風社散日平西。餘胙殘壺手自提。賜食敢思烹細項。家庖仍禁擘團臍。昔爲儀曹郎兼領膳部。每蒙賜食。與王公略等。食品中有羊細項。甚珍。予近以惡殺。不食蟹。

又

天心那得與人同。牲社家家禱歲豐。料理蝗餘猶十五。殘年亦未委溝中。

又

斷雲歸岫雨初收。茅舍蕭條古渡頭。短褐老人垂九十。松枯石瘦不禁秋。

又

客來深媿里閭情。近爲衰殘罷送迎。旋置風爐煎顧渚。劇談猶得慰平生。

又

舉家食粥顏平原。坐客無氈鄭廣文。不是有心輕富貴。偶然看破是浮雲。

又

書生習氣盡驅除。酒興詩情亦已無。底怪今朝親筆硯。村鄉來請辟蝗符。

又

靈府不搖神泰定。病根已去脈和平。金丹妙處無多子。只要先生兩眼明。

又

省身要似晨通髮。止殺先從暮拍蚊。老負明時無補報。惟將忠敬事心君。

又

杖得輕堅餘可略。酒能醇勁更何求。二君最是平生舊。白首相從萬事休。

又

心明始信元無佛。氣住何曾別有仙。領取三山安樂法。蒲團紙帳過年年。

步屨

名山有志未能酬。步屨東岡當出遊。小閣捲簾驚鷺起。清池投餌看魚浮。西風吹葉空多感。落日銜山尙小留。兒老戍邊歸未得。淮南新雁又經秋。

後死

後死非初望。餘生只自悲。舊交孤劍在。壯志短檠知。行步雖依杖。光陰未付棋。爲農自當力。不爲學幽詩。

思剡

羸疾無休日。清秋適此時。節存旄盡落。帶贖眼頻移。吾興復不淺。俗人那得知。會當遊剡去。支許有深期。

故里

漏盡鐘鳴有夜行。幾人故里得歸耕。摧傷自喜消前業。疾恙天教學養生。鄰曲新傳秧馬式。房櫳靜聽緯車聲。芋魁孤首君無笑。老子看來是大烹。

野意

久忝明恩返故鄉。全家衣食出耕桑。詩纔適意寧求好。醉卽成眠不暇狂。小雨荷鋤分藥品。乍涼扶杖看優場。此身已作農夫死。卻媿時賢獨未忘。

意行至神祠酒坊而歸

兩收霽色滿川原。獨曳枯藤出里門。陌上微風搖稗穗。溝中殘水出籬根。繫牲廟柱悲刀几。醜酒村場滿盎盆。興盡還家殊不遠。漁燈續火鬧黃昏。

訪村老

強健如翁舉世稀。夜深容我叩門扉。大兒叱犢戴星出。稚子捕魚乘月歸。骨肉團樂無遠別。比鄰假貸不相違。人間可羨惟農畝。又見秋燈照搗衣。

戲題僧巷

致虛守靜氣當全。家付兒孫命委天。夢事只堪高臥看。危途誰校疾行先。獨轅短棹聊乘興。野草幽花自鬪妍。數字漫留僧壁去。與身閑作後身緣。

書意

秋江菰菜喜新嘗。鹽酪親調匕箸香。但有長腰吳下米。豈須細肋大官羊。青衫昔悔塵中老。白髮今宜靜處藏。一事尙須深自咎。街頭兒女識韓康。

又

物我年來已兩忘。蕭然湖曲一茆堂。身閑自與俗子遠。睡美不知秋夜長。餘祿正應蠶食在。宿醒時臥酒壚傍。老人肘後長生藥。檢盡千金無此方。

南塘晚步記鄰里語

喚舟欲泛湖。出門日已暮。顧景遂輟行。老病畏風露。不如上南塘。蕭然散予步。季子挾書卷。仲孫奉杖屨。夏秋多杜門。一出驚行路。鄰里相與言。稽事凜可懼。羣蝗飛蔽日。殘齧到竹樹。惟茲數里間。若有神物護。天當幸獨薄。豈以此老故。老人亦自笑。病骨日欲仆。鬼神彼何爲。與世殊好惡。相期勤自修。此幸豈可屢。

稽山道中

文章事業初何有。鐘鼎山林本自同。昨暮釣魚天鏡北。今朝采藥石帆東。

又

禹陵草木初露露。謝墅人家已閉門。八十年間幾來往。癡頑不料至今存。

讀近人詩

琢瑀自是文章病。奇險尤傷氣骨多。君看大羹玄酒味。蟹螯蛤柱豈同科。

琴劍

沈塵冉冉琴誰鼓。漬血斑斑劍不磨。俱是人間感懷事。豈無壯士爲悲歌。

戲題

莫輕凡骨未飛騰。要勝人間粥飯僧。山路近行猶百里。酒盃一舉必三升。

溪上小雨

我是人間自在人。江湖處處可垂綸。掃空紫陌紅塵夢。收得煙蓑雨笠身。

晚聞庭樹鴉鳴有感

烏鶻棲我庭。將旦輒散去。此豈厭所棲。亦以飲啄故。一飢能驅人。擾擾無晨暮。不然亦已矣。豈樂塵土汗。我有萌

三間。自少鮮外慕。力耕自足食。雞豚亦可具。晚雖謖收召。疾走如脫兔。六年楓林下。不知歲月度。殘骸幸強健。沽酒徧山步。鄉語謂湖山間。小聚爲山步。醉歸每自笑。不負此芒屨。平生愛方外。雖老冀有遇。秋風送片帆。更上剡溪路。

秋夜齋中

木落煙深江上村。暮秋蕭瑟不堪論。雁如著意頻驚枕。月似知愁故入門。營道數峯新石友。近得道石數峯。廣陵一曲古桐孫。亦知長物終安取。聊與兒曹洗睡昏。

又

殘年冉冉返丘園。敗屋蕭蕭長子孫。久悔文辭妨大學。偶因憂患得玄門。扶持後死知大幸。容養無能荷國恩。急雨打窗秋又晚。旋挑野菜助盤飧。

識魏路逢野老共語歸舍賦此詩

幾年羸疾臥家山。牧豎樵夫日往還。至論本求編簡上。忠言乃在里閭間。私憂驕虜心常折。念報明時涕每潸。二句實書其語。寸祿不沾能及此。細聽只益厚吾顏。

秋雨

暮秋木葉已微丹。小雨蕭蕭又作寒。目送斷雲歸谷口。身隨新雁寄江干。濁醪易負尋常債。退士難叨本分官。謝盡浮名更無事。燈前兒女話團圓。

秋來益覺頑健時一出遊意中甚適雜賦五字

旬日雨頻作。一年秋又殘。光陰不少貸。懷抱若爲寬。小食聊尋醉。疎砧已戒寒。定知清夜夢。又遇石闌干。剡溪道中佳處。

又

何許是吾廬。南臨古鏡湖。園林垂橘柚。門巷落楸梧。牀穩龜無息。巢新鶴有雛。鄰翁殊耐久。有酒卽相呼。

又

原野無閑土。鄉閭有老人。疾平行已健。秋晚醉差頻。啄黍黃雞嫩。迎霜紫蟹新。百年元任運。一笑卻關身。

又
饜食筋骸憊。林廬歲月侵。道窮思故友。力盡悔初心。浩浩天知我。悠悠後視今。飄零君勿歎。古瑟有遺音。

又
輕裝兩衣笈。假寢一胡牀。喚渡江樓下。逢僧縣驛傍。橫林生夕靄。孤蝶弄秋光。老慣人間事。無詩寄斷腸。

又
渡水得魚舍。乞漿敲竹扉。地偏花帶恨。林暖鳥忘歸。獨往非違世。幽居自息機。晚來清興極。更喜雨霏霏。

又
窮阨非由命。從來作計疎。妄營貧鬼笑。多愛奪狐書。何事能陶寫。惟當盡破除。霜晴宜著屐。不敢笑無鱸。

又
寓世年雖往。安心疾已平。每思丹竈冷。宜覺世緣輕。布被雞催曉。蓬窗鵲噪晴。呼兒淨洗硯。書帖寄青城。

又
萬古無窮夢。頗年欲散雲。身雖迫衰謝。學未廢鉏耘。開卷多新得。逢人有舊聞。伏生雖九十。猶冀與斯文。

又
斯世本無事。古人誰與歸。屏除閑麈尾。收拾舊蓑衣。浩浩觀空劫。拳拳訟昨非。雲開天萬里。遼鶴正孤飛。

遊近山僧菴

臥看香穗歎吾衰。起著芒屨信所之。十里溪山最佳處。一年寒煖適中時。眼明竹院如曾到。心許沙鷗卜後期。不是詩人託高興。日長真付一枰碁。

喜晴

三日雨不止。意謂無復晴。泥深不可出。臥聽空堦聲。事有未易料。南風起三更。陣陣浮雲歸。杲杲初日明。穡事既竭作。機杼比屋鳴。天天真老手。談笑功皆成。家家有新釀。歡言相送迎。蝗孽幸掃空。努力謀春耕。

阿通自閩中歸甫九歲頗有老成之風作此詩示之

通子還家已九齡。從師矜佩兩青青。長成勉作功名計。勿學衰翁老一經。

農家

大布縫袍穩。乾薪起火紅。薄才施畎畝。朴學教兒童。半要高爲棧。雞當細織籠。農家自堪樂。不是傲王公。

又

盜息無排甲。兵消不取丁。頻過鬪雞舍。閑學相牛經。江浦漁歌遠。人家績火青。遨遊無定處。隨意宿丘亭。

又

東舍女乘龍。西家婦夢熊。翁誇酒重碧。孫愛果初紅。栗烈三冬近。團欒一笑同。營生無繆巧。百事仰天公。

又

租犢耕蕃地。呼船取荻薪。蒼頭供井臼。赤脚解縫紉。僧乞銘師塔。巫邀賽土神。心常厭多事。謝病又經旬。

又

新作地爐成。蓬窗亦自明。油香麴餌脆。人靜布機鳴。縣吏催科簡。豪家督債輕。小康何敢望。生計且支撐。

又

諸孫晚下學。髻脫繞園行。互笑藏鉤拙。爭言鬪草贏。爺嚴責程課。翁愛哺飴錫。富貴寧期汝。它年且力耕。

讀老子有感

左史倚相讀皇墳。學者尙得窺全渾。孰爲武成二三策。寧取道德五千言。巢居結繩事益遠。澆淳散朴忍復論。安得深山老不死。坐待古俗還羲軒。

鄰人送菰菜

張蒼飲乳元難學。綺季餐芝未免飢。稻飯似珠菰似玉。老農此味有誰知。

書喜

莫謂家貧厭舊醅。一尊聊對桂花開。天蓄已過無蝗孽。海舶初通有藥材。剩借涼風吹醉頰。况逢急雨洗浮埃。入

秋腰脚增強健。山麓從今日日來。

秋日徙倚門外久之

舍前煙水似瀟湘。白首歸來愛故鄉。五畝山園鬱桑柘。數椽茅屋映菰蔣。翻翻小繖船歸郭。渺渺長歌月滿塘。却掩柴荆了無事。篆盤重點已殘香。

雙蝶

庭草何離離。清晨露猶溼。草頭兩黃蝶。爲我小佇立。秋光亦已晚。行見霜霰集。方春不盡狂。汝悔尙何及。吾生更堪笑。去日如電急。功名竟何在。惆悵劍峯澗。

法雲孚上座求詩

老人癡鈍避嫌猜。終日柴門閉不開。堪笑山僧能好事。乞碑纔去覓詩來。近有淨慈僧衲來求銘其師塔。亦寓法雲幾年。

詹仲信出示卜居詩佳甚作二絕句謝之

十里相望亦未遙。何由頻得慰無聊。老來萬事慵開眼。獨喜詩盟不寂寥。

又

年來阻闊動經時。忽見新篇乃爾奇。安得齊紈翦團扇。爲君小草卜居詩。

夜雨

夜雨有殘滴。秋礎無絕聲。得詩旋已忘。覓睡固難成。壯志悲垂老。歸耕願太平。發春纔屬爾。歲事又崢嶸。

晚秋出門戲詠

病叟偷伴古澤邊。橫林搖落暮秋天。鳴鳩雨後卻呼婦。飛雀霜前先著縣。抱被每投僧榻宿。卷書時當酒家錢。秋風想像芝房熟。北望商山一悵然。

又

閑愁那到野人邊。萬事元知合付天。盡醉僅能三龠酒。新寒未辦一銖錢。鄰僧每欲分齋鉢。廟史猶來索社錢。無

地置雖真細事。不妨胸次日超然。

消搖

莫笑茆檐陋。消搖遂野情。遇魔增道力。因病悟浮生。謀食憑長鑱。論交得短檠。不知從此去。幾見雁南征。

堅頑

小市朝行藥。明燈夜讀書。雖殊帶箭鶴。要是脫鈎魚。有飯已多矣。無衣亦晏如。堅頑君勿怪。豈失遂吾初。

遣懷

息倦登耕隴。乘閑弄釣舟。安能書咄咄。且復送悠悠。窮巷誰來往。村醪自獻酬。何妨晏平仲。歲晚一狐裘。

又

窮每占周易。閑惟讀楚騷。病隨災漸退。嬾與拙相遭。投枕燈初上。披衣日已高。清愁亦可剪。無處買并刀。

又

有志師千載。無方起九原。山園菜常瘦。村店酒多渾。衰疾形詩句。窮愁入夢魂。傍觀任嘲笑。吾道始應尊。

又

雲族初疑雨。風生忽快晴。半窗松竹影。繞舍鳥烏聲。看劍心猶壯。開書眼漸明。餘年真已矣。不復問君平。

初寒

日月誰能駐。風霜忽已高。公孫分布被。范叔共綈袍。糲糲炊香甑。蒲萄壓小槽。所慚才已盡。孤詠不能豪。

閑行至西山民家

秋林半丹葉。秋草多碧花。隔山五六里。臨水兩三家。罾魚與伐荻。各自有生涯。平池散雁鷺。繞舍栽桑麻。客至但舉手。土釜煎秋茶。城中不如汝。切莫慕浮夸。

夜與子適說蜀道因作長句示之

憶自梁州入劍門。關山無處不消魂。亞松託宿逢秋雨。小柏經行聽曉猿。亞松在成都。小柏在三泉閣道。當日只知悲客路。歸來終亦老江村。吾兒生晚那知此。聊對青燈與細論。

村舍

無懷葛天古遺民。種畚歸來東澗耕。亭長聞名不識面。豈知明府是何人。

又

雞鳴犬吠相聞地。穴處巢居上古風。飽飯不爲明日慮。酣歌便過百年中。

又

露草乾時兒牧羊。朝日出時女采桑。一牀絮被千萬足。不解城中有許忙。

又

山高正對燒畬火。溪近時聞戽水聲。破屋已斜猶可住。老牛雖瘠尙能耕。

又

莫笑山家拙治生。正緣亦足得身輕。滿爐葑火渾家暖。一盃松肪徹夜明。

又

故絮五更偏覺冷。薄糜未午已先飢。誰知人不堪憂處。正是降魔奏凱時。

又

氣全自可忘憂患。心動安能敵死生。若論老人真受用。已多稗飯與藜羹。

登山西望有懷季長

行年垂九十。舉世少輩行。敢言貧非病。要是老益壯。平時嬾書疏。有答未始倡。張卿獨所敬。夙昔推直諒。迹雖隔吳蜀。相憶每慘愴。使者交道中。萬里問亡恙。忽焉奉赴告。斯文豈將喪。腰經不撫棺。執紼不會葬。送子珉山下。想見車百兩。我徒哭寢門。淚盡氣塞吭。年雖不耄期。仕誰不將相。神明司禍福。于職豈亦曠。霜風九月初。憑高極西望。江原在何許。安得鏗疊嶂。

山行

五尺桄榔杖。二寸栢欄冠。往來山谷中。髮白面渥丹。初非乳石力。所得懷抱寬。入寺不尋僧。自愛松風寒。松風晚

少靜。我意殊未闌。却尋歸村路。白石明青灘。

二樂

遊山恨不遠。讀書恨不博。天下多名山。何處無芒屨。東書飽蠹魚。於汝寧不怍。日月如過燒。老病將何若。眼猶給開卷。足尙供尋壑。少勞君勿辭。是中有真樂。

村女

白襦女兒繫青裙。東家西家世通婚。采桑餉飯無百步。至老何曾識別村。

示子適

我初學詩日。但欲工藻繪。中年始少悟。漸若窺宏大。怪奇亦間出。如石漱湍瀨。數仞李杜牆。常恨欠領會。元白纔倚門。溫李真自鄙。正令筆扛鼎。亦未造三昧。詩爲六藝一。豈用資狡獪。晉人謂戲爲狡獪。今閩語尙爾。汝果欲學詩。工夫在詩外。

聞新雁有感

才本無多老更疎。功名已負此心初。鏡湖夜半聞新雁。自起吹燈讀漢書。

又

新雁南來片影孤。冷雲深處宿菰蘆。不知湘水巴陵路。曾記漁陽上谷無。

山村獨酌

腰劍如今不換牛。固應萬事一時休。孤舟慣作瀟湘夢。駿馬寧思鄠杜遊。毀譽要須千載定。功名已向隔生求。石帆山下秋風晚。買酒看雲自獻酬。

小園獨酌

橫林搖落弄微丹。深院蕭條作小寒。秋氣已高殊可喜。老懷多感自無歡。鹿初離母斑猶淺。橘乍經霜味尙酸。小酌一卮幽興足。豈須落佩與頽冠。

卷七十九

秋思

湖邊一夜霜。庭樹無秋聲。嬾不近筆硯。何以紓幽情。但有一睡耳。展轉無由成。起擁地爐暖。坐待天牕明。

又

弊衣但故絮。糲食惟黃蘗。餘年如登山。步步勤攀躋。從子念寂寞。千里致鹿麋。秋風石帆下。伴我扶青藜。

又

稽山九十翁。病起無氣力。擁杖牧雞豚。乃是老人職。一盃芋糝羹。孫子喚翁食。既飽負朝陽。自愧爾何德。

又

今日鵲噪簷。邢趙蜀父去。華別我西。老懷易感慨。近別亦慘悽。自我臥孤村。海內無輪蹄。垂虹秋愈佳。不得同裝齋。

覽鏡

鏡中老翁誰。非復少年我。誦書如布穀。拈出無一可。又非富貴逼。棄去自不果。無功博一飽。有鼻當萬坐。老境最堪笑。作計日益左。正似鳩拙巢。不及蠶自裹。霜寒衣未贖。瑟縮附殘火。作詩數十年。所得良瓊瑣。弱松因蔓纏。何日見磊砢。洞庭可遠遊。秋風思楫柁。

雨晴

小雨初增氣。慘悽。新晴差解病。沉迷。虛廊靜院聽松籟。細草甘泉養鹿麋。寒靄細分山。遠近。野歌相應。路高低。孰知倦客蕭然意。水品茶經。手自攜。

秋盡自遣

息駕江湖上。推移歲又殘。雨添苔暈紫。霜染柏林丹。貧歎耕疇薄。狂依禁網寬。遊山攜一鉢。到寺即開單。

又

老健非頤攝。羈窮爲折除。人情看已慣。身在不論餘。席下錢雖盡。罇中粟有儲。行歌混樵牧。吾計未全疎。

畫臥

我意殊昏然。一日三就枕。目前幸未病。病勢亦凜凜。偶拈一卷讀。笑若鳩食菴。雖云嗜好篤。自計亦已審。聖門未能窺。詎敢希在寢。所求養根原。常恐躓增品。死期誠已迫。尚可支數稔。薰葢不廢功。吾其享高廩。

獨坐

博山香霧散醅醅。袖手何妨靜掩扉。六十年前故人盡。紹興中往還朋舊。今乃無一人在。八千里外寄書稀。自張季長下世。蜀中書問幾絕。昨朝送客桐江去。今日逢僧剡縣歸。欲作小詩還復懶。海鷗與我兩忘機。

書感

衰顏非復昔年朱。幾過黃公舊酒壚。成敗只堪三太息。是非終付一胡盧。連天煙草迷歸夢。動地風波歷畏途。辛苦一生成底事。躬耕猶得補東隅。

舟中夜賦

問天乞得不貲身。常作東阡北陌人。買酒不澆胸礪硯。憂時空覺膽輪囷。寓居尙復能栽竹。羈宦懸知正憶尊。那似石帆山下客。釣船載月泊煙津。

舍傍晚步

蒲團初起定。藤杖偶閑行。鳥語如相命。魚浮忽自驚。麥苗經雨綠。楓葉得霜頰。野老淳風在。悠然不送迎。

又

養疾便居僻。尋幽喜雨晴。偶因將鹿出。遂作放魚行。木落塔初見。潦收灘自生。霜清念遊衍。漸擬問山程。

自詠

紛紛世態但堪悲。一念蕭然我亦奇。醉裏猖狂醒自笑。夢中虛幻覺方知。江湖重複風波惡。齒髮凋零歲月馳。安得中原路如砥。渭川釣伴待多時。

又

茅舍蕭條似寶坊。老人終日對爐香。學荒自笑身空在。祿盡誰知壽更長。陂水蘼隄常濫濫。麥苗覆塊已蒼蒼。經

行更有欣然處。四野鉏耰滿夕陽。

初冬

初冬常憶宴梁州。百炬如椽滿畫樓。三十七年猶未死。茅簷霜冷一燈幽。

霜晴

萬瓦新霜白。一窗朝日晴。破裘身亦暖。細字眼猶明。老喜譚諄語。衰常蹠蹕行。登封書不草。力穡報時平。

初寒

新雁來時歲又殘。丹楓數樹照江干。前山雲起忽成暝。陋屋雨來初變寒。身退已收清禁夢。里居終出上恩寬。作詩老恨無奇思。時取囊中斷稿看。

題傳神

溼雲生兩屨。細雨暗孤篷。悔不桐江上。從初作釣翁。

書感

伐性牀生豈一端。暮年贏得是衰殘。齒牙零落畏大戲。毛髮蕭疎便小冠。惜日每驚新曆換。怯寒尙覺弊廬寬。華山阻絕岷山遠。安得冥鴻借羽翰。

宋都曹屢寄詩且督和答作此示之

古詩三千篇。刪取財十一。每讀先再拜。若聽清廟瑟。詩降爲楚騷。猶足中六律。天未喪斯文。杜老乃獨出。陵遲至元白。固已可憤疾。乃觀晚唐作。令人欲焚筆。此風近復熾。隙穴始難窒。淫哇解移人。往往喪妙質。苦言告學者。切勿爲所怵。航川必至海。爲道當擇術。

獨飲

蕭蕭霜風勁。蕭蕭木葉聲。殘年如寄爾。冷坐太憎生。就市沽新釀。呼兒洗破觥。獨斟還獨醉。無月配長庚。

簡湖中隱者

十里隔天鏡。一菴依翠屏。甘泉勝牛乳。靈藥似人形。處處筇枝健。年年鬢色青。客星猶不作。肯應少微星。

初冬雜詠

重陽已過二十日。殘菊纔存三四枝。對酒插花君勿笑。從來不解入時宜。

又

古書書來言得增。東陽人到報生孫。一家三處俱強健。且撥閑愁近酒尊。

又

兒時愛書百事廢。飯冷飯乾呼不來。一生被誤終未醒。老作蠹魚吁可哀。

又

微風颺水靴文浪。薄日烘雲卵色天。但恨世間閑客少。江湖底處欠漁船。

又

書生本欲輩莘渭。蹭蹬乃去爲詩人。囊中略有七千首。不負百年風月身。

又

俗緣已斷寧容續。幽事雖多不厭增。折簡迎醫看病鹿。春粳炊飯供遊僧。

又

夜窗父子共煎茶。一點青燈冷結花。村落盜清無吠犬。園林月上有啼鴉。

又

老去胸中百事真。同遊無復白頭新。鵲從熟後頻分食。鹿漸馴來不避人。

老歎

齒髮衰殘久退休。衡茅荒寂更禁秋。一無用力身猶倦。百不關心夢亦愁。遠浦臥看鳧泛泛。深林時聽鹿呦呦。天

台日有遊僧過。白朮黃精不待求。

小園

誰爲閑愁撥不開。小園也復有池臺。清泉白石皆吾友。綠李黃梅盡手栽。衝雨茭雞時上下。近人栗鼠不驚猜。自

憐兩屨猶輕捷。不待兒扶日來。

冬夜思里中多不濟者愴然有賦

大蓋年光病日侵。久辭微祿臥山林。雖無歎老嗟卑語。猶有哀窮悼屈心。力薄不能推一飯。義深常願散千金。夜闌感慨殘燈下。皎皎孤懷帝所臨。

宿近村

病齒漂浮短髮稀。此身猶墮亂書圍。邯鄲倦枕晨炊熟。昌谷空囊晚醉歸。久困厭從人乞貸。力耕頻遇歲凶饑。行年九十窮彌甚。旅舍燈前自綻衣。

梅村野人家小憩

正遺清詩覓菊栽。穿雲涉水又尋梅。萬牛不挽新愁去。一鳥還驚午夢回。老媿逢人說幽憤。窮能隨事學低摧。江邊漂母何爲者。無食王孫未易哀。

寄陳伯予主簿

今年閏餘時令早。十月霜風吹客倒。老夫畏寒不出門。數步鄰家迹如掃。此時陳子獨何勇。飢僮瘦馬長安道。絕知涵養與人別。吐氣如虹失衰老。孟軻浩然正應爾。豈比區區養梨棗。萬鍾于子本何加。一官未免從人討。世誰不達子獨窮。熟念令人惡懷抱。石渠天祿正須才。往乞揚雄太玄草。

夜半憶剡溪

早睡苦夜長。晚睡意復倦。斂膝傍殘燈。拭背展書卷。時時搔短髮。稍稍磨凍硯。更闌月入戶。皎若舒白練。便思泛樵風。溪名次第入剡縣。名山如高人。豈可久不見。

道上見村民聚飲

霜風利如割。霜葉淨如掃。正當十月時。我行山陰道。場功俱已畢。歡樂無壯老。野歌相和答。村鼓更擊考。市壚酒雖薄。羣飲必醉倒。雞豚治羹飯。魚蟹雜鮮薹。但願時太平。鄰里常相保。家家了租稅。春酒壽翁媪。

小江

出郭四十里。孟冬天尙和。風生帆力健。木落月明多。小市人聲散。長橋炬火過。吾生幾來往。撫枕獨悲歌。

短歌行

富貴得意如登天。自計一跌理不全。晝食忘味夜費眠。渠過一日如一年。春蠶得衣耕得食。農功初成各休息。賣酒墟邊紛鼓笛。我過一年如一日。二者求兼勢安可。與我周旋寧作我。春城桃李豈不妍。雪澗未妨松磊砢。人生禍福難遽論。廟犧烏得爲狐豚。君不見獵徒父子牽黃犬。歲歲秋風下蔡門。

初寒

重雲蔽白日。陂港日夜涸。秋風纔幾時。已見霜雪作。人生各有分。豈必衣狐貉。吳中冬蔬茂。盤飭不寂寞。搏泥治牆屋。伐篠補籬落。薄酒亦醉人。問子胡不樂。

對鏡

鏡中衰顏失敷腴。綠鬢已作霜蓬枯。兩肩聳聳似山字。曳杖更有蠻童扶。自驚何以致此老。亟欲脩敬問起居。徐徐熟視乃大笑。但記昔我忘今吾。今吾雖憊頗神王。飛仙正可折簡呼。遠遊縱未從谿父。醉眼猶能隘具區。

書劍

書劍當年徧兩川。歸來垂釣鏡湖邊。老皆有死豈獨我。士固多貧寧怨天。物外勝遊攜鶴去。琴中絕譜就僧傳。莫言白首詩才盡。讀罷猶能意爽然。

城南道中有感

行李蕭然一束書。城南觸目更愁予。市門乞食僧持鉢。關路哦詩客跨驢。殘髮無多真已矣。名山未去獨何歟。芒屨可買身猶健。紅樹青霜十月初。

寄子虞兼示子適

書生賦命艱。舉步得憂患。敢論得意事。一笑亦有限。南征度閩嶺。西戍歷蜀棧。吳江聽唳鶴。淮浦送歸雁。歸來耕故山。暮雨泥沒胛。羣鴉下空陂。黃犢鳴絕岸。索飯閔兒啼。乞墻虞妾颺。一裘三十年。破裂不受綻。欲添一把茅。百計亦未辦。大兒急親養。辛苦就遠宦。間出冒虜塵。短甲中夜擐。小兒奉親驪。野果采溪澗。勉使就微祿。未對涕先

潛觀汝兄弟意。豈復厭藜藿。兄歸弟不出。定省同夜旦。

一年老一年

一年老一年。一日衰一日。譬如東周亡。豈復須大疾。懶惰已廢書冊久。病來亦復疎盃酒。軻車小住固自佳。拂袖便行亦何有。下床擁火暖有餘。鹹豆數粒粥一盂。平生常笑愚公愚。欲栽墮齒染白鬚。

自東岡繚出舍北

年光豈不好。老境獨無歡。百步未爲遠。一尊聊自寬。澤枯波尙綠。霜薄葉初丹。矯首問來雁。中原應苦寒。

有客

有客南山至。相攜飯野亭。傾籃魚白白。出籠菜青青。米滑溪春碓。醅渾草塞瓶。從今同保社。日醉不須醒。

陳伯予見過喜予強健戲作

寒無甑坐甑生塵。此老年來乃爾貧。兩頰如丹君會否。胸中原自有陽春。

東陽郭希呂呂子益送酒

山崦尋香得早梅。園丁又報水仙開。獨醒坐看兒孫醉。虛負東陽酒擔來。

夜坐

家家績火夜深明。處處新畬雨後耕。常媿老身無一事。地爐堅坐聽風聲。

兩日意殊不懌作短歌自遣

一月得笑纔四五。十事敗意常八九。國中謾說無雙士。天下元無第一手。平生愛酒恨小戶。半世爲文真弊帚。劫灰處處吊興亡。宿草年年哭交友。君看丈夫得意時。大冠如箕印如斗。一朝棄去豈復論。衣破何妨露雙肘。有時采藥二室間。亦或釣魚五湖口。死來萬古一熟眠。安用虛名傳不朽。

戲書日用事

衰病時時作。閑愁日日生。寒添沽酒興。困喜磴茶聲。琴廢還重理。詩成更細評。殘年那望進。且復暢幽情。

獨立

上書不上登封書。乘車但乘下澤車。夕陽獨立衡門外。閑看村童學釣魚。

夢中江行過鄉豪家賦詩二首既覺猶歷歷能記也

築屋傍江臯。牆垣締結牢。深門蔭楊柳。高架引蒲萄。黍酒歡迎客。麻衫旋束條。兒孫勿遊惰。常念起家勞。

又

蒲席乘風健。江潮帶雨湔。樹餘梢纜迹。崖有刺篙痕。酒酹湘君廟。歌招屈子魂。客途嗟草草。無處采芳蓀。

病中夜思

一病輒兼旬。百憂集雙鬢。藥裏堆床滿。生意垂欲盡。時聞雀翻更。鄉中有栖雀夜鳴。爲翻更。頻看燈落燼。平生學六經。白首頗自信。拳拳服仁義。念念去驕吝。所覲未死間。猶有分寸進。

得子虞書言明春可歸

白首相依飽蕨薇。吾家父子古來稀。春秧出水柔桑綠。正是農時望汝歸。

雜賦

地爐夜熱麻蕕煖。瓦甌晨烹豆粥香。不是有心輕富貴。從來吾亦愛吾鄉。

又

病叟胸中一物無。夢遊信脚到華胥。覺來忽見天窗白。短髮蕭蕭起自梳。

又

終日纔堪米一升。生涯略似草菴僧。煙薪不管晨炊晚。留得松肪代夜燈。

又

出門信步作閑遊。野廟村坊到處留。每伴樵夫嘗半舍。更隨牧豎采沿溝。牛舍沿溝皆果名。

又

體不佳時看周易。酒痛飲後讀離騷。騎驢太華三峯雪。鼓棹錢塘八月濤。

又

昔人莽莽荒丘裏。陳迹紛紛朽簡中。畢竟是非誰辨得。舉盃吾欲問虛空。

又

百億須彌理固有。八九雲夢何足吞。天下廣居君識否。一間茆屋寄孤村。

又

夢裏曾作南柯守。少時元是東陵侯。今朝半醉歸草市。指點青帘上酒樓。

又

七十八十古來稀。行年九十固應衰。已興工部耳聾歎。更和文公齒落詩。

又

中年畏病孟行淺。晚歲修真食禁多。謝客杜門殊省事。一盃香飯養天和。

又

齊民讓畔不爭桑。和氣橫流歲自穰。君看三山百家聚。更無一壠有遺蝗。今年蝗孽獨三山。過而不下。遂不爲災。

又

得兩郊原已徧耕。東家西舍多逢迎。前山雲起樹無影。別浦潮生船有聲。

散懷

小疾便幽駢。孤懷抱鬱陶。遺文誦史漢。奇思探莊騷。談笑寬吟苦。經行慰作勞。東岡聊一往。突兀古臺高。

書壁

稻草高茨屋。繩樞窄作門。漁樵皆結友。鄰曲自通婚。留客秋茶苦。醺人社酒渾。餘年尙何歎。一飯亦君恩。

又

故里還初服。明恩念老農。方蒙鏡湖賜。又忝渭川封。炊粟猶支日。藏蔬可御冬。霜天病益減。高枕聽鄰鐘。

冬日齋中卽事

讀書雖所樂。置之固亦佳。燒香袖手坐。自足紓幽懷。我生本從人。豈願終不諧。其如定命何。生死一茆齋。

又 一帚常在傍。有暇即掃地。既省課童奴。亦以平血氣。按摩與導引。雖善亦多事。不如掃地法。延年直差易。

又 夙與人尙默。衆鳥相與言。小語豈不可。何至爾嗾喧。吾獨擁燎爐。宿火有餘溫。澹然以自適。喧寂何足論。

又 詰朝澹無營。百事付童子。拂我架上書。注我硯中水。覓睡不復成。取衣乃徐起。卒歲如一朝。底處著愠喜。

又 我老苦寂寥。誰與娛晨暮。狸奴共茵席。鹿麕隨杖履。歲薄食無餘。恨使鳥雀去。安得粟滿園。作粥餽行路。

又 東園二畝地。重重作藩籬。我豈婦女哉。避客門不窺。要當盡徹去。來往無它歧。飯罷忌久坐。時須曳筇枝。

冬日排悶

老欲躬耕力弗強。但應賣藥似韓康。陳編時見古成敗。舊友不知今在亡。已返山林遺世事。尙憑詩酒答年光。此身自笑如稊米。加損寧能繫太倉。

又

地爐微火伴寒灰。垂野江雲暝不開。欲睡手中書自墮。半酣窗外雪初來。渡頭照影聞征雁。籬角吹香得早梅。佛粥春盤俱不遠。離離斗柄欲東回。

法雲寺主僧妙湛方作鐘樓未成

勾踐舊國古會稽。南山擁郭分東西。城門大路引繩直。西走百里皆平堤。客行欲曉到梅市。喔喔尙聽城中雞。法雲古寺臨大澤。風皺百頃青玻璃。迎來送往此其地。素壁時見前人題。乖離會合浩莫計。歷觀名氏空含悽。山僧慣見爲客歎。榮悴從來如夜旦。明年吾樓插天半。世事君須倚闌看。

自法雲歸

落日疎林數點鴉。青山闕處是吾家。歸來何事添幽致。小竈燈前自煮茶。

枯菊

龍山落帽未多時。陳迹依然使我悲。祭祭菊花何似好。增前惟見束枯枝。

聞吳中米價甚貴二十韻

千錢得斗米。一斛當萬錢。嗟汝蚩蚩民。何恃以自全。我欲告父老。食爲汝之天。勿結迎神社。勿飾航湖船。築室勿斲削。但取垣屋堅。婦女省釵澤。野粧何用妍。趨利常處薄。衆役常在前。歲時相勞苦。盛饌一豚肩。近市可致酒。雖薄亦醺然。切勿慕公卿。早朝妨熟眠。亦勿謀高貴。貧吏不汝憐。有負固吹毛。無罪亦株連。豈暇論曲直。挺繫如登仙。短褐與飯豆。温飽可終年。草廬挂葦箔。乃可數世傳。朱門雖赫赫。變化如飛煙。爲農最得策。本無祿與權。時平自逸樂。奉牲祭其先。不幸有散徙。均爲寓民編。吾詩不足徵。請讀七月篇。

寒夜偶懷壯遊書感

疇昔西遊萬里還。狂吟散落滿人間。買空綠水橋邊酒。看徧青城縣裏山。梅蕊疎疎春欲動。川雲漠漠雪猶慳。偶思五十年來事。顧影燈前自笑頑。

夢曾文清公

有道真爲萬物宗。嶮然使我歎猶龍。晨雞底事驚殘夢。一夕清談恨未終。

睡覺

白日悠悠喜意平。夢中歷歷覺魂清。覺時不落晨雞後。靜待天窗一點明。

湖邊小聚

小聚遠塵囂。淳風獨未澆。鳴機燈煜煜。飲憤雨蕭蕭。異味常交致。新醪亦苦邀。人間交道絕。令我慕漁樵。

雨

秋冬久不雨。氣濁喜雲生。麥壟崇朝潤。茆檐徹夜聲。初來斷幽徑。漸密雜疎更。賴有牆陰薺。離離已可烹。

又

薄晚初沾灑。清晨更慘悽。魚寒拋餌去。鴉溼就簷栖。幽澗濺濺溜。長隄淺淺泥。一盃持自賀。吾事在鋤犁。

雨後快晴步至湖塘

齒豁從教道字訛。負薪陌上且行歌。古人亦自逢時少。吾輩何疑忤俗多。山掃黛痕如尙溼。湖開鏡面似新磨。亦知大有掀髯處。無奈西流白日何。

兩日寒雨作雪不成夜忽大雨遂晴

折木翻濤一夜風。浮雲吹盡日行空。天公豈是真慳雪。三白留來付臘中。

歲窮

困阨身如寄。推遷歲忽窮。百年均昨夢。萬古一飛鴻。夜甕鳴春酒。晨畦擷晚菘。屬饜童子笑。便腹負吾翁。

凍坐

湖海淒涼地。風霜慘淡天。吾其去道近。無酒亦陶然。

古意

千金募戰士。萬里築長城。何時青塚月。却照漢家營。

又

夜泊武昌城。江流千丈清。寧爲雁奴死。不作鶴媒生。

雪意復作

前日作雪風敗之。今日濃雲雪復作。一寒未暇自爲計。宿麥懸知天已諾。灞橋策驢愁露手。新豐買酒聊輒脚。胸中正著九雲夢。廊廟何加一丘壑。上書陳事固可笑。服藥求仙亦成錯。不如醉踏一劍騰風雲。跨海東謁青童君。

醉書

天公賦與五湖秋。風月雲煙處處留。損食一年猶可健。無詩三日却堪憂。

排悶

造物冥冥中。與我無一面。不知獲罪由。動輒被訶譴。又若哀其愚。救以藥瞑眩。我亦揣此心。安受不敢怨。中間戍蜀漢。十載困郵傳。騎墜蒙隴干。陣雲暗秦甸。齋糧雜沙糝。掬水以三嚥。傳烽東駱谷。倏忽若流電。歸吳獲小休。餘喘僅一綫。意言在故鄉。終勝客異縣。夫何命大謬。魔事每交戰。友讐同一波。平地肆蹈踐。么然性命微。日畏讒口煽。舊書不暇視。鼠跡上几硯。負病不卽死。遂作諸老殿。却觀所更歷。殆是金百鍊。人誰不愛身。悔作青紫楨。短笻入空翠。小艇破江練。漁歌隔浦聞。續火傍林見。苦貧雖至骨。未肯受客喧。君看投林猿。終異巢幙燕。有山皆可耕。焉往失貧賤。

湖山尋梅

鏡湖渺渺煙波白。不與人間通地脈。騎龍古仙絕火食。慣住空山齧冰雪。東皇高之置度外。正似人中巢許輩。萬木僵死我獨存。本來長生非返魂。

又

小雪湖上尋梅時。短帽亂插皆繁枝。路人看者竊相語。此老胸中常有詩。歸來青燈耿窗扉。心鏡忽入造化機。墨池水淺筆鋒燥。笑拂吳箋作飛草。

作雪寒甚有賦

雲暝風號得我驚。硯池轉盼已生冰。窗間頓失疎梅影。枕上空聞斷雁聲。公子皂貂方痛飲。農家黃犢正深耕。老人別有超然處。一首清詩信筆成。

書嬾

我性本迂疎。養生又無術。憂患自外至。疾病由中出。屏居絕造請。冀補東隅失。今觀世間事。如僧視沐櫛。閑身嶺上雲。睡味蜂房蜜。惟思茅簷下。一席臥朝日。

讀唐人愁詩戲作

少時喚愁作底物。老境方知世有愁。忘盡世間愁故在。和身忘却殆應休。

又

清愁自是詩中料。向使無愁可得詩。不屬僧窗孤宿夜。即還山驛旅遊時。

又

天恐文人未盡才。常教零落在蒿萊。不爲千載離騷計。屈子何由澤畔來。

又

我輩情鍾不自由。等閑白却九分頭。此懷豈獨騷人事。三百篇中半是愁。

又

飛雪安能住酒中。閑愁見酒亦消融。山家有力參天地。不放清尊一日空。

讀書至夜分感歎有賦

老人世間百念衰。惟好古書心未移。斷碑殘刻亦在櫝。時時取玩忘朝飢。推尋點畫到曲折。想見落筆縱橫時。豈惟鸞鳳九霄上。景鍾大鼎森陸離。雖然欲學則曷敢。騫馬仰看驂驪馳。正如志士才不稱。心慕伊傅終何施。爾來亦復強點染。子不隨意徒嗟咨。懸知明日天將雨。中夜雲蒸紫玉池。

擁爐

急雨狂風暮不收。燎爐新暖復□□。□□傾激灑鶴黃酒。似擁蒙茸狐白裘。大澤羈鴟來萬里。高城傳漏過三籌。明朝會看稽山雪。莫爲衝寒怯上樓。

隱趣

歸老家山一幅巾。俗間那可與知聞。舉盃每屬江頭月。贈客時緘谷口雲。行采菖蒲緣薜磴。臥浮舴艋入鷗羣。力營隱趣君無怪。作得閑人要十分。

冬夜舟中作

夜榜孤舟掠岸行。村墟頻過不知名。繞枝倦鶴寒無影。脫網奔魚遠有聲。兩紙忽驚殘曆盡。一盃聊慰旅懷情。還家自笑身猶健。又付生涯與短檠。

湖山

逐鹿心雖壯。乘驪勢已窮。終全蓋世氣。絕意走江東。項羽廟。

又

湖上多甘井。磴泉尤得名。何時枕白石。靜聽轆轤聲。磴山泉。

又

山崦桑麻路。柴門鳥雀聲。老巫祈社雨。小婦餉春耕。容山。

又

坡陀度小嶺。軒豁見平湖。但醉梅花下。民家酒可沽。花徑小嶺。

又

淺井供茶竈。分流浣布紗。此泉吾所愛。百用給山家。項里民家淺井。

又

故堞無遺跡。蕭然數十家。茶煙映山起。酒旆傍隄斜。古城。

又

汀月生眉黛。溪梅試額粧。幽閨元不出。莫道嫁彭郎。柳姑廟。

又

城邊小市聚。煙水淡秋容。南走蘭亭路。迢迢雲外鐘。東跨欄橋。

又

東西二十里。相望兩平橋。傍水多提釣。穿雲有負樵。西跨欄橋。

齒髮

暮境侵尋歲月過。齒搖髮脫又經秋。此身要是歸衰謝。外物何須更固留。卓白從來憎了了。登臨且復送悠悠。嗣宗痛飲圖南睡。萬事輸君此一籌。

古謂不如意事十常八九。雖出於好功名者之言。閑中亦未免此歎。戲作七字一首。

歸志初諧老遽催。良辰常與病俱來。酒雖已熟恨無菊。雪苦不成空見梅。朋舊乖離心每折。山川悠邈首頻回。人生敗意無窮達。莫厭相逢笑口開。

幽居歲暮

冉冉忘年往。紛紛厭事來。庭除多草莽。几硯亦塵埃。園爲畦蔬到。門因汲水開。偶聞林鳥語。太息又春回。

又

却醫翻少疾。辭祿不加貧。嘉木移俱活。村醪釀輒醇。悠悠還過日。盎盎又逢春。狂舞君毋笑。梅花插滿巾。

又

老去轉無事。室空惟一床。臥時幽鳥語。行處野花香。巷北觀神社。村東看戲場。誰知屏居意。不獨爲耕桑。

又

燃薪代秉燭。煑茗當傳盃。但恨朋儕少。那知日月催。衣裘任穿穴。芋栗且燔煨。不爲殘年迫。吾心久矣灰。

又

古井年年浚。荒疇日日犁。刈茅苫鹿屋。插棘護雞栖。閑賴書遮眼。愁須酒到臍。斜陽有常課。緩步上湖隄。

過湖上僧庵

西庵每過未嘗開。邂逅清言始此回。陶令巾車尋壑去。已公茅屋賦詩來。奇香炷罷雲生岫。瑞茗分成乳泛盃。便恐從今往還熟。入門猿鳥不驚猜。

夜坐戲作短歌

畏事如畏虎。避人如避寇。結廬三家村。百事喜寒陋。身閑自爲貴。飯足豈非富。素心憎狐妖。老愈惡銅臭。視之若寒氣。可使客膚腠。卽今知免矣。終歲塞門竇。始知松倒壑。殊勝雲出岫。聊持不動心。更養未盡壽。夜讀南華篇。欣然發吾覆。

書歎

世事紛紜汝所知。欣然領略尙何疑。窮居自是長年術。魔境常爲定力資。人但與遊無德怨。酒皆可醉略醇醜。亭賓主今何在。脩竹依然似曩時。

又

尺椽不改結茅初。薄粥猶艱卒歲儲。獨子解迎門外客。狸奴知護案間書。深林閑數新添筍。小沼時觀舊放魚。自笑從來徒步慣。歸休枉道是懸車。

日暮自湖上歸

我生本亦與人同。緣薄才疎剩得窮。細水自鳴沙渚外。亂山時出雪雲中。僧歸獨趁殘鐘去。人散遙憐晚渡空。造物陳詩信奇絕。忽忽摹寫不能工。

晚步湖隄

絕裘桐帽野人裝。又上湖隄步夕陽。貧甚不爲明日計。興來猶作少年狂。殘樽倒酒無餘瀝。幽圃尋梅認暗香。時有行人歎頑健。黑絲點破領間霜。

夜寒

江雲作雪暗郊原。竟夜風聲萬馬奔。槁面暫朱知酒醺。曲身成直賴爐溫。幼興正復宜巖石。倚相猶能讀典墳。米貴僅供糜粥用。自傷無力濟元元。

感舊

早參太史筆。晚典石渠書。孤立如羈雁。微生等蠹魚。虛名真忝竊。定理有乘除。九十稽山下。荒畦日荷鋤。

小雪

夜臥風號野。晨興雪擁籬。未言能壓瘴。要是欲催詩。跨蹇雖堪喜。呼舟似更奇。元知剡溪路。不減灞橋時。

十二月十日暮小雪即止

夜來急雪打船窗。今夜推窗月滿江。堪恨無情一枝艫。水禽驚起不成雙。

又

夜來一雪苦愆愆。千里濃雲忽來空。換得明月良不惡。未須過計慮蝗蟲。

遺興

駢駢魚鹽市。迢迢桑麥村。山家新炭足。野叟袴襦溫。置免殘蕪盡。又魚積水渾。詩書老無效。猶擬付兒孫。

貧居時一肉食爾戲作

身老便居僻。山寒喜屋低。時猶賴僧米。那惜貸鄰醯。湯餅挑春齋。盤飧設凍齋。怪來食指動。異味得豚蹄。

臘月十四日雨

歲晚深居嬾出遊。小窗終日寄悠悠。雨聲到枕助詩律。花氣襲衣生客愁。殘齒不堪添艱脆。瘦肩轉復覺颼颼。春前一雪猶關念。安得瓊瑤積瓦溝。

節物

節物猶關老病身。鄉儺佛粥一年新。檐間百舌還多事。探借園林十日春。

讀書

力不扶微學。心猶守舊聞。壁間科斗字。秦火豈能焚。

春近

曆授人時後。天回斗柄初。農疇興耒耜。家塾盛詩書。縹緲雙鳧鳥。咿啞一鹿車。山翁喜春近。隨處狎樵漁。

讀陶詩

陶謝文章造化侔。篇成能使鬼神愁。君看夏木扶疎句。還許詩家更道不。

夜雨寒甚

萬籟號風如戰鼓。雪意垂垂先作雨。庭中栖鳥驚屢起。窗下殘燈翳還吐。老翁聳膊高過頂。童子觸屏低不語。時聞鄰舍起飯牛。亦有歸樵說逢虎。去年雪薄蝗害稼。今年望雪如望赦。行當三白兆豐年。牲酒如山作秋社。

寄趙昌甫

杳杳雙鶻鳴庭除。東陽吏傳昌甫書。紙窮乃復得傑作。字字如刮造化爐。爾來此道苦寂寞。千里一士如鄰居。小

兒得祿在傍邑。我貧初辦一鹿車。過門剝啄亦奇事。拜起幸未須人扶。君看幼安氣如虎。一病遽已歸荒墟。吾曹雖健固難恃。相覓寧待折簡呼。餘寒更祝勤自愛。時寄新詩來起予。

稽山雪爲隱者作

高人采藥來禹穴。骨瘦巉然鬢眉白。結茅分得野鹿場。一夜北風三尺雪。明朝過午勢愈惡。虎兕交迹人聲絕。虛窗縱橫叢竹入。幽磴荒寂孤松折。凍冷孰窺袁安戶。僵臥禿盡蘇武節。人生飢寒固亦有。養氣不動真豪傑。希名後世吾所恥。姓字寧與身俱滅。班馬復生無自書。我作此歌空激烈。

招鄰父啜菜羹

老境遺人事。窮居矜世盲。茅簷聽雪滴。瓦鼎爇松肪。不願封侯印。惟求煮菜方。盃羹須及熱。剩欲喚君嘗。

讀論語

壯歲貪求未見書。歸常充棟出連車。晚窺闕里親傳妙。數簡方知已有餘。

晨起

殘夢悠颺不復成。鎗然已有百禽鳴。山童來報溪流長。幽事從今日日生。

雪後

雪消已斷虛簷溜。日暖初催百草生。射的山前春水綠。笙歌又滿會稽城。

示福孫并示喜曾

北商久不通。梨棗罕登盤。山舍惟有橘。瑣細如彈丸。此外則柿栗。收拾猿鳥殘。雖無臚翁話。兒孫亦團欒。今歲雨雪晚。歲暮始大寒。二稚乃可憐。不訴衣襦單。地爐有微火。誦書到更闌。我老多感慨。賴汝差自寬。

微疾

微疾經旬近藥囊。往來巷陌未全妨。時時小雨知春近。處處閑身覺日長。林外鼓歌聞賽廟。懷中茶餅議租桑。兩京梅發今何似。送老流年只自傷。

簡僧求秦望山拄杖

老病龍鍾不自持。飽知藤杖可扶衰。明朝欲入天台去。試就高人乞一枝。

遊山步

蹇驢渺渺過雲邊。旋了三生物外緣。平日視家真逆旅。此行出戶若登仙。飢從野店烹葵飯。困就僧床借枕眠。所恨暮年交舊盡。佳時無與共聯翩。

又

南出平橋十里餘。湖山處處可成圖。水邊更覺梅花瘦。雲外誰憐雁影孤。時喚行僧同煮茗。亦逢樵叟問迷途。破裘不怕春寒峭。小市疎燈有酒壚。

雪晴欲出而路瀟未通戲作

欲覓溪頭路。春泥不可行。歸來小窗下。袖手看新晴。

又

雪消重作雨。冰釋又成泥。已敗筇枝興。高眠聽午雞。

春日

冷餅細生菜。老翁殊未衰。仍尋舊旛勝。一笑伴諸兒。

示兒輩

窮居懷抱久無懽。猶賴吾兒得少寬。謹視雞豚供老疾。力營薪炭備春寒。舊書綴緝編無絕。小竈調味味不酸。坐使乃翁無一事。高眠常到日三竿。

雪後煎茶

雪液清甘漲井泉。自攜茶竈就烹煎。一毫無復關心事。不枉人間住百年。

夢中作

久向人間隱姓名。看花幾到武昌城。一壺春色常供醉。萬里煙波懶問程。斜日挂帆堤外影。便風擊鼓驛前聲。丈夫入手皆勛業。廊廟江湖未易評。

破屋歎

我年四十時。築舍受一廛。歲月不貸人。殆將五十年。初非樞柁林。既久理豈全。慘淡窘風雨。亦復補破穿。竹椽與繩樞。豈敢求牢堅。今朝忽自顧。衰疾方沉綿。不知此殘軀。與屋誰先顛。粥藥幸粗給。兒稚滿目前。斂藏雖甚薄。猶勝死道邊。一笑推枕起。無酒亦陶然。

戊辰歲除前五日作新歲八十有五矣

灰深火可宿。炷小燈耐久。長流故不腐。易成必速朽。我昔遊青城。聞道巢居叟。躬行雖不力。年少過九九。固知道天幸。自養亦差厚。傳家六兒子。其四今皓首。寧聞澗底松。鬱鬱慕蒲柳。大兒新年六十二。仲子六十。季亦近六十。

晨起復睡

衰翁卯飲易上面。澤國春寒偏著人。下榻一盃還就枕。不嫌鼾睡聒比鄰。

梅

三十三年舉眼非。錦江樂事祇成悲。溪頭忽見梅花發。恰似青羊宮裏時。

又

俗事常妨把一盃。等閑開過小園梅。自傷惟有尋春夢。百舌無情又喚回。

小疾治藥偶書

禦戎虛上策。治疾闕全功。安得如神禹。常行無事中。

又

握苗農害稼。過劑藥傷人。此理君能造。無爲萬□□。

子適讀書常至夜分作此示之

我爲無才老把鉏。汝窮亦復坐迂疎。夜燈詠史蟲吟草。朝几陳書獺祭魚。未至苦飢依馬磨。不妨相守臥蝸廬。業成自有能知賞。家世從來典石渠。先太傅先楚公。皆久在三館。予亦入館二十年。晚忝大蓬之命。

歲暮作

魚貫長條兔臥盤。往來聊續里閭歡。舊符又擬新年換。殘曆都無半紙看。梅影橫斜春尚淺。角聲悲壯夜將闌。堅頑敢望今如許。戲說期頤強自寬。

除夕

熾炭爐中百藥香。屠蘇煎酒代椒觴。明朝賴是無來客。雪後泥深一尺強。

己巳元日

曾孫新長奉椒觴。兒女冠笄各綴行。身作太翁垂九十。醉來堪喜亦堪傷。

初春

裝罷桃符又剪燈。新年光景捷飛騰。老翁掃盡兒童事。卻學禪床入定僧。

新年書感

早歲西遊賦子虛。暮年負未返鄉閭。殘軀未死敢忘國。病眼欲盲猶愛書。朋舊何勞記車笠。子孫幸不廢菑畬。新年冷落如常日。白髮蕭蕭悶自梳。

開歲連日大雪

開歲大雪如飛鷗。轉盼已見平簷溝。村深出門風裂面。沉復取醉湖邊樓。從來春雪不耐久。臥聽點滴無時休。去年久旱縣千里。犁不入土蝗蟲稠。今年冬春足膏澤。天意似欲滋農疇。豈惟養豬大作社。更賣寶劍添耕牛。

飲酒

我酒本小戶。痛飲乃有時。意氣不相值。終日持空卮。醉或能齋莊。不醉或狂逸。乃知老子狂。非自麴蘖出。今日雪始晴。行歌官道傍。超然醒醉間。非莊亦非狂。

詩酒

我生寓詩酒。本以全吾真。酒既工作病。詩亦能窮人。每欲兩忘之。永焉耕樵民。周旋日已久。棄去終無因。齒髮益衰謝。肝膽猶輪囷。吟哦撼四壁。鬼蛾頹烏巾。江上處處好。風月年年新。正爾豈不樂。浩歌終此身。

人日雪己巳元日至人日雨雪間作

病臥江村不厭深。貂裘無奈曉寒侵。非賢那畏蛇年至。多難却愁人日陰。嫋嫋孤雲生翠壁。霏霏急雪灑青林。一盃飯罷無餘事。坐看生臺下凍禽。

春寒

滔天來降水。震瓦戰昆陽。此敵猶能禦。春寒不可當。

又

高樓墜綠珠。惡客碎珊瑚。未抵春寒夜。貧翁喪故襦。

雨雪久無來客亦不能出作長句排悶

造物無情豈我私。從來不使墮危機。青雲路近常排去。白浪堆高亦脫歸。殘稿尙存空自許。故人略盡欲誰依。新春雪暗山村路。且復焚香獨掩扉。

書老

我老耄已及。終日惟冥行。鄰里少間闊。便若昧平生。家人每過前。亦或忘其名。昏昏等作夢。兀兀如病醒。不知張睢陽。何以記一城。愚知各自適。得失未易評。

初暮遣興

閑愁長與病相依。晨起梳頭感髮稀。春事鼎來風更惡。晨光已滿雪猶飛。江梅有恨論年別。旅雁無情計日歸。剩欲江邊踏青去。憑誰爲解亂書圍。

讀書

少從師友講唐虞。白首襟懷不少舒。舊謂皆當付之酒。今知莫若信吾書。朱黃參錯雞鳴後。鐵帙從橫月墮初。撫几欣然時有得。此翁作計未全疎。

雜興

灰中火如螢。燎原從此始。元氣一點存。危疾亦不死。

又

炷香火要深。作墨手當緩。淺士務成速。所以多後患。

又

庖丁悟養生。輪扁議讀書。彼特一技爾。聖智有不如。

又

鏗爾捨瑟作。曝然放杖笑。浩浩太古音。與俗不同調。

後雜興

臘雪瑞我麥。春雨嘉我穀。老農無他求。一飽萬事足。

又

日上明我窗。月出縞我庭。朝暮得佳時。一榼醉復醒。

又

會合惜日短。別離愁夜長。人老愛吾廬。客歸悲故鄉。

又

俚醫刀匕藥。老巫半榼酒。拜況不敢忘。淡薄最耐久。

自詠

道本治吾身。緒餘方及人。神清緣食少。事簡爲家貧。薄酒如重醞。寒蔬抵八珍。村村花柳動。且復岸綸巾。

又

謝事客誰過。閑遊吏不訶。家人爭稗粥。鄰叟和畬歌。靜夜詩成祟。新春睡有魔。年光本無盡。未用歎蹉跎。

晚窗

一塢梅花已盡空。數瓴春雪未全融。晚窗忽有題詩興。落筆縱橫半醉中。

早歲志遠遊。萬里攜孤劍。所至必弔古。如疾得鍼砭。荒寒過吳宮。摧剝觀禹窆。及仕楊潤間。挂席度天塹。梁宋不可遊。北望每懷歎。會有蜀漢役。奇嶮日窺覘。築壇訪遺址。燒棧想烈焰。轅門俯清渭。徹底綠可染。舊史所登載。一嘗考驗。胡羊笑無敵。黍酒實醇醞。枕戈南山下。馳獵久不厭。比參劍南幕。壯志就收斂。卜鄰揚雄宅。遂欲老鉛槧。但愛古柏青。肯顧海棠豔。人生不易料。白首東歸剡。稽山秋峨峨。鏡水春澌澌。餘俸買扁舟。月下采菱芡。湖山最奇處。容我釣石占。婚嫁幸已畢。百事不關念。但當勤醉歌。一死不汝欠。

對酒

社醅又借醉顏酡。手挽鄰翁作浩歌。江月偏能照蓬戶。京塵終不汗漁蓑。苦吟且復歛吾帽。對奕真當爛汝柯。回首紛紛俱夢耳。人間何處有天魔。

夜雨

正看飛雪暗江天。不覺新春已粲然。花氣襲人娛獨夜。雨聲遶舍送豐年。樵風未改山川舊。襖事空悲歲月遷。一榼可營身尙健。故應先治下湖船。

己巳正月十八九間雪復大作不止

早衰常畏雪。況復在江干。三日不能出。數年無此寒。捲簾驚淅淅。下榻覺蹒跚。稚子應憐我。孤吟興未闌。

寄子虞

汝官南壽春。我居東會稽。疋馬護秋塞。兩犢翻春泥。淮天沙雁過。江村雪雲低。書來動半年。相望常愴悽。父子不共耕。此悔真噬臍。明年城西社。爛醉相扶攜。

書夢

我夢舉有司。雞唱起裹飯。又夢趁早朝。漏舍坐待旦。既寤兩無有。撫枕徒浩歎。今雖去爲農。飯牛亦夜半。何曾得放慵。笑睡到日吁。一笑俱置之。浮生固多難。

示子適

家貧不學儉。物理有固然。要是善用短。足以終其年。我家稽山下。稟賦良奇偏。敢言中人產。日或無炊煙。有兒更耐窮。伴翁理遺編。短檠幸能繼。竟夜可忘眠。

對食有感

孟酌以助氣。匕筋以充腹。沾醉與屬饜。其害等嗜慾。歡醜有餘歡。食淡百味足。養生所甚惡。旨酒及大肉。老翁雖無能。更事嗟已熟。勿歎茹三間。養汝山林福。

又

我老雖無家。其實如客耳。食至舉匕箸。飽則捨而起。廚人有勤惰。我豈形愠喜。園畦摘青蔬。地碓舂赤米。勞人固已多。坐享類常泚。作詩本自規。亦以告閭里。

雪夜

荒郊翼翼行。斷壟倬倬耕。常情所藉躡。豈復懷不平。歸來臥破屋。中惟一牀橫。且燒生柴火。靜聽涇雪聲。

又

今年春苦寒。風雪塞戶牖。况我窮閭士。袴敝衣見肘。正須小忍之。此事豈得久。努力辦一壺。西村看花柳。

又

瓦疎雪墮簷。窗破風吹燭。短裘不及氈。手脚盡皸瘃。猶勝南鄰叟。一褐竟未贖。薄酒城中來。清夜聊相屬。

初春

柳拂朱橋湖水生。園林處處聽新鶯。亦知人世當行樂。無奈春陰不肯晴。走馬章臺身縱老。看花杜曲眼猶明。只應詩思年來減。預法同遊議罰觥。

春日雜興

方塘盎盎帶泥渾。遠草青青沒燒痕。只道雨晴春晝永。歸時不覺已黃昏。

又

南村北村鼓鼙鼙。剗牟刺豕祭潭龍。一生衣食財取足。百世何妨常作農。

又
小甌有米可續炊。紙薦竹馬看兒嬉。但得官清吏不橫。卽是村中歌舞時。

又
夜夜燃薪煖絮衾。禺中一飯直千金。身爲野老已無責。路有流民終動心。聞有流移人到城中。

又
出仕常騎秃尾驢。歸休自駕折轅車。今朝偶遇村夫子。借得齊民一卷書。

又
更事多來見物情。世間常恨太忙生。花開款款寧爲晚。日出遲遲却是晴。

又
一枝筇杖一山童。買酒行歌小市中。莫笑摧頽今至此。當年萬里看春風。

又
四十餘年學養生。誰知所得亦平平。體孱不犯寒時出。路溼常尋乾處行。

又
攪睡禽聲曉傍簷。泥人花氣午穿簾。懽情老去年年薄。困思春來日日添。

又
陰晴不定春猶淺。困健相兼病未蘇。見說市樓新酒美。杖頭今日一錢無。

又
乍晴乍雨忽經旬。半醉半醒還過春。春臥不知菴外事。閑吟聊適夢中身。

又
行人陌上思悠悠。十里斜陽古渡頭。一片落花無覓處。只教芳草管閑愁。

小鬢乘竹輿至柳姑廟而歸

殘雲斷處漏斜陽。草滿平隄柳著行。颺颺畫船來北港。翻翻青繖度南塘。行人相賀新年健。逃戶雖窮舊業荒。感物興懷空絕歎。才衰無語付詩囊。

春曉

初見天窗一點明。旋看曉色到簷楹。衾裯溫煖留殘夢。鳥雀呼鳴報快晴。雖喜心隨年愈老。卻愁事與日俱生。平川漫漫煙蕪綠。筋力猶堪給耦耕。

肩輿歷湖桑堰東西過陳灣至陳讓堰小市抵暮乃歸

堤遠沙平草色勻。新晴喜得自由身。芋羹豆飯家家樂。桑眼榆條物物春。野店茶香迎倦客。市街犬熟傍行人。牆頭婦女更相語。認到先生折角巾。

又

貪看西南一面山。不知信步到陳灣。未言散釋經旬病。且要消磨半日閑。蔬糲過寒常鬱鬱。鳥聲迎暖已關關。斜陽不爲行人駐。十里鐘來翠靄間。

書適

疇昔花前醉放顛。卽今不飲亦陶然。太平固自多遺老。獨往何妨是斥仙。扶杖每觀南畝鱣。解衣時作北窗眠。人間賢俊方雲集。我遇龍蛇豈厄年。

陳讓堰市中遇吳氏老自言七十六歲與語久之及歸送予過市猶戀戀不忍去

就店煮茶古堰邊。偶逢父老便忘年。嗟予空忝十年長。聞道慚無一日先。壯子當門能碌碌。諸孫承業亦翩翩。熟思遊宦終何事。悔不從公曝背眠。

午炊

江路初晴日。煙蕪古廢城。青鍼秧稻出。黑蠶稚蠶生。山際牛羊路。林間雞犬聲。午炊聊小憩。野老解逢迎。

古風

曠象薦清廟。餘材突溝中。二者雖甚遠。殘生其實同。人當貴其身。豈復論窮通。寧爲原上草。一寸搖春風。

又

木生雖拱把。鮮不困斧斤。枯朽亦可全。又以蕪故焚。嘉禾終銍艾。豈獨草見耘。此理講已熟。要當尊所聞。

肩輿至石堰村

偶上籃輿踏夕陽。醉魂困思兩悵悵。潤薪旋拾供茶竈。詩稿初成寄藥囊。村舍藝麻驅鳥雀。牧童隨草放牛羊。歸來徙倚衡門久。始覺中春已日長。

睡起遣懷

百事不能能荷鋤。不鋤菜畦鋤芋區。身存那用十年相。陂壞且爲凶歲儲。百事不學學作詩。不作白紵作竹枝。黃陵廟前風浪惡。青衣渡口行人悲。老病閉門常憤憤。芋不復鋤詩亦廢。客來剝啄喚不應。一味人間占閑退。今朝一日三倒牀。歎息春晝如年長。摩挲困睫喜湯熟。小瓶自折山茶香。

春晴

柳未吹絲筍未抽。春郊風日正清柔。疎疎簾影供高臥。裊裊輿芋嬾出遊。無客共謀良夜醉。有花空動故年愁。雲生祇恐還成雨。自向園頭聽鷓鴣。

書感

鴨子陂頭看水生。蜂兒園裏按歌聲。天公用意誰能測。未許吾曹醉太平。

野興

莽莽寬野闊。悠悠曠遠身。氣從林下吐。言向醉中真。社稷元當壽。江鷗豈易馴。興來無遠近。隨處岸綸巾。

野步

堤上淡黃柳。水中花白鵝。詩情隨處有。此地得偏多。

又

水生已抹堤。草長復侵路。小蝶仍可憐。欲下却飛去。

稽山

我識康廬面。亦撫終南背。平生愛山心。於此可無悔。晚歸古會稽。開門與山對。奇峯縮鬚鬢。橫嶺掃眉黛。豈亦念孤愁。一日變萬態。風月娛朝夕。雲煙闔明晦。一洗故鄉悲。更益吾廬愛。東偏得山多。寢食鮮不在。寧無度世人。談笑見英概。銜風倘可留。爲我傾玉瀝。

緋桃開小酌

我廬城南村。家無十金產。種花雖歷歲。名品終有限。頗欲及暇時。著譜書之簡。今朝緋桃開。歡喜洗酒琖。鄰翁亦喜事。爲我一笑莞。但恨首稽盤。蔬薄欠佳饌。往來見已熟。勸揖忘媿赧。一事粗可言。似具識花眼。

夜中獨步

春半寒初退。更闌睡不成。褰裳偶獨起。曳履得徐行。月上烏未宿。水深鼃亂鳴。踟躕忽已久。殘漏下高城。

春寒復作

春寒已解忽復作。病思不堪當語誰。青燈熒熒耿欲滅。殘雨滴滴休無期。故人已死夢中見。壯志未忘心自知。青絲玉井聲輾轉。又是窗白鴉鳴時。

大雨排悶

地潤礎流水。氣蒸人脫裘。前知暴雨至。孰解老農憂。

又

三日斷行路。東薪無處求。牀頭周易在。且復送悠悠。

室中屏去長物戲作

久從昭代乞殘骸。荷鍤隨行偶未薶。四壁盡空君勿怪。纔留一物卽關懷。

對酒

酒非攻愁具。本賴以適意。如接名勝遊。所挹在風味。庸子墮世紛。但欲蕪一醉。麴生絕俗人。笑汝非真契。

曝舊畫

故篋開緘一愴情。斷縑殘幅尙知名。翩翩戲鵲如相語。洶洶驚濤覺有聲。柳暗正當煙未斂。花穠仍值雨初晴。百

年手澤存無幾。蟲蠹塵侵祇涕橫。

予以淳熙戊戌歲自蜀歸時年五十四今三十有二年矣猶復強健得小詩自賀
入玉門關到酒泉。昔人想望若登天。豈知萬里西征客。歸臥家山三十年。

花下小酌

柳色初深燕子回。猩紅千點海棠開。鰲魚蒨菜隨宜具。也是花前一醉來。

又

雲開太華插遙空。我是山中採藥翁。何日胡塵掃除盡。數溪道上醉春風。

夜酌

我有一瓢酒。與君今夕同。鳴簷社公雨。捲野沛歌風。閱世花開落。觀身劫壞空。北邙丘壠盡。太息幾英雄。

數日不作詩

吾詩鬱不發。孤寂奈愁何。偶爾得一語。快如疏九河。黃流舞浩蕩。白雨助滂沱。門外無來客。花前自浩歌。

幽居示客

嗜睡疎茶盃。逢春愛麴車。聊將枕流耳。靜聽屬私蛙。林下閑成癖。人間嬾莫加。孫登欲長嘯。四座且無譁。

又

齒髮雖俱弊。神明尙有餘。幽扉鍊奇藥。細字錄仙書。野水鳴苔徑。長松蔭草廬。客來多謝病。深媿問何如。

春日登小臺西望

九十衰翁身尙健。流年過眼如奔電。憶昔初來對行在。衫鬢青青接英彥。中間亦嘗走梁益。萬里憑高望鄉縣。散關驛近柳迎馬。駱谷雪深風裂面。東歸却尋書生事。誤長諸儒集賢院。乞身七年罪未除。君恩尙許寬嚴謹。癡頑亦復病不死。春到故園家釀美。雨餘草長四野青。日落煙生半山紫。

醉賦

我疾多自愈。初非遇奇方。我生固多難。欲慮忽已忘。頽然亂書中。不知歲月忙。有時或得意。炙冷不暇嘗。乃今又

大悟萬事付一觴。書中友王績。堂上祠杜康。

卽事

我本區中士。偶來湖上居。時尋一枕夢。閑展數行書。得醉常歡甚。無炊亦晏如。今朝好天氣。一笑命柴車。

落花

山杏溪桃次第開。狂風正用此時來。未妨老子憑欄興。滿地殘紅點綠苔。

春日

春來日日困春醒。徂歲如馳得我驚。山寺餽茶知穀雨。人家插柳記清明。登階勃窣晨雞老。侵路縱橫野草生。堪歎筋骸猶健在。強隨丁壯事深耕。

戲詠園中春草

離離幽草自成叢。過眼兒童采擷空。不知馬蘭入晨俎。何似燕麥搖春風。

又

童子爭尋鶉鴿飯。醫翁日曝蝦蟆衣。欲賡楚客詠殮菊。却媿周人歌采薇。

二月二十四日夜大風異常

天青無雲星錯落。大風忽自西南作。壽藤老木不自全。門外豈容存略約。翁媪驚呼兒女泣。屋瓦飛空吁可愕。某傾共閱烏鵲死。空黑還疑鬼神惡。南鄰僅有瓜牛廬。轉盼卷去無遺餘。腐儒自笑獨耐事。一燈熒熒猶讀書。

雨夜與鄰翁飲用前輩韻

老人閱世真悠悠。八十已過九十來。茆檐參差映煙樹。蕭條雞犬三家聚。一樽鄰翁送賓主。醉語豈憂多謬誤。我作吳歌君起舞。夜雨莫辭泥沒屨。

雜感

壯遊回首海茫茫。默數方驚歲月長。舊事莫論齊柏寢。殘軀方似魯靈光。

又

天際晴雲舒復卷。庭中風絮去還來。人生自在常如此。何事能妨笑口開。

又

射的山前花柳新。典衣買酒過殘春。但甘身作噲等伍。莫信人間髯絕倫。

又

禍福雖云不可猜。人生要豈願爲才。獨樓正使非王樂。犧象何疑是木災。

讀史

蕭相守關成漢業。穆之一死宋班師。赫連拓跋非難取。天意從來未易知。

又

顏良文醜知何益。關羽張飛死可傷。等是人間號驍將。太山寧比一毫芒。

出遊

社近頻逢雨。春深却喜晴。畚煙傍山起。神鼓隔林鳴。客駐觀農鋤。兒歸遺母羹。豐年多樂事。何以報時平。

又

綠樹魚鹽市。青蕪雉兔場。采桑村女集。入學幼童忙。戶賽祈蠶願。家藏問孝章。村坊多美酒。爛醉答年光。

夜與戲作

遙夜寂無譁。江城鼓屢搗。傍牆行蹊踣。脫帽髮鬢髹。詩和玲瓏韻。燈開頃刻花。會心有佳處。不寐到啼鴉。

酒熟書喜

小槽春夜壓春醪。天與龜堂慰作勞。喜似繫囚聞縱釋。快如苛癢得爬搔。未陳尊杓心先醉。傍睨江山氣已豪。久厭羶葷愁下筯。眼明湖上得雙螯。

湖上

寒食初過穀雨前。輕衫短帽影翩翩。獨轆碾破新堤路。雙耜犁殘古廟壩。萬事不禁劉毅擲。諸人誰著祖生鞭。市壚處處誇新釀。且就花陰一醉眠。

春晚

落絮飛花又滿城。年光大半付春醒。蹇驢閑後詩情減。陣馬拋來髀肉生。少日雕蟲真小技。暮年畫餅更虛名。壘中幸有黃庭在。安得高人與細評。

食酪

南烹北饌妄相高。常笑紛紛兒女曹。未必鱸魚芼菰菜。便勝羊酪薦櫻桃。

六言

愛馬能成一癖。結髦可忘百憂。我亦時時自笑。開編萬事俱休。

又

遇合生封萬戶。阨窮不直一錢。此是由來事爾。正須到處欣然。

又

豪士以妾換馬。耕農賣劍買牛。我看浮雲似夢。却貪山水閑遊。

又

風細飛花相逐。林深啼鳥移時。客至旋開新茗。僧歸未拾殘棋。

又

覓飽如籌大事。擁書以墮重圍。誤喜敲門客至。出看啄木驚飛。

又

香煙觸簾不散。燈焰無風自搖。獨倚蒲團寂寂。忽聞山雨蕭蕭。

書意示子孫

我闕人間久。深知理惡盈。莘莘訓來裔。董董作儒生。仕勿卑曹掾。書纔記姓名。芾茨不啻足。此外盡浮榮。

暮春龜堂卽事

風日和晝漏長。蕭然巾履集茆堂。雨餘千疊暮山綠。花落一溪春水香。斷簡檣中塵委積。故人墓上草荒涼。爾

來幸有寬懷處。病退牀頭減藥處。

又

躑躅花開照眼明。緩扶藤杖繞廊行。流年又見一春過。苦雨略無三日晴。覓句未應妨熟睡。漱泉聊足解餘醒。鹿麕雉子常追逐。誰識山翁及物情。

又

日月無根去若馳。故園又見落花時。盃中綠酒不肯飲。鏡裏蒼顏應自知。千丈新堤湖水滿。五更殘漏角聲悲。暮年父子難乖隔。淮浦書來苦覺遲。

又

東皇促駕又天涯。一片難尋墮地花。瘦策穿林數新筍。素屏圍枕聽鳴蛙。蠶房已裹清明種。茶戶初收穀雨芽。欲把一盃壺已罄。謾搜詩句答年華。

莫辭酒

勸君莫辭酒。酒能解君愁。勸君勤采藥。藥可使疾瘳。此外莫廢書。書亦豈君誤。古來敗人事。正以不學故。愁去疾亦平。便腹如瓠壺。努力貯萬卷。無此令君愚。

懷友

酒家旗下分攜久。山驛燈前感慨頻。人事已隨雙鬢改。柳條又見一年新。

蘭亭道上

湖上青山古會稽。斷雲漠漠雨淒淒。籃輿晚過偏門市。滿路春泥聞竹雞。

又

蘭亭步口水如天。茶市紛紛趁雨前。烏笠遊僧雲際去。白衣醉叟道傍眠。

又

陌上行歌日正長。吳蠶捉績麥登場。蘭亭酒美逢人醉。花塢茶新滿市香。蘭亭。官酤名也。花塢。茶名。

又
箭箠弓戟小獵回。壯心自笑未低摧。前身家近盤閭路。曾看吳王射雉來。

殘年

殘年光景易駸駸。屏迹江村不厭深。新麥熟時蠶上簇。晚鶯啼處柳成陰。短檠已負觀書眼。孤劍空懷許國心。惟有雲山差可樂。杖藜誰與伴幽尋。

春老

春色垂垂老。山家處處忙。園丁賣菰白。蠶妾采桑黃。候雨占秧信。催兒築麥場。醉眠官道上。人爲護牛羊。

睡起

睡起披衣弄素琴。房櫳槐柳綠成陰。春殘鶉鴉如多恨。雨惡醱醲欲不禁。羸病強行常蹉跎。癡愚多慮每噫喑。行年九十獨賒死。誰測高高厚厚心。

自規

立志當如塞決河。犀編鐵硯未爲過。文難稱意古所恨。學不盡才今亦多。四海交朋常隔闊。一生光景易蹉跎。老年尙欲鞭吾後。太息無人爲詆訶。

夜聞雷雨大作

暗空霧雨無時已。卷地風雷却是晴。九十老翁更事久。寄言兒女不須驚。

卷八十二

賞山園牡丹有感

雒陽牡丹面徑尺。鄜時牡丹高丈餘。世間尤物有如此。恨我總角東吳居。俗人用意若侷促。目所未見輒謂無。周漢故都亦豈遠。安得尺箠驅羣胡。山陰距長安二千七百四十里。距雒陽二千八百九十里。

山居

平生絕愛山居樂。老去初心亦漸償。直道本知天可恃。驕懷真與世相忘。徑穿脩竹衣巾爽。盤設靈苗匕箸香。但恨相逢無魯叟。浩歌小試接輿狂。

閑詠

蕭蕭華髮映烏巾。五十年前故史臣。正使老來無老伴。未妨閑處作閑人。按行池水知增耗。點檢庭花見故新。更有菴中策勛事。投牀鼻息聒比鄰。

又

事業無聞負聖時。滄波自照角巾欹。養成林下無窮癩。占盡人間徹底癡。小麥繞村苗鬱鬱。柔桑滿陌椹纍纍。醫翁筮叟真堪友。搜索殘尊與共持。

又

謝事歸來一把茅。村深樵牧日論交。未言客路塵衣化。最恨書窗鐵硯凹。戀戀故袍誰復念。便便癡腹敢辭嘲。卜居雖僻吾猶悟。失却岷山理鶴巢。

又

白頭羈客更堪論。身寄城南桑竹村。一榻琴書春寂寂。四山霧雨晝昏昏。常情共笑門庭冷。好事虛推輩行尊。燒筍炊粳真過足。兒曹不用致魚飧。

又

危途九折浩無津。晚幸收身作散人。俸祿既空憂患少。酒殺雖薄笑歌頻。多添布褐方知老。淨掃茆衡不覺貧。南陌東阡元在望。柴車嬾駕動經旬。

讀樂天詩

放姬鬻駱初何有。常笑香山恨不攄。輸與此翁容易死。一身之外更無餘。

讀許渾詩渾居丹陽丁卯橋其詩丁卯集

裴相功名冠四朝。許渾身世落漁樵。若論風月江山主。丁卯橋應勝午橋。

時鳥

日出鳴布穀。月落鳴子規。一氣之所感。彼亦不自知。架犂最晚至。適當農事時。丁壯戴星出。力作孰敢遲。鳴者既有警。聞者得以思。乃知失時輩。強聒終何爲。百舌亦能言。今默乃其宜。我作時鳥篇。用繼幽人詩。

齒髮數

樂天悲脫髮。退之歎墮齒。吾年垂九十。此事已晚矣。髮脫妨危冠。齒墮廢大嚼。晨興對清鏡。何以慰寂寞。造物本無心。豈欲使汝衰。曷不望長空。兩曜無停時。

送春

新葉張翠幄。落花作紅茵。山蔬旨且柔。家釀清而淳。以我垂老境。送此將歸春。我固惜流年。春亦記陳人。江山處處佳。風月日日新。蹇驢度松岡。短檝橫煙津。蘭亭人已遠。遺韻猶清真。卻下木柵市。天風吹角巾。

初夏

新綠陰中燕子飛。數家煙火自相依。童誇犢健浮溪過。婦閔蠶飢負葉歸。地煖小畦花汞長。泥融幽徑藥苗肥。却居樂事何勝數。一醉旗亭又典衣。

又

江鄉初夏暑猶輕。霽日園林有晚鶯。聊置尊罍師北海。盡除屏障學東平。綠槐露溼單衣爽。紅藥風翻病眼明。每感流年成絕歎。白頭自笑未忘情。

初夏卽事

夏景遽如許。先從草木知。朱纓連蒂剪。紅藥帶花移。病起單衣怯。身閑晝漏遲。空齋無長事。簾影看參差。

古壽人至聞五郎頗有老態作長句自遣

齒落髮斑兒亦老。志衰力惰我寧悲。埋盆便可爲池看。折竹何妨作馬騎。點誦內篇莊叟語。長歌半格白公詩。此身未死須安頓。除却山村百不宜。

郊行

春郊無處不堪行。滿路人家笑語聲。賣劍買牛知盜息。乞漿得酒喜時平。西村日落川雲暝。東嶺虹收海氣清。農事方興戒遊惰。爲君來往主齊盟。

小園

小園草木手栽培。表丈清池數尺臺。拄杖倦時閑倚壁。芳醪熟後喜傳盃。春蕪滿地鹿忘去。夏木成陰鷺自來。堪笑山童慚飽食。時時走報一花開。

初夏雜興

隱趣與誰論。深居湖上村。避蘭寧改路。惜筍不開園。庭草饒生意。溪沙記漲痕。愁來時淺酌。隨時有雞豚。

又

避寂諸緣息。安貧百慮寬。嬾如常抱疾。退似本無官。皎潔鶴翎扇。嵯峨龜屋冠。何勞問唐舉。徹屋是清寒。

又

咄咄無窮事。騰騰暫寓身。月生知改朔。花盡覺經春。市鬩朝沽酒。巫歌夜樂神。興來隨衆出。一笑不妨新。

又

移花得微雨。晒藥遇新晴。悶裏家書到。貧時糴價平。身方抱沉疾。天乃相餘生。莫恨村醪薄。燈前與細傾。

又

倦甚惟思睡。閑來却要行。疏泉入幽圃。映樹覘流鶯。藥品從僧問。琴材就客評。轉頭還一日。正爾送餘生。

思子處

里塚迢迢阻問津。年光冉冉苦催人。未能免俗予嗟老。豈不懷歸汝念親。家釀湖蕪誰共醉。江雲淮月又經春。新詩題罷無從寄。獨倚危闌一愴神。

偶思蜀道有賦

天回驛畔江如染。鳳集城邊柳似搓。萬事已隨流水去。一尊將奈夕陽何。是非無定言何益。窮達徐觀得孰多。幸有漁蓑歸故里。不妨高枕且酣歌。

書意

養得山林氣。羸全此。懷無處不超然。日長琴奕。茆檐下。歲晚江湖。箬帽前。天上本令星主酒。俗間妄謂世無仙。今年茶比常年早。笑試西峯一掬泉。今年清明前數日。山中已有新茶。

贈倪道士

羽衣暫脫著戎衣。坐定方驚語入微。歸隱玉霄應不出。他年容我扣巖扉。

又

我坐虛名剩得窮。百年身墮畏途中。看君一棹煙波樂。悔不常爲采藥翁。

哭李孟達

舊交多已謝明時。孟達奇才最所思。晚歲立朝雖小試。平生苦學竟誰知。尊前一笑終無日。地下相從却有期。慟絕寢門霜日暮。短篇聊爲寫餘悲。

送黃文叔守福州

黃公天下士。遇主紹熙年。議論前修似。聲名九牧傳。巨舟夷險濟。拱壁始終全。勇退先諸老。榮歸總十連。旌旄照關路。冠蓋盛離筵。內閣恩光重。宸毫墨色鮮。任方分斧鉞。歸即珥貂蟬。病叟難爲別。臨期一悵然。

初夏雜詠

揮袖謝人間。一窗如海寬。鹿麕爲老伴。松屑當朝餐。自悟達生理。儘容非意干。却嫌孤寂甚。支竈學燒丹。

又

病退身仍健。年侵趣更高。芳醪溢蜜榼。短褐束鄒緜。本不營三窟。何由挫一毫。煙帆幾時掛。長嘯破秋濤。

又

屐路緣虛壁。棋軒枕小灘。玄言不媿藉。熟睡却輸搏。咄咄書常懶。便便腹本寬。山園時節好。杏子已微丹。

又

去日驚鑽燧。窮途困負薪。故人天末遠。薄俗眼邊新。蹇蹇飄零客。悠悠賸長身。寸心知己矣。端欲爲誰陳。

又
昔日江湖上。飄然無定居。頻傾京口酒。亦食武昌魚。北首心空壯。東歸憤不摅。豈知齒牙落。送老一茆廬。

卽事

萬里山河拱至尊。羽林鐵騎若雲屯。羣公先正不復作。故國世臣誰尙存。河洛可令終左袵。芻蕘何自達脩門。王師一日臨榆塞。小醜黃頭豈足吞。

漁扉

蜻蜒浦上一漁扉。回首人間萬事非。賣藥山城攜鶴去。看碑野寺策驢歸。偶因束帶悲腰減。常爲梳頭感髮稀。午睡定知無客攪。曲肱閑看兩羣雉。郊居遇雨作。則無客至。

山行見三十年前題名悵然有賦

百年村落半丘墟。垂老經過一柁車。金石闕訛秦漢舊。謂秦始皇刻石。及禹空上漢隸。山川絕勝晉唐餘。醉題墨淡塵昏壁。詩社人亡淚濺裾。名宦半生成底事。早時恨不學犁鉏。

山房

柴門不掩俗人稀。成就山房一段奇。木葉最宜新雨後。鳥聲更勝暮春時。家貲屢罄緣耽酒。宿習猶存爲愛詩。別有一條差自慰。木苗芎茁正離離。

縱筆

兀兀一無爲。冥冥百不知。倦多惟嗜睡。食晚遂忘飢。開卷渾如夢。逢人不省誰。何須覓知識。木石卽吾師。

又

一點湛空明。居然萬事輕。菜元勝肉食。車豈異徒行。幻境終何在。金丹本自成。信能如是解。土苴亦長生。

又

薙草除枯葉。勞人亦動心。無愁疎把酒。習懶罷彈琴。濯垢臨溪水。追涼就木陰。常尋省力處。外物孰能侵。

夢事飽曾經。蠶臺了不驚。窵親同一妄。魔佛兩皆平。應物如風過。投牀卽鼾聲。晨興拂几硯。猶恨太勞生。

窗下戲詠

飛來山鳥語惺惚。却是幽人半睡中。新竹成陰無彈射。不妨同享北窗風。

又

三尺清池鏡面平。剪刀葉底戲魚行。吾曹安得如渠樂。傍渚跳波過此生。

又

何處輕黃雙小蝶。翩翩與我共徘徊。綠陰芳草佳風月。不是花時也解來。

埭西小聚

瓦盎盛蠶蛹。沙甌煮麥人。三家小聚落。兩姓世婚姻。父老衣冠古。閭閻風俗淳。不應陶靖節。獨號葛天民。

老歎

步遲腰偃僂。面瘦骨崢嶸。貧病消前業。耕樵樂太平。有歌悲易水。無酒醉湖城。何許容身得。門前釣艇橫。

衰甚書感

髮殘不勝冠。齒墮欲廢嚼。譬如亭臯木。秋至葉自落。豈惟形骸變。意氣已非昨。牀隅倚拄杖。壁上挂雙屨。經旬不出戶。薄飯羹藜藿。居然遠霜露。因得養腰脚。年衰固應死。延促未可度。人之生實難。壽終固爲樂。開卷思千載。闕世等六博。志士有蹈海。儒生亦投閣。何如釀濁醪。遇興時獨酌。半酣望青天。萬事付一噓。

山行過僧菴不入

垣屋參差竹塢深。舊題名處嬾重尋。茶壚煙起知高興。碁子聲疎識苦心。淡日暉暉孤市散。殘雲漠漠半川陰。長吟未斷清愁起。已見橫林宿暮禽。

山行

閑人日日得閑行。況值今朝小雨晴。水淺遊魚渾可數。山深藥草半無名。臨溪旋喚罾船渡。過寺初聞浴鼓聲。小醉未應風味減。滿盤青杏伴朱櫻。

夜窗

性中汝本具光明。蔽障除時道自成。手刈茆苫數椽屋。身鉏菜煮一盃羹。天人送勝誰能測。禍福無常不待評。惟有吾心終可恃。夜窗袖手聽松聲。

送邢芻甫入閩

兩窮相值每相憐。聞子南遊一愴然。莫道此行非久別。衰翁何敢望明年。

又

君行正及荔枝丹。想見臨觴爲破顏。此外但宜烹茗雪。傷生不用擘螻山。

從邢芻甫求桃竹拄杖

拄杖當年盛得名。一枝尙覺百金輕。老人不復須春草。只要攜渠處處行。

老雞

老雞擁腫不良行。將旦猶能效一鳴。碓下糠粃幸不乏。何妨相倚過餘生。

還東

還東寒暑幾推移。漸近黃梅細雨時。窗下興闌初掩卷。花前技癢又成詩。囊錢不貯還成癖。官事都捐未免癡。賴是病軀差勝舊。一盃藜粥且扶衰。

行東山下至南巖

穿林了不厭崎嶇。邂逅幽懷得少摠。昔媿出山成小草。今知流水羨遊魚。呦呦馴鹿隨輕策。泱泱流泉入野渠。坐覺塵襟真一洗。正如頭垢得爬梳。

書幸

謀身從昔本迂疎。豈料餘年却晏如。盤箸無時闕鮭菜。道途隨事有舟車。故衣已敝月三浣。短髮雖殘日一梳。里巷浮沉亦何憾。見賢猶及渡江初。

放言

酒熟固可喜。酒盡亦陶然。有客則劇談。無客枕書眠。飢啜羹不糝。閑玩琴無絃。摘嗅砌下花。掬弄澗底泉。啄木抱蠹榘。搏黍鳴桑顛。欣然爲一笑。世故何足捐。無人罵鄭虔。亦無嘲孝先。回顧三角童。吾與汝忘年。

晚步門外

槐葉已成陰。楸花亦離離。日暮門無人。迨我消搖時。左持漆園書。右挾栗里詩。風從湖面來。成此一段奇。石路雖甚狹。雅稱拖筇枝。少頃山月明。照我角巾欵。

夏夜

風便更漏明。室虛蟲蚋靜。筋骸日益衰。厭事樂幽屏。清燈北窗下。突兀寫孤影。進學無新功。賦詩聊自警。

甕池

藴甕東階下。澹澹一石水。買魚畜其間。鱣鱖三十尾。力微思及物。爲惠止於此。無風水不搖。得志魚自喜。涵泳藻與蒲。永不畏刀几。飯罷時來觀。相娛從此始。

種菜

菜把青青間藥苗。豉香鹽白自烹調。須臾徹案呼茶椀。盤箸何曾覺寂寥。

又

老農飯粟出躬耕。捫腹何殊享大烹。吳地四時常足菜。一番過後一番生。

又

白苣黃瓜上市稀。盤中頓覺有光輝。時清閭里俱安業。殊勝周人詠采薇。

又

引水何妨藝芥菘。圃功自古補三農。恨君不見岷山芋。藏蓄猶堪過藏凶。

白首

白首歸來老故園。索居情味更堪論。關河悠逸夢魂到。親舊凋零書札存。身病自憐詩思退。家貧客笑酒醅渾。昏昏只欲投牀睡。兒勸孫扶強出門。

東窗遺興

巷陌過從少。園林景物新。羣魚時戲藻。馴雉每依人。映戶槐陰密。堆盤麥餌珍。殘春又陳迹。撫事一傷神。

又

巾屨長閑客。簾櫳薄暑天。巢空重乳燕。葉密未鳴蟬。壺箭看多算。圖書理斷編。悠然已日夕。卻上采菱船。

又

夏淺清陰滿。村深白日長。言多思寂默。酒醒悔猖狂。老馬漫知路。鈍錐寧出囊。此翁真耄矣。嬾放亦何傷。

北窗

晏嬰長不滿五尺。淳于飲能至一石。老無功名未足歎。滑稽玩世亦非昔。當年交友傾一時。誰料蓬門今寂寂。陳山李石千載士。早死當爲天下惜。斯文顯晦端有命。道悠運促非人力。我今稽山一老農。百歲不死知何益。後生可畏要有人。誰能隱若一敵國。狂言勿發心自驚。歸臥北窗還默默。

小酌

偶向東園把一盃。不辭團坐埽蒼苔。野花經雨自開落。山鳥穿林時去來。皂白正非天欲辨。青黃要與木爲災。今年秋後猶能健。賸乞梅栽與李栽。

夏日

暑雨初晴畫漏邊。江鄉樂事有誰知。村村蠶麥登場後。戶戶吳蠶坼簇時。

又

齒髮凋零奈爾何。年光暗裏易消磨。街槐正喜清陰密。巷柳還驚蠹葉多。

又

竹根斷作眠雲枕。木癭剝成貯酒尊。怪怪奇奇非著意。自無俗物到山村。

又

動身尙嬾那堪事。學古無成罷讀書。枕上側眠聽語燕。池邊小立看游魚。

悶欲遠遊身苦癩。病思閑話客誰過。北窗一枕差堪樂。無奈茶盃作祟何。

又

黃葛蚊廚睡欲成。高槐陰轉暑風清。倚牀奴子垂頭坐。搔手孫兒小步行。

又

斲取溪藤便作香。煉成崖蜜旋煎湯。蕭然巾履茅堂上。不畏人間夏日長。

又

謝客捐書日日閑。行穿密竹臥看山。巖前恨欠煎茶地。安得芴茨一小間。

又

蘋生洲渚微風起。梅熟園林細雨來。咫尺柴門常癩出。不教拄杖損蒼苔。

又

側臥橫眠百不知。軒窗寂寂雨絲絲。豈無布襪青鞋興。過卻梅天出未遲。

又

幽花姪姪開還斂。小蝶翩翩去復留。貪睡畸翁俱不領。被人錯喚作閑愁。

又

山下柴荆晝不開。苔生古井暗楸槐。新詩哦罷閑無事。移取藤牀睡去來。

睡起

不恨無人到野堂。惟將笑睡答年光。風經荷葉翻翻綠。雨溼松枝細細香。薄俗空成土龍笑。長歌未盡接輿狂。掬泉弄石翛然晚。又得今年一夏涼。

雨中作

湖曲兩淒淒。芴檐觸額低。衡門元少客。窮巷况多泥。解渴黃梁粥。嘗新白苴齏。吾生真自足。不恨老鉏犂。

感物

物情豈願歲時過。一氣潛移不自由。日出鷓鴣還喚雨。夏初蟋蟀已吟秋。今年四月聞蟋蟀鳴。

又

小園清曉岸綸巾。物態年光日日新。綠葉自生黃自落。不應秋至始愁人。

舟中有賦

一枝柔艣聽咿啞。炊稻來依野老家。山寺日中齋鼓動。江樓風急酒旗斜。綠梢嫋嫋搖新竹。翠蔓離離熟早瓜。閑客去留隨所遇。不知何處送棲鴉。

晨起獨行綠陰間

楸槐陰裏漏朝暉。芳草離離露漸稀。不恨過時嘗煮酒。且欣平日著生衣。病逢鍼藥如差減。貧比簞瓢尚庶幾。惟是未能忘習氣。亂書隨日又成圍。

獨至遜菴避暑菴在大竹林中

赤日黃塵厭垢紛。竹林深處寄幽欣。如聽嵩雒風前笛。似看瀟湘雨後雲。園鹿知時新解角。池魚得意自成羣。悠然一笑誰能識。坐勝天魔百萬軍。

又

世俗元非不汝忘。汝歸安取醉爲鄉。藥苗野蔌山家味。柏子松房道室香。一卷隱書爲日課。數聲啼鳥謝年光。客來莫笑茆茨陋。占盡炎天一味涼。

短歌行

上樽不解散牢愁。靈藥安能扶死病。千鈞強弩無自射虛空。六出奇計終難逃定命。人生斯世無別巧。要在遇物心不競。憂忘寢食怒裂眦。孰若憑高寄孤詠。炎天一葛冬一裘。藜羹飯糗勿豫謀。耳邊閑事有何極。正可付之風馬牛。

山寺

路盡初逢寺。行行獨叩扉。民貧稀送供。僧老少完衣。日正樓鐘動。溪深藥草肥。吾衰亦久矣。捨此欲疇依。

明日復欲出遊而雨再用前韻

小艇爭浮浦。幽人獨倚扉。新泥添燕壘。細雨溼鶯衣。甚紫桑新暗。秧青水正肥。欣然語鄰父。投老得相依。

暇日登東岡

雙屨青芒滑。輕衫白苧涼。雲生半巖潤。麝過一林香。童子持碁局。廚人饋粟漿。歸來更清絕。淡月滿林塘。

暴雨

黑雲如龍爪。白雨如博碁。老屋處處漏。此夕將何之。豈惟移牀避。殆欲懸釜炊。擾擾舍中人。具食不以時。兒女乃可憐。赤脚啼午飢。語兒姑少忍。開霽會有期。

幽事

衰翁喜幽事。闔戶不升堂。酒僅三蕉葉。琴纔一履霜。東坡自能飲三蕉葉。范文正公酷好琴。止彈履霜一曲。詩謂之范履霜。好遊力不給。愛客病相妨。獨有詩情在。年來亦漸忘。

又

野館多幽事。畸人無俗情。靜分書句讀。且戲習酒章程。藥褚藏難見。碁枰算未成。悠然寄孤幘。吾豈固逃名。

卷八十三

病起雜言

國不可以無蓄。身不可以無疾。無蓄之國亂或更速。無疾之身死或無日。昆夷獫狁無害於周之王。闢土富國無救於隋之亡。壯夫一臥多不起。速死未必皆羸尫。古來惡疾棄空谷。往往更得度世方。我年九十理不長。况復三日病在牀。天公念之亦已至。儆戒不使須臾忘。起居飲食每自省。常若嚴師畏友在我傍。躋民仁壽則非職。且爲老憊鍼膏肓。

雨後

小築濤江外。微涼暑雨餘。傾囊致歡伯。信脚到華胥。芳草翩翩蝶。清池潑潑魚。此翁雖老矣。作計未全疎。

一夜茅簷雨。晨興乃爾涼。禽魚皆遂性。草木自吹香。微潤生琴薦。纖塵避筆牀。悠然北窗興。真欲傲羲皇。

示客

久泛煙波不問津。騰騰且復養吾真。每持盃酒呼江月。殊勝征衣化路塵。半枕何人遊蟻垤。立談爲汝脫狐身。挂帆莫恨瀟湘遠。是處相逢一笑新。

蒸溽作雨排悶

柱礎生微潤。簾櫳轉薄陰。蟻遷都邑改。鳩逐怨恩深。齒茗新離水。芭蕉半展心。掩屏惟熟睡。誰與續愁吟。

夏中雜興

梳髮高春後。投牀甲夜初。語艱愁對客。手倦怕催書。笑睡那思覺。甘餐不願餘。更應慙造化。無事到幽居。

又

小響風吹葉。微痕雨點池。興來閑弄笛。客散自收碁。忽忽尋殘夢。時時足小詩。出門俄已暮。忘卻野人期。

又

出赴盟鷗社。歸尋夢蝶牀。愚爲度世術。閑是養生方。休歇書中癖。消磨酒後狂。遠遊亦已矣。不復解輕裝。

又

處世如灰冷。持心似砥平。盤飧無宿戒。香火有常程。樵父供藜杖。陶人售瓦檠。經旬常苦雨。嘯傲送餘生。

又

心慕羲農世。躬行黃老言。采椽聊築舍。橫木卽爲門。短髮冠龜屋。空牀枕竹根。從來薄世味。染指肯嘗鼈。

又

遣信邀鄰父。隨宜具小殮。草燔豚肉美。瓮壓酒醅渾。易致商山皓。難招楚澤魂。嗟予亦衰矣。心事與誰論。

卽事

翁自析薪兒負薪。一生不似此年貧。折除卻得常強健。天定方知果勝人。

又

楸垂落索槐吐花。溪女採蓮童抱瓜。一年光景又將半。愈老愈知生有涯。

又

煙雨淒迷晚不收。疎簾曲几寄悠悠。一雙蚊蝶來何許。點盡青青百草頭。

又

生來骨相本酸寒。天遣沙頭把釣竿。但稱山人搨耳帽。敢希楚客切雲冠。

又

魚鱸羣出天將雨。鼃黿爭鳴草滿庭。莫道歸休便無事。時時襪裊伴園丁。

又

幽鳥飛鳴翠木陰。小魚游泳綠波心。滿前好句無人領。堪笑寒窗費苦吟。

又

小閣憑欄望遠空。天河橫貫斗牛中。他年鼓角榆關路。馬上遙看與此同。

又

幽鳥呼人入睡鄉。層層露葉漏朝陽。臨池只欲消殘醉。無奈鶉兒似酒黃。

夏日幽居

赤日黃塵一點無。負山臨水是幽居。爽如瑞露零仙掌。清似寒冰貯玉壺。孤艇過時驚宿鷺。溼煙深處亂風蒲。倚
然欲棄人間去。天際聯翩誰與俱。

枕上

小疾知閑樂。微涼與睡宜。膏騰如欲覺。展轉復多時。四壁人聲寂。疎簾日影移。詩囊與藥裹。一步不相離。

題望海亭事在以龍絕頂

瑞龍千丈何蜿蜒。蒼鱗翠鬣翔江邊。路達鏡湖乃下駐。玩珠不去知何年。七州元帥權畫戟。全家終日樓居仙。霜笳一曲入銀漢。碧瓦萬疊浮嵐煙。其間望海最傑觀。疎豁坐占蓬萊先。風雲變化几席上。蛟鼉出沒闌干前。手捫心房倚北斗。眼中萬象俱森然。尙書喚客共領略。遠坊十里聞管絃。從容賦詩出妙思。超絕欲拍微之肩。主中有客垂九十。追逐無路空自憐。夜闌客散公歸院。笙歌隱隱在半天。向來老客今何處。菱唱三更起釣船。

露坐小飲

寂寂柴門閉嫩苔。門前有路走天台。近秋河漢西南落。欲雨風雲東北來。旋摘甘瓜青帶蔓。新鶴玉醴冷傳盃。亦知野外無供給。且復相逢笑口開。

小憩臥龍山亭

山高風浩浩。堂豁海冥冥。綠李分猿噪。蒼苔墮鶴翎。松寒詩思健。茶爽醉魂醒。安得丹青手。傳摹入素屏。

晚涼

笛簟平鋪八尺牀。脫巾高臥對疎篁。近村得雨知何處。此地無風亦自涼。

夏日六言

退士自應客少。幽居不厭椽低。未說盤堆玉膾。且看白搗金蠶。

又

醉面貪承夕露。釣竿喜近秋風。借問孤舟何處。深入芙蓉浦中。

又

溪漲清風拂面。月落繁星滿天。數隻船橫浦口。一聲笛起山前。

又

我是百年遺老。埽空一夢浮名。未到終南二華。且入天台四明。

招客看山

今日清明宜看山。約君來上釣魚船。微雲點破尙堪恨。何況城中塵漲天。

舟中作

平生剩有煙波興。釣瀨時時小艇橫。欲暮山光先慘淡。未秋河漢已分明。捕魚時見連江網。迎荻遙聞過埭聲。想得今宵清絕夢。又攜猿鶴上青城。

清暑

穿竹清我魂。散髮吹我頂。虛窗聽鳴蟬。小檻看汲井。掃地長物空。漱泉齒頰冷。廚人具漿粉。童子鬻山茗。微雲未必雨。且喜收樹影。殘書置不視。樂此清晝永。既夕卽榜舟。門外綠千頃。世事何足論。平生慕箕穎。

五月下旬大熱晦日夜得雨明且涼甚

一雨蕭然洗睡昏。清晨屣履自開門。豈惟爽氣生山袂。坐覺涼颼入髮根。浦口魚多來野鶴。林梢果熟下山猿。吾廬清絕君知否。釣雪寒江不足言。

黃氏冲和堂

冲和堂中和氣。襲堆笏滿牀。羣從集。宜州太史一紙書。百年筆墨猶山立。使君所學何超然。要是胸中不負天。王畿奉使纔廿日。忠厚風流天下傳。國家多事民力困。正要設施先百郡。但令一念與天通。河南南陽亦可問。

暴雨

蒼龍挂東南。天矯峯萬仞。雖然雜雲氣。爪尾略可認。明日暴雨來。繼以雷大震。平地成江河。吞卷纔一瞬。吾廬久傾壞。不壓真葦葦。所欣顛顛中。一飽天不吝。餘功到場圃。草木皆綠潤。蕭然岸角巾。三歎撫庭楯。

書意

策蹇若華駟。歎滴如上尊。人皆可堯舜。身自有乾坤。逢客亦共語。無人還閉門。千年道術裂。誰復見全渾。

又

養生慕黃老。爲治法唐虞。耆壽緣憂懼。危亡坐燕娛。大川宜利涉。蔓草戒難圖。退士惟身處。銘膺豈敢無。

又

委順天知我。經營鬼笑人。定知窮至死。敢恨病經旬。愛酒陶元亮。還鄉賀季真。扁舟吾事畢。遺世亦遺身。

浴罷

浴罷淡無事。出門隨意行。相如知渴減。叔寶覺神清。新月參差影。殘蟬斷續聲。躊躇遂忘去。風露欲三更。

水鄉泛舟

終朝流汗浹衣襟。悵望何時枕簟秋。作雨未成徒益熱。舉盃不醉更添愁。悲歌易水輕燕俠。對泣新亭笑楚囚。別有生涯君會否。煙波無際弄孤舟。

又

赤日黃塵不自聊。泛溪且用沃枯焦。隔林大吠村墟近。掠面風來酒力消。遠火微茫知夜績。長歌斷續認歸樵。扁舟不盡凌風興。却著青鞵踏野橋。

閑詠

平生到處足間關。天遣殘年樂故山。社日連村饜酒肉。豐年無盜伏茆菅。秋來梁燕將雛去。雨過林鳩喚婦還。我亦葛衣新浴罷。爲君滿意說清閑。

江樓夜望

江樓百尺倚高寒。上盡危梯宇宙寬。秋近漸看河落角。天回更覺斗闌干。茫茫浦口煙帆遠。坎坎城頭漏鼓殘。要得故人同躡屐。一尊相屬話悲歡。

連日作雨苦熱

天地一氣爾。陰陽司闔開。鬱蒸以爲雨。回薄以爲雷。久鬱無所泄。造化安在哉。方其欲雨時。雖天不能回。此豈降自天。其實有自來。所以屈宋輩。千載有餘哀。

門外追涼

羽扇綸巾一味涼。曠懷非醉亦非狂。橫林點點暮鴉集。平壑離離新稻香。山月出時閑弄影。水風清處旋移牀。學仙到此無餘說。更覺金丹墮粃糠。

夏夜泛溪至南莊復回湖桑歸

不求奇骨可封侯。但喜枯腸不貯愁。數點殘燈沽酒市。一聲柔橈採菱舟。元知澤國偏宜夜。已就天公探借秋。歸過三更風露重。紗巾剩覺髮飈飈。

雨後殊有秋意

天地新秋入苦吟。詩書萬古付孤斟。愛君憂國孤臣淚。臨水登山節士心。只歎鼻端無妙斲。豈知絃外有遺音。剡中勝踐今猶昔。安得高人支道林。

寓規

百疾皆有源。雖愚猶自知。惟其忽不念。所以悔莫追。微隙爲無傷。一壞誰能支。寔安比鳩毒。先民不吾欺。

又

分量各有窮。升龠不受斗。滿盈靡懷懼。覆敗乃自取。衣笥無複禪。食案有三韭。貧狹雖可嗤。比汝差耐久。

又

人生孰無疾。治疾惟欲瘳。疾瘳藥不止。乃有過劑憂。節食戒屬饜。養氣常致柔。金丹無此功。往哉勤自修。

新涼

儘道新涼好。無如晝漏長。奇文窺楚屈。妙理玩蒙莊。靜臥貧猶樂。高歌醒亦狂。翩翩雙蝶子。也似惜年光。

又

月入楸梧徑。風生蘆荻林。脫巾涼入髮。臨水爽披襟。寒暑推移久。江湖感慨深。功名雖已矣。猶得寓孤吟。

追涼至安隱寺前

枕石何妨更漱流。一涼之外豈他求。寺樓無影月卓午。橋樹有聲風變秋。殘曆半空心悄愴。岸巾徐步髮飈飈。定知從此清宵夢。常在沙邊伴白鷗。

湖上夜賦

冉冉秋將至。沉沉夜向晨。河隨天漸轉。露洗月如新。瘦竹過眉杖。輕紗折角巾。漁歌四面起。煙水澹無津。

又

清絕追涼地。平生得未曾。似嘗仙掌露。如嚼玉壺冰。狂學菱舟曲。閑尋竹院僧。更思生羽翼。散髮醉巴陵。

書適

萬事罷經營。悠然心太平。甘餐隨日足。笑睡等閑成。處處佳風月。人人好弟兄。神仙不須學。券內有長生。

羸老

羸老幸未死。敢嗟生理微。牛閑牧童臥。犬吠市船歸。月落見收網。燈青聞踏機。時時語鄰里。井臼幸相依。

卽事

臯夔無近用。芝朮少奇功。上壽當徐致。沉疴忌力功。醫傳三世久。事歷百年中。畏與庸人說。終身託病羸。

晚興

並簷幽鳥語瓊瓏。一榻蕭然四面風。客散茶甘留舌本。睡餘書味在胸中。浮雲變態吾何與。腐骨成塵論自公。剩

欲與君談此事。少須明月出溪東。

郊行

淒風吹雨過江城。緩策羸驂並水行。古路初驚秋葉墮。荒郊已放候蟲鳴。壯心耿耿人誰識。往事悠悠恨未平。斜日半竿羌笛怨。西陵寂寞又潮生。

喜雨

雨氣侵人暮不休。雨聲逼枕冷颼颼。方欣草木有生意。已報溝池無涸流。避溼入簷憐病鶴。爭巢逐婦歎鳴鳩。老農自喜知時節。夜半呼兒起飯牛。

劉道士贈小葫蘆

葫蘆雖小藏天地。伴我雲山萬里身。收起鬼神窺不見。用時能與物爲春。

又

貴人玉帶佩金魚。憂畏何曾頃刻無。色似栗黃形似繭。恨渠不識小葫蘆。

又

短袍楚製未爲非。況得藥瓢相發揮。行過山村傾社看。絕勝小劍壓戎衣。

又

箇中一物著不得。建立森然卻有餘。盡底語君君豈信。試來跳入看何如。

自傲

學當盡力去浮華。從事文辭但可嗟。造道淺深看應物。修身勤惰驗齊家。

雨中

孤村風雨連三日。秋暑如焚一洗空。睡覺房櫳燈漸暗。卻尋殘夢雨聲中。

書歎

遺蝗出境樂秋成。多稼登場喜雨晴。暗笑衰翁不解事。猶懷萬里玉關情。

又

兩夜孤舟宿鏡湖。秋聲蕭瑟滿菰蒲。書生有淚無揮處。尋見祥符九域圖。祥符中。會詔王會等修九域圖。

題畫薄荷扇

薄荷花開蝶翅翻。風枝露葉弄秋妍。自憐不及狸奴黠。爛醉籬邊不用錢。

又

一枝香草出幽叢。雙蝶飛飛戲晚風。莫恨村居相識晚。知名元向楚辭中。

秋興

誰敢輕他萬戶侯。一生賦分在滄洲。屋穿沉值雨騎月。俗謂二十四五間用爲騎月用。主霖霖不止。路惡更堪風。

打頭。此世極知同逆旅。吾身亦自是懸疣。乞錢買取青芒屨。爛醉三條二華秋。

又

斂盡殘雲見夕陽。門前穉穉漸登場。經年都得幾回醉。一兩頓驚如許涼。耐事尙能心似鐵。放歌仍忘髮成霜。頗生底用從人問。此是山翁肘後方。

又
五十年來住鏡湖。白頭仍是一臞儒。朝眠每恨妨書課。秋穫先令入酒甌。江路伶俜形弔影。草菴寂默我忘吾。兩窗忽有高談興。筮叟醫翁亦可呼。

又
萬事何曾挂齒牙。只將放浪作生涯。有時掬米飼馴鹿。到處入林求野花。鄰父築場收早稼。溪姑負籠賣秋茶。等閑一日還過卻。又倚柴扉數暮鴉。

晝睡

體中小不佳。惟睡可以休。睡笑自成夢。去爲萬里遊。萬里遊尙可。乃復有得喪。漂搖一葉舟。掀舞千重浪。午雞忽驚起。向夢安在哉。童子解原夢。篝火具茶盃。

得子虞濠上書

日暮坐柴門。懷抱方煩紆。鈴聲從西來。忽得濠州書。開緘讀未半。喜極涕泗俱。父老子惜別。況經患難餘。羈旅易生疾。霜露行載途。思歸雖甚苦。且復忍須臾。時濠州軍亂。子虞適來攝通判。身率將士力戰平之。

庭草

階前西風搖百草。鬱鬱逢秋殊未槁。雪霜要當次第來。恰似人生怕衰老。百草榮悴則有時。人於養生當自知。金丹九轉儻未辦。簡斂冲默真吾師。攝調小失豈遽死。二豎眉端先溢喜。但令神氣常守形。莫畏夢中呼起。

文章

文章本天成。妙手偶得之。粹然無疵瑕。豈復須人爲。君看古彝器。巧拙兩無施。漢最近先秦。固已殊淳漓。胡部何爲者。豪竹雜哀絲。后夔不復作。千載誰與期。

秋日遣懷

離離上藥苗。鬱鬱靈芝榮。我昔逢異人。瑣細皆能名。擊石以取火。薪桂持前口。五雲夜覆鼎。談笑得長生。

又

胸中何所有。世界如河沙。區區吞雲夢。何至爲客誇。初見賣苑冰。青門已無瓜。天河正不遠。秋風乘客槎。

又
西來浮濤江。東眺俯鏡湖。其中縣千里。鬱鬱桑麻區。禹葬有遺窆。粵亡無故墟。秋風吹短褐。望古空躊躇。

又
野風聲如潮。溪水色可染。浮雲時翳日。亦作雨數點。行歌雖放浪。未至越繩檢。蕭然茅三間。送老此山崦。

又
秋夜坐東窗。殘雨時一滴。四壁無人聲。心境兩虛寂。吾方遊物初。超然謝形役。一毫儻未盡。何往非勍敵。

又
自我歸故山。不知歲月徂。念雖迫霜露。憂國猶區區。老不能上疏。泰階陳六符。安得子元子。同歌于薦于。

又
今年秋氣早。風露應時令。晨起換熱衣。殘暑已退聽。松聲滿庭戶。蕭然失衰病。人衆何足言。天固不可勝。

又
晨几手作墨。午窗身磴茶。豈惟要小勞。亦以禦百邪。兒童不解此。傾心逐紛華。君看如山禍。萌在一念差。

自做
惡石從來豈汝仇。安居無患卻堪憂。不須更守庚申夜。留取三彭做情偷。

又
世事如雲日日新。瓦盆黍酒卻關身。細思只有窮居好。寄語玄翁莫逐貧。

生世
乾坤成毀由來事。生世真同黍一炊。嗟我已過三萬日。餘年有幾自應知。

秋雨
山深草木久已荒。晝昏風雨殊未止。看書不覺向壁臥。煎茶欲罷推枕起。清心正付竹鑪香。漱齒每挹巖泉水。與

世不諧元有命。閉門自適差可喜。少年癡絕晚乃悟。束縛珠襦均一死。悠然袖手倚蒲團。洗盡玉關心萬里。

思蜀

西遊陳迹浩無窮。回首真同一夢中。柳拂驛牆思鳳集。鼓喧市里憶蠶叢。故人丘壠秋蕪碧。舊隱園林夕照紅。自閔未能忘感慨。浩歌彈劍送飛鴻。

病思

短髮蕭蕭不滿簪。更堪衰疾日侵尋。數匙淡飯支殘息。一篆清香印本心。小徑古苔遺鶴毳。空堂壞甃有蟲吟。悠然更起扁舟興。秋水門前口尺深。

術家言予今歲畏四孟月而秋尤甚自初秋小疾屢作戲題長句

一生強半臥窮閭。糲飯藜羹似蜜甜。老齒覺衰嗟已晚。孟秋屬疾口口口。危途本自難安步。口石何妨更痛砭。堅忍莫口口口口。口藟猶足待茅苫。

秋夕書事

垂老雖堪歎。爲謀亦未疎。悶賒鄰巷酒。閑讀後身書。大嚼寧須肉。徐行可當車。秋來歡喜事。菽粟有新儲。

又

點點秋燈晚。翻翻宿鳥還。雨添羈枕睡。書伴小窗閑。僧閣荒寒外。漁村縹緲間。畫工今代少。誰爲寫家山。

小疾

小疾有根柢。忽之當日深。養苗先去草。省事在清心。蟻夢能看破。狐妖可坐擒。一盃藜粥罷。聽雨擁秋衾。

又

老不禁當病。經旬臥一牀。亦知非疥癬。幸未至膏肓。水落灘初出。秋深草漸黃。非關畏人事。晚歲合深藏。

又

避人便小疾。省事喜閑身。並海魚鹽聚。入秋風雨頻。元知器苦窳。空有膽輪囷。轉飯聊同飽。知君不笑貧。

病中作

此事明明在默存。一身元有一乾坤。不憂寧子居膏上。已見真人出面門。力守誰能發底火。深潛自足美口用。功若到無功處。千載乘雲不足言。

縱筆

天下本無事。吾生行且休。關心惟酒盞。入眼獨漁舟。雁過三湘曉。雲開二華秋。慙慙驛樓柱。小草記曾遊。

又

相馬失之瘦。知人良獨難。雖居環堵室。未廢切雲冠。暮雨潼關暗。秋風渭水寒。深燕埋壯士。千古爲悲歡。

卷八十四

自立秋前病過白露猶未平遣懷

門冷荒車轍。囊空別醉鄉。懶行眠亦好。倦話默何傷。野叟占幽夢。山僧送秘方。病懷雖忽忽。隨事答年光。

又

飢能堅志節。病可養精神。不動成罷臥。微勞學鳥伸。功名知幻境。憂患笑前身。藥裏吾何厭。秋燈作夢新。

聖門

聖門妙處不容思。千古茫茫欲語誰。晞髮庭中新沐浴。舞雩沂上詠歸時。研求豈足窺微指。博約何由遇碩師。小疾埽空身尙健。蓬窗更作數年期。

書齋壁

幅巾短褐野人裝。洗盡黃塵早暮忙。地僻漁扉常隱翳。身閑靈府自清涼。雨中鬱鬱垣衣綠。牆底纖纖石髮長。老憊只思眠踞壁。一尊到手又成狂。

病後小健戲題

行年九十未龍鍾。慙媿天公久見容。醉解病人詩解瘦。不如世世作春農。

新晴

兩葉玲瓏曉日明。經旬風雨得初晴。欹眠歇盡人間念。時聽幽禽一兩聲。

夢中作

征途遇秋雨。數士集郵亭。酒拆官壺綠。山圍草市青。劇談猶激烈。瘦影各伶俜。四海皆兄弟。悠然共醉醒。

又

一客若蜀士。相逢意氣豪。偶談唐夾寨。遂及楚城臯。二者皆所論。頓洗風塵惡。都忘篋轡勞。蟬嘶笑餘子。辛苦學離騷。

疾小愈縱筆作短章

治疾如治盜。要使復其常。藉曰用戈矛。全之寧欲傷。彼盜皆吾民。初非若胡羌。奈何一朝忿。直欲事毆攘。毆攘雖快心。少忍理則長。華陀古神醫。煎浣到肺腸。取效雖卓犖。去死真毫芒。君審欲除盜。惟當法龔黃。撫摩倘有道。四境皆耕桑。我亦以治疾。不減玉函方。

病少愈偶作

蕭條白髮臥蓬廬。虛讀人間萬卷書。遇事始知聞道晚。抱疴方悔養生疎。高門赫赫何關我。薄俗紛紛莫問渠。羸疾少蘇思一出。夕陽門巷駕柴車。

又

病入秋來不可當。便從此逝亦何傷。百錢布被斂首足。三寸桐棺埋潤崗。但恨著書終草草。不嫌徂歲去堂堂。今朝生意纔絲髮。便擬街頭醉放狂。

書生

書生專業苦難成。點檢常憂害至成。夢寐未能除小忿。文辭猶欲事虛名。聖言甚遠當深考。古義雖聞要力行。漢世陋儒吾所斥。若爲青紫勝歸耕。

古驛

古驛橋邊艇子橫。每因羈旅愜幽情。窗間月落無花影。枕上潮來有鷓聲。舊友凋零歸夢想。新詩邂逅得天成。今

朝有喜君知否。秋雨晴時小疾平。

夜讀劉伯倫傳戲作

生本無心死可知。徐徐掩骨未爲遲。一奴僅可供薪水。那得閒人荷鍤隨。
湖上晚望

閒人無處破除閒。待得漁舟一一還。峯頂夕陽烟際水。分明六幅巨然山。

村居卽事

西成東作常無事。婦鎰夫耕萬里同。但願清平好官府。眼中歷歷見幽風。

又

炊甑生塵榻長苔。柴門日晏未曾開。載醪問字今年落。猶有鄰翁裹飯來。

又

長笛圓聲曲調新。東家西舍送迎神。不因豐歲人情樂。淡殺溪頭老病人。

夜興

夜闌扶策繞中庭。雲罅三三兩兩星。安得南風卷雲盡。爛然河白映天青。

夢華山

路入河潼喜著鞭。華山忽到帽檐邊。洗頭盆上雲生壁。腰帶鞋前月滿川。丹竈故基誰復識。白驢遺跡但相傳。夢魂妄想君無笑。尙擬今生得地仙。

寓歎

窮居諳世故。了了不如昏。萬事慵挂眼。終年思杜門。雲閒忘出岫。葉落喜歸根。熟計惟當醉。寧論社瓮渾。

又

小隱終非隱。休官尙是官。早知農圃樂。不見道途難。故國雞豚社。貧家菽水歡。至今清夜夢。猶覺畏澆瀾。

又

事外癡頑老。人中牘長身。開顏時賴酒。閉口不言貧。淡話常終夕。閒遊動歷旬。漁翁偶相遇。疑是武陵人。

又
老闕市朝久。紛紛長厭看。人紆綬紫艾。家擁轂朱丹。不羨官曹熱。惟憐眼境寒。東塗與西抹。感舊一長歎。

嘉定己巳立秋得膈上疾近寒露乃小愈

獨立溪橋看落暉。殘蕪漠漠蝶飛飛。從來澤國秋常晚。歎息衰翁已衲衣。

又

今年病老遂難禁。二豎奔逃豈易尋。風雨三更僮僕睡。自持殘燭檢千金。

又

窮銷壯歲功名志。病過新秋賞詠時。自古世間如意少。天公寧肯爲君私。

又

小詩苦思憑誰賞。綠酒盈尊每獨傾。老境情悰例如此。不須惆悵感餘生。

又

一枕鳥聲殘曉夢。半窗竹影弄新晴。屏深室煖秋垂老。粥美蔬香疾漸平。

又

半飢半飽隨時過。無客無書盡日閒。童子貪眠呼不省。狸奴戀煖去仍還。

又

粥香可愛貧方覺。睡味無窮老始知。要識放翁真受用。大冠長劍只成疑。

又

小詩閒淡如秋水。病後殊勝未病時。自翦矮牋膽斷稿。不嫌墨淺字傾欹。

又

八月吳中風露秋。子鵝可炙酒新篘。老人病愈鄉閭喜。處處歡迎共獻酬。

又 清泉白米山家有。鹽酪猶從小市求。寸步須扶本常事。細書妨讀卻閒愁。

又 東書不觀萬事休。誰令識字惹閒愁。胸中作祟知何物。不是當年老督郵。

又 客疾無根莫浪憂。今朝埽盡不容留。飯囊酒瓮非吾事。只貯千巖萬壑秋。

病中臥聞春聲

又 丘嫂羹存先戛釜。山僧齋竟始鳴鐘。孰知造物獨憐我。一日未嘗無夕春。

又 妄想說梅猶止渴。真聞春米固忘飢。未論炊熟香生甑。已覺杪來雪滿匙。

病小減復作

又 一身真贖長。兩月抱沉綿。吟作楚人語。聳成山字肩。災從季主卜。藥欠宋清錢。彌老彌堪笑。藜羹且信緣。

又 衛養元無術。衰殘只自悲。扶行十步地。強坐一炊時。枕藉漆園語。呻吟栗里詩。災年未易過。那敢望期頤。卜者言今秋來春皆災。過此壽未艾。

又 晨粥半茶碗。秋衣一布裘。酒惟詩裏見。山向夢中遊。卜繇兒能測。藥方僧爲求。重陽無半月。尙泥菊花不。

病思

又 水碓春粳滑勝珠。地爐燔芋軟始酥。老來自愛盤飧笑。安得高人共破除。

又 殺物求君舌本肥。是非豈復待深思。卽今不足何時足。小甑香粳日兩炊。

又 江上秋風蘆荻聲。魚蝦日日厭煎烹。病來作意停鮮食。留得青錢買放生。

又 行攜馴鹿寄消搖。共鮑山蔬與藥苗。本自入山緣服玉。不應忘味待聞韶。

又 西山雪外巢松客。南岳巖前洗鉢僧。平日寄懷常在此。秋風剩欲辦行滕。

又 窗扉寂寂秋將晚。燈火昏昏夜向闌。不是暮年能耐病。道人心地本來寬。

病中自遣

孤燈如露螢。熠燿北窗下。我亦氣僅屬。厭厭迫衰謝。平生更事熟。生死等晝夜。行年八十五。八十九已化。雖云病惱侵。處此亦閒暇。人扶時出門。清溪帶茆舍。

又

一鴉振羽鳴。窗色忽已綺。衆鳥次第來。各矜語言好。病夫正擁被。宛若兒在褓。跣婢職衣襦。丫童謹除埽。紅日已入簾。吾豈尙恨早。悠然一盃粥。頑鈍聊自保。

又

少時揣無才。一意守貧賤。窮閭依馬磨。小石寫驢券。中年更可笑。顛顛客異縣。何曾得一飽。塵土空滿面。卽今況已病。百衰相俱見。雖然亦自重。未忍悲秋扇。

八月二十三夜夢中作

道士上天鶴一隻。老僧住菴雲半間。去來盡向無心得。癡黠相除到處閒。江山千里互明晦。魚鳥十年相往還。高巖縹緲人不到。醉中爲子題其顏。

病少間作

身如水有漚。病如雲無根。方其未散間。妄謂有我存。漚壞水渺然。雲滅寧遺痕。回首乃可笑。妄想生怨恩。念我曩昔時。一笏朝帝闈。既老復何爲。釣魚石帆村。今年病臥久。慘痛不可言。一念忽超詣。二豎皆忙奔。吾居本廣大。談笑決其藩。還持一尊酒。往酹湘水魂。

秋晚幽居

吳中秋晚氣猶和。疾豎其如此老何。烏語漸稀人睡美。木陰初薄夕陽多。埽園日日成幽趣。撫枕時時亦浩歌。車轍久空君勿歎。文殊自解問維摩。

病中思出遊

病境雖猶在。秋天已自清。閒思尋酒伴。嬾畏主詩盟。煙艇桐江去。籃輿剡縣行。會心隨處住。便足了餘生。

九月初作

莫笑衡茆陋。幽情得細論。客疎慙齏醢。僧熟認敲門。杳杳煙中刹。昏昏雨外村。登高負今歲。老病易消魂。

四日夜雞未鳴起作

放翁病過秋。忽起作醉墨。正如久蟄龍。青天飛霹靂。雖云墮怪奇。要勝常憫默。一朝此翁死。千金求不得。

臥病雜題

咬咀初成藥。呶啞半掩扉。病知身健樂。閒覺宦遊非。小澗看猿飲。枯筇擁鶴歸。今朝更堪喜。書札得淮淝。是日得五郎廬州書。

又

鷗鷺馴亭沼。琴書悅性靈。身叨鄉祭酒。孫爲國添丁。煙浦收菰菜。秋山斲茯苓。虛名吾所薄。未應少微星。

又

陋室施牀迳。窮閭問疾疎。加餐惟是粥。弄筆不成書。盎盎新篘酒。青青小摘蔬。客來邀褊帶。聊示小勤渠。

又

終日常辭客。經秋半在牀。愛窮留作伴。諳病與相忘。竈婢工烹粥。園丁習寫方。久病家人作粥盞佳。晝朝夕當爲

之也。又有山僕本不識字。因久合藥。遂能寫藥方數大篇。今朝有奇事。久雨得窗光。

又

人間跛男子。物外病維摩。病中遂牽聯病右足。但可妨趨拜。何因廢獻歌。菜羹醯醬薄。村巷棘茨多。舉手謝鄰父。非君誰肯過。

讀華陀傳

六籍雖殘聖道醇。中更秦火不成塵。華陀老黠徒驚俗。吾豈無書可活人。

家山

鹿食草時猶命侶。鶴冲霄後尙思歸。家山不忍何山隱。稽首虛空懺昨非。

九月十一日疾小間夜賦

清夜房櫳燈火微。此心病起更依依。空驚牀下莎蟲語。不見梁間巢燕歸。蒼硯有池殘墨在。白頭不櫛亂書圍。可憐未遽忘風月。猶夢華觴插羽飛。

又

病後衣巾盡覺寬。挈提裘領喟然歎。孤燈不焰熒熒碧。小雨無聲慘慘寒。只道清心災自退。豈知非意病相干。平生最愛秋搖落。惆悵今年怯倚欄。

一病七十日

一病七十日。共疑無復生。隄全河漸復。師濟寇將平。縹緲香雲散。颼颼藥鼎鳴。庭前有殘菊。自笑尙關情。

西郊

七十辭北闕。五畝寄西郊。涿水魚依藻。摩雲鶴結巢。巧僧時問疾。卜叟或論交。社櫟天全汝。寧當歎繫匏。

蔬食

肉食從來意自疑。齋盂況與病相宜。老羝昔作春蔬祟。斷稿今無晚釣詩。陌上煙苕誰采采。牆陰風葉正離離。人生飢飽初何杖。一斛檳榔笑汝癡。

乙巳秋暮獨酌第一首六韻

孤雲繫不定。野鶴籠難馴。賣藥句曲秋。沽酒天台春。中原幾流血。四海一閒人。數月對我影。折花插我巾。花月成三友。江海爲四鄰。何敢忘吾君。巢由稱外臣。

又

安期與羨門。秦漢迹已陳。不如東平公。一劍隱紅塵。醉歌題市樓。墨色粲如新。叱咤與風雲。約束山川神。從我者誰歟。夜渡黃鶴津。

又

山陰老道士。寄情魚鳥中。幽戶綠蘿月。孤舟白蘋風。豈無小盃熟。尊杓誰與同。邂逅得知心。一見歎猶龍。

又

湖中有隱士。或謂千歲人。大兒嚴子陵。小兒賀季真。姓名莫能知。況可得疎親。有竿不釣魚。秋晚香粳新。

秋晚

春將愁並至。秋與病相終。過望猶賒死。扶衰又入冬。撥香開社瓮。帶睡聽晨鐘。懶放君無誚。天公儘見容。

病中遣懷

人生長短無百歲。八十五年行九分。堪笑癡翁作黠計。欲將繩子繫浮雲。

又

放生何足爲愛物。施藥因行聊結緣。山舍老翁無事業。只將閒事占流年。

又

鮮肥莫事膚寸舌。蕭散何辜七尺軀。山路豈無孤店宿。渡頭亦有小舟呼。

又

家貧不與身添業。病久寧非天做予。埽盡世間閒忿怒。小園煙雨種春蔬。

又

菘芥煮羹甘勝蜜。稻梁炊飯滑如珠。上方香積寧過此。慙媿天公養病夫。

又

開繖紫栗如拳大。帶葉黃柑染袖香。天與山家講鄰好。江天昨夜有新霜。

六言

滿帽秋風入剡。半帆寒日遊吳。問子行裝何在。帶間笑指葫蘆。

又

不慕生爲柱國。何須死向揚州。但願此身無病。天台剡縣閒遊。

野興

著草晨占大易爻。松肪夜借隱書抄。飢時每就猿分果。宿處時從鶴寄巢。旋賣荆薪持取醉。偶逢野叟卽論交。頽然坐閱人間事。耐辱禁愁卻自嘲。

遠遊

壯年不作故山歸。老去方知浪走非。挂日片帆吳赤壁。嘶風疋馬蜀青衣。交遊雖廣知心少。香火徒勤願力微。堪笑只今成底事。青燈無恙且相依。

反遠遊

賣卻貂裘買釣舟。久將身世付悠悠。行歌西郭紅橋路。爛醉東關白塔秋。皆山陰近郊地名。夜泊驛亭觀月上。曉登僧閣聽猿愁。一生身屬官倉米。剩喜殘年得自由。

病著

病著今年劇。衰來次第新。茅茨安久處。芻豢罷前陳。零落閒邊句。逍遙事外身。村東褚草輩。一笑得常珍。

梅市

小雨長隄古寺西。不容羸馬惜障泥。時平道路鈴聲少。歲樂坊場酒價低。煙樹淺深山驛近。野歌斷續客魂迷。殘軀不料重來此。一首清詩手自題。

梅市書事

羸馬孤愁不可勝。小詩未忍付膏騰。一聲客枕江頭雁。數點商船兩外燈。

病減

病減停湯熨。身衰賴按摩。書虧平日課。睡比故年多。龜卜占休泰。醫方較闕訛。有時還一笑。隔浦起漁歌。

幽居卽事

山斃可伐薪。稻壠可負耒。但令二事集。一飽已有在。霜林兩株橘。春圃數畦菜。仁哉造物心。乞我曾不愛。炊烹付樵青。鉏灌賴阿對。乃翁亦自爲。高枕聽晨碓。

又

書几積流塵。硯池漬淺墨。老夫自省事。童子豈不力。人生適可爾。過計亦何得。胡爲棄梨棗。日夜長荆棘。洗汝後汰心。去汝驕吝色。一菜餉有餘。奚取萬錢食。

羸疾

羸疾止還作。已過秋暮時。但當名百藥。那更謁三醫。強飯幸如昨。清遊元有期。新霜宜野店。行矣不須疑。

九月二十五日雞鳴前起待旦

堪笑枯腸漸長茶。夜闌坐起聽城笳。爐溫自撥深培火。燈暗猶垂半結花。斷夢不妨尋枕上。孤愁還似客天涯。掃塵拾得殘詩稿。滿紙風鴉字半斜。

秋夕排悶十韻

湖海雙歸棹。蓬蒿一病翁。幽居天鏡北。別墅石帆東。雲岫翩孤鶴。煙汀渺斷鴻。一從生白髮。幾見落丹楓。獨立中庭月。欹眠滿院蛩。藜羹晨糝白。葑火夜爐紅。物外緣雖薄。塵中念已空。放魚從長者。累塔伴羣童。野寺觀冬懺。叢祠禱歲豐。行歌與坐睡。處處現神通。

宴坐

氣住卽存神。心安自保身。誰歟二豎子。卓爾一真人。氣泝如潮上。津流若酒醇。幽居幸無事。莫玩物華新。

又

周流惟一氣。天地與人同。天道故不息。人爲斯有窮。蛟龍上雲雨。魚鳥困池籠。寔坐觀茲理。吾其若發蒙。

小室

術淺難醫急。文疎不送窮。詩囊逢厄運。藥裏少新功。小室香凝碧。明窗日射紅。鄰翁來問疾。少話莫匆匆。

舟次浦口

吾孽本自作。此生元有涯。三江去浩蕩。一艫任嘔啞。賣藥村村市。炊粳處處家。相逢喜亡急。不敢厭喧譁。

開爐

餘疾三分在。閑愁一點無。書能伴孫讀。身欲卻人扶。霽日鴉鳴樂。清霜草蔓枯。南山送僧炭。隨事且開爐。

散懷

東行西行一日過。深酌淺酌萬事休。亦知衣食將不繼。老甚安能懷百憂。

又

中年絕慾不復念。今日肉食夫何難。天公賦與本來薄。一概掃空力少安。

卷八十五

子虞當以十月離淝上喜而有作

十月霜侵客子衣。片帆計已發淮淝。山林獨往我何敢。州縣徒勞兒未非。傳舍方寒索調護。里門終日待來歸。解裝且共燈前語。萬事真當付一欷。

病來

抱疴雖可驗。應接每安徐。正使須彈塞。寧當快掃除。寡言防禍始。省事養災餘。一飽吾何欠。香粳薦笑蔬。

舟中晨起

天宇清寒病體輕。煙波聊復事宵征。鷗橫舟尾霜如抹。犬走籬根葉有聲。蕭尹威名空赫赫。班侯智略本平平。不

如歸結迎神社。長笛圍擊送此生。

江村

江村連夜有飛霜。柿正丹時橘半黃。轉枕卻尋驚斷夢。撥爐偶見爇殘香。醫無絕藝空三易。死與浮生已兩忘。拈得一書還嬾看。臥聽孫子誦琅琅。

兀兀

兀兀心非睡。惺惺口不言。齒津生頰舌。鼻息撼牆垣。書媿兒童問。年叨里巷尊。貧家有喜事。黍酒帶醅渾。

道懷

織罷化吾梭。棋終爛汝柯。藥靈刀匕足。語妙立談多。楂浦吹橫笛。桐江買短蓑。白鷗真可友。萬里渺煙波。

柯山道上作

道路如繩直。郊園似砥平。山爲翠螺踊。橋作彩虹明。午酌金丸橘。晨炊玉粒杭。江村好時節。及我疾初平。

病後自詠

狂豪掃去得衰殘。數啜芳醪興亦闌。閉戶交朋疎索盡。捐書日月破除難。盤除鮮食生蔬美。衣簪吟肩束帶寬。賴有一條差自慰。高眠常到日三竿。

十月九日

酒開甕面撲人香。菊折霜餘滿把黃。我是化工君信否。放遲一月作重陽。

三三孫十月九日生日翁翁爲賦詩爲壽

正過重陽一月時。龜堂驪喜抱孫枝。棄穉已足驚關吏。堆笏寧惟取世資。落筆千言猶細事。讀書萬卷要深期。汝翁豪傑非今士。不用擔登更覓師。

江路

江路最初程。飄然兩履輕。少留雲際宿。徐待月明行。雁起平沙影。泉輕斷岸聲。誰知遊剡興。不減上青城。

初冬

落葉紛紛十月時。今年霜比去年遲。山猿引子飲幽澗。野鶻結巢爭墮枝。嶺北片雲生峭絕。橋東殘水漾淪漪。病衰自怪詩情盡。造物撩人乃爾奇。

又

落葉窗前已作堆。地爐微火撥殘灰。夢中無祟敗蔬圃。飯後有歌誇芋魁。裊裊清笳催日晚。蕭蕭新雁帶寒來。更寬十日可閑出。會挈一壺尋早梅。

夜坐

餅餌支遙夜。薪烝禦早寒。臥聞風浩蕩。起視寸闌干。雞怯飛霜重。鴉驚出月殘。挑燈搔短髮。顧影發吾歎。

又

藥裏關心處。篝燈照影時。文書用遮眼。棗栗可無飢。素業存農圃。頽齡迫耄期。蓋棺萬事已。唯負國恩私。

殘菊

殘菊一枝香未殘。夜窗拈起百回看。過時只恐難相笑。我是三朝舊史官。

久病

臥疾闕三時。冥冥不自持。婢諳曾製藥。犬識舊迎醫。質貸交親厭。呻吟里巷知。有時推枕起。清獻尙能奇。

病小愈喜晴

雲邊采藥喜身輕。燈下觀書覺眼明。擾擾已空浮世事。依依還作苦吟聲。又爲天地幾年客。頓覺軒窗三日晴。深媿山童憐寂寞。風爐傳法煑蕪菁。

租稅

占星起飯犢。待月出輪租。遇嶮頻呼侶。扶轅數戒奴。畏飢懷餅餌。愁雪備薪樗。意象今誰識。當年賦兩都。

初寒

兩鬢林猶滴。泥新路易乾。蕭條山步晚。顛顛客衣單。小女收魚笱。童兒放鴨欄。初寒豈不好。衰病自無歡。

呻吟

呻吟半歲掩柴扉。性命惟存氣力微。夙業豈能逃馬麥。窮居賴是慣牛衣。濁清且復分賢聖。今昨誰能論是非。一段光明君記取。要知無念是真歸。

山墅

煙水煙林老結廬。人間用短更誰如。輒蒲穩背供危坐。小幟障燈便細書。莫欺衰病歸山墅。曾領諸儒上石渠。貞觀開元嗟已遠。爲君試說紹興初。

十月二十四日夜夢中送廬山道人歸山

平生不到三公府。晚歲歸來五老菴。夙士極知成殿後。吾曹所賴作司南。孤舟夜泊灘聲惡。小瓮晨香雪意酣。笑語牀隅拄杖子。卽今惟汝是同參。

病後晨興食粥戲書

蝴蝶莊周安在哉。達人聊借作嘲訖。不知自此隨緣住。更把晨窗粥幾盃。

贈僧

松間數語淡交成。不喜將身上世行。安得北窗風雪夜。地爐相對煑燕菁。

又

長明燈下三更雨。且過寮前萬里身。止使未能超佛祖。也應小勝市朝人。

遊山

一生萬里著行滕。抖擻塵埃尙未能。不怕語音時帶剡。敢辭生計略如僧。疎梅漸動清溪曲。霽雪遙看古塔層。喚起故年清絕夢。數聲柔艣下巴陵。

又

蕭然破帽伴枯藤。逢著青山不厭憎。家似江淮歸業戶。身如湖嶺罷參僧。煨柴夜宿寒爐火。洗黼晨敲古澗冰。果向此中能得趣。官途捷徑不須曾。

又

九十衰翁心尙孩。幅巾隨處一悠哉。偶扶拄杖登山去。卻喚孤舟過渡來。酒市擁途觀鬼戲。僧廬借榻寄吟臺。吾生清絕煩君看。不枉人間夢一回。

農圃歌

我不如老農。占地畝一鍾。東作雖有時。力耕在茲冬。張燈觀夜織。高枕聽晨春。時時喚鄰里。旨蓄亦可供。我不如老圃。父子日相從。一鉏萬事足。不求定遠封。春泥剪綠韭。秋雨畦青菘。放筍有餘味。豈不烹險噉。乃者半年病。清鏡滿衰容。塵生一鞞屐。壁倚一枝筇。惟有呻吟聲。和合牀下蛩。青燈照兀兀。布衲聊自縫。

贈拄杖

歷險橫空捷有神。得來元自剡溪濱。同爲萬里江湖客。共見三生風月身。不怕雲中伴鳧舄。只愁雨後長龍鱗。何妨更悟無生理。露柱燈籠一話新。

贈貓

執鼠無功元不劾。一簞魚飯以時來。看君終日常安臥。何事紛紛去又回。

宮詞

秋露蕭蕭洗秋月。夢斷陳宮白銀闕。臨春結綺底處所。回首已成狐兔穴。

病中雜詠十首各四韻第八首二韻

半年不讀書。顧影疑非我。乃知百年中。如此過亦可。書能作汝祟。識字果非福。明年倘未死。樂哉駕黃犢。

又 伐性無蛾眉。腐腸無旨酒。齋居亦得疾。果無第一手。才不如嵇康。疎懶則過之。雖有絕交書。不作幽憤詩。

又

華陀囊書久已焚。思邈玉函秘不聞。從醫火攻固下策。遣化飯香方普熏。觸人正白坐愚直。學道今當輸拙勤。勿言將智耄已及。後死或可與斯文。

又

擊壤林間送此生。欣欣東作到西成。泥深宿麥苗初長。葉落柔桑眼已生。枹鼓無聲盜衰息。文書簡出吏清平。西遊攜得蹲鴟種。且共山家玉糝羹。

又

身是人間一老樵。城南煙水寄迢迢。尋人偶到金家畷。取米時經杜浦橋。小市孤村雞喔喔。斷山幽谷雨蕭蕭。吾曹自養無能爾。楚客應無隱可招。

又

身似頭陀不出家。杜陵歸老有桑麻。茶煎小鼎初翻漫。燈映寒窗自結花。殘藥漸離愁境界。亂書重理淡生涯。等閑一事還超俗。斷紙題詩字亂斜。

又

天遠不可問。將如此老何。老驚詩思退。貧欠藥錢多。剡縣尋僧宿。桐江買酒歌。市橋新柳色。又是一年過。

又

半黃半綠柳滿城。欲開未開梅有情。放翁一病又百日。回視新春如隔生。

又

久病身猶困。閑遊性已成。未停湯熨事。卽理水雲程。投宿忘街陌。論交失姓名。醉憐花塢好。恐是牡丹坪。

又

自我居湖曲。漁樵日往來。只知年屢改。不覺老相催。小浦潮痕長。長隄草色回。逢春心自在。莫道已成灰。

雪

一夕山陰道。真成白玉京。衰殘失壯觀。擁被聽窗聲。

自笑

左車第二牙辭去。見韓文公詩。團坐無生話。又新。堪笑按摩并洗沐。未忘貪愛夢中身。臘月五日。湯沐按摩幾半日。是早。左車第二牙脫去。

絕句

山遮水隔重重埃。兩練風柔處處花。一病半年能不死。又將此恨醉天涯。

題藥囊

殘暑纔屬爾。新春還及茲。真當名百藥。何止謁三醫。半夜噉朝日。晨興飲上池。金丹有門戶。草木爾何知。

未題

平日尤閑老更閑。一毫世事豈相關。孤雲不敢來歸岫。細水無聲自出山。支徑過僧纔百步。小樓藏藥可三間。客來不肯通名姓。熟視吾廬爲破顏。

又

一身只付雞棲上。萬卷真藏椰子中。嘉定三年正月後。不知幾度醉春風。

病中示兒輩

去去生方遠。冥冥死卽休。狂思攘鬼手。危至服丹頭。有劍知誰與。無香可得留。惟應勤學謹。事事鑑恬侯。

夢中行荷花萬頃中

天風無際路茫茫。老作月王風露郎。只把千尊爲月俸。爲嫌銅臭雜花香。

示兒

死去元知萬事空。但悲不見九州同。王師北定中原日。家祭無忘告乃翁。

此
页
空
白

先君太史。晚自號曰放翁。紹興辛巳間。及事高宗皇帝。累遷樞密院編修官。孝宗皇帝嗣位之初。召對便殿。賜進士第。時始置編類。太上皇帝聖政所。妙東時髦。先君首預其選。擢檢討官。久之。以忤貴倖自免去。五爲州別駕。西泝楚道。樂其風土。有終焉之志。蜀之名卿巨儒。皆傾心下之。爭共挽留。晁公子止侍郎欲捐其別墅以舍之。先君諾焉。而未之決也。嘗爲子虞等言。蜀風俗厚。古今類多名人。苟居之。後世子孫。宜有興者。宿留殆十載。戊戌春正月。孝宗念其久外。趣召東下。然心固未嘗一日忘蜀也。其形于歌詩。蓋可考矣。是以題其平生所爲詩卷曰劍南詩稿。以見其志焉。蓋不獨謂蜀道所賦詩也。後守新定。門人請以錢梓。遂行于世。其戊申己酉後詩。先君自大蓬謝事歸山陰故廬。命子虞編次爲四十卷。復題其籤曰劍南詩續稿。而親加校定。朱黃塗攷。手澤存焉。自此至捐館舍。通前稿。凡爲詩八十五卷。子虞假守九江。刊之郡齋。遂名曰劍南詩稿。所以述先志也。其他雜文論著。季弟子適亦已刊之溧陽。會子虞上乞骸之請。且暮且去。故有所未暇。初先君在新定時。所編前稿。于舊詩多所去取。其所遺詩。存者尙七卷。念先君之遺之也。意或有在。且前稿行已久。不敢復雜之卷前。故別其名曰遺藁云。嘉定十三年十二月之望。男朝請大夫知江州軍州事借紫子虞謹書。

孝宗一日御華文閣。問周益公曰。今代詩人。亦有如唐李太白者乎。益公以放翁對。由是人竟呼爲小太白。篇什富以萬計。今古無雙。或評如怒猊抉石。渴驥奔泉。或評如翠嶺明霞。碧溪初月。何足盡其勝概耶。近來坊刻。寡陋不成帙。劉須溪本子亦十僅二三。甲子秋。得翁子虞編輯劍南詩稿。又吳錢兩先生嚴訂。天天者。真名祕本也。亟梓行之。以公同好。其命名次第。具載跋語云。湖南毛晉記。

放翁逸稿目錄

卷上

賦七首

禹廟賦

紅梔子華賦

焚香賦

思故山賦

記二首

閩古泉記

辭五首

水龍吟

月照梨花

如夢令

虎節門觀雨賦

豐城劍賦

自閩賦

南園記

夜遊宮

又

卷下

律詩四十三首

成材將還肝江幕以詩四章為貺次韻其二以識別歲在政元孟夏二十有三日書于臥龍方丈之西

壁二首 送李舍人赴闕 寄鄧志宏五首 大溪灘折柁二首 羅山平雲閣 中閣 冲虛宮

羅浮山 寶積寺 祈雨二首 秋日山居四首 戲作三首 余邦英惠小山新芽作小詩以謝三

首 寄彥成 榮歸 翠微堂 閑居七首 夜坐 新秋晚歸 懷王美 感事 客舍對梅 春

目

續添

古詩六首

聞婆餅焦 種桑 夜聞鷓鴣聲 離家示妻子 黃山塔 送三兄赴秦邸

律詩十四首

聞角 寄楊濟伯 幽事 葺圃 幽事 北檻 贈徐相師 寄姜梅山雷字詩 採菊 吳娃曲
四首 過江至蕭山縣驛東軒海棠已謝

放翁逸藁

卷上

禹廟賦

世傳禹治水得玄女之符。予從鄉人以暮春祭禹廟。裴回于庭。思禹之功。而歎世之妄。稽首作賦。其辭曰。嗚呼。在昔鴻水之爲害也。浮乾端。浸坤軸。裂水石。卷草木。方泮徐行。瀾漫平陸。浩浩蕩蕩。奔放洄洑。生者寄丘阜。死者葬魚腹。蛇龍驕橫。鬼神夜哭。其來也。組練百萬。鐵壁千仞。日月無色。山嶽俱震。大堤堅防。攻訖立盡。方舟利楫。辟易莫進。勢極而折。千里一瞬。莽乎蒼蒼。繼以饑饉。於是舜謀于庭。堯咨于朝。蒼羲和。憂臯陶。伯夷莫施于典禮。后夔何假乎簫韶。禹于是時。惶然孤臣。耳目手足。亦均乎人。張天維于已絕。極救命于將涸。九土以奠。百谷以陳。阡陌鱗鱗。原隰昉昉。仰事俯育。熙熙終身。凡人之類。至于今不泯者。禹之勤也。孟子曰。禹之行水也。行其所無事也。天以水之橫流。浩莫之止。而聽其自行。則冒沒之害。不可治已。于傳有之。禹手胼而足胝。官卑而食菲。髮塗山而遂去腎。不暇視其呱泣之子。則其勤勞亦至矣。然則孟子謂之行其所無事。何也。曰。世以己治水。而禹以水治水也。以己治水者。己與水交戰。決東而西溢。堤南而北圯。治于此而彼敗。紛萬緒之俱起。則溝澮可以殺人。溝瀆作于平地。此鯀之所以殛死也。以水治水者。內不見己。外不見水。惟理之視。避其怒。導其駛。引之爲江。爲河。爲濟。爲淮。匯之爲潭。爲淵。爲沼。爲沚。蓋溘于性之所安。而行乎勢之不得已。方其懷山襄陵。駕空滔天。而吾以見其有安行地中之理矣。雖然。豈惟水哉。禹之服三苗。蓋有得乎此矣。使禹有勝苗之心。則苗亦悻然有不服之意。流血漂杵。方自此始。其能格之于羽之閒。談笑之際耶。夫人之喜怒憂樂。始生而具。治水而不憂。伐苗而不怒。此禹之所以爲禹也。禹不可得而見之矣。惟澹然忘我。超然爲物者。其殆庶乎。

虎節門觀雨賦

南方旣秋兮。暑弗歸。老火干時兮。秋金微。赫赫炎炎兮。炮烙之威。赤雲如山兮。其高巍巍。陽鳥三足矣。中天流輝。吳牛喘臥兮。海鳥勸飛。水泉枯竭兮。桔槔息機。禾欲茂而槁死兮。婦泣而子歎。曾纖絺之不御兮。如被裘衣。吾一

夕而三起兮。汗如寫其屢揮。昏然投牀兮。飲饑蚊之方飢。倏清風之颯來兮。視庭日其蒼蒼。乃命吾駕兮。登古城以徜徉。雲與東山兮。瀾漫入荒。披吾襟而脫吾帽兮。受萬里之涼。雨勢飄忽兮。其陣堂堂。甚銳且整兮。遇者辟易而莫當。翻江倒海兮。沃除驕陽。天地晦冥兮。日月翳光。如天戰之初酣兮。壯士顏行。飛白羽之箭兮。攢綠沉之槍。旣散復合兮。奇正靡常。乘高督戰兮。吾氣甚揚。俄霧霈之霽止兮。煙斂雲藏。海山呈嫵兮。天水茫茫。泉流泱泱兮。塵清土香。草木蘇醒兮。興起仆僵。晨夫起舞兮。歲以大穰。九衢行歌兮。厥聲洋洋。又如旣勝兮。底定一方。氛翳廓清兮。寇戎披攘。岡巒靡迤兮。亭障籌翔。秦凱而歸兮。竹帛燁煌。嗟夫。世有絕景。然後發馳騁怪偉之辭。士有奇志。然後悟超絕詭特之觀。昔人文章之妙兮。固與造化者同夫一端。風霆之奔掣兮。震薄九關。追寫以筆墨兮。固知其難。彼黃塵赤日兮。車馬衣冠。得斯賦而讀之兮。亦足以發胸中之高寒也。

紅梔子華賦

余讀五嶽之書。始知蜀之青城。歲癸巳之仲冬。天畀予以此行。極山中之奇觀。乃稅駕乎雲肩。挹瀑泉之甘寒。味芝朮之芳馨。濯肺肝之塵土。凜毛骨其淒清。乃步空翠之間。而聽風松之聲。覩一童子。矜佩青青。手持異華。六出其莢。以爲薺蔔。則色丹。蓋莫得而強名。方就視而愛歎。已絕馳而莫及。忽矯首而清獻。猶舉袂而長揖。援脩蔓而上騰。壁峭壁而遽入。數變滅于轉盼。久儻恍而佇立。有老道士。笑而語予。人皆可以得道。求諸己而有餘。願捨是而外慕。宜見欺于狡狙。嗟予好學而味道。有書而無師。雖羸速于聲利。實未免夫喜奇。請書先生之言。用爲終身之規。

豐城劍賦過豐城縣作

在晉太康。觀星者曰。夕有異氣。見于牛斗之躔。時方伐吳。或曰。吳未可平。彼方得天。獨張華之博識。排是說之不然。迨孫皓之脚璧。氣益著而不寤。于是雷煥附華之說。曰。是寶劍之精。維太阿與龍泉。卒之斷獲于豐城之獄。變化于延平之川。世皆以爲是矣。千載之後。有陸子者。喟其永歎。夫占天知人。本以考驗治忽。卜運命之促延。彼區區之二劍。曾何與于上玄。若吳亡而氣猶見。其應晉之南遷。有識已悲宗廟之丘墟。與河洛之腥羶矣。華不此之是懼。方飾智而怙權。嗚虜。負重名。位大吏。俛仰羣枉之間。敗不可以旋踵。而顧自謂優游以窮年。夫九鼎不能

保東周之存。則二劍豈能救西晉之顛乎。使華開大公。進衆賢。徒南風于長門。投賈謚于羽淵。則身名可以俱泰。家國可以兩全。彼三尺者。尙何足捐乎。煥輩非所責。予將酌扈酒。賦此以弔吾茂先也。

焚香賦

陸子起玉局。牧新定。至郡彌年。困于簿領。意不自得。又適病青。厭喧嘩。事幽屏。卻文移。謝造請。閉閣垂帷。自放于冥寂之境。時則有二口之几。兩耳之鼎。爇明窗之寶炷。消畫漏之方永。其始也。灰厚火深。煙雖未形。而香已發聞矣。其少進也。縣縣如鼻端之息。其上達也。鬻藹如山穴之雲。新鼻觀之異境。散天葩之奇芬。旣卷舒而縹緲。復聚散而輪囷。傍琴書而變滅。留巾袂之氤氳。參佛龕之夜供。異朝衣之晨熏。余方將上疏挂冠。誅茅築室。從山林之故友。娛耄耋之餘日。暴丹荔之衣。莊芳蘭之茁。徙秋菊之英。拾古柏之實。納之玉兔之臼。和以檜華之蜜。掩紙帳而高枕。杜荆扉而簡出。方與香而爲友。彼世俗其奚恤。潔我壺觴。散我籤帙。非獨洗京洛之風塵。亦以慰江漢之衰疾也。

自閔賦

余有志於古兮。騁自壯歲。慕殺身以成仁兮。如自力於私毅。視閨室其猶康莊兮。凜昭昭之可畏。敢以不費之身兮。差冒沒于富貴。嗟止不自推兮。草奮如輦。余旁睨而竊怪兮。抵掌戲吐。狂喙之三尺兮。論極涇渭。徒被齋而潔芳兮。蹈道則未。念國中孰知我兮。去而遠遊。窮三江而浮七澤兮。莫維余舟。赤甲崇崇兮。白鹽酋酋。東屯之下兮。清泉笑疇。是可以置家兮。予卽而謀。忽馳騁而北首兮。道阻且悠。宕渠葭萌兮。石摧車軌。雲棧劍閣兮。險名九州。遂戍散關兮。北防盛秋。登高以望兮。慷慨滂流。畫策不見用兮。寧鐘釜之是求。歸過蜀而少休兮。卜城南之丘。築室鑿井兮。六年之留。或挽而出兮。遺以百憂。奚觸而忿兮。起爲寇讎。惟節士以見疑兮。趨以卽死。豈摧辱之不置兮。尙馳驚而弗止。彼賤丈夫之希世兮。頑鈍亡恥。雖鉗于市其猶安受兮。何有于詆訾。毀吾車兮。殿門。逝口老于故里。

思故山賦

陸子爲嚴州逾年。困于吏役。悵然不樂。日有秦稽之思。乃作思故山賦。其詞曰。

仲秋之杪。木葉既落。殘暑告歸。霖雨未作。川原奇麗。天宇澄廓。風蕭蕭而未厲。日暉暉而淺薄。陸子于是被白葛之單衣。躡青芸之雙屨。抱嶂陽之寶琴。引華亭之鷓鴣。出衡茆。度略約。榜一葉之輕舟。凌浮天之大壑。白鷺下渚。文魚出躍。荷蓋摧柄。竹枝隕籟。松騎騎以藏寺。柳疎疎而帶郭。行欲盡而更賒。望若邇而逾邈。俄而披煙霞。觀嶽。千峯巖峨。萬嶂聯絡。或聳起而鳥騫。或怒奮而獸搏。或雖容而暇豫。或峭厲而刻削。或方行而疑立。或將前而復卻。連者如隄。斷者如笮。廣者如屋。銳者如槩。泄雲如飢。蓄雨如藥。或平如燕居之几。或壯如行軍之幟。或筋脈奇瘦。如夔魍之欸見。或竅穴穿空。如渾沌之初鑿。豈惟西門青城。北揜紫閣。固已擅雄秀于三口。噫。口里之旁。磳矣。口乃涉淺濶之淙潺。步蒼崖之犖磔。擷幽蹊之凋蘭。掇孤洲之芳若。歷市聚之雞犬。望塔廟之丹樓。耕墾參差。疏畦交錯。則有野父樵童。迎揖而勞苦。道翁藥叟。一笑而相握。拂藜牀以延坐。持黍酒而請酌。秋釀粟餌。牛醢雉臠。陳升果蔬。調變鹽酪。超世俗之澆僞。有太古之簡朴。或驚齒髮之衰殘。或喜精神之矍鑠。或譏宿志之久負。或誚浮名之奚樂。嗟餘日之幾何。將舍此而焉託。予仰而歎。俛而作。楚祭而起謝曰。僕所謂自用而愚。寡要而博。貌智而中蠱。類強而實弱者也。凡子言者。敢不敬諾。請謝曩昔之過。更堅後日之約。可乎。今予年過六十。血氣已索。春憂重膇。秋畏瘴癘。飲不醮觚。食不加勺。衣食之奉。減于市藥。雖富貴而孰享。矧刑禍之可愕。冒平地之濤瀾。忽鬪首之蛟鱗。以吾真之至貴。就華纓而自縛。旌搖搖而靡定。舟泛泛而安泊。逝將歸而即汝。尚農圃之可學。指白日以為盟。挽天河以自濯。冀晨春之相聞。亦社酒之共曠。春原出而耦耕。秋場築而偕穫。僕之念歸。如寒魚之欲就箔也。若曰金棄于躍冶。足則于獻璞。退居之言。困而後酢。識謝獨見。機味先覺。則敢不斂衽正容。以拜父老之罰簪。

閩古泉記

太師平原王韓公府之西。繚山而上。五步一磴。十步一壑。崖如伏龍。徑如驚蛇。大石礚礚。或如地踊以立。或如翔空而下。或翩如將奮。或森如欲搏。名葩碩果。更出互見。壽藤怪蔓。羅絡蒙密。地多桂竹。秋而華敷。夏而籜解。至者應接不暇。及左顧而右盼。則呀然而江橫陳。豁然而湖自獻。天造地設。非人力所能爲者。其尤勝絕之地曰閩古泉。在瀾玉亭之西。繚以翠麓。覆以美蔭。又以其東向。故浴海之日。既望之月。泉輒先得之。袤三尺。深不知其幾也。

霖雨不溢。久旱不涸。其甘飴蜜。其寒冰雪。其泓止明靜。可鑒毛髮。雖游塵墮葉。常若有神物呵護屏除者。朝暮兩
場。無時不鏡如也。泉上有小亭。亭中置瓢。可飲可濯。尤於烹茗釀酒爲宜。他石泉皆莫逮。公常與客倚泉上。酌
以飲客。游年最老。獨盡一瓢。公顧而喜曰。君爲我記此泉。使後知吾輩之游。亦一勝也。游按泉之壁。有唐開成五
年。道士諸葛鑑元。八分書題名。蓋此泉湮伏弗耀者。幾四百年。公乃復發之。時閱古蓋先忠獻王以名堂者。則泉
可謂榮矣。游起於告老之後。視道士爲有愧。其視泉尤有愧也。幸且暮得復歸故山。幅巾短褐。從公一酌此泉。而
行尙能賦仁。嘉泰三年四月乙巳山陰陸游記。

南園記

慶元三年二月丙午。慈福有旨。以別園賜今少師平原郡王韓公。其地實武林之東麓。而西湖之水匯于其下。天
造地設。極山湖之美。公既受命。乃以祿入之餘。葺爲南園。因其自然。輔以雅趣。方公之始至也。前瞻卻視。左顧右
盼。而規模定。因高就下。通窻去蔽。而物象列。奇葩美木。爭效于前。清流秀石。若顧若揖。於是飛觀傑閣。虛堂廣廳。
上足以陳俎豆。下足以奏金石者。莫不畢備。高明顯敞。如蛻塵垢。而入窈窕。邃深疑于無窮。旣成。悉取先得魏忠
獻王之詩句而名之。堂最大者曰許閒。上爲親御翰墨。以榜其顏。其射廳曰和容。其臺曰寒碧。其門曰藏春。其關
曰凌風。其積石爲山。曰西湖洞天。其瀦水藝稻。爲園爲場。爲牧牛羊畜雁鷺之地。曰歸耕之莊。其它因其實而命
之名。則曰夾芳。曰豁望。曰鮮霞。曰矜春。曰歲寒。曰忘機。曰照香。曰堆錦。曰清芬。曰紅香。亭之名則曰遠塵。曰幽翠。
曰多稼。自紹興以來。王公將相之園林相望。莫能及南園之髣髴者。公之志。豈在於登臨游觀之美哉。始曰許閒。
終曰歸耕。是公之志也。公之爲此名。皆取於忠獻王之詩。則公之志。忠獻之志也。與忠獻同時功名富貴。略相埒
者。豈無其人。今百四十五年。其後往往寂寥無聞。韓氏子孫。功足以銘彝鼎。被絃歌者。獨相踵也。逮至于公。勤勞
王家。勲在社稷。復如忠獻之盛。而又謙恭抑畏。拳拳志忠獻之志。不忘如此。公之子孫。又將嗣公之志。而不敢忘。
則韓氏之昌。將與宋無極。雖周之齊魯。尙何加哉。或曰。上方倚公如濟大川之舟。公雖欲遂其志。其可得哉。是不
然。知上之倚公。而不知公之自處。知公之勲業。而不知公之志。此南園之所以不可無述。游老病謝事。居山陰澤
中公以手書來曰。子爲我作南園記。游竊伏思公之門。才傑所萃也。而顧以屬游者。豈謂其愚且老。又已挂衣冠

而去。則庶幾其無諛辭。無侈言。而足以道公之志歟。此游所以承公之命而不獲辭也。中大夫直華文閣致仕賜紫金魚袋。陸游謹記。

水龍吟

摩訶池上追遊客。紅綠參差春晚。韶光妍媚。海棠如醉。桃花欲煖。挑菜初聞。禁煙將近。一城絲管。看金鞍爭道。香車飛蓋。爭先占。新亭館。惆悵年華暗換。黯銷魂。兩收雲散。鏡奩掩月。釵梁拆鳳。秦箏斜雁。身在天涯。亂山孤壘。危樓飛觀。歎春來只有。楊花和恨。向東風滿。

夜遊宮宴席

宴罷珠簾半卷。畫簷外。蠟香人散。翠霧霏霏。漏聲斷。倚香肩。看中庭。花影亂。宛是高堂館。寶奩炷。麝煙初煖。璧月何妨。夜夜滿。擁芳柔。恨今年。寒尙淺。

月照梨花闌思

霽景風軟。煙江春漲。小閣無人。繡簾半上。花外姊妹相呼。約樽蒲。修蛾忘了。章臺樣。細思一餉。感事添惆悵。胸酥臂玉消減。擬覓雙魚。倩傳書。

又闌思

悶已縈損。那堪多病。幾曲屏山。伴人畫靜。梁燕傲起。猶慵。換熏籠。新愁舊恨。何時盡。漸凋綠鬢。小雨知花信。芳牋寄與何處。繡閣珠櫺。柳陰中。

如夢令闌思

獨倚博山峰小。翠霧滿身飛繞。只恐學行雲。去作陽臺春曉。春曉。春曉。滿院綠楊芳草。

渭南文集。皆放翁未病時手自編輯者。其不入韓侂胄園記。亦董狐筆也。予已梓行久矣。牧齋師復出賦七篇相示。皆集中所未載。又云。闕古南園日記。雖見疵于先輩。文實可傳。其飲青衣泉。獨盡一瓢。且曰。視道士有媿。視泉尤有媿。已面唾侂胄。至于南園之亂。惟勉以忠獻事業。無諛詞。無侈言。放翁未嘗爲韓尋也。因合鐫之。併載詩餘幾闕。以補渭南之遺云。湖南毛晉識。

卷下

成材將還肝江幕以詩四章爲貺次韻其二以識別歲在政元孟夏二十有三日書于臥龍方丈之西壁
漂泊干戈到粵山。不妨還正七雲冠。乾坤策內窺真象。龍虎爐中養舊丹。靜愛白雲歸遠岫。時邀明月下層巒。此
身已作長閑計。祇願朝廷四海安。

又

文場妙譽古推高。卜仕尤從州縣勞。野鶴未應羣雁驚。幽蘭終不敵蓬蒿。歲寒挺節無霜霰。海運搏風有羽毛。好
去江南吐奇策。從來功業屬吾曹。

送李舍人赴闕

執簡曾聞侍玉螭。謫仙才調盡推奇。能將苦語康時病。更遣丹誠動主思。北闕親朋瞻舊德。東吳山水入新詩。知
公自有經綸術。會見飛翔集鳳池。

寄鄧志宏五首

三徑從來半草萊。席門那爲故人開。自慚不是梧桐樹。安得朝陽鳴鳳來。

又

彭澤思歸意未成。折腰五斗謾勞生。何如張翰秋風起。便憶鱸魚葦菜羹。

又

厭從薄宦思蓮幕。思見故人映玉山。須信人生貴適志。相逢樽酒且開顏。

又

筆下文章信有神。西來避地不無因。要看銀漢從天落。一洗人間萬古塵。

又

中原回首涕沾裳。誰是當時柱石強。會喚謫仙天上去。扶將日轂出扶桑。

大溪灘折柁。舟行至大溪而折柁。中流危甚。舟人皆懼。作笑謂德夫兄曰。吾輩豈嘗死于此耶。已而幸獲濟。虞。因成二絕。

溪流亂石似牛毛。雨過狂瀾勢轉豪。寄語河公莫作戲。從來忠信任風濤。

又

暮江初漲漫翻狂。一葉輕舟泛渺茫。我愧人非跛男子。安能與世作津梁。

羅山平雲閣

上方高閣與雲齊。臘屐穿雲步步躋。卻恐此身生羽翼。不從平地作增梯。九門路接青霄近。四望山連碧海低。徙倚闌干重回首。疎林煙暝野猿啼。

中閣

萬仞仙山插太空。山腰依約見蓮宮。人寰隔絕無人到。洞府深沉有路通。石隙生雲埋柱礎。海光浮日映簾櫳。野僧齋罷憑闌久。千里秋毫入望中。

仲虛宮

林館松門白晝扃。參鸞人去已千齡。基存舊宅樓臺古。地有遺丹草木靈。滿榻晴雲春釀雨。一池秋水夜涵星。麻姑仙馭今何在。檻外孤峯晚更青。

羅浮山

十里山光翠障開。重遊何事意徘徊。石樓自向雲中見。仙島誰知海上來。丹竈尙能含日月。龍潭還解起風雷。天涯爲郡空華髮。十二年間到兩迴。

寶積寺

偶來遊古寺。景逐眼前生。巖上高僧坐。林間野客行。望窮滄海遠。吟久暮雲平。此境真難到。登臨暫適情。

祈雨

折腰爲米顏常醜。負耒躬耕意自甘。積谷千牛多骨相。年年禱雨到雲菴。

又

至德無私不我欺。精祈未効莫輕疑。但令葵藿勤傾向。會有風雲感會時。

秋日山居

晏起

年年睡債苦相關。好夢長隨苦角殘。作意歸來償宿負。透牕遮莫已三竿。

野步

漠漠秋園暮景孤。綸巾羽服從奚奴。風流畫手無摩詰。寫作龍山野步圖。

午枕

茗椀兵休戒老兵。客來剝啄急須應。爲言余正理公事。半落烏紗枕曲肱。

夜坐

老癩開編早欠伸。強搔短髮照青燐。蠶鹽二十年前夢。尙想長郎撼夜鈴。

戲作

颺颺松韻生魚眼。洶洶雲濤湧兔毫。促膝細論同此味。絕勝痛飲讀離騷。

又

東書舊隱棋巖下。憤碾春風傲北牕。喚起口生塵土夢。賴君圭璧一雙雙。

又

建苑誇豪如貴冑。棋巖晦迹類臞仙。倘憑闕闕定人物。耕野釣溪難自賢。

余邦英惠小山新芽作小詩三首以謝

家園破社得鷹爪。舌本初參便到口。忽喜雲腴來建苑。坐令渴肺生華滋。

又

正焙如觀詩大雅。小山當似變風論。脫今風格不類古。終有先王禮義存。

又

平時共語不成些。癡坐空彫藜莧腸。誰遣春風入牙頰。詩成忽帶小山香。

寄彥成

交舊天涯曉宿稀。年來獨子付心期。滿牀文史對談處。萬里風霜並轡時。雨滴空堦憐夜榻。吟牽芳草夢春池。合沙橋下東流水。雙鯉何時上釣絲。

榮諱

車馬填門撥不開。吾宗得雋凱歌回。折將蟾苑一枝桂。泛入萱堂百歲杯。雅望素欽山竦岳。芳名中占斗中魁。先登賴子光邦族。繼踵行看袞袞來。

翠微堂

萬頃青山只一溪。此中聊欲效真栖。尋深巧被閑雲到。破靜時聞幽鳥啼。羞有卑功追管晏。慚無高節比夷齊。困眠飢食真吾事。寶篆香殘日又西。

閑居

小隱輕華屋。深山自結茅。亂苔侵石磴。疎竹映花梢。泉瀨含清韻。風來慰淡交。閉門燒柏子。好把道書抄。

又

溪透桃源路。門連小華峯。虹霓橫水檻。羽蓋偃巖松。日月詩魂迴。煙霞道氣濃。欲尋鍾呂去。世外說從容。

又

廚給胡麻粒。山供鹿脯盤。掃門遲客至。入郭借書看。種竹添風韻。留松老歲寒。一生無別事。雞犬戀劉安。

又

自得窮通樂。而無寵辱驚。韜光聊混俗。去知默陶情。毛竹蒼龍瘦。雲衣白鶴輕。時敲朝斗磬。林外玉聲清。

又

野水明鵝兒。通渠遶屋流。鷺衝煙織素。魚避月沉鉤。草鬧蚊蠅市。林昏蝙蝠秋。開懷覺清曠。萬象入冥搜。

又
生計淡無味。終焉樂有餘。灌畦親抱甕。種秫學拈鋤。擇木翔歸鳥。臨淵聚戲魚。地偏心更遠。靖節愛吾廬。

又
剪葉霜風勁。關門謝遠遊。深村梅映雪。前浦水明樓。蜜熟蜂衙放。蠶殘蟻陣收。地爐無獸炭。炙背補衣裳。

夜坐

懷抱何蕭爽。涼風掃鬱蒸。寒蛩喧敗草。飢鼠嚙枯藤。蝶入誰家夢。花殘半夜燈。無人論道德。長嘯愧孫登。

新秋晚歸

玉粒嘗新稻。金風作好秋。鴈回沙漠信。蟠噪夕陽愁。立久雲生岫。歸遲月滿樓。吟余露華冷。砧杵起江頭。

懷王美

理髮侵霜白。酡顏借酒紅。故人千里別。何日一樽同。魂夢徒勞蝶。音書不見鴻。抱琴雖有意。無語倚西風。

感事

今古成何事。興亡迹已陳。干時無上策。避世且全真。就日思明主。看雲憶老親。到頭垂白早。徑醉曲生春。

客舍對梅

野迴林寒一水傍。密如疎蕊正商量。半霜半雪相仍白。無蝶無蜂自在香。月過曉牕移影瘦。風傳殘角引聲長。還憐客路龍山下。未折一枝先斷腸。

春日

平生過眼萬芳菲。晚景收心與世違。枯槁形骸元自瘦。膏腴田土爲誰肥。

據放翁子子虞跋云。先君編前藁。于舊詩多所去取。其遺存者尙七卷。別名遺藁。惜今不傳。余刻劍南詩藁。成。復從牧齋師案頭。見續藁二冊。又得未刻律詩八句者二十三首。四句者二十首。但春日一章。雖編入斷句。而語意未了。疑亦八句而缺其後。遇詮次作逸藁下卷。聊補劍南之遺云。湖南毛晉識。

續添

聞婆餅焦

黃泥嶺。松森森。幽鳥穿枝時一吟。汝聲一何森。汝語惻我心。連邨麥熟餅餌香。我母九泉那得嘗。

種桑

孔明百畝桑。景略十具牛。豈無子孫念。飽暖自可休。種桑吾廬西。微徑出南陌。三月葉暗園。四月椹可摘。戴勝枝上鳴。倉庚葉閒飛。飛鳴各自口。人生口不歸。歸家力農桑。慎莫愁貧賤。婚嫁就比鄰。死生長相見。

夜聞櫓聲

啣啞雙櫓聲。淒切遊子情。豈無一杯酒。孤舟誰與傾。清愁不可耐。霜月照潮平。

離家示妻子

明日當北征。竟夕起復眠。悲蟲號我傍。青燈照我前。婦憂衣裳薄。紉線重數綿。兒爲檢藥籠。桂蠶手炮煎。墩埃默可數。一念已酸然。使憂能傷人。我得復長年。同生天壤閒。人誰無一塵。傷哉獨何辜。遑遑長可憐。破屋不得住。風雨走道邊。呼天得聞否。賦與何其偏。

黃山塔

風吹旗脚西南開。掛帆搥鼓何快哉。轉頭已失望如石。黃山孤塔迎人來。黃山勸汝一杯酒。送往迎來殊耐久。明年我作故鄉歸。還對黃山一搔首。

送三兄赴秦邸

兄年十七弟始生。弟今白髮森千莖。所期相就畢此世。一尊濁酒得共傾。往年雖窮猶半菽。兩年糠覈苦不足。書生志欲及天下。貧賤不得收骨肉。過悲復恐兄意傷。忍涕不覺涕已滂。早朝霜露戒衣薄。願書此語歡或忘。閉門病衰百無用。日望兄歸有餘俸。早從丞相乞湖州。莫待異時思少游。

聞角

小閣柴門近。黃昏畫角聲。時時逐風散。嫋嫋伴愁生。天地清秋暮。關河歲月明。湖南賊未破。獨立久含情。

寄楊濟伯

聞道皇華使。來從萬里回。五溪春薺老。三峽暮猿哀。昔日文昌省。頻年灑灑堆。問君何地險。斟酌寄聲來。

幽事

日日營幽事。時時有好懷。兩園殘竹粉。風砌落花釵。伴蝶行苔徑。聽蛙傍水涯。窮通了無謂。不必更安排。

葺圃

種樹書頻讀。齊民術屢窺。曾求竹醉日。更問柳眠時。盧橘初非橘。蒲葵不是葵。因而辨名物。甘作者樊遲。

幽事

幽事春來早。晨興即啓閤。掃梁迎燕子。插椽護龍孫。數日招賓友。先期辦酒尊。淋漓衣袖溼。不管續春痕。

北檻

北檻近中堂。緣堦物自芳。晨清花拱露。地僻藜侵廊。坐久時開卷。吟餘或炷香。終朝無客至。一枕到羲皇。

贈徐相師

許負遺書果是非。子憑何處說精微。使君豈必如椰大。丞相元來要瓠肥。袖闊日常籠短刺。肩寒春未換單衣。口頭布袋挑詩卷。也道遊京賣術歸。

寄姜梅山雷字詩

章臺官柳映宮槐。寶馬蹄輕不動埃。只怪好詩無與敵。誰知古學有從來。江山常逐客帆遠。歲月不禁衙鼓催。剩約東林投淨社。高情千載有宗雷。

采菊

秋花莫插鬢。雖好亦淒涼。采菊還授卻。空餘滿袖香。

吳娃曲友有妾而內不容。戲爲作此。因得不去。

滿地花陰不閉門。琵琶抱恨立黃昏。妾身不似天邊月。此夜此時重見君。

忘憂石榴深淺紅。草花紅紫亦成叢。明年開時不望見。只望郎君不著儂。

又

二月鏡湖水拍天。禹王廟下鬪龍船。龍船年年相似好。人自今年異去年。

又

臂上燒香拜佛前。願郎安穩過新年。多情已是長多病。莫要留心在妾邊。

過江至蕭山縣驛東軒海棠已謝

星星兩鬢怯年華。幽館無人江月斜。惆悵過江留一夕。曉風吹盡海棠花。

先君刻逸藁後六十餘年。展購得別本渭南集五十二卷。其前後與家刻略同。祇少入蜀記六卷。而多詩八卷。細檢劍南集中。除其重複。又得未刻詩二十首。并續添於後云。汲古後人毛扆識。

南唐書序

天曆改元。余待罪中執法。監察御史王主敬謂余曰。公向在南臺。蓋嘗命郡士戚光纂輯金陵志。始訪得南唐書。其於文獻遺闕。大有所考證。裨助良多。且爲之音釋焉。因屬博士程熟等。就加校訂。鑿板與諸史並行之。越明年。余得告。還金陵。書適就。光來請序。按南唐本紀。李昇系出憲宗四世。開關困阨。纔有江淮之地。僅餘三十年。卒不復振。而宋滅之。雖爲國褊小。觀其文物。當時諸國。莫與之並。其賢才碩輔。固不逮蜀漢武侯。而張延翰。劉仁贍。潘佑。韓熙載。孫忌徐錯之徒。文武才業。忠節聲華。炳耀一時。有不可揜。矧其間政化得失。興衰治亂之跡。有可爲世鑒戒者。尤不可泯也。竊謂唐末契丹雄盛。虎視中原。晉漢之君。以臣子事之。惟謹。顧乃獨拳拳於江淮小國。聘使不絕。嘗獻橐駝并牟馬千計。高麗亦歲貢方物。竟者久服唐之恩信。尊唐餘風。以唐爲猶未亡也。邪。宋承五季。周統。目爲僭僞。故其國亡。而史錄散佚不彰。然則馬元康胡恢等。迭有所述。今復罕見。至山陰陸游。著成此書。最號有法。傳者亦寡。後世有能秉春秋直筆。究明綱目統緒之旨者。或有所考而辯之。姑識其端。以俟君子。余前忝史館。朝廷嘗議修宋遼金三史而未暇。他日太史氏復申前議。必將有取於是書焉。集賢大學士奎章閣大學士光祿大夫知經筵事趙世延序。

南唐書目錄

卷一

烈祖本紀

一

卷二

元宗本紀

五

卷三

後主本紀

一一

卷四

宋齊丘列傳

一五

卷五

周徐查邊列傳

一八

卷六

周柴何王張馬游刁列傳

二一

卷七

徐高鍾常史沈三陳江毛列傳

二六

卷八

三徐三五二朱胡申屠喬睦列傳

三一

卷九

劉高盧陳李廖列傳

三五

卷十

張李皇甫江歐列傳……………	四〇
卷十一	
馮孫廖彭列傳……………	四四
卷十一	
孟陳韓朱列傳……………	四八
卷十二	
劉潘李嚴張龔列傳……………	五一
卷十四	
郭張林盧蒯二陳列傳……………	五六
卷十五	
周鄭李三劉江汪郭伍蕭李盧朱王魏列傳……………	六〇
卷十六	
后妃諸王列傳……………	六五
卷十七	
雜藝方士節義列傳……………	七一
卷十八	
浮屠契丹高麗列傳……………	七四

南唐書

卷一

烈祖本紀第一

烈祖光文肅武孝高皇帝。名昇。字正倫。小字彭奴。徐州人。姓李氏。唐憲宗第八子建王恪之玄孫。恪生超。超生志。仕爲徐州判司。卒官。因家焉。志生榮。榮性謹厚。喜從浮屠遊。多晦跡精舍。時號李道者。帝以光啓四年十二月二日生於彭城。六歲而孤。遇亂。伯父球攜帝及母劉氏。避地淮泗。至濠州。乾寧二年。淮南節度使楊行密。見而奇之。養以爲子。行密長子渥惡帝。不以爲兄弟。行密乃與大將軍徐溫曰。是兒狀貌非常。吾度渥終不能容。故以乞汝。遂冒姓徐氏。名知誥。帝事溫盡子道。溫妻李氏。以其同姓。鞠養甚至。及長。身七尺。方頰隆準。脩上短下。語聲如鍾。精采鑠人。常緩步。而從者疾行。莫能及。溫有疾。與其婦晨夜侍旁不去。溫益愛之。行密亦謂溫曰。知誥雋傑。諸將子皆不逮也。天祐六年六月。自元從指揮使遷昇州防遏使。兼樓船軍使。治戰艦於昇。七年五月。授昇州副使。知州事。九年。副柴再用平宣州。以功遷昇州刺史。時江淮初定。守令皆武夫。專事軍旅。帝獨褒廉吏。課農桑。求遺書。招延四方士大夫。傾身下之。雖以節儉自勵。而輕財好施。無所愛吝。以宋齊丘。王令謀。王翊。主論議。曾禹。張洽。孫飭。徐融。爲賓客。馬仁裕。周宗。曹悰。爲親吏。十一年。加檢校司徒。始城昇州。十四年五月。城成。溫來觀。喜其制度壯麗。徙治焉。而以帝爲檢校太保。潤州團練使。帝本意在宣州。不悅。時溫子知訓。以內外馬步都軍副使。專制楊氏。驕淫失衆。宋齊丘納說曰。知訓旦暮且敗。是行天所贊也。十五年。朱瑾殺知訓。馬仁裕自蒜山渡。馳告帝。帝即日帥師入廣陵。定亂。遂代知訓爲淮南節度行軍副使。內外馬步都軍副使。勤儉寬簡。盡反知訓之政。上下悅服。吳王建國。以帝爲左僕射。參政事。國人謂之政事僕射。乘剝亂之後。曾未期歲。紀綱憲度。粲然並舉。溫雖遙執國政。而人情頗已歸屬於帝。有徐玠者。事溫。爲金陵行軍司馬。工揣摩捭闔。密說溫曰。居中輔政。豈宜假之它姓。請更用嫡子知詢。帝刺知皇恐。表乞罷政事。出鎮江西。表未上。而溫疾亟。遂止。溫卒。知詢嗣爲金陵節度使。諸道副都統。數與帝爭權。帝乃使人誘之來朝。留爲左統軍。悉奪其兵。而帝以太尉中書令出鎮金陵。如溫故事。吳命

帝開大元帥府。置僚屬。進封齊王。用天子制度。改名誥。

昇元元年冬十月。吳帝禪位於我。甲申。即皇帝位。改吳天祚二年爲昇元元年。國號齊。以十二月二日爲仁壽節。尊吳帝爲高尙思。玄弘古讓皇帝。上冊稱受禪老臣誥。追尊考溫爲太祖武皇帝。丙申。以平章事張延翰爲右僕射。兼門下侍郎。同平章事。門下侍郎張居詠。中書侍郎李建勳。皆爲同平章事。以建康爲西都。廣陵爲東都。改尙書省爲尙書都省。東都尙書省爲留守院。丙戌。改齊明門爲朝元門。丁亥。封弟知證爲江王。知諤爲饒王。戊子。降吳太子璉爲弘農郡公。辛卯。降吳建安王珙。江夏王璘等十一人爵一等。而加官增戶邑。詔獄訟未經本處論決者。毋得詣闕訴。乙未。降吳公主爲國君。甲午。立王后宋氏爲皇后。丙申。封女弟杞國君爲廣德長公主。庚子。遣使如漢。閩吳越荆南告即位。辛丑。追封吳歷陽公瓌爲臨川王。諡曰靈。以禮改葬。戊申。封子景通爲吳王。諸道副元帥。判六軍諸衛事。十一月庚戌朔。改東都舊第爲崇德宮。癸丑。改承宣院爲宣徽院。丙辰。追冊故妃魏國君楊氏爲順妃。丁巳。追封長子景遷爲高平郡王。長女爲豐城公主。改辭狀司爲清訟院。立姪景邁爲晉陵郡公。景遜爲上饒郡公。景邈爲桂楊郡公。景逸爲平陽郡公。封女五人爲盛唐。太和。永興。建昌。玉山公主。戊午。立子景遂爲吉王。景達爲壽陽郡公。以景遂爲東都留守。江都尹。赴東都。己未。陞東都海陵縣爲泰州。割鹽城。泰興。如皋。興化縣屬焉。丁卯。高從誨表請置邸建康。從之。己巳。吳越王使將軍袁韜來賀即位。乙亥。追封故高平王景遷妃吳上饒公主爲燕國君。諡貞莊。十二月庚寅。上太祖武皇帝陵曰定陵。追尊高祖以下皆爲公王。而稱宗。配皆稱國君及妃。墓皆稱陵。惟武皇帝之配李氏曰明德皇后。丙午。有星孛北方。

昇元二年春正月己酉朔。日有食之。避殿。停朝賀。甲子。高從誨使龐守規來賀即位。甲戌。詔臣僚三品以上追贈父母。將相贈三世。二月壬戌。閩使內客省使朱文進來賀即位。夏五月。讓皇屢請徙居。南平王李德誠等亦引漢隋故事。有請。戊午。改潤州州治爲丹陽宮。以平章事李建勳充迎奉讓皇使。己未。漢使集賢殿學士鄒禹讓來賀即位。甲寅。徙讓皇居丹陽宮。丁卯。廣濟倉災。焚米二十萬石。作渾天儀。六月庚辰。月入太微西華門。犯右執法。辛巳。犯東垣上相。甲申。陞池州爲康化軍。是月。高麗使正朝廣評侍郎柳勳律來朝貢。秋七月壬申。以左丞相宋齊丘爲平章事。八月戊寅。陞洪州瀟灘鎮爲清江縣。不隸州。丁亥。契丹使梅里祿盧古來聘。冬十月丙子。立太學。命

刪定禮樂。癸未。新羅使來朝貢。壬辰。命吳王璟勒步騎八萬。講武銅駝橋。十二月辛丑。讓皇祖。詔不視朝二十七日。帝率百官素服舉哀。是歲。徙吳王璟爲齊王。

昇元三年。春正月庚戌。江王知證。饒王知諤。表請帝復姓李氏。不許。癸亥。右丞相齊丘。平章事居詠。建勳。樞密使。同平章事宗等。表請復姓。甲子。御札詳議復姓。乙丑。齊丘等議。宜如所請。從之。丙寅。至壬申。齊王璟等三上尊號。曰應乾紹聖文武孝明皇帝。不許。詔曰。迺者干戈相尋。地蕪而不藝。桑殞而弗蠶。衣食日耗。朕甚閔之。民有嚮風來歸者。授之土田。仍給復三歲。二月乙亥。改太祖武皇帝廟號義祖。己卯。帝御興祥殿。復姓。爲考妣發哀。與皇后皆服斬纓。居廬。如始喪禮。服考妣喪各二十七日。凡五十四日。不視朝。旦暮臨。詔國事委宋齊丘。惟軍旅以聞。羣臣固諫。詔以墨纒聽政。帝初欲更名昂。以犯文宗諱。乃名冕。或云朱全忠名也。又更名坦。御史王鵠言。字從旦。犯睿宗諱。庚寅。詔更名昇。甲午。月犯南斗第六星。乙未。契丹使曷魯來。以兄禮事帝。蜀使來賀卽位。追尊高祖建王恪曰定宗。孝靜皇帝。貞妃程氏曰貞靜皇后。曾祖超曰成宗。孝平王。配崔氏曰平貞妃。祖志曰惠宗。孝安王。配盧氏曰安莊妃。考榮曰慶宗。孝德皇帝。配劉氏曰德恭皇后。庚午。作南郊行宮千間。夏四月庚辰。朝享於太廟。辛巳。有事於南郊。以高祖神堯皇帝配。用上辛也。大赦。百官進位。將士勞賜有差。民三年藝桑及三千本者。賜帛五十疋。每丁墾田及八十畝者。賜錢二萬。皆五年勿收租稅。詔曰。朕以眇躬。託於民上。常懼弗類。以養高祖太宗之遺業。羣公卿士。顧欲舉上尊號之禮。朕甚不取。其勿復以聞。戊子。進封李德誠趙王。徐知證韓王。知諤梁王。辛亥。進封景遂壽王。景達宣城王。丙寅。以齊王璟爲諸道兵馬大元帥。丁未。吳越王使左武衛上將軍沈韜文。荆南高從誨使王崇嗣來賀南郊。作北郊於玄武湖西。熒惑犯月。秋七月丙午。放諸州所獻珍禽奇獸於鍾山。命有司作昇元格。與吳令並行。甲寅。歲星晝見。自五月不雨。至於閏七月。冬十月丁丑。御後樓。閱戰馬。

昇元四年春二月。詔罷營造力役。毋妨農時。三月丁未。頒中正曆。曆官陳承勛所撰也。丙戌。漢人閩人來聘。夏五月。晉安州節度副使李金全來降。六月癸亥。罷宣州歲貢木瓜雜果。太師中書令趙王李德誠卒。秋八月。立齊王璟爲皇太子。仍兼大元帥。錄尚書事。璟固讓。從之。丁卯。月掩歲星。九月戊辰。契丹使梅里掠姑米里來聘。獻狐白裘。冬十月癸巳朔日。熒惑填歲星。聚於南斗。壬寅。以齊王璟讓儲貳。赦殊死以下。京師賜酺。內外諸軍給優賜。禁

表奏言聖睿二字。違者以大不敬論。乙巳。詔幸東都。命齊王璟監國。庚戌。帝自保德門御舟。辛亥。次迎鑾鎮。甲寅。至東都。入建元門。帝感念疇昔。愀然流涕不已。遣使問東畿士民不能自存者。己未。高麗使廣評侍郎柳兢質來貢方物。十一月乙丑。宴羣臣於崇德宮。故第也。以聽事爲光慶殿。庚辰。改東都文明殿爲乾元殿。英武殿爲明光殿。應乾殿爲垂拱殿。朝陽殿爲福昌殿。積慶宮爲崇道宮。西都崇英殿爲延英殿。凝華內殿前爲昇元殿。後爲雍和殿。興祥殿爲昭德殿。積慶殿爲穆清殿。乙酉。賜東畿高年疾苦憚獨米。人二石。漢使都官郎中鄭翽。闕使客省使葛裕。吳越使刑部尙書楊嚴。來賀仁壽節。十二月丙申。帝至自東都。

昇元五年春二月己未。殺秦州刺史褚仁規。五月戊辰。契丹使來。秋七月。詔曰。右僕射兼中書侍郎同平章事監脩國史李建勳。幸處台司。且聯戚里。靡循紀律。敢黷彝章。其罷歸私第。八月。有星孛於天市。長數尺。七十日沒。遣使振貸黃州旱傷戶口。是歲。吳越水民就食境內。遣使振恤安集之。

昇元六年春正月甲子。月犯填星。退行在畢。閏月甲申朔。改天長制。置使爲建武軍。庚寅。漢使區延保來聘。癸巳。閩使尙食使林弘嗣來聘。都下大水。秦淮溢。東都火。焚數千家。二月己丑。以左丞相太保宋齊丘知尙書省事。初。齊丘累求預政。帝許中書視事。又以兩省事多委給事舍人。劇務多在尙書省。又求知省事。許之。夏五月。左丞相太保宋齊丘罷爲鎮南軍節度使。六月。常宣。歛三州大雨。漲溢。漢使蕭規來告哀。廢朝三日。庚午。契丹使掠姑米里來聘。獻馬五駒。大蝗自淮北蔽空而至。辛未。命州縣捕蝗。燼之。庚辰。熒惑犯房次將。辛巳。禁節度刺史給攝署牒。秋八月甲申。漢使法物使公孫惠來謝襲位。九月庚寅。頒昇元刪定條。冬十月。詔曰。前朝失御。四方崛起者衆。武人用事。德化墜而不宣。朕甚悼焉。三事大夫。其爲朕舉用儒者。罷去苛政。與吾民更始。十二月。閩使徐弘績。漢使滕紹英。吳越使右武衛大將軍蔣璠。來賀仁壽節。

昇元七年春正月。契丹使達羅千等二十七人來聘。獻馬三百。羊三萬五千。二月庚午。帝崩於昇元殿。年五十六。十一月壬寅。葬永陵。帝臨崩。謂齊王璟曰。德昌宮儲戎器金帛七百萬。汝守成業。宜善交鄰國。以保社稷。吾服金石欲延年。反以速死。汝宜視以爲戒。帝生長兵間。知民厭亂。在位七年。兵不妄動。境內賴以休息。性節儉。常躡蒲履。用鐵盆盥。暑月。寢殿施青葛帷。左右官婢裁數人。服飾樸陋。建國始。卽金陵治所爲宮。惟加鷓尾。設闌檻而已。

終不改作。元宗爲太子，欲得杉木作板障，有司以聞。帝曰：杉木固有之，但欲作戰艦，以竹作障可也。江淮間連年豐樂，兵食盈溢，羣臣多請恢拓境土。帝歎息曰：吾少在軍旅，見兵之爲民害深矣，誠不忍復言。使彼民安，吾民亦安矣。吳越國大火，焚其宮室，帑藏兵甲幾盡。將帥皆言乘其弊可以得志，帝一切不聽。遣使厚持金幣唁之，仁厚恭儉，務在養民，有古賢主之風焉。

論曰：昔馬元康、胡恢皆嘗作南唐書，自烈祖以下，元康謂之書，恢謂之載記。蘇丞相頌得恢書而非之曰：夫所謂紀者，蓋摘其事之綱要，繫於歲月，屬於時君。秦莊襄王而上，與項羽皆未嘗有天下，而史遷著於本紀。范曄漢書又有皇后紀，以是質之，言紀者不足以別正閏。陳壽三國志，吳蜀不稱紀，是又非可法者也。蘇丞相之言，天下之公言也，今取之，自烈祖而下皆爲紀，而用史遷法，總謂之南唐紀云。

卷一

元宗本紀第二

元宗明道崇德文宣孝皇帝名璟，字伯玉，烈祖長子。母曰宋皇后，初名景通，風度高秀，幼工屬文，起家駕部郎中，累進諸衛大將軍。烈祖爲齊王，立爲王太子，固讓，昇元初，烈祖受禪，封吳王。徙齊王，四年八月，立爲皇太子。復固讓曰：前世以嫡庶不明，故早建元良，示之定分。如臣兄弟友愛，尙何待此。烈祖爲下詔稱其守廉退之風，師忠貞之節，有子如此，予復何憂。赦殊死以下，臣民奉踐齊王。如太子禮。七年二月，烈祖病疽，祕之，人皆莫知。庚午，疾亟，大醫吳廷紹密遣人告帝，帝馳入宮，侍疾於東閣，是夕，烈祖崩，祕不發喪，而下詔命帝監國。大赦，頒賚有差。丙子，始宣遺詔。

保大元年春三月己卯朔，烈祖殂已旬日，帝猶未嗣位，方泣讓諸弟，奉化節度使周宗手取衮冕衣，帝曰：大行付陛下神器之重，豈得固守小節。是日，卽皇帝位。大赦，改元，不待逾年。遽改元，識者非之。百官進位二等。將士皆有賜，蠲民逋負租稅，賜鰥寡孤獨粟帛，尊皇后爲皇太后，立妃鍾氏爲皇后，以鎮南軍節度使宋齊丘爲太保兼中書令，奉化軍節度使周宗爲侍中，徙封壽王景遂爲燕王，宣城王景達爲鄂王，閩使來吊祭，升濠州爲定遠軍，秋

七月。徙燕王景遂爲齊王。鄂王景達爲燕王。仍以景遂爲諸道兵馬元帥。居東宮。景達爲副元帥。仍詔中外以兄弟傳國之意。八月乙卯。立弟景邊爲保寧王。冬十月庚戌。有星孛於東方。嶺南妖賊張遇賢犯虔州。詔遣洪州營屯都虞候嚴恩帥師討之。以通事舍人邊鏞監其軍。其後擒遇賢。及其黨黃伯雄曹景全斬於金陵市。十二月。以太保中書令宋齊丘爲鎮海軍節度使。

保大二年春正月。侍中周宗罷爲鎮南軍節度使。左僕射兼門下侍郎平章事張居誅罷爲鎮海軍節度使。辛巳。詔齊王景遂總庶政。惟樞密副使魏岑查文徽得奏事。餘非召對不得見。初。烈祖尤愛景遂。帝奉先志。欲傳以位。故有是詔。宋齊丘蕭儼皆上書切諫。未見聽。侍衛都虞候賈崇叩閣請見曰。臣事先帝三十年。孜孜詢察。下情猶患壅隔。陛下始卽位。所委何人。而頓與臣下疎絕如此。因嗚咽流涕。帝感悟。命坐賜食。遂收所上詔。夏五月。閩將朱文進弒其君曦。自稱閩王。遣使來告。帝囚其使。將討之。議者謂閩亂由王延政。當先討。乃釋閩使遣還。秋九月。庚午朔。日有食之。冬十二月。樞密院使查文徽請討王延政。詔以文徽爲江西安撫使。往覘建州。文徽固請。乃以邊鏞爲行營招討。共攻延政。敗績於蓋竹。

保大三年春二月。以何徽洙爲福建道行營招討。祖全恩爲應援使。姚鳳爲諸軍都監。會查文徽進討。秋七月。星見而風雨。八月甲子朔。日有食之。克建州。執王延政歸於金陵。拜羽林大將軍。升建州爲永安軍。冬十月。皇太后宋氏殂。是歲升建州延平津爲劍州。以建州之劍浦。汀州之沙縣隸焉。

保大四年春正月。以青陽公宋齊丘爲太傅兼中書令。昭武軍節度使李建勳爲右僕射兼門下侍郎。及中書侍郎馮延巳皆平章事。夏五月。以樞密使陳覺爲福建宣諭使。使諭李弘義入朝。不克。覺擅發汀建撫信州兵趨福州。帝遂命王崇文。魏岑。馮延魯會攻福州。秋九月。淮南蟲食稼。除民田稅。冬十月庚辰。圍福州。攻漳州爲南州。保大五年春正月。立齊王景遂爲皇大弟。徙燕王景達爲齊王。拜諸道兵馬元帥。徙南昌王弘冀爲燕王。副元帥。晉密州刺史皇甫暉。棣州刺史王建。來歸。契丹耶律德光以滅晉來告捷。且請會盟於境上。帝不從。遣工部郎中張易聘之。請命使者如長安脩奉諸陵。契丹亦不從。三月己亥。吳越救福州。兵自海道至。我師與之戰。敗績。諸營皆潰。夏四月壬申。詔卽軍中斬陳覺。馮延魯。餘將帥皆赦不問。已而復詔械覺延魯還都。既至。貸死。覺流蘄州。延

魯流舒州。五月。帝聞契丹棄中原遁歸。詔曰。乃眷中原。我之故地。以李金全爲北面行營招討使。六月。聞漢入汴。兵遂不出。而金全猶不罷。秋。閏七月丁丑。夜有彗出東方。近濁。其尾迹近側。掃少微及長垣。至八月壬辰。乃沒。八月。太傅兼中書令宋齊丘。罷爲鎮南軍節度使。

保大六年。夏六月庚寅朔。日有食之。九月。漢護國軍節度使李守貞。間道表求援師。以鎮海軍節度使李金全爲北面行營招討使。救河中。師次沂州。冬十一月。退保海州。

保大七年。春正月。淮北盜起。以神衛都虞候皇甫暉。將軍張巒。蕭處質。監軍散騎常侍張義方。帥師萬人。出海泗。招降。納亳州蒙城鎮將咸師朗等以歸。夏六月癸酉朔。日有食之。冬十月。我師度淮。攻正陽。敗績。十二月。泉州刺史劉從効。兄南州刺史從願。殺刺史董思安。據南州。自稱刺史。我不能問。因升泉州爲清源軍。以從効爲節度使。保大八年。春正月。李金全始罷。北面行營招討使。二月。福州遣諜者詣建州。留後查文徽。告吳越戍卒亂。殺李弘義。棄城去。文徽信其言。襲福州。大敗。被執。而別將建州刺史陳誨。以戰棹敗福州兵。執其將馬先進。俘於金陵。秋七月。歸馬先進於吳越。而求查文徽。八月。尙書郎周濬等三人奔漢。九月。楚朗州節度使馬希萼。表請師。詔加同平章事。賜以鄂州今年租稅。命楚州團練使何敬洙。帥師援之。冬十月。越歸查文徽。十一月甲子朔。日有食之。十二月。馬希萼攻陷潭州。弑其君馬希廣。楚將李彥溫。劉彥瑨。各以千人來歸。

保大九年。春二月。楚王希萼。使掌書記劉光翰。來貢方物。三月壬戌朔。以右僕射孫晟。客省使姚鳳。爲楚王策禮使。又以洪州營屯都虞候邊鎬。爲湖南安撫使。便宜進封淮南錢。夏五月辛未。有星大如五升器。自西北流。墜西南。光燭地。聲如雷。六月。楚靜江軍指揮使王達。執朗州節度使馬光惠。歸於金陵。推辰州刺史劉言。爲朗州留後。來請命。秋九月。楚將徐威等。廢其君希萼。命邊鎬出萍鄉。以討楚亂。冬十月壬寅。武安留後馬希崇。請降。鎬入潭州。癸丑。武昌節度使劉仁贍。帥舟師取岳州。湖南遂平。南漢來攻。陷郴州。周兗州節度使慕容彥超。來乞援師。從之。

保大十年。春正月。陞洪州高安縣爲筠州。以清江萬載。上高三縣隸焉。援兗州之師。敗績於沐陽。周人執我指揮使燕敬權。二月。周人歸敬權。使來言曰。吾賊臣背叛。爾國助之。豈長計哉。且使潁州郭瓊。遺我壽州劉彥貞書曰。

自古有國。皆惡叛臣。貴邦何爲。常事招誘。吳中多士。無乃淺圖。帝頗愧其言。以翰林學士江文蔚知禮部貢舉。放進士王克貞等三人及第。旋復停貢舉。三月。以太弟太保馮延巳爲左僕射。前鎮海節度使徐景運爲中書侍郎。及右僕射孫忌。並同平章事。帝以南漢乘楚亂。據桂宜等州。將取之。以知全州張巒兼桂州招討使。夏四月丙戌朔。日有食之。命統軍侯訓帥五千人。會張巒攻桂州。敗績於城下。訓死之。巒收餘衆保全州。周興順指揮使白進福以族來歸。秋九月。召朗州劉言入朝。冬十月。劉言將王逵周行逢攻潭州。王辰拔益陽寨。戍將李建期死之。丙申。潭州節度使邊鎬棄城遁。辛丑。劉言將蒲公益攻岳州。刺史宋德權監軍任鎬棄城遁。十一月。劉言盡據楚地。詔流邊鎬於饒州。斬宋德權。任鎬於太社。斬裨將申洪泰。尹建於都門外。平章事馮延巳。孫忌。皆罷爲左右僕射。十二月。零都令趙暹奔周。洪州大都督楚王馬希萼來朝。留不遣。是歲大旱。

保大十一年。春三月。以左僕射馮延巳同平章事。金陵火逾月。焚官寺民廬數千間。復設貢舉。夏六月不雨。井泉竭涸。淮流可涉。旱蝗民饑。流入周境。冬十月。築楚州白水塘。以溉屯田。遂詔州縣陂塘湮廢者。皆脩復之。於是力役暴興。楚州常州爲甚。帝使親吏車延規董其役。發洪饒吉筠州民牛以往。吏緣爲姦。強奪民田爲屯田。江淮騷然。百姓以數丈竹去節焚香於中。仰天訴冤者。不可勝數。知制詔徐鉉。因奏事白之。帝曰。吾國兵數十萬。安肯不食捍邊。事有大利。則舉國排之。奈何。鉉又力陳其弊。帝乃遣鉉行視利害。鉉至楚州。悉取所奪田還民。詰責車延規。欲榜之。百姓感悅。而帝左右交譖。以爲擅作威福。帝大怒。趣歸。將沉之江中。既至。怒少解。流舒州。而白水塘等役。亦賴以止。

保大十二年。春正月。有大星貫於西北。聲如雷。二月。命吏部侍郎朱翬知禮部貢舉。自十一年六月。至於今年三月。大饑疫。命州縣鬻粥食餓者。秋七月。契丹使其舅來聘。夜宴清風驛。盜斬契丹使。亡去。捕之不得。或以爲周人也。自是契丹遂不至。

保大十三年。春二月。以中書侍郎知尚書省嚴續。爲門下侍郎平章事。夏六月。周攻秦鳳。蜀使間使來告難。周下詔罪狀我。遣將李穀。王彥超。韓令坤等侵我淮南。攻自壽州。帝乃以神武統軍劉彥貞爲北面行營都部署。帥師三萬赴壽州。奉化節度使同平章事皇甫暉。爲北面行營應援使。常州團練使姚鳳。爲應援都監。帥師三萬。屯定

遠縣召鎮南節度使宋齊丘入朝謀難。冬十二月，以安定郡公從嘉爲沿江巡撫使。是歲天裂東北，其長二十丈。保大十四年春正月壬寅，周帝親征劉彥貞與周師戰於正陽，敗績。彥貞戰死。二月，周師兼道襲清流關，皇甫暉敗保滁州。周師破城，俘暉及姚鳳以歸。壬戌，有星孛於參芒。東南指，帝遣泗州牙將王承朗奉書至徐州，求成於周。稱唐皇帝奉書於大周皇帝，願以兄事。歲獻方物。大弟景遂亦移書周將帥，皆不報。己卯，遣翰林學士鍾謨文、理院學士李德明使周奉表。至下蔡，行在貢金器千兩，銀器五千兩，錦綺紋帛二千疋，及御衣犀帶茶藥。又奉牛五百頭，酒二千石，犒軍，請罷兵。乙酉，周師陷東都，執副留守馮延魯。丁亥，左神衛使徐象等十八人自壽州奔周。天長制置使耿謙以城降於周，遣園苑使尹廷範護遷讓皇之族於潤州，廷範殺其男子六十人，誅廷範以謝國人。周師陷泰州，刺史方訥棄城遁。帝遣間使求援於契丹。至淮北，爲周人所執。吳越侵常州、宣州，靜海制置使姚彥洪奔吳越。三月，遣司空孫晟及禮部尙書王崇質使周，削去帝號，奉表請爲外臣，猶不許。光州兵馬都監張延翰以城降於周，刺史張紹遜還。丁酉，周師陷舒州，刺史周弘祚赴水死。蘄州將李福殺知州王承雋，降於周。戊戌，天成軍使蔡暉自壽州奔周。周師陷和州，詔斬李德明於都市，坐奉使請割地也。吳越陷常州之郛，執團練使趙仁澤。燕王弘冀遣龍武都虞候柴克宏救常州。壬子，大敗吳越兵於常州，斬獲萬計，俘其將數十。至潤州，弘冀悉斬之。壬戌，壽州軍校陳延貞等十三人奔周。是月，命諸道兵馬元帥齊王景達拒周。夏四月，復泰州。五月，周帝北還。秋七月，復東都。舒蘄光、和、滁、州，惟壽州之圍愈急。冬十月，周人害我行人孫晟，從者二百人皆死，獨貸鍾謨，以爲耀州司馬。是歲詔省淮南屯田之害民者。

保大十五年春二月乙亥，周帝親征齊王景達自濠州遣邊鎬、許文稹、朱元帥兵數萬援壽州。景達用監軍使陳覺言謀奪朱元兵，以楊守忠代之。元遂舉寨降周，裨將時厚、卿獨不從，見殺。壬辰，周師盡破我諸寨，執邊鎬、許文稹、楊守忠，餘衆悉奔潰。景達亦遜歸金陵。是役也，所喪四萬人。三月，誅朱元妻子。丁未，壽州劉仁贍病革，副使孫羽等代仁贍署表降於周。辛亥，晝晦，雨沙如霧。夏四月，周帝北還。冬十一月，周帝復親征。十二月，濠州刺史郭廷謂、泗州刺史范再遇皆舉城降。帝知東都必不守，遣使焚其官私廬舍，徙其民於江南。周師入揚州。丁丑，周師攻陷泰州。都城大火，一日數發。

交泰元年春正月。改元中興。丙戌。周師陷海州。壬辰。周師陷靜海軍。丁未。陷楚州。防禦使張彥卿。兵馬都監鄭昭業。死之。周師屠其城。焚廬舍殆盡。周師次雄州。刺史易文贊舉城降州。天長縣也。三月。大赦。改元交泰。以皇太弟景遂爲天策上將軍。晉王立燕王弘冀爲皇太子。參治朝政。丁亥。周帝次揚州。辛卯。遂至迎鑾鎮。壬辰。耀兵江口。帝懼。周師南渡。遣樞密使陳覺奉表貢方物。請傳位太子弘冀。以國爲附庸。周帝始采唐報回紇可汗故事。答帝璽書。稱皇帝致書敬問江南國主。帝遣閣門承旨劉承遇上表。稱唐國主。盡獻江北郡縣之未陷者。鄂州漢陽汝川二縣在江北。亦獻焉。歲輸土貢數十萬。乞海陵鹽監南屬。不許。後歲給贍軍鹽三十萬石。庚子。周帝賜書許帝奉正朔。罷兵。而不許傳位太子。甲辰。遣平章事馮延巳等使周犒軍。及買宴。夏五月。下令去帝號。稱國主。去交泰年號。稱顯德五年。置進奏邸於汴都。凡帝者儀制。皆從貶損。改名景。以避周信祖諱。告於太廟。告廟之日。金陵大霧。通夕不解。左僕射平章事馮延巳。罷爲太子太傅。門下侍郎平章事嚴續。罷爲太子少傅。己酉。周帝遣太府卿馮延魯。衛尉少卿鍾謨。賜國主御衣金玉帶錦帛羊馬。及犒軍帛十萬。凡士卒俘於周者皆遣還。凡五千七百五十人。冬十月甲午。周帝歸我臣馮延魯。許文稹。邊鎬。周廷構。國主皆不復用。十一月己亥。暴宋齊丘。陳覺。李徵古罪。放齊丘歸九華山。覺安置饒州。徵古削官爵。覺徵古尋皆賜自盡。齊丘明年正月。亦幽死。

顯德六年。秋七月。鑄大錢。文曰永通泉貨。一當十。與舊錢並行。又鑄唐國通寶錢。二當開通錢之二。九月丙午。太子弘冀卒。冬十一月。建洪州爲南都南昌府。

建隆元年。春正月。遣何荏誅鍾謨於饒州。誅張巒於宣州。大宋太祖皇帝受周禪。放江南降將三十四人來歸。二月。始鑄鐵錢。三月。遣使朝賀於京師。秋七月。遣禮部郎中龔慎儀朝於京師。貢乘輿服御。自是貢獻尤數。歲費以萬計。冬十月。宋楊州節度使李重進叛。來求援。不許。十一月丁未。太祖平李重進。國主遣右僕射嚴續犒軍。蔣國公從鎰。戶部侍郎馮延魯朝貢。

建隆二年。春二月。國主遷於南都。立吳王從嘉爲太子。留金陵監國。國主舟行。旌麾仗衛。六軍百司。凡千餘里不絕。所過勞問高年疾苦。大宴於當塗。至宋家洲。暴風飄國主舟。幾至北岸。翼日。從官皆乘輕舟奔問。三月。國主至南都。太祖以國主遷都。遣通事舍人王守貞來勞問。南都迫隘。羣下皆思歸。國主亦悔遷。北望金陵。鬱鬱不樂。澄

心堂承旨秦承裕常引屏風障之。復議東遷。未及行。國主寢疾。不復進膳。惟啖蔗漿。嗅藕華。六月己未。疾革。親書遺令。留葬西山。累土數尺爲墳。且曰。違吾言。非忠臣孝子。夕有大星貫於南都。庚申。殂於長春殿。年四十六。後主不忍從遺令。迎喪還。秋八月。至金陵。丁未。殯於宮中萬壽殿。告哀於京師。且請追復帝號。太祖許之。

三年正月戊寅。葬順陵。元宗多才藝。好讀書。便騎善射。在位幾二十年。慈仁恭儉。禮賢睦族。愛民字孤。裕然有人君之度。少喜栖隱。築館於廬山瀑布前。蓋將終焉。迫於紹襲而止。然自以唐室苗裔。誦於斥大境土之說。及福州湖南再喪師。知攻取之難。始議弭兵務農。或曰。願陛下十數年勿復用兵。元宗曰。兵可終身不用。何十數年之有。會周師大舉。寄任多非其人。折北不支。至於蹙國降號。憂悔而殂。悲夫。

論曰。元宗舉閩楚之師。境內虛耗。及契丹滅晉。中原有隙可乘。而南唐兵力。國用既已弗支。熟視而不能出。世以爲恨。予謂不然。唐有江淮。比同時割據諸國。地大力強。人材衆多。且據長江之險。隱然大邦也。若用得其人。乘閩楚昏亂。一舉而平之。然後東取吳越。南下五嶺。成南北之勢。中原雖欲睥睨。豈易動哉。不幸諸將失律。貪功輕舉。大事弗成。國勢遂弱。非始謀之失。所以行之者非也。且陳覺馮延魯輩用師閩楚。猶喪敗若此。若北鄉而爭天下。與秦晉趙魏之師戰於中原。角一旦勝負。其禍可勝言哉。故予具論其實如此。後之覽者。得以考觀焉。

卷二

後主本紀第三

後主名煜。字重光。元宗第六子。初名從嘉。母曰光穆皇后鍾氏。從嘉廣額豐頰。駢齒。一目重瞳子。文獻太子惡其有奇表。從嘉避禍。惟覃思經籍。歷封安定郡公。鄭王。文獻太子卒。徙吳王。以尙書令知政事。居東宮。建隆二年。遂立爲太子。元宗南巡。太子留金陵監國。以嚴續。殷崇義輔之。張洎主牋奏。六月。元宗殂。太子嗣立於金陵。更名煜。居喪。哀毀幾不勝。赦境內。尊鍾后曰聖尊后。以后父名太章也。立妃周氏爲國后。徙信王景揚爲江王。鄧王從善爲韓王。立弟從鎰爲鄧王。從謙爲宜春王。從信爲文陽郡公。從度爲昭平郡公。從度。景遷子也。令諸司四品至九品無職事者。日二員。待制於內殿。以右僕射嚴續爲司空平章事。餘進位有差。遣中書侍郎馮延魯於京師。奉表

陳襲位。太祖賜詔答之。自是始降詔。秋九月。太祖遣鞍轡庫使梁義來吊祭。冬十月。太祖遣樞密承旨王文來賀襲位。初。元宗雖臣於周。惟去帝號。他猶用王者禮。至是國主始易紫袍。見使者。使退。如初服。十二月。置龍翔軍以教水戰。

建隆三年。春三月。遣馮延魯入貢京師。泉州節度使中書令晉江王劉從劾卒。子紹鑑自稱留後。四月。泉州將陳洪進。執紹鑑歸金陵。推副使張漢思爲留後。六月。遣客省使翟如璧入貢京師。太祖放降卒千人南還。冬十一月。遣水部郎中顧彝入貢京師。

乾德元年。春正月。太祖遣使來。賜羊馬橐駝。三月。太祖出師平荆湖。國主遣使犒軍。夏四月。泉州副使陳洪進廢張漢思。自稱權知軍府。來告。國主卽以洪進爲節度使。秋七月。太祖詔國主。遣還顯德以來中朝將士在江南者。及令揚州民遷江南者。還其故土。十二月。國主表乞罷詔書不名之禮。不從。

乾德二年。春三月。行鐵錢。每十錢。以鐵錢六。權銅錢四。而行。其後銅錢遂廢。民間止用鐵錢。末年。銅錢一直鐵錢十。比國亡。諸郡所積銅錢六十七萬緡。命吏部侍郎脩國史。韓熙載知貢舉。放進士王崇古等九人。國主命中書舍人徐鉉。覆試舒雅等五人。雅等不就。國主乃自命詩賦題。以中書官蒞其事。五人皆見黜。秋八月。太祖於江北置折博務。禁商旅過江。九月。立子仲寓爲清源郡公。仲宣宣城郡公。十月甲辰。仲寓卒。國后周氏已寢疾。哀傷增革。遂亦卒。十一月。太祖遣作坊副使魏丕來吊祭。

乾德三年。夏五月。司空平章事嚴續。罷爲鎮海軍節度使。秋九月。兩沙。聖尊后鍾氏歿。冬十月。太祖遣染院使李光圖來吊祭。

乾德四年。秋八月。國主遣龔慎儀持書使南漢。約與俱事。中朝。九月。慎儀至番禺。被執。

乾德五年。春。命兩省侍郎。諫議。給事中。中書舍人。集賢。勤政殿學士。更直光政殿。召對咨訪。率至夜分。

開寶元年。春三月。戊申。以樞密使右僕射殷崇義爲左僕射。同平章事。境內旱。太祖賜米麥十萬石。冬十一月。立國后周氏。

開寶二年。三月。以游簡言爲左僕射。兼門下侍郎。同平章事。夏五月。簡言卒。是歲。右僕射同平章事殷崇義。罷爲

潤州節度使同平章事。

開寶三年夏。太白晝見。二日相觸。

開寶四年。冬十月。國主聞太祖滅南漢。屯兵於漢陽。大懼。遣太尉中書令鄭王從善朝貢。稱江南國主。請罷詔書不名。從之。有商人來告。中朝造戰艦數千艘。在荆南。請密往焚之。國主懼。不敢從。

開寶五年。春二月。國主下令。貶損儀制。改詔爲教。中書門下省爲左右內史府。尙書省爲司會府。御史臺爲司憲府。翰林院爲文館。樞密院爲光政院。大理寺爲詳刑院。客省爲延賓院。官號亦從改易。以避中朝。初金陵殿闕。皆設鴟吻。元宗雖臣於周。猶如故。乾德後。遇中朝使至。則去之。使還復設。至是。遂去不復用。降諸弟封王者。皆爲公。從善楚國。從鎡江國。從謙鄂國。內史舍人張似。知禮部貢舉。放進士楊遂等三人。清耀殿學士張洎。言似多遺才。國主命洎考覆。遺不中第者。於是又放王倫等五人。閏月癸巳。太祖命進奉使楚國公從善爲泰寧軍節度使。留京師。賜第汴陽坊。示欲召國主入朝也。國主遣戶部尙書馮延魯。謝從善爵命。延魯至京師。疾病。不能朝而歸。開寶六年。夏。太祖遣翰林院學士盧多遜來。國主聞太祖欲興師。上表類受爵命。不許。以司空殷崇義知左右內史事。冬十月。內史舍人潘佑。上書切諫。佑素與戶部侍郎李平交厚。國主以爲事皆由平始。先以平屬吏。遣使收佑。佑自殺。平縊死獄中。皆徙其家外郡。

甲戌歲秋。國主上表求從善歸國。不許。太祖遣閤門使梁迥來。使從容言曰。天子今冬行柴燎之禮。國主宜往助祭。國主不答。九月丁卯。復遣知制誥李穆爲國信使。持詔來曰。朕將以仲冬有事園丘。思與卿同闕犧牲。且諭以將出師。宜早入朝之意。國主辭以疾。且曰。臣事大朝。冀全宗祀。不意如是。今有死而已。時太祖已遣潁州團練使曹翰。率師先出江陵。宣徽南院使曹彬。侍衛馬軍都虞候李漢瓊。賀州刺史田欽祚。率舟師繼發。及是。又命山東道節度使潘美。侍衛步軍都虞候劉遇東。上閣門使梁迥。率師水陸並進。與國信使李穆同日行。冬十月。國主遣江國公從鎡。貢帛二十萬疋。白金二十萬斤。又遣起居舍人潘慎修。貢宴宴帛萬疋。錢五百萬。築城聚糧。大爲守備。閏十月。王師拔池州。國主於是下令戒嚴。去開寶紀年。稱甲戌歲。辛未。王師進拔蕪湖。及雄遠軍。吳越亦大舉兵犯常潤。國主遺吳越王書曰。今日無我。明日豈有君。一旦明天子易地賞功。王亦大梁一布衣耳。吳越王表

其書於朝。王師次采石磯。作浮橋成。長驅渡江。遂至金陵。每歲大江春夏暴漲。謂之黃花水。及王師至。而水皆縮小。國人異之。國主以軍旅委皇甫繼勳。機事委陳喬張洎。又以徐元瑀。刁衍。爲內殿傳詔。而遽書警奏。日夜狎至。元瑀等輒屏不以聞。王師屯城南十里。閉門守陴。國主猶不知也。初烈祖有國。凡民產二千以上。出一卒。號義軍。分籍者又出一卒。號生軍。新置產亦出一卒。號新擬軍。客戶有三丁者。出一卒。號披山軍。元宗時。許郡縣村社競渡。每歲重午日。官閱試之。勝者。給綵帛銀碗。皆籍姓名。至是盡取爲卒。號凌波軍。民奴及贅壻。號義勇軍。募豪民以私財招聚亡賴亡命。號自在軍。至是又大蒐境內。自老弱外。皆募爲卒。號排門軍。民間又有自相率拒敵。以紙爲甲。農器爲兵器。號白甲軍。凡十三等。皆使捍禦。然實皆不可用。奔潰相踵。

乙亥歲。春二月壬戌。王師拔金陵關城。三月丁巳。吳越攻我常州。權知州事禹萬誠以城降。誅神衛都指揮使皇甫繼勳。彗出五車。色白。長五尺。夏六月。轉見西方。犯太微。六十日滅。王師及吳越圍潤州。留後劉澄以城降。吳越遂會王師圍金陵。洪州節度使朱令贛。帥勝兵十五萬赴難。旌旗戰艦甚盛。編木爲棧。長百餘丈。大艦容千人。令贛所乘艦尤大。擁甲士。建大將旗鼓。將斷采石浮橋。至皖口。與王師遇。傾火油焚北船。適北風反。焰自焚。我軍大潰。令贛及戰權都虞候王暉。皆被執。外援既絕。金陵益危蹙。王師百道攻城。晝夜不休。城中米斗萬錢。人病足弱。死者相枕籍。國主兩遣徐鉉等厚貢方物。求緩兵。守祭祀。皆不報。冬十一月。白虹貫日。晝晦。乙未城陷。將軍渴彥。馬承信。及弟承俊。帥壯士數百。力戰而死。勤政殿學士鍾禱。朝服坐於家。亂兵至。舉族就死不去。光政使右內史侍郎陳喬。請死不許。自縊死。國主帥司空知左右內史事殷崇義等。肉袒降於軍門。明年正月辛未。至京師。乙亥。授右千牛衛上將軍。封違命侯。太宗即位。加特進。改封隴西公。太平興國三年七月辛卯。殂。年四十二。是日。七夕也。後主蓋以是日生。贈太師。追封吳王。葬洛陽北邙山。後主天資純孝。事元宗盡子道。居喪哀毀。杖而後起。嗣位之初。屬保太軍與之後。國削勢弱。帑庾空竭。專以愛民爲急。蠲賦息役。以裕民力。尊事中原。不憚卑屈。境內賴以少安者十有五年。憲司章疏。有繩糾過。皆寢不下。論決死刑。多從未減。有司固爭。乃得少正。猶垂泣而後許之。常獵於青山。還如大理寺親錄繫囚。多所原釋。中書侍郎韓熙載奏。獄訟有司之事。囹圄非車駕所宜臨幸。請罰內庫錢三百萬以資國用。雖不聽。亦不怒也。殂。問至江南。父老有巷哭者。然酷好浮屠。崇塔廟。度僧尼。不可勝算。

罷朝。輒造佛屋。易服膜拜。以故頗廢政事。又置澄心堂於苑內。引能文士。及徐元機。元榆。元樞。兄弟居其間。中旨由之而出。中書密院。乃同散地。兵興之際。降御札移易將帥。大臣無知者。皇甫繼勳誅死之後。夜出萬人斫營。招討使但暑牒遣兵。竟不知何往。蓋皆澄心堂直承宣命也。長圍既合。內外隔絕。城中之人。惶怖無死所。後主方幸淨居室。聽沙門德明。雲真。義倫。崇節。講楞嚴圓覺經。用鄱陽隱士周惟簡。爲文館詩易侍講學士。延入後苑。講易否卦。賜惟簡金紫。羣臣皆知國亡在旦暮。而張洎猶謂北師已老。將自遁去。後主益甘其言。晏然自安。命戶部員外郎伍喬。於圍城中放進士孫確等三十八人及第。其所施爲。大抵類此。故雖仁愛足以感其遺民。而卒不能保社稷云。

卷四

宋齊丘列傳第一

宋齊丘。字子嵩。世爲廬陵人。父誠。與鍾傳同起兵。高駢表傳爲洪州節度使。以誠副之。卒官。因家洪州。齊丘好學。工屬文。尤喜縱橫長短之說。烈祖爲昇州刺史。齊丘因騎將姚克膽得見。暇日陪燕游。賦詩以獻。曰。養花如養賢。去草如去惡。松竹無時衰。蒲柳先秋落。烈祖奇其志。待以國士。從鎮京口。入定朱瑾之難。常參秘畫。因說烈祖講典禮。明賞罰。禮賢能。寬征賦。多見聽用。烈祖爲築小亭池中。以橘度。至則撤之。獨與齊丘議事。率至夜分。又爲高堂。不設屏障。中置灰爐。而不設火。兩人終日擁爐。畫灰爲字。旋即平之。人以比劉穆之。之佐宋高祖。然齊丘資躁褊。或議不合。則拂衣徑起。烈祖謝之。乃已。義祖獨惡其爲人。每欲進拔。輒不果。浮沉下僚十餘年。義祖末年。議者多請以徐氏諸子執國政。烈祖聞之。亟欲自請出鎮。齊丘請徐之。俄而義祖自殿直軍判官。擢右司員外郎。進右諫議大夫。兵部侍郎。居中用事。且倚以爲相。齊丘自以資望尙淺。或不爲國中所服。乃告歸洪州。政葬。因入九華山。累啓求致仕。不許。時元宗已爲大將軍。烈祖以吳主命。命元宗躬往迎之。於是齊丘託不得已而起。遂拜中書侍郎。遷右僕射平章事。烈祖出鎮金陵。以元宗入輔。委齊丘左右之。初烈祖權位日隆。舉國皆知代謝之勢。吳主謙恭無失德。烈祖懼羣情未協。欲待嗣君。與齊丘議合。已而都押衙周宗。揣微指。請急至都。以禪代事告齊丘。

齊丘默計。大議本自己出。今若遽行。則功歸周宗。欲因以釣名。乃留與夜飲。亟遣使手書切諫。以爲時事未可。後數日。馳至金陵。請斬宗以謝國人。烈祖亦悔。將從之。徐玠固爭。纔黜宗爲池州副使。玠乃與李建勳等。遂極言宜從天人之望。復召宗還舊職。齊丘由是頗見疎忌。留爲諸道都統判官。加司空。無所關預。從容而已。數請退。烈祖以南國給之。俄而齊國建。猶以勳舊爲左丞相。而不預事。李德誠周本自廣陵持吳帝詔來。行傳禪。齊丘謂德誠子建勳曰。尊公吳室元勳。今日掃地矣。獨稱疾臥家。不預勸進。烈祖旣受禪。徐玠爲侍中。李建勳爲中書侍郎。同平章事。周宗爲樞密使。齊丘但遷司徒。中懷不平。及宣制至布衣之交。忽抗聲曰。臣爲布衣時。陛下亦一刺史耳。今爲天子。可不用老臣矣。烈祖優容之。嘗夜燕天泉閣。李德誠曰。陛下應天順人。惟宋齊丘不悅。因出齊丘諷止勸進書。烈祖卻之曰。子嵩三十年故人。豈負我者。齊丘頓首謝。自是爲求媚計。更請降讓皇爲公侯。絕吳太子璉婚。久之。表言備位丞相。不當不聞國政。又自陳爲人所間。烈祖大怒。齊丘歸第。白衣待罪。而烈祖怒已解。謂左右曰。宋公有才。特不識大體爾。孤豈忘舊臣者。命吳王璟持手詔召見。遂以丞相同平章事。寢復委任。兼知尙書省事。與張居詠。李建勳。更日入閣議政。契丹耶律德光遣使來。齊丘陰謀間契丹。使與晉人相攻。則江淮益安。密請厚其原幣遣還。至淮北。潛令人刺殺之。契丹與晉人果成嫌隙。齊丘親吏夏昌圖。盜庫金數百萬。特判傳輕典。烈祖命斬昌圖。齊丘慚。稱疾求罷省事。許之。遂不復朝謁。帝遣壽王璟遂勞問。許鎮故鄉。始入朝。因召與宴飲。齊丘酒酣。輒曰。陛下中興。實老臣之力。乃忘老臣可乎。烈祖怒曰。太保始以遊客干朕。今爲三公。足矣。齊丘詞色愈厲。曰。臣爲游客時。陛下亦偏裨耳。今不過殺老臣。遂引去。烈祖頗悔。明日手詔曰。朕之性。子嵩所知。少相親。老相怨可乎。拜鎮南節度使。至鎮。起大第。窮極宏麗。坊中居人。皆使修飾垣屋。民不堪其擾。有逃去者。初赴鎮。烈祖曰。衣錦畫行。古人所貴。賜以錦袍。親爲著之。遂服錦袍視事。元宗卽位。召拜太保。中書令。與周宗並相。齊丘之客。最親厚者。陳覺。元宗亦以爲才。馮延巳。延魯。魏岑。查文徽。與覺深相附結。內主齊丘。時人謂之五鬼。相與造飛語。傾周宗。宗泣訴於元宗。而岑覺又更相攻。於是出齊丘爲鎮海軍節度使。齊丘怏怏。力請歸九華舊隱。從之。賜號九華先生。封青陽公。食青陽一縣租稅。元宗欲傳位齊王璟。遂詔璟遂總庶政。惟魏岑。查文徽得奏事。餘非特召不得見。國人大駭。齊丘自九華上疏。極論不可。會言者衆。元宗乃收所下詔。或謂齊丘先帝勛舊。不宜久棄山澤。遣馮

延己召之不起。遣燕王景達再持詔往。乃起拜太傅。中書令封衛國公。賜號國老。奉朝請。然不得預政。益輕財好客。識與不識皆附之。薦陳覺使福州。諭李弘義入朝。覺至福州不敢言。而專命出兵敗事。僉謂必坐誅。齊丘上表待罪。置不問。覺亦不死。齊丘方且怒韓熙載議其黨與。黜之。元宗不悅。復使鎮洪州。周侵淮北。起齊丘爲太師。領劍南東川節度使。進封楚國公。與謀難。齊丘固讓。仍爲太傅。建議發諸州兵。屯淮泗。擇偏裨可任者將之。周人未能測虛實。勢不敢輕進。及春水生。轉饗道阻。彼師老食匱。自當北歸。然後遣使乞盟。度可無大喪敗。元宗惶惑不能用。又力陳割地無益。與朝論頗異。及明年暑雨。周棄所得淮南地北歸。議者謂扼險要擊。可以有功。且懲後。齊丘乃謂擊之怨益深。不如縱其歸以爲德。由是周兵皆聚於正陽。而壽州之圍遂不可解。終失淮南。方是時。陳覺李徵古同爲樞密副使。皆齊丘之黨。躁妄專肆。無人臣禮。自度事定。必不爲羣臣所容。若齊丘專大柄。則可以無患。覺乃乘間言。宋公造國於艱危如此。陛下宜以國事一委宋公。元宗意謀出齊丘。大銜之。會鍾謨使還。挾周以爲己重。所言率見聽。而謨本善李德明。欲爲報仇。屢陳齊丘乘國危殆。竊懷非望。且黨與衆。謀不可測。元宗遂命殷崇義草詔曰。惡莫甚於無君。罪莫深於賣國。放歸九華山。而不奪其官爵。初命穴牆給食。俄又絕之。以餒卒。諡醜繆。覺徵古皆誅死。未幾。元宗燕居。見齊丘爲厲。叱之不退。遂遷南都。後主立。召其家還金陵。廩給甚厚。方齊丘敗時。年七十三。且無子。若謂窺伺謀篡竊。則過也。特好權利。尙詭譎。造虛譽。植朋黨。矜功忌能。飾詐護前。富貴滿溢。猶不知懼。狃於要君。聞於知人。釁隙遂成。蒙大惡以死。悲夫。

論曰。世言江南精兵十萬。而長江天塹。可當十萬。國老宋齊丘。機變如神。可當十萬。周世宗欲取江南。故齊丘以反間死。方五代之際。天下分裂大亂。賢人君子。皆自引於深山大澤之間。以不仕爲得。而馮道有重名於中原。齊丘擅衆譽於江表。觀其人。可以知其時之治亂矣。周師之犯淮南。齊丘實預議論。雖元宗不盡用。然使展盡其籌策。亦非能決勝保境者。且世宗豈畏齊丘機變而間之者哉。蓋鍾謨自周歸。力排齊丘。殺之。故其黨附會爲此說。非其實也。予論序齊丘事。盡黜當時愛憎之論。而錄其實。覽者得詳焉。

卷五

周徐查邊列傳第二

周宗字君太廣陵人少遇亂孤窮事烈祖爲給使閑於擯相辭令方時艱難每使四方輒稱職端敏可仗恩顧日洽烈祖鎮金陵爲都押衙時用宋齊丘議迎吳讓皇都金陵繕府治爲宮馬步都虞候蔡弘業爲宮城營奉使徙都統府於古臺城使都教練使孔昌祚營之都統府成凡二千四百間環一千五百步烈祖已徙居且迎讓皇矣宗請問曰若主上西遷則公當東駕勞費方始怨嗟將日聞矣烈祖納之託以歲不利而止自是宗益預議論齊丘始忌之一日烈祖臨鏡理白鬚太息曰功業成而吾老矣奈何宗適侍側悟微指乃請如廣陵諷讓皇以禪代事亦請諭齊丘齊丘心忌大譏自宗發及其將還留與飲酒而遣騎以手疏切諫烈祖得之大悔懼後數日齊丘馳至金陵爲險語動烈祖請斬宗以謝國人烈祖將從之徐玠固爭事乃已但黜宗爲池州副使玠又與李建勳等言天人之望已集密定大計復召宗還舊職烈祖受禪宗躡進至內樞使同平章事遷侍中時以樞密爲內樞者猶避吳武王諱也烈祖常召宗及宋齊丘馬仁裕宴於崇英院歡燕道舊爲樂他將相莫預然待宗尤親厚不甚以職務嬰之宗亦能澹然畏遠權勢居家節儉俸賜皆積不用故齊丘黨雖日讒之不能害久之乃罷爲江州節度使有俞文貞者早遊烈祖幕府宗及馬仁裕皆趨走執事左右及宗出鎮文貞仕宦蹭蹬猶爲其州巡官方旅見輒越次問曰馬押衙亡急宗曰馬相公已鎮廬州文貞顧同列匿笑而退他日預公設宗勸以酒文貞俛首曰下官小戶令公所熟知也聞者大駭而宗怡然不動其寬厚如此徙宣州節度使入覲賜宴元宗親爲摺襪頭腳以表殊禮復出留守東都請老以司徒致仕歸金陵馮延魯代爲留守會周師陷廣陵延魯自髡而逃見執於周人東縛桎梏僅得免死時人益以宗享福終始爲異俄而宗病卒年七十餘宋齊丘時以太傅奉朝請撫其棺哭曰君大黜來亦得時去亦得時元宗聞之不平宗二女皆爲後主后

徐鍇字楚金會稽人父延休字德文風度淹雅故唐乾符中進士昭宗狩石門無學士草詔延休來調官適在旁近逆旅左右言其工文詞卽召見命視草昭宗善之及還長安不得用梁蔣玄暉辟爲其佐延休棄去依鍾傳於洪州吳取江西得延休仕至光祿卿江都少尹卒二子鍇鍇遂家廣陵鍇四歲而孤母方教鍇就學未暇及鍇鍇自能讀書消長文詞與鉉齊名昇元中議者以文人浮薄多用經義法律取士鍇恥之杜門不求仕進鉉與常夢

錫同直門下省。出錯文示之。夢錫賞愛不已。薦於烈祖。未及用。而烈祖殂。元宗嗣位。起家祕書郎。齊王景達奏授記室。時殷崇義爲學士。草軍書。用事謬誤。錯竊議之。崇義方得君。誣奏錯泄禁省語。貶烏江尉。歲餘召還。授右拾遺。集賢殿直學士。論馮延魯有罪無才。人望至淺。不當爲巡撫使。重忤權要。以祕書郎分司東都。然元宗愛其才。復召爲虞部員外郎。後主立。遷屯田郎中。知制誥。集賢殿學士。改官名。拜右內史舍人。賜金紫。宿直光政殿。兼兵吏部選事。與兄鉉俱在近侍。號二徐。初。錯久次當遷中書舍人。游簡言當國。每抑之。錯乃詣簡言。簡言從容曰。以君才地。何止一中書舍人。然伯仲並居清要。亦物忌太盛。不若少遲之。錯頗怏怏。簡言徐出妓佐酒。所歌詞皆錯所爲。錯大喜。乃起謝曰。丞相所言。乃錯意也。歸以告鉉。鉉嘆息曰。汝癡絕。乃爲數闋歌。換中書舍人乎。錯凡四知貢舉。號得人。後主哀所製文。命爲之序。士以爲榮。錯酷嗜讀書。隆寒烈暑。未嘗少輟。後主嘗得周載齊職儀。江東初無此書。人無知者。以訪錯。一一條對。無所遺忘。其博記如此。既久處集賢。朱黃不去手。非暮不出。少精小學。故所讎書尤審諦。每指其家語人曰。吾惟寓宿於此耳。江南藏書之盛。爲天下冠。錯力居多。後主嘗嘆曰。羣臣勤其官。皆如徐錯在集賢。吾何憂哉。李穆來使。見錯及鉉。嘆曰。二陸之流也。嘗夜直。召對。論天下事。因及用人。才行孰先。後主曰。多難當先才。錯曰。有人才如韓彭而無行。陛下敢以兵十萬付之乎。後主稱善。時國勢日削。錯憂憤鬱鬱。得疾。謂家人曰。吾今乃免爲俘虜矣。開寶七年七月卒。年五十五。贈禮部侍郎。謚曰文。著說文通釋。方輿記。古今國典。賦苑。歲時廣記。及他文章。凡數百卷。錯卒逾年。江南見討。比國破。其遺文多散逸者。

查文微。歙州休寧人。幼好學。能自刻苦。手寫經史數百卷。稍長。任氣好俠。聞人困乏。雖不識。必濟之。家本富。坐是窮空。不悔也。或遺以金帛。一夕盜入其家。盡取去。文微不言。雖鄰里莫知者。久之。盜敗於旁邑。移文訊驗。人始知之。咸推其量。烈祖輔政。初入謁。烈祖召與語。偉其論。宋齊丘亦稱薦之。徐知諤領浙西。以文微爲其判官。或獻玉盃。知諤喜。酌以錢百萬。趣開宴。出盃行酒。至文微。偶墮地碎。一坐皆驚。而文微自若。烈祖受禪。入爲監察御史。元宗立。進諫議大夫。中書舍人。樞密副使。閩主延義。與其兄延政相攻。延政以建州建國稱殷。而延義爲其下所殺。推立大將朱文進。元宗欲討文進。文微以爲延政首亂。當先致討。有翰林待詔臧循者。與文微同里巷。少嘗爲賈入閩。習知其山川險易。爲陳進兵之策。文微本好言兵。遂請行。元宗乃以爲江西安撫使。令至境上。審觀可否。文

徽銳於成功。至上饒。復命。盛言必克。詔發洪州屯兵。以邊鎬爲將。從文徽攻建州。建人厭王氏之亂。伐木開道。迎我師。行次蓋竹。遇建州兵至。又聞泉漳汀州皆歸。延政恐懼。退保建陽。時臧循亦爲別將。屯邵武。延政襲破之。獲循。斬於建州。軍聲大振。元宗遣何敬洙等來援。敬洙鎬與建州兵相持。文徽得建之降將孟堅。使潛師出其後。擊之。建州兵大敗。潰去。遂傳其城。雖下建州。諸軍無紀律。殺掠不禁。民始失望。有叛志矣。元宗知而置不問。策功遷撫州觀察使。又拜建州留後。由是文徽益自用。時李弘義披吳越兵據福州。僞遣謀來告福州亂。文徽喜。率劍州刺史陳誨赴之。誨將舟師至福州城下。擊敗其兵。執吳越將馬先進等三人。文徽以步騎繼至。弘義陽遣卒數百人出迎。而設伏西門以待。文徽傳令徑入其城。陷伏中。大敗。墜馬被執。送錢塘。將士死者萬人。元宗遣使歸馬。先進於吳越。而求文徽。吳越王遣還。將發。爲置酒。寘毒。歸至金陵。毒始作。元宗使醫視之。醫以珠置口中。有頃。珠色變黑。醫曰。疾不可爲。然猶十年乃死。文徽遂病瘖。以工部尙書致仕。朱元降周。坐親黨安置宣州。卒。年七十。距遇毒之歲。正十年云。諡曰宣。子元方。元規。元素。元範。元賞。元方事後主。爲水部員外郎。吉王從謙掌書記。從謙朝京師。太祖命知制誥。盧多遜。燕從謙於館。多遜弈棋次。顧元方曰。江南竟何如。元方斂衽曰。江南事大朝十餘年。極君臣之禮。不知其他。多遜推枰愧謝曰。勿謂江南無人。使還。通判建州。盧緯據歙州。傳檄至建。元方立斬其使。及絳平。太祖聞元方所爲。大悅。擢殿中侍御史。知泉州。卒。官。元方子道。龍圖閣待制。始徙家海陵。純厚長者。以文行稱於時。道從兄陶。及事後主。國亡入朝。任至秘書少監。知審刑院。與道尤極友愛。自金陵破。士族流離。多貧困失職。惟道兄弟盡力收恤。聚食常數十百人。得任予恩。皆以與族人。以少長爲先後。無親疏之間。異姓亦分俸給之。時其婚姻。由是常苦貧。而查氏至今爲海陵望族。許國籥皆其後也。

邊鎬。金陵人。少事烈祖爲通事舍人。以通敏稱。保大初。循州人張遇賢。本羅縣小吏。有神降於縣之刻杉鎮。語人曰。張遇賢非常人。當事我。遇賢往事之。會州境羣盜起。各擁衆數百。無所統。相與禱於神。神又大言曰。張遇賢。汝主也。遇賢遂稱王。改元。置百官。度嶺襲虔州。節度使賈浩閉門登陴。不敢出。遇賢據白雲洞。衆十餘萬。元宗遣洪州營屯都虞候嚴思。率所部討之。鎬爲監軍。虔有書生白昌裕。沉香有謀。鎬引與定計。刊木開道。襲白雲洞。會遇賢所事神棄去。不復降語。賊衆遂潰。其裨將李台執之以降。策功。遷洪州營屯諸軍都虞候。二年。查文徽以樞密

副使出師伐建州。詔鎬爲行營招討。洪撫饒信歙等州。諸指揮都虞候從文徽行。然衆纔數千。戰敗。退舍。元宗聞之。遣何敬洙。祖全恩。姚鳳來援。敬洙與鎬進兵。奪其險要。自崇安進次赤嶺。與建兵方相持。爲背水陣。文徽使騎繚出建兵之後。與敬洙鎬夾擊。大破之。遂取建州。降王延政。復取漳州。事平。諸將皆爭功。鎬獨無一言。七年。楚馬氏兄弟相攻。希萼雖勝。而尤無道。元宗知楚難方艱。以鎬爲信州刺史。領屯營兵。兼湖南安撫使。駐贛州。萍鄉有警。許便宜從事。楚人果復廢立。鎬自萍鄉帥師入潭州。遷馬氏之族。及文武將吏於金陵。遂拜潭州節度使。南漢將潘崇徹攻彬州。鎬出兵爭之。敗績。遂失彬州。鎬懼南漢寇邊未已。請除道全二州刺史。詔以廖偃爲道州刺史。張巒權知全州。然湖湘之憂。實不在南漢也。自馬氏廢立以來。帑藏空竭。土地旣歸我。馮延己爲相。矜平楚之功。不欲取費於國。專培植楚人。以給經費。人心已離。鎬柔而無斷。日飯沙門希福。紀綱頽弛。不之問。初。成師。朗來歸。以其所部爲奉節軍。從鎬入楚。廩給薄於楚之降卒。偶語怨望。而糧料使王紹顏。每給奉節糧。輒刻削之。軍校孫朗欲殺紹顏。紹顏匿困下。得免。官屬請斬紹顏。以謝將士。鎬不聽。朗乃謀殺鎬。及紹顏。據湖南。歸中原。夜率所部取草燒府門。火輒不發。良久。傳漏者覺之。以告鎬。出衙兵與鬪。勝負未決。鎬命吹角。亂兵少。以爲將旦。亟斬關奔朗州。盡以潭州虛實告劉言。言久懷叛志。得朗言大喜。遣其將王進遠。周行逢來攻。鎬亦備言已。而聞人謂忠順傾意信之。及言兵已拔益陽。遂夜棄城出奔。列城皆潰。盡喪楚地。坐削官。流饒州。而他將棄城者皆斬。湘中謠言馬去不用鞭。至是而驗。十四年。周師大入。齊王景達爲元帥。出兵援壽州。起鎬爲大將。戰敗被執。世宗命爲右千牛衛上將軍。及元宗割淮南地請盟。世宗乃歸鎬。卒於金陵。

卷六

周柴何王張馬游刁列傳第三

周本舒州宿松人。漢南郡太守瑜之後。瑜葬宿松。卽墓爲祠。子孫居其旁者。猶數十家。本少孤。羈貧。有勇力。嘗獨格虎殺之。吳武王起隸帳下。勇冠三軍。每奮躍先登。攻堅摧鋒。蒙犯矢石。身無完膚。戰罷。輒自燒鐵烙其創。食飲言笑自如。累遷至淮南馬步使。武王取江西。撫州刺史危全諷。率諸州兵十萬。來爭其地。屯象牙潭。楚人圍高安。

以援全諷。江西守將劉威警書至。武王謀可將者。列官嚴可求薦本。時本從軍取蘇州。不能下。恥之。稱疾臥家。可求自往強起本。本曰。吳門之役。非賊果強。徒以我將帥權輕。下皆專命。故無功。今必見起。勿用偏裨。乃可。許之。得精卒七千。晨夜兼行。武王初命之解高安圍。本曰。楚人非欲下高安。第爲全諷聲援爾。今先敗全諷。楚人必棄高安走。何足擊哉。乃馳至象牙潭。急擊之。大破其軍。擒全諷。楚人亦逐。吉州刺史彭玕。信州刺史危仔昌。皆棄城去。江西之地始定。本之初至也。卽揮兵進。劉威欲留宴犒。不許。或曰。敵兵盛。宜審觀形勢。何遽如此。本曰。賊衆加我十倍。使我兵知之。戰先奪氣矣。急乘其鋒用之。乃可有功。已而果如所料。武王奇其能。遂用爲信州刺史。吳越將陳璋。據衢州歸款。越人圍之。武王遣本迎璋。越人解圍出璋。而列兵不動。本遂以璋還。裨將呂師造曰。越有輕我心。必怠。請擊之。本不可。越人躡我軍至中道宿。夜半。本陽驚。棄輜重走。而設伏於旁。越人果急追。伏發。前後夾擊。盡殲其衆。唐莊宗入洛。吳遣司農卿盧蘋往聘。還言。莊宗知本名。由是召爲雄武統軍。俄出鎮壽州。改廬州。加安西大將軍。大尉中書令。西平王。本不知書。然能尊禮儒士。遇僚屬以禮。士民愛之。性朴拙。無他才。惟軍旅之事。若生知者。烈祖將受吳禪。徐玠周宗等。以本及李德誠。名位隆重。諷之使率羣臣勸進。本已昏老。其子祚懼家禍。代署表上之。本初不知。猶謂所親曰。我受吳室厚恩。老矣。復能推戴異姓乎。吳宗室臨川王蒙。廢居歷陽。聞將傳禪。乃殺監守者。與親信兩人。走詣本。本卽欲出見之。祚固執不可。本怒曰。我家郎君也。奈何不使我一見。祚拒閉中門。令外人執蒙告之。蒙遂誅死。本愧恨。屬疾數月卒。初七十七。本晚好飲酒。樂施予。或曰。公春秋已高。宜少儲積。爲子孫計。本曰。吾繫芒屨事吳武王。位至將相。何人所遺乎。旣卒。太常言。準令廢朝三日。烈祖以本舊將。命有司講求優典。禮官言。前朝嘗爲汾陽王郭子儀廢朝五日。詔用之。謚恭烈。葬給鹵簿。子鄰。鄰。本長子也。少驍勇。每從其父征討。本爲信州刺史。略地至建州道經嶮阨。被圍垂困。鄰躍馬救之。手殺數十人。翼本而出。建人駭懼。潰去。事烈祖。典親軍。出爲滁州刺史。暴猛狠戾。常蓄飛揚之志。烈祖以本故優容之。聞歷陽公楊蒙被執。歎憤逾月。國人亦以此稱其好義。本卒。後仕至廬州節度使。昇元六年卒。

柴克宏。父再用。事吳有功。至德勝軍節度使。克宏以父仕爲郎將。嘗爲宣州巡檢使。初至。城塹皆堙圯不治。吏云。自田頴王茂章。李遇相繼叛。無敢爲守備者。克宏嘻笑曰。豈有是哉。大加營繕。後吳越兵至。賴以得全。積遷泗州。

刺史罷歸爲龍武軍都虞候。好施予。不事產業。故家常窮空。然性豪舉。博奕縱酒自若也。時元宗自謂唐後規取中原。復舊業。羣臣多爲大言。以迎合主意。克弘獨未嘗一語及軍旅。人亦不以爲知兵。以故不遷。久之。出爲撫州刺史。時淮南交兵。吳越伺間來寇。克宏乃請効死行陣。元宗嘉之。授右衛將軍。遣與右衛將軍袁州刺史陸孟俊同救常州。精兵悉在江北。克宏所將。財贏卒數千。樞密副使李徵古。給戈甲皆朽鈍。克宏言於徵古曰。卒已非素練。得器械堅利。猶可用。奈何所給乃此等。徵古謾罵之。見者皆忿。克宏知徵古狂生。不足與較。是非。怡然不少動。至潤州。徵古終不快。白召克宏歸。以神武衛統軍朱匡業代之。燕王弘冀獨以爲克宏可任。卒遣行。克宏帥師至常州。徵古猶遣使趣其歸。克宏曰。吾計日破寇。爾何爲者。必錢氏所遣奸人也。命斬之。使者曰。受李樞密命來。克宏曰。李樞密來。吾亦斬之。遂斬使者以徇。然後勒兵進。大破吳越兵於常州。斬萬級。獲其將數十人。自保大來邊事大起。克敵之功。莫先克宏者。拜奉化軍節度使。復上疏請援壽春。行至泰興。發瘍。數日卒。國人莫不痛惜。諡威烈。或云。初。克宏母自表其子可爲將。徵古抑之。母又言克宏有父風。苟不勝任。分甘孥戮。元宗始用焉。及徵古誅死。詔暴其罪。亦以折辱克宏爲言云。

何敬洙。廣陵人。幼遇亂。吳將楚州刺史李簡得之。給事左右。簡酷暴。僕使有小過。率置之死。不少貸。敬洙與其伍戲小廳下。有持簡所寶硯過焉。顧曰。孰敢毀此者。敬洙時被酒。奮曰。死生有命。何不敢之有。奪硯擲石階上碎之。翼旦。簡視事退。聞硯毀。詰主者。具以實對。即命擒至。皆謂必死矣。簡妻素奇敬洙。匿之堂奧。旬日。簡謂已逃去。亦置不問。會有烏逐簡而噪。避之。亦隨至。大怒曰。恨何敬洙不在此。敬洙善射。命中無所遺。故思之。語未畢。敬洙挾朱彈鐵丸拜於前。拜起。一發斃之。簡大喜。不復詰毀硯事。有善相者。簡使相諸子曰。雖皆善。然無及公者。獨指敬洙曰。此人殆過公。簡由是益愛之。及長。用爲軍校。簡卒。事烈祖爲裨將。進天威軍都虞候。建州之役。爲行營招討長步軍都指揮使。會查文徽進討。敬洙堅謂閩地僻陋。不足勞大兵。文徽開譬之。不得已而行。及平建州。敬洙功最諸將。然以功推王建封。無吝色。拜楚州團練使。敬洙自以初事李簡於是州。尤自感勵。常微服遊里巷。察民疾苦。有科調輒先爲經畫。民不知勞。坐聽事與賓佐譚讌。民有訴事者。立引入。親自剖折曲直。皆厭服而出。保大八年。楚朗州節度使馬希萼來附。且乞師。元宗命敬洙援之。遷武昌軍節度使。周人侵淮南。命武安軍節度使王進

逵領所部州師入江南境。進逵奉詔行。且遣部將潘叔嗣爲先鋒。取鄂州長山寨。殺三千人。元宗命敬洙清野入保。敬洙格詔出城。除地爲戰場。曰。敵至吾與丘民俱死於此。丈夫豈能惴惴閉門自守邪。會叔嗣自長山回。戈襲朗州。進逵狼狽而去。人重其決。加鎮國將軍中書令。後主嗣位。以病足乞解官。授右衛上將軍。芮國公。致仕。給全俸。第門列戟。乾德二年二月卒。年七十七。廢朝三日。命樞密使中書侍郎朱鞏持節冊贈鄂州大都督左衛上將軍。諡威烈。

王會。廬州廬江人。本名安。少事吳武王。王嘗臨戰。升高冢望敵。安捧唾壺侍側。左右皆注目前視。忽有卒持稍徑趨王。莫能禦者。會置壺於地。引弓射之。一發而殪。徐納弓。殺中。復捧壺立。色不變。王喜。撫其背曰。汝器度如此。他日必富貴。積功至袁州刺史。烈祖代吳。用爲百勝軍節度使。虔州與嶺南地接。南漢使者往來。節度使嘗燕勞問遺。而會故名。犯漢王祖諱。乃賜今名。昇元五年卒。年七十三。

張延翰。字德華。宋州睢陽人。故唐之末。任爲陝州司馬。從父慎思。擢徐州留後。延翰往省之。告以北方將亂。欲避地江淮。以全家祀。慎思是其言。慨然遣之。入吳爲鹽城令。有治績。烈祖以平章事領江州。封潯陽侯。表延翰爲江州觀察。巡官通判軍府事。烈祖代吳。入爲侍御史。判臺事。張宣爲左衛使。恃功驕暴。延翰廷劾之。強豪屏跡。進禮部侍郎。自以起疏遠。遭時被知。得盡己才。感槩自盡。時未設貢舉士。有獻書論事者。第其優劣選用。烈祖悉以委延翰。號爲精覈稱職。兼選事。務進孤貧。吏不敢爲奸利。元宗輔政。謂人曰。張君議論公正。處事悉有條理。吾得傾心聽之。由是六司綜領殆遍。時整歸重。拜中書侍郎。同平章事。時年財五十餘。人猶以爲柄用晚。屬疾益侵。不復能治事。烈祖以爲國器。方一意任之。不許其去。遣使勞問。賜良藥。旁午於道。卒。年五十七。贈太傅。

馬仁裕。徐州人。唐北平王燧裔孫。世爲武寧軍校。仁裕母方娠。夢傳呼北平王來歸。及生。紫氣充庭。數歲。學兵法。通解若素習。遇亂南奔。事烈祖爲昇州牙吏。烈祖領潤州。仁裕監蒜山渡。首聞朱瑾之亂。馳入白之。烈祖即日渡江定亂。以功遷左領軍將軍。歷楚州刺史。右金吾衛大將軍。烈祖代吳。拜潤州節度使。徙廬州。爲政寬簡。廉平。甚得民心。昇元六年卒於鎮。初烈祖左右小臣親信者。惟周宗及仁裕兩人。任遇略等。宗力贊禪代事。遂輔政。其後富盛冠一時。仁裕資長者。獨退然安於外鎮。晚益貧窶。不悔也。卒年六十三。諡曰匡。

游簡言字敏中。建安人。父恭。吳駕部員外郎。知制誥。簡言少孤力學。起家祕書省正字。烈祖鎮金陵。以爲戶曹參軍。典元帥府書檄。遷觀察推官。烈祖代吳爲中書舍人。元宗嗣位。遷翰林學士。禮部侍郎。貞介。獨不附權要。元宗頗重其爲人。命判中書省。兼吏兵部選事。裁抑僥倖。憎疾者衆。選人邵唐試判不中。上書言簡言父恭。嘗爲鄂州林洪掌書記。洪獎成朱溫篡弒。恭預其謀。簡言逆臣子。當斬。請正國法。元宗怒。唐挾私忿。謗讟。決杖流饒州。及淮南交兵。吳越亦伺釁攻常州。執團練使趙仁澤。歸於錢塘。仁澤見吳越王。責以敗盟。吳越王怒。挾其口至耳。方議遣使詰責吳越。羣臣畏懼。莫敢往。元宗以命簡言。簡言不辭。見其子慈爲千牛備身。將發。拜中書侍郎。未出境。召還。及遷都豫章。立吳王爲太子。留西都監國。以簡言爲輔。簡言力辭。言久備近臣。不忍去帷幄。元宗嘉其一心事主。無微後福意。卽從其請。更用嚴續。而後主亦由是賢之。拜吏部尙書。知省事。簡言親治簿書。督責嚴峻。人或以事請托。必固違拂。雖直亦不得伸。議者譏其過。拜左僕射。兼門下侍郎。同平章事。疾已篤。不及視事。卒。年五十七。刁彥能字德明。上蔡人。父禮。遇亂徙家宣州。彥能少孤。事母篤孝。家貧無以養。乃事節度使王茂章。茂章叛吳歸吳越。彥能以帳下當從。乃使家人扶其母俟於道左。彥能泣告茂章曰。彥能有老母在此。不能捨而從公。敢請死。茂章哀其意。許之。乃馳還宣州。而城中已亂。彥能登城。以劍招之曰。我從王府來。大軍已近。爾輩無妄動。衆信之。稍定。義祖聞而嘉之。以爲軍校。事其子知訓於廣陵。知訓狂恣。彥能每切諫。不聽。然亦不加罪。牙將馬謙以衆擁吳主登宮門。將殺知訓。彥能從朱瑾入。手斬謙以獻。賞賚甚厚。然彥能警敏。觀知訓必敗。而人望在烈祖。心常附焉。知訓忌烈祖。數欲害之。嘗與烈祖飲酒。而伏劍士室中。彥能行酒。以爪語烈祖。烈祖悟。亟起去。又嘗從知訓宴烈祖於山光寺。復欲加害。弟知諫摘語烈祖。烈祖亦馳去。知訓取佩刀授彥能。使追殺之。及於途。舉刀示先主。乃還。以不及告。及知訓死。義祖見彥能諫書。歎異。復使事知諫於潤州。遷裨將。烈祖代吳。入爲環衛。遷至天威軍都虞候。左衛使。金陵數大水。秦淮溢。東關尤被害。彥能請築隄爲斗門。疏導之。水患稍息。元宗嗣立。出爲饒州節度使。徙信州。又徙建州。留後。撫州節度使。彥能好讀書。在鎮委任文吏。頗有治稱。好作詩。嘗與李建勳相答贈。建勳因燕見及之。元宗笑曰。殊不知彥能乃西班牙學士也。性矜莊。燕居容服不少惰。時貴宴飲。或蓬首裸袒。彥能在坐。則皆肅然。保大末卒。年六十八。子衍。事後主爲祕書郎。集賢校理。以文翰見知。擢直清輝殿。閣中外章奏。國亡入

朝仕至兵部郎中直祕閣崇文院檢討淳淡夷粹恬於仕進暇日鼓琴圍碁不交人事衍孫約亦名士久在三館晚築室潤州號藏春塢王安石蘇軾皆尊愛之

卷七

徐高鍾常史沈三陳江毛列傳第四

徐玠字蘊圭彭城人事帥崔洪爲軍吏洪避朱全忠南奔遣玠先見吳武王因得事吳累居右職師出江西爲糧料使江西平授吉州刺史玠初爲小校以幹敏稱及治郡貪猥不治烈祖輔政罷之而義祖悅其善事人引以爲副使遂見親狎玠挾宿怨且希義祖意每與嚴可求言烈祖疏財結士不宜久執國權請以嫡子知詢代之事垂行而義祖殂知詢繼立玠本詭譎多智善揣摩非能爲徐氏計也至是察知詢必敗反持其長短自結於烈祖烈祖亦遂愛之盡忘前事鎮金陵以爲行軍司馬與周宗李建勳孫忌等參代吳秘計遂以佐命拜右丞相出爲宣州節度使徙洪州兼中書令復召爲司徒右丞相然徒崇以名位不復預政老而益貪鄙所至人患苦之好神仙之說嘗以下價市丹砂惡者治丹人以爲笑保太元年五月卒年七十六贈高平郡王

高審思失其家世鄉里少以驍勇事吳武王從劉信平虔州有功爲人重厚沉默烈祖愛之用爲神武統軍出鎮壽州兼侍中在鎮治守備常如有警或曰以公威略守堅城何太懼邪審思曰事變無常不可不過爲之備及保太末周人來侵諸郡往往一鼓而下惟壽州能堅守以世宗英武將士皆精練然逾年極兵力不可取雖劉仁贍善守亦審思之遺績也卒於鎮年七十五廢朝三日贈太師諡曰忠初術者悉言審思位不至刺史嘗受命刺常州固辭不敢行而其後位兼將相終始富貴術之不足信有如此

鍾謨字仲益會稽人徙建安李德明失其家世鄉里保大中俱爲尙書郎敏於占對元宗愛之而天資皆浮躁沾沾自銜反覆嶮巇朝士側目號爲鍾李時魏岑已斥復用姦諛彌甚謨德明雖與岑若不同至爲惡則合符券戶部員外郎范仲敏擡使軍帥王建封上書歷詆之請選用正人元宗大怒謂建封武人握兵不當輒議國政流建封池州未至殺之仲敏棄市謨德明自謂君寵可怙愈縱肆旁若無人德明嘗奏事別殿取元宗所御筆記事

元宗不能堪。曰：卿它日自可持筆來。德明亦自若。謨遷翰林學士戶部侍郎。德明遷工部侍郎。文理院學士。元宗雅稱兩人有詞辨。欲令說周罷兵。遣如壽州城下。貢御服及犒軍牛酒。世宗前知其欲以口舌游說。大陳兵衛。戟以見之。謂曰：江南自謂唐室苗裔。衣冠樂禮。異於它國。與朕隔一水。未嘗遣使修好。惟航海通北虜。此何禮也。今又比朕六國愚主。謂可說使罷兵。何其不知朕也。歸語若主。必臣事我。則兵可罷。不然。徑往金陵。借府庫犒軍。若君臣得無悔乎。兩人股栗。不敢出言。惟曰：寡君震畏天威。願獻壽濠泗楚光海六州。及歲輸方物。世宗以淮南諸州繼陷。欲盡取江北地。不許。德明見周師急攻壽州。度旦暮且下。乃曰：寡君未能知大國兵力。乃爾。願寬臣數日之誅。歸國取表。盡獻江北郡縣。世宗遣德明歸。以書諭江南君臣。語多諂讓。陵肆。國人已不堪。而德明方盛稱世宗威德。請必割地。元宗惡其言。宋齊丘力詆割地爲亡益。陳覺言德明賣國以悅敵。不可赦。德明佻薄。語多過實。知割地之說不行。攘袂大言。謂周師必克。元宗益怒。遂斬德明於都市。不復議割地。謨因留不得歸。及孫忌之死也。謨亦在召中。得不死。貶爲耀州司馬。及元宗割地稱臣。如謨德明初議。世宗乃召謨至京師。授衛尉卿。賜黃金五百兩。遺諭指於元宗。往復數四。謨旣矜肆。以爲世宗聽其言。江左可藉以無恐。元宗亦方賴其力。心雖憾之。體貌皆厚。以爲禮部侍郎。判尙書省。而三省之事。靡不預之。勢焰赫然。宋齊丘。陳覺。李徵古之死。皆出其計。又白請雪德明之罪。贈光祿卿。謚曰忠。太子弘冀參總庶政。謨薦其客閤式爲司議郎。百司關啓必由之。俄而世宗崩。謨自揆無所恃。頗若有失。元宗遇之亦寢薄。初李德明被誅。唐鎬預其事。至是鎬懼修怨。不自安。會鎬以納賄聞。謨面詰其狀。鎬愈懼。信州刺史張巒。入爲天威軍都虞候。謨素與之善。每屏人共語。或至中夜。又嘗請使巒帥帳下兵巡都城。鎬廉得之。因密言謨往來兩國。挾周人以脅制朝廷。今與典兵者交結。又請令巡徼葦下。其包藏殆不可測。謨微聞之。念無以爲奇貨。會弘冀卒。後主以母弟當立。而謨嘗與元宗愛子從善同使周。相與親厚。乃言後主器輕志放。無人君之度。因盛稱從善才。不知元宗建儲之意已決。更以此忤旨。乃暴其交結張巒等罪。貶國子司業。又貶著作佐郎。安置饒州。遣中使領侍衛軍十人。即日督促乘驛而去。謨時方病風眩。在途賦詩十章。語皆悽愴。巒出爲宣州副使。建隆元年正月。元宗聞太祖受周禪。乃遣使如饒州。賜謨死。問曰：卿昔與孫忌使周。忌死而卿獨生還何也。謨頓首伏罪。遂縊殺之。巒亦坐誅。謨有女。感家禍。不嫁。爲道士。名守一。博通孔老書。尤善講。

說。端拱中。京師建洞真宮。召守一爲道職云。

常夢錫。字孟圖。扶風人。或曰京兆萬年人也。岐王李茂貞。不貴文士。故其俗以狗馬馳射博奕爲豪。夢錫少獨好學。善屬文。累爲秦隴諸州從事。茂貞死。子從儼襲父位。承制補寶雞令。後唐長興初。從儼入朝。以夢錫從。及鎮汴。爲左右所譖。遂來奔。烈祖輔吳。召置門下。薦爲大理司直。及受禪。擢殿中侍御史。禮部員外郎。益見獎遇。遂直中書省。參掌詔命。進給事中。時以樞密院隸東省。故機事多委焉。夢錫重厚方雅。多識故事。數言朝廷因楊氏霸國之舊。尙法律。任俗吏。人主親決細事。煩碎失大體。宜修復舊典。以示後代。烈祖納其言。頗譏簡易之法。元宗在東宮。有過失。夢錫盡言規正。無所撓。始雖不悅。終以諒直多之。及卽位。首召見慰勉。欲用爲翰林學士。以自近。宋齊丘黨。惡其不附己。坐封駁制書。貶池州判官。及齊丘出鎮。召爲戶部郎中。遷諫議大夫。卒以爲翰林學士。復置宣政院於內庭。以夢錫專掌密命。而魏岑已爲樞密副使。善迎合。外結馮延己等相爲表裏。夢錫終日論譁。不能勝。罷宣政院。猶爲學士如故。乃稱疾縱酒。希復朝。會鍾謨李德明分掌兵吏諸曹。以夢錫人望言於元宗。求爲長史。拜戶部尙書知省事。夢錫恥爲小人所推薦。固辭不得請。惟署牘尾。無所可否。延己卒。文致其閨門罪。貶饒州團練副使。夢錫時以醉得疾。元宗憐之。留處東都留守。周宗力勸夢錫止酒治疾。從之。乃少瘳。召爲衛尉卿。改吏部侍郎。復爲學士。交泰元年。方與客坐談。忽奄然卒。年六十一。卒後財逾月。齊丘黨與敗。元宗歎曰。夢錫平生欲去齊丘。恨不使見之。贈右僕射。諡曰康。夢錫文章典雅。有承平之風。歌詩亦清麗。然絕不喜傳於人。剛褊少恕。每以直言忤物。嘗與元宗苦論齊丘輩。元宗辯博。曲爲解釋。夢錫詞窮。乃頓首曰。大姦似忠。陛下若終不覺悟。家國將爲墟矣。元宗不答。而心善之。及割地降號之後。公卿在坐。有言及周以爲大朝者。夢錫大笑曰。汝輩嘗言致君堯舜。何故今日自爲小朝邪。衆皆默然散去。每公卿會集。輒暗鳴大咤。驚其坐人。以故不爲時所親附。然既沒。皆以正人許之。雖其仇讎。不敢訾也。

史虛白。字畏名。世家齊魯。虛白隱居嵩。少著書。中原喪亂。與北海韓熙載來歸。時烈祖輔吳。方任用宋齊丘。虛白誦言曰。吾可代彼。齊丘不平。欲窮其技能。召與宴飲。設倡樂奕碁博戲。酒數行。使製書檄詩賦碑頌。虛白方半醉。命數人執紙。口占。筆不停綴。俄而衆篇悉就。詞采磊落。坐客驚服。虛白數爲烈祖言。中原方橫流。獨江淮豐阜。兵

食俱足。當長驅以定大業。毋失事機。爲他日悔。烈祖不能從。虛白乃謝病去。南遊至九江落星灣。因家焉。常乘雙犢版輦。掛酒壺車上。山童總角。負一琴一酒瓢以從。往來廬山。絕意世事。保大初。熙載爲史館修撰。薦虛白可用。元宗召見。訪以國事。對曰。草野之人。漁釣而已。安知國家大計。賜宴便殿。醉溺於殿陛。元宗曰。真隱者也。賜田五頃。放還山。及元宗南遷豫章。次蠡澤。虛白鶴裘藜杖。迎謁道旁。元宗駐蹕。勞問曰。處土居山。亦嘗有所賦乎。曰。近得谿居詩一聯。使誦之。曰。風雨揭却屋。渾家醉不知。元宗變色。厚賜粟帛。上樽酒。徐鉉高越謂之曰。先生高不可屈。肯使二子仕乎。虛白曰。野人有子。賢則立功業。以道事明主。愚則負薪捕麋。以養其母。僕未嘗介意也。不敢以累公。鉉越媿歎。卒年六十八。將終。謂其子曰。官賜吾美酒。飲之略盡。尙留一榼。吾死。置藜杖及此酒於棺中。四時勿用祭享。無益死者。吾亦不歎。子皆從之。孫温。天聖中仕爲虞部員外郎。獻虛白文集。仁宗皇帝愛之。追號虛白仲靖先生。

沈彬。洪州高安人。唐末。浪迹湖湘。隱雲陽山。好神僊。喜賦詩。句法清美。烈祖輔吳。表授祕書郎。與元宗遊。俄懇求還山。以吏部郎中致仕。元宗遷南都。彬年八十餘。來見。曰。臣久處山林。不預世事。臣妻曰。君主人耶君。今爲天子。何不一往。臣遂忘衰老而來。元宗命毋拜。厚賜粟帛。以其子爲祕書省正字。彬先歲嘗策杖郊原。手植一樹。識之。語其子曰。吾當藏骨於此。及卒。伐樹掘地。至丈餘。得一石槨。製作精麗。光潔可鑑。蓋上有篆云。開成二年。壽櫟。舉棺就之。廣袤中度。次子廷瑞。有道術。嗜酒却粒。寒暑一單褐。數十年不易。跣行。日數百里。林棲路宿。多在玉笥浮雲二山。老而不衰。後不知所終。

陳況。閩人。性夷曠。隱於廬山四十年。衣食乏絕。不以動心。苦思於詩。得句未成章。已播遠近。元宗聞其名。召見。時方祁寒。元宗見其衣單薄。降手札曰。欲以綾綺衣賜卿。卿必不受。今賜朕自服。絢縑衣三十事。俄授江州士曹掾。固辭歸。卒於山中。年七十餘。

陳曙。蜀人。嘗舉進士。唐末。避地淮南。多遜於蘄州山中。鄉人有會集。或祭神。曙不待召而至。醉飽。乃辭去。由是人多設虛座。陳酒肴以俟之。同日或至數家。舍中惟一榻。素書數卷。與蛇虎雜居。不設牕戶。雨雪滿室。亦自若。人有乘其出往闕之者。曙必自外來。凡數十年。顏鬢不少異。元宗命中書舍人高越召之。不肯起。後徙居鄂渚。及洪之

西山不知所終。

陳陶嶺南人。少學長安。昇元中南奔。將求見烈祖。自度不合。乃隱洪州西山。歎曰。世豈無麟鳳。國家自遺之耳。保大末。有星孛於參芒。指東南。陶語人曰。國其幾亡乎。果失淮南。元宗南遷豫章。至落星灣。將訪以天象。恐陶不肯盡言。以其素嗜鮓。乃使人僞言賣鮓。至門。陶果出。啗鮓。喜甚。賣鮓者曰。官舟至落星矣。處士知之乎。陶笑曰。星落不還。元宗聞之不憚。遂不復問。是歲果晏駕。西山產靈藥。陶與妻日斲而餌之。不知所終。開寶中。南昌市有一老翁。丫結被褐。與老嫗賣藥。得錢則沽西市鮓。相對飲啗。既醉。歌舞道上。其歌曰。藍采和。藍采和。塵世紛紛事更多。何如賣藥沽美酒。歸去青崖拍手歌。或疑爲陶夫婦云。

江夢孫。字聿修。潯陽人。烈祖輔吳。表爲祕書郎。夢孫數自言。迂儒無裨益。平生讀書。欲小試於治民。求爲總令。方是時。士之客於烈祖者。率以功名富貴自許。而夢孫言獨如此。烈祖以爲不情。不之許也。求不已。而補天長令。烈祖先持告身示之曰。今日受此。明日趨走庭下矣。曰。此素志矣。庸何傷。乃授之。至天長。吏白縣署正寢有淫厲。不可居。夢孫不從。是夕。果有怪並出。夢孫起焚香曰。夢孫受命爲令。常治事於此。鬼神有祠廟丘壟。胡不各歸其所。吾行不欺暗室。奚畏君等。語訖。皆斂迹。夢孫治縣寬簡。吏民安之。逾年。棄官去。縣人號泣。送之數十里。還家。事繼母盡孝。早暮潔衣冠。視膳羞。母食旣徹。爲諸生講禮。凡至疑義。輒斂衽曰。此科先儒猶多異同。夢孫安敢輕言。諸君自擇所長可也。保大中卒。年八十五。贈國子司業。

毛炳。洪州豐城人。隱居廬山。時爲諸生講。得錢卽沽酒。嘗醉臥道旁。有里正掖起之。炳瞋目呵之曰。醉者自醉。醒者自醒。亟去。毋撓予睡。後徙居南臺山。數年。忽書齋壁曰。先生不住此。千載惟空山。因大醉。一夕卒。與炳同時。又有酒禿者焉。酒禿姓高氏。駢族子。棄家祝髮。博極羣書。善講說。而脫略跌宕。無日不醉。後主召講華嚴。梵行一品。資金帛甚厚。玄寂卽日盡送酒家。日夜劇飲。醉則從小兒數十。浩歌道中。歌曰。酒禿酒禿。何榮何辱。但見衣冠成古丘。不見江河變陵谷。一日。醉死石子岡。

三徐三王二朱胡申屠喬陸列傳第五

義祖生六子。知誨。知詢。知誨。知諫。知證。知諤。及烈祖開國。惟知證知諤在。餘皆前卒。

徐知證。義祖第五子也。事吳。歷州刺史。至節度使。烈祖初尊義祖爲太祖。復姓。改義祖封。拜徐氏與李氏同。知證王江。改王魏。元宗嗣位。尤見尊禮。內宴用家人禮。起舞拜跪爲壽。知證亦以叔父自處。無所讓。卒年四十二。

徐知諤。義祖第六子。在吳亦爲節鎮。代知詢爲金陵尹。烈祖初封饒王。進王梁。鎮潤州。兼中書令。好奇寶怪物。所蓄不可計。有蜀估持鳳首至。自言得之徼外蠻夷。狀如雄雞。廣五寸。冠上正平。可用爲枕。朱冠金喙。文彩煥爛。如生人。咸異之。一日遊蒜山。除地爲場。連虎皮爲大幟。號虎帳。與賓僚會飲其中。忽暴風至。裂帳。盡碎如飛蝶。知諤懼而歸。屬疾數日卒。平生常語客曰。人生七十爲大限。吾生長王家。窮極歡樂。一日可敵世人二日。年三十五。其死乎。至是如其言。廢朝七日。烈祖悲悼。復詔不視朝者七日。斂以袞冕。及上方秘器。諡曰懷。十子皆貴顯國中。所著文賦歌詩十卷。號閨中集。

徐遊。知誨子也。初名景遊。避元宗名。去景字。知誨於元宗有舊恩。故元宗待遊及兄汝南郡公遼。尤親厚。出入宮省。備顧問。預籌畫。專典宮室營繕。及浮屠事。當時言蠹政者以兩人爲首。後主嗣位。好爲文章。遊復以能屬文見昵。封文安郡公。燕飲則流連酣咏。更相倡和。雖后妃在席。不避也。昭惠后好音。時出新聲。或得唐盛時遺曲。遊輒從旁稱美。有三閭狎客之風。閉居講論古今得失。後主設問。遊具以所聞對。或遊有疑。以請。後主亦引經義。或古事。稱制答之。君臣相矜。至國亡不悟也。遊有巧思。敵器之制久不傳。人無知者。遊獨以意創製。皆合古法。太平興國中。蘇易簡爲學士。得之暇日。試於玉堂。太宗皇帝聞而取視之。歎賞不已。方金陵之將亡也。徐錯屬疾。忽夢巨人持大鐵篋。取己及兄鉉。并遊。同納篋中。篋之錯與遊皆墜地。而鉉獨否。俄錯遊皆以疾卒云。

王建封。上元人。少從軍。以任俠驍勇知名。元宗取建州。建封爲先鋒橋道使。於建州外郭。克之。王延政降。何徽洙功最諸將。建封忿曰。我縱火先登克城。諸軍乃能入。我功當第一。敬洙因推之曰。君言是也。具以聞諸朝。第賞拜信州刺史。人皆多敬洙而薄建封。陳寬。馮延魯。魏岑。攻福州。李弘義圍之。敗吳越援兵。福州援絕。危蹙。且拔矣。而覺延魯岑各欲功在己。不相應接。偏裨莫肯用命。故未能克。覺奏請建封濟師。建封率五千人會之。破福州版寨。

入東武門。而建封亦與諸將爭功。遽斂兵先退。弘義乘之。我軍復敗。遂潰而歸。元宗深銜建封。顧方洽覺等擅與。未及治也。建封內不自安。元宗懼其作亂。召爲天威軍都虞候。付以親軍。建封遂泰然。恃恩僭侈。無復顧憚。戶部員外郎范冲敏。疾魏岑。鍾謨。李德明用事。詭建封上書。歷詆岑等。請更用正人。元宗遂發怒。謂建封武臣握精兵。敢干國政。謀進退柄臣。其漸不可長。流池州。未至。殺之。冲敏棄市。未幾。岑見冲敏爲厲。謂道士上章訴天。數月竟死云。

王彥儔。蔡州上蔡人。少爲州軍校。唐同光末。諸郡多亂。彥儔亦樂禍思奮。會同列六人者。來與謀曰。四郊恟恟。能者得富貴。我輩不可後人。彥儔許諾。且曰。今夕吾直府中。公等可持兵來。吾亦裹甲爲內應。旣夜。六人者如約俱至。彥儔伏壯士盡捕斬之。持其首叩帳門。告刺史曰。姦盜竊發。幸已伏誅。懼有佚黨爲變。願公亟號令以安衆心。刺史驚喜而出。彥儔卽斬之。歸其罪於六人者。翼日。悉族六家。據蔡州。無敢動。唐兵來討。彥儔自計不能守。匿其妻子於村舍。奉父母來奔。烈祖輔吳。以爲都押衙。歷和州刺史。始遣間使迎妻子南歸。彥儔有政績。善撫境內。和遂爲富州。入拜統軍。自以發迹兇亂。於是務爲恭謹。烈祖嘉之。嘗陞堂拜其父。開國。以爲池州節度使。常夢錫自給事中。以直諫貶判官。彥儔事之如在朝廷。人士稱之。卒於鎮。

朱匡業。廬州舒城人。父延壽。以姊爲吳武王夫人。故自少得幸。從征討。摧堅陷陣。功冠諸將。好以寡擊衆。不勝而返者。必盡戮之。嘗與梁戰。遣二百人持大劍斫陣。將行。指一卒留之。卒請行。延壽以違命。立斬之。其令出必行。皆類此。然每得賞賜。悉分賚其下。無以入家者。唐昭宗在岐下。聞其名。遣使問道。授延壽蔡州節度使。武王疑其難制。誘殺之。出夫人。使更嫁。然猶以舊功貸其妻子。時匡業尙幼。稍長。授以官。烈祖輔吳。拔爲軍校。積功至諸軍都虞候。嗜酒使氣。烈祖優容之。出爲歙州刺史。有政績。改建州留後。還朝。授神衛統軍。周侵淮南。中外震駭。盜投幘多竊發。以匡業爲內外巡檢使。嚴而無私。犯令無所貸。中外肅然。夜戶不閉。正陽喪師。朱元叛。元宗議親征。召匡業及統軍劉存中。問以方略。匡業輒對曰。運數之興。天地皆助。大事若去。雖英雄亦無如之何。存中從旁贊之。元宗怒。貶匡業撫州團練使。流存中饒州。後主襲位。召拜神武統軍。加中書令。卒。子崇俊。短陋羸瘠。而妙於騎擊。馳突若神。早卒。

朱令贇大將軍業從子少從軍椎額鷹目趨捷善射積遷至鎮南節度使開寶中後主見討王師兵已圍金陵召令贇赴難軍至湖口與諸將謀曰今爲前進則北軍據我後上江阻隔進未破敵退絕餽餽奈何乃檄南都留守柴克貞赴軍欲俟其至使代拒湖口及發而後主危急飛書督兵者接踵令贇不能守初議乃與戰棹都虞候王暉乘流而前自潯陽湖編木爲大楫長百餘丈大艦至容千人將突下斷采石浮梁會江水涸舟楫艱阻王師得設備比至虎蹲洲合戰令贇所乘艦尤大建大將旗鼓王師舟小聚攻之令贇以火油縱燒王師不能支會北風反焰自焚水陸諸軍十五萬不戰皆潰令贇惶駭赴火死糧米戈甲俱焚無孑遺烟焰不止者旬日自是金陵外援遂絕以至於亡是時王師上露布稱生獲令贇則非也

論曰金陵之被圍也以守備任皇甫繼勳以外援付朱令贇繼勳既懷貳心而令贇孺子復非大將才其亡宜矣使林仁肇不以間死盧絳得當攻守之任胡則申屠令堅輩宣力圍城中雖天威臨之豈易遽亡哉然則江南雖弱曹彬等所以成功者獨乘其任人乖刺而已吾以此知伐國之難也

王崇文父縮吳大將崇文以門地選尙烈祖妹廣德公主歷百勝永安二鎮廬陵民尙氣喜訟以先止爲怯素號難治崇文一以法治之不少貸訟爲衰息建州初平崇文安集之民忘其亂又涉武昌自南唐興崇文內典禁兵出更藩任位兼將相終始富貴而平居被服儒雅風度夷曠在武昌方閣騎士於鞠場傍古屋數十間崩塌聲震數里聞者莫知所爲崇文指揮使令訖事不失常度竟亦不問後主初立上疏歷陳朝政賜書褒之加中書令卒胡則不知其世家後主末爲江州指揮使金陵陷曹彬喻後主以手書命郡縣悉以城降書至江州刺史謝彥賓集將佐視之謀納款則憤形於色亟出謂其下曰吾屬世受李氏恩安可負之且都城久受圍此書真僞不可知刺史不忠欲污吾州爾輩能從我死忠義乎衆皆曰善乃帥同列宋德明等大譁入攻彥賓彥賓懼逃簷霑中執而殺之衆推則爲刺史號令肅然莫敢不聽則嘗爲壽州裨將從劉仁贍城守累年盡得其方略乃日夜閱丁壯勒部伍爲堅壁死守計太祖命南面行營招安巡檢使曹翰攻之城帶江負山樓櫓高險堅不可破屢遣使諭降則誓死不從翰軍死傷者衆詔書切責督戰會則疾革不能起城始陷衆猶巷鬪雪涕奮擊不少退翰軍尤多死則臥牀上翰執之數其違命之罪對曰犬吠非其主爾何怪也卽昇置木牀上將磔之俄死腰斬其屍以狗并殺

宋德明而隳其城七尺。使後不可守。時右補闕張霽被命知江州。與翰偕行。既入城。翰軍士掠民家。民訴於霽。霽按誅軍士。翰因發怒屠城。死者數萬人。取其屍投井。坎皆滿溢。餘悉投江流。因誣奏霽。太祖薄霽罪。徙知烏州。民家貨貨鉅萬。翰悉取之。初。太祖聞江州城垂破。遣使持詔賜翰。使勿多殺。使者至獨樹浦。大風斷渡。比至。已無噍類矣。

申屠令堅。山東人。少無賴。勇敢絕人。晉漢間。嘗爲盜。被獲。以計脫來歸。保大末。禦周師於壽春。破城南大砦有功。擢神武都虞候。劉茂忠。吉州安福人。本名徹。或謂之曰。劉徹乃漢武帝也。非人臣所能名。乃改焉。少亦爲羣盜。會赦。募盜爲兵。茂忠出應募。且應擒盜自洗滌。乃詐亡命入盜中。自言工風雲占。盜信之。乃密約吏爲內應。悉擒戮無遺者。惟廬陵鷓鴣洞賊帥吳先。狡有謀。且據巖險。不可捕。茂忠鞭二卒。使佯爲得罪。奔先。示以鞭創。先乃納之。月餘。斬先。其黨皆潰。積功爲吉州兵馬都押衙。開寶中。令堅爲吉州刺史。茂忠爲袁州刺史。金陵破。後主歸京師。兩人者相約。不以主存亡易節。誓死報國。前二年。令堅寐。則夢與人鬪。大呼而寤。乃聚侍婢歌舞。喧笑達旦。始能寐。至是若與人搏擊於帳中者。踰時而卒。茂忠度不能獨奮。遂降。將行。悉燔州縣軍興科斂文籍。所留田稅簿而已。袁人德之。入朝。舟次淮口。謁關吏。稱袁州刺史。吏擲刺於地曰。此亡國之俘。何刺史也。叱令執杖庭參。至京師。授登州刺史。關吏抵罪。適編管登州。茂忠見之曰。乃汝耶。日責拜謁兩衙。必令植立庭下。吏慚憤死。茂忠還朝。病金瘡卒。

喬匡舜。字亞元。高郵人。弱冠能屬文。以典贍稱。烈祖輔吳。用爲祕書省正字。開國。宋齊丘辟置幕中。十餘年。歷大理評事。屯田員外郎。齊丘喜人諛己。而匡舜真率。故雖賞其文藝。未嘗薦拔。烈祖獨知之。嘗詔公卿舉可親民者。意齊丘且舉匡舜。奏上。竟不及。烈祖喟然。謂常夢錫曰。吾不意其捨匡舜也。夢錫與韓熙載素惡齊丘。每相語曰。宋公誤識亞元。正可怪也。久之。齊丘出鎮豫章。始表爲節度掌書記。保大中。召爲駕部郎中。知制誥。進中書舍人。周侵淮南。諸將無功。元宗議親率六軍拒之。匡舜上疏切諫。帝怒。坐以沮國動人心。流撫州。然亦卒不能親行也。後主嗣位。復起爲司農少卿。歷殿中監。修國史。給事中。兼獻納使。知貢舉。放及第樂史輩五人。多久滯名場者。時稱得人。而少年輕薄子嘲之。謂之陳橋成勝。遷刑部侍郎。老病。乞骸骨歸。後主憫其貧。給俸終身。開寶五年卒。年

七十五。諡曰貞。

陸昭符。金陵人。不知所以進。保大中。爲常州縣刺史。當吳越之衝。屢交兵。城邑荒殘。昭符爲改電筒。招納遺亡。未幾遂富實。一日坐廳事。雷雨暴至。電光如金蛇。遶案。吏卒皆震仆。昭符不懼。撫案叱之。雷電遽散。及舉案。准得鐵索重百斤。昭符亦不變色。徐命舉索納庫中。顯德五年。元宗旣稱藩於周。秋八月。命昭符爲進奏使。置邸大梁。太祖受周禪。昭符乃更名。後主嗣位。御宮門。立金雞竿。降赦。如天子禮。太祖聞而怒。召昭符詰之。色甚厲。昭符徐以鄙語對。太祖爲笑。因置不問。然昭符常往來金陵。時後主數貢奉。帑藏空竭。昭符市於富民。石守信家得絹十萬。後主大悅。太祖已遣李穆召後主入朝。因問昭符曰。汝度汝主來否。對曰。君命召。不俟駕。安有不來。及後主稱疾。王師致討。昭符又言於太祖曰。臣主必死社稷。已而後主降。罷奏邸。不得調。卒。初名匡符。建隆初改。以避上名云。

卷九

劉高盧陳李廖列傳第六

劉彥貞。兗州中都人。父信。初爲羣盜。戰敗奔吳。事武王。數有功。王遇之厚。嘗召信計事。醉不能言。王嬖罵之。信卽仗一劍棄去。左右請追之。王曰。信醉耳。醒當復來。明日果至。積功至鎮南軍節度使。宣王建國。加征南大將軍。唐莊宗滅梁。遣諫議大夫薛昭文使閩。假道洪州。信燕勞之。謂昭文曰。皇帝知有信否。昭文曰。主上新平河南。未知公之名。信曰。漢有韓信。吳有劉信。一等人也。因指牙旗銀首。舉酒屬昭文曰。幸而中此。願爲我飲。一發中之。烈祖受禪。以舊故贈太師。彥貞。信第四子。以父任爲大理評事。遷濠州節度使。移壽州。始贖貨。自殖市肆。不問貧富。概出資助。矢不虛發。軍中號曰劉一箭。吏事亦以強濟見稱。遷濠州節度使。移壽州。始贖貨。自殖市肆。不問貧富。概出資助。之。而收其贏。州有安豐塘。溉田萬頃。以故無凶歲。彥貞託以浚城濠。決水入濠中。民田皆涸。而督賦益急。皆賣田去。彥貞擇尤膏腴者。以下價售之。乃復繕塘水如初。歲入不可勝計。時南唐政衰。用事者多貪墨。彥貞廣賂遺。以致聲譽。於是魏岑等雜然推倡其用兵治民之能。以爲一面長城。在鎮久。疑當受代。輒妄造邊遽以固其位。久之。乃入爲神武統軍。及周師侵淮南。拜北面行營都部署。帥三萬人援壽州。次來遠鎮。兵車旗幟巨數百里。戰艦衝

尾蔽淮而上。周將李穀慮我師斷浮橋。腹背受敵。燒營退保正陽。彥貞雖名將家子。生長富貴。初不練兵事。裨將武彥暉張延翰成師。朗皆鬪將。無籌略。見周師退以爲快。惟恐不得速戰。士未及朝食。卽督以進。遇周將李重進於正陽東。彥貞置陣。橫布拒馬。聯貫利刃。以鐵繩維之。刻木爲猛獸攫拳狀。飾以丹碧。立陣前。號捷馬牌。又以革囊貯鐵蒺藜布於地。周兵望而笑其怯。銳氣已增。一戰。我師大敗。師朗等皆被擒。彥貞死于陣。南唐喪地千里。國幾亡。其敗自彥貞始。雖死王事。議者不與也。後數年。贈中書令。諡曰壯。亦不復錄其孤云。

高越。字仲遠。幽州人。精詞賦。有名燕趙間。盧文進鎮上黨。具禮幣致之。初以客從。及文律徙安州。越又從之。遂爲其掌書記。文進仲女有才色。能屬文。號女學士。因以妻越。文進奔吳。亦與俱行。吳以爲祕書郎。烈祖受禪。遷水部員外郎。改祠部。浙西營田判官。與江文蔚俱以能賦擅名江表。時人謂之江高。保大初。文進卒。有欲傾其家者。越上書訟之。黜爲蘄州司士參軍。語在文進傳。就遷軍事判官。與隱士陳曙爲物外交。淡然不志榮利。久之。仍徙廣陵。令還判吏部。歷事御史知雜。元帥府掌書記。起居郎。中書舍人。淮南交兵。書詔多出越手。援筆立成。詞采溫麗。元宗以爲稱職。不徙官者累年。後主立。始遷御史中丞。勤正殿學士。左諫議大夫。兼戶部侍郎。修國史。卒年六十。二。諡曰穆。貧不能葬。後主爲給葬費。世歎其清。兄子遠。

遠字攸遠。父操。袁州別駕。遠少孤。爲人夷雅沖淡。而遇事有奇節。杜門力學。不交人事。烈祖受禪。招來四方秀傑。得遠。以爲祕書省正字。保大初。遷校書郎。兼太常修撰。遂爲太常博士。淮南兵興。元宗召見。賜金紫。使典成府書檄。歷禮部員外郎。樞密判官。侍御史知雜。史館修撰。起居郎知館事。遂爲勤政殿學士。國初。命兵部尙書陳瓘修吳史。未成而卒。其後顏史職者多貴游。或新進少年。纂述殆廢。遠自保大中預史事。始撰烈祖實錄二十卷。敘事詳密。後主嗣位。遠猶在史館。與徐鉉喬匡彛潘佑。共成吳錄二十卷。遠又自撰元宗實錄十卷。未及上。會屬疾。取史稿及他所著書凡百餘卷。悉燔之。卒年五十七。贈給事中。諡曰良。後主欲修國史。訪稿于其家。無復在者。遠有精識。方邊鑄入潭州。湖南悉平。百官入賀。遠獨曰。我乘楚亂。取之甚易。觀諸君之才。守之實難。聞者愕然。以爲過。及後如所料。乃皆服其先見。

盧文龜。字大用。望州人。事後唐明宗。至安州節度使。事具五代史。晉高祖起晉陽。與契丹耶律德光約爲父子。文

進少嘗事契丹。娶虜公主。爲其平州刺史。明宗時。率衆數萬來歸。至是不自安。且本燕人。尙氣。不能屈於晉。乃決計歸吳。時烈祖輔吳爲齊王。將受禪。吳遣將祖全恩以兵二千陣於安州近境。俟文進出。殿之而至。拜天雄統軍。宣潤節度使。委任賓佐。政績甚美。潤州市大火。文進使馬步使救之。益熾。文進怒。自出府門。斬馬步使。傳聲而火止。人皆異之。召還。以左衛上將軍兼中書令范陽郡王奉朝請。猶給藩鎮俸卒。馮延巳惡文進。文進亦以素貴。不少下。及卒。乃誣以陰事。盡收文進諸子。欲籍其家。文進以女妻高越。越乃上書訟文進寃。指延巳過惡。詞氣甚厲。時延巳方用事。人頗壯之。元宗怒。以越屬吏。貶蘄州司士參軍。而盧氏亦賴以得全。文進在金陵爲客言。昔陷梁丹。嘗瀝於郊。遇晝晦。如夜。星緯燦然。大駭。偶得一胡人問之。曰。此謂之筮日。何足異。頃自當復。良久。果如其言。日方午也。又嘗至無定河。見人脛骨大如柱。長可七尺云。

陳覺。揚州海陵人。烈祖以東海王輔吳。作禮賢院。聚圖書萬卷。及琴奕游戲之具。以延四方賢士。政事之暇。多與之講評古今。覺亦預焉。烈祖居金陵。以次子景遷留東都。爲同平章事。知左右軍。使輔政。命覺爲之佐。謂曰。吾蚤莫與賢士相接。今老矣。尙未達天下事。景遷年少當國。故屈君子。無憚也。景遷卒。還朝。爲宣徽副使。烈祖晚多暴怒。近臣多得譴罰。覺心懼。稱疾。家居累月。以宣遺詔日入朝。判大理寺。蕭儼劾之。元宗不從。遷光政院副使。太僕少卿。覺有兄。居鄉里。時海陵已爲泰州。覺兄犯法。刺史褚仁規笞之。覺挾私怨。密譖仁規貪殘。侍御史王仲璉亦劾之。元宗薄其罪。止罷刺史。仁規忿。上章自訴。元宗命覺馳往鞠之。仁規惶恐伏罪。覺還。條其罪狀甚衆。詔賜死。覺之竊弄威福。蓋始於此。覺與李徵古。皆宋齊丘客。徵古者。袁州宜春人。於齊丘有中外事。齊王景達爲宮官。齊丘告歸九華。逾年不召。徵古使其僚謝仲宣諷景達言于元宗曰。齊丘先帝布衣之舊。雖不用。不當棄之。齊丘旣召歸。益以腹心寄覺。欲使立功以取柄任。時唐兵初得建州。諸將請用其鋒。攻取福州。齊丘獨薦覺爲宣諭使。召節度使李弘義入朝。可不勞寸刃。盡得閩地。元宗意方向覺。遂遣之。旣至。弘義倨甚。覺氣折。不敢言。歸至劍州。恥于無功。矯詔召弘義。自稱權福州事。擅興汀建撫信州兵及戍卒。命馮延魯將之。攻福州。敗績。衆潰而歸。死者萬計。亡失金帛戈甲之類。不可勝數。朝論謂必死。元宗亦怒。欲寘軍法。齊丘上表待罪。實營救覺等。馮延巳助之。於是財貶蘄州。逾年。復起任事。始與徵古爲死黨。相倡和。如出一口。淮南兵興。我師屢北。度不可復支。元宗遣鍾謨。

李德明孫忌。王崇質使周世宗。請獻壽濠泗楚光海六州。以罷兵。世宗不許。而壽州日危蹙。德明懼。乃白世宗。言願寬臣數日之誅。歸白寡君。盡獻淮南地。周乃遣德明。王崇質先還。德明至金陵。盛稱周兵之彊。請必割地。元宗不悅。齊丘覺徵古素惡忌。及德明。適語王崇質。使異其詞。覺徵古因極言德明賣國。德明褊忿。知見排。攘袂大言。周師必克。元宗遂斬德明于都市。覺徵古勢焰益熏灼。道路以目。德明既誅。不復議請盟。乃命齊王景達率大兵拒周。而以覺爲監軍使。軍政皆出覺。聚兵五萬。無決戰意。朱元數有功。覺忌之。奪其兵。元遂叛降周。諸軍悉潰。覺歸爲樞密使如故。而徵古爲副使。不以敗事自咎。方相與挾齊丘爲耐久計。議事元宗前。橫甚。元宗嘗言及家國感慨泣下。徵古輒曰。陛下當以兵力拒敵。涕泣何爲。飲酒過量耶。乳保不至耶。帝色變。左右股栗。而徵古驚然自若。司天言天文變異。人主宜避位祈禳。元宗曰。此固吾意。第不知孰可付耳。覺徵古遽以爲誠言。輒曰。天命如此。宜使宋公攝政。陛下深居禁中。俟國事定。歸政未晚。元宗亟召中書舍人陳喬草詔。實出于憤怒。喬固陳不可。元宗嘻笑而止。周師益進。世宗駐迎鑾鎮。元宗遣覺奉表貢方物。覺至迎鑾。見周之戰艦。陳列江津。且南渡矣。大懼。請遣人取本國畫江爲界表。世宗可之。覺頓首謝退。遣其屬劉承遇南還。以告。畫江稱藩奉正朔之議。遂決。周亦班師。遣覺還。錫賚豐渥。覺將發。獻詩一首。敘感別。賜金器百兩。初覺徵古以德明請割地爲賣國誅死。及是覺身自爲之。使還。以兵部尚書致仕。徵古先出爲洪州節度副使。時晉王景遂爲帥。不堪徵古之傲狠。常欲斬之。自拘於有司。左右力諫。乃已。鍾謨自周還。屢言齊丘覺徵古之罪不可容。覺嘗傳世宗之語告元宗曰。聞江南拒命。謀出其相嚴續。當殺續以謝我。元宗知覺與續有宿怨疑之。謨請至周覆實其事。元宗遣謨行。以手表引咎。且言非續之罪。世宗省表大驚曰。嚴續能拒命乃忠臣。朕爲天下主。其肯教人殺忠臣乎。謨還。具奏之。元宗大怒。齊丘既斥。覺亦責授國子博士。饒州安置。遣殺之。徵古削奪官爵。賜自盡于洪州。

李德誠。廣陵人。少事宣州節度使趙錙。錙給使。吳攻宣州。錙出降。德誠與韓球俱從之。不去。城中復推立裨將周進思以拒吳。錙使德誠入城。說進思降。將行。暴得疫疾。委頓不克往。乃致命球。球既至。進思斬之。擲其首城外。德誠是日即愈。人皆異之。錙死。事吳武王。常從征討。積功爲江南馬步軍使。與諸將圍潤州。安仁義諸將每見仁義臨城督戰。必嫚罵之。德誠獨否。及城破。仁義操弓矢坐城上。衆莫敢近。德誠至。仁義忽顧曰。汝見我獨不失禮。且

有奇相。他日將大貴。吾以爲汝功。卽擲弓矢就執。武王卽拜德誠潤州刺史。歷撫虔洪三鎮節度使。平南大將軍。中書令。烈祖受禪。拜太師。封南平王。進封趙王。德誠事吳最久。至南唐之興。又爲佐命。首與周本勸進。初無大勳勞。特以際會至高位。富貴壽考。世罕及者。然爲人謙恭沉厚。終始如一。自洪州入覲。烈祖命宮人逆勞于途。百官班謁於都門。入對日。朝堂設次以待之。昇元四年卒。年七十八。廢朝五日。諡忠懿。子二十八人。第四子建勳。建勳字致堯。少好學。能屬文。尤工詩。德誠在潤州。嘗秉燭夜出。候者以告。義祖疑有變。徙江州。德誠猶慮讒聞。遣建勳入謁。義祖見之釋然。妻建勳以女。所謂廣德公主也。建勳家世將相。又娶于徐氏。爲其國貴游。然杜門不預世事。所與交皆寒賤。裘馬取具而已。烈祖鎮金陵。用爲副使。預禪代之策。拜中書侍郎。同平章事。加左僕射。監修國史。領滑州節度使。自開國至昇元五年。猶輔政。比他相最久。烈祖鑒吳之亡。由權在大臣。意頗忌之。而建勳無引退意。會建議政事當更張者。且言事大體重。不可自臣下出。請以中旨行之。烈祖雖從之。未有命也。建勳遽命舍人草制。給事中常夢錫劾奏。建勳擅造制書。歸怨于上。烈祖得奏。適會本意。乃降制放還私第。廣德宮主剛東有智。入謂烈祖曰。吾父亡急時。兄亦嘗求見與李耶書。今何見負。烈祖曰。此自國事。吾與李耶骨肉之情。固無間也。召見慰勉焉。未幾復相。元宗嗣立。以開國勳勞。又聯姻戚。尊遇之與宋齊丘埒。每謂爲史館而不名。聽朝之暇。多開延英殿。召公卿議當世事。人皆欣然望治。建勳獨謂所親曰。上寬仁大度。優於先帝。但性習未定。宜得方正之士。朝夕獻替。不然。恐未必能守先朝基業也。出爲撫州節度使。建州之役。諸將無復紀律。建勳請官出金帛贖俘掠。還其家。見聽。及出師平湖南。國人相賀。建勳獨以爲憂。曰。禍始於此矣。召拜司空。稱疾。乞骸骨。以司徒致仕。賜號鍾山公。營別墅於山中。放意泉石。或謂之曰。公未老。又無大疾。急遽爲此舉。欲復爲九華先生耶。建勳曰。吾平生笑宋公輕出處。何至效之。自知不壽。欲求數年閑適爾。疾革。遺令曰。時事如此。吾得全歸幸矣。勿封樹立碑。貽他日毀斷之禍。保大十年五月卒。贈太保。諡曰靖。及南唐亡。公卿塚墓。鮮不發者。惟建勳不知葬所。宋齊丘當國。深忌同列。少所推遜。然獨稱建勳曰。李相清談。不待潤色。自成文章。

論曰。李建勳非不智也。知湖南之師必敗。知其國且亡。皆如蒼龜。然其智獨施之一己。故生則保富貴。死猶能全其骸於地下。至立於羣枉間。一切無所可否。唯諾而已。視覆軍亡國。君父憂辱。若己無與者。方區區請出金帛以

贈俘虜真婦人之仁哉。

廖居素將樂人仕烈祖元宗之間。爲人堅正。不爲當國者所喜。困校書郎二十年。始得大理司直。後主嗣位。稍遷至瓊林光慶使。檢校太保判三司。後主孱昏。而羣臣方充位保富貴。國益削。居素獨慷慨諫。冀後主一悟。終不見聽。乃閉門却食。服朝衣冠立死井中。已而得手書大字于篋。筒曰。吾之死。不忍見國破也。徐鍇爲文弔之。以比屈原伍員。後幾百年。將樂父老猶叩頭稱之。盱江李覲爲之傳云。

卷十

張李皇甫江歐列傳第七

張義方。不知其所以進。烈祖代吳。用爲侍御史。義方既就職。卽上疏曰。古之任御史者。非止平獄訟。肅班列也。有怙威侮法。棄忠賊義。樹朋黨。蔽聰明者。得以糾彈。至於人主好遊畋。聲色說奢。侈佞媚賞。非功罰罪。得以論爭。使諸侯不敢亂法。百司不得盜權。則御史爲不失職。今文武材行之士。固不爲乏。而貪墨凌犯。傷風教。棄仁義者。猶采革心。臣欲奉陛下德音。先舉忠孝潔廉。請頒爵賞。然後繩糾乖戾。以正典刑。小則上疏論列。大則對仗彈奏。臣每痛國家之敗。非獨人君不明。蓋官卑者畏罪而不言。位尊者持祿而不諫。上下苟且。至于淪亡。今臣誠不忍忘君親之義。有所不盡。惟陛下幸赦之。疏奏。烈祖親札曰。孤始受禪。任義方以風憲。乃能力振朝綱。詞皆謙切。可宣示朝野。賜義方衣一襲。以旌直言。義方始名元達。烈祖方倚以肅正邪慝。取前朝王義方名以易之。故義方得盡忠焉。後之議者。謂義方爲御史。彈劾奸邪。諫正過失。則可。若請舉善。頒爵賞。則爲奪輔相權矣。然所言凜然守正。有漢唐名臣之風。惜其事跡散落。不得盡載云。

李金全。其先吐谷渾人。事唐明宗爲廝養。以戰功貴。專具五代史。晉高祖時。爲安州節度使。任中門使。胡漢榮。漢榮貪戾專政。失軍民心。高祖遣賈仁沼代。歸京師。金全奏。漢榮病不任行。仁沼至。酖殺之。事聞。高祖乃以馬全節代。金全鎮安州。漢榮懼。給告日。郎吏劉珂。密遣人馳報。朝廷召公有異處分。金全懼。使其從事張緯奉表詣金陵。請降。烈祖命鄂州屯營使李承裕段處恭。帥兵三千人。逆金全。陳于城外。俟金全出。殿之而東。承裕等至之夕。金

全帥數百人來奔。而承裕違命。輒大掠城中。得金帛不可計數。乃還。晉將安審禪追敗之于馬黃谷。處恭死於陣。承裕帥餘兵扼雲夢橋。復爲審禪所敗。執而殺之。金全至。拜天威統軍。出爲潤州節度使。漢隱帝時。李守貞以河中叛。來乞師。魏岑查文徽議。宜爲出師。劉彥貞以攻取自任。元宗欲籍金全宿將威望。以爲北面行營招討使。救河中。彥貞副之。文徽爲監軍使。岑爲沿淮巡檢使。師出沐陽。次沂州。金全曰。諸君以河中在何處。而欲自此轉戰以前耶。勢必不相及。徒爲國生事爾。嘗會食帳中。候騎告北兵數百並潤。皆羸弱。諸將欲掩擊之。金全下令曰。敢言過潤者斬。及暮。伏兵四起。旗幟蔽日。金鼓聲聞十餘里。諸將乃服。金全嘗料敵逾月。退保海州。遂引歸。金全曰。吾全軍而還。不得爲無功矣。拜右衛聖統軍。領義成軍節度使。兼侍中。保大八年八月。卒於金陵。年六十。多內寵。子男女凡三十二人。元宗命少府監王仲連持節冊贈中書令。諡曰順。金全卒後。閩楚之役興。用事者皆少年。不更軍旅。覆敗相踵。周人乘我罷弊。攻取淮南。國遂衰削。不復能振。人始思金全。恨其已卒云。

皇甫暉。魏州人。事唐晉。事具五代史。契丹入中原。暉時爲密州刺史。與棣州刺史王建俱來奔。元宗遣使具舟楫逆之。將至。暉念本起盜賊。不自安。至秦淮。赴水不死。舟人援出之。自言如履大石。入朝。歷歙州刺史。神衛軍都虞候。江州節度使。加同中書門下平章事。周師攻淮南。爲北面行營應援使。會劉彥貞。姚鳳兵以行。彥貞舉動躁撓。人測其必敗。暉獨持重。部分甚整。士亦樂爲用。周人頗憚之。及彥貞敗死。暉鳳退保清流關。周世宗親帥衆盡銳攻壽州。而分兵襲清流。暉陳山下。周兵出山後要擊。暉大敗。猶收兵且戰且行。入滁州。滁州刺史王紹顏已委城。遜暉無所歸。方斷橋自守。周兵涉水踰城而入。執暉鳳送壽州行在。見世宗曰。臣力憊。欲暫坐。及坐曰。欲暫臥。不俟命而臥。神色自若。曰。臣非不盡力國事。南北勇怯不敵。臣在晉屢與契丹戰。安能如今日大朝兵甲之盛。昨退保滁州城。不意大軍攀堞如飛而入。臣智力俱殫。故被擒耳。世宗賜之馬及衣帶。數日創甚。暉不肯治而死。子繼勳。

繼勳少從暉兵間。爲軍校。以父死難。擢將軍。歷池饒二府刺史。頗以吏事稱。入爲神衛統軍都指揮使。諸老將繼死。繼勳雖尙少。且無戰功。徒以家世。遂爲大將。資產優贍。名聞甲第。冠于金陵。多蓄聲妓。厚自奉養。及開寶中大兵傅城。繼勳保惜富貴。無効死之意。第欲後主亟降。聞諸軍敗績。則幸災見于詞色。偏裨有募死士。謀夜出奮擊。

者。輒鞭而囚之。自度罪惡日聞。稀復朝請。後主召議事。亦辭以軍務。不至。內結傳詔使。一切蔽塞。及後主登城。見王師旌旗壘柵。彌徧四郊。始大駭失色。繼勳從遷至宮。乃以屬吏始出宮門。軍士雲集。斃之。斯須皆盡。

江文蔚。字君章。建安人。博學工屬文。後唐明宗時擢第。爲河南府館驛巡官。坐秦王重榮事。奪官南奔。烈祖輔吳。用爲宣州觀察巡官。歷比部員外郎。知制誥。國初。改主客郎中。拜中書舍人。烈祖殂。元宗以喪亂之後。因恤舊典。散亡命。文蔚以給事中判太常卿事。與韓熙載。蕭儼共加討論。時稱其精練。保大初。遷御史中丞。持憲平直。無所阿枉。馮延巳當國。與弟延魯。魏岑。陳覺。竊弄威福。及伐閩敗績。詔斬覺。及延魯。以謝國人。而延巳岑置不問。文蔚對仗彈奏曰。賞罰者。帝王所重。賞以進君子。不自私恩。罰以退小人。不自私怒。陛下踐阼以來。所信重者。馮延巳。延魯。魏岑。陳覺。四人。皆擢自下僚。驟升高位。未嘗進一賢臣。成國家之美。陰狡圖權。引用羣小。陛下初臨大政。常夢錫居封駁之職。正言讜論。首罹譴逐。棄忠拒諫。此其始也。奸臣得計。欲擅威權。於是有保大二年正月八日。敕公卿庶僚。不得進見。履霜堅冰。言者恟恟。再降御札。方釋羣疑。御史張緯論事。忤傷權璉。其貶官。敕曰。罔思職分。傍有奏論。御史奏彈。尙爲越職。况非御史。孰敢正言。嚴續國之戚里。備位大臣。不附奸險。尙遭排斥。張義方上疏。僅免嚴刑。自是守正者得罪。朋邪者信用。上之視聽。惟在數人。雖曰接羣臣。終成孤立。陛下深思遠慮。始信終疑。復常夢錫宥密。擢蕭儼侍從。授張緯赤令。羣小疑懼。與酷吏司馬正彝。同惡相濟。迫脅忠臣。高越之于盧氏。義兼親故。受其寄託。痛其侵陵。訴於君父。乃敢蔽陛下聰明。枉法竄逐。羣凶勢力。可以回天。在外者握兵。居中者當國。師克在和。而三凶邀利。迭爲前卻。天生五材。國之利器。一旦爲小人忿爭妄動之具。使精銳者奔北。饋運者死亡。穀帛戈甲。委而資寇。取弱鄰邦。貽譏海內。同列之中。有敢議論。則馮魏毀之於中。正彝持之於外。構成罪狀。死而後已。今陳覺延魯。雖已伏辜。而魏岑猶在。本根未殄。枝幹復生。馮延巳善柔其色。才業無聞。憑恃舊恩。遂階任用。蔽惑天聰。斂怨歸上。高審知累朝宿將。墳土未乾。逐其子孫。奪其居第。使與臺竊議。將卒狐疑。陛下方以孝理天下。而延巳母封縣太君。妻爲國夫人。與弟異居。捨棄其母。作爲威福。專任愛憎。咫尺天威。敢行欺罔。以至綱紀大壞。刑賞失中。風雨由是不時。陰陽以之失序。傷風敗俗。蠹政害人。蝕日月之明。累乾坤之德。天生魏岑。道合延巳。蛇豕成性。專利無厭。逋逃歸國。鼠奸狐媚。讒疾君子。交結小人。善事延巳。遂當樞要。面欺人主。孩視親干。侍燕諂

譁。遠近驚駭。進俳優以取容。作淫巧以求寵。視國用如私財。奪君恩爲己惠。上下相蒙。道路以目。征討之柄。在岑
折簡。柝藏取與。繫岑一言。先帝卑宮勤儉。陛下守之勿失。而岑營建大第。廣役丁夫。孽子之居。過于內殿。亭觀之
後。踰于上林。前年建州勞還。文徽入覲。西苑會燕。捨爵策勳。岑披猖無禮。狂悖妄言。與延己用意多私。行恩不當。
俾軍士懷恨怒之志。受賞無感勵之心。將校爭功。誼動京邑。奸謀詭計。誑惑國朝。致漳州屠害使者。福州違拒朝
命。百姓肝腦塗地。國家柝藏空虛。福州之役。岑爲東南面應援使。而自焚營壁。縱兵入城。使窮寇堅心。大軍失勢。
軍法逗遛畏懦者斬。律云。主將守城。爲賊所攻。不固守而棄去。及守備不設。爲賊掩覆者皆斬。昨敕赦諸將。蓋以
軍威政令。各非己出。岑與覺延魯更相違戾。互肆威權。號令並行。理在無赦。烈祖孝高皇帝。櫛風沐雨。勤勞二紀。
成此慶基。付之陛下。比諸鄰邦。我爲強國。奈何賞罰大柄。肆奸宄之謀。軍國資儲。爲凶狡所散。昨天兵敗。統內
震驚。將雪宗廟之羞。宜醢奸臣之肉。已誅二罪。未塞羣情。盡去四凶。方祛衆怒。今民多饑饉。政未和平。東有伺隙
之鄰。北有霸強之國。市里訛言。遐邇危懼。陛下宜軫慮殷憂。誅鉅虺。延己不忠不孝。在法難原。魏岑同罪異誅。
觀聽疑惑。請行典法。以謝四方。文蔚將上疏。先具小舟。載老母。以待左降。元宗果怒。貶江州司士參軍。而覺延魯
以宋齊丘救解。復皆不死。延己雖黜。旋復柄用。方宣延己制。百官在廷。常夢錫大言曰。白麻雖佳。要不如江文
蔚疏耳。逾年召還。南唐建國以來。憲度草創。言事遇合。卽隨材進用。不復設禮部貢舉。至是始命文蔚以翰林學
士知舉。略用唐故事。放進士盧陵王克貞等三人及第。元宗問文蔚。卿知舉取士。孰與北朝。文蔚曰。北朝公薦私
謁相半。臣一以至公取才。元宗嘉歎。中書舍人張緯。後唐應順中及第。大銜其言。執政又皆不由科第進。相與排
沮。貢舉遂復罷矣。保大十年卒。年五十二。諡曰簡。

歐陽廣。吉州吉水人。保大中。詣闕上書曰。臣近遊潭州。伏見節度使邊鎬。偶逢聖代。初非將才。措置乖刺。大失人
心。致奉節兵乘夜呼噪。共焚譙門。會明而遁。不然。幾致大變。是仁不足惠下也。明陵近在肘腋。曾不爲虞。乃圖桂
林。以取奔敗。是智不足謀遠也。與監軍使昌延恭不相協和。動輒疑阻。是義不足和衆也。幕府無賢才。是禮不足
得士也。號令朝出夕改。是信不足使人也。五者無一長。考之前古。未或不敗。請擇帥濟師。以全境土。書入。不省。及
失湖南。元宗思廣言。命授以官。執政請召試。廣言非人主尊賢待士之意。不肯就試。乃授本縣令。亦辭不受而卒。

卷十一

馮孫廖彭列傳第八

馮延巳。字正中。一名延嗣。廣陵人。父令顏。事烈祖。至吏部尚書致仕。嘗爲歙州鹽鐵院判官。刺史滑言病篤。或言已死。人情頗詢詢。延巳年十四。入問疾。出以言命謝將吏。外賴以安。及長。以文雅稱。白衣見烈祖。起家授祕書郎。元宗以吳王爲元帥。用延巳掌書記。與陳覺善。因覺以附宋齊丘。同府位高者。悉以計出之。於是無居己右者。元宗亦頗悟其非端士。而不能去。延巳負其材藝。狎侮朝士。嘗誚孫忌曰。君有何所解而爲丞郎。忌憤然答曰。僕山東書生。鴻筆藻麗。十生不及君。詼諧歌酒。百生不及君。諂媚險詐。累劫不及君。然上所以寘君於王邸者。欲君以道義規益。非遣君爲聲色狗馬之友也。僕固無所解。君之所解者。適足以敗國家耳。延巳慚不得對。給事中常夢錫屢言延巳小人。不可使在王左右。烈祖感其言。將斥之。會晏駕。元宗立。延巳喜形於色。未聽政。屢入白事。元宗方哀慕。厭之。謂曰。書記自有常職。餘各有司存。何爲不憚煩也。乃少止。保大初。拜諫議大夫翰林學士。遷戶部侍郎。翰林學士承旨。又進中書侍郎。四年。同平章事。集賢殿大學士。罷爲太子少傅。頃之。拜撫州節度使。以母憂去鎮。起復冠軍大將軍。召爲太弟太保。領潞州節。俄以左僕射同平章事。延巳數居柄任。揣元宗不能察其奸。遂肆爲大言。謂己之才略。經營天下有餘。而人主躬覽庶務。大臣備位。安足致理。元宗果謂然。悉委以政。凡事奏可而已。延巳初以文藝進。實無他長。紀綱頹弛。吏胥用事。軍旅一切。以委邊帥。無所可否。愈欲以大言蓋衆。而惑人主。至譏笑烈祖戢兵。以爲齷齪無大略。嘗曰。安陸之後。喪兵數千。輟食咨嗟者旬日。此田舍翁。安能成天下事。今上暴師數萬於外。宴樂擊鞠。未嘗少輟。此真英雄主也。九年。湖南平。而朗州劉言叛。勢張甚。元宗亦知用兵之難。謂延巳與孫忌曰。湖湘之役。楚人求息肩。吾之出師。不得已耳。今若授劉言旄節。使和其民。吾亦得休養衡湘之民。國其庶幾乎。忌即欲奉行。延巳方以克楚爲功。乃曰。本朝出偏帥。平一國。守縣震動。今一旦三分棄其二。傷威敗重。非所以示天下。且諸將行奏功矣。持不下。又不欲緣軍與取資于國。以損其功。遣使于長沙。調兵賦。苛征暴斂。重失民心。言遂取長沙。盡據故楚地。周人亦伺釁而動。朝論籍籍。延巳力求去。而元宗待之如初。及周師大入。盡

失江北地。始罷延己，猶爲太子少傅。數月復相。會疾，改太子太傅。建隆元年五月乙丑卒。年五十八。諡忠肅。延己工詩，雖貴且老，不廢。如宮瓦數行曉日，龍旗百尺春風。識者謂有元和詞人氣格。尤喜爲樂府詞。元宗嘗因曲宴內殿，從容謂曰：吹皺一池春水，何干卿事？延己對曰：安得如陛下小樓吹徹玉笙寒之句？時喪敗不支，國幾亡。稽首稱臣於敵，奉其正朔。以苟歲月。而君臣相諶，乃如此。延己晚稍自厲爲平恕。蕭儼嘗廷斥其罪，及爲大理卿，斷軍使李甲妻獄，失入，坐死。議者皆以爲當死。延己獨揚言曰：儼爲正卿，誤殺一婦人，即當以死。君等今議殺正卿，他日孰任其責？乃建議儼素有直聲，今所坐已更赦宥，宜加弘貸。儼遂免。人士尤稱之。弟延魯。

延魯，字叔文，一名謚，少負才名。烈祖時，與兄延己俱事元帥府。元宗立，自禮部員外郎爲中書舍人，勤政殿學士。有江州觀察使杜昌業者，聞之，歎曰：封疆多難，薦御賢才，必以爵祿。延魯一言合指，遽寘高位，後有立大功者，當以何官賞之？然元宗愛其才，不以爲躐進。嘗內宴，出寶器貯龍腦數斤，賜羣臣。延魯曰：臣請効陳平均分之。比遍賜，猶餘其半。輒曰：敕賜錄事馮延魯，拜舞懷之。元宗爲躑笑而罷。保大中，師出平建州，以延魯爲監軍使。諸將欲乘勝遂取福州，樞密使陳覺欲自爲功，乃請銜命宣慰。召李弘義入朝，既見弘義，不敢發。還至劍州，矯詔起邊兵，命延魯將之。元宗雖怒覺之專，兵業已行，因命延魯爲南面監軍使。陳覺及王崇文、魏岑會攻福州，取其外郭。會吳越將余安援兵，自海道至白蝦浦，將捨舟而渚，淖不可行。方布竹簣登岸，我軍曹射之，簣不得施。延魯曰：弘義不降，恃此援耳。若麾我軍稍退，使吳越兵至半地，盡勦之，城立降矣。裨將孟堅爭曰：援兵已陷死地，將盡力與我戰，勝負殆未可知。延魯不聽。頃之，吳越兵至岸，鼓噪奮躍而前，與城中夾擊我。延魯敗走，俘馘五千人。孟堅戰死，諸軍遂大潰。死者萬計。委軍實，戎器數十萬，國帑爲之虛耗。延魯引佩刀自刺，人救之，不殊。朝廷議即軍中斬延魯及覺。既有命矣。會宋齊丘以嘗薦覺使福州自効，乃詔械延魯，還金陵。屬吏皆止流竄。延魯流舒州。會赦，復少府監。元宗擇廷臣爲巡撫使，分按諸州。延魯在焉。右拾遺徐錯上疏論其多罪無才，不足辱臨遣，不聽。使還，遷中書舍人。以工部侍郎出爲東都副留守。周師南侵，分兵下東都。延魯窘蹙自髡，衣僧服而逃。被執，世宗釋之，賜衣冠。授給事中。問江南事，占奏詳華，賜予加厚。留大梁累年。遷刑部侍郎，得還。拜戶部尚書。宋興，揚州節度使李重進叛，伏誅。元宗遣延魯朝于行在。太祖將乘兵鋒南渡，旌旗戈甲皆列江津。厲色詰延魯曰：爾國何爲敢通吾

叛臣延魯色不變。徐曰：陛下徒知其通謀，未知其事之詳也。重進之使館於臣家，國主令臣語之曰：大丈夫失意而反，世亦有之，但時不可耳。方宋受禪之初，人心未定，上黨作亂，大兵北征，君不以此時反，今內外無事，乃欲以數千烏合之衆，抗天下精兵，吾寧能相助乎？太祖初意，延魯必恐懼失次，及聞其言，乃大喜，因復問曰：諸將力請渡江，卿以爲何如？延魯曰：重進自謂雄傑，無與敵者，神武一臨，敢不旋踵。況小國，其能抗天威乎？然亦有可慮者。本國侍衛數萬，皆先主親兵，誓同死生，固無降理。大國亦損數萬人，乃可。況大江天塹，風濤無常，若攻城未下，饑道不繼，事亦可虞。太祖因大笑曰：朕本與卿戲耳，豈聽卿遊說哉？會捕重進叛卒，日戮數十人，延魯因奏事，言曰：叛者獨一重進乎？亦衆人乎？謂衆人，則陛下應天順人，烏有此理；獨一重進，則脅從者何罪？太祖感悟，後獲者皆貸不誅，厚賜遣延魯歸。南渡之師，由是亦輟。後主嗣位，延魯頗自伐，奉使之功，嘗宴內殿，後主親酌酒賜之，飲固不盡，誦詩及索琴自鼓以侑之。延魯猶自若，後主優容不責也。楚國公從善入朝，太祖授旌節，留之闕下，後主復遣延魯入謝，疾作，不能朝。太祖待之素厚，至是尤憐之，遣使挾太醫護視，詔放還金陵，卒於家。子僕，韓熙載知貢舉，放及第，覆試被黜，後與其弟侃，儀、侂，仇、伉，入宋，繼取名第。南唐公卿家莫能及者，仇仕至殿中丞，知福州。至道咸平間，歷典藩郡，以政績聞。延魯銳于仕進，然喜言高退事，嘗早朝集漏舍，歎曰：元宗賜賀監三百里鏡湖，非僕所敢望，得賜玄武湖，亦遂素意。徐鉉笑答曰：上於近臣，豈惜一玄武湖，恨無知章爾。延魯不能對。

孫忌，高密人，一名鳳，又名晟，少舉進士，始濟陽爲進士者，例修邊幅，尙名檢，忌豪舉跌宕，不能蹈繩墨，遂亡去。渡河，客趙魏間，唐莊宗建號，以豆盧革爲相，革雅知忌，辟爲判官，遷著作郎。明宗天成中，與高聲同事秦王從榮，從榮敗，忌亡命至正陽，未及渡，追騎奄至，亦疑其狀偉異，睨之，忌不顧，坐淮岸，捫弊衣，鬻蝨，追者乃捨去。渡淮，至壽春，節度使劉金得之，延與語，忌陽瘖不對，授館累日，忽謁漢淮南王安廟，金先使人伏神座下，悉聞其所禱，乃送詣金陵，時烈祖輔吳，四方豪傑多至，忌口吃，初與人接，不能道寒暄，坐定，辭辯鋒起，人多憎嫉之，而烈祖獨喜其文辭，使出教令，輒合指，遂預禪代祕計，每入見，必移時乃出，尤務謹密，人莫窺其際。烈祖受禪，歷中書舍人，翰林學士，中書侍郎。元宗立，齊王景遂排之出，爲舒州節度使，治軍嚴，有歸化卒二人，正晝挺白刃入府，求忌殺之，入自西門，吏士倉卒莫能禦，適忌間行在東門，聞亂，得民家馬乘之，奔桐城，叛卒不得忌，乃殺都押衙李建崇而逸。

忌坐貶光祿卿。元宗素重之，不以爲罪。累遷右僕射，與焉延己並相。每鄴延己侮誚之，卒先罷。保大十四年，周師侵淮南，圍壽州。分兵破滁州，擒皇甫暉。江左大震，以忌爲司空，使周奉表，請爲外臣。忌見延己曰：「此行當屬公。然忌若辭，則是負先帝也。」旣行，知不免。中夜歎息，語其副禮部尚書王崇質曰：「吾思之熟矣，終不忍負永陵一坏土。」周世宗以樓車載忌于壽州城下，使招仁瞻。仁瞻望見忌，戎服拜城上，忍遙語之曰：「君受國恩，不可開門納寇。世宗詰之，忌謝曰：『臣爲唐大臣，豈可教節度使外叛？於是遣王崇質歸，而留忌。會暑，兩班師，忌亦從至大梁。館都亭驛，遇入閣，使班東省官後，屢召見，飲以醇酒，問江南事。忌但言寡君實北面無二心。周將張永德與李重進不相能，傷言重進且反，唐人聞之，以爲有間，可乘。遣蠟丸書招重進，重進表其書於世宗，皆斥瀆反間之言。世宗遂發怒，時鍾謨亦奉使在館，俱召見責讓。忌正色請死，無撓辭。又問江左虛實，終不肯對。比出，命都承旨曹翰護至右軍巡院，猶飲之酒，數酌，翰起曰：『相公得罪，賜自盡，忌怡然，整衣索笏，東南望，再拜曰：『臣受恩深，謹以死謝。從者二百人，亦皆誅死於東相國寺。世宗性暴急，莫敢救者。忌已死，乃始追悔。元宗聞之流涕，贈太傅，追封魯國公，諡文忠，厚恤其家，擢其子爲祠部郎中，賜名魯嗣。』

論曰：南唐之衰，劉仁瞻死於封疆，孫忌死于奉使，皆天下偉丈夫事。雖敵讎不敢議也。區區江淮之地，有國僅四十年，覆亡不暇，而後世追考，猶爲國有人焉。蓋自烈祖以來，傾心下士，士之避亂失職者，以唐爲歸。烈祖於宋齊丘，字之而不敢名。齊丘一語不合，則挈衣笥，望秦淮門欲去，追謝之乃已。元宗接羣臣如布衣交，間御小殿，以燕服見學士，必先遣中使謝曰：「小疾不能着幘，欲冠帽，可乎？」於虛是誠足以得士矣。苟含血氣名人類者，烏得不以死報之耶？傳曰：君之視臣如手足，則臣視君如腹心，詎不信夫。

廖偃，彭師暉，皆楚馬殷之臣。偃，虔州虔化人，祖爽，父匡圖，仕皆至刺史。偃少倜儻，喜奇節，通左氏春秋，班固漢書。馬殷有國，自祕書郎爲裨將，戍衡山縣。殷子希萼與弟希崇爭國，希萼敗見執，師暉不知其世家，自殷時爲將，與希萼有舊怨，希崇避殺兄名，於是命師暉幽希萼於衡山，使甘心焉。師暉歎曰：「留後欲使我弑君耶？吾豈爲是哉。」至衡山，偃在焉，相與護視希萼甚謹，未嘗失人臣禮。希崇意不快，復遣召希萼歸長沙，終欲加害。偃擇勇士百人，執兵衛希萼，晝夜擊柝，以警非常，遂築行府，與師暉奉希萼爲衡山王，請命于金陵。元宗爲出師定楚亂，希萼遂

入朝。偃師曷俱從行。而偃爲部暑輜重指揮使。尤勤瘁。希萼流涕曰。吾逐於逆豎。非偃盡忠。豈能免禍。至金陵。元宗召見兩人。歎獎之。授偃左殿直軍使。萊州刺史。師曷殿直都虞候。而使偃守道州。以備南漢。會朗州叛。潭州亦潰。偃所部多潭人。中夜作亂。偃率親卒力戰。不能支。極罵而死。元宗下制哀悼。贈右領衛大將軍。寧州刺史。諡曰節。而師曷不見用。卒於金陵。後主時徐鉉爲史官。有豐城令劉虛已。移書明偃大節云。

論曰。史之失傳者多矣。廖偃彭師曷之事。可謂盡忠所事者。而五代史則以爲馬希崇遣師曷偃囚希萼。而師曷奉希萼爲衡山王。是偃亦同受囚希萼之指。而師曷獨能全之也。江表志。則以爲師曷且從希崇害希萼。偃百計誘諭而寢其謀。及衛希萼也。師曷之計乃無所施。是師曷實欲害希萼。獨賴偃以全耳。嗚呼。何其異也。惟十國紀年言兩人者俱有功。差可考信。故多采之。大抵忠于故君。兩人實同。而偃功爲多。不可誣也。張巡許遠之事。著若日星。兩家子弟。猶有異論。况偃師曷耶。

卷十一

孟陳韓朱列傳第九

孟堅始事建州王延政爲將。保大初。查文徽討王氏之亂。堅來降。文徽即以兵付之。出奇鏖擊有功。及馮延魯之攻福州也。堅亦在兵間。吳越援兵自海道至。阻淖不得登岸。延魯不知兵。急於破敵。欲斂兵誘而蹙之。堅諫曰。吳越兵進退俱不能。方致死於我。使得至平地。未見可勝也。延魯大言曰。吾自擊之。無預君事。吳越兵得平地。果不可制。李弘義兵自城中出。盡銳交擊。延魯大敗。棄軍逐。堅力戰以死。延魯雖貶。而其黨方盛。故堅之死事不見錄。國人哀之。

陳誨。建州人。生數月。趨健能馳走。其父異之。名之曰阿鐵。長。事王延政爲將。唐師攻建州。傳其城。誨數出挑戰。先鋒橋道使王建封克外郭。擒誨。將斬之。已解衣伏鑕。忽脫身絕馳。追者數十百輩。莫能及。自歸大將查文徽。文徽駭異。用爲戰棹指揮使。領故部曲。從攻福州。馮延魯敗走。諸營皆潰。死者萬計。委軍實。戎器不可勝計。誨獨殿後。收所棄金帛二十萬以歸。文徽鎮建州。誨爲劍州刺史。諜者告吳越戍兵棄福州。逐。文徽暗而貪功。即率誨俱進。

誨以戰繼入閩江。適春雨。江水暴漲。一夕七百里。抵城下。擊敗福州兵。獲其將馬先進。葉仁安。鄭彥華。始知福州未嘗有變。誨親故多在城中。方遣間使招之。文徽勒步騎亦至。福州來迎。文徽傳令入城。誨以所聞告。且曰。僕閩人也。豈不能料閩人之情。宜先立寨整衆。俟所招親故來。得其實。徐圖之。文徽曰。狐疑且生變。乘機據城。上策也。遂入。誨知其必敗。植旗鳴鼓。列兵江干以須之。文徽果敗。被執。誨全軍還劍州。獻馬先進於金陵。用鄭彥華爲將。唐兵兩取福州。皆大敗塗地。誨在兵間皆有功。號名將。遂爲建州節度使。兼侍中。訓兵積穀。隱然爲大鎮。嘗破福州兵于南臺江。聲大震。由是朝廷委以南方事。而名其軍曰忠義。及周兵入淮南。誨遣子德誠率鎮兵赴難。諸將多敗。惟德誠頗有戰功。拜和州刺史。建隆三年六月。誨引病求罷。朝論難其代。乃以弟劍州刺史謙爲留後。召誨還都。後主親臨視。七月卒。諡忠烈。閩之亂。士民幾殲焉。惟誨之宗族益盛。謙與德誠。後亦繼領建州旄節。諸子悉至顯官。

韓熙載。字叔言。北海人。少隱嵩山。唐同光中。擢進士第。父光嗣。平盧節度副使。軍中逐其帥符習。推光嗣爲留後。明宗即位。討亂。光嗣坐死。熙載來奔。時烈祖輔吳。方修明法令。熙載年少放蕩。不守名檢。補和常。滁三州從事。時人士自中原至者。多已擢用。熙載在京洛。早負才名。乃獨落魄不偶。亦不以介意。烈祖受禪。召爲祕書郎。使事元宗於東宮。諭之曰。以卿早奮名場。疎雋未更事。故使歷州縣之勞。今用卿矣。宜善自修飭。輔吾兒也。熙載亦不謝。在東宮。談燕而已。不嬰世務。元宗即位。拜虞部員外郎。史館修撰。兼太常博士。乃慨然曰。先帝知我而不顯用。是以我爲慕容紹宗也。始數言朝廷事。所當施行者。展盡無所回隱。宋齊丘。馮延巳等皆側目。元宗怒。獨嘉之。命禮部知制誥。書命典雅。有元之和風。與徐鉉。齊名。時號韓徐。契丹入汴。晉少帝北遷。熙載上疏曰。陛下有經營天下之志。今其時矣。若戎主遁歸。中原有主。則不可圖矣。不省。陳覺。馮延魯。福州喪師。初議寘軍法。齊丘爲之請。止削官。遷外郡。熙載上疏請無赦。又數言齊丘黨與。必基禍亂。熙載不能飲酒。齊丘誣以酒狂。貶和州司士參軍。徙宣州。節度推官。復入爲虞部郎中。史館修撰。遷中書舍人。周太祖有天下。用事者猶議北伐。熙載曰。北伐。吾本意也。但今已不可耳。郭氏奸雄。曹馬之流。雖有國日淺。守境已固。我兵妄動。豈止無功耶。言雖切。而朝廷闕於機會。經營中原之意終不已。周人果以藉口。兵入淮南。齊王景達以兵馬元帥臨邊。陳覺爲監軍使。熙載言。出師大事也。當

先正名。莫信於親王。莫重於元帥。安用監軍使哉。亦不從。熙載才氣逸發。多藝能。善談笑。爲當時風流之冠。尤長於碑碣。他國人不遠數千里。輦金幣求之。然性忽細謹。老而益甚。蓄妓四十輩。縱其出。與客雜居。物議閎然。熙載密語所親曰。吾爲此以自污。避入相爾。老矣。不能爲千古笑。端坐託疾不朝。貶右庶子。分司南都。熙載盡斥諸妓。後主喜。留爲秘書監。俄復故官。欲遂大用之。而去妓悉還。後主歎曰。孤亦無如之何矣。宿直宮中。賜對多所弘益。後主手教褒之。進中書侍郎。卒年六十九。後主謂侍臣曰。吾竟不得相熙載。欲贈平章事。古有是。或對曰。晉劉穆之贈開府儀同三司。卽故事也。乃贈右僕射同平章事。廢朝三日。諡文靖。命葬梅嶺岡。謝安故墓側。著格言。及後述三卷。擬議集十五卷。定居集二卷。初熙載嘗使周。及歸。元宗歷問周之將相。熙載曰。趙點檢。顧視非常。殆難測也。及太祖受禪。人服其識。

朱元。潁州沈丘人。本姓舒。少倜儻。通左氏春秋。與楊訥同爲河中李守貞客。守貞叛。俱來乞兵。楊訥者。李平也。語在平傳。元旣留事南唐。以駕部員外郎待詔文理院。數上書論事。言今幸中原多故。苟支歲月。非所以爲國。當取湖湘閩越錢塘。以固基本。且請專任軍旅。以次討定。用事者嫉其言。共譖之。以爲遠人謀握兵。包藏莫測。遂罷待詔。元失意。縱酒不事事。朝廷亦優容之。保大末。周師入淮南。元請對言兵事。元宗大悅。命從齊王景達救壽州。元善撫士卒。與之同甘苦。每臨戰誓衆。詞指慷慨。流涕被面。聞者皆有効死赴敵之意。破舒和二州。以功加淮南西北面行營應援都監。與邊鎬許文績柵紫金山。軍聲頗振。益柵且及壽州。元恃功。時或違景達節制。監軍使陳覺與元素有隙。且嫉其能。屢表元本學縱橫。不可信。不宜付以兵柄。元宗乃命楊守忠代之。守忠至元帥府。景達檄元計事。元憤怒欲自殺。其客宋均曰。丈夫何往不可。乃爲妻子死耶。遂舉寨萬餘人降周。由是諸軍皆潰。邊鎬許文績。楊守忠。皆被擒。壽州不守。遂畫江請盟矣。元在江南。娶查氏文徽女。至是伏誅。文徽累表乞貸死。不從。以珠柩覆尸於市哭之。隕絕。觀者皆爲垂泣。元歸周。復姓舒。世宗愛其驍果。以爲蔡州團練使。其母猶在沈丘。遂迎養焉。太祖受禪。遷汀州防禦使。太平興國初卒。

論曰。亡國之君。必先壞其紀綱。而後其國從焉。方是時。疆場之臣。非皆不才也。敗於敵。未必誅。一有成功。讒先殺之。故強者玩寇。弱者降敵。自古非一世也。南唐如陳覺。馮延魯。查文徽。邊鎬輩。喪敗塗地。未嘗少正典刑。朱元取

兩州於周兵將遽之時。固未爲舊功。而陳覺已不能容。此元之所以降也。元降。諸將束手無策。相與爲俘纍以去。而唐遂失淮南。臣事于周。雖未卽亡。而亡形成矣。欲知南唐之亡者。當於是觀之。

卷十二

劉潛李嚴張翼列傳第十

劉仁瞻。字守惠。淮陰洪澤人。父金。事吳武王。有戰功。至濠州團練使。長子仁規。娶武王女。貴於其國。嘗爲清淮軍節度使。仁瞻略通儒術。好兵書。有名於國中。事烈祖。歷黃袁二州刺史。入爲龍衛軍都虞候。拜鄂州節度使。元宗伐楚。仁瞻帥州師克巴陵。撫納降附。甚得人心。保大中。湖湘戍兵潰歸。復失故楚地。上書者多謂周人有南侵之謀。淮上石偶人言。元宗聞而惡之。斷其首。自六月至冬不雨。長淮可涉。民流入周邊城。遮殺之。不能禁。唐亦與屯田。修邊備。以壽州最爲要地。十三年。徙仁瞻爲清淮軍節度使。自楊氏有吳。歲暮淮涸。輒增戍以備侵軼。謂之把淺。監軍吳廷紹。以爲無事。徒費糧糗。罷之。仁瞻表陳不可罷。未及行。周已遣將李穀。王彥超。韓令坤等。帥師大入。詔書暴我納李金全。援李守貞。慕容彥超。結契丹太原之罪。報至。上下失色。仁瞻獨部分號令。宴勞吏士。閒暇如平時。十一月。出兵破城南大柵。殺周兵數千人。元宗遣神武統軍劉彥貞將三萬人救壽州。十四年正月。彥貞至來遠鎮。距壽州二百里。軍容甚盛。李穀燒營夜遁。保正陽。彥貞率戰艦數百艘。泝淮而上。仁瞻曰。敵已畏君矣。當持重。養盛以俟。聞若遽求戰而不能勝。則大事去矣。彥貞不從。仁瞻曰。周人遽。必設伏。遇之。將敗績。乃率勵其下。益兵固守。彥貞果大敗。沒於陣。伏尸三十餘里。亡戈甲三十萬。周世宗自將攻城。屯於城西北淝水之陽。徵宋亳陳潁許秦徐宿州丁夫數十萬。備攻城雲梯洞屋。下臨城中。數道同時進攻。填塹陷壁。晝夜不少休。如是者累月。每鼓角四發。聲震牆壁。皆動。我援兵在外者。見利輒進。常陷伏中。以故屢敗而終不悟。仁瞻雖知外援之敗。意氣益壯。胡世宗在城下。據胡牀督攻城。仁瞻素善射。自引弓射之。箭去胡牀數步。輒墮。世宗命進胡牀於箭墮處。後箭復遠數步而墮。仁瞻知之。投弓於地曰。若天果不佑唐耶。吾有死於城下耳。終不失節。於是世宗遣中使來諭曰。知卿忠義。然士民何罪。又親駕臨城招之。皆不從。自正月至四月不可下。世宗還京師。楊泰齡和舒斲諸州。皆

復爲唐守。渦口定遠周兵戍守者。亦皆爲我師襲破。江左幾復振。而壽州之圍獨不解。元宗遣元帥齊王景達。以兵數萬來援。分重兵據紫金山。列寨十餘處。與城中傳烽相應。築甬道抵城。通餽餉。六月。仁贍出兵。殺周兵數百。焚攻城洞屋甚衆。周將李重進等兵力頗屈。仁贍因請乘世宗之歸。以邊鎬守城。自出決戰。景達畏懦。又方任陳覺。固不許。仁贍憤鬱得疾。少子崇諫。夜泛小舟渡淮。謀紓家禍。爲軍校所執。仁贍命腰斬之。監軍使文德殿使周廷構哭於中門。又求救於仁贍妻薛氏。薛氏曰。崇諫幼子。固所不忍。然貸其死。則劉氏爲不忠之門。促命斬之。然後成喪。聞者皆爲出涕。十五年二月。世宗復親征。屢戰皆克。唐軍被俘誠者四萬人。餘衆不能復整。朱元。朱仁裕。孫璠。皆降周。仁贍聞之。扼吭憤歎。世宗知壽州且下。心獨嘉仁贍之忠。恐城破殺之。乃下詔諭使自擇禍福。三月甲辰。又耀兵城北。而仁贍已困篤。不知人。監軍周廷構。營田副使孫羽等。爲仁贍表請降。戊申。世宗次城北。受之。昇仁贍至幄前。撫勞嘉歎。拜天平軍節度使。兼中書令。命還城養疾。辛亥。晝晦。雨黃沙如霧。世宗在下蔡。疑有變。馳騎覘之。乃仁贍卒。年五十八。州人皆哭。偏裨及士卒。自剄以殉者數十人。世宗遣使弔祭。追封彭城郡王。錄其子崇讚爲懷州刺史。賜莊宅各一區。元宗聞仁贍死。哭之慟。贈太師中書令。謚忠肅。嘆曰。仁贍有知。其肯捨我而受周命耶。是夕。夢仁贍若拜謝庭中。加封衛王。後主立。進封越王。開寶中。仁贍子崇諒爲進奉使。太祖嘉其忠臣之後。特命爲都官郎中。仁贍至今廟食壽春不絕。

論曰。政和中。先君會稽公爲淮西常平使者。實請於朝。例仁贍於典祀。且名其廟曰忠顯。後又嘗寓家壽春。方世宗攻下壽州。廢爲壽春縣。而徙壽州於下蔡。故壽春父老。喜言仁贍死時事。言其夫人不食五日而卒。今傳記所不載。廟在邑中。歲時奉祀甚盛。乾道淳熙之間。予遊蜀。在成都見梓潼令金君所藏周世宗除仁贍天平軍節度使告身。白紙書。墨色印文皆如新。金君言。仁贍獨一裔孫。賣藥新安市。客死無後。故得之。其詞與王溥所修周世宗實錄皆合。若歐陽氏五代史所稱。盡忠所事。抗節無虧。前代名臣。幾人可比。予之南伐。得汝爲多。蓋摘取制中語載之。本不相聯屬。又頗有潤色也。以仁贍之忠。天報之宜如何。而其後於今遂絕。天理之難知如此。可悲也。夫潘佑。幽州人。祖貴。事劉仁恭爲將。守光殺之。父處常。脫身南奔。事烈祖爲散騎常侍。佑生而狷潔。閉門苦學。不交人事。文章議論。見推流輩。陳喬輩薦於元宗。起家秘書省正字。後主在東宮。開崇文館。以招賢。佑預其間。及嗣位。

遷虞部員外郎。史館修撰。議納后禮。援據精博。遷知制誥。召草勸南漢書。文不加點。遷中書舍人。後主以潘卿稱之。酷喜老莊之言。嘗作文曰。莊周有言。得者時也。失者順也。安時處順。則哀樂不能入也。僕佩斯言久矣。夫得者如人之有生。自一歲至百歲。自少得壯。自壯得老。歲運之來。不可卻也。此所謂得之者時也。失之者亦如一歲至百歲。暮則失早。今則失昔。壯則失少。老則失壯。行年之去。不可留也。此所謂失之者順也。凡天下之事。皆然也。達者知我無奈何。物亦無奈何也。其視天下之事。如奔車之歷蟻蛭也。值之非得也。去之非失也。燕之南。越之北。日月所生。是爲中國。其間含齒戴髮。食粟衣帛者。是爲人。剛柔動植。林林而無窮者。是爲物。以聲相命。是爲名。倍物相聚。是爲利。彙首而芸芸。是爲事。事往而記於心。爲喜。爲悲。爲怨。爲恩。其名雖衆。實一心之變也。始則無物。終復何有。而於是強分彼我。彼謂我爲彼。我亦謂彼爲彼。彼自謂爲我。我亦自謂爲我。終不知孰爲彼耶。孰爲我耶。而世方狗欲嗜利。繫心於物。局促若轅下駒。安得如列禦寇莊周者。焚天下之轅。釋天下之駒。浩浩乎復歸於無物歟。此吾平昔所言也。足下之行。書以贈別。開寶五年。更官名。改內史舍人。初與張洎親厚。及俱在西省。所趨既異。情好頓衰。每歎曰。堂堂乎張也。難與並爲仁矣。時南唐日衰削。用事者充位無所爲。佑憤切上疏。極論時政。歷詆大臣將相。詞甚激訐。後主雖數賜手札嘉歎。終無所施用。佑七疏不止。且請歸田廬。乃命佑專修國史。悉罷他職。而佑復上疏曰。三軍可奪帥也。匹夫不可奪志也。臣乃者。繼上表章。凡數萬言。詞窮理盡。忠邪洞分。陛下力蔽姦邪。曲容諂僞。遂使家國悖悖。如日將暮。古有桀紂孫皓者。破國亡家。自己而作。尙爲千古所笑。今陛下取則姦回。敗亂國家。不及桀紂孫皓遠矣。臣終不能與姦臣雜處。事亡國之主。陛下必以臣爲罪。則請賜誅戮。以謝中外。詞既過切。張洎從而擠之。後主遂發怒。以潘佑素與李平善。意佑之狂直。多平激之。而平又以建白造民籍。爲所排。乃先收平屬吏。併使收佑。佑聞命自剄。年三十六。徙其家饒州。處士劉洞賦詩弔之。國中人人傳誦。爲泣下。及王師南征。下詔數後主殺忠臣。蓋謂佑也。子華仕宋。至屯田員外郎。以疾致仕。景德中。真宗皇帝憐佑之忠。起華於家。授故官。

論曰。佑學老莊。齊死生。輕富貴。故其上疏。縱言詆訐。若惟恐不得死者。雖激於一時忠憤。亦少過矣。後主非強懷雄猜之君。而陷之於殺諫臣。使佑學聖人之道。知事君之義。豈至是哉。不幸旣死。同時諸臣。已默默爲降虜矣。猶

醜正嫉言。視之如仇。誣以狂愚惑孀淫祀左道之罪。至斥爲人妖。雖後之良史。有不能盡察其說者。於戲悲夫。李平。本姓名曰楊訥。少爲嵩山道士。與汝陰布衣舒元共學。數年業成。同游蒲中。客於節度使李守貞。守貞叛漢。使兩人懷表間行。乞師於金陵。元宗爲出師數萬。爲之聲援。甫出境而守貞叛。兩人無所復命。且唐遇之厚。因留事唐。而訥始自稱李平。元亦易姓朱。元宗皆以爲尙書郎。吳越侵常州。欲以平爲將。固辭。遷衛尉少卿。周兵取蘄州。不能有。復棄而歸。乃以平爲刺史。朱元叛。元宗以平本與元同歸唐。慮其不自安。召還金陵。使者失指。械平以歸。元宗大驚。慰勉之。拜建州節度使。召爲衛尉卿。潘佑好老莊。平少爲道士。習其說。因相與遊。平請復井田法。造民籍。復造牛籍。課民種桑。後主本好古務農。甚悅其言。使判司農寺。平急於成功。施設無漸。人不以爲便。後主亦中悔。罷之。而佑歷詆一時公卿。獨稱薦平。請以判司會府。羣議益不平。會佑以直諫得罪。因坐以與平淫祀鬼神事。繫乎大理獄。縊死獄中。

嚴續。字興宗。馮翊人。祖實。仕故唐爲江淮水陸轉運判官。徙家廣陵。父可求。爲吳武王謀臣。及景王宣王嗣立。又皆有功。宣王建國。可求爲尙書左僕射同平章事。大和二年卒。續十餘歲。以父蔭補千牛備身。遷祕書郎。尙烈祖女。生長富貴。而性恭謹。歷兵部侍郎尙書左丞。元宗卽位。進禮部尙書中書侍郎。出牧池州。復拜中書侍郎。兼三司使。又出爲江州節度使。數年。復入知尙書省。遂爲門下侍郎同平章事。初續之未出池州也。宋齊丘專國。公卿多附之。惟續持正不爲屈。翰林學士常夢錫。嘗指言齊丘過咎。元宗語之曰。大臣惟嚴續能自立。然才短恐不能勝其黨。卿宜助之。夢錫退。諭指於續。續因與夢錫親厚。然不能盡用其言也。卒爲黨人所排。與夢錫俱補外。及爲相。雖自以肺附盡忠不貳。然寡學識。聽用多非其人。不能稱職。或作螃蟹賦以譏切之。是時以軍興。百司政事。往往歸樞密院。續言多不見用。求罷。拜鎮海軍節度使。屬疾還都。已革。猶不亂。與客言論如平時。後主使內夫人問之。歷陳羣臣邪正。某當進。某當退。辭氣慷慨。不及其私。翼日卒。年五十七。諡曰懿。初續以不學見輕。同列遂力教子弟。諸子及孫。舉進士者十餘人。

張易。字簡能。魏州元城人。高祖萬福。故唐金吾將軍。後徙萊州掖縣。易性豪舉尙氣。少讀書於長白山。又徙王屋及嵩山。苦學自勵。食無鹽酪者五歲。齊有高士王達靈。居海上。博學精識。少許可。易從之遊。數年。入洛。舉進士。不

中以昇元二年南歸。授校書郎大理評事。時方重赤縣。拜上元令。元宗立。以水部員外郎通判歙州。刺史朱匡業平居甚謹。然醉則使酒陵人。果於誅殺。無敢犯者。易至。赴其寔。先已飲醉。就席。酒甫一再行。擲杯推案。攘袂大呼。詬責鋒起。匡業尙醒。愕然不敢對。惟曰。通判醉甚。不可當也。易巍峨暗鳴自若。俄引去。匡業使吏掖就馬。自是見易加敬。不敢復使酒。郡事亦賴以濟。太弟景遂初立。高選官僚。召爲贊善大夫。景遂召飲。以玉杯行酒。因與坐客傳玩。至易。忽大言曰。殿下有重寶。輕士之意何耶。抵於柱礎碎之。坐皆失色。其他規正皆類此。景遂不爲忤。待易益厚。遷刑部郎中。判大理寺。周人南侵。時江淮久安。人不知戰。我師屢北。上下震恐。易獨揚言朝路曰。國家被山帶海。守奕世之業。昔者夫差以無道之兵。威陵齊晉。孫權以草創之國。勢逼曹劉。今若上下併力。敵何足畏哉。元宗聞而異之。召使宿直禁中。議事。然亦不能用也。陳覺李徵古方用事。朝野側目。易一日朝退。歎曰。吾忝廷尉。職誅邪擊。當手斃二豎。以謝曠官。俄以吳越犯邊。出爲宣歙招諭使。判宣州。前刺史方築州。城役徒數萬。一切罷遣之。曰。自守者弱。遠圖者強。何以城爲。吳越聞之。懾服。不敢復犯。後主封吳王。召易爲吳王司馬。東宮建。又爲左庶子。後主即位。遷右諫議大夫。復判大理寺。尋乞解大理。改勤政殿學士。判御史臺。采武德至寶曆君臣問對。及臣下論奏骨鯁者七十事。爲七卷。曰諫奏集。上之。註太玄。未成。卒。年六十一。

翼慎儀。後主時爲給事中。開寶三年。高祖欲封南漢。未決。詔後主諭劉鋹。令奉正朔。後主乃遣慎儀持書使南漢。書曰。僕與足下。叨累世之盟。雖疆畿阻闊。休戚實同。敢奉尺書。敬布腹心。昨大朝伐楚。足下疆吏弗靖。遂成釁隙。初爲足下危之。今弊邑使臣入貢。皇帝幸以此宣示曰。彼若能幡然改圖。單車之使造廷。則百萬之師不復出矣。不然。將有不得已者。僕料大朝之心。非貪土地也。怒人不寘而已。且古之用武。不計強弱小大。而必戰者有四。父母宗廟之讎。一也。彼此烏合。民無定心。二也。敵人進不捨我。退無守路。戰亦亡。退亦亡。三也。彼有敗亡之勢。我乘進取之機。四也。今足下與大朝。無是四者。而坐受天下之兵。決一旦之命。有國家利社稷者。固如是乎。夫疆則南面而王。弱則玉帛事大。屈伸在我。何常之有。違天不祥。好戰危事。天方相楚。尙未可爭。而況今日之事耶。地莫險於劍閣。而蜀亡矣。兵莫強於上黨。而李筠失守矣。竊意足下國中。必有矜智好謀之臣。獻尊主強國之策。以謂五嶺之險。非可遽前。堅壁清野。絕其饋道。依山阻水。射以強弩。彼雖百萬之兵。安能成功。不幸而敗。則輕舟浮海。猶

足自全。豈能以萬乘之主。而屈於人哉。此說士之常談。可言而不可用。異時王師南伐。水陸並舉。百道俱進。豈暇俱絕其饜道。盡保其壁壘。或用吳越舟師。自泉州航海。不數日。至足下國都矣。人情恟恟。則舟中皆爲敵國。忠義效死之士。未易可見。雖有巨海。孰與足下俱行乎。敢布腹心。惟與大臣熟計之。史館修撰潘佑之辭也。銀得書怒。囚慎儀不遣。後主表聞。太祖遂決興師。南漢平。乃得歸。後主之亡也。慎儀爲徽州刺史。會昭武留後盧絳聞國破。提兵自宣州欲入福建。過歙。慎儀閉城拒守。絳怒曰。慎儀吾故人。何爲見拒。遣裨將馬雄攻之。慎儀朝服而出。爲雄所害。

卷十四

郭張林盧蒯二陳列傳第十一

郭廷謂。字信臣。彭城人。父全義。仕爲濠州觀察使。廷謂幼好學。善書札騎射。補殿前承旨。出爲濠州中門使。全義卒。擢莊宅使。即爲州監軍。周侵淮南。廷謂與州將黃仁謹約以死守。籍州民不逞者。聚於僧寺。嚴兵守之。日給食。隨所能。使造守具。故周師終不知城中虛實。久不可下。元宗歎其忠。因大發戰糧。命與林仁肇援壽州。周世宗聞之。徙下蔡浮橋於渦口。築壘夾淮東西以護橋。扼濠壽之衝。暑雨淮漲。廷謂掩不備。輕舟泝流。急趨渦口。將麾兵斷竿。周人覘知。設伏待之。廷謂將至。揣得其情。駐軍不進。襲敗周將武行德。周務勅於定遠。斬首數百。行德挺身。逐卒焚浮橋。周兵死者不可計。遂盡焚軍資。取良馬數百。進武功殿使。就遷州刺史。猶以爲賞薄。又遷團練使。兼上淮水陸應援使。及紫金山戰。唐將帥多降於周。廷謂獨還軍守濠州。治壁壘。繕戈甲。爲守備。世宗復南征。廷謂表金陵請援。且言周師日張。願卑辭請和。以俟機會。夜出敢死士千餘。襲破周營。焚雲梯洞屋。周人大驚。相蹂踐。死者甚衆。然援師不至。世宗親攻城。焚戰艦數百艘。殺二千人。進攻羊馬城。又殺數百人。遣諜持詔諭降。廷謂廷謂度不能支。奉表於周。懇言世受本國爵命。家在江南。欲遣使稟命國主。世宗許之。爲緩攻。及廷謂使還。知金陵卒不能救。集將士於壘門。南嚮慟哭再拜。乃降。世宗見廷謂。賜宴勞之。曰。兵興以來。江南敗亡相踵。惟卿能犯渦口浮橋。破定遠寨。足報國矣。濠州小城。使汝主自守。豈能固哉。賜襲衣金帶良馬。及器皿萬餘。拜亳州防禦使。以

其弟廷讚爲和州刺史。因命帥濠州兵東攻天長。下之。遷樓櫓戰權左右廂都監。入朝。官至靜江軍節度。觀察留後。知梓州。代歸。賜第東都。卒年五十四。廷謂事母孝。朝夕束帶立侍。寒暑不變。爲政亦有惠愛。方廷謂降周時。令其錄事參軍鄒陽李延鄒草降表。延鄒責以忠義。不爲具草。廷謂憐其言。然業已降。必欲得表。以兵脅之。延鄒投筆曰。大丈夫終不負國。爲叛臣作降表。遂遇害。元宗聞之。召見延鄒子。命以官。

張彥卿。史失其鄉里世家。保大末。周世宗南侵。彥卿爲楚州防禦使。周師銳甚。旬日間。海泰州靜海軍皆破。元宗亦命焚東都官寺民廬。徙其民渡江。世宗親御旗鼓攻楚州。自城以外皆已下。發州民濬老鶴河。遣齊雲戰艦數百。自淮入江。勢如震霆烈焰。彥卿獨不爲動。及梯衝臨城。鑿城爲窟室。實薪而焚之。城皆摧圯。遂陷。彥卿猶列陣城內。誓死奮擊。謂之巷鬪。日暮。轉至州廡。長短兵皆盡。彥卿取繩牀搏戰。及兵馬都監鄭昭業等千餘人皆死之。無一人生降者。周兵死傷亦甚衆。世宗怒。盡屠城中諸民。焚其室廬。然得彥卿子光祐。不殺也。元宗下詔。贈彥卿侍中。天長縣時陞爲雄州。刺史建武軍使易文贊亦固守。聞楚州陷。遂降。彥卿馬元康書以爲彥能。亦莫知孰是也。

論曰。彥卿守楚州。孤壘無援。當百倍之師。身可碎。志不可踰。雖劉仁贍殆不能過。而史家傳載獨略。至其名亦或不同。於虜。何其重不幸也。

林仁肇。建陽人。事閩爲裨將。沉毅果敢。文身爲虎。軍中謂之林虎子。閩亡。久不見用。會周侵淮南。元宗遣使至福建募勇士。得仁肇。及陳德誠。鄭元華。皆拔爲將。仁肇率偏師援壽州。攻城南大寨有功。又破濠州水柵。推淮南屯營應援使。時周人正陽浮橋初成。扼援師道路。仁肇率敢死士千人。以舟實薪芻。乘風舉火焚橋。周將張永德來爭。會風回。火不得施。我兵少卻。永德鼓噪乘之。遂敗。仁肇獨騎一馬爲殿。永德引弓射之。屢將中。仁肇輒格去。永德驚曰。此壯士。不可逼也。遂捨之而還。及割地。元宗以爲潤州節度使。徙鄂州。又徙南都留守。開寶中。密言於後主曰。宋淮南諸州。戍守單弱。而連年出兵。滅蜀。平荆湖。今又取嶺表。往返數千里。師旅罷弊。此在兵家爲有可乘之勢。請假巨兵數萬。出壽春。渡淮。據正陽。因思舊之民。以復故境。彼縱來援。吾形勢已固。必不得志。兵起之日。請以臣舉兵外叛。聞事成。國家饗其利。不成。族臣家。明陛下不預謀。後主懼不敢從。時皇甫繼勳朱全贊掌兵柄。忌

仁肇雄略。謀有以中之。會朝貢使自京師回。遣使言仁肇密通中朝。見其畫像於禁中。且已爲築大第。以待其至。後主方任繼勳等。惑其言。使人持醜往毒之。仁肇少病風。口氣常臭。醫云肺掩不正。及遇醜。家人怪其不臭。俄卒。初。仁肇尤爲陳喬所知。至是。喬歎曰。國勢如此。而殺忠臣。吾不知所稅駕也。然不能白其誣。仁肇卒。逾年。後主遂見討。又逾年。國爲墟矣。

盧絳。字晉卿。宜春人。自言唐中書舍人。歙州刺史肇之後。初名充。慕晉魏絳。更焉。讀書略通大指。喜論當世利病。然脫略繩檢。每以博奕角觝爲事。舉進士。不中。爲吉州回運務計吏。盜庫金。事覺。當伏危法。乃更儒服亡去。至新淦。客於土豪陳氏。與其子弟共學。絳好縱橫兵書。日夜讀之。陳氏察其非士流。謂曰。朝廷方求賢豪。吾子其可久留此乎。因厚具裝遣行。絳將還宜春。中途飲博。盡費其裝。比至家。母及兄弟皆鄙詘之。絳乃入廬山白鹿洞書院。猶亡賴。以屠販爲事。多脅取同舍生金。又持推貨誣山中浮屠。以邀賄謝。人皆患苦之。與諸葛濤。蒯鼈。號廬山三害。朱弼爲國子助教。將捕治其罪。復亡去。往來金陵丹陽間。遇大寒。平地躍起。折簷桷爲薪。以自濟。守倉吏召歸。使躍倉簷。自氣樓入倉中盜米。一夕往返數十久之。乃上書論事。未報。詣樞密使陳喬。口陳所上書。詞辨從橫。喬聳然異之。用爲本院承旨。授沿江巡檢。募亡命習水戰。使馬雄王川軍等分將之。要吳越兵於海門。屢獲舟艦。以善戰聞。開寶中。密說後主曰。吳越仇讎。腹心之疾也。他日必爲北兵鄉導以攻我。臣屢與之角。知其易與。不如先事出不意滅之。後主曰。然則大朝且見討奈何。絳曰。臣請詐以宣歙叛。陛下聲言伐叛。且賂吳越乞兵。吳越之兵。勢不得不出。俟其來。拒擊之。而臣躡其後。國可覆也。滅吳越。則國威大振。北兵不敢動矣。後主不聽。及王師來討。以絳爲凌波都虞候。松江都郡署。守秦淮水柵。戰屢勝。諸將忌其能。共說後主。遣絳出援潤州。乃授昭武軍節度留後。帥八千人陣於潤州城下。北軍不敢逼。入城拒守。而節度使劉澄。謀因計事斬絳。以城降。絳覺之。澄乃謂絳曰。都城危甚。萬一不守。守此何爲。絳曰。君爲守不可棄城。宜赴難者。絳也是夕。澄遣裨將出送降款。絳帥部下馳出。欲冒圍入金陵。圍堅不可入。乃走保宣州。金陵城陷。諸郡皆下。絳獨不降。謀南據閩中。過歙州。怒刺史龔慎儀不出迎。殺之而行。太祖使絳弟襲招絳。絳初欲殺襲。以明不屈。已而卒降。至京師。授冀州團練使。遇龔慎儀兄子贊善大夫頴於朝。詬絳曰。是殺我叔父者。執至殿。陸訴冤。詔屬吏。樞密使曹彬言其才略可用。願宥其死。使自效。

太祖曰。是貌類侯霸榮。何可留也。斬於西市。絳臨刑大呼曰。陛下不記以鐵券誓書招臣乎。霸榮河東將。嘗來降。已而復叛歸。弑其主劉繼恩者。故太祖深惡之。

劇鼇。宣城人。善屬文。南唐承唐末。文體纖麗之弊。士率不能自振。鼇獨不事華藻。以理趣爲本。有承平餘風。然居鄉飲博無行。不爲人士所容。迺去。入廬山國學。亡賴尤甚。晚乃勵風操。尙信義。一言之出。必復而後已。嘗蓄龍尾硯。友人欲之而不言。鼇亦心許之。未及予也。一日友人告而歸。鼇悔恨。徒步數百里追及。授硯而還。猶以素行爲有司所擯。終國亡不仕。久之。遊京師。擢進士第。仕至殿中丞。樊若水欲薦於朝。鼇恥之。亟致仕。歸隱廬山。數年卒。

陳喬。字子喬。廬陵玉笥人。父濬。事吳爲翰林學士。烈祖時。以兵部尙書卒。喬幼敏悟。文辭清麗。事親以孝聞。濬死。撫恤族黨。均財給之。親疏無間。起家爲太常寺奉禮郎。歷屯田員外郎。中書舍人。淮南兵興。元宗憂蹙。不知所爲。陳覺李徵古請以宋齊丘攝政。元宗怒。度羣臣必持不可。乃促召喬草詔。如覺徵古言。喬請對。未報。排宮門入頓首曰。陛下旣署此。則百官請朝。皆歸齊丘。尺地一民。非陛下有。陛下縱脫屣萬乘。獨不念先帝中興大業之艱難乎。讓皇幽囚丹陽宮。陛下所親見也。他日垂涕求爲田舍翁。不可得矣。元宗笑而止。引喬入見。后及諸子曰。此忠臣也。及齊丘黨與皆斥。喬與齊丘尤親厚。獨得不坐。遷都豫章。以喬輔太子留金陵。後主嗣位。歷吏部侍郎。翰林學士承旨。樞密副使。遂以門下侍郎兼樞密使。貶制度政右內史侍郎。兼光政院使輔政。喬風度淹雅。小心守法。度然短於才略。吏胥多交通權倖。侮文法。不能察也。太祖遣使召後主入朝。後主欲往。以喬爲介。喬曰。往必見留。如社稷何。後主懼見討。喬曰。陛下不得已。當以臣爲解。及兵圍金陵。太祖又遣進奉使江國公從鎰諭指。欲後主自歸。且命曹彬緩攻以俟之。而喬堅持不可。劉澄以潤州降。後主方惶惑。欲置其家不問。喬憤切曰。人臣受重寄。一旦開門迎敵。此豈可容。悉取其父母妻子斬之。於是人皆知喬必死國事矣。及城將陷。後主自爲降款。命喬與清源郡公仲寓詣曹彬。喬持款歸府。投承雷中。復入見云。自古無不亡之國。降亦無由得全。徒取辱耳。請背城一戰而死。後主握手涕泣。不能從。喬曰。如此則不如誅臣。歸臣以拒命之罪。後主又不從。乃掣手而去。至政事堂。召二親吏。解所服金帶與之曰。善藏吾骨。遂自縊。二吏微榻之。金陵平。家人謀改葬。求尸不獲。或見一丈夫衣

黃半臂。舉手障面。及發瘞。如所見云。

陳起。蘄州人。性剛硬。尤惡妖異。昇元中。以進士起家。爲黃梅令。時縣境獨木村有妖人諸佑。挾左道。自言數世不食肉。能使富者貧。貧者富。俚民稍稍從之。初有徒數十人。積數年。從者至數百。男女無別。號曰忍辱。夜行晝伏。取資於盜。相與倡言。佑有神術。能升虛空。入水火。州縣亦憚之。不敢問。起到官。邑人畢賀。佑獨偃蹇不至。起乃按戶籍。取佑爲里正。不服。嬖言曰。吾且斷令頭。起告巡檢使周鄴。出兵捕佑等。獲之。不能神。皆就執縛。搜其家。得乘輿服器。遂斬之。鄴欲宥其婦女童稚。起曰。此皆瀆亂人倫。不可使有遺言。乃併斬之。起由是知名。官至監察御史卒。

卷十五

周鄭李三劉江汪郭伍蕭李盧朱王魏列傳第十二

周惟簡。鄱陽人。隱居明易。後主聞其名。召至金陵。起布衣爲集賢殿侍講。以虞部郎中致仕。還山。金陵受圍。問道召還。入後苑講否卦。後主思得奇士。能使兵間者。張洎薦惟簡。可以言笑和解。乃授給事中。副徐鉉使京師。後主手疏言。惟簡託志妙門。存心道典。伴臣修養。不預公途。蓋爲之聲價。冀動朝聽。比至。太祖召見。詰責。鉉猶懇奏不已。惟簡惶恐。反言曰。臣本野人。未嘗仕宦。李煜強遣來。未嘗預聞使指。伏聞終南山多靈藥。願得棲隱。太祖許之。金陵平。命爲國子周易博士。判監事。或謂曰。終南之言不誦。且得罪。惟簡不得已。上表求解官。以遂初志。改虞部郎中致仕。授其子繕京兆鄠縣主簿。使就養。太平興國中。復表求仕。授太常博士。遷水部員外郎卒。繕後舉進士中第。仕亦至尙書郎。

鄭彥華。福閩人。祖父世爲福建諸州刺史。彥華少隸節度使李弘義帳下。常射殺乳虎。以勇聞。元宗出師攻福州。大將王崇文遣卒李興。登樓車。罵弘義。弘義不勝憤。募生得興者。彥華請行。夜縋出城外。伏壕傍。興猶嫚罵不已。彥華操長鉤。鉤得興。挾以登城。城上皆鼓譟。弘義得興而甘心焉。崇文不能下城。遂去。歲餘。劍州刺史陳誨。以水軍來攻。彥華適出屯候官。以所部降誨。誨與語。奇之。署軍校。南唐與周師相拒淮南。彥華大小百餘戰。身被五十餘創。累遷至鎮海軍節度使。如同平章事。後主見討。王師自采石作浮梁渡江。後主命彥華督舟師萬人。又遣別

將杜貞率步兵萬人同逆戰。後主親遣行戒之曰。水陸兩軍相表裏。則吾事濟矣。比與王師遇。貞以所部力戰。彥華擁兵不救。貞敗而潰。金陵聞之喪氣。遂閉壘自守。以至國破。亦不能正彥華之罪矣。彥華從後主入朝。爲右千牛衛將軍。太宗征大原及幽州。用彥華爲將。無功。猶歷諸衛將軍。至左千牛衛大將軍。卒年七十三。子文寶。初任後主。以文學選爲清源公仲寓掌書記。遷校書郎。歸朝。南唐故臣皆許錄用。文寶獨不自言。後主以環衛奉朝請。不納。客謁。文寶乃被篋荷笠。作漁者以見。寬譬久之。後主嘆其忠。後中進士第。任至兵部員外郎。國史有傳。

李貽業。故唐時平章事。蔚從曾孫。父戴。唐末第進士。奔吳爲起居郎。貽業事烈祖。至翰林學士。烈祖晏駕。大臣欲奉宋后臨朝。命中書侍郎孫忌草遺制。貽業獨奮曰。此姦人所爲也。大行常謂婦人預政。亂之本也。安肯自爲此。若果宣行。貽業當對百官裂之。會宋后亦不許。於是臨朝之義遂寢。元宗語貽業曰。疾風知勁草。於卿見之。保大中。以兵部侍郎卒。諡曰簡。初。戴爲人簡率。無威儀。貽業又甚於父。平居頽然。不言是非。國有大議。必首斷之。尤好飲酒。常折簡招親友曰。今夕佳月。能相過乎。比客集。貽業已大醉。指酒壺曰。本用相待。酒興忽來。自倒之矣。其疎豁大抵如此。

劉崇俊。字德修。楚州山陽人。祖全。以功臣爲濠州刺史。有威名。全卒。子仁規繼其任。爲政苛虐。及卒。崇俊繼之。盡反仁規之政。人懷其惠。數年。漸專恣不法。多畜不逞。使過淮。剽掠。獲美女良馬。以自奉。元宗陞濠州爲定遠軍。因拜崇俊節度使。以其子節尙太寧公主。然元宗亦惡其爲人。會壽州姚景卒。崇俊厚賂權貴。求兼領壽州。元宗乃陽若不解其意。命移鎮壽州。而遣楚州刺史劉彥貞馳入濠州代之。崇俊自悼失計。頗革心循法度。未幾得疾。卒年四十。贈太尉。諡曰威。

劉洞。廬陵人。隱居廬山二十年。能詩。長於五字唐律。自言得賈島法。後主嗣位。尤屬意詩人。或以洞言者。洞遂獻詩百篇。卷首石城篇。其詞。石城古渡頭。一望思悠悠。幾許六朝事。不禁江水流。後主讀之。感愴不怡者久之。因棄不復觀。洞亦不復見省。金陵受圍。洞猶在城中。國亡。洞過故宮闕。徘徊賦詩。多感慨悲傷。不以不遇故有怨懟語。未幾卒。與洞同時有夏竇松者。亦隱廬山。相與爲詩友。洞有夜坐詩。竇松有宿江城詩。皆見稱一時。號劉夜坐夏江城云。

江爲宋人。避亂徙閩。元宗初設貢舉。爲屢爲有司所黜。嘗有題白鹿寺詩。元宗南遷。過而愛之。爲由是愈自負。傲睨一時。卒無薦引者。居懷憤憤。束書欲東走吳越。爲同謀者所發。按得其狀。伏誅。

汪召符。敏人。能屬文。烈祖初嘗上書論事。合指宋齊丘頗抑之。召符貽齊丘書。謂其疾己才。齊丘大怒。密使人誘召符乘舟痛飲。至石頭蚶蚱磯下。沉殺之。

郭昭慶。廬陵人。博學能自力。嘗著唐春秋三十卷。保大中獻所著治書。補揚子尉。辭不受。後主時復獻經國治民論。擢著作郎。時方奉中朝。凡歲慶賀貢方物牋表。及廷勞宴餞之辭。率命昭慶爲之。一日方晨起造朝。暴卒。

伍喬。廬江人。居廬山國學數年。力於學。詩調寒苦。每有瘦童羸馬之歎。山中浮屠。夢仰視見一大星。芒色甚異。旁有人指之曰。此伍喬星也。既覺訪得喬。乃傾資奉之。使入金陵。舉進士。及試畫八卦。霽後望鍾山詩。故事。中選者。主司必延之陞堂。置酒。時有宋貞觀者。首就坐。張洎續至。主司覽其文。揖貞觀南坐。引洎坐於西。酒至數行。喬始上卷。主司歎其傑作。乃徒貞觀處席北。洎處席南。以喬居賓席。又覆考榜出。喬果爲首。洎貞觀次之。時稱主司精於衡鑑。元宗亦大愛喬程文。命勒石以爲永式。仕至考功員外卒。

蕭儼。廬陵人。幼舉童子。中其科。稍長。命爲秘書省正字。烈祖初。歷大理司。自刑部郎中。以平恕稱。烈祖晚服金石藥。多暴怒。近臣數被譴罰。宣徽副使陳覺不自安。稱疾在告者數月。及聞遺詔。即以其日造朝。儼劾奏覺傾耳私室。以幸禍變。宜重置於法。不報。烈祖輔吳。設法禁以良人爲賤。至是馮延巳延魯欲廣置妓妾。輒矯遺制。託稱民貧許賣子女。儼駁曰。昔延魯爲東都判官。已有此請。大行以訪臣。臣對曰。陛下納麓之初。出庫金贖民。孰不歸心。今竇運中興。人仰德澤。奈何欲使鬻子。貧豪家役使乎。大行以臣言爲然。將罪延魯。臣曰。此但智識淺陋耳。非有他也。罪之且塞言路。大行乃斜封其奏。抹三筆。持入宮。願求之宮中。旣而果得留中。章奏千餘。皆斜封。有一抹至三抹者。遂得延魯奏。然大臣亦方以豪侈相高。利於廣聲色。因共謂遺制已宣行。不當追改。遂已。元宗初以國讓景遂。羣下持不可。乃以景遂爲諸道兵馬元帥。景遂副之。宣告國中。以兄弟相傳之意。儼極諫。謂夏殷以來。天下爲家。父子相傳。不易之典也。景遂景達亦固讓。不敢當。然元宗意愈確。不之聽。江文蔚韓熙載典太常禮儀。議烈祖稱宗。儼獨建言。帝王已失之。已得之。謂之反正。非己失之。自己復之。謂之中興。中興之君。廟宜稱祖。先帝興已。

隆之業。不應屈而稱宗。文蔚亦以儼議爲當。遂用之。保大二年。元宗終欲傳位景遂。下詔命總庶政。惟樞密使魏岑查文徽許奏事。餘非特召不得對。儼上疏力爭。會宋齊丘賈崇皆以爲不可。遂收所下詔。其後元宗於宮中作大樓。召近臣入觀。皆歎其宏麗。儼獨曰。比景陽但少一井耳。元宗怒。貶舒州副使。孫忌爲觀察使。遣州兵給儼。實防衛之。儼謂忌曰。僕以言獲罪耳。顧命之日。君持異議。幾危社稷。君之罪。豈不重於僕乎。反見防何也。忌慚。即撤去。俄召還。後主初嗣位。數與嬖倖弈棋。儼入見。作色投局於地。後主大駭。詰之曰。汝欲效魏徵耶。儼曰。臣非魏徵。則陛下亦非太宗矣。後主爲罷弈。南唐亡。儼以老病歸鄉里。杜門數年。卒年七十餘。

劉承勳。失其鄉里。以善心計。事烈祖爲糧料判官。遷德昌宮使。德昌宮者。蓋南唐內帑別藏也。自吳建國。有江淮之地。比他國最爲富饒。山澤之利。歲入不貲。烈祖勵以節儉。一金不妄用。其積如山。太子嘗欲一杉木作版障。有司以聞。烈祖書奏後曰。杉木不乏。但欲作戰艦。以竹代之可也。然德昌宮簿。煩委無由勾校。承勳獨任其事。盜用無算。保大後。貢奉事興。倉猝取辦。愈得以爲姦利。畜妓樂數十百人。每置一妓。價數十萬。教以藝。又費數十萬。而服飾珠犀金翠稱之。又厚以寶貨賂遺權要。故終無發其罪者。太祖平荆湖。詔江南具舟。漕其米入京師。承勳狡黠。計後主終不能有其國。欲預自結中朝。爲異時計。乃請行。督巨艦。自長沙抵迎鑾。千柁相銜。太祖覺其意而惡之。及國亡。承勳歸京師。首自陳漕米事。太祖曰。此汝主勤王耳。汝安得有勞。叱出。特命勿敘用。久客無資。裸袒乞食。不勝凍餒而死。

李元清。濠州人。徙金陵。矯健善走。能及奔馬。常步入梁宋刺事。開寶中。後主以吉州永新與湖南隣。命元清爲永新制置使。每數月。一託疾。不坐衙。輒微服入湖南境。人無知者。以故敵人動息。皆知之。累年。邊障晏然。國亡。歸京師。元清心不欲仕二國。僞稱失明。召驗之。揮刃將及頸。而目不瞬。乃放歸濠州卒。

盧郢。金陵人。工屬文。有勇力。好吹鐵笛。乾德中。後主命韓德霸爲都城烽火使。警察非常。怙權暴橫。國人望其前驅。莫不奔避。郢嘗遇之。調笛自若。德霸叱左右捕執。郢奮臂擊。十餘人皆顛蹶。乃直前摔德霸。墜馬毆之。敗而傷目。德霸入訴。後主叱之出。顧近侍笑曰。我帥遇一措大。不能自全面目。尙敢訴耶。遂罷其職。從郢舉進士。試王度如金玉賦。擢第一。徐鉉娶郢姊。嘗受後主命撰文。累日未就。郢曰。當試爲君杼思。適庭下有石。千夫不得舉。郢戲

取弄之。有頃，索酒，頓飲數升，復弄如初，忽顧筆吏，口占使書，不竄易一字，鉉伏其工。後主亦以爲適俊可愛，國亡歸朝，知金州卒。

朱彌，字君佐，建州人。舉明經第一，授國子助教。知廬山國學，盧絳劓鬻諸葛濤，欽博不逞，患苦諸生，學官依違，無收問者。及彌至，一切繩以禮法，每升堂講說，座下肅然。絳等亦愧服引去。徒自四方來者，數倍平時。國亡，補衡山縣主簿，秩滿，求爲南嶽廟令卒。

王輿，合淝人。少與兄綰俱事吳武王。輿初爲小校，從周本攻危全諷，臨戰，本視賊水柵部分諸將，指旁山頭一小營，謂輿曰：爾往爲我取彼，輿唯唯，而色不欲行。本曰：爾憚往耶？輿曰：公必不以輿爲不武，請得此柵破之，捨而趨彼何爲？本大喜曰：爾亦知此爲必爭之地耶？吾本自行，今爲爾功，勞而遣之。輿乘輕舟襲破其前鋒，遂排柵入，諸軍繼進，賊大潰，積功遷至諸軍都虞候。烈祖輔吳，以腹心所寄，進控鶴都虞候，持重有謀，甚見倚任。久乃出爲光州刺史。初，輿兄子爲海州刺史，叛附梁，聞輿在光山，遣間使通問，輿執以歸金陵，因求罷郡，入爲左宣威統軍。歷鎮海節度留後，金吾衛大將軍，武昌節度使，與監軍甄廷堅不相得，會廷堅被誣，告有貳志，烈祖遣使械廷堅，屬吏未至，輿刺知之，密告廷堅，因爲謀曰：今獨可即日乘輕舟歸闕待罪，毋與中使遇。廷堅恐懼，不暇爲他謀，即從其計。至金陵，遇赦，且以其先自歸得免。人推其長者。元宗嗣位，加同平章事。保大二年卒。年七十四。輿少從軍，攻潤州，爲巨弩所射，中右耳，矢自左耳出。又中旁一人，猶立死。輿扶歸營，臥百餘日，復起。耳至老不曠，亦無癢痕。攻潁州，倚營門，仗劍驅士卒登城，城上機石發，中營門及鎧之半，皆糜碎，而輿不傷，莫不異之。兄綰亦至虔州節度使。

魏岑，字景山，鄆州須城人。善諂諛，學揣摩，尤爲宋齊丘所知，薦授校書郎。保大中，驟進至諫議大夫。元宗自以唐子孫，慨然有定中原，復舊都之意，有司請行南郊禮。元宗曰：俟天下爲一，然後告謝天地。岑遂與陳覺、馮延巳、延魯更相倡和，爲拓境事，嘗侍燕，自言臣少遊元城，樂其風土。陛下還長安日，乞爲魏博節度使。元宗欣然許之。岑趨下殿再拜謝，侍衛皆竊笑。覺延魯攻福州，岑爲監軍，應援使。三人者，暗懦專恣如一。軍敗，元宗初欲按軍法，誅覺延魯，而貸岑。御史中丞江文蔚對仗彈奏，請並岑誅之。於是貶太子洗馬。俄復還故官。李守貞叛，來乞師，岑

乃力請出兵赴救。於是元宗從之。因以岑爲涇淮巡檢使。無功而還。岑自復進。姦諂彌甚。鍾謨李德明亦用事。其趨向與岑雖異。而迷國則均。戶部員外郎范仲敏懷不平。怵大將王建封上疏。請盡逐之。更用正人。元宗怒。併置仲敏建封於死。岑自謂得主眷。愈無所憚。壽州節度使劉彥貞。以厚賂結岑爲奧援。岑所得不可數知。遂肆言稱彥貞爲將如韓白。治民如龔黃。其敢爲誕欺如此。元宗方倚以柄任。會見仲敏爲厲。召道士上章訴天。未幾卒。

卷十六

后妃諸王列傳第十三

烈祖元敬皇后宋氏。小名福金。父韞。江夏人。后幼流離亂兵中。昇州刺史王戎得后。烈祖取戎女。后爲媵。得幸。生元宗。王氏早卒。義祖命烈祖以爲繼室。封廣平郡君。晉國君。治內有法。不妄言笑。義祖殂於金陵。烈祖在東都。將奔喪。后密以大計諫止焉。烈祖爲齊王。封正妃。及受禪。立爲后。從容裨贊。多所弘益。烈祖嘗曰。吾思有未達。后已悟矣。昇元末。烈祖服金石藥。多暴怒。賴后以免譴者甚衆。及殂。中書侍郎孫忌。懼魏岑。馮延巳。延魯。以東宮舊僚用事。欲稱遺詔奉后臨朝聽政。后不許曰。此武后故事。吾豈爲之。元宗即位。尊后爲皇太后。保大三年十月卒。祔葬永陵。

烈祖後宮种氏。名時光。性警惠。年十六。入宮。列樂部中。俄得幸。生景邊。烈祖以受禪後所得子。甚愛之。种氏寵日盛。烈祖性嚴整。嘗大怒。聲如乳虎。殿門環爲震動。左右皆喪魂魄。种氏左手持食。右手進匕。從容如平時。烈祖怒亦頓解。他日。烈祖幸齊王宮。遇王親理樂器。大怒。數日未解。种氏負籠。輒乘間言景邊才過齊王。烈祖正色曰。子有過。父教之。常禮也。若何敢爾。叱下殿。去簪珥。幽於別宮。數月。命度爲尼。景邊愛亦弛。終烈祖世。獨不加封爵。元宗即位。始封景邊保寧王。許种氏就養於景邊宮中。封王太妃。宋后挾舊怨。屢欲加害。元宗力解之。乃止。

元宗光穆皇后鍾氏。父太章。事吳爲義祖裨將。義祖謀誅張灝。令嚴可求喻太章。伏死。士二十輩。斬灝於府。太章許諾。義祖疑其怯。夜半往止之曰。僕母老。懼事不成。欲徐圖之。如何。太章勃然曰。言已出口。豈有可已之理。明日。遂誅灝。後頗恃功。頡頏。烈祖疑其難制。義祖曰。昔者吾赤族之禍。間不容髮。使無太章。豈有今日富貴耶。奈何以

薄物細故疑之。乃命以太章次女配元宗。卽后也。昇元中。封齊王妃。元宗卽位。立爲皇后。後主卽位。爲太后。以父名改稱聖母后。后寢疾。後主朝夕侍側。衣不解帶。藥必親嘗。乃進。乾德三年十月卒。是日雨沙於金陵。後主毀瘠骨立。杖而後能起。哀動左右。葬順陵。

後主昭惠國后周氏。小名娥皇。司徒宗之女。十九歲來歸。通書史。善歌舞。尤工琵琶。嘗爲壽元宗前。元宗歎其工。以燒槽琵琶賜之。至於采戲奕棋。靡不妙絕。後主嗣位。立爲后。寵嬖專房。創爲高髻纖裳。及首翹鬢朶之妝。人皆效之。嘗雪夜酣燕。舉杯請後主起舞。後主曰。汝能創爲新聲則可矣。后卽命賤綴譜。喉無滯音。筆無停思。俄傾譜成。所謂邀醉舞破也。又有恨來遲破。亦后所製。故唐盛時霓裳羽衣。最爲大曲。亂離之後。絕不復傳。后得殘譜。以琵琶奏之。於是開元天寶的遺音。復傳於世。內史舍人徐鉉。聞之於國工曹生。鉉亦知音。問曰。法曲終則緩。此聲乃反急何也。曹生曰。舊譜實緩。宮中有人易之。非吉徵也。後主以后好音律。因亦耽嗜。廢政事。監察御史張憲切諫。賜帛三十疋。以旌敢言。然不爲輟也。未幾。后臥疾。已革。猶不亂。親取元宗所賜燒槽琵琶。及平時約臂玉環。爲後主別。乃沐浴粧澤。自內含玉。卒於瑤光殿。年二十九。葬懿陵。後主哀甚。自製誄。刻之石。與后所愛金屑檀槽琵琶同葬。又作書燔之與訣。自稱鰥夫。煜其辭數千言。皆極酸楚。或謂后寢疾。小周后已入宮中。后偶褰幔見之。驚曰。汝何日來。小周后尙幼。未知嫌疑。對曰。旣數日矣。后恚怒。至死。面不外向。故後主過哀。以揜其迹云。

後主國后周氏。昭惠后妹也。昭惠卒。未幾。後主居聖母后喪。故中宮久虛。開寶元年。始議立后爲繼室。命太常博士陳致雍。考古今沿革。草具婚禮。又命學士徐鉉。史官潘佑參定。文安郡公徐遊評其異同。遊多是佑議。遂施用之。逾月。遊病疽。鉉慰其不主己議。戲語人曰。周孔亦能爲厲乎。后少以戚里。間入宮掖。聖母后甚愛之。故立焉。被寵過於昭惠。時後主於羣花間作亭。雕鏤華麗。而極迫小。僅容二人。每與后酣飲其中。國亡。從後主北遷。封鄭國夫人。太平興國二年。後主歿。后悲哀不自勝。亦卒。

後主保儀黃氏。江夏人。父守忠。事湖南馬氏爲偏裨。邊鏑入長沙。得黃氏。納後宮。後主見其美。選爲保儀。以工書札。使專掌宮中書籍。二周后相繼專房。燕暱。故保儀雖見賞識。終不得數御幸也。元宗後主俱善書法。元宗學牟欣。後主學柳公權。皆得十九。購藏鍾王以來墨帖至多。保儀實掌之。城將陷。後主謂之曰。此皆先帝所寶。城若不

守汝卽焚之。無爲他人得。及城陷。悉焚無遺者。保儀亦從北遷。卒於大梁。又有宮人流珠者。性通慧。工琵琶。後主
愼念家山破。及昭惠后所作邀醉舞。恨來遲。二破久而忘之。後主追念昭惠。問左右無知者。流珠獨能追憶。無所
忘失。後主大喜。後不知所終。

烈祖五子。宋皇后生元宗。楚王景遷。晉王景遂。齊王景達。种氏生江王景暹。

景遷。字子通。幼警敏。讀書一覽輒不忘。烈祖輔吳。景遷尙吳公主爲駙馬都尉。歷衙內馬步軍都指揮使。海州團
練使。左右軍都軍使。遂以左僕射參政事。留東都輔政。時甫成童。尋加同平章事。知左右軍使。寢疾。罷歸金陵。爲
諸道副都統。以景遂代輔政。景遷病逾年。竟卒。年十九。諡曰定。無子。初。術士皆謂景遷貴不可言。故烈祖在諸子
中尤愛之。及是始悟術士之妄。

景遂仕吳爲門下侍郎。烈祖受禪。封壽王。純厚夷淡。有士君子之操。讓皇之喪。景遂受命往護喪事。望柩哀慟。觀
者聳歎。烈祖。元宗以位讓景遂。大臣固持之而止。明年。又命景遂總庶政。已降詔。僉謂不可。乃收所下詔。久之。
又以爲太弟。凡太子官屬。皆改爲太弟官屬。景遂固辭。雖不得命。終恐懼不敢安處。乃取老子功成名遂身退之
意。自爲字曰退身。以見志。平居好客。善屬文。燕集無虛日。贊善大夫張易。峭直喜盡言。景遂嘗賦詩。頗纖麗。易面
規之。景遂敬納。又嘗怒碎玉杯於坐。景遂亟推謝。無忤色。及易出使契丹。景遂上言力諫。以爲易國士也。宜夙夜
納誨。今使航不測之淵。報聘遠夷。非國之利。元宗報之曰。易固奇士。海神當畏之。竟遣行。景遂在東宮十三年。屢
乞歸藩。交泰元年三月。始改授天策上將軍。江南西道兵馬元帥。洪州大都督。太尉。尙書令。晉王。以樞密副使李
徵古爲鎮南節度副使佐之。徵古習驕慢。至鎮。專恣尤甚。景遂積久不能堪。欲斬之。而自拘有司。左右諫止。初。景
遂之出鎮也。弘冀爲太子。弘冀嘗被譴於元宗。有復立景遂之意。景遂在鎮。亦頗忽忽。多忿譟。嘗以忤意殺都押
衙袁從範之子。弘冀刺知之。乃使親吏持醜遺從範。使毒景遂。景遂擊鞠而渴。索漿。從範毒漿以進之。暴卒。年三
十九。未斂。體已潰。元宗素友愛。聞訃悲悼。左右欲少慰釋之。因妄曰。太弟初得疾。忽語人曰。上帝命我代許旌陽。
元宗始少解。故被醜之事。竟不之知。廢朝七日。贈太弟。諡文成。

景達生於吳順義四年。是歲大旱。烈祖方輔政。極於焦勞。七月既望。雪而得雨。景達以是日生。烈祖喜。故小名兩

師稍長。神觀爽邁，異於他兒。烈祖深器之，受禪封信王。烈祖欲以爲嗣，難於越次，故不果。烈祖殂，景遷已前死，元宗稱疾，固讓景遂，欲以次及景達。承先帝遺意，既迫於羣下之議，不得行，乃立景遂爲太弟。景達自燕王徙封齊王，爲諸道兵馬元帥，中書令。景達孝友純至，嘗從遊後苑，泛舟池中。元宗舟覆，景達在他舟，初不善泅，遽躍入水中，負元宗出。人以爲精誠所感，性剛正疾惡，朝廷嚴憚之。帝每召宗室近臣曲宴，馮延巳、延魯、魏岑、陳覺輩，憑寵笑呼，旁若無人。景達屢訶詰之，復極諫。元宗他日宴於東宮，延巳愧二弟之命不出於己，欲以虛辭爲德，陽醉撫景達背曰：爾勿忘我。景達不勝其忿，拂衣入，奏請斬延巳。元宗諭解久之，乃已。張易語景達曰：殿下力未能去羣小，而數面折之，使之懼而自謀，豈易測哉。景達悟，自是畏禍，遇曲燕輒以疾辭。保大末，淮南交兵，景達以元帥督師，陳覺爲監軍使，軍政皆決於覺。景達署牘尾而已。朱元叛，壽州陷，皆覺爲之。景達亦不能詰。初出師五萬，而俘死亡叛者四萬。景達及覺引殘兵歸金陵，上還印綬。元宗恐其無功自愧，乃拜天策上將軍，浙西節度使。景達不敢當要鎮，力辭。改撫州大都督，臨川牧。在鎮十餘年，後主嗣位，加太師，尙書令，甚尊禮之。卒於鎮，年四十八。在烈祖諸子中，最爲壽矣。贈太弟，諡昭孝。遺命留葬江州廬山。初，景達好神仙道家之說，記室徐鉉獻述仙賦以諷，行於世。

景暹，字宣遠，烈祖初受禪，以十二月二日爲仁壽節。景暹以是日生，故小名仁壽。烈祖甚愛之，母种氏得譴，宋皇后鞠養。景暹如已出。元宗嗣位，封保寧王，徙封信王，出爲虔州節度使，簡易節儉，虔人安其政。贛令卒，尉邵繼夏攝令，以令成喪，日張樂宴飲。景暹立奏黜之，每有小過，掌書記孫峴苦言規正之。景暹大重之。峴卒，言及必流涕，厚卹其孤。後主立，進封江王，加兼中書令。元宗後主皆酷好浮屠，羣臣化之，政事日弛。景暹獨尊六經名教，排斥浮屠，不少撓。在鎮十一年，卒，年三十一，贈中書令，諡昭順。

元宗十子，弘冀、弘茂、後主、從善、從鎰、從謙、從慶、從信。凡八人可見，而從慶從信失其官封。又二人並逸其名。鍾皇后生弘冀，後主從善從謙，自弘茂以下，皆不知其母。

弘冀，元宗長子，故唐之末，民間相傳讖曰：東海鯉魚飛上天，而烈祖果育於徐氏。因信符讖，又有讖曰：有一真人在冀州，開口張弓向左邊。元宗欲其子應之，乃名之曰弘冀。初封東平公，徙王南昌。元宗嗣位，以弟景遂爲兵馬

元帥。景達爲副元帥。書於烈祖梓宮前。約兄弟相傳。而出弘冀留守東都。及景遂爲太弟。又徙鎮潤州。封燕王。弘冀爲人沉厚寡言。周師陷廣陵。吳越亦攻我常州。元宗念弘冀尙少。不習軍旅事。遣使召還都。部將趙鐸曰。王雖富於春秋。然元帥之重。衆心所恃。忽棄其師而歸。則部下必亂。歸欲何之。弘冀善其言。聞於元宗。即日大爲戰守之備。部分諸將。皆愜服士心。元宗使龍武都虞候柴克宏。右衛將軍陸孟俊。救常州。至潤州。樞密副使李徵古。白以神衛統軍朱匡業代克宏歸。弘冀察克宏有才略。謂曰。君第前戰。吾當拒守。表言克宏決可破賊。常州危在旦暮。臨敵易將。兵家所忌。臣請以身保其功。克宏亦感激思奮。馳至常州。果大破吳越兵。斬首萬級。獲其將佐數十人。俘於潤州。弘冀以時方艱危。悉驅出轅門。斬之。人壯其決。然元宗以其專誅殺。不悅者久之。及太弟景遂力請歸藩。而景遂爲元帥。奔潰南歸。獨弘冀有功。遂立爲太子。參決政事。元宗仁厚。羣下多縱弛。至是弘冀以剛斷濟之。紀綱頗振起。而元宗復怒其不遵法度。一日怒甚。以打毬杖笞之曰。吾行召景遂矣。弘冀大懼。故景遂遇魴。語在其傳。元宗旣請盟於周。以在位久。恥於降屈。屢遣使請於世宗。欲傳位弘冀。使爲大國附庸。世宗賜書力止之。其詞曰。皇帝致書敬問江南國王。茲睹來章。備形縉旨。敍此日傳讓之意。述向來高尚之心。仍以數載以來。交兵不息。備陳追悔之事。無非克責之辭。雖古者省咎責躬。因災致懼。亦無以過也。況君血氣方剛。春秋鼎盛。爲一方之英主。得百姓之離心。豈可高謝君臨。輕辭世務。與其慕希夷之道。孰皆懷康濟之誠。且天災流行。國家代有。昔之聖哲。所不能逃。苟盛德之日新。斯景福之彌遠。諒惟英敏。必照誠懷。書詞溫潤。略似敵國。元宗乃已。世宗遣使至。亦別賜弘冀國信。以爲常。顯德六年七月。弘冀屬疾。數見景遂爲厲。九月丙午卒。有司諡曰宣武。句容尉張洎上書。謂世子之德。在侍臆問安。今標顯武功。垂示後世。非所以防微杜漸也。洎知元宗猶銜弘冀專殺事。其說蓋出於揣摩。元宗果大以爲然。改諡曰文獻。而洎由此進用。

弘茂。字子松。元宗第二子。幼穎異。善歌詩。格調清古。年十四。爲侍衛諸軍都候侯。封樂安公。騎射擊刺皆精習。又領兵職。然不喜戎事。每與賓客朝士燕遊。惟以賦詩爲樂。初弘冀剛嚴。人多憚之。故時望歸弘茂。保大九年七月。卒。追封慶王。弘茂之幼。有異僧言人壽天禍福多驗。元宗使視弘茂。僧書九十一字以獻。及卒。年一十九。從善。字子師。元宗第七子。器度凝遠。封紀國公。使周。會帝卽位。厚其禮。遣翰林學士王著送之。初從善與鍾謨相

附結。謾輒請以從善爲嗣。元宗雖不從。然意亦自愛從善。其遷南都也。使主扈從諸軍。元宗殂。未御梓宮。從善輒從。徐遊求遺詔。遊厲色拒之。至金陵。具以事聞。後主素友愛。略不以介意。愈加輯睦。進封韓王。及貶制度。降南楚國公。開寶四年。遣朝京師。太祖已有意召後主歸闕。即拜從善泰寧軍節度使。留京師。賜甲第汴陽坊。封其母凌氏吳國太夫人。後主聞命。手疏求從善歸國。太祖不許。以疏示從善。加恩慰撫。慎府將吏皆授常參官以寵之。而後主愈悲思。每憑高北望。泣下露襟。左右不敢仰視。由是歲時遊燕。多罷不講。常製卻登高文曰。玉墀澄醪。金盤鱸鮓。茶房氣烈。菊蕊香豪。左右進而言曰。惟芳時之令月。可藉野以登高。矧上林之同幸。而秋光之待爽乎。予告之曰。昔予之壯也。意如馬。心如猿。情榮樂恣。驪賞忘勞。悵心志於金石。泥花月於詩騷。輕五陵之得侶。陋二秦之選膏。量珠聘妓。緜綵維艘。被牆宇以耗帛。論丘山而委糟。年年不負登臨節。歲歲何曾捨逸遨。小作花枝金翦菊。長裁羅被翠爲袍。豈知萑葦乎性。忘長夜之靡靡。宴安其毒。累大德於滔滔。今予之齒老矣。心悽焉而切切。愴家艱之如燬。縈離緒之鬱陶。陟彼岡兮。跂予足。望復關兮。睇予目。原有鷓鴣兮。相從飛。嗟予季兮。不來歸。空蒼蒼兮。風淒淒。心躑躅兮。淚漣漣。無一驪之可作。有萬緒以纏悲。於戲噫嘻。爾之告我。曾非所宜。從善妃屢詣後主號泣。後主聞其至。輒避去。妃憂憤而卒。國人哀憐之。國亡。改授右神武大將軍。太平興國初。改右千牛衛上將軍。雍熙四年卒。年四十八。

從鎰。元宗第及子。初封舒國公。改封蔣。太祖親征揚州。李重進遣從鎰朝行在。進封鄧王。出鎮宣州。後主宴餞綺霞閣。與近臣俱賦詩。而後主自爲序。及貶制度。降江國公。太祖以不朝來討。後主遣從鎰貢帛二十萬疋。白金二十萬斤。大兵悉已南渡。從鎰留京師。館懷信驛。捷奏至。百僚稱賀。閣門趣隨班入。邸吏亦謂當有貢獻。其介潘慎修以爲國被封。頽亡。而使者旅賀。非禮。但奉方物以待罪。太祖嘉其知禮。爲易供帳。加賜牲餼。上櫺。命知制誥李穆送從鎰歸國。諭指。令後主亟自歸。仍命曹彬等緩攻以俟之。而後主卒不行。以至城陷。從鎰從後主北歸。改名從浦。卒。

從謙。元宗第九子。數歲。爲奕棋詩。有思致。後主賞歎之。歷封鄂國公。宜春王。進吉王。及貶制度。降鄂國公。歸朝。爲右神武大將軍。淳化五年。九月。以本官出爲安遠行軍司馬。後不知其所終。

從慶失其官封
從信逸其行實。

後主二子。仲寓。仲宣。皆昭惠周后所生。

仲寓。字叔章。初封清源郡公。國亡北遷。宋授右千牛衛大將軍。居後主喪。哀毀逾制。太宗臨朝。遣使勞問。終喪。賜積珍坊第一區。久之。自言族大家貧。求治郡。拜郢州刺史。在郡以寬簡爲治。吏民安之。淳化五年。八月卒。年三十七。子正言好學。亦早卒。於是後主之後遂絕。初。江南聞後主凶問。父老皆巷哭。及是。其嗣續殄絕。遺民猶爲之興悼云。

仲宣。小字瑞保。與仲寓同日受封。仲宣封宣城公。三歲。誦孝經不遺一字。宮中燕待合禮。如在朝廷。昭惠后尤愛之。宋乾德二年。仲宣纔四歲。一日戲佛像前。有大琉璃燈。爲貓觸墮地。劃然作聲。仲宣因驚癘得疾。竟卒。追封岐王。謚懷獻。時昭惠后已疾甚。聞仲宣夭。悲哀更遽。數日而絕。

卷十七

雜藝方士節義列傳第十四

吳廷紹爲太醫令。列祖因食飴。喉中噎。國醫皆莫能愈。廷紹尙未知名。獨謂當進楮實湯。一服。疾失去。馮延己苦腦中痛。累日不減。廷紹密詰廚人曰。相公平日嗜何等。對曰。多食山雞鷓鴣。廷紹曰。吾得之矣。投以甘豆湯。亦愈。羣醫默識之。他日取用。皆不驗。或扣之。答曰。噎因甘起。故以楮實湯治之。山雞鷓鴣。皆食烏頭半夏。故以甘豆湯解其毒耳。聞者大服。

潘辰。往來江淮間。自稱野客。嘗依海州刺史鄭匡國。不甚見禮。館之馬廐旁。一日。從匡國獵近郊。匡國妻行至廐中。因視辰所居。四壁蕭然。韋席竹筍而已。發筍。覩二錫丸。亦頗怪之。辰歸大驚曰。何物婦人。觸吾劍。賴吾攝其光芒。不然身首殊矣。或以告匡國。匡國竦然曰。殆劍客也。求學其術。辰曰。姑一試之。乃俱至靜院。探懷出二錫丸。置掌中。俄而氣出指端。如二白虹。旋繞匡國頸。有聲錚然。匡國汗下如雨。曰。先生之術神矣。觀止矣。辰笑引手收之。

復爲錫丸。匡國表薦於烈祖。召居紫極宮。數年卒。

李冠善吹洞簫。悲壯入雲。元宗將召之。會軍旅事興。不暇。司徒李建勳亦知音。絕歎賞之。冠輒不遇。周顯德中。北遊梁宋。每醉輒登市樓長嘯。後不知所終。

某御廚者。失其姓名。唐長安舊人也。從中師至江表。未還。聞崔胤誅北司。遂亡命。而某留事吳。及烈祖受禪。御膳宴設賴之。略有中朝承平遺風。其食味有鷺鷥餅。天喜餅。駝蹄餡。春分餡。密雲餅。鑄糟炙。瓏瑰餡。紅頭簽。五色餛飩。子母饅頭。舊法具存。

申漸高。優人。昇元中。爲教坊部長。時關征苛急。屬畿內旱。一日。宴北苑。烈祖願侍臣曰。近郊皆得雨。獨都城未雨。何也。得非刑獄有冤乎。漸高遽進曰。大家何怪。此乃兩長抽稅。故不敢入京爾。烈祖大笑。明日。下詔弛稅額。信宿大雨霑洽。周本自吳時。有威望。烈祖慮其難制。因內宴。引鴆酒賜本。本覺之。輒取御杯均酒之。半以進。曰。願以此上千萬壽。庶明君臣一心。烈祖失色。左右莫知所爲。漸高託俳優。舞袂升殿。曰。勅賜臣。漸高併飲之。納杯懷中。而出。烈祖密遣中人持藥解之。不及。腦裂而卒。至元宗時。又有李家明。亦優人。宋齊丘止一子。輒死。悲哭踰月。齊王景達勉之。不從。家明曰。是易喻爾。作紙薦。大書其上曰。一子不能捨。如讓皇百口何。縱之。墜其第中。齊丘取觀。爲收淚而止。元宗失江北。遷豫章。龍舟至趙屯。舉酒望皖公山。曰。好青峭數峯。不知何名。家明對曰。此舒州皖公山也。因獻詩曰。皖公山縱好。不落御觴中。元宗太息。罷酒去。

譚紫霄。泉州人。幼爲道士。初有陳守元者。亦道士。劖地得木札數十。貯銅盎中。皆漢張道陵符篆。朱墨如新。藏去而不能用。以授紫霄。紫霄盡能通之。遂自言得道陵天心正法。劾鬼魅。治疾病。多效。閩王王昶尊事之。號金門羽客。正一先生。閩亡。遁居廬山棲隱洞。學者百餘人。武昌節度使何敬洙嘗殺女奴。投尸井中。人無知者。遇疾。召紫霄。中夜被髮仗劍考治。見女厲自訴。詰旦。屏人以語敬洙。乃丹篆符遣之。疾即愈。廬山僧闢路。有大石。堅不可鑿。紫霄往視。曰。此固易爾。索杯水。噴之。命工施鑿。應手如粉。後主闢其名。召見。賜官階。辭不受。俄無疾卒。年百餘歲。今言天心法者。祖紫霄。

史守中。番禺人。不知何許人。烈祖嘗夢得神丹。既覺。語左右。欲物色訪求。而守中適詣宮門獻丹方。辰亦以方繼

進。烈祖皆神之。以爲僊人。使鍊金石爲丹。服之。多暴怒。羣臣奏事。往往厲聲色詰讓。嘗以其藥賜李建勳。建勳乘間言曰。臣服甫數日。已覺炎躁。此豈可常進哉。烈祖笑曰。孤服之已久。寧有是事。諫者皆不從。俄而疽發。遂至大漸。臨終。謂元宗曰。吾服金石求長年。今反若此。汝宜以爲戒也。

耿先生者。父雲。軍大校。耿少爲女道士。玉貌烏爪。常著碧霞帔。自稱比丘先生。始因宋齊丘進。嘗見宮婢持翼掃。謂元宗曰。此物可惜。勿令棄之。取置鑊中。烹煉良久。皆成白金。嘗遇雪擁鑪。索金盈貯雪。令宮人握雪成錠。投火中。徐舉出之。皆成白金。指痕猶在。又能爛麥粒成圓珠。光彩粲然奪真。大食國進龍腦油。元宗秘愛。耿視之曰。此未爲佳者。以夾纈囊貯白龍腦數斤。懸之。有頃。瀝液如注。香味逾於所進。遂得幸於元宗。有娠。將產之夕。雷雨震電。及霽。娠已失矣。久之。宮中忽失元敬宋太后所在。耿亦隱去。幾月餘。中外大駭。有告者云。在都城外二十里方山寶華宮。元宗亟命齊王景遂往迎太后。見與數道士方酣飲。乃迎還宮。道士皆誅死。耿亦不復得入宮中。猶然往來江淮。後不知所終。金陵好事家。至今猶有耿先生寫真云。

古史官書忠義孝行列女各爲傳。南唐偏方短世。又史牒放逸。不能盡見。撫其僅可書者。合爲節義傳。

段處常。失其鄉里家世。保大中。爲兵部郎中。周侵淮南。元宗命處常浮海使契丹乞援。處常爲契丹陳利害。甚辨。契丹本通南唐。徒持虛辭。利南方茶藥珠貝而已。至是。了無出師意。而留處常不遣。處常怨其無信。誓死國事。數面誚虜主。虜主亦媿其言。優容之。以病卒於虜。

趙仁澤。失其鄉里家世。保大中。爲常州團練使。周人來侵。吳越乘間出兵攻常州。仁澤戰敗。被執。歸之錢唐。仁澤見吳越王不拜。責之曰。我烈祖皇帝中興。首與先王結好。質諸天地。王今見利忘義。將何面目入先王廟乎。吳越王怒。以刀抉其口至耳。丞相元德昭嘉仁澤之忠。以良藥傅瘡。獲愈。後不知所終。

張雄。失其鄉里家世。周人來侵淮南。民自相結爲部伍。以拒周師。謂之義軍。而雄所將最有功。元宗命爲義軍首領。及割地。徙之江南。歷袁汀州刺史。後主見討。保大中。舊將無在者。乃擢雄統軍使。雄謂諸子曰。吾必死國難。爾輩不從吾死。非忠孝也。諸子泣受命。與田欽祚戰於溧水。敗績。他將皆遁。士卒死者萬餘人。雄與其子力戰。俱死。不同行者。亦死於它陳。父子八人無生存者。時金陵已危蹙。不復議贈卹。國人哀之。

陳褒。江州德安縣人。唐元和中給事中。京之後。十世同居。長幼七百人。不置奴婢。日會食堂上。男女異席。未冠笄者。別又爲一席。畜犬百餘。共以一船貯食飼之。一犬不至。則羣犬皆不食。築書樓。延四方學者。鄉鄰化其德。獄訟爲之衰息。昇元初。州以聞。詔復徭役。表門閭。同時見旌者尙數家。皆五世同居云。

永興公主。烈祖女也。嫁吳睿帝太子璉。及禪代。宋齊丘請離婚。烈祖不聽。公主自以爲吳室冢婦。而國亡。中懷憤悒。聞之呼之爲公主。輒悲傷流涕。烈祖愧之。乃以璉爲中書令。池州節度使。璉卒。公主哭之過哀。亦感疾卒。

余洪妻鄭氏。洪爲閩將。唐師下建州。裨將王建封得鄭氏。以其有色。而自持堅貞不撓。不敢犯。獻之大將查文徽。文徽欲納之。鄭大罵曰。王師弔伐。當褒錄節義。以表勵風節。建封出行伍。尙知見憚。君元帥也。乃欲爲禍首耶。文徽大慚。亟訪其夫歸之。

吳媛。後儀人。唐史官兢之後。父志野。義不仕梁。南遊吳。遂家廬陵。媛適段甲。生子未晬。段卒。父母以媛少。議嫁之。媛發面自誓。事舅姑極備敬謹。教所生子爲善士。韓熙載使江南。表其節云。

卷十八

浮屠契丹高麗列傳第十五

嗚呼。南唐偏國短世。無大淫虐。徒以寢衰而亡。要其最可爲後世鑒者。酷好浮屠也。初。烈祖輔吳。吳都廣陵。而烈祖居建業。大築其居。窮極土木之工。旣成。用浮屠說。作無遮大齋。七會。爲工匠役夫死者薦福。俄有胡僧。自身毒中。卽土來。以貝葉旁行及所謂舍利者爲贄。烈祖召豫章龍興寺僧智玄。譯其旁行之書。又命文房書華嚴論四十部。奩帙副焉。並圖寫製論李長者像。班之境內。此事佛之權輿也。然烈祖未甚惑。後胡僧爲姦利。逐出之。國人則寢已成俗矣。及其末年。溧水大興寺。桑生木人。長六寸。如僧狀。右袒而左跪。衣械皆備。其色如純漆。可鑑。謂之須菩提。縣提置龕中。以仁壽節日來獻。烈祖始不驚異。迎置宮中。奉事甚謹。其徒因夸以爲感應。而識者按譙氏五行書。知且有喪。不三月。烈祖殂。及元宗後主之世。好之遂篤。幸臣徐遊。專主齋祠事。羣臣和附。惟恐居後。宮中造佛寺十餘。出金錢募民。及道士爲僧。都城至萬僧。悉取給縣官。後主退朝。與后頂僧伽帽。服袈裟。課誦佛經。

胡瞻頽。至爲瘤贅。手常屈指作佛印。僧尼犯姦淫。獄成。後主每曰。此等毀戒。本圖婚嫁。若冠笄之。是中其所欲。命禱百而捨之。奏死刑日。適遇其齋。則於宮中佛前燃燈。以達旦爲驗。謂之命燈。未旦而滅。則論如律。不然。率貸死。富人賂宦官竊續膏油。往往獲免。上下狂惑。不恤政事。有諫者輒被罪。歙州進士汪煥。上封事。言梁武惑浮屠而亡。陛下所知也。奈何効之。後主雖擢煥爲校書郎。終不能用其言。開寶初。有北僧號小長老。自言募化而至。多持瑿怪物。賂貴要爲輿助。朝夕入論天宮地獄果報之說。後主大悅。謂之一佛出世。服飾皆縷金絳羅。後主疑非法。答曰。陛下不讀華嚴經。安知佛富貴。因說後主多造塔像。以耗其帑廩。又請於牛頭山造寺千餘間。聚徒千人。日給盛饌。有食不能盡者。明旦再具。謂之折倒。蓋故造不祥語。以搖人心。及王師渡江。卽其寺爲營。又有北僧若塔於采石磯。草衣糲食。後主及國人施遺之。皆拒不取。及王師下池州。繫浮橋於石塔。然後知其爲閻也。金陵圍。後主召小長老求助。對曰。北兵雖強。豈能當我佛力。登城一麾。圍城之師爲小卻。後主真以爲佛力。合掌數。厚賜之。下令軍民。皆誦救苦菩薩。聲如江濤。未幾。梯衝環城。矢石亂下如雨。倉皇復召小長老。稱疾不至。始悟其姦。殺之。羣僧懼。併坐誅。乃共乞授甲出鬪。死國難。後主曰。教法其可毀乎。弗許。及國亡。後主入朝。過臨淮。禮普光王塔。施金帛。猶以千計。其後弟從鎰之子祝髮爲僧。名惟淨。景德祥符中。天下治安。西域獻佛書甚衆。惟淨博聞通梵學。繙譯精密。莫能及者。積官試光祿卿。譯經三藏。亦南唐之餘習云。

契丹覓唐書本傳。及五代史四夷附錄。今取其事之繫南唐者爲傳。

烈祖昇元二年。契丹主耶律德光。及其弟東丹王。各遣使以羊馬入貢。別持羊三萬口。馬二百匹來鬻。以其價市羅紩藥。烈祖從之。於是翰林院進二丹入貢圖。詔中書舍人江文蔚作贊。其詞曰。皇帝建西都之歲。神功邁於三古。嵐格於四裔。華夷咸若。駿奔結軌。粵六月。契丹使梅里捺盧古。東丹使兵器寺少令高徒煥。奉書致貢。咸集都公。脚庶尹。拜手稽首稱賀。以爲文德所服。受命之符也。若迺鴻荒以降。驟步相侔。耀武以信威。有所不及。任算以御物。有所不從。詩頌太原之師。則用伐矣。漢開朔方之地。則崇力矣。若我宣猷大麓。儷德無私。刑於朝廷。以及於荒服。旃裘左袵。捧日分光。殊方異產。充庭納贄。曰垂衣裳而天下治。斯之謂矣。有司紀美。烈於續事。傳曰。主上聖而德不聞。有司之過也。臣職在翰墨。親覩隆平。敢獻贊曰。赫矣聖武。纂堯之緒。要荒之長。駿奔臣附。伏

波之柱。單于之臺。遺鏃徒費。獻琛靡來。我后穆穆。我網恢恢。重譯日貢。皇哉唐哉。四年。德光遣使獻馬百匹。於是烈祖遣通事舍人副四方館事歐陽遇。借鴻臚少卿使契丹。假道於晉。高祖不可。遇及境而復。元宗嗣位。遣使者公乘鎔航海繼好。既至而契丹主兀欲被殺。弟述津遣元宗書曰。大契丹天順皇帝。謹致書大唐皇帝闕下。貴朝使公乘鎔等。自去秋以達東京海岸。適遭國禍。今年二月二十六日。部署一行。並諸儀物兵鎧。已至燕京。茲蒙敦念先朝。踐修舊好。既增摧痛。又切感銘。貴國長直官王朗陳篆。取問道先回。用附咨報。公乘鎔等已遣伴送使陳植等同回。止俟便風。卽令引道。而公乘鎔亦以蠟封帛書。其詞曰。臣鎔自去年六月雜鬻油。七月至鎮東關。遣王朗奉表契丹。九月。乃有番官夷離畢部牛車百餘乘。及鞍馬治路置頓。十月。至東京。留三日。契丹主遣閑廐使王廷秀。稱詔勞問。兼述泰寧王燕王九月同行大事。兀欲卽世。母妻併命。又遼東以西。水潦壞道。數百里車馬不通。今年正月。方至幽州。館於愍忠寺。先迎御容入宮。言元欲識唐皇帝面。乃引見如舊儀。問國書中機事。臣卽述奕世歡好。當謀分裂之事。契丹主喜。問復有何事。臣云軍機別有密書。契丹主接置袖間。乃云。吾與唐皇帝一如先朝往來。因置酒合樂。又諭臣曰。使人遠泛巨海而至。不期骨肉間倏起此事。道路所聞。必亦憂恐。手斟一玉鍾酒。先自啜。乃以勸臣。令飲。自旦至日晡始罷。自是數遣使宣勞。三日一賜食。謹遣王朗齎殷號子歸聞奏。殷號子不知何等語也。初。宋齊丘謀間晉。會契丹使燕人高霸來聘。歸至淮北。唐陰遣人刺殺之。霸有子乾從行。匿之濠州。於是契丹頗信以爲霸之死。出於晉人。保大十二年。述律遣其舅來。夜宴清風驛。起更衣。忽仆於地。視之。失其首矣。厚賞捕賊不得。久乃知周大將荆罕儒。知契丹使至。思遣客刺之。以間唐。乃下令能得吾枕者。賞三百緡。俄有劍客田英得之。卽給賞如約。仍屏人語之曰。能得江南番使頭。賞三千緡。英果得之。自是唐與契丹遂絕。及世宗兵出淮南。勅暴我罪曰。蠢爾淮甸。敢拒大邦。跋扈飛揚。垂六十載。幸累朝多事。與北虜交通。厚起戎心。誘爲邊患。所罪狀我雖非一。然首以通契丹爲興師之名。方石晉以父事契丹。而契丹每以兄事南唐。蓋戎狄習見唐之威靈。故聞後裔在江南。猶尊之不敢與他國齒。南唐亦頗恃以自驕。其實相結約。撓中原。皆虛辭。非能爲南唐助也。

高麗事。具唐書及五代史四夷附錄。今書南唐所載異聞。及高麗通南唐之見於傳記者。

高麗至五代初。國名曰大封。其王高氏。名躬。躬又晚年。果於誅殺。吳順義二年。當梁之龍德二年。爲海軍統帥。王建所殺。建自立。去大封之名。復稱高麗。以開州爲東京。平壤爲西京。吳天祚二年。當晉之天福元年。敗新羅百濟。於是倭耽浮羅於羅鐵勒東夷諸國皆附之。有二京六府九節度百二十郡。內列十省四部官。朝服紫丹緋綠青碧。青碧以年序遷。綠以上。選才能。賜之俸祿。賦以田租。尙冠禮。略如古制。婚姻。男女執手。自相媒許。俗重匾頭。生男。且巨。按壓其首。惟恐不匾也。昇元二年。遣使來貢方物。所上書。稱牋。大略云。今年六月內。當國中原府入吳。越國使張訓等回。伏聞大吳皇帝。已行禪禮。中外推戴。卽登大寶者。伏惟皇帝陛下。道契三無。恩涵九有。堯知天命。已去。卽禪瑤圖。舜念歷數。在躬。遂傳玉璽。逮夙。惟庸陋。獲託生成。所恨沃日波遙。浮天浪闊。幸遇龍飛之旦。阻申燕賀之儀。無任歸仁戴聖。鼓舞激切之至。儀式如表。而不稱臣。烈祖御武功殿。設細仗。見其使。自言代主朝覲。拜舞甚恭。宴於崇英殿。出龜茲樂作番戲。召學士承旨孫忌侍宴。三年。又遣其贖評侍郎柳勳。律來貢方物。其後史冊殘缺。來與否不可考矣。

是書凡馬令胡恢陸游三本。先輩云。馬胡詮次。識力相似。而陸獨逾邁。得史遷家法。今馬本盛行。胡本不傳。放翁書一十八卷。僅見於鹽官胡孝轅秘冊函中。又半燼於武林之火。庚午夏仲。購其焚餘板。一百有奇。斷蝕不能讀。因簡家藏抄本訂正。附梓於全集逸稿之末。至若與馬玄康異同繁簡。已詳見胡沈兩公跋語云。

湖南毛晉識。

此
页
空
白

南唐書音釋

習氏明晉紹漢。比宋論乃章。漢事失於陳志。唐尙有是書。戚光既校之。并音釋。

本紀一之三

南唐書一之三

烈祖第一。昇音弁。日光貌。明也。憲宗第八子憲宗凡二十子。見城昇州古金陵。唐稱昇州城。始東高

宗。蒜山在鎮江城。捍闔捍闔作擺。開也。鬼谷子有同施橋即今金陵城東十里銅橋。据音弗。草多

厥豐。南郊牛頭山有廢宮址。相傳太廟金陵志。今乾明玄武湖見馮延巳傳。鍾山在城東北十五里。即蔣

鎮州。馬元康胡恢宋陽羨馬令祖。太學博士。元康世家金陵。多記唐事。書未成而卒。令於崇寧

臧否人物。能詩。○案南唐諸書。有烈祖開基誌十卷。唐滁州刺史王顏撰。起天祐乙丑。止昇元癸

卯。烈祖實錄十三卷。內闕二卷。吳錄二十卷。並高遠撰。遠傳書未成。卒。焚其草。故多遺落。

江南錄十卷。宋太宗以徐鉉。湯悅皆唐舊臣。命撰之。晁无咎曰。王安石言。鉉書至亡國之際。不

言其君之過。但以曆數存亡論之。於春秋箕子之義為得也。然潘佑以直見殺。而鉉書佑死以妄。豈

惟厚誣忠臣。其欺君亦甚。世多以此言為然。獨劉道原得佑子華所上父事迹。略與江南錄同。乃知

鉉等非欺誣也。悅即殷崇義。避宋諱改姓。因并易名。江南別錄四卷。宋陳彭年撰。吳唐四主傳也。

南唐近事二卷。紅表傳三卷。並鄭文寶撰。江南野史二十卷。宋龍衮撰。凡八十四傳。江南館載二

卷。其序言鉉等奉詔為江南錄後。王舉。路振。陳彭年。楊億皆有書。大概皆不足以史稱。而褒尤甚。

熙寧八年。得鄭君所遺於楚州。其事有人家所遺。或小異者。刪落是正。以類相從云。鄭君序者皆

不著名。已上并馬胡二家。凡十一書。惟陸游徧取折衷。成此書也。游亦不著名。以他書考而知。

豈時以私著避也。

元宗第二。璟俱承切。邊字通作。近濁唐天文志。流星尾長丈餘。出紫微。入濁。大星自東濁際西流。

濁。有星出東壁。東北速行至濁沒。六月朔。日食五分。至酉六刻帶二分。入濁不見。七月。月食。

丑五刻虧見東北方。食及二分半。入濁不見。食甚。及復五分。月食成一刻。虧見東南方。出濁。

未員六分。在東井度中。至五刻復。以日月食朔望出沒之際。觀少微長垣各四星。在贊於倫切。瑯寶說益明矣。又凡此書星變。五代史通鑑皆不載。蓋其史失之。

他勞切。柳慶林切。暹。榜音彭。答擊也。漢書。榜答。竇通作。清流關在滁州西南二十里。周孫晟玉名。柳琛。又勞格彭考字通用。一作榜。竇隕。清流關之捷時。宋太祖為將。孫晟

即孫信祖郭威即帝位。稱周。追訖雪律切。音戊。說文。誘也。或作悅。漢書。悅於邪忌。信祖尊高祖璟。廟號信祖。廟說。如淳曰。見誘悅也。今俗猶云相諷悅。諷音小。

後主第。煜音耀。殷崇義見烈祖紀馬暴張張通作張。張亦通。平聲。皖合版切。山高彥局。字書。口辰言是姓。姓書無焄姓。但有過焄二姓。並音戈。過。風俗通。夏諸侯國氏焉。漢有兗州刺史詡。急就章。有過說。春秋。寒促處其子燒于過。謂之過燒。少康滅之。以封諸侯。其地漢東萊掖縣北過

鄉是也。宋季有尙書郎昂望。出高平過。楚大夫封焄。因氏焉。三輔決錄。有扶風太守尙。或以焄即焄。非也。宋季猶有過焄。或曰即過。後世去走。如隨為隋爾。亦非也。鄭樵氏族略。以古帝名為

氏者。女媧之後有焄氏。焄與尙音同而字近。焄當是焄而去女文爾。案秋備志。鍾菴字德林。案徐鉉載他牧守自唐康震蕭復。至南唐鄭彥華焄彥。凡九十五人。惜彥事績莫考也。鍾菴王夫人墓誌。王

太原人。家豫章。舊父司徒。繼戎是邦。因娶焉。二子。長懷建。繇校書郎歷東府掾。以羣從百口家豫章。辭祿公朝。因除洪州都督府司馬。次。菴也。以屬詞敦行。從事咸藩。累登臺郎。為集賢

殿學士。會中令齊王避親謬寵。授鉞臨川。朝廷慎選英僚。以光幕府。除撫州觀察判官檢校屯田郎中。既拜。而夫人疾亟。以交泰元年卒于京師嘉瑞坊官舍。鉉又有保大九年。送德林員外。赴東府

亞尹詩序。鉉等錢于石頭城。分題為詩。菴有賦山別諸知己詩云。暮景江亭上。靈山日望多。只愁辭輦。長恨隔嵯峩。有意圖功業。無心憶薜蘿。親朋將遠別。且共醉笙歌。又克復揚州後。以菴辭

侍從。攝尹正東府。鉉等分韻賦詩。弟翁亦與。有序。菴有得新鴻別諸同志詩云。隨陽來萬里。點點度遙空。影落長江水。聲悲半夜風。殘秋辭絕漠。無定似鶯蓬。我有離羣恨。飄飄類此鴻。菴之

才譽。亦可見矣。但馬承信兄弟事未詳。青山案郡志。後主繼青龍山。一靴狙觸網。淚下漣類。舊嘉瑞坊在今城內東南隅。菴。倉甸切。屢顧其腹。後主命虞人守之。其夕生二子。還幸大

理寺。親錄囚。一大辟婦以孕在獄。適產二子。因得減死。山在城。膜拜長跪拜也。東三十五里。然城南四十里亦有青山。但郡志所傳。若頗悉爾。膜拜膜音謨。

唐年世總釋凡七十

唐天祐元年甲子。昭宗天復四年。改元。朱二年乙丑。蜀天三年丙寅。蜀天四年丁卯。蜀天復七年。開平元年戊辰。晉岐。淮。六年己巳。晉岐。吳岐王承八年辛未。晉岐。岐梁

開平元年。蜀武成元年。六年。七年。加淮南楊隆演嗣吳王。吳。蜀永平元年。

昇都金陵府。以宣之當塗廣信并置。蕪湖。銅陵。繁昌來屬。及當塗為雄遠軍。揚東都江都府。改江

昇復以他之青陽來屬。與舊領上元。江寧。句容。溧水。溧陽。為十縣也。場陽為廣陵。以海陵。改揚

子曰永貞。以其白沙鎮為迎鑾鎮。雄觀揚之六合。楚以鹽城屬秦。吳順泗。滁改永陽。和光

黃舒。廬昭順。壽清順。海泰。以揚之海陵置。領揚之興化。濠定遠。通靜海。雄遠軍見。潤鎮海。常

宣見昇。口攝。池康化軍。置銅陵。饒永平軍。信置鉛。江口化軍。置德安。順昌。湖口。口洪南都南

置清江。改新吳。鄂軍。筠割洪之高安。置上高。萬載。清江。筠音口。以南城置。袁置萬。吉泉。虔兩

為奉口置靖安。鄂軍。筠割洪之高安。置上高。萬載。清江。筠音口。以南城置。袁置萬。吉泉。虔兩

軍。口瑞金。龍南。石建永安軍。改忠義。汀劍割建汀。南口口樟名以泉。清源

城。上口口口贛州。建軍。置歸化建寧。汀劍割建汀。南口口樟名以泉。清源

列傳一之十五 南唐書四之十八

宋齊丘第一。詩凡三十四韻。有曰。山盛龍虎健。水黑螭蜃作。日晚嚴城鼓。風來蕭寺鐸。金桃帶葉

金陵城中鳳凰臺作。今石刻王紹顏奉勅書真竹

無感衰。媚柳先搖落。一聯小異。昇元中勅立。

周宗第二。臺城六朝宮也。在都城內北。烈祖因築府就為宮。宋為府治。後為行宮。在今

建勳等畫影。皆輾裹公服。一如盛唐也。志謂之舊子城。都城亦烈祖築。子城都城。比古城皆近南甯。摺襟頭角

徐錯錯音措。又音皆。諦審音帝。邊鎬鎬音好。柳。柴克宏第三。頰麀又音贊。王會。破音叨。弓。

遊簡言。謫音讀。怨。

刁彥能 舉刀示先主 先主，蓋舊書文當云烈祖也。

鍾謨 第四 沾沾自銜 沾音瞻。輕薄也。漢魏其傳。沾沾音喜。銜音縣。說文。自矜也。

朱匡業 第五 朱元叛元宗議親征 元本作烈祖。今按其事正之。

朱令贊 贊見元宗紀。

江文蔚 第七 捨爵策勳 出左氏。捨舍去聲。

馮延己 第八 顏見上柴 延魯 玄武湖 在金陵城北。南唐近事。湖周廻十數里。幕府。雞籠。蔣山。環聳左右。名園勝境。掩映如畫。六朝舊迹。多出其間。每裁

菱藕。罟網之利。不下數千云。案湖。宋王安石言開為田。今成平陸矣。

孫忌 豆盧 姓出北地。

彭師鬻 鬻字通作皓鬻。

韓熙載 第九 梅嶺岡 在城南。郡志。謝公墓上。有無字碑。今皆失其處。慕容紹宗 案北史。紹宗初事爾朱。歸高歡。歡命其子

劉仁瞻 第十 壽州 本漢壽春。周世宗得壽州。從其軍淮北大下蔡。改名忠正軍。以旌仁瞻之節。復以壽州故治立壽春縣。隸忠正軍。宋置安豐軍於壽春縣。今安豐路也。

潘佑 見上馬元康下。

嚴續 肺附 見漢書劉向衛青傳。肝肺相附。通作肺。音副。

張易 嵬戔 即巍戔。嵬音噉。懷怒氣也。漢書作音烏碎噉。晉灼曰音烏。恚怒聲也。

郭廷謂 第十 竿橋 通作笮。音昨。以竹索為橋也。字又音窄而義異。

林仁肇 擿揚子 擿音剔。挑也。發也。漢趙廣漢傳。發姦擿伏。擿音索塗。字又通作擿擿。而音義異。

盧絳 新淦漢縣。隋以屬吉州。宋以屬臨江軍。淦水出焉。淦。從水。金聲。古暗切。

陳喬 脫屣 屣音徒。孟子。猶棄敝屣也。又通作躄。屣不躄根也。屣。所寄切。

李元清 第十。趨音驢。奮走也。捷也。

魏岑 怵見上。元宗紀作詠。

元宗子從善 第十。悁音緣切。詩。憂心悁悁。蓋兼絹絳捐委之義。

雜藝方士吳廷紹 第十。貽音怡。

潘辰 紫極宮 南唐近事。辰後欲傳其法於人。夢其師怒擅演靈術。傳非其人。陰奪其法。寤。不復能劍云。尋病終紫極宮。臨終上言。乞桐棺葬近地。後當尸解。上從之。使中貴人護

冢觀之。骸骨尚在。迄無異焉。

耿先生 燭火乾也。亦方山 在城東南三十里外。吳葛仙翁所居。有丹井。一名天印山。有寶華宮碑。宮基經火。正當井處。故老云。當時即焚之也。

節義 史諫 諫通作諫。札也。漢志。披圖諫。

吳媛 媛音援。女賢也。字又通作娟。粹 祖對切。子生一歲也。

浮屠 第十。身毒 身音捐。又音乾。毒音篤。國在大夏東南。今呼天衣祴 語出佛書。祴音刻。牛頭山 在城南十里。即晉王尊指為天關者。

契丹 旃俗作 寶徐刃切。會禮之財也。通作臚。漢書唐書作進。

高麗 倭 竊茲 音丘慈。○已上音釋。姑据所知。亦有特略之者。加詳者。幸觀者審焉。

老學庵筆記

卷一

徽宗南幸。至潤郡官迎駕於西津。及御舟抵岸。上御棕頂轎子。一宦者立轎旁呼曰。道君傳語。衆官不須遠來。衛士臚傳以告。遂退。

徽宗南幸還京。服栗玉並桃冠。白玉簪。赭紅羽衣。乘七寶輦。蓋吳敏定儀注云。

高宗在徽宗服中。用白木御椅子。錢大主入覲。見之曰。此檀香椅子耶。張婕妤掩口笑曰。禁中用胭脂阜莢多。相公已有語。更敢用檀香作椅子耶。時趙鼎張浚作相也。

建炎苗劉之變。內侍遇害至多。有秦同老者。自揚州被命至荆楚。前一日還行在。尙未得對。亦死焉。又有蕭中道者。日侍左右。忽得罪。絀爲外郡監。當前一日出城。遂免。

臨安父老言。苗劉戕王淵。在朝天門外。今都進奏院前。然日曆及諸公記錄皆不書。但云死於路衢而已。邵彪所錄。謂死於第。尤非也。

鼎澧羣盜如鍾相楊么。鄉語謂幻爲么。戰船有車船。有槳船。有海鯁頭。軍器有鞞子。其語謂鞞爲饒。有魚叉。有木老鴉。鞞子魚叉。以竹竿爲柄。長二三丈。短兵所不能敵。程昌萬部曲。雖蔡州人亦習用鞞子等。遂屢捷。木老鴉一名不藉。木取堅重木爲之。長財三尺許。銳其兩端。戰船用之。尤爲便捷。官軍乃更作灰礮。用極脆薄瓦罐。置毒藥石灰鐵蒺藜於其中。臨陣。以擊賊船。灰飛如烟霧。賊兵不能開目。欲效官軍爲之。則賊地無窳戶。不能造也。遂大敗。官軍戰船。亦倣賊車船而增大。有長三十六丈。廣四丈一尺。高七丈二尺五寸。未及用。而岳飛以步兵平賊。至完顏亮入寇。車船猶在。頗有功云。初。張公之行。趙元鎮丞相以詩送之云。速宜淨掃妖氛了。來看錢塘八月潮。鼎澧羣盜。惟夏誠劉衡二砦。據險不可破。二人每自咤曰。除是飛過洞庭湖。其後卒爲岳飛所破。蓋語讖云。趙元鎮丞相謫朱崖。病亟。自書銘旌云。身騎箕尾歸天上。氣作山河壯本朝。

靖康二年。浙西路勤王兵。杭州二千人。湖州九百一十五人。秀州七百一十六人。平江府一千七百三十八人。常

州七百八十五人。鎮江府六百人。一路共六千七百五十四人。以二月七日起發。東都之陷已累月矣。

集英殿宴金國人使。九盞。第一肉鹹鼓。第二爆肉雙下角子。第三蓮花肉油餅骨頭。第四白肉胡餅。第五羣僂翁。太平畢羅。第六假圓魚。第七柰花索粉。第八假沙魚。第九水飯鹹鼓。旋鮓瓜薑看食棗錫子。臚餅。白胡餅。饊餅。厚

紹興辛酉與虜交兵。虜遜。議者謂當取壽。穎宿三州屯重兵。然後淮可保。淮可保。然後江可固。惜其不果用也。建康城。李景所作。其高三丈。因江山爲險固。其受敵惟東北兩面。而壕塹重複。皆可堅守。至紹興間。已二百餘年。所損不及十之一。

漢人入仕。有以貲爲郎者。司馬相如張釋之是也。有入錢入穀賞以官者。卜式黃霸是也。入錢穀。則今買官之類。以貲。則非也。

秦會之在山東。欲逃歸。舟楫已具。獨懼虜有告者。未敢決。適遇有相識稍厚者。以情告之。虜曰。何不告監軍。會之對以不敢。虜曰。不然。吾國人若一諾公。則身任其責。雖死不憾。若逃而獲。雖欲貸。不敢矣。遂用其言告監軍。監軍曰。中丞果欲歸耶。吾契丹亦有逃歸者。多更被疑。安知公歸而南人以爲忠也。公若果去。固不必顧我。會之謝曰。公若見諾。亦不必問某歸後禍福也。監軍遂許之。

黃元暉爲左司諫。論事忤蔡氏。謫昭潭。後復管勾江州太平觀。謝表曰。言之未盡。悔也。奚追。

張芸叟作漁父詩曰。家住未江邊。門前碧水連。小舟勝養馬。大罟當耕田。保甲元無籍。青苗不著錢。桃源在何處。此地皆神仙。蓋元豐中謫官湖湘時所作。東坡取其意爲魚蠻子云。

張德遠誅范瓊於建康獄中。都人皆鼓舞。秦會之殺岳飛於臨安獄中。都人皆涕泣。是非之公如此。

政和中大饑。下桂府進面具。比進到。稱一副。初訝其少。乃是以八百枚爲一副。老少妍陋無一相似者。乃大驚。至今桂府作此者皆致富。天下及外夷皆不能及。

京師承平時。宗室戚里歲時入禁中。婦女上犢車。皆用二小鬟持香毬在旁。而袖中又自持兩小香毬。車馳過。香烟如雲。數里不絕。塵土皆香。

明州江瑤柱有二種。大者江瑤，小者沙瑤。然沙瑤可種，逾年則成江瑤矣。海檜亦有二種，海檜天矯堅瘦皆天成。又有刻削蟠屈而成者，名土音杜檜，海檜絕難致。凡人家所有，大抵土檜也。

晁以道爲明州船塢，日日平旦，具衣冠焚香占一卦。一日，有士人訪之，坐間小雨，以道語之曰：「某今日占卦有折足之象，然非某也。客至者當之，必驗無疑。」君宜戒之。士人辭去，至港口，踐滑而仆，脛幾折，療治累月乃愈。

國初，士大夫戲作語云：「眼前何日赤，腰下幾時黃。」謂朱衣吏及金帶也。宣和間，親王公主及他近屬戚里入宮，輒得金帶關子，得者旋填姓名賣之，價五百千。雖卒伍屠酤，自一命以上，皆可得。方臘破錢，唐時朔日，太守客次有服金帶者數十人，皆朱劬家奴也。時諺曰：「金腰帶，銀腰帶，趙家世界朱家壞。」

仁宗賜宗室名。太祖下曰：「世。」太宗下曰：「仲。」秦王下曰：「叔。」皆兄弟行。世，卽長也。其後世字之曾孫，又曰伯，則失之。

淳熙己酉十月二十八日，駕車幸候潮門外大校場大閱。是日上早膳畢出郊，從駕臣僚及應奉官，並戎服擲帶子著靴。大閱畢，丞相親王以下賜茶。是日駕出麗正門，入和寧門，沿路官司免起居。

建炎中，平江造戰船，略計其費四百料，八艚戰船長八丈，爲錢一千一百五十九貫。四艚海鷗船長四丈五尺，爲錢三百二十九貫。

荆公素輕沈文通，以爲寡學。故贈之詩曰：「脩然一榻枕書臥，直到日斜騎馬歸。」及作文公墓誌，遂云：「公雖不常讀書，或規之曰：『渠乃狀元。』此語得無過乎？」乃致讀書作視書，又嘗見鄭毅夫夢仙詩曰：「授我碧簡書，奇篆蟠丹砂，讀之不可識，翻身凌紫霞。」大笑曰：「此人不識字，不勘自承。」毅夫曰：「不然，吾乃用太白詩語也。」公又笑曰：「自首臧等，祕閣有端硯，上有紹興御書一頑字。」唐有準勅惡詩，今又有準勅頑硯耶。

潘子賤題蔡奴傳神云：「嘉祐中，風塵中人亦如此。嗚呼盛哉！然蔡實元豐間人也。仇氏初在民間，生子，爲浮屠，曰了元。所謂佛印禪師也。已而爲廣陵人國子博士李閭妾，生定，出嫁郟氏。生蔡奴，故京師人，謂蔡奴爲郟六。」

紹聖元符間，汪內相彥章有聲太學，學中爲之語曰：「江左二寶，胡仲汪漢，仲字彥時，亦新安人。終符寶郎，曾文清風興誦論語一篇，終身未嘗廢。」

先左丞言荆公有詩正義一部，朝夕不離手，字大半不可辨。世謂荆公忽先儒之說，蓋不然也。

靖康國破。二帝播遷。有小崔才人與廣平郡王儲君幼子。名捷。俱匿民間。已近五十日。虜亦不問。有從官餽以食。遂爲人所發。亦不免。不十日。虜去矣。城中士大夫可罪至此。

金賊劫遷宗室。我之有司。不遺餘力。然比其去。義士匿之獲免者。猶七百人。人心可知。國初韻略載進士所習有何論一首。施肩吾及第。勅亦列其所習何論一首。何論蓋如三傑佐漢執優。四科取士。何先之類。

嘉興人聞人茂德名滋。老儒也。喜留客食。然不過蔬豆而已。郡人求館客者。多就謀之。又多蓄書。喜借人。自言作門客牙。充書籍行。開豆腐羹店。予少時。與之同在勅局。爲刪定官。談經義。滾滾不倦。發明極多。尤邃於小學云。

張芸叟過魏文貞公舊莊。居者猶魏氏也。爲賦詩云。破屋居人少。柴門春草長。兒童不識字。耕稼鄭公莊。此猶未失爲農。神宗夜讀宋璟傳。賢其人。詔訪其後。得於河朔。有裔孫曰宋立。遺像譜牒告身皆在。然宋立者已投軍矣。欲與一武官。而其人。不願。乃賜田十頃。免徭役雜賦云。其微又過於魏氏。言之可爲流涕。政和末。議攻元。王黼擬用重和。既下詔矣。范致虛間白上曰。此契丹號也。故未幾復改宣和。然宣和乃契丹宮門名。猶我之宣德門也。年名則實曰重熙。遠建中靖國後。遼避天祚嫌名。追謂重熙曰重和耳。不必避可也。

建炎維揚南渡時。雖甚倉猝。二府猶張蓋搭城坐而出。軍民有懷輒狙擊黃相者。既至臨安。二府因言方艱危時。臣等當一切貶損。今張蓋搭坐。尙用承平故事。欲乞並櫓省去。候事平日依舊。詔從之。實懲維揚事也。

林自爲太學博士。上章相子原啓云。伏惟門下相公有猷有爲。無相無作。子厚在漏舍。因與執政語及。大罵云。遮漢敢亂道如此。蔡元度曰。無相無作。雖出佛書。然荆公字說嘗引之。恐亦可用。子厚復大罵曰。荆公亦不曾奉勅許亂道。况林自乎。坐皆默然。

靖康末。括金賂虜。詔羣臣服金帶者。權以通犀帶易之。獨存金魚。又執政則正透。從官則倒透。至建炎中興。朝廷草創。猶用此制。呂好問爲右丞。特賜金帶。高宗面諭曰。此帶朕自視上方工爲之。蓋特恩也。紹興三年。兵革初定。始詔依故事。服金帶。

建炎初。按景德幸澶州故事。置御營使。以丞相領之。執政則爲副使。上御朝。御營使副先上奏本司事。然後三省

密院相繼奏事其重如此。

張晉彥才氣過人。然急於進取。子孝祥在西掖時。晉彥未老。每見湯岐公自薦。岐公喜之曰。太師尙書令兼中書令。是公合作底官職。餘何足道。所稱之官。蓋輔臣贈父官也。意謂安國且大用耳。晉彥終身以爲憾。

紹興末。巨公丁丑生者數人。或戲以衰健放榜。陳福公作魁。凌尙書景夏未名。張魏公黜落。

紹興末。朝士多饒州人。時人語曰。諸公皆不爲癡漢。又有監司發薦京官。狀以關節欲與饒州人。或規其當先孤寒。監司者憤然曰。得饒人處且饒人。時傳以爲笑。

王嘉叟自洪倅召爲光祿丞。李德遠亦召爲太常丞。一日相遇於景靈幕次。李謂王曰。見公告詞云。其鐫月廩。仍褫身章。謂通判借牙緋。入朝則服綠。又俸薄也。王答之曰。亦見君告詞矣。李曰。云何。曰。具官李浩。但知健羨。不揆孤寒。旣名右相之名。又字元樞之字。蓋謂史丞相張魏公也。滿座皆笑。

予去國二十七年復來。自周丞相子充一人外。皆無復舊人。雖吏胥亦無矣。惟賣卜洞微山人亡恙。亦不甚老。話舊愴然。西湖小昭慶僧了文。相別時未三十。意其尙存。因被命與奉常諸公同檢視郊廟壇壝。過而訪之。亦已下世。弟子出遺像。乃一老僧。使今見其人。亦不復省識矣。可以一歎。

晏尙書景初作一士大夫墓誌。以示朱希真。希真曰。甚妙。但似欠四字耳。然不敢以告。景初苦問之。希真指有文集十卷字下曰。此處欠。又問欠何字。曰。當增不行於世四字。景初遂增藏於家三字。實用希真意也。

秦會之丞相卒。魏道弼作參政。委任頗專。且大拜矣。翰苑欲先作白麻。又不能辦。假手於士人陳豐。豐以其姓魏。遂以晉絳和戎。對鄭公論諫。久之。道弼出典藩。而沈守約万俟卨元忠並拜左右揆。翰苑者倉猝取豐所作制。以與沈公。而忘易晉絳鄭公之語。實錄例載拜相麻。予在史院。欲刪此一聯。會去國。不果。

陳福公長卿。重厚粹美。有天人之相。然議者擬其少英偉之氣。予爲編修官時。一日。與沈持要尹少稷見公于都堂閣。公忽盛怒曰。張德遠以元樞。輒受三省樞密院訴牒。雖是勳德重望。亦豈當如此。方言此時。精神赫然。目光射人。退以告朝士。皆云平生未嘗見此公怒也。古人有貴在于怒者。此豈是耶。

李莊簡公泰發奉祠還里。居于新河。先君築小亭曰千巖亭。盡見南山。公來必終日。嘗賦詩曰。家山好處尋難遍。

日日當門只臥龍。欲盡南山巖壑勝。須來亭上少從容。每言及時事。往往憤切興歎。謂秦相曰咸陽。一日來坐亭上。舉酒屬先君曰。某行且遠謫矣。咸陽尤忌者。某與趙元鎮耳。趙既過嶠。某何可免。然聞趙之聞命也。涕泣別子弟。某則不然。青鞵布襪。卽日行矣。後十餘日。果有藤州之命。先君送至諸暨。歸而言曰。秦發談笑慷慨。一如平日。問其得罪之由。曰。不足問。但咸陽終誤國家耳。咸陽指楹。

張樞密子功。紹興末還朝。已近八十。其辭免及謝表。皆以屬予。有一表。用飛龍在天。對老驥伏櫪。公皇恐。語周子充左史。託言于予。易此二句。周叩其故。則曰。某方巧去。恐人以爲志在千里也。周笑解之曰。所謂志千里者。正以老驥已不能行。故徒有千里之志耳。公雖筋力衰。豈無報國之志耶。子功亦笑而止。蓋其謹如此。又嘗謂予曰。先人有遺稿滿篋。皆諸經訓解。字畫極難辨。惟某一人識之。若死。遂皆不傳。豈容不亟歸耶。

汪廷俊從梁才甫辟爲大名機幕。專委以修北京宮闕。凡五年乃成。歲一再奏功。輒躡遷數官。五年間。自宣教郎轉至中奉大夫。其濫賞如此。

予在南鄭。見西陲俚俗謂父曰老子。雖年十七八。有子亦稱老子。乃悟西人所謂大范老子。小范老子。蓋尊之以爲父也。建炎初。宗汝霖留守東京。羣盜降附者百餘萬。皆謂汝霖曰宗爺爺。蓋此比也。

陳瑩中遷謫後。爲人作石刻。自稱除名勒停送廢州編管陳某撰。劉季高得罪秦氏。坐贓廢。後雖復官。去其左字。季高緘題及作文。皆去左字。不以爲愧也。孫仲益亦坐以贓罪去左字。則但自稱晉陵孫某而已。至紹興末。復左朝奉郎。乃署銜。

予嘗與查元章讀太宗實錄。有侯莫陳利用者。予問有對否。元章曰。昨虜使有烏古論思謀。可對也。予曰。虜人姓名五字者固多矣。元章曰。不然。侯莫陳可析爲三姓。烏古論亦然。故爲工也。

毛德昭名文。江山人。苦學至忘寢食。經史多成誦。喜大罵極談。紹興初。招徠直諫。無所忌諱。德昭對客議時事。率不遜語。人莫敢與酌對。而德昭愈自若。晚來臨安赴省試。時秦會之當國。數以言罪人。勢焰可畏。有唐錫永夫者。遇德昭于朝天門茶肆中。素惡其狂。乃與坐。附耳語曰。君素號敢言。不知秦太師如何。德昭大駭。亟起掩耳曰。放氣放氣。遂疾走而去。追之不及。

北方多石炭。南方多木炭。而蜀又有竹炭。燒巨竹爲之。易然。無烟。耐久。亦奇物。邛州出鐵。烹鍊利於竹炭。皆用牛車載以入城。予親見之。

杜少陵在成都。有兩草堂。一在萬里橋之西。一在浣花。皆見於詩中。萬里橋故迹。湮沒不可見。或云。房季可園是也。

蜀人爨薪皆短而爲。東縛齊密。狀如大餅。不可遽燒。必以斧破之。至有以斧柴爲業者。孟蜀時。周世宗志欲取蜀。蜀卒涅面爲斧形。號破柴都。

謝景魚名倫。滌硯法。用蜀中貢魚紙。先去墨。徐以絲瓜磨洗。餘漬皆盡。而不損硯。

青城山上官道人。北人也。巢居食松麩。年九十矣。人有謁之者。但粲然一笑耳。有所請問。則託言病暗。一語不肯答。予嘗見之于丈人觀道院。忽自語養生曰。爲國家致太平。與長生不死。皆非常人所能然。且當守國使不亂。以待奇才之出。衛生使不夭。以須異人之至。不亂不夭。皆不待異術。惟勤而已。予大喜。從而叩之。則已復言暗矣。

呂周輔言東坡先生與黃門公南遷。相遇于梧藤間。道旁有鬻湯餅者。共買食之。物惡不可食。黃門置箸而歎。東坡已盡之矣。徐謂黃門曰。九三郎。爾尙欲咀嚼耶。大笑而起。秦少游聞之曰。此先生飲酒。但飲溼而已。

魏道弼參政使金人軍中。抗辭不撓。虜酋大怒。欲于馬前斬之。揮劍垂及頸而止。故道弼頭微偏。

使金舊惟使副得乘車。三節人皆騎馬。馬惡則蹄齧。不可羈。鈍則不能行。良以爲苦。淳熙己酉。完顏璟嗣僞位。始命三節人皆給車。供張飲食。亦比舊加厚。

淳熙己酉。金國賀登寶位。使自云悟室之孫。喜讀書。著作郎權兵部郎官鄧千里館之。因遊西湖。至林和靖祠堂。忽問曰。林公嘗守臨安耶。千里笑而已。

謝子肅使金回云。金廷羣臣。自徒單相以下。大抵皆白首老人。徒單年過九十矣。又云。虜姓多三兩字。又極怪。至有姓斜卯者。己酉春。虜移文境上曰。皇帝生日。本是七月。今爲南朝使人冒暑不便。已權改作九月一日。其內鄉之意。亦可嘉也。

楊廷秀在高安。有小詩云。近紅暮看失燕支。遠白宵明雪色奇。花不見桃惟見李。一生不曉退之詩。予語之曰。此

意古人已道。但不如公之詳耳。廷秀愕然。問古人誰曾道。予曰。荆公所謂積李兮縞夜。崇桃兮炫晝是也。廷秀大喜曰。便當增入小序中。

卷二一

張廷老名珙。唐安江原人。年七十餘。步趨拜起健甚。自言夙興必拜數十。老人血氣多滯。拜則支體屈伸。氣血流通。可終身無手足之疾。

魯直在戎州作樂府曰。老子平生。江南江北。愛聽臨風笛。孫郎微笑。坐來聲噴霜竹。予在蜀見其稿。今俗本政笛爲曲以協韻。非也。然亦疑笛字太不入韻。及居蜀久。習其語音。乃知爐戎間謂笛爲獨。故魯直得借用。亦因以戲之耳。

秦會之初得疾。遣前宣州通判李季設醮于天台桐柏觀。季以善奏章自名。行至天姥嶺下。憩小店中。邂逅一士人。頗有俊氣。問季曰。公爲太師奏章乎。曰然。士人搔首曰。徒勞耳。數年間。張德遠當自樞府再相。劉信叔當總大兵捍邊。若太師不死。安有是事耶。季不復敢與論。即上車去。醮之明日。而聞秦公卒。

英州石山。自城中入鍾山。涉錦溪。至靈泉。乃出石處。有數家。專以取石爲生。其佳者。質溫潤蒼翠。叩之。聲如金玉。然匠者頗闕之。常時官司所得。色枯槁。聲如擊朽木。皆下材也。

葉相夢錫嘗守常州。民有比屋居者。忽作高屋。屋山覆蓋鄰家。鄰家訟之。謂他日且占地。葉判曰。東家屋被西家蓋。仔細思量無利害。他時折屋別陳詞。如今且以壁爲界。

蜀人任子淵好譴。鄭宣撫剛中自蜀召歸。其實秦會之欲害之。鄭公治蜀。有惠政。人猶覬其復來。數日。乃聞秦氏之指。人人太息。衆中或曰。鄭不來矣。子淵對曰。秦少恩哉。人稱其敢言。

秦會之以孫女嫁郭知運。自答聘書曰。某人東第華宗。南宮妙選。乃肯不卑於作費。何辭可拒于盟言。其夫人欲去作贅字。曰。太惡模樣。秦公曰。必如此。乃束縛得定。聞者笑之。

張子韶對策。有桂子飄香之語。趙明誠妻李氏嘲之曰。露花倒影柳三變。桂子飄香張九成。

王荆公作相。裁損宗室恩數。於是宗子相率馬首陳狀。訴云。均是宗廟子孫。且告相公看祖宗面。荆公厲聲曰。祖宗親盡。亦須祧遷。何況賢輩。於是皆散去。

呂正獻平章軍國時。門下客因語次。或曰。嘉問敗壞家法。可惜。公不答。客愧而退。一客少留。曰。司空尙能容呂惠卿。何況族黨。此人妄意迎合。可惡也。公又不答。既歸。弟子請問二客之言如何。公亦不答。

西山十二真君各有詩。多訓誡語。後人取焉。以占吉凶。極驗。射洪陸使君廟。以杜子美詩爲籤。亦驗。予在蜀。以淳熙戊戌春被召。臨行。遣僧則華往求籤。得遣與詩曰。昔者龐德公。未曾入州府。襄陽耆舊間。處士節獨苦。豈無濟時策。終竟畏網罟。林茂鳥有歸。水深魚知聚。舉家隱鹿門。劉表焉得取。予讀之惕然。顧迫貧從仕。又十有二年。負神之教多矣。

李知幾少時。祈夢于梓潼神。是夕夢至成都天寧觀。有道士指織女支機石曰。以是爲名字。則及第矣。李遂改名石。字知幾。是舉果省。

伯父通直公。字元長。病右臂。以左手握筆。而字法勁健過人。宗室不微亦然。然猶是自幼習之。梁子輔年且五十。中風。右臂不舉。乃習用左手。逾年。作字勝于用右手時。遂復起作郡。

趙廣合肥人。本李伯時家小史。伯時作畫。每使侍左右。久之。遂習畫。尤工作馬。幾能亂真。建炎中陷賊。賊聞其善畫。使圖所擄婦人。廣毅然辭以實不能畫。脅以白刃。不從。遂斷右手拇指。遺去。而廣平生實用左手。亂定。惟畫觀音大士而已。又數年乃死。今士大夫所藏伯時觀音。多廣筆也。

禁中舊有絲鞋局。專挑供御絲鞋。不知其數。嘗見蜀將吳玠。被賜數百緡。皆經奉御者。壽皇卽位。惟臨朝服絲鞋。退卽以羅鞋易之。遂廢此局。

今上卽位。詔每月三日七日十七日二十七日。皆進素膳。

舊制。皇帝曰御膳。中宮曰內膳。自壽成皇后初立。懇辭內膳。詔權罷。今中宮因之。

駕頭舊以一老宦者。抱繡裹兀子于馬上。高廟時猶然。今乃代以閣門官。不知自何年始也。

王聖美子韶。元祐末。以大蓬送北客至瀛。賜宴罷。有振武都頭卒。不堪一行人須索。忽操白刃。入斫聖美。其子冒

死直前護救。中三刀。左臂幾斷。虞候卒繼至。傷者六人。死者一人。聖美腦及耳皆傷甚。明日不能與虜使相見。告以冒風時疾。虜使戲之曰。曾服花蕊石散否。

前輩傳書。多用鄂州蒲圻縣紙。云。厚薄緊慢。皆得中。又性與麵黏。相宜能久不脫。

劉韶美在都下累年。不以家行。得俸專以傳書。書必三本。雖數百卷爲一部者亦然。出局則杜門校讎。不與客接。既歸蜀。亦分作三船。以備失壞。已而行。至秭歸新灘。一舟爲灘石所敗。餘二舟無他。遂以歸。普慈築閣貯之。

隆興中。議者多謂文武一等。而輒爲分別。力欲平之。有劉御帶者。輒建言。謂門狀榜子。初無定制。且僧道職醫。皆用門狀。而武臣非橫行。乃用榜子。幾與胥史卒伍輩同。雖不施行。然曉曉久之乃已。

饒德操詩。爲近時僧中之冠。早有大志。既不遇。縱酒自晦。或數日不醒。醉時。往往登屋危坐。浩歌慟哭。達旦乃下。又嘗醉赴泚水。適遇客舟救之。獲免。

徐師川長子璧。字待價。豪邁能文辭。嘗作書萬言。欲投匭。極言時政。無所諱避。師川偶見之。大驚。奪而焚之。早死。王性之讀書。真能五行俱下。往往他人纔三四行。性之已盡一紙。後生有投贄者。且觀且捲。俄頃卽置之。以此人疑其輕薄。遂多謗毀。其實工拙皆能記也。既卒。秦燻方恃其父。氣餒熏灼。手書移郡。將欲取其所藏書。且許以官。其子長子仲信。名廉清。苦學有守。號泣拒之曰。願守此書以死。不願官也。郡將以禍福誘脅之。皆不聽。燻亦不能奪而止。

先君言。舊制。朝參拜舞而已。政和以後。增以喏。然紹興中。予造朝。已不復喏矣。淳熙末。還朝。則迎駕起居閣門亦喝唱喏。然未嘗出聲也。又紹興中。朝參止聲折。遂拜。今閣門習儀。先以笏叩額。拜拜皆然。謂之瞻笏。亦不知起于何年也。

德壽宮德壽殿二額。皆壽皇御書。旁署臣某恭書四字。今重華宮重華殿二額。亦用此故事。今上御書。

予初見梁歐陽頎傳。稱頎在嶺南。多致銅鼓。獻奉珍異。又云。銅鼓累代所無。及予在宣撫司。見西南夷所謂銅鼓者。皆精銅。極薄而堅。文鏤亦頗精。叩之。鏗鏗如鼓。不作銅聲。秘閣下古器庫。亦有二枚。此鼓。南蠻至今用之于戰陣祭享。初非古物。實不足辱祕府之藏。然自梁時。已珍貴之如此。不知何理也。

杜牧之作范陽盧秀才墓誌曰：生年二十，未知古有人曰周公孔子者。蓋謂世雖農夫卒伍，下至臧獲，皆能言孔夫子。而盧生猶不知，所以甚言其不學也。若曰：周公孔子，則失其指矣。

酉陽雜俎云：茄子一名落蘇。今吳人正謂之落蘇。或云：錢王有子跛足，以聲相近，故惡人言茄子，亦未必然。錢王名其居曰握髮殿，吳音握惡相亂。錢塘人遂謂其處曰：此錢大王惡發殿也。

乾道末，夔路有部使者作中興頌，刻之瞿唐峽峭壁上。明年峽漲，有龍起峽中，適碎石壁，亦可異也。方刻石時，有夔州司理參軍，以恩榜入官，權教授，出賦題曰：歌頌大業刻金石，或惡其佞，謂之曰：韻脚當云：老子文學，乃克爲之。聞者爲快。

秦會之當國，有殿前司軍人施全者，伺其入朝，持斬馬刀，斃于望僊橋下，斫之，斷轎子一柱，而不能傷，誅死。其後秦每出，輒以親兵五十人，持挺衛之。初，斬全於市，觀者甚衆，中有一人朗言曰：此不了事漢，不斬何爲？聞者皆笑。呂元直作相，治堂吏絕嚴，一日有忤意者，遂批其頰，吏官品已高，慚於同列，乃叩頭曰：故事，堂吏有罪，當送大理寺準法行遣，今乃如蒼頭受辱，某不足言，望相公存朝廷事體。呂大怒曰：今天子巡幸海道，大臣皆著草屨，行泥濘中，此何等時？汝乃要存事體，待朝廷歸東京了，還汝事體未遲。衆吏相顧稱善而退。

秦會之問宋朴參政曰：某可比古何人？朴遽對曰：太師過郭子儀，不及張子房，秦頗駭曰：何故？對曰：郭子儀爲宦者發其先墓，無如之何。今太師能使其輩屏息畏憚，過之遠矣。然終不及子房者，子房是去得底勳業，太師是去不得底勳業。秦拊髀太息曰：好，遂驟薦用，至執政，秦之叵測如此。

洪駒父竄南島，有詩云：關山不隔還鄉夢，風月猶隨過海身。

北戶錄云：嶺南俗家，富者婦產三日，或匝月洗兒，作團油飯，以煎魚蝦雞鵝豬羊灌腸蕉子薑桂鹽豉爲之。據此，卽東坡先生所記盤遊飯也。二字語相近，必傳者之誤。

護聖楊老說：被當令正方，則或坐或睡，更不須覓被頭。此言大是。又云：平旦粥後就枕，則粥在腹中，煖而宜睡。天下第一樂也。予雖未之試，然覺其言之有味。後讀李端叔詩云：粥後復就枕，夢中還在家。則固有知之者矣。

陂澤惟近時最多廢，吾鄉鏡湖三百里，爲人侵耕幾盡。閩州南池亦數百里，今爲平陸。只墳墓自以千計，雖欲疏

濟復其故亦不可得。又非鏡湖之比。成都摩訶池。嘉州石堂谿之類。蓋不足道。長安民契券。至有云。某處至花萼樓。某處至含元殿者。蓋盡爲禾黍矣。而興慶池偶存十三。至今爲弔古之地云。

故都時。定器不入禁中。惟用汝器。以定器有芒也。

遂寧出羅。謂之越羅。亦似會稽尼羅而過之。耀州出青瓷器。謂之越器。似以其類餘姚縣秘色也。然極麤樸不佳。惟食肆以其耐久多用之。

故都李和燭粟。名聞四方。他人百計效之。終不可及。紹興中。陳福公及錢上閣。出使虜庭。至燕山。忽有兩人持燭粟各十裹來獻。三節人亦人得一裹。自贊曰。李和兒也。揮涕而去。

往時執政簽書文字。卒著帽衣盤領紫背子。至宣和猶不變也。

予童子時。見前輩猶繫頭巾帶于前作胡桃結。背子背及腋下。皆垂帶。長老言。背子率以紫勒帛繫之。散腰則謂之不敬。至蔡太師爲相。始去勒帛。又祖妣楚國鄭夫人。有先左丞遺服一篋。袴有繡者。白地白繡。鵝黃地鵝黃繡。裏肚則紫地。阜繡。祖妣云。當時士大夫皆然也。

先左丞平居朝章之外。惟服衫帽。歸鄉墓。客來。亦必著帽與坐。延以酒食。伯祖中大夫公。每赴官。或從其子出仕。必著帽。遍別鄰曲。民家或留以酒。亦爲盡歡。未嘗遺一家也。其歸亦然。

成都諸名族婦女。出入皆乘犢車。惟城北郭氏車最鮮華。爲一城之冠。謂之郭家車子。江瀆廟西廂有壁畫犢車。廟祝指以示予曰。此郭家車子也。

吳幾先嘗言參寥詩云。五月臨平山下路。藕花無數滿汀洲。五月非荷花盛時。不當云無數滿汀洲。廉宣仲云。此但取句美。若云六月臨平山下路。則不佳矣。幾先云。只是君記得熟。故以五月爲勝。不然。止云六月。亦豈不佳哉。仲翼有書名。而前輩多以爲俗。然亦以配周越。予嘗見其飛白大字數幅。亦甚工。但誠不免俗耳。

慈聖曹太后。工飛白。蓋習觀昭陵落筆也。先人舊藏一美字。徑二尺許。筆勢飛動。用慈書宮寶。今不知何在矣。賈表之。名公望。文元公之孫也。資稟甚豪。嘗謂仕宦當作御史。排擊姦邪。否則爲將帥。攻討羌戎。餘不足爲也。故平居惟好獵。常自飼犬。有妾焦氏者。爲之飼鷹鷄。寢食之外。但治獵事。曰。此所以寓吾意也。晚守泗州。翁彥國勤

王不進。久留泗上。表之面叱責之。且約不復餉其軍。彥國媿而去。及張邦昌僞赦至。率郡官哭於天慶觀聖祖殿。而焚其赦書。僞命卒不能越泗而南。所試纔一郡。而所立如此。許穎之間。獺徒謂之賈大夫云。

淮南諺曰。雞塞上樹。鴨塞下水。驗之皆不然。有一媪曰。雞塞上距。鴨塞下嘴耳。上距謂縮一足。下嘴謂藏其味于翼間。

陳亞詩云。陳亞今年新及第。滿城人賀李衙推。李乃亞之舅。爲醫者也。今北人謂卜相之士爲巡官。巡官。唐五代郡僚之名。或謂以其巡遊賣術。故有此稱。然北方人市醫皆稱衙推。又不知何謂。

字說盛行時。有唐博士耜。韓博士兼。皆作字說解數十卷。太學諸生作字說音訓十卷。又有劉全美者。作字說偏旁音釋一卷。字說備檢一卷。又以類相從。爲字會二十卷。故相吳元中試辟雍程文。盡用字說。特免省門下侍郎薛肇明作詩奏御。亦用字說中語。予少時。見族伯父彥遠和霄字韻詩云。雖貧未肯氣如霄。人莫能曉。或叩之。答曰。此出字說霄字云。凡氣升此而消焉。其奧如此。鄉中前輩胡浚明尤酷好字說。嘗因浴出。大喜曰。吾適在浴室中。有所悟。字說直字云。在隱可使十日視者直。吾力學三十年。今乃能造此地。近時此學旣廢。予平生惟見王瞻叔參政。篤好不衰。每相見。必談字說。至暮不雜他語。雖病亦擁被指畫誦說不少輟。其次鼂子止侍郎亦好之。先伯祖中大夫。平生好墨成癖。如李廷珪張遇以下皆有之。李黃門邦直在真定。嘗寄先左丞以陳贍墨四十笏。盡以爲伯祖壽。晚年擇取尤精者。作兩小篋。常置臥榻。愛護甚至。及下世。右司伯父舉篋以付通判叔父曰。先人所寶。汝宜謹藏之。不取一笏也。

承平時。滑州冰堂酒爲天下第一。方務德家有其法。

亳州太清宮檜至多。檜花開時。蜜蜂飛集其間。不可勝數。作蜜極香。而味帶微苦。謂之檜花蜜。真奇物也。歐陽公守亳時。有詩曰。蜂採檜花村落香。則亦不獨太清而已。

柳子厚詩云。海上尖山似劍鉞。秋來處處割愁腸。東坡用之云。割愁還有劍鉞山。或謂可言割愁腸。不可但言割愁。亡兄仲高云。晉張望詩曰。愁來不可割。此割愁二字出處也。

字所以表其人之德。故儒者謂夫子曰仲尼。非媪也。先左丞每言及荆公。只曰介甫。蘇季明書張橫渠事。亦只曰

子厚。

唐道士侯道華喜讀書。每語人曰。天上無凡俗仙人。此妙語也。仙傳載有遇神仙。得仙樂一部。使獻諸朝。曰。以此爲大唐正始之音。又有僧契虛過異境。有人謂之曰。此稚川仙宮也。正始乃年號。稚川是人字。而其言乃如此。豈道華所謂凡俗仙人耶。

崇寧間。初興學校。州郡建學。聚學糧。日不暇給。士人入辟雍。皆給券。一日不可緩。緩則謂之害學政。議罰不少貸。已而置居養院。安濟坊。漏澤園。所費尤大。朝廷課以爲殿最。往往竭州郡之力。僅能枝梧。諺曰。不養健兒。卻養乞兒。不管活人。只管死尸。蓋軍糧乏。民力窮。皆不問。若安濟等有不及。則被罪也。其後少緩。而神霄宮事起。土木之工尤盛。羣道士無賴。官吏無敢少忤其意。月給幣帛。硃砂紙筆。沉香乳香之類。不可數計。隨欲隨給。又久之。而北取燕薊。調發非常。動以軍期爲言。盜賊大起。馴至喪亂。而天下州郡。又皆添差歸明官。一州至百餘員。通判鈐轄。多者至十餘員云。

本朝廢后入道。謂之教主。郭后曰金庭教主。孟后曰華陽教主。其實乃一師號耳。政和後。羣黃冠乃敢上道君尊號曰教主。不祥甚矣。孟后在瑤華宮。遂去教主之稱。以避尊號。吁。可怪也。

靖康初。京師織帛。及婦人首飾衣服。皆備四時。如節物則春幡燈毬。競渡艾虎雲月之類。花則桃杏荷花菊花梅花。皆併爲一景。謂之一年景。而靖康紀元。果止一年。蓋服妖也。

卷二

任元受字盡言。事母盡孝。母老多疾病。未嘗離左右。元受自言老母有疾。其得疾之由。或以飲食。或以燥溼。或以語話稍多。或以憂喜稍過。盡言皆朝暮候之。無毫髮不盡。五臟六腑中事。皆洞見曲折。不待切脈而後知。故用藥必效。雖名醫不迨也。張魏公作都督。欲辟之入幕。元受力辭曰。盡言方養親。使得一神丹。可以長年。必持以遺老母。不以獻公也。況能捨母。而與公軍事耶。魏公太息而許之。

僧法一宗杲。自京都避亂渡江。各攜一笠。杲笠中有黃金釵。每自檢視。一伺知之。杲起登廁。一亟探釵擲江中。杲

還亡釵。不敢言而色變。一叱之曰。與汝共學了生死大事。乃眷眷此物耶。我適已爲汝投之江流矣。果展坐具作禮而行。

今人謂賤丈夫曰漢子。蓋始于五胡亂華時。北齊魏愷自散騎常侍遷青州長史。固辭之。宣帝大怒曰。何物漢子。與官不就。此其證也。承平日。有宗室名宗漢者。自惡人犯其名。謂漢子曰兵士。舉官皆然。其妻供羅漢。其子授漢書。宮中人曰。今日夫人召僧供十八大阿羅漢。大保請官教點兵士書。都下聞然。傳以爲笑。

會稽天寧觀老何道士。喜栽花釀酒以延客。居于觀之東廊。一日有道人狀貌甚偉。款門求見。善談論。喜作大字。何欣然接之。留數日乃去。未幾有妖人張懷素號落托者。謀亂。乃前日道人也。何亦坐繫獄。以不知謀得釋。自是畏客如虎。杜門絕往還。忽有一道人亦美風表。多技術。觀之西廊道士曰張若水。介之來謁。何大怒曰。我坐接無賴道人。幾死于囹圄。豈敢復見汝耶。因大罵。闔扉拒之。而此道人蓋永嘉人林靈噩也。旋得幸。貴震一時。賜名靈素。平日一飯之恩。必厚報之。若水乘驛赴關。命以道官至蕊珠殿校籍。視殿脩撰。父贈朝奉大夫。母封宜人。而老何以嘗罵之。朝夕憂懼。若水爲揮解。且以書慰解之。始少安。觀中人至今傳笑。

老葉道人。龍舒人。不食五味。年八十八。平生未嘗有疾。居會稽舜山。天將寒。必增屋瓦。補牆壁。使極完固。下帷設簾。多儲薪炭。杜門終日。及春乃出。對客莊敬。不肯多語。弟子曰小道人極愿慙。嘗歸淮南省親。至七月望日。鄰有住菴僧。召老葉飯。飯已。亟辭歸。問其故。則曰。小道人約今日歸矣。僧笑曰。相去二三千。豈能必如約哉。葉曰。不然。此子平日未嘗妄也。僧乃送之歸。及門。小道人者已弛擔矣。予識之已久。每訪之。殊無他語。一日默作意欲叩其所得。纔入門。卽引入臥內。燒香。具道其遇師本末。若先知者。亦異矣。夫韓退之詩云。夕貶潮陽路。入千畝。公云。夷陵此去更三千。謂八千里。三千里也。或以爲歇後。非也。書。彌成五服。至于五千。注云。五千里。論語。冉有曰。方六七。如五六。注亦云。六七十里。五六十里也。

秦會之有十客。曹冠以教其孫爲門客。王會以婦弟爲親客。郭知運以離婚爲逐客。吳益以愛婿爲嬌客。施全以刺刃爲刺客。李季以設醮奏章爲羽客。某人以治產爲莊客。丁禩以出入其家爲狎客。曹詠以獻計取林一飛還作子爲說客。初止有此九客耳。秦旣死。葬于建康。有蜀人史叔夜者。懷雞絮號慟墓前。其家大喜。因厚遺之。遂爲

平客。足十客之數。

鄉里前輩盧少崔言得之傅丈子駿云。洪範。無偏無黨。王道蕩蕩。無黨無偏。王道平平。無反無側。王道正直。會有其極。歸其有極。入句。蓋古帝王相傳以爲大訓。非箕子語也。至曰皇極之數言。以曰發之。則箕子語。傅丈博羣極書。少崔嚴重不妄。恨予方童子。不能詳叩爾。

辛參政企李守福州。有主管應天啓選宮內臣武師說。平日郡中待之。與監司等。企李初視事。謁入。謂客將曰。此特豎璫耳。待以通判。已是過禮。乃令與通判同見。明日。郡官朝拜神御。企李病足。必扶掖乃能拜。既入。至庭下。師說忽叱候卒退曰。此神御殿也。企李不爲動。願卒曰。但扶。自當具奏。雍容終禮。既退。遂奏待罪。朝廷爲降師說爲泉州兵官云。

秦會之初。賜居第時。兩浙轉運司置一局曰箔場。官吏甚衆。專應付賜第事。自是訖其死十九年。不罷。所費不可勝計。其孫女封崇國夫人者。謂之童夫人。蓋小名也。愛一獅貓。忽亡之。立限令臨安府訪求。及期。貓不獲。府爲捕繫鄰居民家。且欲劾兵官。兵官惶恐。步行求貓。凡獅貓悉捕致。而皆非也。乃賂入宅老卒。詢其狀。圖百本於茶肆張之。府尹因嬖人祈懇乃已。其子燻。十九年間。無一日不鍛酒器。無一日不背書畫碑刻之類。

張文潛言王中父詩。喜用助語。自成一體。予按韓少師持國亦喜用之。如酒成豈見甘而壞。花在須知色卽空。居仁由義吾之素。處順安時理則然。不盡良哉。用空令識者傷。用舍時焉耳。窮通命也歟。

岑參在西安幕府詩云。那知故園月。也到鐵關西。韋應物作郡時。亦有詩云。寧知故園月。今夕在西樓。語意悉同。而豪邁閒澹之趣。居然自異。

童貫既有詔誅之命。御史張達明持詔行。將至南雄州。貫在焉。達明恐其聞而引決。則不及正典刑。乃先遣親事官一人。馳往見貫。至則通謁拜賀于庭。貫問故。曰。有詔遣中使賜茶藥。宣詔大王赴闕。且聞已有河北宣撫之命。貫問果否。對曰。今將帥皆晚進。不可委寄。故主上與大臣熟議。以有威望。習邊事。無如大王者。故有此命。貫乃大喜。顧左右曰。又卻是少我不得。明日達明乃至。誅之。貫既伏誅。其死所。忽有物在地。如水銀鏡。徑三四尺。俄而斂縮不見。達明復命。函貫首自隨。以生油水銀浸之。而以生牛皮固函。行一二日。或言勝捷兵有死士欲奪貫首。達

明恐亡之。乃置首函於竹轎中。坐其上。然所傳蓋妄也。

張達明雖早歷清顯。致位綱轄。然未嘗更外任。奉祠居臨川。郡守月旦謁之。達明見其騶導。歎曰。人生五馬貴。阮裕云。非但能言人不可得。正索解人亦不可得。呂居仁用此意作詩云。好詩正似佳風月。解賞能知已不凡。湯岐公自行宮留守出爲會稽。朝士以詩送行甚衆。周子充在館中。亦有詩而亡之。岐公以書再求曰。頃蒙贈言。乃爲或者藏去。子充極愛其遺辭之婉。

黃魯直有日記。謂之家乘。至宣州。猶不輟書。其間數言信中者。蓋范寥也。高宗得此書真本。大愛之。日置御案。徐師川以魯直甥召用。至翰林學士。上從容問信中謂誰。師川對曰。嶺外荒陋無士人。不知何人。或恐是僧耳。寥時爲福建兵鈐。終不能自達而死。

范寥言魯直至宜州。州無亭驛。又無民居可儼止。一僧舍可寓。而適爲崇寧萬壽寺。法所不許。乃居一城樓上。亦極湫隘。秋暑方熾。幾不可過。一日忽小雨。魯直飲薄醉。坐胡牀。自欄楯間。伸足出外。以受雨。顧謂寥曰。信中吾平生無此快也。未幾而卒。

華州以華山得名。城中乃不見華山。而同州見之。故華人每曰。世間多少不平事。卻被同州看華山。張芸叟守同。嘗用此語作絕句。後二句云。我到左馮今一月。何曾得見好孱顏。蓋同州亦登高乃見之爾。

淳化中。命李至張洎張佖宋白脩太祖國史。久之。僅能帝紀一卷而止。咸平中。又命宋白宋湜舒雅吳淑脩太祖國史。亦終不成。元豐中。命曾鞏獨脩五朝國史。責任甚重。然亦僅進太祖紀敘論一篇。紀亦未及進。而鞏以憂去。史局遂廢。

僧行持。明州人。有高行。而喜滑稽。嘗住餘姚。法性貧甚。有頌曰。大樹大皮裹。小樹小皮纏。庭前紫荆樹。無皮也過年。後住雪竇。雪竇在四明。與天童育王。俱號名剎。一日同見新守。守問天童覺老。山中幾僧。對曰。千五百。又以問育王。對曰。對曰。千僧。未以問持。持拱手曰。百二十。守曰。三剎名相亞。僧乃如此不同耶。持復拱手曰。敝院是竇數。守爲撫掌。

虞士李璞居壽春山。一日登樓。見淮灘雷雨。中一船騰擊而上。雨霽。行灘上。得一蚌頗大。偶拾視之。其中有龍蟠。

之迹宛然。鱗鬣爪角悉具。先君嘗親見之。

晏安恭爲越州教授。張子韶爲僉判。晏美髯。人目之爲晏鬣。一日同赴郡集。晏最未至。張戲之曰。來何晏乎。滿座皆笑。

晏景初尙書。請僧住院。僧辭以窮陋不可爲。景初曰。高才固易耳。僧曰。巧婦安能作無麵湯餅乎。景初曰。有麵則拙婦亦辦矣。僧慙而退。

蜀俗厚。何耕類省試卷中有云。是何道也夫。道夫。耕字也。初未必有心。耕有時名。會有司亦自奇其文。遂以冠蜀士。士亦皆以得人相賀。而不識其偶近暗號也。師渾甫。本名某。字渾甫。旣拔解。志高退。不赴省試。其弟乃冒其名以行。不以告渾甫也。俄遂登第。渾甫因以字爲名。而字伯渾。人人盡知之。弟仕亦至郡倅。無一人議之者。此事若在閩浙。訟訴紛然矣。

杜起莘自蜀入朝。不以家行。高廟聞其清脩獨處。甚愛之。一日因得對。褒諭曰。聞卿出局。卽蒲團紙帳。如一行腳僧。真難及也。起莘頓首謝。未幾。遂擢爲諫官。張真父戲之曰。吾蜀人如劉韶。笑馮圓仲及僕。蓋皆無妻妾。塊然獨處。與君等耳。君乃獨以此見。知得拔擢。何也。當揭登聞鼓訴之。因相與大笑而罷。起莘方爲言事官。而真父戲之如此。雖真父豪氣蓋一時。亦可見向來風俗之厚。

吳人謂杜宇爲謝豹。杜宇初啼時。漁人得蝦。曰。謝豹蝦。市中賣筍。曰。謝豹筍。唐顧況送張衡尉詩曰。綠樹村中謝豹啼。若非吳人。殆不知謝豹爲何物也。

徽宗南幸。還至泗州。僧伽塔下。問主僧曰。僧伽旁白衣持錫杖者何人。對曰。是名木叉。蓋僧伽行者。上曰。可賜度牒與披剃。

宣和中。保和殿下種荔枝成實。徽廟手摘以賜燕帥王安中。且賜以詩曰。保和殿下荔枝丹。文武衣冠被百蠻。思與廷臣同此味。紅塵飛鞚過燕山。

廬州自州治東出芙蓉橋。至大樓。曰南定。氣象軒豁。樓之右。繚子城數十步有亭。蓋梁子輔作守時所創也。正面南下臨大江。名曰來風亭。亭成。子輔曰。枕簟其上。得未疾。歸雙流。蜀人謂亭名有微云。

筇竹杖蜀中無之乃出徼外蠻峒蠻人持至瀘敘間賣之一枝纔四五錢以堅潤細瘦九節而直者爲上品蠻人言語不通郡中有蠻判官者爲之貿易蠻判官蓋郡吏然蠻人孺服惟其言是聽太不直則亦能羣訟于郡庭而易之予過敘訪山谷故迹于無等毛本有侍宇佛殿西廡有一堂羣蠻聚博其上骰子亦以骨爲之長寸餘而區狀若牌子折竹爲籤以記勝負劇呼大笑聲如野獸宛轉旣上其意甚樂椎善獠面幾不類人見人亦不顧省時方五月中皆被氈毳臭不可適。

孔安國尙書序言爲隸古定更以竹簡寫之隸爲隸書古爲科斗蓋前一簡作科斗後一簡作隸書釋之以便讀誦近有善隸者輒自謂所書爲隸古可笑也。

宣和間雖風俗已尙詔訣然猶趣簡便久之乃有以駢儷牋啓與手書俱行者主於牋啓故謂手書爲小簡然猶各爲一緘已而或厄于書吏不能俱達於是駢緘之謂之雙書紹興初趙相元鎮貴重時方多故人恐其不暇盡觀雙書乃以爵里或更作一單紙直敘所請而併上之謂之品字封後復止用雙書而小簡多其幅至十幅秦太師當國有諂者嘗執政矣出爲建康留守每發一書則書百幅擇十之一用之于是不勝其煩人情厭患忽變而爲劄子衆稍便之俄而劄子自二幅增至十幅每幅皆具銜其煩彌甚而謝賀之類爲雙書自若紹興末史魏公爲參政始命書吏鏤版從邸吏告報不受雙書後來者皆循爲例政府雙書遂絕然牋啓不廢但用一二矮紙密行細書與劄子同搏封之至今猶然然外郡則猶用雙書也。

元豐中王荆公居半山好觀佛書每以故金漆版書藏經名遣人就蔣山寺取之人士因有用金漆版代書帖與朋儕往來者已而苦其露泄遂有作兩版相合以片紙封其際者久之其製漸精或又以縑囊盛而封之南人謂之簡版北人謂之牌子後又通謂之簡版或簡牌予淳熙末還朝則朝士乃以小紙高四五寸闊尺餘相往來謂之手簡簡版幾廢市中遂無賣者而紙肆作手簡賣之甚售。

士大夫交謁祖宗時用門狀後結牒右件如前謹牒若今公文後以爲煩而去之元豐後又盛行手刺前不具銜止云某謹上謁某官某月日結銜姓名刺或云狀亦或不結銜止書郡名然皆手書蘇黃龜張諸公皆然今猶有藏之者後又止行門狀或不能一一作門狀則但留語闈人云某官來見而苦于闈人匿而不告紹興初乃用榜

子。直書銜及姓名。至今不廢。

石藏用名用之。高醫也。嘗言今人稟賦怯薄。故按古方用藥。多不能愈病。非獨人也。金石草木之藥。亦皆比古力弱。非倍用之。不能取效。故藏用以喜用熱藥得謗。羣醫至爲謠言曰。藏用檐頭三斗火。人或畏之。惟鼃以道大喜其說。每見親友蓄丹。無多寡。盡取食之。或不待告主人。主人驚駭。急告以不宜多服。以道大笑不顧。然亦不爲害。此蓋稟賦之偏。他人不可效也。晚乃以盛冬伏石上書丹。爲石冷所逼。得陰毒。傷寒而死。

予族子相。少服兔絲子。凡數年。所服至多。飲食倍常。氣血充盛。忽因浴去背垢。背覺腫。急視之。隨視隨長。赤嫩異常。蓋大疽也。適四五月間。金銀藤開花時。乃大取。依良方所載法飲之。兩日至數斤。背腫消盡。以此知非獨金石不可妄服。兔絲過餌。亦能作疽如此。不可不戒。

初。虞世字和甫。以醫名天下。元符中。皇子鄧王生月餘。得癘疾。危甚。羣醫束手。虞世獨以爲必無可慮。不三日。王薨。信乎醫之難也。

佛經戒比丘非時食。蓋其法過午則不食也。而蜀僧招客暮食。謂之非時。董仲舒三年不闕園。謂勤苦不遊嬉也。館中著庭有園。每會飯罷。輒相語曰。今日闕園乎。此二事甚相類。

范丞相覺民拜參知政事時。歷任未嘗滿一考。

宣和中。百司庶府悉有內侍官爲承受。實專其事。長貳皆取決焉。梁師成爲祕書省承受。坐于長貳之上。所不置承受者。三省密院學士院而已。

趙高爲中丞相。翼澄樞爲內太師。猶稍與外庭異。童貫真爲太師。領樞密院。振古所無。

吳玠守蜀。如和尚原。殺金平。仙人原。潭毒關之類。皆劍爲控扼之地。古人所未嘗知。可謂名將矣。

蜀孟氏時。苑中忽生百合花。一本數百房。皆並蒂。圖其狀於聖壽寺門樓之東。頰壁間。謂之瑞花圖。至今尙存。乃知草木之妖。無世無之。

曹孝忠者。以醫得幸。政和宣和間。其子以翰林醫官換武官。俄又換文。遂除館職。初。蜀人謂病風者爲雲。畫家所謂趙雲子是矣。至是。京師市人亦有此語。館中會語及宸翰。或謂曹氏子曰。計公家富有雲漢之章也。曹忽大怒。

曰爾便雲漢。坐皆惘然。而曹肆罵不已。事聞。復還右選。除閣門官。宣和末。婦人鞋底尖以二色合成。名錯到底。竹骨扇以木爲柄。舊矣。忽變爲短柄。止插至扇半。名不徹頭。皆服妖也。

种彛叔。靖康初。以保靜節鉞致仕。居長安村墅。一夕。旌節有聲甚異。旦而中使至。遂起。五代時。安重誨王峻。皆嘗有此異。見周太祖實錄。二人者皆得禍。彛叔雖自是登樞府。然功名不成。亦非吉兆也。方彛叔赴召時。有華山道人獻詩曰。北蕃羣犬窺籬落。驚起南朝老大蟲。崇寧中。長星出。推步躔度長七十二萬里。

卷四

謁丞相。雖三公亦入客次。故相入朝。以經筵或內祠奉朝請。班退。亦與從官同捲班而出。三公無班。若不秉政。惟立使相班。與貴戚諸人雜立。

故相前執政入朝。當張蓋。史魏公始撤去。見任執政爲宣撫使。舊用劄子關三省樞密院。押字而已。王公珣參政。始改用申狀。

百官入殿門。閣門輒促之曰。那行。那音繡。予去國二十七年。復還朝。儀寢有不同。唯此聲尙存。

四川宣撫使置司利州。或興元府。以見任執政爲之。而成都自置四川制置使。制置使移文宣撫司。當用申狀。而倔強不伏。又以見任執政無用牒之理。於是但用申宣撫某官。不肯申宣撫司。此當拒而不受。或聞之朝廷。而宣撫使依違不能問也。

李公擇孫莘老。平時至相親厚。皆終於御史中丞。元祐五年二月二日。公擇卒。三日。莘老卒。先後纔一日。曾子宣以大觀元年八月二日卒。其弟子開以三日卒。先後纔一日。

蔡京祖某。父準及京。皆以七月二十一日卒。三世同忌日。

張文潛三子。秬。秭。和。皆中進士第。秬。秭在陳。死于兵。和爲陝府教官。歸葬二兄。復遇盜見殺。文潛遂亡後。可哀也。

予年十餘歲時。見郊野間鬼火至多。麥苗稻穗之杪。往往出火。色正青。俄復不見。蓋是時去兵亂未久。所謂人血爲燐者。信不妄也。今則絕不復見。見者輒以爲怪矣。

太母。祖母也。猶謂祖爲大父。熙寧元豐間。稱曹大皇爲太母。元祐中。稱高太皇爲太母。皆謂帝之祖母爾。元符中。謂向太后爲太母。紹興中。謂章太后爲太母。則非矣。

宣和末。鄭伸自檢校太師。忽落檢校爲真太師。國初以來所無有也。

曹偁以太皇太后之弟。且英宗受天下于仁祖。故神廟所以養慈。聖光獻者備極隆厚。偁官至中書令。會慈聖上僊。偁解官行服。服闕。嘗還故官。而官制行使相不帶三省長官。例換開府儀同三司。于是特封偁濟陽郡王。及薨。追封沂王。外戚封王自偁始。然偁之例。後豈可用哉。

建炎大駕南渡後。每邊事危急。則住常程。謂專治軍旅。其他皆權止施行。又急則放百司。謂官吏權聽自便。幸明州時。呂相欲并從官聽自便。高宗不可。乃止。

建炎初。大駕駐蹕南京揚州。而東京置留守司。則百司庶府爲二。其一曰在京某司。其一曰行在某司。其後大駕幸建康會稽。而大宮往江西則亦分爲二。曰行在某司。行宮某司。已而大駕幸建康。大宮留臨安。則建康爲行在。臨安爲行宮。今東京阻隔。而臨安官司。猶曰行在某司。示不忘恢復也。

郭子儀三十年無緦麻服。人或疑其不然。安厚卿樞密逾二紀無功緦之戚。乃近歲事也。

故都紫宸殿有二金狻猊。蓋香獸也。故晏公冬宴詩云。狻猊對立香煙度。鸞鷲交飛組繡明。今寶玉大弓之盜未得。而奉使至虜廷率見之。真卿大夫之辱也。

南齊胡諧之譖梁州刺史范柏年于武帝曰。欲擅一州。柏年已受代。帝欲不問。諧之曰。見虎格得。而放上山。于是賜死。紹聖中。謫元祐大臣過嶺。呂吉甫聞之。嘻笑曰。捕得黃巢。笞而遣之。

顏夷仲爲少蓬。尙無出身久之。乃賜第。除西掖。

予在嚴州時。得陸海軍節度使印。藏軍資庫。蓋節度使鄭翼之所賜印也。翼之南渡後死。

夏元青州蠻。有狔冷。有狔獠。有狔攬。有狔攔。有山獠。俗亦土著。外愚內黠。皆焚山而耕。所種粟豆而已。食不足。則

獵野獸。至燒龜蛇啖之。其負物則少者輕。老者重。率皆束于背。婦人負者尤多。男未娶者。以金雞羽插髻。女未嫁者。以海螺爲數珠挂頸上。嫁娶先密約。乃伺女於路。劫縛以歸。亦忿爭叫號求救。其實皆僞也。生子。乃持牛酒拜女父母。初亦佯怒卻之。鄰里共勸。乃受。飲酒以鼻。一飲至數升。名鈎藤酒。不知何物。醉則男女聚而蹈歌。農隙時。至一二百人爲曹。手相握而歌。數人吹笙在前導之。貯缸酒于樹陰。饑不復食。惟就缸取酒恣飲。已而復歌。夜疲。則野宿至三日。未厭。則五日或七日。方散歸。上元。則入城市觀燈。呼郡縣官曰大官。欲人謂己爲足下。否則怒。其歌有曰。小娘子。葉底花。無事出來吃盞茶。蓋竹枝之類也。諸蠻惟狃狔頗強。習戰鬪。他時或能爲邊患。童貫平方寇時。受富民獻遺。文臣曰。上書可采。武臣曰。軍前有勞。並補官。仍許磨勘封贈爲官戶。比事平。有司計之。凡四千七百人。有奇。

吳元中丞相在辟雍。試經義五篇。盡用字說。援據精博。蔡京爲進呈。特免省赴廷試。以爲學字說之勸。及作相。上章乞復春秋科。反攻王氏。徐擇之時爲左相。語人曰。吳相此舉。雖湯武不能過。客不解。擇之曰。逆取而順守。元中甚不能平。

姚平仲謀劫虜寨。欽廟以詢种彜叔。彜叔持不可甚堅。及平仲敗。彜叔乃請速再擊之。曰。今必勝矣。或問平仲之舉。爲虜所笑。奈何再擊。彜叔曰。此所以必勝也。然朝廷方上下震慄。無能用者。彜叔可謂知兵矣。綦翰林叔厚謝宮祠表云。雜宮錦於漁篋。敢忘君賜。話玉堂于茆舍。更覺身榮。時歎其工。又有一表云。欲挂衣冠。尙低回于末路。未先犬馬。儻邂逅於初心。尤佳。

祕書新省成。微廟臨幸。孫叔詣參政作賀表云。蓬萊道山。一新羣玉之構。勾陳羽衛。共仰六飛之臨。同時無能及者。

錢遜叔侍郎。少時泝汴。舟敗。溺水。流二十里。遇救。得不死。旬日猶苦腰痛。不悟其故。視之。有手迹。大如扇。色正青。五指及掌。宛然可識。若擎其腰間者。此其所以不死也耶。

遼相李儼作黃菊賦。獻其主耶律弘基。弘基作詩題其後。以賜之。云。昨日得卿黃菊賦。碎翦金英填作句。袖中猶覺有餘香。冷落西風吹不去。

會稽法雲長老重喜。爲童子時。初不識字。因掃寺廊。忽若有省。遂能詩。其警句云。地爐無火客囊空。雪似楊花落。歲窮拾得斷麻縫。壞衲不知身在寂寥中。程公闢修撰守會稽。聞喜名。一日召之。與游戴山上。方院。索詩。喜卽吟云。行到寺中寺。坐觀山外山。蓋戲用公闢體也。

呂吉甫在北都。甚愛鼯以道。以道方以元符上書謫官。吉甫不敢薦。謂曰。君才如此。乃自蹈罪籍。可惜也。以道對曰。詠之無他。但沒著文章處耳。其恃氣不撓如此。

鼯以道與其弟季比同應舉。以道獨拔解。時考試官葛某眇一目。以道戲作詩云。沒興主司逢葛八。賢弟被黜兄薦發。細思堪惜又堪嫌。一壁有眼半壁瞎。

張文潛生而有文在其手曰末。故以爲名。而字文潛。

張文潛虎圖詩云。煩君衛吾寢。起此蓬蒿陋。坐令盜肉鼠。不敢窺白晝。譏其似貓也。

白樂天有忠州木蓮詩。予遊臨邛。白鶴山寺。佛殿前有兩株。其高數丈。葉堅厚如桂。以仲夏發花。狀如芙蓉。香亦酷似。寺僧云。花坼時有聲如破竹。然一郡止此二株。不知何自至也。成都多奇花。亦未嘗見。

舊制兩省。中書在門下之上。元豐易之。

舊制。丞相署敕皆著姓。官至僕射則去姓。元豐制新。以僕射爲相。故皆不著姓。

徐敦立言。往時士大夫家。婦女坐椅子兀子。則人皆譏笑其無法度。梳洗牀。火爐牀。家家有之。今猶有高鏡臺。蓋施牀則與人面適平也。或云。禁中尙用之。特外間不復用耳。

頃歲駁放秦墳等科名。方集議時。中司誤以駁爲剝。衆雖知其非。畏中司者護前。遂皆書曰剝。可以一笑。余深罷相。居福州第中。有荔枝初實。絕大而美。名曰亮功紅。亮功者深家御書閣名也。靖康中。深謫建昌軍。旣行。荔枝不復實。明年深歸。荔枝復如故。乃知世間富貴人。皆有陰相之者。

紹聖中。蔡京館遼使李儼。蓋泛使者。留館頗久。一日。儼方飲。忽持盤中杏曰。來未花開。如今多幸。京卽舉梨。謂之曰。去雖葉落。未可輕離。

宣和末。黃安時曰。亂作不過一二年矣。天使蔡京八十不死。病亟復蘇。是將使之身受禍也。天下其能久無事乎。

唐拾遺耿緯下邳。喜叔孫主簿鄭少府見過詩云。不是仇梅至。何人問百憂。蘇子由作續溪令時。有贈同官詩云。歸報仇梅省文字。麥苗含穗欲蠶眠。蓋用緯語也。近歲均州刻本。輒改爲仇香。

僧宗昂住會稽能仁寺。有故相寓寺中。已而復相。宗昂被敕住持。即官馬子約題詩法堂壁間曰。十年衰病臥林泉。鷓鴣羣飛競刺天。黃紙除書猶到汝。固知清世不遺賢。

慎東美。字伯筠。秋夜待潮于錢塘江。沙上露坐。設大酒樽及一杯。對月獨飲。意象傲逸。吟嘯自若。顧子敦適遇之。亦懷一杯。就其樽對酌。伯筠不問。子敦亦不與之語。酒盡各散去。伯筠工書。王逢原贈之詩。極稱其筆法。有曰。鐵索急纏蛟龍僵。蓋言其老勁也。東坡見其題壁。亦曰。此有何好。但似篋束枯骨耳。伯筠聞之笑曰。此意逢原已道了。今惟丹陽有戴叔倫碑。是其遺迹。

予爲福州德寧縣主簿。入郡。過羅源縣。走馬嶺。見荆棘中有崖石。刻樹石二大字。奇古可愛。卽令從者雍除觀之。乃才翁所賞樹石六字。蓋蘇舜元書也。因以告縣令項騰。服箠作欄楯護之云。

銅色本黃。古鐘鼎彝器。大抵皆黃銅耳。今人得之地中者。歲久色變。理自應耳。今郊廟所製。乃以藥薰染令蒼黑。此何理也。

曾子開封曲阜縣子。謝任伯封陽夏縣伯。曲阜今仙源縣。陽夏今城父縣。方疏封時。已無二縣矣。司封殆失職也。蔡京爲太師。賜印文曰公相之印。因自稱公相。童貫亦官至太師。都下人謂之媪相。

館職常苦俸薄。而吏人食錢甚厚。周子充作正字時。嘗戲曰。豈所謂省官不如省吏耶。都下舊謂館職爲省官。故云。

趙相初除都督中外軍事。孫叔詣參政。時爲學士。當制。請曰。是雖王導故事。然若兼中外。則雖陛下禁衛三衙皆統之。恐權太重。非防微杜漸之意。乃改爲都督諸路軍馬制出。趙乃知之。頗不樂。

呂居仁詩云。蠟燭堆盤酒過花。世以爲新。司馬溫公有五字云。煙曲香尋篆。盃深酒過花。居仁蓋取之也。茶山先生云。徐師川擬荆公細數落花因坐久。緩尋芳草得歸遲。云。細落李花那可數。偶行芳草步因遲。初不解

其意。久乃得之。蓋師川專師陶淵明者也。淵明之詩。皆適然寓意。而不留於物。如悠然見南山。東坡所以知其決

非望南山也。今云細數落花，緩尋芳草，留意甚矣。故易之。又云，荆公多用淵明語而意異，如柴門雖設要常關，雲

尚無心能出岫，要字能字，皆非淵明本意也。傅丈子駿奏事，誤稱名退而移文閣門，請彈奏，閣門以殿上語，非有司所得聞，不受。子駿乃自劾，詔放罪，從真唐

仲俊，年八十五，六極康寧，自言少時因讀千字文，有所悟，謂心動神疲四字也。平生遇事未嘗動心，故老而不衰。永清軍者，貝州也。王則據州叛，既平，改州曰恩州，而削其節鎮，及宣和中，復幽州，乃建爲永清軍節度，以命郭藥

師，藥師果亦叛，蓋不祥也。紹聖中，貶元祐人蘇子瞻儋州，子由雷州，劉莘老新州，皆戲取其字之偏旁也。時相之忍伎如此。

魯直詩有題扇草色青青柳色黃一首，唐人賈至，趙嘏詩中皆有之。山谷蓋偶書扇上耳。至詩中作吹愁去，嘏詩中作吹愁卻，卻字爲是。蓋唐人語，猶云吹卻愁也。

周子充言退之黃陵廟碑辨陟方事，非也。古蓋謂適遠爲陟，書曰：若陟遐必自邇。猶今人言上路也。豈得云南方地勢下耶。

常璩，字子然，河朔人，本農家，一村數十百家皆常氏，多不通譜。子然既爲御史，一村之人，名皆從玉，雖走史下令皆然，無如之何。子然乃名子曰任侏美向，謂周任史侏子美叔向也，意使人不可效耳。

湯丞相封慶國公，命下，湯公謂此仁宗賜履之國，自天聖以來無封者，欲請避之，或曰：何執中嘗封慶國公矣。湯公曰：執中不知引避，此何足爲法哉。卒辭之，改封岐。

古所謂長夜之飲，或以爲達旦，非也。薛許昌宮詞云：畫燭燒闌煖復迷，殿帷深密下銀泥，開門欲作侵晨散，已是明朝日向西。此所謂長夜之飲也。

王逸少筆經曰：有人以綠沉漆竹詩及鏤管見遺，老杜所謂苔臥綠沉槍，蓋謂是也。歐陽公梅宛陵王文恭集，皆有小桃詩。歐詩云：雪裏花開人未知，摘來相顧共驚疑，便須索酒花前醉，初見今年

第一枝。初但謂桃花有一種早開者耳，及遊成都，始識所謂小桃者，上元前後即著花，狀如垂絲海棠，曾子固雜識云：正月二十開，天章閣賞小桃，正謂此也。

王定國素爲馮當世所知。而荆公絕不樂之。一日當世力薦于神祖。荆公卽曰：此孺子耳。當世忿曰：王鞏戊子生。安得謂之孺子。蓋鞏之生與同天節同日也。荆公愕然不覺退立。

汪彥章草赦書。敍軍興征斂。其詞云：八世祖宗之澤。豈汝能忘。一時社稷之憂。非予獲已。最爲精當。人以比陸宣公興元赦書。然議者謂自大祖至哲宗。方七世。若并道君數之。又不應曰祖宗。彥章亦悔之。信乎文之難也。

童汪錡能執干戈以衛社稷。本謂幼而能赴國難耳。非姓童也。翟公巽作童貫告詞云：爾祖汪錡。誤也。或云：故以戲之。

劉長卿詩曰：千峯共夕陽。佳句也。近時僧癩可用之云：亂山爭落日。雖工而窘。不迨本句。

李後主落花詩云：鶯狂應有限。蝶舞已無多。未幾亡國。宋子京亦有落花詩云：香隨蜂蜜盡。紅入燕泥乾。亦不久下世。詩識蓋有之矣。

隋唐嘉話云：崔日知恨不居八座。及爲太常卿。於廳事後起一樓。正與尙書省相望。時號崔公望省樓。又小說載御史久次不得爲郎者。道過南宮。輒回首望之。俗號拗項橋。如此之類。猶是謗語。予讀鄭畋作學士時。金鸞坡上南望詩云：玉晨鐘韻上空虛。畫戟祥煙擁帝居。極日向南無限地。綠煙深處認中書。則其意著矣。乃知朝士妄想自古已然。可付一笑。

今世所道俗語。多唐以來人詩。何人更向死前休。韓退之詩也。林下如曾見一人。靈澈詩也。長安有貧者。爲瑞不宜多。羅隱詩也。世亂奴欺主。年衰鬼弄人。海枯終見底。人死不知心。杜荀鶴詩也。事向無心得。章碣詩也。但有路可上。更高人也行。龔霖詩也。忍事敵災星。司空圖詩也。一朝權入手。看取令行時。朱灣詩也。自己情雖切。他人未肯忙。裴說詩也。但知行好事。莫要問前程。馮道詩也。在家貧亦好。戎昱詩也。

漢隸歲久。風雨剝蝕。故其字無復鋒銳。近者杜仲微。乃故用禿筆作隸。自謂得漢刻遺法。豈其然乎。

曾子宣丞相。嘗排蔡京于欽聖太后簾前。太后不以爲然。曾公論不已。太后曰：且耐辛苦。蓋禁中語。欲遣之使退。則曰：耐辛苦也。京已出太原。復留。

趙正夫丞相薨。車駕臨幸。夫人郭氏哭拜請恩澤者三事。其一乃乞于盃中帶一正字。餘二事。皆卽許可。惟賜盃

事。獨曰待理會。平時微廟凡言待理會者。皆不許之詞也。正夫遂諡清憲。

富鄭公初請功德院。得勅額曰奉親。已而乃作兩院。共用一名。謂之南奉親院。北奉親院。

陳魯公薨。以其遭際龍飛。又薨于位。與王岐公同。于是詔用岐公元豐未贈典。超贈太師。其他恩數。皆視岐公猶

可也。及其家請諡。遂特賜諡曰文恭。蓋亦用岐公諡。用他人之諡。以爲恩數。自古烏有此事哉。

諺有曰濮州鐘。世不知爲何等語。嘗有人死。見陰官。濮州人也。問以此。亦不能對。予案此事。見周世宗實錄。顯德六年二月丁丑。幸太清觀。先是乾明門外修太清觀成。上聞濮州有大鐘。聲聞十里。乃命徙之。以賜是觀。至是往觀焉。

予參成都議幙。攝事漢嘉。一見荔子熟。時凌雲山安樂園皆盛處。糾曹何預元立。法曹蔡迨肩吾皆佳士。相與同樂。薛許昌亦嘗以成都幕府來攝郡。未久罷去。故其荔枝詩曰。歲杪監州曾見樹。時新入座但聞名。蓋恨不及時也。每與二君誦之。

東坡守杭。法外刺配顏巽父子。御史論爲不法。累章不已。蘇公雖放罪。而顏巽者。竟以朝旨放自便。自是豪猾益甚。以藥塗鹽鈔而用。既毀抹。賂主者浸洗之。藥盡而鈔不傷。雖老于其事者不能辨。他不法尤衆。有司稍按治。輒劫持之曰。某官乃元祐奸黨。蘇某親舊。故觀望害我。公形狀牒。時治黨籍方苛峻。雖監司郡守。得其牒。輒畏縮解縱乃已。大觀中。胡奕修爲提舉鹽事。會計已毀抹鹽鈔。得其姦。奏之。鯨竄化州。籍沒貲產。一方稱快。

天下名山。惟華山。茅山。青城山。無僧寺。青城十里外。有一寺。曰布金。洪水壞之。今復葺于旁里許。

僧可遵者。詩本凡惡。偶以直待衆生。總無垢之句。爲東坡所賞。書一絕於壁間。繼之山中。道俗隨東坡者甚衆。卽日傳至圓通。適適在焉。大自矜詡。追東坡至前途。而途中又傳東坡三峽橋詩。遵卽對東坡自言有一絕。卽欲題三峽之後。旅次不及書。遂朗吟曰。君能識我湯泉句。我卻愛君三峽詩。道得可噉。不可漱。幾多詩將豎降旗。東坡既悔賞拔之誤。且惡其無禮。因促駕去。觀者稱快。遵方大言曰。子瞻護短。見我詩好甚。故妒而去。徑至栖賢。欲題所舉絕句。寺僧方礮石刻東坡詩。大詬而逐之。山中傳以爲笑。

卷五

种徵君明逸既隱。操不終。雖驟登侍從。眷禮優渥。然常懼讒嫉。其寄懷詩曰。予生背時性孤僻。自信已道輕浮名。中途失計被簪紱。目覩寵辱心潛驚。雖從鸚鵡共班序。常恐青蠅微有聲。清風滿壑石田在。終謝吾君甘退耕。其憂畏如此。又有寄二華隱者詩曰。我本厭虛名。致身天子庭。不終高尚事。有媿少微星。北闕空追悔。西山羨獨醒。秋風舊期約。何日去冥冥。然其後卒遭王嗣宗之辱。可以爲輕出者之戒。世傳常夷甫晚年悔仕。亦不足多怪也。宋太素尙書中酒詩云。中酒事俱妨。偷眠就黑房。靜嫌鸚鵡鬧。渴憶荔枝香。病與慵相續。心和夢尙狂。從今改題品。不號醉爲鄉。非真中酒者。不能知此味也。

紹興中有貴人好爲俳諧體詩。及箋啓詩云。綠樹帶雲山鬢畫。斜陽入竹地銷金。上汪內相啓云。長楸脫卻青羅幘。綠蓋千層。俊鷹解下綠絲條。青雲萬里。後生遂有以爲工者。賴是時前輩猶在。雅正未衰。不然。與五代之體何異。此事繫時治忽。非細事也。

承平時。鄜州田氏作泥孩兒。名天下。態度無窮。雖京師工效之。莫能及。一對至直十緡。一床至直十千。一床者。或五或七也。小者二三寸。大者尺餘。無絕大者。予家舊藏一臥者。有小字云。鄜時田玘製。紹興初。避地東陽山中。歸則亡之矣。

隆興間。有揚州帥。貴戚也。宴席間。語客曰。諺謂三世仕宦。方解著衣喫飯。僕欲作一書。言衣帽酒殺之制。未得書名。通判鮮于廣蜀人。卽對曰。公方立勳業。今必無暇及此。他時功成名遂。均逸林下。乃可成書耳。請先立名曰逸居集。帥不之悟。有牛簽判者。京東歸正官也。輒操齊音曰。安撫莫信。此是通判罵安撫。飽食煖衣。逸居而無教。則近于禽獸。是甚言語。帥爲發怒頰面。而通判欣然有得色。

龜子止云。曾見東坡手書四州環一島詩。其間茫茫太倉中一句。乃區區魏中梁。不知果否。蘇季真云。寄張文潛桃榔杖詩。初本云酒半消。其下云。江邊獨曳桃榔杖。林下閒尋華撥苗。盛孝章又誤爲孝標。已而悟。故盡易之。雖其家所傳。然去今所行亡字韻殊遠。恐傳之誤也。

范至能在成都嘗求亭名于予。予曰：思鱸。至能大以爲佳。時方作墨，即以銘墨背。然不果築亭也。臨邛夾門鎮山險處，得瓦棺，長七尺，厚幾二寸，與今木棺略同。但蓋底相反，骨猶不壞。棺外列置瓦器，皆極淳古。時靖康丙午歲也。李知幾及見之。

市人有以博戲取人財者，每博必大勝，號松子量。不知何物語也。亦不知其字云何。李端叔爲人作墓志，亦用此三字。端叔前輩也，必有所據。

今官制，光祿大夫轉銀青，銀青轉金紫，金紫轉特進。五代以前，乃自銀青轉金紫，金紫轉光祿。光祿轉特進。據馮道長樂老序所載甚詳。

莊文太子初封鄧王，予爲陳魯公史，魏公言：鄧王乃錢俶歸朝後所封。又哲宗之子早薨，亦封鄧王。當避此不祥之名。二公曰：已降詔，俟郊禮改封可也。莊文竟早世。

東坡贈趙德麟秋陽賦云：生于不土之里，而詠無言之詩。蓋寓時字也。尹少稷強記，日能誦麻沙版本書厚一寸，嘗於呂居仁舍人坐上，記歷日，酒一行，記兩月，不差一字。

肅王與沈元用同使虜，館於燕山愍忠寺，暇日無聊，同行寺中，偶有唐人碑，辭皆偶儷，凡二千餘言。元用素強記，卽朗誦一再，肅王不視，且聽且行。若不經意，元用歸，欲矜其敏，取紙追書之，不能記者闕之。凡闕十四字。書畢，肅王視之，卽舉筆盡補其所闕，無遺者。又攻元用謬語四五處，置筆他語，略無矜色。元用駭服。

靖康兵亂，宣和舊臣悉已遠竄。黃安時居壽春，歎曰：造禍者全家盡去，嶺外避地，卻令我輩橫屍路隅耶。安時卒死於兵，可哀也。

高宗除喪，予以禮部郎入讀祝，至几筵殿，蓋帝平日所御處也。殿三楹，殊非高大，陳列几席，椀柳之類，亦與常人家不甚相遠，猶相見高廟之儉德也。

夜涼疑有雨，院靜似無僧。此潘道逸詩也。

田登作郡，自諱其名，觸者必怒。吏卒多被榜笞。於是舉州皆謂燈爲火。上元放燈，許人入州治遊觀。吏人遂書榜揭于市曰：本州依例放火三日。

劉隋州詩。海內猶多事。天涯見近臣。言天下方亂。思見天子而不可得。得天子近臣。亦足自慰矣。見天子近臣。已足自慰。况又見之於天涯乎。其愛君憂國之意。鬱然見于言外。

紹興間。復古殿供御墨。蓋新安墨工戴彥衡所造。自禁中降出雙角龍文。或云米友仁侍郎所畫也。中官欲于苑中作墨竈。取西湖九里松作煤。彥衡力持不可曰。松當用黃山所產。此平地松。豈可用。人重其有守。

祖母楚國夫人。大觀庚寅在京師。病累月。醫藥莫效。雖名醫如石藏用輩。皆謂難治。一日有老道人。狀貌甚古。銅冠緋氅。一丫髻童子。操長柄白紙扇從後。過門。自言疾無輕重。一灸立愈。先君延入。問其術。道人探囊出少艾。取一甄灸之。祖母方臥。忽覺腹間痛甚。如火灼。道人自言九十歲。遂徑去。追之。疾馳不可及。祖母是時未六十。復二十餘年。年八十三。乃終。祖母沒後。又二十年。從兄子楫。監三江鹽場。偶飲于士人毛氏。忽見道人。衣冠及童子。恐如祖母平日所言。方愕然。道人忽自言京師灸甄事。言訖。遽遂去。遍尋不可得。毛君云。其妻病。道人爲灸屋柱。十餘壯。病脫然愈。方欲謝之。不意其去也。世或疑神仙。以爲渺茫。豈不謬哉。

齊民要術。有鹹杓子法。用柘木皮漬鴨卵。今吳人用虎杖根漬之。亦古遺法。

曹詠爲浙漕。一日坐客言徽州汪王靈異者。詠問汪王若爲對。有唐永夫者在坐。遽曰。可對曹漕。詠以爲工。遂愛之。曾覲字純甫。偶歸正官蕭鷓巴來謁。既退。復一客至。其所狎也。因問曰。蕭鷓巴可對何人。客曰。正可對曾鶉臚。覲以爲慢己。大怒。與之絕。然鷓巴北人。實謂之札八。

童貫爲太師。用廣南龔澄樞故事。林靈素爲金門羽客。用閩王時譚紫霄故事。嗚呼異哉。

元豐間。建尙書省于皇城之西。鑄三省印。米芾謂印文背戾。不利輔臣。故自用印以來。凡爲相者。悉投竄。善終者。亦追加貶削。其免者。蘇丞相頌一人而已。蔡京再領省事。遂別鑄公相之印。其後家安國又謂省居白虎位。故不利。京又因建明堂。遷尙書省于外以避之。然京亦竄死。二子坐誅。其家至今廢。不知爲善。而遷省易印以避禍。亦愚矣哉。

王黼作相。請朝假歸咸平焚黃。畫舫數十。沿路作樂。固已駭物論。紹興中。秦熿亦歸金陵焚黃。臨安及轉運司舟舫。盡選以行。不足。擇取於浙西。一路凡數百艘。皆窮極丹腹之飾。郡縣監司迎餞。數百里不絕。平江當運河。結綵

樓數丈。大合樂官妓舞于其上。縹緲若在雲間。嬉處之自若。

秦太師娶王禹玉孫女。故諸王皆用事。有王子溶者。爲浙東倉司官屬。郡宴必與提舉者同席。陵忽玩戲。無所不至。提舉者事之反若官屬。已而又知吳縣。尤放肆。郡守宴客。初就席。子溶遣縣吏呼伎樂伶人。即皆馳往。無敢留者。上元吳縣放燈。召太守爲客。郡治乃寂無一人。又嘗夜半遣廳吏叩府門。言知縣傳語。必請面見。守狼狽攬衣秉燭出。問之。乃曰。知縣酒渴。聞有鹹齏。欲覓一甌。其陵侮如此。守亟取遺之。不敢較也。

司馬安四至九卿。當時以爲善宦。以今觀之。則謂之拙宦可也。彼汨喪廉恥。廣爲道徑者。不數年至公相矣。安用四至九卿哉。

蔡京賜第。有六鶴堂。高四丈九尺。人行其下。望之如蟻。

故都里巷間人言利之小者。曰八文十二。謂十爲謀。蓋語急。故以平聲呼之。白傳詩曰。綠浪東西南北路。紅欄三百九十橋。宋文安公宮詞曰。三十六所春宮館。一一香風送管絃。鼉以道詩亦云。煩君一日慇懃意。示我十年感遇詩。則詩家亦以十爲謹矣。

周宇文護與母閤書曰。受形稟氣。皆知母子。誰知薩保如此不孝。此乃對母自稱小名。南齊武帝崩。鬱林王卽位。明帝謀廢立。右僕射王晏盡力助之。從弟思遠謂晏曰。兄荷武帝厚恩。一旦贊人如此事。何以自立。因勸之引決。及晏拜驃騎。謂思遠兄思徵曰。隆昌之末。阿戎勸吾自裁。若用其語。豈有今日。思遠曰。如阿戎所見。猶未晚也。此乃對兄自稱小名。畢景儒幕府燕閒錄。載蘇易簡初及第時。與母書。自稱岷岷。亦小名也。從伯父右司小名馬哥。在京師省祖母楚國夫人。出上馬矣。楚國偶有所問。自出屏後呼馬哥。親事官聞之。白伯父曰。夫人請吏部。蓋此輩亦習聞之也。今吳人子弟稍長。便不欲人呼其小名。雖尊者亦以行第呼之矣。風俗日薄如此。奈何。

宋白石燭詩云。但喜明如蠟。何嫌色似蠶。燭出延安。予在南鄭數見之。其堅如石。照席極明。亦有淚如蠟。而煙濃。能熏汗帷幕衣服。故西人亦不貴之。

胡基仲嘗言韓退之石鼓歌。天羲之俗書趁姿媚。狂肆甚矣。予對曰。此詩至云。陋儒編詩不收入。二雅褊迫無委蛇。其言羲之俗書。未爲可駭也。基仲爲之絕倒。

王廣津宮詞云。新睡起來思舊夢。見人忘卻道勝常。勝常猶今婦人言萬福也。前輩尺牘有云。尊候勝常者。勝字當平聲讀。

拄杖斑竹爲上。竹欲老瘦而堅勁。斑欲微赤而點疏。賈長江詩云。揀得林中最細枝。結根石上長身遲。莫嫌滴瀝紅斑少。恰是湘妃淚盡時。善言拄杖者也。然非予有此癖。亦未易賞音。

唐韓翃詩云。門外碧潭春洗馬。樓前紅燭夜迎人。近世晏叔原樂府詞云。門外綠楊春繫馬。床前紅燭夜呼盧。氣格乃過本句。不謂之剽可也。

張文昌成都曲云。錦江近西煙水綠。新雨山頭荔枝熟。萬里橋邊多酒家。遊人愛向誰家宿。此未嘗至成都者也。成都無山。亦無荔枝。蘇黃門詩云。蜀中荔枝出嘉州。其餘及眉半有不。蓋眉之彭山縣。已無荔枝矣。况成都乎。

先太傅自蜀歸。道中遇異人。自稱方五。見太傅曰。先生乃西山施先生肩吾也。遂授道。蓋施公睦州桐廬人。太傅晚乃自睦守挂冠。蓋有緣契矣。

張文昌紗帽詩云。惟恐被人偷翦樣。不曾閒戴出書堂。皮襲笑亦云。借樣裁巾怕索將。王荆公于富貴聲色。略不動心。得耿天隲憲。竹根冠。愛詠不已。予雅有道冠拄杖二癖。每自笑歎。然亦賴古多此賢也。

故都時御爐炭。率斲作琴樣。胡桃紋。鸚鵡青。高宗紹興初。巡幸臨安。詔嚴州進炭。止令用土產。勿拘舊制。東坡自儻耳歸。至廣州。舟敗。亡墨四篋。平生所寶皆盡。僅於諸子處得李墨一丸。潘谷墨兩丸。自是至昆陵捐館舍。所用皆此三墨也。此聞之蘇季真云。

世言東坡不能歌。故所作樂府詞多不協。鼂以道云。紹聖初。與東坡別于汴上。東坡酒酣。自歌古陽關。則公非不能歌。但豪放。不喜裁翦。以就聲律耳。

山谷水仙花二絕。淡掃蛾眉簪一枝。及只比江梅無好枝者。見于李端叔集中。恐非端叔所及也。賀方回作王子開挽詞。和璧終歸趙。干將不葬吳者。見于秦少游集中。子開大觀己丑卒于江陰。而返葬臨城。故方回此句爲工。

時少游已沒十年矣。水仙花則不可考。然氣格似山谷。晚作。不類端叔也。

吳武安玠。葬德順軍隴干縣。今雖隔在虜境。松楸甚盛。歲時祀享不輟。虜不敢問也。玠諡武安。而梁益間有廟。賜額曰忠烈。故西人至今。但謂之吳忠烈云。

姚福進者。兕麟之祖也。德順軍人。以挽強名於秦隴間。至今西人謂其族爲姚硬弓家。曲端、吳玠、建炎間。有重名于陝西。西人爲之語曰。有文有武是曲大。有謀有勇是吳大。玠能書。今闔中錦屏山壁間有其書。奇偉可愛。

成都江瀆廟北壁外。畫美髯一丈夫。據銀胡床坐。從者甚衆。邦人云。蜀賊李順也。

邛州僧寺中。版壁有趙諗題字。字既凡惡。語亦淺拙。不知當時何以中第如此之高。蓋希時事力。詆元祐。故有司不復記其文之工拙也。

永康軍導江縣迎祥寺。有唐女真吳彩鸞。書佛本行經六十卷。予嘗取觀之。字亦不甚工。然多闕唐諱。或謂真本爲好事者易去。此特唐經生書耳。

利州武后畫像。其長七尺。成都有孟蜀時后妃祠堂。亦極脩偉。絕與今人不類。福州大支提山。有吳越王紫袍。寺僧升椅子舉其領。猶拂地。兩肩有汗迹。

老杜海樓詩。在左縣所賦。今已不存。成都有一株。在文明廳東廊前。正與制置司簽廳門相直。簽廳乃故錦官閣。聞潼川尤多。予未見也。

成都石筍。其狀與筍不類。乃累疊數石成之。所謂海眼。亦非妄。瑟瑟至今有得之者。蜀食井鹽。如仙井大寧。猶是大穴。若榮州。則井絕小。僅容一竹筒。真海眼也。石犀在廟之東階下。亦粗似一犀。正如陝之鐵牛。但望之大概似牛耳。石犀一足不備。以他石續之。氣象甚古。

承平日甚重宮觀。宣和中。鼂以道知成州。有請。吏部報云。照會本官歷任已曾住宮觀。不合再有陳乞。遂致仕而歸。

唐夔州在白帝城。地勢險固。本朝太平與國中。丁晉公爲轉運使。始遷於瀼西。瀼西地。平不可守。又置瞿唐關。使於白帝屯兵。下臨瀼西。使有事。宜多置兵。則夔帥不能親將。指聲倒置。若少置兵。則關先不守。夔州必隨以破。可謂失策。大抵當時蜀已平。乃移夔州。晉已平。乃移太原。皆不可曉。若使晉蜀復爲豪傑所得。彼能據一國。獨不能復徙一城。以就形勝耶。若雖有外寇。而其地尙爲我有。乃捨險就易。此何理也。

忠州在陝路。與萬州最號窮陋。豈復有爲郡之樂。白樂天詩乃云。唯有綠樽紅燭下。暫時不似在忠州。又云。今夜

酒醺羅綺煥，被君融盡玉壺冰。以今觀之，忠州那得此光景耶。當是不堪司馬閒冷，驟易刺史，故亦見其樂爾。可憐哉。

會子宣，林子中在密院，爲哲廟言。章子厚以隱士帽紫直掇繫條見從官，從官皆朝服，在強肆如此。上曰：彼見蔡京，亦敢爾乎。京時爲翰林學士，不知何以得人主待之如此。真奸人之雄也。

祖宗故事，命官鑾廳舉進士者，先所屬選官考試所業通者，方聽取解至省試。程文紕繆者勒停，不合格者亦贖銅放，永不得應舉。天聖間，方除前制，然未久，又詔文臣許鑾廳兩次，武臣止許一次，其嚴如此。近歲泛許人應博學宏辭，遂有妄以此自稱，或假手作所業獻禮部，亦許試，而程文繆不可讀，亦無以懲之，殆非也。

秦所作鄭白二渠，在今京兆府之涇陽，皆以涇水爲源。白渠灌涇陽高陵櫟陽及耀州雲陽三原富平，凡六縣，斗門百七十餘所，今尙存。然多廢不治。鄭渠所灌尤廣袤，數倍于白渠。涇水乃絕深，不能復入渠口，渠岸又多摧圯填淤，比之白渠，尤不可措手矣。

唐人喜赤酒甜酒灰酒，皆不可解。李長吉云：琉璃鍾，琥珀濃，小槽酒滴真珠紅。白樂天云：荔枝新熟雞冠色，燒酒初開琥珀香。杜子美云：不放香醪如蜜甜。陸魯望云：酒滴灰香似去年。

李虛己侍郎，字公受，少從江南先達學作詩，後與曾致堯倡酬，曾每曰：公受之詩雖工，恨啞耳。虛己初未悟，久乃造入，以其法授晏元獻。元獻以授二宋，自是遂不傳。然江西諸人，每謂五言第三字，七言第五字要響，亦此意也。沈義倫諡恭惠，其家訴於朝，欲帶一文字，議者執不可而止。張知白諡文節，御史王嘉言請改諡文正。王孝先爲相，亦不肯改。歐陽文忠公初但諡文，蓋以配諱文公。常夷甫方兼太常，晚與文忠相失，乃獨謂公有定策功，當加忠字，實抑之也。李邦直作議不能固執，公論非之。當時士大夫相謂曰：永叔不得諡文公，此諡必留與介甫耳。其後信然。

本朝進士，初亦如唐制，兼探時望。真廟時，周安惠公起始建糊名法，一切以程文爲去留。

李允則，真廟時知滄州，虜圍城，城中無礮石，乃鑿冰爲礮，虜解去。近時陳規守安州，以泥爲礮，城亦終不可下。信州龍虎山，漢天師張道陵後，世襲虛靜先生號，蠲賦役，自二十五世孫乾曜始。時天聖八年也。今黃冠輩謂始

于三十二代。非也。又獨謂三十二代爲張虛靜。亦非也。

卷六

太宗朝。胡秘監周甫。貶坊州團練副使。擅離徙所。至鄜州謁宋太素尙書。被劾。特置不問。元祐中。陳正字無己爲徐教官。亦擅離任。至南京別東坡先生。諫官彈之。亦不加罪。祖宗優待文士如此。今上初登極。周丞相草儀注。稱新皇帝。蓋創爲文也。

歐陽公記開寶錢文曰宋通。予按周顯德錢文曰周通。故國初因之。亦曰宋通。建隆乾德中皆然。不獨開寶也。至太平興國以後。乃以年號爲錢文。至今皆然。歐公又謂寶元錢文曰皇宋。按寶錄所載亦同。然今錢中又有云聖宋者。大小錢皆有之。大錢折二。始於熙寧。則此名乃或出於熙寧以後矣。

周世宗時。李景奉正朔。上表自稱唐國主。而周稱之曰江南國主。國書之制曰。皇帝致書恭問江南國主。又以君字易卿字。至藝祖於李煜。則遂賜詔如藩方矣。仁宗時。冊命趙元昊爲夏國主。蓋用江南故事。然亦賜詔。凡言及卿字處。卽闕之。亦或以國主代卿字。當時必有定制。然不盡見於國史也。

歐陽文忠公立論。易繫辭當爲大傳。蓋古人已有此名。不始於公也。有黠僧遂投其好。偕作韓退之與僧大顛書。引繫辭謂之易大傳。以示文忠公。公以合其論。遂爲之跋曰。此宜爲退之之言。予嘗得此書石刻。語甚鄙。不足信也。

今僧寺輒作庫。質錢取利。謂之長生庫。至爲鄙惡。予按楚甄彬嘗以束苧就長沙寺庫質錢。後贖苧還。於苧束中得金五兩。送還之。則此事亦已久矣。庸僧所爲。古今一揆。可設法嚴絕之也。

先君入蜀時。至華之鄭縣。過西溪。唐昭宗避兵。嘗幸之。其地在官道旁七八十步。澄深可愛。亭曰西溪。蓋杜工部詩所謂鄭縣亭子澗之濱者。亭旁古松間。支徑入小寺。外弗見也。有柎木。版揭梁間甚大。書杜詩。筆亦雄勁。體雜顏柳。不知何人書。墨挺然出版上。甚異。或云。墨着柎木皆如此。

宗正卿。祖宗因唐故事。必以國姓爲之。然不必宗室也。元豐中。始兼用庶姓。而知大宗正事。設官乃於濮安懿

王始權任甚重。頗鑄損云。

京師溝渠極深廣。亡命多匿其中。自名爲無憂洞。甚者盜匿婦人。又謂之鬼樊樓。國初至兵興常有之。雖才尹不能絕也。

祥符東封。命王欽若。趙安仁並判兗州。二公皆見任執政也。慶曆初。西鄙未定。命夏竦判永興。陳執中。范雍知永興。一州二守。一府三守。不知當時如何分職事。既非長貳。文移書判之類。必有程式。官屬胥吏。何所稟承。國史皆不載。莫可考也。然當時諫官御史不以爲非。諸公受之。亦不力辭。豈在其時亦爲便於事耶。宣和中。復幽州以爲燕山府。蔡靖知府。郭藥師同知。既增同守。則爲長貳。與慶曆之制不同。鼂以道讀魏書。以爲魏收獨無刑禍。既以壽終。又贈司空尙書左僕射。諡文貞。以此攻韓退之避脩史之說。然收死後。竟以史筆多憾於人。齊亡之歲。冢被發。棄骨於外。得禍亦不輕矣。

王荆公父名益。故其所著字說無益字。蘇東坡祖名序。故爲人作序。皆用敘字。又以爲未安。遂改作引。而謂字序曰字說。張芸叟父名蓋。故表中云。此乃伏遇皇帝陛下。今人或效之。非也。

古謂帶一爲一腰。獨今謂衣爲一領。周武帝賜李賢御所服十三環金帶一腰是也。近世乃謂帶爲一條。語頗鄙。不若從古爲一腰也。

黃巢之入長安。僖宗出幸。豆盧瑑崔沆劉鄩于琮裴諗趙縱李溥李湯皆守節。至死不變。鄭綦鄭係義不臣賊。舉家自縊而死。以靖康京師之變言之。唐猶爲有人也。

晉語兒人二字通用。世說載桓溫行經王大將軍墓。望之曰。可兒可兒。蓋謂可人爲可兒也。故晉書及孫綽與庾亮牋。皆以爲可人。又陶淵明不欲束帶見鄉里小兒。亦是以小人爲小兒耳。故宋書云。鄉里小人也。

晉人所謂不意永嘉之末。復聞正始之音。永嘉正始。乃魏晉年名。胡武平。上呂丞相言云。手提六鐸。鏘正始之遺音。夢授神椽。擯奪朱之亂色。蓋不悟正始爲年名也。

俗說唐五代間事。每及功臣。多云賜無畏。其言甚鄙淺。予兒時聞之。每以爲笑。及觀韓偓金鑿密記云。面處分。自此賜無畏。兼賜金三十兩。又云。已曾賜無畏。卿宜凡事皆盡言。直是鄙俚之言。亦無畏。以此觀之。無畏者。許之無

所畏憚也。然君臣之間，乃許之無所畏憚，是何義理必起於唐末耳。

國初舉人對策，皆先寫策題，然策題不過一二十句，其後策題寢多，而寫題如初。舉人甚以為苦。慶曆初，賈文元公為中丞，相奏罷之。

故事，臺官無侍經筵者。賈文元公為中丞，仁祖以其精於經術，特召侍講，邇英自此遂為故事。秦會之當國時，諫官御史必兼經筵，而其子熺亦在焉。意欲搏擊者，輒令熺於經筵侍對時諭之。經筵退，彈文即上。予與尹少稷同作密院編脩官，時陳魯公史魏公為左右相，一日過堂，見魯公語少款，少稷忽曰：「稽便難活。」相公面上人又云：「稽是右相薦，右相面上人。」又云：「稽是相公鄉人。」處處為人關防。魯公笑答曰：「康伯往年使虜，有李愈少卿者來迓客，自言漢兒也。」云：「女真契丹奚皆同朝，只漢兒不好。」北人指曰：「漢兒。」南人卻罵作番人，愈之言無乃與君類耶。一座皆笑。

吳處厚字伯固，既上書告蔡新州詩事，自謂且顯擢，時已為漢陽守，比秩滿，僅移衛州。予少時嘗見其謝表曰：「今李常已移成都，則餘人次第復用，臣有兩子一壻，俱是選人，到處撞見冤讎，何人更肯提挈。」處厚本能文，而表辭鄙淺如此者，意謂太母見之易曉耳。

王黼在翰苑，嘗病疫，危甚，國醫皆束手。二妾曰：「豔娥素娥侍疾，坐於足。」素娥泣曰：「若內翰不諱，我輩豈忍獨生，惟當俱死耳。」豔娥亦泣，徐曰：「人生死有命，固無可奈何，姊宜自寬。」黼雖昏臥，實具聞之。既愈，素娥專房，燕封至淑人。豔娥遂辭去，及黼誅，素娥者驚悸，不三日亦死。曩日俱死之言遂驗。

蜀老言紹興初，漕粟嘉陵以餉邊，每一斛至軍中，計其費為七十五斛。席大光胡承公為帥，始議轉船摺運，於是費十減六七，向非二公，蜀已大困矣。故至今蜀人謂承公為湖州鏡。

王性之記問該洽，尤長於國朝故事，莫不能記。對客指畫誦說，動數百千言，退而質之，無一語繆。予自少至老，惟見一人。方大駕南渡，典章一切掃蕩無遺，甚至祖宗諡號亦皆忘失。祠祭但稱廟號而已。又因討論御名，禮部申省言未尋得廣韻，方是時，性之近在二百里內，非獨博記可詢，其藏書數百篋，無所不備，盡護致剡山，當路藐然不問也。

王伯照長於禮樂。歷代及國朝議禮之書。悉能成誦。亦可謂一時之傑。紹興末。爲太常少卿。遷禮部侍郎。猶兼少卿事。可謂得人。俄坐臺評去。近時不惜人才至此。

都下買婢。謂未嘗入人家者爲一生人。喜其多淳謹也。予在蜀中。與何搢之同闕報狀。見新進驟用者。搢之曰。渠是一生人。宜其速進。予怪而詰之。搢之曰。曾爲朝士者。旣爲人所忌嫉。又多謗。故惟新進者常無患。蓋有激也。

杜詩夜闌更秉燭。意謂夜已深矣。宜睡而復秉燭。以見久客喜歸之意。僧德洪妄云。更當平聲讀。烏有是哉。

謝景魚家有陳無己手簡一編。有十餘帖。皆與酒務官託買浮炭。其貧可知。浮炭者。謂投之水中而浮。今人謂之浮炭。恐亦以投之水中則浮故也。白樂天詩云。日暮半爐浮炭火。則其語亦已久矣。

四方之音有訛者。則一韻盡訛。如閩人訛高字。則謂高爲歌。謂勞爲羅。秦人訛青字。則謂青爲妻。謂經爲稽。蜀人訛登字。則一韻皆合口。吳人訛魚字。則一韻皆開口。他放此。中原惟洛陽得天地之中。語音最正。然謂絃爲玄。謂玄爲絃。謂犬爲遣。謂遣爲犬之類。亦自不少。

予遊邛州天慶觀。有陳希夷詩石刻云。因攀奉縣尹尙書水南小酌。回捨轡。特叩松扃。謁高公。茶話移時。偶書二十八字。道門弟子圖南上。其詩云。我謂浮榮真是幻。醉來捨轡謁高公。因聆玄論冥冥理。轉覺塵寰一夢中。末書太歲丁酉。蓋蜀孟昶時。當石晉天福中也。天慶本唐天師觀。詩後有文與可跋。大略云。高公者。此觀都威儀何昌一也。希夷從之學鎖鼻術。予是日迫赴太守宇文袞臣約飯。不能盡記。後卒不暇再到。至今以爲恨。

予遊大邑鶴鳴觀。所謂張天師鶴鳴化也。其東北絕頂。又有上清宮。壁間有文與可題一絕曰。天氣陰陰別作寒。夕陽林下動歸鞍。忽聞人報後山雪。更上上清宮上看。

京口子城西南月觀。在城上。或云卽萬歲樓。京口人以爲南唐時。節度使每登此樓。西望金陵。嵩呼遙拜。其實非也。京口記云。晉王恭所作。唐孟浩然有萬歲樓詩。見集中。

水流天地外。山色有無中。王維詩也。權德輿晚渡楊子江詩云。遠岫有無中。片帆烟水上。已是用維語。歐陽公長短句云。平山闌檻倚晴空。山色有無中。詩人至是蓋三用矣。然公但以此句施於平山堂爲宜。初不自謂工也。東坡先生乃云。記取醉翁語。山色有無中。則似謂歐陽公創爲此句。何哉。

世言荆公四家詩。後李白以其十首九首說酒及婦人。恐非荆公之言。白詩樂府外。及婦人者實少。言酒固多。比之陶淵明輩。亦未爲過。此乃讀白詩不熟者。妄立此論耳。四家詩未必有次序。使誠不喜白。當自有故。蓋白識度甚淺。觀其詩中。如中宵出飲三百杯。明朝歸揖二千石。揄揚九重萬乘主。謔浪赤墀金鎖賢。王公大人借顏色。金章紫綬來相趨。一別蹉跎朝市間。青雲之交不可攀。歸來入咸陽。談笑皆王公。高冠佩雄劍。長揖韓荆州之類。淺陋有索客之風。集中此等語至多。世俱毛本作但。以其詞豪俊動人。故不深考耳。又如以布衣得一翰林供奉。此何足道。遂云當時笑我微賤者。卻來請謁爲交親。毛本作歡。宜其終身坎壈也。

杜牧之作還俗僧詩云。雲髮不長寸。秋寒力更微。獨尋一徑葉。猶挈衲殘衣。日暮千峯裏。不知何處歸。此詩蓋會昌廢佛寺時所作也。又有斫竹詩。亦同時作云。寺廢竹色死。官家寧爾留。霜根漸隨斧。風玉尙敲秋。江南苦吟客。何處寄悠悠。詞意悽愴。蓋憐之也。至李端叔還俗道士詩云。聞道華陽客。儒衣謁紫微。舊山連藥賣。孤鶴帶雲歸。柳市名猶在。桃源夢已稀。還家見鷗鳥。應媿背船飛。在道士還俗。非不得已者。故直譏之耳。

聞人茂德言沙糖。中國本無之。唐太宗時。外國貢至。問其使人。此何物。云以甘蔗汁煎。用其法煎成。與外國者等。自此中國方有沙糖。唐以前書傳。凡言及糖者。皆糟耳。如糖蟹糖薑皆是。

漢嘉城西北山麓。有一石洞。泉出其間。時聞洞中泉滴聲。良久一滴。清如金石。黃魯直題詩云。古人題作東丁水。自古東丁直到今。我爲改名方響洞。要知山水有清音。

成都藥市。以玉局化爲最盛。用九月九日。楊文公談苑云。七月七日。誤也。

馬鞭擊貓。筇竹杖擊狗。皆節節斷折。物理之不可推者也。

亳州出輕紗。舉之若無。裁以爲衣。真若煙霧。一州惟兩家能織。相與世世爲婚姻。懼他人家得其法也。云自唐以來名家。今三百餘年矣。

禁中有哲宗皇帝宸翰四大字曰。罰弗及嗣。更無他語。此必紹聖元符間。有欲害元祐黨人子孫者。故帝書此言。祖宗盛德如此。故老言。大臣嘗從容請幸金明池。哲廟曰。祖宗幸西池。必宴射。朕不能射。不敢出。又木工楊琪作龍舟。極奇麗。或請一登之。哲廟又曰。祖宗未嘗登龍舟。但臨水殿略觀足矣。後勉一幸金明。所謂龍舟。非獨不登。

亦終不觀也。

唐人本謂御史在長安者爲西臺。言其雄劇。以別分司東都事。見劇談錄。本朝都汴。謂洛陽爲西京。亦置御史臺。至爲散地。以其在西京。亦號西臺。名同而實異也。

唐人本以尙書省在大明宮之南。故謂之南省。自建炎軍興。蜀士以險遠。許就制置司類試。與省試同。間有願赴行在省試者。亦聽之。蜀士因謂之赴南省。以大駕在東南也。尤非是。

北戶錄云。廣人於山間掘取大蟻卵爲醬。名蟻子醬。按此卽禮所謂蚍蜉醢也。三代以前。固以爲食矣。然則漢人以鼃祭宗廟。何足怪哉。

祖宗以來至靖康間。文武臣僚罷官。或服闋。或被罪絀復到闕。皆有期限。如有故。須自陳給假。至建炎初。以軍興道梗。始有三年之限。後有特許從便赴闕。猶降旨云。候邊事寧息日依舊。然遂不復舉行矣。

今人書某爲人。皆以爲俗從簡便。其實古某字也。穀梁桓二年。蔡侯鄭伯會於鄧。范寧注曰。鄧人地。陸德明釋文曰。不知其國。故云人地。本又作某。

江鄰幾嘉祐雜志。言唐告身初用紙。肅宗朝有用絹者。貞元後始用綾。予在成都。見周世宗除劉仁贍侍中告。乃用紙。在金彥亨尙書之子處。

嘉祐雜志云。峨眉雪蛆。治內熱。予至蜀。乃知此物實出茂州雪山。雪山四時常有積雪。彌遍嶺谷。蛆生其中。取雪時。并蛆取之。能蠕動。久之雪消。蛆亦消盡。

會稽鏡湖之東。地名東關。有天花寺。呂文靖嘗題詩云。賀家湖上天花寺。一一軒牕向水開。不用閉門防俗客。愛閒能有幾人來。今寺乃在草市通衢中。三面皆民間廬舍。前臨一支港。與詩殊不合。豈陵谷之變。遽已如此乎。或謂寺本在湖中。後徙於此。

蘇叔黨政和中至東都。見妓稱錄事。太息語廉宣仲曰。今世一切變古。唐以來舊語盡廢。此猶存唐舊。爲可喜。前輩謂妓曰酒糾。蓋謂錄事也。相藍之東。有錄事巷。傳以爲朱梁時名妓崔小紅所居。

張真甫舍人。廣漢人。爲成都帥。蓋本朝得蜀以來所未有也。未至前旬日。大風雷。龍起劍南西川門。揭牌擲數十。

步外。壞南宇。不迹宛然。人皆異之。真甫名震。或爲之說曰。元豐末。貢院火。而焦蹈爲首魁。當時語曰。火焚貢院狀元焦。無能對者。今當以雷起譙門。知府震爲對。然歲餘。真甫以疾不起。方未病時。府治堂柱生白芝三。諂者謂之玉芝。予按酉陽雜俎。芝白爲喪。真甫當之。

自元豐官制。尙書省復二十四曹。繁簡絕異。在京師時有語曰。吏勦封考。筆頭不倒。戶度金倉。日夜窮忙。禮祠主牘。不識判稅。兵職駕庫。典了襪袴。刑都比門。總是冤魂。工屯虞水。白日見鬼。及大駕幸臨安。喪亂之後。士大夫亡失告身批書者多。又軍賞百倍平時。賂賄公行。冒濫相乘。饟軍日滋。賦斂愈繁。而刑獄亦衆。故吏戶刑三曹。吏胥人人富饒。他曹寂寞彌甚。吏輩又爲之語曰。吏勦封考。三婆兩媪。戶度金倉。細酒肥羊。禮祠主牘。淡喫麩麵。兵職駕庫。敲薑呷醋。刑都比門。人肉餛飩。工屯虞水。生身餓鬼。

高宗行幸揚州。郡人李易爲狀元。次舉駐蹕臨安。而狀元張九成亦貫臨安。時以爲王氣所在。方李易唱第時。上顧問此人合衆論否。時相對曰。易乃揚州州學學正。必合衆論。人笑其敷奏之陋。

唐以來。皇子不兼師傅官。以子不可爲父師也。其後失於檢點。乃有兼者。治平中。賈黯草東陽郡王顥檢校太傅制。建明其失。自後皇子及宗室卑行合兼三師者。悉改爲三公。政和中。省太尉司徒司空之官。而置少師少傅少保。皇子乃復兼師傅。自嘉王楷始。

今參知政事恩數。比門下中書侍郎。在尙書左右丞之上。其議出於李漢老。漢老時爲右丞。蓋暗省轉廳。可徑登接路也。呂丞相元直覺此意。排去之。然自此遂爲定制。

蔚藍乃隱語天名。非可以義理解也。杜子美梓州金華山詩云。上有蔚藍天。垂光抱瓊臺。猶未有害。韓子蒼乃云。水色天光共蔚藍。乃直謂天與水之色。俱如藍耳。恐又因杜詩而失之。

胡子遠之父。唐安人。家饒財。常委僕權錢。得錢引五千緡。皆僞也。家人欲訟之。胡曰。幹僕已死。豈忍使其孤對獄耶。或謂滅其半價予人。尙可得二千餘緡。胡不可曰。終當誤人。乃取而火之。泰然不少動心。其家暴貴。宜哉。

杜子美梅兩詩云。南京犀浦道。四月熟黃梅。慙慙長江去。冥冥細雨來。茅茨疎易溼。雲霧密難開。竟日蛟龍喜。盤渦與岸回。蓋成都所賦也。今成都乃未嘗有梅兩。惟秋半積陰。氣令蒸溽。與吳中梅兩時相類耳。豈古今地氣有

不同耶。

卷七

熙寧癸丑。華山阜頭峯崩。峯下一嶺一谷。居民甚衆。皆晏然不聞。乃越四十里外。平川土石雜下。如簸揚。七社民家壓死者幾萬人。懷田七八千頃。固可異矣。紹興間嚴州大水。壽昌縣有一小山。高八九丈。隨水漂至五里外。而兩旁草木廬舍。比水退。皆不壞。則此山殆空行而過也。

韓魏公家不食蔬。以脯醢當蔬盤。度亦始於近時耳。

曾子宣丞相家。男女手指。皆少指端一節。外甥亦然。或云。襄陽魏鎮輔。家世指少一節。道輔之姊嫁子宣。故子孫肖其外氏。

故都殘暑。不過七月中旬。俗以望日具素饌享先。織竹作盆盎狀。貯紙錢。承以一竹。焚之。視盆倒所向。以占氣候。謂向北則冬寒。向南則冬溫。向東西則寒溫得中。謂之孟蘭盆。蓋但俗老媪輩之言也。又每云。孟蘭盆倒。則寒來矣。晏元獻詩云。紅白薇英落。朱黃槿豔殘。家人愁溽暑。計日望孟蘭。蓋亦戲述俗語耳。

歐陽公謫夷陵時。詩云。江上孤峯蔽綠蘿。縣樓終日對嵯峨。蓋夷陵縣治。下臨峽江。名綠蘿溪。自此上泝。卽上牢下牢關。皆山水清絕處。孤峯者。卽甘泉寺山。有孝女泉及祠在葛竹間。亦幽邃可喜。峽人歲時遊觀頗盛。予入蜀。往來皆過之。韓子蒼舍人泰輿縣道中詩云。縣郭連青竹。人家蔽綠蘿。似因歐公之句而失之。此詩蓋子蒼少作。故不審云。

秦會之跋後山集。謂會南豐脩英宗實錄。辟陳無己爲屬。孫仲益書數百字詆之。以爲無此事。南豐雖嘗預脩英宗實錄。未久卽去。且南豐自爲吏屬。烏有辟官之理。又無己元祐中。方自布衣命官。故仲益之辨。人多是之。然以予考其實。則二公俱失也。南豐元豐中還朝。被命獨脩五朝史。實許辟其屬。遂請秀州崇德縣令刑恕爲之用。選人已非故事。特從其請。而南豐又授經義局。辟布衣徐禧。例乞無己檢討。廟堂尤難之。會南豐上太祖紀敘論。不合上意。脩五朝史之意。寢緩未幾。南豐以憂去。遂已。會之但誤以五朝史爲英宗實錄耳。至其言辟無己事。則實

有之。不可謂無也。

前代夜五更至黎明而終。本朝外廷及外郡。悉用此制。惟禁中未明前十刻。更終。謂之待旦。蓋更終。則上御盥櫛。以俟明出御朝也。祖宗勤於政事如此。

予兒時。見宋脩撰輝爲先君言。某艱難中以轉餉至行在。時方避虜海道。上大喜。令除待制。呂相元直雅不相樂。乃曰。宋輝係直龍圖閣。便除待制。太超躐。欲且與脩撰。脩撰與待制。亦只爭一等。候更有勞。除待制不晚。遂除祕撰。宋公言之太息曰。此某命也。頃予被命脩高宗聖政及實錄。見日曆所載。實有此事。自昔大臣以私意害人。此其小小者耳。

高廟駐蹕臨安。艱難中每出。猶鋪沙藉路。謂之黃道。以三衙兵爲之。紹興末。內禪。駕過新宮。猶設黃道如平時。明日壽皇出。卽撤去。遂不復用。

族伯父彥遠。言少時識仲殊長老。東坡爲作安州老人食蜜歌者。一日與數客過之。所食皆蜜也。豆腐麵筋牛乳之類。皆漬蜜食之。客多不能下箸。惟東坡性亦酷嗜蜜。能與之共飽。崇寧中。忽上堂辭衆。是夕閉方丈門。自縊死。及火化。舍利五色。不可勝計。鄒忠公爲作詩云。逆行天莫測。雉作瀆中經。漚滅風前質。蓮開火後形。鉢盂殘蜜白。爐篆冷烟青。空有誰家曲。人間得細聽。彥遠又云。殊少爲土人。遊蕩不羈。爲妻投毒羹。戲中幾死。啖蜜而解。醫言復食肉。則毒發不可復療。遂棄家爲浮屠。鄒公所謂誰家曲者。謂其雅工於樂府詞。猶有不羈餘習也。

晏元獻爲藩郡。率十許日乃一出廳。僚吏旅揖而已。有欲論事。率因親校轉白。校復傳可否以出。遂退。呂正獻作相。及平章軍國事時。於便坐接客。初惟一揖。卽端坐自若。雖從官亦以次起白。及退。復起一揖。未嘗離席。蓋祖宗時。輔相之尊嚴如此。時亦不以爲非也。

東坡詩云。大弨一弛何緣毅。已覺翻翻不受檠。考工記。弓人寒奠體注曰。奠讀爲定。至冬膠堅。內之檠中。定往來體。釋文。檠音景。前漢蘇武傳。武能網紡繳。檠弓弩。顏師古曰。檠謂輔正弓弩。音警。又巨京反。東坡作平聲叶。蓋用漢書法也。

豐相之於舒信道。鄒志完於呂望之。其爲人似不類。然相與皆厚甚。不以鄉里及同僚故也。相之爲中司時。猶力

薦信道。志完元符中進用。則實由望之薦也。及以直諫遠竄。望之坐薦非其人。魏官謝表云。臣之與浩。實匪素交。以其嘗備學校之選於先朝。能陳詩賦之非於元祐。比緣薦士。遂取充員。豈期螻蟻之微。自速雷霆之譴。其敘陳終不以志完爲非。亦不易矣。

宋白集。有賜諸道節度觀察防團刺史知州以下。賀登極進奉詔書云。朕仰承先訓。續嗣丕基。眷命曆之有歸。想寰區之同慶。卿輟由俸祿。恭備貢輸。遙陳稱賀之誠。知乃盡忠之節。省覽嘉歎。再三在懷。實真廟登極時詔書也。乃知是時貢物。皆守臣以俸祿自備。今既以庫金爲貢。而推恩則如故。可謂厚恩矣。

前輩遇通家子弟。初見請納拜者。既受之。則設席望其家。遙拜其父祖。乃就坐。先君尙行之。

前輩置酒飲客。終席不褫帶。毛達可守京口時尙如此。後稍廢。然猶以冠帶勸酬。後又不講。紹興末。胡邦衡還朝。每與客飲。至酒勸。必冠帶再拜。朝士皆笑其異衆。然邦衡名重。行之自若。

元豐七年秋宴。神廟舉御觴。示丞相王岐公以下。忽暴得風疾。手弱觴側。餘酒霑汗御袍。是時京師方盛歌側金盞。皇城司中官以爲不祥。有歌者輒收繫之。由是遂絕。先楚公進裕陵挽詞有云。輅從元朔朝時破。花是高秋宴後萎。二句。皆當時實事也。

天聖明道間。京師盛歌一曲。曰曹門高。未幾。慈聖太后受冊中宮。人以爲驗矣。其後宣仁與慈聖皆垂箔攝政。而宣仁實慈聖之甥。以故選配英廟。則徵兆之意。若曰曹門之高。當相繼而起也。何其神哉。

趙相挺之使虜。方盛寒。在殿上。虜主忽顧挺之耳。愕然急呼小胡指示之。蓋闔也。俄持一小玉合子至。合中有藥。色正黃。塗挺之兩耳。周匝而去。其熱如火。既出殿門。主客者揖賀曰。大使耳。若用藥遲。且拆裂缺落。甚則全耳皆墮而無血。扣其玉合中藥爲何物。乃不肯言。但曰。此藥市中亦有之。價甚貴。方七直錢數千。某輩早朝。遇極寒。卽塗少許。吏卒輩則別有藥。以孤瀾調塗之。亦效。

遼人劉六符。所謂劉燕公者。建議於其國。謂燕薊雲朔。本皆中國地。不樂屬我。非有以大收其心。必不能久。虜主宗真問曰。如何可收其心。曰。斂於民者。十減其四五。則民惟恐不爲北朝人矣。虜主曰。如國用何。曰。臣願使南朝。求割關南地。而增戍闕兵。以脅之。南朝重於割地。必求增歲幣。我託不得已受之。俟得幣。則以其數對減民賦。可

也。宗真大以爲然。卒用其策。得增幣。而他大臣背約。纔以幣之十二減賦。民困已喜。及洪基嗣立。六符爲相。復請用元議。洪基亦仁厚。遂盡用銀絹二十萬之數。減燕雲租賦。故其後虜政雖亂。而人心不離。豈可謂虜無人哉。仁宗皇帝慶曆中。嘗賜遼使劉六符飛白書八字曰。南北兩朝。永通和好。會六符知貢舉。乃以兩朝永通和好爲賦題。而以南北兩朝永通和好爲韻。云出南朝皇帝御飛白書。六符蓋爲虜畫策增歲賂者。然其尊戴中國尙如此。則盟好中絕。誠可惜也。

王荆公素不樂滕元發。鄭毅夫。目爲滕屠鄼。然二公資豪邁。殊不病其言。毅夫爲內相。一日送客出郊。過朱亥冢。俗謂之屠兒原者。作詩云。高論唐虞儒者事。賈交負國豈勝言。憑君莫笑金槌陋。卻是屠酤解報恩。

予幼時侍先君避亂東陽山中。有北僧年五十餘。慈朴無能。自言沈相義倫裔孫。攜遺像及告身詔勅甚備。且云。義倫之後。惟己獨存。欲訴於朝。求一官還俗。不知竟何往也。

詩正義曰。絡緯鳴。嬾婦驚。朱子京秋夜詩云。西風已飄上林葉。北斗直掛建甌城。人間底事最堪恨。絡緯啼時無婦驚。其妙於用事如此。

孫少述一字正之。與王荆公交最厚。故荆公別少述詩云。應須一曲千回首。西去論心有幾人。又云。子今此去來何時。後有不可誰予規。其相與如此。及荆公當國數年。不復相聞。人謂二公之交遂睽。故東坡詩云。蔣濟謂能來阮籍。薛宣真欲吏朱雲。劉舍人貢父詩云。不負與公遂初賦。更傳中散絕交書。然少述初不以爲意也。及荆公再罷相歸。過高沙。少述適在焉。亟往造之。少述出見。惟相勞苦。及弔元澤之喪。兩公皆自忘其窮達。遂留荆公。置酒共飯。劇談經學。抵暮乃散。荆公曰。退卽解舟。無由再見。少述曰。如此更不去奉謝矣。然惻惻各有惜別之色。人然後知兩公之未易測也。

杭僧思聰。東坡爲作字說者。大觀政和間。挾琴遊梁。日登中貴人之門。久之。遂還俗。爲御前宣臣。方其將冠巾也。蘇叔黨因浙僧入都。送之詩曰。試誦北山移。爲我招琴聰。詩至已無及矣。參寥政和中老矣。亦還俗而死。然不知其故。

陶淵明遊斜川詩。自敘辛丑歲。年五十。蘇叔黨宣和辛丑。亦年五十。蓋與淵明同甲子也。是歲得圓於許昌西湖。

上。故名之曰小斜川云。

夏文莊初謚文正。劉原父持以爲不可。至曰：天下謂竦邪。而陛下謚之正。遂改今謚。宋子京作祭文。乃曰：惟公溫厚粹深。天與其正。蓋謂夏公之正。天與之。而人不與。當時自有此一種議論。故張文定甚惡石沮徠。詆之甚力。目爲狂生。東坡議學校貢舉狀云：使孫復石介尙在。則迂闊矯誕之士也。可施之於政事之間乎。其言亦有自來。歐公作王洙源叔參政墓誌曰：夏竦卒。天子以東宮恩賜謚文獻。洙爲知制誥。封還曰：此僖祖謚也。於是太常更謚文莊。與他書異。

壹貳叁肆伍陸柒捌玖拾。字書皆有之。參正是三字。或讀作七南反耳。柒字晉唐人書或作漆。亦取其同音也。

三舍法行時。有教官出易義題云：乾爲金。坤又爲金何也。諸生乃懷監本易至簾前請云：題有疑。請問。教官作色曰：經義豈當上請。諸生曰：若公試。固不敢。今乃私試。恐無害。教官乃爲講解大概。諸生徐出。監本復請曰：先生恐是看了麻沙本。若監本。則坤爲釜也。教授皇恐乃謝曰：某當罰。卽輪罰改題而止。然其後亦至通顯。

老杜哀江頭云：黃昏胡騎塵滿城。欲往城南忘城北。言方皇惑避死之際。欲往城南。乃不能記孰爲南北也。然荆公集句兩篇。皆作欲往城南望城北。或以爲舛誤。或以爲改定。皆非也。蓋所傳本偶不同。而意則一也。北人謂向爲望。謂欲往城南。乃向城北。亦皇惑避死不能記南北之意。

先夫人幼多在外家晁氏。言諸晁讀杜詩。穉子也能賒。晚來幽獨恐傷神。也字恐字。皆作去聲讀。

蜀人石耆公。言蘇黃門嘗語其姪孫在庭少卿曰：哀江頭。卽長恨歌也。長恨冗而凡。哀江頭簡而高。在庭曰：常武與桓二詩。皆言用兵。而繁簡不同。蓋此意乎。黃門搖手曰：不然。

姓但者。音若檀。近歲有嶺南監司曰但中庸。是也。一日朝士同觀報狀。見嶺南郡守以不法被劾。朝旨令但中庸根勘。有一人輒歎曰：此郡守必是權貴所主。問何以知之。曰：若是孤寒。必須痛治。此乃令但中庸根勘。卽是有力可知。同坐者無不掩口。其人悻然作色曰：拙直宜爲諸公所笑。竟不悟而去。

今人解杜詩。但尋出處。不知少陵之意。初不如是。且如岳陽樓詩。昔聞洞庭水。今上岳陽樓。吳楚東南拆。乾坤日夜浮。親朋無一字。老病有孤舟。戎馬關山北。憑軒涕泗流。此豈可以出處求哉。縱使字字尋得出處。去少陵之意。

益遠矣。蓋後人元不知杜詩所以妙絕古今者在何處。但以一字亦有出處爲工。如西崑酬倡集中詩。何曾有一字無出處者。便以爲追配少陵。可乎。且今人作詩。亦未嘗無出處。渠自不知。若爲之箋注。亦字字有出處。但不妨其爲惡詩耳。

壽皇時。禁中供御酒。名薔薇露。賜大臣酒。謂之流香酒。分數旋取旨。蓋酒戶大小。已盡察矣。

韓魏公聲雌。文潞公步碎。相者以爲二公若無此二事。皆非人臣之相。

慶曆中。河北道士賈衆妙善相。以爲曾魯公脊骨如龍。王荆公目睛如龍。蓋人能得龍之一體者。皆貴窮人爵。見豫章黃庠手曰。左手得龍爪。雖當魁天下。而不仕。若右手得之。則貴矣。庠果爲南省第一。不及廷對而死。

兪秀老紫芝。物外高人。喜歌謳。醉則浩歌不止。故荆公贈之詩曰。魯山眉宇人不見。只有歌辭來向東。借問樓前蹋子薦。何如雲臥唱松風。又云。暮年要與君攜手。處處相煩作好歌。不知者以爲賦詩也。紫芝之弟清老欲爲僧。荆公名之曰紫琳。因手簡目之爲琳公。然清老卒未嘗祝髮也。

臨江蕭氏之祖。五代時。仕於湖南。爲將校。坐事當斬。與其妻亡命焉。王捕之甚急。將出境。會夜阻水。不能去。匿於人家罾槽中。湘湖間謂罾爲窳。天將旦。有扣窳語之曰。君夫婦速去。捕者且至矣。因亟去。遂得脫。卒不知告者何人。以爲神物。乃世世奉祀。謂之窳頭神。今參政照鄰乃其後也。

晁以道明皇打毬圖詩。宮殿千門白晝開。三郎沈醉打毬回。九齡已老韓休死。明日應無諫疏來。又張果洞請云。怪底君王慚漢武。不誅方士守輪臺。皆偉論也。

歐陽公早朝詩云。玉勒爭門隨仗入。牙牌當殿報班齊。李德芻言自昔朝儀未嘗有牙牌報班齊之事。予考之。實如德芻之說。問熟於朝儀者。亦惘然以爲無有。然歐陽公必不誤。當更博考舊制也。

王荆公所賜玉帶。闊十四搯。號玉抱肚。真廟朝。趙德明所貢。至紹興中。王氏猶藏之。曾孫奉議郎瓊。始復進入禁中。

舅氏唐居正。意文學氣節。爲一時師表。建炎初。避兵武當山中。病歿。遺文散落。無復存者。獨滁州漢高帝廟碑陰尙存。今錄於此。滁之西曰豐山。有漢高帝廟。或云漢諸將追項羽。道經此山。至今土俗以五月十七日爲高帝生

日遠近畢集。薦殺觴焉。某嘗從太守侍郎會禱雨於廟。因讀庭中刻石。始知昔人相傳。蓋以五月十七爲高帝忌日。按漢書高帝十三年四月甲辰崩於長樂宮。五月丙寅葬長陵。注自崩至葬凡二十四日。疑五月十七日必其葬日。又非忌日也。以曆推之。自上元甲子之歲。至高帝十二年四月晦日。是年歲在丙午。凡積一百九十三萬六千三百六十三年。二千三百九十四萬九千五百九十九日。七億七百二十四萬六千八百八十五日。以法除之。算外得五月朔己酉十七日乙丑。則丙寅葬日。乃十八日也。班固記漢初北平侯張敖所有顛帝曆。晦朔月見弦望滿虧多非是。故高帝九年六月乙未晦日食。夫日食必於朔。而此食於晦。則先一日矣。豈非丙寅乃當時十七日乎。不然。歲月久。傳者失之也。遂以告公。命書其碑陰。紹聖二年五月旦記。

劍門關皆石無寸土。潼關皆土無拳石。雖皆號天下險固。要之潼關不若劍門。然自秦以來。劍門亦屢破矣。險之不可恃如此。

曾子宣丞相。元豐間。帥慶州。未至。召還。至陝府。復還慶州。往來潼關。夫人魏氏作詩戲丞相曰。使君自爲君恩厚。不是區區愛華山。

南豐曾氏享先。用節羹醢鵝剛粥。建安陳氏享先。用肝串子猪白割血羹肉汁。皆世世守之。富貴不加。貧賤不廢也。

蘇子由晚歲遊許昌賈文元公園。作詩云。前朝輔相終難得。父老咨嗟今亦無。蓋謂方仁祖時。士大夫多議文元。然自今觀之。豈易得哉。其感慨如此。

卷八

國初尙文選。當時文人專意此書。故草必稱王孫。梅必稱驛使。月必稱望舒。山水必稱清暉。至慶曆後。惡其陳腐。諸作者始一洗之。方其盛時。士子至爲之語曰。文選爛。秀才半。建炎以來。尙蘇氏文章。學者翕然從之。而蜀士尤盛。亦有語曰。蘇文熟。喫羊肉。蘇文生。喫菜羹。學士院移文三省。名咨報。都司移文六曹。名刺。

蜀人見人物之可誇者。則曰嗚呼。可鄙者。則曰噫嘻。

張邦昌既死。有旨。月賜其家錢十萬。於所在州勘支。曾文清爲廣東漕。取其券繳奏。曰。邦昌在古法當族誅。今貸與之。生足矣。乃加橫恩如此。不知朝廷何以待伏節死事之家。詔自今勿與。予銘文清墓。載此事甚詳。及刻石。其家乃削去。至今以爲恨。

興元城固縣產礬石。不可勝計。與凡土石無異。雖數十百擔。亦可立取。然其性酷烈。有大毒。非置瓦罏中煨三過。不可用。然猶動能害人。尤非他金石之比。千金有一方。用礬石。輔以乾薑烏頭之類。名匈奴露宿丹。其酷烈可想見也。

陰平在今文州。有橋曰陰平橋。淳熙初。爲郡守者大書立石於橋下。曰鄧艾取蜀路。過者笑之。

建炎三年春。車駕倉卒南渡。駐蹕於杭。有侍臣召對者。既對。所陳劄子。首曰。恭惟陛下。歲二月。春巡狩。至於錢塘。

呂相頤浩見之。笑曰。秀才家識甚好惡。

淳熙中。黃河決。入汴。梁宋間謹言。謂之天水來。天水國姓也。還民以爲國家恢復之兆。

史魏公自少保六轉而至太師。中間近三十年。福壽康寧。本朝一人而已。文潞公自司空回轉。蔡太師自司空三轉。秦太師自少保兩轉而已。

鄭康成自爲書戒子益恩。其末曰。若忽忘不識。亦已焉哉。此正孟子所謂父子之間不責善也。蓋不責善。非不示於善也。不責其必從耳。陶淵明命子詩曰。夙興夜寐。願爾斯才。爾之不才。亦已焉哉。用康成語也。自唐至本朝。中書門下出勅。其勅字皆平正渾厚。元豐後。勅出尙書省亦然。崇寧間。蔡京臨平寺額。作險勁體。來長而力短。省吏始效之。相跨尙。謂之司空勅。亦曰蔡家勅。蓋妖言也。京敗。言者數其朝京退逐。及公主改帝姬之類。偶不及蔡家勅。故至今勅字。蔡體尙在。

東坡海外詩云。夢中時見作詩孫。初不解。在蜀。見蘇山藏公墨迹。疊韻竹詩。後題云。寄作詩孫符。乃知此句爲仲虎發也。

紹興末。謝景思守括蒼。司馬季思佐之。皆名俊。劉季高以書與景思曰。公作守。司馬九作倅。想郡事皆如律令也。

聞者絕倒

東坡牡丹詩云。一朵妖紅翠欲流。初不曉翠欲流爲何語。及遊成都。過木行街。有大署市肆曰。郭家鮮翠紅紫鋪。問土人。乃知蜀語鮮翠。猶言鮮明也。東坡蓋用鄉語云。蜀人又謂糊牕曰泥牕。花蕊夫人宮詞云。紅錦泥牕遶四廊。非曾遊蜀亦所不解。

東坡先生省試刑賞忠厚之至論。有云。臯陶爲士。將殺人。臯陶曰殺之三。堯曰宥之三。梅聖俞爲小試官。得之。以示歐陽公。公曰。此出何書。聖俞曰。何須出處。公以爲皆偶忘之。然亦大稱歎。初欲以爲魁。終以此不果。及揭榜。見東坡姓名。始謂聖俞曰。此郎必有所據。更恨吾輩不能記耳。及謁謝。首問之。東坡亦對曰。何須出處。乃與聖俞語合。公賞其豪邁。太息不已。

宋白尙書詩云。風騷墜地欲成塵。春鎖南宮入試頻。三百俊才衣似雪。可憐無個解詩人。又云。對花莫道渾無過。曾與常人舉好詩。大抵宋詩雖多疵類。而語意絕有警拔者。故其自負如此。

白樂天詩云。四十著緋軍司馬。男兒官職未蹉跎。一爲州司馬。三見歲重陽。本朝太宗時。宋太素尙書。自翰苑謫鄜州行軍司馬。有詩云。鄜州軍司馬。也好畫爲屏。又云。官爲軍司馬。身是謫仙人。蓋北音司字作入聲讀。

故事謫散官。雖別駕司馬。皆封賜如故。故宋尙書在鄜時詩云。經時不巾櫛。傭更佩金魚。東坡先生在僭耳亦云。鶴髮驚全白。犀圍尙半紅。是也。至司戶參軍。則奪封賜。故世傳寇萊公謫雷州。借錄事參軍綠袍拜命。袍短纔至膝。又予少時見王姓之曾夫人。言曾丞相謫廉州司戶。亦借其姪綠袍拜命云。

紹興十六七年。李莊簡公在藤州以書寄先君。有曰。某人汲汲求少艾。求而得之。自謂得計。今成一聚枯骨。世尊出來。也救他不得。一聚枯骨。出神仙傳老子篇。某人者。前執政。留守金陵。暴得疾卒。故云。

秦丞相晚歲權尤重。常有數卒卓衣持挺立府門外。行路過者稍顧視警效。皆呵止之。嘗病告一二日。執政獨對。既不敢他語。惟盛推秦公勳業而已。明日入堂。忽問曰。聞昨日奏事甚久。執政惶恐曰。某惟誦太師先生勳德。曠世所無。語終卽退。竇無他言。秦公嘻笑曰。甚荷。蓋已曠言事官上章。執政甫歸閣子。彈章副本已至矣。其忤刻如此。

韓魏公罷政。以守司徒兼侍中鎮安武勝軍節度使。公累章牢辭。至以爲恐開大臣希望僭忒之階。遂改淮南節度使。元豐間。文潞公亦加兩鎮。引魏公事辭。卒亦不拜。紹興中。張俊韓世忠。乃以捍虜有功。拜兩鎮。俄又加三鎮。二人皆武人。不知辭。當時士大夫爲之語曰。若加一鎮。卽爲四鎮。如朱全忠矣。奈何。

大駕初駐蹕臨安。故都及四方士民商賈輻輳。又敕立官府。扁榜一新。好事者取以爲對曰。鈐轄諸道進奏院。詳定一司勅令所。王防禦契聖眼科。陸官人遇仙風藥。乾溼腳氣四斤丸。偏正頭風一字散。三朝御裏陳忠翊。四世儒醫陸太丞。東京石朝議女壻樂駐泊藥鋪。西蜀費先生外甥寇保義卦肆。如此凡數十聯。不能盡記。

高廟謂端硯如一段紫玉。瑩潤無瑕乃佳。何必以眼爲貴耶。晁以道藏硯。必取玉斗樣。喜其受墨濬多也。每曰。硯若無池受墨。則墨亦不必磨。筆亦不須點。惟可作枕耳。

呂吉甫問客。蘇子瞻文辭似何了。客揣摩其意答之曰。似蘇秦張儀。呂笑曰。秦之文高矣。儀固不能望。子瞻亦不能也。徐自誦其表語云。面折馬光於講筵。廷辯韓琦之奏疏。甚有自得之色。客不敢問而退。

陳師錫家亨儀。謂冬至前一日爲冬住。與歲除夜爲對。蓋閩音也。予讀太平廣記三百四十卷。有虛頊傳云。是夕冬至除夜。乃知唐人冬至前一日。亦謂之除夜。詩唐風。日月其間。除音直慮反。則所謂冬住者。冬除也。蓋傳其語。而失其字耳。

老杜寄薛三郎中詩云。上馬不用扶。每扶必怒曠。東坡送喬全詩云。上山如飛曠人扶。皆言老人也。蓋老人諱老。故爾。若少壯者。扶與不扶皆可。何曠之有。

宣和末。有巨商捨三萬緡。裝飾泗州普照塔。煥然一新。建炎中。商歸湖南。至池州江中。一日晨興。忽見一塔十三級。淨水上南來。金碧照輝。而隨波傾颺。若欲倒者。商舉家及舟師人人見之。皆驚怖誦佛。旣漸近。有僧出塔下。舉手揖曰。元是裝塔施主船。淮上方火災。大師將塔往海東行化去。語未竟。忽大風作。塔去如飛。遂不見。未幾。乃聞塔廢於火。舒州僧廣勤與商船同行。親見之。

段成式酉陽雜俎。言揚州東市塔影忽倒。老人言海影翻則如此。沈存中以謂大抵塔有影必倒。予在福州見萬壽塔。成都見正法塔。蜀州見天目塔。皆有影。亦皆倒也。然塔之高如是。而影止三二尺。纖悉皆具。或自天窗中下。

或在廊廡間。亦未易以理推也。

唐彥猷硯錄。言青州紅絲石硯。覆之以匣。數日。墨色不乾。經夜。即其氣上下蒸濡。着於匣中。有如雨露。又云。紅絲硯。必用銀作匣。凡石硯。若置銀匣中。即未乾之墨。氣蒸上騰。其墨乃著蓋上。久之。蓋上之墨復滴硯中。亦不必經夜也。銅錫皆然。而銀尤甚。雖漆匣亦時有之。但少耳。彥猷貴重紅絲硯。以銀爲匣。見其蒸潤。而未嘗試他硯也。

賀方回狀貌奇醜。色青黑。而有英氣。俗謂之賀鬼頭。喜校書。朱黃未嘗去手。詩文皆高。不獨工長短句也。潘邠老贈方回詩云。詩束牛腰藏舊稿。書訛馬尾辨新讎。有二子曰房曰廩。於文房從方。廩從回。蓋寓父字於二子名也。翟耆年。字伯壽。父公巽。參政之子也。能清言。工篆及八分。巾服一如唐人。自名唐裝。一日往見許顛。彥周壘誓。着犢鼻褌。躡高屐出迎。伯壽愕然。彥周徐曰。吾晉裝也。公何怪。

元祐七年。哲廟納后。用五月十六日。法駕出宣德門。行親迎之禮。初。道家以五月十六日爲天地合日。夫婦當異寢。違犯者必天死。故世以爲忌。當時太史選定。乃謂人主與后。猶天地也。故特用此日。將降詔矣。皇太妃持以爲不可。上亦疑之。宣仁獨以爲此語俗忌耳。非典禮所載。遂用之。其後詔獄旣興。宦者復謂若廢后。可弭此禍。上意益不可回矣。

政和以後。斜封墨勅盛行。乃有以寺監長官視待制者。大抵皆以非道得之。晁叔用以謂視待制。可對如夫人。蓋爲清議貶黜如此。又往往以特恩賜金帶。朝路混淆。然猶以舊制不敢坐狹。故當時謂橫金無絨鞵。與閣門舍人等耳。

聶山胡直孺同爲都司。一日過堂。從容爲蔡京言道流之橫。京慨然曰。君等不知耳。淫侈之風日熾。姑以齋醮少間之。不暇計此曹也。京之善文過如此。

蔡京賜第宏敞過甚。老疾畏寒。幕帟不能禦。遂至無設牀處。惟撲水少低。間架亦狹。乃即撲水下作臥室。秦燾作狀元時。蔡京親吏高棟猶在。謂人曰。看他秦太師。吾主人乃天下至繆漢也。棟當蔡氏盛時。官至拱衛大夫。領青州觀察使。靖康臺評所謂厮養官爲橫行是也。有王俞者。與之同列。官亦相等。康靖間。俞停廢。棟猶以武功大夫爲浙東副總管。遂終其身不復褫削。議者亦置之。或自有由也。

沈存中辨雞舌香爲丁香。蠶蠶數百言。竟是以意度之。惟元魏賈思勰作齊民要術第五卷。有合香澤法。用雞舌香。注云。俗人以其似丁香。故謂之丁香。此最的確可引之證。而存中反不及之。以此知博洽之難也。

顏延年作靖節徵士誄云。微音遠矣。誰箴予闕。王荆公用此意。作別孫少述詩。子今去此來何時。後有不可誰予規。青出於藍者也。

先君讀山谷乞貓詩。歎其妙。晁以道侍讀在坐。指聞道貓奴將數子一句。問曰。此句何謂也。先君曰。老杜云。豎止啼烏將數子。恐是其類。以道笑曰。君果誤矣。乞貓詩數字當音色主反。數子。謂貓狗之屬。多非一子。故人家初生畜。必數之曰生幾子。將數子。猶言將生子也。與杜詩語同而意異。以道必有所據。先君言當時偶不叩之以爲恨。翟公異參政。靖康初。召爲翰林學士。過泗州。謁僧伽像。見鬚忽涌出長寸許。問他人。皆不見。怪之。一僧在旁曰。公雖召還。恐不久復出。公扣之。曰鬚出者。須出也。采驗。

唐人詩中。有曰無題者。率杯酒狎邪之語。以其不可指言。故謂之無題。非真無題也。近歲呂居仁陳去非亦有曰無題者。乃與唐人不類。或真亡其題。或有所避。其實失於不深考耳。

翟公異參政。守會稽日。命工塑真武像。旣成。熟視曰。不似不似。即日毀之。別塑。今告成。觀西廡小殿立像是也。道士賀仲清在旁親見之。而不敢問。

古所謂揖。但舉手而已。今所謂喏。乃始於江左諸王。方其時。惟王氏子弟爲之。故支道林入東。見王子猷兄弟。還人問諸王何如。答曰。見一羣白項烏。但聞啞啞聲。即今喏也。

荆公詩云。閉戶欲推愁。愁終不肯去。劉賓客詩云。與老無期約。到來何等閑。韓舍人子蒼取作一聯云。推愁不去還相覓。與老無期稍見侵。比古句蓋益工矣。

四月十九日。成都謂之浣花。遨頭宴於杜子美草堂滄浪亭。傾城皆出。錦繡夾道。自開歲宴遊。至是而止。故最盛於他時。予客蜀數年。屢赴此集。未嘗不晴。蜀人云。雖戴白之老。未嘗見浣花日雨也。

明州護聖長老法揚。藏其祖鄭舍人向所得仁廟東宮日回賀歲巨書。稱皇太子某狀。用太子左春坊之印。舍人是時猶爲館職也。

湯岐公初秉政。偶刑寺奏牘有云生人婦者。高廟問此有法否。秦益公云。法中有夫婦人。與無夫者不同。上素喜岐公。顧問曰。古亦有之否。岐公曰。古法有無。臣所不能記。然生人婦之語。蓋出三國志杜畿傳。上大驚。乃笑曰。卿可謂博記矣。益公陰忌。獨謂岐公純篤。不忌也。

北方民家吉凶。輒有相禮者。謂之白席。多鄙俚可笑。韓魏公自樞密歸鄴。赴一姻家禮席。偶取盤中一荔支。欲啗之。白席者遽唱言曰。資政喫荔支。請衆客同喫荔支。魏公愴其喋喋。因置不復取。白席者又曰。資政惡發也。請衆客放下荔支。魏公爲一笑。惡發猶云怒也。

唐自相輔以下。皆謂之京官。言官於京師也。其常參者。曰常參官。未常參者。曰未常參官。國初以常參官預朝謁。故謂之升朝官。而未預者。曰京官。元豐官制行。以通直郎以上。朝預宴坐。仍謂之升朝官。而按唐制去京官之名。凡條制及吏牘。止謂之承務郎以上。然俗猶謂之京官。

唐所謂丞郎。謂左右丞。六曹侍郎也。尙書雖序左右丞上。然亦通謂之丞郎。猶今言侍從官也。俗又謂之兩制。指內制而言。然非翰苑西掖。亦曰兩制。正如丞郎之稱。契丹僭號。有高坐官。亦侍從之比。坐字本犯御嫌名。或謂丞郎爲左右丞。中書門下侍郎。亦非也。

唐高祖實錄。武德二年正月甲子。下詔曰。釋典微妙。淨業始於慈悲。道教沖虛。至德去其殘暴。況乎四時之禁。毋伐麋卵。三驅之禮。不取順從。蓋欲敦崇仁惠。蕃衍庶物。立政經邦。咸率斯道。朕祗膺靈命。撫遂羣生。言念亭育。無忘鑑昧。殷帝去網。庶踵前修。齊王捨牛。實符本志。自今每年正月五月九月十月十日。並不得行刑。所在公私宜斷屠殺。此三長月。斷屠殺之始也。唐大夫如白居易輩。蓋有遇此三齋月。杜門謝客。專延緇流。作佛事者。今法至此月。亦減去食半錢。蓋其遺制。

卷九

蜀父老言。王小暉之亂。自言我土鍋村民也。豈能霸一方。有李順者。孟大王之遺孤。初蜀亡。有晨興過摩訶池上者。見錦箱錦衾。覆一襁褓嬰兒。有片紙在其中。書曰。國中義士。爲我養之。人知其出於宮中。因收養焉。順是也。故

蜀人惑而從之。未幾小幡戰死。衆推順爲主。下令復姓孟。及王師傅毛本作薄城。城且破矣。順忽飯城中僧數千人以祈福。又度其童子亦數千人。皆就府治削髮。衣僧衣。晡後分東西門兩門出。出盡。順亦不知所在。蓋自髡而遜矣。明日王師入城。捕得一髻士。狀頗類順。遂誅之。而實非也。有帶御器械張舜卿者。因奏事。密言臣聞順已逸去。所獻首蓋非也。太宗以爲害諸將之功。叱出。將斬之。已而貸之。亦坐免官。及真廟天禧初。順竟獲於嶺南。初欲誅之於市。且令百官賀。呂文靖爲知雜御史。以爲不可。但卽獄中殺之。人始知舜卿所奏非妄也。蜀人又謂順逃至荆渚。入一僧寺。有僧熟視曰。汝有異相。當爲百日偏霸之主。何自在此。汝宜急去。今年不死。尙有數十年壽。亦可怪也。又云。方順之作。有術士拆順名曰。是一百八日有西川耳。安能久也。如期而敗。

太宗太平興國四年。平太原。降爲并州。廢舊城。徙州於榆次。今太原則又非榆次。乃三交域也。城在舊城西北。三百里。亦形勝之地。本名故軍。又嘗爲唐明鎮。有晉文公廟甚盛。平太原後三年。帥潘美奏乞以爲并州。從之。於是徙晉文公廟。以廟之故址爲州治。又徙陽曲縣於三交。而榆次復爲縣。國史所載頗略。方承平時。太原爲大鎮。其興廢人人能知之。故史亦不備書。今陷沒幾七十年。遂有不可詳者矣。

唐小說載有人路逢奔馬入都者。問何急如此。其人答曰。應不求聞達科。本朝天聖中。初置賢良方正等六科。許少卿監以上奏舉。自應者亦聽。俄又置高蹈丘園科。亦許自於所在投狀求試。時以爲笑。予少時爲福州寧德縣主簿。提刑樊茂實以職狀舉予曰。有聲於時。不求聞達。後數月再見之。忽問曰。何不來取奏狀。予笑答之曰。恐不稱舉詞。故不敢。茂實亦笑。顧書吏促發奏。然予竟不投也。

成都士大夫家法嚴。席帽行范氏自先世貧而未仕。則賣白龍丸。一日得官。止不復賣。城北郭氏賣鼓亦然。皆不肯爲市井商賈。或舉貨營利之事。又士人家子弟。無貧富。皆着蘆心布衣紅勒帛。狹如一指大。稍異此則共嘲笑。以爲非士流也。

周禮蠨氏注云。蠨。今御所食鼈也。漢書霍光傳。亦有丞相擅減宗廟羔菟鼈。此何等物。而漢人以供玉食及宗廟之薦耶。古今事不同如此。

真宗御集。有苑中賞花詩十首。內一首龍柏花。李文饒平泉山居草木記。有藍田之龍柏。宋子京又有真珠龍柏

詩。劉子儀。冕以道。朱希真。亦皆有此作。予長於江南。未嘗見也。或云。本出鄜坊間。舒煥堯文。東坡公客。建炎中猶在。有子爲湖南一縣尉。遇盜燒死。堯文年九十矣。憂悸得病而卒。陳無己子豐。詩亦可喜。冕以道集中。有謝陳十二郎詩卷是也。建炎中以無己故。特命官。李鄴守會稽。來從鄴作攝局。鄴降虜。豐亦被繫纍而去。無己之後。遂無在江左者。豐亦不知存亡。可哀也。

劉道原壯輿載世藏書甚富。壯輿死無後。書錄於南康軍官庫。後數年。胡少汲過南豐訪之。已散落無餘矣。行在百官。以祠事致齋於僧寺。多相與徧遊寺中。因遊旁近園館。或齋於道宮。亦然。按張文昌僧寺宿齋詩云。晚到金光門外寺。寺中新竹隔簾多。齋官禁與僧相見。院院開門不得過。乃知唐齋禁之嚴如此。今律所云。作祀事悉禁。是也。

韓子蒼詩喜用擁字。如車騎擁西疇。船擁清溪尙一樽之類。出於唐詩人錢起。城隅擁歸騎也。政和神霄玉清萬壽宮。初止改天寧萬壽觀爲之。後別改宮觀一所。不用天寧。若州城無宮觀。卽改僧寺。俄又不用宮觀。止改僧寺。初通撥賜產千畝。已而豪奪無涯。西京以崇德院爲宮。據其產二萬一千畝。實舍錢園利錢。又在其外。三泉縣以不隸州特置。已而凡縣皆改一僧寺爲神霄下院。駸駸日張。至宣和未方已。

天下神霄。皆賜威儀。設於殿帳座外。面南。東壁從東第一架六物。曰錦織。曰絳節。曰寶蓋。曰珠幢。曰五明扇。曰旌。從東第二架六物。曰絲拂。曰旛。曰鶴扇。二。曰金鉞。曰如意。西壁從東第一架六物。曰如意。曰玉斧。曰鶴扇。二。曰旛。曰絲拂。西壁從東第二架。曰旌。曰五明扇。曰珠幢。曰寶蓋。曰絳節。曰錦織。東南經兵火。往往不復。在蜀中多徙於天慶觀聖祖殿。今猶有存者。

神霄以長生大帝君青華帝君爲主。其次曰萊蓬靈海帝君。西元大帝君。東井大帝君。西華大帝君。清都大帝君。中黃大帝君。又有左右仙伯。東西臺吏二十有二人。繪於壁。又有韓君丈人。祀於側殿。曰此神霄帝君之尙賓也。其說皆出於林靈素。張虛白。劉棟。

天禧中。以王捷所作金寶牌賜天下。至宣和末。又以方士劉知常所鍊金輪頰之天下神霄宮。名曰神霄寶輪。知常言。其法以汞鍊之成金。可鎮分野兵饑之災。時宣和七年秋也。遣使押賜天下太常。方下奉安寶輪儀制。而虜

寇已渡河矣。

本朝康保裔真嗣時爲高陽關都部署契丹入寇戰死。祖志忠後唐明宗時討王都戰死。父再遇太祖時爲將討李筠戰死。三世皆死國事。

天聖初宋元憲公在場屋曰夢魁天下故事四方舉人集京師當入見而宋公姓名偶爲衆人之首禮部奏舉人宋郊等公大惡之以爲惠徵止此矣。然其後卒爲大魁。紹興初張子韶亦夢魁天下。比省試類榜坐位圖出。其第一人則張九成也。公殊快怏及庭試唱名亦冠多士與元憲事正同。

王冀公自金陵召還不降詔止於茶蘼合中賜御飛白王欽若三字而中使口傳密告冀公即上道至國門輔臣以下皆未知政和中蔡太師在錢塘一日中使賜茶蘼亦於合中得大玉環徑七寸色如截肪京拜賜即治行後二日詔至即日起發二事略相似然非二人者必無此事也。

孫策傳張津常著絳帕頭帕頭者巾幘之類猶今言幘頭也。韓文公云以紅帕首已爲失之。東坡云絳帕蒙頭讀道書增一蒙字其誤尤甚。

貴臣有疾宣醫及物故勅葬本以爲恩然中使挾御醫至凡藥必服其家不敢問蓋有爲醫所誤者勅葬則喪家所費至傾竭貲貨其地又未必善也。故都下諺曰宣醫納命勅葬破家。慶曆中始有詔已降指揮勅葬而其家不願者聽之。西人云姚麟勅葬乃絕地故其家遂衰。

范文正公喜彈琴然平日止彈履霜一操。時人謂之范履霜。韓子蒼和錢遜叔詩云叩門忽送銅山句知是賦詩人姓錢。蓋唐詩人錢起賦詩以姓爲韻有銅山許鑄錢之句。

撫州紫府觀真武殿像設有六丁六甲神而六丁皆爲女子像。黃次山書殿榜曰感通之殿。感通乃醴泉觀舊名。至和二年十二月賜名而像設亦醴泉舊制也。

東坡先生在中山作戚氏樂府詞最得意。慕容李端叔跋三百四十餘字敘述甚備欲刻石傳後爲定武盛事。會請去不果。今乃不載集中。至有立論排詆以爲非公作者。識真之難如此哉。

予在成都偶以事至犀浦過松林甚茂問馭卒此何處答曰師塔也。蓋謂僧所葬之塔。於是乃悟杜詩黃師塔前

江水東之句。

南朝詞人。謂文爲筆。故沈約傳云。謝玄暉嘗爲詩。任彥昇工於筆。約兼而有之。又庾肩吾傳。梁簡文與湘東王書。論文章之弊曰。詩旣若此。筆又如之。又曰。謝朓沈約之詩。任昉陸倕之筆。任昉傳。又有沈詩任筆之語。老杜寄賈至嚴武詩云。賈筆論孤憤。嚴詩賦幾篇。杜牧之亦云。杜詩韓筆愁來讀。似倩麻姑癢處抓。亦襲南朝語。爾往時諸。晁謂詩爲詩筆。亦非也。

東蒙蓋終南山峯名。杜詩云。故人昔鸞東蒙峯。已佩含景蒼精龍。故人今居子午谷。獨在陰崖結茅屋。皆長安也。種明東蒙新居詩。亦云。登遍終南峯。東蒙最孤秀。南土不知。故註杜詩者。妄引顛輿爲東蒙主。以爲魯地。

紹興初。程氏之學始盛。言者排之。至譏其幅巾大袖。胡康侯力辨其不然曰。伊川衣冠。未嘗與人異也。然張文潛元祐初贈趙景平主簿詩曰。明道新墳草已春。遺風猶得見門人。定知魯國衣冠異。盡戴林宗折角巾。則是自元祐初爲程學者。幅巾已與人異矣。衣冠近古。正儒者事。譏者固非。辨者亦未然也。

晁氏世居都下昭德坊。其家以元祐黨人及元符上書籍記。不許入國門者數人。以道其一也。嘗於鄭洛道中遇降羌。作詩云。沙場尺箠致兇渾。玉陛俱承雨露恩。自笑百年家鳳闕。一生腸斷國西門。方是時。士大夫失職如此。安得不兆亂乎。

鄭介夫喜作詩。多至數千篇。謫英州。遇赦得歸。有句云。未言路上舟車費。尙欠城中酒藥錢。絕似王元之也。

元祐初。蘇子由爲戶部侍郎。建言都水監本三司之河渠案。將作監本三司之修造案。軍器監本三司之甲冑案。三司今戶部也。而三監乃屬工部。請三監皆兼隸戶部。凡有所爲。戶部定其事之可否。裁其費之多寡。而工部任其工之良楛。程其作之遲速。朝廷從其言。爲立法。及紹聖中。以爲害元豐官制。罷之。建中靖國中。或欲復從元祐。已施行矣。時豐相之爲工部尙書。獨持不可曰。設如都水監塞河。軍器監造軍器。而戶部以爲不可。則已矣。若以爲可。則併任其事可也。今戶部吝其費。裁損之。乃令工部任河之決塞。器之利鈍。爲工部者。不亦難乎。議遂寢。相之本主元祐政事者。然其言公正不阿如此。可謂賢矣。

徽宗嘗乘輕舟。泛曲江。有宮嬪持寶扇乞書者。上攬筆亟作草書一聯云。渚菴參法駕。沙鳥犯鈎陳。俄復取筆塗。

去犯鈞陳三字。曰：此非佳語。此聯實李商隱陳宮詩，亦不祥也。李耕道云。

東坡在黃州時，作西捷詩曰：漢家將軍一丈佛，詔賜天閑八尺龍。露布朝馳玉關塞，捷烽夜到甘泉宮。似聞指麾築上郡，已覺談笑無西戎。放臣不見天顏喜，但覺草木皆春容。一丈佛者，王中正也。以此詩爲非東坡作耶。氣格如此，孰能辨之。以爲果東坡作耶。此老豈譽王中正者。蓋刺之也。以三百篇言之，君子偕老是矣。

南朝謂北人曰儻父，或謂之虜父。南齊王洪軌，上谷人，事齊高帝，爲青冀二州刺史，勵清節。州人呼爲虜父使君。今蜀人謂中原人爲虜子。東坡詩：久客厭虜饌是也。因目北人仕蜀者爲虜官。晁子止爲三榮守，民有訟竇官縣尉者，曰：縣尉虜官，不通民情。子止爲窮治之，果負冤民，既得直，拜謝而去。子止笑諭之曰：我亦虜官也。汝勿謂虜官不通民情，聞者皆笑。

紹興末，予見陳魯公留飯，未食，而揚郡王存中來白事。魯公留予便坐而見之。存中方不爲朝論所與，予年少，意亦輕之。趨幕後聽其言，會魯公與之言及邊事。存中曰：士大夫多謂當列兵淮北，爲守淮計，即可守。因圖進取中原，萬一不能支，卽守大江未晚。此說非也。士惟氣全，乃能堅守。若俟其敗北，則士氣已喪，非特不可守淮，亦不能守江矣。今據大江之險，以老彼師，則有可勝之理。若我師克捷，士氣已倍，彼奔潰不暇，然後徐進而北，則中原有可取之理。然曲折尙多，兵豈易言哉。予不覺太息曰：老將要有所長，然退以語朝士，多不解也。

東坡在嶺海間，最喜讀陶淵明柳子厚二集，謂之南遷二友。予讀宋白尙書玉津雜詩，有云：坐臥將何物。陶詩與柳文，則前人蓋有與公暗合者矣。

凌霄花未有不依木而能生者。惟西京富鄭公園中一株，挺然獨立，高四丈，圍三尺餘，花大如杯，旁無所附。宣和初，景華苑成，移植於芳林殿前，畫圖進御。

政和宣和間，妖言至多，織文及纈帛，有遍地桃冠，有並桃香，有佩香曲，有賽兒，而道流爲公卿受錄，識者謂桃者逃也。佩香者背鄉也。賽者塞也。錄者戮也。蔡京書神霄玉清萬壽宮，及玉皇殿之類。玉宇旁一點，筆勢險急，有道士觀之曰：此點乃金筆，而鋒芒侵王，豈吾教之福哉。侍晨李德柔勝之親聞其言，嘗以語先君。又林靈素詆釋教，謂之金狄亂華。當時金狄之語，雖詔令及士大夫章奏碑版，亦多用之。或以爲靈素前知金賊之禍，故欲廢釋氏。

以厭之。其實亦妖言耳。

近世士大夫。多不練故事。或爲之語曰。上若問學校法制。當對曰。有劉士祥在。問典禮因革。當對曰。有齊闡韶在。士祥闡韶。蓋國子監太常寺老吏也。史院有竊議史官者曰。史官筆削有定本。個個一樣。或問何也。曰。將吏人編出日曆。中臣僚上言字塗去上字。其後奉聖旨依字亦塗去。而從旁注從之二字。卽一日筆削了矣。

政和後。道士有賜玉方符者。其次則金方符。長七寸。闊四寸。面爲符。背鑄御書曰。賜某人。奉以行教。有違天律。罪不汝貸。結於當心。每齋醮則服之。會稽天寧萬壽觀有老道士盧浩真者。嘗被金符之賜。予少時親見之。

世傳唐呂府君勅葬碑。呂名惠恭。僧大濟之父。大濟代宗時內道場僧也。官至殿中監。故惠恭贈官爲兗州刺史。而官爲營葬。宣和中。會稽天寧觀道士張若水官爲蕊珠殿校籍。贈其父爲朝奉大夫。毋封宜人。嘗見其母賜誥云。嘉其教子之勸。寵以宜家之號。詩人林子來。亦有贈道官萬大夫焚黃詩。然二人者。品秩猶未高。若林靈素以侍晨恩數視執政。則贈官必及三代矣。犬抵當時道流濫恩。不可勝載。中更喪亂。史皆不得書。此偶因事見之耳。北都有魏博節度使田緒遺愛碑。張弘靖書。何進滔德政碑。柳公權書。皆石刻之傑也。政和中。梁左丞子美爲尹。皆毀之。以其石刻新頒五禮新儀。

近世名士李泰發。光一字泰定。晁以道說之。一字伯以。潘義榮。良貴。一字子賤。張全真。守。一字子固。周子充。必大。一字洪道。芮國器。焯。一字仲蒙。林黃中。栗。一字寬夫。朱元晦。熹。一字仲晦。人稱之多以舊字。其作文題名之類。必從後字。後世始以疑矣。

王荆公熙寧初召還翰苑。初侍經筵之日。講禮記會參易養一節曰。聖人以義制禮。其詳見於牀第之間。君子以仁行禮。其勤至於垂死之際。姑息者且止之辭也。天下之害。未有不由於且止者也。此說不見於文字。予得之於從伯父彥遠。

卷十

世多言白樂天用相字。多從俗語。作思必切。如爲問長安月。如何不相離是也。然北人大抵以相字作入聲。至今

猶然不獨樂天。老杜云。恰似春風相欺得。夜來吹折數枝花。亦從入聲讀。乃不失律。俗謂南人入京師。效北語。過相藍。輒讀其勝曰。大廡國寺傳以爲笑。

中貴楊戩。於堂後作一大池。環以廊廡。肩鏞周密。每浴時。設浴具及澡豆之屬於池上。乃盡屏人。躍入池中游泳。率移時而出。人莫得窺。然但謂其性喜浴於池耳。一日。戩獨寢堂中。有盜入其室。忽見牀上乃一蝦蟆。大可一牀。兩目如金。光彩射人。盜爲之驚仆。而蝦蟆已復變爲人。乃戩也。起坐握劍問曰。汝爲何人。盜以實對。戩擲一銀香毬與之曰。念汝迫貧。以此賜汝。切勿爲人言所見也。盜不敢受。拜而出。後以他事繫開封獄。自道如此。

廟諱同音。署字常怨反。樹字殊遇反。然皆諱避。則以爲一字也。北史杜弼傳。齊神武相魏時。相府法曹辛子炎諮事。云取署字。子炎讀署爲樹。神武怒其犯諱。杖之。則署爲樹音不同。當時雖武人亦知之。而今學士大夫乃不能辨。方嘉祐治平之間。朝士如宋次道蘇子容輩。皆精於小學。亦不以爲言。何也。

東坡素知李廌方叔。方叔赴省試。東坡知舉。得一卷子大喜。手批數十字。且語黃魯直曰。是必吾李廌也。及拆號。則章持致平。而廌乃見黜。故東坡山谷。皆有詩在集中。初廌試罷。歸語人曰。蘇公知舉。吾之文。必不在三名後。及被黜。廌有乳母年七十。大哭曰。吾兒遇蘇內翰知舉。不及第。他日尙奚望。遂閉門睡。至夕不出。發壁視之。自縊死矣。廌果終身不第以死。亦可哀也。

楊文公云。豈期遊岱之魂。遂協生桑之夢。世以其年四十八。故稱其用生桑之夢爲切當。不知遊岱之魂。出河東記。韋齊休事。亦全句也。

閭中有習左道者。謂之明教。亦有明教經。甚多。刻板摹印。妄取道藏中校定官名銜贊其後。燒必乳香。食必紅葷。故二勃皆翔貴。至有士人宗子輩。衆中自言。今日赴明教齋。予嘗詰之。此魔也。奈何與之遊。則對曰。不然。男女無別者爲魔。男女不親授者爲明教。明教遇婦人所作食則不食。然嘗得所謂明教經觀之。誕謾無可取。直俚俗習妖妄者。所爲耳。又或指名族士大夫家曰。此亦明教也。不知信否。偶讀徐常侍稽神錄云。有善魔法者。名曰明教。則明教亦久矣。

芰。芰也。今人謂卷荷爲伎荷。伎。立也。卷荷出水面。亭亭植立。故謂之伎荷。或作芰。非是。白樂天池上早秋詩云。荷

芟綠參差新秋水滿池。乃是言荷及芟二物耳。

蔡太師作相時。衣青道衣。謂之太師青。出入乘襪項轎子。謂之太師轎子。蔡太師作相時。裹頭巾當面俱作一摺。謂之太師錯摺樣。第中窗上下及中一二眼。作方眼。餘作疎櫺。謂之太師窗。

張魏公有重望。建炎以來。置左右相多矣。而天下獨目魏公爲張右相。丞相帶都督亦數人。而天下獨目魏公爲張都督。雖夷狄亦然。然魏公隆興中再入亦止於右相領都督。乃知有定數也。

東坡絕句云。梨花澹白柳深青。柳絮飛時花滿城。惆悵東闌一株雪。人生看得幾清明。紹興中。予在福州。見何晉之大著。自言嘗從張文潛遊。每見文潛哦此詩。以爲不可及。余按杜牧之有句云。砌下梨花一堆雪。明年誰此憑闌干。東坡固非竊牧之詩者。然竟是前人已道之句。何文潛愛之深也。豈別有所謂乎。聊記之以俟識者。

今人謂後三日爲外後日。意其俗語耳。偶讀唐逸史裴老傳。乃有此語。裴大曆中人也。則此語亦久矣。

嚴州建德縣有崇勝院。藏天聖五年內降劄子設道場云。皇太后賜銀三十兩。皇太妃施錢二十貫。皇后施錢十貫。朱淑儀施錢五貫。有仁廟飛白御書。今皆存。蕙院有僧。嘗際遇真廟。召見。賜衣及香燭故也。猶可想見祖宗恭儉之盛。予在郡。初不聞。迨代歸始知之。不及刻石。至今爲恨。

徐敦立侍郎頗好誑。紹興末。嘗爲予言柳子厚非國語之作。正由平日法國語爲文章。看得熟。故多見其疵病。此俗所謂沒前程者也。予曰。東坡公在巔外。特喜子厚文。朝夕不去手。與陶淵明並稱二友。及北歸。與錢濟名書。乃痛詆子厚時令斷刑四維。貞符諸篇。至以爲小人無忌憚者。豈亦由朝夕紬繹耶。恐是非國語之報。敦立爲之抵掌絕倒。

蔡攸初以淮康節領相印。徽宗賜曲宴。因語之曰。相公公相子。蓋是時京爲太師。號公相。攸卽對曰。人主主人翁。其善爲諧給如此。

白樂天云。微月初三夜。新蟬第一聲。晏元憲云。綠樹新蟬第一聲。王荆公云。去年今日青松路。憶似聞蟬第一聲。三用而愈工。信詩之無窮也。

蘇子容詩云。起草才多封卷速。把麻人衆引聲長。蘇子由詩云。明日白麻傳好語。曼聲微繞殿中央。蓋昔時宣制。

皆曼延其聲。如歌詠之狀。張天覺自少鳳拜右揆。有旨下閣門。令平讀。遂爲故事。

蔡元長當國時。士大夫問軌革。往往畫一人戴草而祭。輒指之曰。此蔡字也。必由其門而進。及童貫用事。又有畫地上奏樂者。曰。土上有音。童字也。其言亦往往有驗。及二人者廢。則亦無復占得此卦。紹興中。秦會之專國柄。又多畫三人。各持禾一束。則又指之曰。秦字也。其言亦頗驗。及秦氏旣廢。亦無復占得此卦矣。若以爲妄。則紹興中如黑象輩。畜書數百冊。對人檢之。予親見其有三人持禾者在其間。亦未易測也。祖宗時。有知樞密院及同知簽署之類。治平後避諱。改曰簽署。政和以後。宦者用事。輒改內侍省都知曰。知內侍省事。都知曰。同知內侍省事。押班曰。簽署內侍省事。蓋僭視密院也。建炎中。始復舊。近有道士之行天心法者。自結銜曰。知天樞院事。亦有稱同知簽署者。又可一笑也。

考工記弓人注云。臚亦黏也。音職。今婦人髮有時爲膏澤所黏。必沐乃解者。謂之臚。正當用此字。

司馬侍郎朴陷虜後。妾生一子於燕。名之曰通國。實取蘇武胡婦所生子之名。名之。而國史不書。其家亦諱之。太祖開國。雖追尊僖祖以下四廟。然惟宣祖昭憲皇后爲大忌。忌前一日不坐。則太祖初不以僖祖爲始祖可知。真宗初罷宣祖大忌。祥符中。下詔復之。然未嘗議及僖祖。則真宗亦不以僖祖爲始祖可知。今乃獨尊僖祖。使宋有天下二百四十餘年。太祖尙不正東向之位。恐禮官不當久置不議也。

興國中。靈州貢馬。足各有二距。其後靈州陷於西戎。宣和中。燕山府貢馬亦然。而北虜之禍遂作。

周越書苑云。郭忠恕以爲小篆散而入分生。入分破而隸書出。隸書悖而行書作。行書狂而草書聖。以此知隸書乃今真書。趙明誠謂誤以入分爲隸。自歐陽公始。

太宗時。史官張洎等。撰太祖史。凡太宗聖諭。及史官采撫之事。分爲朱墨書以別之。此國史有朱墨本之始也。元祐紹聖。皆嘗修神宗實錄。紹聖所修旣成。焚元祐舊本。有敢私藏者。皆立重法。久之。內侍梁師成家。乃有朱墨本。以墨書元祐所脩。朱書紹聖所脩。稍稍傳於士大夫家。詔興初。趙鼎提舉再撰。又或以雌黃書之。目爲黃本。然世罕傳。

先太傅慶曆中。賜紫章服。赴閣門拜賜。乃塗金魚袋也。豈官品有等差歟。

史丞相言高廟嘗臨蘭亭。賜壽皇於建邸。後有批字云。可依此臨五百本來看。蓋兩宮之篤學如此。世傳智永寫千文八百本。於此可信矣。

晉人避其君名。猶不避嫌名。康帝名岳。鄧岳改名嶽。

唐初不避二名。太宗時猶有民部。李世勣處世南皆不避也。至高宗即位。始改爲戶部。世南已卒。世勣去世。字惟名勣。或者尙如古卒哭乃諱歟。

唐王建牡丹詩云。可憐零落蕊。收取作香燒。雖工而格卑。東坡用其意云。未忍汚泥沙。牛酥煎落蕊。超然不同矣。張繼楓橋夜泊詩云。姑蘇城外寒山寺。夜半鐘聲到客船。歐陽公嘲之云。句則佳矣。其如夜半不是打鐘時。後人又謂惟蘇州有半夜鐘。皆非也。按於鄴襄中卽事詩云。遠鐘來半夜。明月入千家。皇甫冉秋夜宿會稽嚴維宅詩云。秋深臨水月。夜半隔山鐘。此豈亦蘇州詩耶。恐唐時僧寺自有夜半鐘也。京都街鼓今尙廢。後生讀唐詩文及街鼓者。往往茫然不能知。況僧寺夜半鐘乎。

宋文安公自禁庭謫鄜時詩云。九月一日奉急宣。連忙趨至閣門前。忽爲典午知何罪。謫向鄜州更慙然。蓋當時謫黜者。召至閣門受命。乃行也。

宋文安公集中。有省油燈盞詩。今漢嘉有之。蓋夾燈盞也。一端作小窳。注清冷水於其中。每夕一易之。尋常盞爲火所灼而燥。故速乾。此獨不然。其省油幾半。邵公濟牧漢嘉時。數以遺中朝士大夫。按文安亦嘗爲玉津令。則漢嘉出此物。幾三百年矣。

祥符中。有布衣林虎上書真廟曰。此人姓林名虎。必尙怪者也。罷遣之。宣和中。有林虎者。賜對。徽宗亦異之。賜名於虎上加竹。然字書初無此字。乃自稱填篋之篋。而書名不敢增。但作篋云。

吳中卑薄。斷地二三尺。輒見水。千頃在南鄭。見一軍校。火山軍人也。言火山之南。地尤枯瘠。鋤鑿所及。烈焰應手涌出。故以火山名軍。尤爲異也。

楚語曰。若武丁之神明也。其聖之睿廣也。其治之不放也。猶自爲未艾。荆公嘗摘取睿廣二字入表語中。蔡京爲翰林學士。識神宗諡。因力主睿廣二字。而忘其出楚語也。范彞叟折之曰。此楚語所載。先帝言必稱堯舜。今乃捨

六經。而以楚語爲尊號可乎。京遂屈。韓丞相師朴亦云。睿廣但可作僧法名耳。時亦以爲名言。今人謂貝州爲甘陵。吉州爲廬陵。常州爲毗陵。峽州爲夷陵。皆自其地名也。惟嚴州有嚴光釣瀨。名嚴陵。嚴陵乃其姓字。瀨是釣處。若謂之嚴瀨尙可。今俗乃謂之嚴陵。殊可笑也。

唐質肅公參禪。得法於淨山遠禪師。嘗作贈僧詩云。今日是重陽。勞師訪野堂。相逢又無語。籬下菊花黃。今人謂妻婦爲索婦。古語也。孫權欲爲子索呂布女。皆見三國志。

元豐間。有俞充者。諂事中官王中正。中正每極口稱之。一日充死。中正輒侍神廟。言充非獨吏事過人。遠甚。參禪亦超然悟解。今談笑而終。略無疾急。上亦稱歎。以語中官李舜舉。舜舉素敢言。對曰。以臣觀之。止是猝死耳。人重其直。

古所謂路寢。猶今言正廳也。故諸侯將薨。必遷於路寢。不死於婦人之手。非惟不瀆。亦以絕婦寺矯命之禍也。近世乃謂死於堂奧。爲終於正寢。誤矣。前輩墓誌之類。數有之。皆非也。黃魯直詩云。公虛采蘋宮。行樂在小寢。按魯僖公薨於小寢。杜預謂小寢。夫人寢也。魯直亦習於近世謂堂爲正寢。故以小寢爲妾媵所居耳。不然。旣云虛采蘋宮。又云在小寢。何耶。

王黼作相。其子閔孚作待制。造朝財十四歲。都人目爲胡孫待制。

晉人所謂見何次道。令人欲傾家釀。猶云欲傾竭家貲以釀酒飲之也。故魯直云。欲傾家以繼酌。韓文公借以作箴。詩云。有賈直欲傾家貲。王平父謝先大父贈箴詩。亦云。傾家何計效韓公。皆得晉人本意。至朱行中。舍人有句云。相逢盡欲傾家釀。久客誰能散橐金。用家釀對橐金。非也。

錢勰字穆。范祖禹字淳。皆一字。交友以其難乎。故增父字。非其本也。

錢穆父風姿甚美。有九子。都下九子母祠。作一巾紵。美丈夫坐於西偏。俗以爲九子母之夫。故都下謂穆父爲九子母夫。東坡贈詩云。九子羨君門戶壯。蓋戲之也。

保壽禪師作臨濟塔銘云。師受黃蘗印可。尋抵河北鎮州城東臨滹沱河側小院住持。名臨濟。其後墨君和太尉。於城中捨宅爲寺。亦以臨濟爲名。墨君和名見唐書及五代史。其事甚詳。近見呂元直丞相燕魏錄。載真定安業

坊臨濟院。乃昭憲杜太后故宅。按保壽與臨濟。乃師弟子。不應有誤。豈所謂臨濟院者。又嘗遷徙耶。謝任伯參政。在西掖草蔡太師謫散官制。大爲士大夫所稱。其數京之罪曰。列聖詒謀之憲度。掃蕩無餘。一時異議之忠賢。耘鋤略盡。其語出於張文潛論唐明皇曰。太宗之法度。廢革略盡。貞觀之風俗。變壞無餘也。呂進伯作考古圖云。古彈棋局。狀如香爐。蓋謂其中隆起也。李義山詩云。玉作彈棋局。中心亦不平。今人多不能解。以進伯之說觀之。則粗可見。然恨其藝之不傳也。魏文帝善彈棋。不復用指。第以手巾角拂之。有客自謂絕藝。及召見。但低首以葛巾角拂之。文帝不能及也。此說今尤不可解矣。大明龍興寺佛殿。有魏宮玉石彈棋局。上有黃初中刻字。政和中取入禁中。

昭德諸晁謂塔爲借債之倩云。近世方訛爲倩盼之倩。予幼小不能叩所出。至今悔之。

紹聖元符之間。有馬從一者。監南京排岸司。適漕使至。隨衆迎謁。漕一見怒甚。即叱之曰。聞汝不職。正欲按汝。何以不亟去。尙敢來見我耶。從一惶恐。自陳湖湘人。迎親竊祿。求哀不已。漕察其語。南音也。乃稍霽威云。湖南亦有司馬氏乎。從一答曰。某姓馬。監排岸司耳。漕乃微笑曰。然則勉力職事可也。初蓋誤認爲溫公族人。故欲害之。自是從一刺謁。但稱監南京排岸而已。傳者皆以爲笑。

蔡太師父準。葬臨平山。爲駝形。術家謂駝負重則行。故作塔於駝峯。而其墓以錢塘江爲水。越之秦望山爲案。可謂雄矣。然富貴既極。一旦喪敗。幾於覆族。至今不能振。俗師之不可信如此。

該聞錄言皮日休陷黃巢。爲翰林學士。巢敗被誅。今唐書取其事。按尹師魯作大理寺丞皮子良墓誌。稱曾祖日休。避廣明之難。徙籍會稽。依錢氏。官太常博士。贈禮部尚書。祖光業。爲吳越丞相。父瓌。爲元帥府判官。三世皆以文雄江東。據此。則日休未嘗陷賊。爲其翰林學士被誅也。光業見吳越備史頗詳。孫仲容在仁廟時。仕亦通顯。乃知小說謬妄。無所不有。師魯文章傳世。且剛直有守。非欺後世者。可信不疑也。故予表而出之。爲襲美雪謗於泉下。

鄒忠公夢微廟賜以筆。作詩記之。未幾疾不起。說者謂筆與畢同音。蓋杜牧夢改名畢之類。唐小說載李紆侍郎罵負販者云。頭錢價奴兵。頭錢猶言一錢也。故都俗語云。千錢精神頭錢賣。亦此意云。

楊朴處士詩云。數箇胡皴徹骨乾。一壺村酒膠牙酸。南楚新聞亦云。一櫟斲根數十皴。盤中猶自有紅鱗。不知皴何物。疑是餅餌之屬。

白樂天寄裴晉公詩云。聞說風情筋力在。只如初破蔡州時。王禹玉送文太師詩云。精神如破貝州時。用白語而加工。信乎善用事也。

茲集向編裨海函中。人爭謂其拾得小碎。如五色線西陽雜俎之類。讀至仁宗飛白。哲宗宸翰。張德遠誅范瓊於建康獄中。都人皆鼓舞。秦會之殺岳飛於臨安獄中。都人皆涕泣。王仲信守父書而不願官秦熿。任元受視母病而不肯就魏公諸則。真足補史之遺。而糾史之謬。寧僅僅杜宇爲謝豹。不律爲綠沈。多識於鳥獸草木之名耶。湖南毛晉識。

家世舊聞

太傅諱軫。字齊卿。性質直。雖在上前。不少改。昔爲館職時。嘗因奏事。極言治亂。舉笏指御榻曰。天下奸雄睥睨此座者多矣。陛下須好作。乃可長保。明日。仁祖以其語告大臣。取陸軫淳直如此。

楚公諱旬。字農師。使虜歸。攜所得貌。至京師。先君言。猶記其狀。如大鼠而極肥臍。甚畏日。偶爲隙光所射。輒死。性能糜肉。一鼎之肉。以貌一爨投之。旋即糜爛。然虜人亦不以此貴之。但謂珍味耳。楚公使虜時。館中有小胡。執事甚謹。亦能善言。因食夾子。以食不盡者與之。拜謝而不食。問其故。曰。將以遺父母。公喜。更多與之。且問識此何物也。曰。人言是石榴。意其言食餽也。又虜人負載隨行物。不用兵夫。但遇道上行者。卽驅役之耳。一日將就馬。一擔夫訴曰。某是燕京進士。不能負擔。公笑爲言而遣之。

祖母楚國鄭夫人。撫視庶子。與己子等。先君與四十二叔父。提舉公諱棠。字元珍。同歲。方懷孕時。祖母作襁褓。二副。付侍者曰。先產者先用之。已而八月。祖母生先君。九月。杜支婆生叔父。相距才二十餘日也。先世以來。虛母皆稱支婆。

楚公言。遼人雖外竊中國禮文。然實安於夷狄之俗。南使過中京。舊例有樂來迎。卽以束帛與之。公以十一月二十日至中京。遼人作樂受帛自若也。明旦。迓使輒止不行。曰。國忌行香。公照案牘。則虜忌正二十日也。因移文問。虜曰。去年昨日作忌。今年今日作忌。何爲不可。蓋利束帛。故徙忌日耳。又西遼送使聞其主喪。而不能作哀也。但以墨滅幘頭之光。行數日。旣除服。則佩服如常矣。獨副使哀洗幘頭。見者大笑。公平生待物以誠。雖於夷狄不變也。因從容與話。使洗之。副使亟謝。

先君諱宰。字元鈞。言青州王沂公所居坊。有榜曰三元文正之坊。又嘗見沂公初登第。報其父書曰。曾今日殿前唱名。遂忝第一。皆先世積德。大人教訓所致。然此亦世間有底事。大人不須過喜。因言楚公登科時。第四人張中。在殿廷喜甚。挈楚公手曰。如何得鄉里知去。楚公不答。及歸。密謂親曰。此殆非遠器也。中爲明州象山縣官。坐私與高麗人朴寅亮偕和詩。停官。終身沈滯。雖一時不幸坐法。亦器宇非遠大也。

宣和末。蔡京病篤。人皆謂必死矣。獨晁叔用冲之謂先君曰。未死也。此老敗壞至此。若使晏然死牖下。備極哀榮。豈復有天道哉。已而果然。

先君言蔡京自少好方士之術。其在錢塘。嘗遇異人。以故所至輒延道人輩。崇寧初。作相。卽爲徽廟言。泰州徐神翁。能知未來事。元祐中。蘇軾知揚州。遣人往求字。神翁大書曰。泄慢墮地獄。禍及七祖。神翁雖方外士。而能疾元祐人。所宜褒顯。其可笑如此。然上頗喜之。羣閹又言。元符中。哲宗嘗遣人密問聖嗣。神翁曰。吉人君子。吉人者。上名也。於是召至都下。上用太宗見陳搏故事。御繚襪。卽便殿。以賓禮接之。又有劉混康者。茅山道士。其師祖朱自英。以傳錄著名。章獻名肅太后臨朝時。嘗召至京師。從受法籙。故混康亦得召。混康頗有識。善劾鬼神。然未嘗行。每日安能敲枷擊鎖。作老獄吏耶。二人者既至。皆物故。上疑其變化仙去。益求其類。初京爲真定帥。道人王老志自言鍾離權弟子。嘗許京必貴極人臣。至是。物色得之。京館之後園。引與見上。老志敢大言。熟視上曰。頗記老臣否。上亦自記。嘗夢游帝所。有仙宮贊拜者。其面目真老志也。恩禮尤渥。車駕游幸。老志輒羽衣導駕。言有非常。輒能知之。未幾老志夜叩京門。告以鍾離公怒我語涉欺誕。行當墮落。公福亦不終矣。明日得疾。力辭歸河朔而死。自是方士自言有異術者相踵。而林靈素最後出。尤爲魁傑。素字靈通叟。本名靈噩。温州人。少嘗事僧爲童子。嗜酒不檢。僧笞辱之。發憤棄去。爲道人。頗知小術。亦時時自寫所爲歌詩遺人。然筆札詞句皆鄙惡。了無可觀。旣得幸。其徒黠者稍潤色之。然靈素本庸夫。每升高座說法。肆爲市井俚談。聞者絕倒。或擇日施符水。爲人治病。車駕間幸其所居。設次臨觀。則陰募京師無賴數十人。曲背爲偃。扶杖爲盲。噤口爲暗。曳足爲跛。旣嚙水扶符。則偃者伸背。盲者捨杖。暗者大呼。跛者疾走。或拜或泣。各言得疾二十年或三十年。一旦都除。歡聲動地。上爲大悅。靈素以爲未足。則又倡言神霄事。謂天有九霄。神霄最尊。上爲神霄帝君。寶玉帝長子。下降世間。而其貳曰青華長生二帝君。實治神霄府事。每齋醮。上必親劄辭表。以禱上帝君。或久無靈響。亦禱焉。好事者或謂青華爲上。長生爲鄆王。蓋過矣。然宮觀設醮。亦或言見上御道家冠服。跨金龍。冉冉自空而降。呼奉祠官及道士與塵。其事故不可知也。惟擲果自空而墜。則往往得之。果皆絕大異常。靈素又自謂己乃神霄計吏。褚慧有兄曰褚嘉卿。位至右極仙。嘉卿今亦生世間。是爲王黼。黼和御製詩有曰。君王猶記褚嘉卿者是也。其他如蔡京則左元仙伯。范致虛則

東臺典籍。王孝迪則西臺詳閱真文史。靈素與王革有隙。則曰革廐吏也。常與帝君馭馬。其他有名者甚衆。是時明節劉后方幸。又曰。后在神霄爲九華玉真安妃。蔡京曲讎詩曰。保和前殿麗秋暉。恩許塵凡到綺闈。曲讎酒闌傳密詔。玉真軒裏見安妃。是也。安妃名在真譜。蓋天之高真。而靈素敢瀆冒如此。又嘗密奏兩靈真裔將誕。蓋明節方就館耳。靈素賜號蕊珠殿侍晨金門羽客。通真達靈先生。上刻玉爲降真召靈之寶。自用之。而錫靈素塗金印。文曰通真達靈之印。班視執政。錫賚至不可計。有弟子姓丁。自言謂之四世孫。上爲下詔。贈爲少保。士大夫無恥者。日萃其門。所荐進皆卽拔擢。又著令。道士居僧上。而道士入僧寺。輒據上席。已而遂冠笄僧尼矣。先是宮中數有物怪。或見一老媪。黃帽黃衫。抱十餘歲兒。紅袍玉帶。乘輿鳴蹕而出。媪兒皆有悲泣容。其將見。必先有聲如雷。宮中爲之雷。去聲。上常手札賜靈素。略曰。元符三年冬。內人自泰陵還。摘皂莢一籠入宮門。籠輒自躍。皂莢皆跳出。是祟物顯行。宜善治之。勿爲髡徒所笑。靈素竭其術。不效。既久。上益厭之。遂放靈素歸故郡。宣和末。病死。靈素之逞。憾釋氏也。每爲金狄亂華。又創圖宮殿爲仙女騎麟鳳之狀。名之曰女真。皆妖言也。

余於放翁逸詩遺文。凡史籍載記及稗官野冊。撫拾幾盡。又訂正南唐書及老學庵筆記附之。意謂放翁小碎。亦無遺珠矣。既簡說郭學海。又得家世舊聞若干則。喜而讀之。真不啻登積書巖者。第其卷末。載蔡京述妖異事獨詳。不解何也。湖南毛晉識。

此
页
空
白

齋居紀事

研每遇磨墨用畢。即以蓋覆之。或謂北方多塵。故須覆。此說殊不然。墨不覆以易乾。乾必屢磨。故墨滯而損筆。又研不免近窗。故昔人用研屏以障日氣。長速乾也。筆用乾亦當滌之。常置一小器水於研旁。加榻。貴筆常潤。又倉卒便可使。亦自省筆。不可不知。

研水必日一換。仍用清泉。塵多處。密覆乃佳。

漆研匣茶奩之屬。勿以冷水洗。水能敗漆。當戒。

畜筆用以椒濃煎湯。以少許拌膩粉。如薄麪。胡故反蘸筆鋒。

藏墨用綿包置奩中。時一出暴。

凡紙必作筒收。每筒不過二十五幅。入箱中。卓頭太高者。先裁令適宜。使動者置面上。則不壓扁。

遼巡麪法。用白麵扞古罕。反作薄麪。鈔中薄熟。頻翻。勿令焦壓。爆乾。杵羅令細。貯之。要用時。旋以冷熟湯調作麪。

厚薄隨意。急用冷水亦可。

每年芒種以前。乘好日色。設牀暴書。令極燥。入廚籠。厚皮紙羃罽。勿通風過小。暑乃開。仍去羃。

筆墨碑畫匣。皆以梓木爲之。匣深其筍。匣內切勿用漆。能致蒸溼。梅月仍以厚紙錮罽乃佳。

照書獨必令羃而短。勿過一尺。羃則耐。短則近。書燈勿用銅盞。惟瓷盞最省油。蜀有夾瓷盞。注水於盞唇竅中。可

省油之半。燈檠法。高七寸。盤闊六寸。受盞圈徑二寸半。擇與圈稱者。

磴草茶法。必先滌濯。令無舊茶氣。風日中曝極燥。擇去茶子小黃葉枝梗。以疎布巾裹建茶一隻。盛茶一隻。盛茶一隻。手撼頓之。

盡徒去白毛。更略見火。乃入磴。少下而急轉。如雪花。片乃佳。仍用始沸湯點湯。老則味澀。

茶須旋磴。正可三五日用。過此。香味皆損。茶遇梅月。須朝暮以慢火焙之。常時亦須三兩日一焙。但切忌熾火。及

有烟火。又忌與香藥同貯。皆當躬自屢省。勿委齋僕。

梭魚。二月以前。取在膚中成塊段者。去枝。祇湯煑令熟。下燭香蔥。蠶油并椒。然後以酢水相半。煑沸。微加鹽醬。機

欄樹皮中子。

園庵中當作月狀。以石灰泥之。傍置瓦整四。菴後作小茅屋三五間繞之。凡菴之茶藥蔬果器用薪炭。及齋僕之廬具焉。亦當簡約。非甚不可已者勿蓄。

烏豆粥。用新好大烏豆一斤。炭火鬻一日。當糜爛。可作三升米粥。至極熟。下豆。入糖一斤和勻。又入細生薑菓子四兩。一法。鬻豆熟後。以熬熟麻油浸之。豆上油深寸半。密覆之。文武火鬻。候霧出豆。卽以匙拌轉。更鬻令泣盡油方止。每鬻成粥一釜。可下豆三四椀。攪勻入糖如前。不用薑菓子。

地黃粥。用地黃二合。候湯沸。與米同下。別用酥二合。蜜一合。炒令香熟。貯器中。候粥欲熟乃下。枸杞粥。用紅熟枸杞子。生細研。淨布捩汁。每粥一椀。用汁一盞。加少煉熟蜜乃鬻。

紫鱒飴。用新烏豆鬻濃汁。澆麵作湯餅。借筍搗汁。芼以葷菜。至佳。

苦筍冷淘。用慢火煨苦筍。候熟。細裂之。以薑油醃醬拌和勻。作冷淘。此蜀名士劉夷叔望之法也。

朝晡食粥飯湯餅之屬。皆當令腹中有餘地。魚肉僅僅可以下飯。按酒則已。多尤爲害。若偶食一物多。則當減一物以乘除之。如湯餅稍多。則減飯。飯稍多。則減肉。要不過此數。食罷。行五七十步。然後解襟褫帶。低枕少臥。此養生最急事也。

孟子離婁篇言。待我以橫逆一節。以爲當自反。最爲要論。然不免有怒心。如此亦妄人及與禽獸奚擇之言是也。要當終自反而已。

拭布當常置陰處。近火則堅燥不可用。若拭酒食。必隨手洗濯令淨。

拄杖唯蘆竹最佳。尋常用作筆管者是也。一節疎。二節勁。三色白。四至輕。五易得。

米元章言。春和手不皴。可自洗研作字。口有精神。墨不自研。筆不自滌。紙不自口。研水不自汲。亦如之。

口口口書作字就食案。洗研就醜口口香。用炊竈躡爐火。點茶用銅鐵口口口口口貧者用石銚沙餅可也。

宋人書以李西臺蔡端明爲第一。至蘇內翰黃太史米南宮。超軼奔放。姿態橫生。尤爲卓絕。南渡後。惟石湖放翁。猶有前輩筆意。下是無足觀矣。放翁家會稽。遺墨多流落人間。此帖宜爲僧石溪所寶。宇文公諒謹題。

右放翁齋居紀事帖稿真迹。內多塗抹。余近得於洞庭陸氏。陸氏得於會稽鬻古書者。欲便觀覽。因錄置几席。嘉靖丙戌蠟月四日。是日雪片如手。興之所至。呵凍作書。殊不覺寒也。中臯子袁髣尙之。在臥雪齋漫志。先君搜袁放翁著作。可謂備矣。但不得老學菴續筆記。以爲欠事。展近讀袁尙之嘉藝錄中。有齋居紀事一焉。從放翁真跡抄出者。并刊附於後。焉未缺字。想係渝敵處。嘉藝錄者尙之手錄其家藏及所見法書名畫題識。都爲一冊。亦朱性甫鐵網珊瑚之流也。但其記本之紙絹。軸之大小橫立。以及若何設色。今昔收藏姓氏。視性甫爲詳密云。汲古後人毛辰識。

中華民國二十五年二月初版

告

陸放翁全集(全二册)

定價國幣四元


(外埠酌加運費匯費)

出版者 國學整理社

發行者 世界書局

印刷者 世界書局

發行所 上海及各省 世界書局



版權所有 不准翻印

仿古字版

白香山詩集

居易諷諭之作。比附風人之義。如新樂府五十首等。尤所自負。詩體平易。流傳最廣。當時禁省觀寺郵侯牆壁之上無不書。王公妾婦牛童馬走之口無不道。而傳寫尤夥。全書長慶集凡二十卷。後集凡十七卷。別集一卷。補遺兩卷。凡香山之詩。無不搜羅殆盡。卷首附白香山年譜一卷。尤屬名貴。


精裝一厚冊 一元二角
(寄費掛號一角三分)

世界書局發行

上海图书馆藏书



A541 212 0023 1797B



160.00

~~1626382~~

